

MAT

Amatie

Azezi-krisi kō-yēlga tɪ

Amatie

gvlse

1

Azezi-krisi yaabdōma yelle

(Aluki 3:23-38)

¹Azezi n de Adavidi* yuŋa, la Abraham* yuŋa yaabdōma n wāna:

²Abraham n dɔge A'izaki,

tɪ A'izaki dɔge Azakɔbi,

tɪ Azakɔbi dɔge Azuda*, la a kēendōma, la a yɪbsɪ.

³Tɪ Azuda la a pɔga Atamaari dɔge Afarestɪ la Azara,

tɪ Afarestɪ dɔge A'esrɔm,

tɪ A'esrɔm dɔge Aram,

⁴tɪ Aram dɔge Aminadabi,

tɪ Aminadabi dɔge Anaasō,

tɪ Anaasō dɔge Asalmō.

⁵Tɪ Asalmō la a pɔga Arahabi dɔge Aboozɪ,

tɪ Aboozɪ la a pɔga Aruti dɔge A'obɛɛdɪ,

tɪ A'obɛɛdɪ dɔge Azese*.

⁶Tɪ Azese dɔge naba Adavidi.

Tɪ Adavidi daan di A'uuri pɔkōore, tɪ ba dɔge Asalomō*.

⁷Tɪ Asalomō dɔge Aroboam,

tı Aroboam dɔge Abiya,

tı Abiya dɔge Aza.

⁸Tı Aza dɔge Azozafatı,

tı Azozafatı dɔge Azoram,

tı Azoram dɔge A'oziası.

⁹Tı A'oziası dɔge Azɔtam,

tı Azɔtam dɔge Akaazı,

tı Akaazı dɔge A'ezekiası.

¹⁰Tı A'ezekiası dɔge Amanase,

tı Amanase dɔge Amō,

tı Amō dɔge Azoziası.

¹¹Tı Azoziası dɔge Azekoniyası la a yıbsı.

Wakat-ēña tı ba yōge İsrayelı* dōma tarı sēñe Babilōnı*.

¹²La ban paage Babilōnı na poorum,

tı Azekoniyası dɔge Asalatıyelı,

tı Asalatıyelı dɔge Azorobabelı.

¹³Tı Azorobabelı dɔge Abiyuudı,

tı Abiyuudı dɔge A'eliakim,

tı A'eliakim dɔge Azɔɔrı.

¹⁴Tı Azɔɔrı dɔge Asadɔkı,

tı Asadɔkı dɔge Akim,

tı Akim dɔge A'eliyuudı.

¹⁵Tı A'eliyuudı dɔge A'eleazaarı,

tı A'eleazaarı dɔge Amatã,

tı Amatã dɔge Azakɔbı.

¹⁶Tı Azakɔbı dɔge Azozefu n de Amaari sıra la.

Amaari ēña n dɔge Azezi* tı ba wi'iri Krisi* la.

¹⁷Lan pī'ilum na Abraham wa paage Adavidi, de la zamãana pia la

anaasi. Lan sēņe la Adavidi wa paage ban yōge lsrayeli dōma sēņe Babilōni na, de la zamāana pia la anaasi. Ban yōge lsrayeli dōma sēņe Babilōni wa paage Krisi la, de la zamāana pia la anaasi.

Azezi-krisi dōka yelle

(Aluki 1:26-38, 2:1-7)

¹⁸Azezi-krisi dōka daan ēņe la wāna: A ma Amaari daan yeti a ele la Azozefu, la ba daan nān ka gā'are la taaba, dee ti a tara puure, la de la Nawēnne* Sia n boti a tara puure la. ¹⁹La Azozefu n daan yeti a di ē na de la nēr-sōņo, a ka boori ti a ēņe ē yānne nērba nifum, a daan tē'ese me ti a base ē sīm. ²⁰La ēn daan tē'esri bela la, ti Zuudāana Nawēnne maleka* wa'am wa puke a mēņa pa'ale ē zāasņo pvam yele ē yeti: < < Azozefu, Adavidi* yuņa, da zoe dabeem, di Amaari ti a dena fu pōga, puure la ti a tari la de la Nawēnne Sia n bō ē. ²¹A wun dōge la budibla, ti fu si a yu'vure ti Azezi*, la de ēņa n wun fāage a nērba la ba tōon-be'ero pvam base. > >

²²Bōn-bāma wuu ēņe me ti Zuudāana Nawēnne n yvun boti a nōtō'osa* la yele se'em na n ēņe. A yvun yeti:

²³< < Bise-ya, pugla n nān ka mi buraaga wun yōke puure dōge budibla,

ti ba wi'ira a yu'vure ti A'emanuweli. > >

A vōore de la Nawēnne boe la ti le.

²⁴Ti Azozefu nēege, ēņe wu Zuudāana maleka la n yele ē se'em na, di a pōga la. ²⁵La a daan ka gā'are la ē, halu ti a wa dōge budibla la, ti a si bia la yu'vure ti Azezi.

2

Bāņrība sēņe ka yē Azezi

¹Ba daan dɔge Azezi la Betelem n boe Zude* so'olum, se'emwēnne ti A'erɔdɪ* de naba la. Tɪ bāŋrɪba ze'ele dapɔa bɔba wa'am Zerizalem*,
²wa soke yetɪ: < <Bia la tɪ ba dɔge la boe la be, sɛka n wun dena Zifdōma* naba la? Tōma yē la a wōrbiire dapɔa bɔba, bela iyā ti tōma wa'am tɪ ti nā'ase ē. > > ³La naba A'erɔdɪ n daan wōm bela la, ēŋa la Zerizalem dōma wuu yem n yɔɔrɪ. ⁴Tɪ A'erɔdɪ daan lagse kāabgɔ* kēma nēŋadōma, la lɔɔ* karēnsāandōma la wuu, soke ba yetɪ: < <Tēn-kāna tɪ ba wun dɔge Krisi* la? > > ⁵Tɪ ba yele ē yetɪ: < <Betelem n boe Zude so'olum na, se'ere n soe la, Nawēnne nōtɔ'ɔsa* la yvun gulse yele la wāna:

⁶< Betelem n de tēn-pɪka,
fɪ ka pɔ'ɔge Zude so'olum tēn-kāra la puam,
se'ere n soe la,
nēra n wun yese fōn puam dena nēŋadāana bisra Israyelɪ* dōma n
de mam nērba la yelle. > > >

⁷La A'erɔdɪ sɔge mɛ wi bāŋrɪba la soke ba bāŋe wēnse'ere ti wōrbiire la yese, ⁸dee tōm ba yetɪ: < <Sēŋe-ya Betelem ka ε soke bāŋe bia la yelle sōŋa sōŋa, la ya sān yē ē, ya leme wa'am wa yele mam tɪ mam mē sēŋe ka nā'ase ē. > > ⁹La ban wōm naba la yetɔga la, ba sēnnɪ mɛ wɛ'esa, dare le yē wōrbiire la tɪ ba daan yē dapɔa bɔba la n tole ba nēŋa, tarɪ ba halɪ ka paage bia la n boe zē'e-seka la ze'ele.

¹⁰La ban daan yē wōrbiire la, ba sūure ēŋe yēlum mɛ halɪ zozo'e.

¹¹Tɪ ba kē yire la puam yē bia la, la a ma Amaari, ka dūma tēŋa bia la nēŋam nā'ase ē, dee lorge ba lɔgrɔ loose ban tarɪ sɛla la bɔ ē. Ba daan de la sālma, la tɪdare, la miiri n tarɪ yūuŋ-yēlga.

¹²Tɪ Nawēnne daan kā'an ba zāasŋɔ puam yetɪ, ba da le doose naba A'erɔdɪ zē'am, bela tɪ ba daan doose sore ayēma lebe kule ba tēŋa.

A'erōdt boortu ti a ku Azezi

¹³Bānrība la n fōrge la, ti Nawēnne maleka* puke a mēṅa pa'ale Azozefu zāasṅo puam, yele ē yeti: < < Isge tartu bia la, la a ma la zoe sēṅe Ezipti* ka bōna bilam halu ti m le wa yele fu se'ere. Se'ere n soe la, naba A'erōdt wun eera bia la me ti a ku. > > ¹⁴Ti Azozefu isge yu'uhṅo tartu bia la, la a ma la sēṅe Ezipti, ¹⁵ka bōna bilam halu ti A'erōdt wa ki. La ēṅe la bela, ti Zuudāana Nawēnne n yun boti a nōtō'osa yele se'em na ēṅe. A yun yeti:

< < Mam wi m Dayva la n boe Ezipti la ti a wa'am. > >

¹⁶La A'erōdt n daan bāṅe ti bānrība la pā'ase ēṅa me na, a sūure n yīige halu, ti a tōm nēba yeti ba sēṅe Betelem, la tēn-seba n boe a kēnkērsi la wuu ka ku budim-seba wuu n mase wu yuma ayi, la seba n ka paage bela la, wu ēṅa n daan soke bānrība la bāṅe se'emwēnne ti wōrbiire la yese la.

¹⁷Bela ti Nawēnne nōtō'osa Azeremi n yun yele se'em na ēṅe. A yun yeti:

¹⁸< < Ba wōm tagursi Rama tēṅa,

kuunṅo la fablṅo zozo'e.

La de la Araselu n kellu a kōma yelle,

ti ba pā'asra ē ti a ka sakra ti a go'oge.

Se'ere n soe la, a kōma la ka le bōna. > >

¹⁹La naba A'erōdt daan wa ki me, ti Zuudāana maleka puke a mēṅa pa'ale Azozefu zāasṅo puam Ezipti, yele ē yeti: ²⁰< < Isge tartu bia la, la a ma la lebe Israyeli tēṅa, se'ere n soe la, seka n daan eeri bia la ti a ku la ki me. > > ²¹Ti Azozefu isge tartu bia la, la a ma la kule Israyeli tēṅa.

²²La a daan wōm me ti Arkelawusi n soṅe a so A'erōdt zē'am di Zude na'am. Ti a daan zoe dabeem ka sēṅe Zude so'olum. Ti

Nawēnne kā'an ē zāasḡo puam, ti a sēḡe Galile so'olum. ²³A daan sēḡe ka kē'era la tēḡa yu'ure n de Nazareti. Bela ti Nawēnne nōtō'osriba la n daan ye le se'em na ēḡe. Ba daan yeti: < < Ba wun wi'ira Krisi la ti Nazareti nēra. > >

3

Azā mōoli Nawēnne yetōga, dee misri nērba ko'om puam

(Amarki 1:1-8, Aluki 3:1-18, Azā 1:19-28)

¹Bela wēnne ti Azā n misri nērba ko'om* puam na, wa sēḡe Zude weem ka mōola ²yeti: < < Teege-ya yem base tōon-be'ero, ti Nawēnne so'olum* lem me. > > ³La de la Azā yelle ti Nawēnne nōtō'osa A'ezayi* daan gulse yeti:

< < Nēra ayila n boe weem mōola ke'enke'em yeti:

< Malge-ya sore sōḡa gu'ura Zuudāana.

Malge-ya sōa la ti ba tō tēntēesi bō ē. > > >

⁴Azā daan ye la fuugo n de yugne kōbrō, dīke sagānne lu a sia. A dia daan de la saniiro la seero. ⁵Ti nērba daan ze'ele Zerizalem, la Zude so'olum wuu, la tēn-sēba n lem kulaaga yu'ure n de Zurdē la wuu sēnna a zē'am, ⁶tōgra ba tōon-be'ero pa'ala ē, ti a misra ba Zurdē ko'om na puam.

⁷La Azā yē la Farisi* dōma, la Saduse* dōma zozo'e n sēm a zē'am ti a mise ba ko'om puam, ti a ye le ba yeti: < < Yāma ān wu kāmpēesi buuri, āne n pa'ale ya ti ya tā wun zoe pōse Nawēnne sibgre n sēm na? ⁸Tōm-ya tōon-sēba n pa'alī ti ya teege yem base tōon-be'ero. ⁹La ya da tē'esra ti Abraham* n de ya yaaba la, ya wun pōse Nawēnne sibgre la me. Mam yeti ya me ti Nawēnne tā wun dīke kuga wā boti ba lebge Abraham yusi me. ¹⁰Nēra n pōn tara lia a nu'usum ti a lube

tusi. Tɪ-sɛka woo n ka wɔnnɪ bie sōma, a wɔn lɔbɛ ẽ mɛ, lobge
bugum puam, tɪ bugum di ẽ.

¹¹Mam misri ya la ko'om puam tɪ la pa'ale tɪ ya teege yem base
tōon-be'ero. La sɛka n boe mam poorum sēna la pãña gãnnɪ mam mɛ.
La mam pōn ka mase tɪ m pirge a tagra. Eɲa n wɔn mise ya Nawēnne
Sia*, la bugum puam*fɪ*. ¹²Ẽɲa wɔn welge nērba wu nēra n zālɪ
pɪ'igɔ a nu'usum tɪ a vaage a si zɛɛɲa yeele, ẽɲɛ a bāare puam dee yō
urgo la, la bugum n ka kīɲri. > >

Azezi ko'om misga

(Amarkɪ 1:9-11, Aluki 3:21-22)

¹³Azezi daan ze'ele la Galile wa'am Zurdē Azā zē'am tɪ a mise ẽ
ko'om puam. ¹⁴Tɪ Azā daan zagse, dee yetɪ: < <La de nɪ na mam n
wɔn wa'am fōn zē'am tɪ fōn mise mam, tɪ fōn sēna mam zē'am? > >
¹⁵Tɪ Azezi lerge ẽ yetɪ: < <Base tɪ la ẽɲɛ bela læle wã, tɪ la de la bela
tɪ tɪ wɔn ẽɲɛ lan mase Nawēnne n boort se'em na wuu. > > Azezi n
yele bela la, tɪ Azā sake ¹⁶mise ẽ, tɪ a dɔɔra. Haya, tɪ saazuum yo'oge,
tɪ a yē Nawēnne Sia n signi a zuo wu na'adawenne. ¹⁷Tɪ kōa ze'ele
Nawēnne yire yetɪ:

< <Ẽna de la mam Dayva
tɪ mam nōɲɛ la m sūure wuu,
a paage la mam yem. > >

4

Asūtāana make Azezi

(Amarkɪ 1:12-13, Aluki 4:1-13)

¹Nawēnne Sia* la daan tari Azezi sēɲɛ la weem tɪ Asūtāana* make

ẽ. ²Azezi daan lu la nõore dabsa pinaasi, wunteɛɛŋa la yu'ɔŋɔ. Tɪ a kɔm dɔnna. ³Tɪ Asũtãana lem ẽ, yeti: < < Fu sãn sɪrɪ dena la Nawẽnne Dayua, fu botɪ kuga wã lebge dia. > > ⁴Tɪ Azezi lerge yeti: < < La gulse Nawẽnne gɔŋɔ puam yeti:

< Nẽrsaala kãn vɔa dia mã'a ãyã,

la de la yetɔg-seba wuu n yesɪ Nawẽnne nõorum ãyã. > > >

⁵Tɪ Asũtãana tarɪ Azezi sɛŋɛ Zerizalem, ka zom Wẽnde-kãte* la zuo ze'ele, ⁶dee yele ẽ yeti: < < Fu sãn dena Nawẽnne Dayua, fu ẽke bisge tɛŋa, se'ere n soe la, la gulse Nawẽnne gɔŋɔ puam yeti:

< Nawẽnne wun botɪ a malekadõma* kɔke fu la ba nu'usi,

ti fu kãn wẽ fu nã'are la kugre. > > >

⁷Tɪ Azezi yele ẽ yeti: < < La ken gulse yeti:

< Da make fu Zuudãana Nawẽnne bise. > > >

⁸Tɪ Asũtãana le tarɪ Azezi zom tãŋa n ba wɔge zuo, ka pa'ale ẽ dũnia so'olum wuu la a na'am pãŋa, ⁹yele ẽ yeti: < < Fu sãn ka dũma tɛŋa nã'ase mam, mam wun bɔ fu bãna wã wuu. > > ¹⁰Tɪ Azezi yele ẽ yeti: < < Sɛŋɛ fɔrge, Asũtãana! La gulse Nawẽnne gɔŋɔ puam yeti:

< Nã'asra Zuudãana Nawẽnne,

dee sakra ɛŋa ayɪla mã'a. > > >

¹¹Tɪ Asũtãana base Azezi dee fɔrge. Tɪ malekadõma wa'am wa sɔŋra ẽ.

Azezi pɔse a tɔoma Galile so'olum

(Amarkɪ 1:14-15, Alukɪ 4:14-15)

¹²Tɪ Azezi wɔm ti ba yɔke Azã yu yu'a deego puam, ti a lebe Galile so'olum. ¹³La a daan base Nazareti tɛŋa, dee sɛŋɛ ka kɛ'era la Kapernaum n lem Galile mɔgre la nõorum, Zabolõ la Neftali so'olum puam, ¹⁴ti Nawẽnne nõtɔ'ɔsa A'ezayi* n yuun yele se'em na ɛŋɛ. A

yvvn yeti:

¹⁵ < < Zabulō la Neftali tēnsi n tōgle ko-kāte boba, Zurdē doone ke
boba,

Galile tēnsi ti bu-zāņsi* boe a puam na,

¹⁶ nēr-sēba n boe lika puam na yē peelem zozo'e.

La nēr-sēba n zī kūm mā'asum puam na,

peelem nēegε me bɔ ba. > >

¹⁷ Bēla wēnne ti Azezi daan pōse mōola yeti: < < Teege-ya yem base
tōon-be'ero, ti Nawēnne so'olum* lem me. > >

Azezi wi zūn-yōgrība ti ba dola ē

(Amarki 1:16-20, Aluki 5:1-11)

¹⁸ Azezi daan eeri la Galile mōgre la nōorum, yē buraasi bayi, Asimō
ti ba wi'iri ti Apyeeri, la a yibga A'andre, ti ba lobri yuka mōgre la
puam, ba daan de la zūn-yōgrība. ¹⁹ Ti Azezi yele ba yeti: < < Dola-ya
mam, ti mam wun base ti ya εera nērba ti ba dola mam wu yāma n
yōgrī zūma se'em na. > > ²⁰ Ti ba base ba yugsi la bilam mēņa, dee
dola ē.

²¹ Ti a sēņε nēņa le yē buraasi bayi n de Azebede kōma, Azaki la a
yibga Azā. Ti bāma, la ba sɔ Azebede bōna ōorņɔ puam malgra ba
yugsi. Ti Azezi wi ba, ²² ti ba base ōorņɔ la, la ba sɔ la totɔ, dee dola
ē.

Azezi zāsni nērba, dee b'ɔra ba ĩmā'asum

(Aluki 6:17-19)

²³ Azezi daan kaari la Galile so'olum wuu zāsna nērba Zifdōma
wēndeto* puam, mōola Nawēnne so'olum kō-yēlga dee boti
bā'adōma, la kobro wuu n boe nērba la puam yēta ĩmā'asum. ²⁴ Ti a

yu'bre daan yese Siiri so'olum wuu, ti ba tara bā'adōma wuu ti bā'asi buuri to'oto'ore tarı ba, nērba iisi n dōnnı ti ba nāmsra, la kulkā'arstı* n dolı seba, la nērba n luti kinki'ire, la kōrnō wa'am a zē'am, ti a botı ba wuu yē ĩmā'asum. ²⁵Tı nēr-kuvuḡo zozo'e ze'ele Galile, la Dekapōlı*, la Zerizalem, la Zude, la tēnsı n boe Zurdē doone ke bōba doose ē.

5

Nēr-seba n tarı Nawēnne yel-sōnne

(Aluki 6:20-23)

¹Tı Azezi yē nēr-kuvuḡo la, zom tāḡa zuo zı'ire. Tı a karēnbiisi la lagse a zē'am. ²Tı a yāḡa zāsum ba yetı:

³< <Nēr-seba n mi ti ba ka mase Nawēnne nēḡam tarı zu-yēlga, se'ere n soe la, Nawēnne so'olum* de la ba bōnō.

⁴Sū-sā'aḡo dōma tarı zu-yēlga, se'ere n soe la, Nawēnne wun botı ba sūure mā'age.

⁵Sū-bugsum dōma tarı zu-yēlga, se'ere n soe la, Nawēnne wun bō ba dūnia ti ba sōna.

⁶Seba n boortı sela n mase Nawēnne yem la ba sūure wuu tarı zu-yēlga,

se'ere n soe la, Nawēnne wun bō ba sela ti ba boortı la ti la seke.

⁷Ninbāal-zōtba tarı zu-yēlga, se'ere n soe la, Nawēnne wun zoe ba ninbāalga.

⁸Pupeelem dōma tarı zu-yēlga, se'ere n soe la, ba wun yē Nawēnne.

⁹Seba n botı sū-mā'asum bōna nērba tēḡasuka tarı zu-yēlga, se'ere n soe la, Nawēnne wun wi'ira ba ti a kōma.

¹⁰Sɛba n itɪ sɛla n mase, tɪ ba nāmsra ba tarɪ zu-yɛlga,
se'ere n soe la, Nawɛnnɛ so'olum de la ba bɔnɔ.

¹¹Yāma sɛba tɪ ba tʊvɪ ya, nāmsra ya, tɔgra ya tɔg-be'ero dee parna
bɔ'ɔra ya, yan dolɪ mam na ɪyā, tarɪ zu-yɛlga. ¹²ɛŋɛ-ya sū-yɛlga
sɪrʊm, ya yɔɔɔ n wun zo'oge Nawɛnnɛ yire* la ɪyā. Ba mɛ daan
nāmse Nawɛnnɛ nɔtɔ'ɔsrɪba n dɛŋɛ yāma la bela. > >

Yaarum, la peelem makre

(Amarkɪ 9:50, Alukɪ 14:34-35)

¹³Azezi daan le yetɪ: < < Wʊ yaarum n botɪ dia zā'asum na, yāma
mɛ mase tɪ ya āna wʊ yaarum dūnia wā puam. La yaarum sān sabge,
bɛm n wun base tɪ a le zā'asum? A lebge la zāŋa, a ka le tara yōorɔ, a
de la ba lobe ɛ base yɛŋa, tɪ nɛrba nɛ ɛ la nāma.

¹⁴Yāma de la dūnia wā peelem. Tɛŋa n boe tāŋa zuo ka tā wun
suge. ¹⁵La ba ka yō'orɪ fitla vugra la pɪ'ɪgɔ, ba wun zoole ɛ na fitla
zoolgo zɛ'a, tɪ a nɛege peelem bɔ'ɔra nɛr-sɛba wuu n boe yire la puam
na. ¹⁶Bɛla, base-ya tɪ ya peelem nɛege nɛrba tɛŋasuka, tɪ ba yɛ ya
tōon-sōma nā'ase ya Sɔ Nawɛnnɛ n boe saazuum. > >

Azezi zāsʊm lɔɔ yelle

¹⁷< < Da tɛ'esɛ-ya tɪ mam wa'am tɪ m sā'am na Nawɛnnɛ lɔɔ*, bu a
nɔtɔ'ɔsrɪba* yetɔga la. Mam ka wa'am tɪ m sā'am ba, mam wa'am tɪ
m pa'alɛ la ba vōore ba'ase, dee ɛŋɛ ban yele se'em na. ¹⁸Mam yetɪ ya
la sɪra sɪra, tɪ saazuum la tɛŋa n wun yuuge se'em, sɛla sɛla kān yese
Nawɛnnɛ lɔɔ la puam baa fɛfɛɛ, halɪ tɪ sɛla woo wa ɛŋɛ ba'ase. ¹⁹Bɛla,
nɛr-sɛka n ka sake Nawɛnnɛ lɔɔ ayɪla, baa a sān āna pɪka gānna wuu,
dee zāsna nɛrba baseba tɪ ba da sake, a wun dena nɛr-pɪka Nawɛnnɛ
so'olum puam. La sɛka n sake Nawɛnnɛ lɔɔ, dee zāsna nɛrba tɪ ba ita
bɛla, a wun dena nɛr-kāte Nawɛnnɛ so'olum puam. ²⁰Mam yetɪ ya la

sura sura, ti ya sãn ka ita Nawēnne n boori se'em na gãna lɔɔ karēnsãandōma, la Farisi* dōma, ya kãn tã'age kē Nawēnne so'olum puam. > >

Azezi zãsum sũ-isgre yelle

(Aluki 12:57-59)

²¹ < < Yãma wõm ti ba daan yeke kurum dōma yeti: < Da ku nēra, la nēra sãn ku nēra, ba di a sariya. > ²² La mam yeti ya ti nēr-sēka woo sũure n isge la a sɔbia, la mase ti ba di a sariya. La sēka n yeke a sɔbia yeti: < Yalma >, la mase ti sariyaditba nēṅadōma di a sariya. La sēka n yeke a sɔbia yeti: < Fu ka tari vōore >, ēṅa dāana mase me ti a kē bug-tēṅa*. ²³ Bela, fu sãn tari fu bɔ'a wa'am kãabgɔ bĩmbĩnne zē'a ti fu bɔ Nawēnne, sãn tēege ti fõn tari la yelle la fu sɔbia, ²⁴ fu base fu bɔ'a la kãabgɔ bĩmbĩnne la nēṅam, dee dēṅe sēṅe ka malge fu yelle la, la fu sɔbia la, dee yãṅa leme wa'am wa dıke fu bɔ'a la bɔ Nawēnne.

²⁵ Fu sãn tara yelle la nēra, ti a tara fu we'esa sariyadia zē'am, malge fu yelle la tɔtɔ, yãma n nãn boe sore la, ti a da dıke fu bɔ sariyadita, ti a tɔge fu yetɔga la dıke fu bɔ gu'ura, ti a kē'esε fu yu'a deem. ²⁶ Mam yeti fu la asura, ti fu kãn yē sore yese yu'a deem na, halı ti fu wun wa yɔ fu sãnne na wuu ba'ase. > >

Azezi zãsum yalstı yelle

²⁷ < < Yãma wõm ti ba daan yeti: < Da gã'are la fu tadãana pɔga. > ²⁸ La mam yeti ya ti, sēka n buse pɔka ti a yem bɔɔra ē, a põn gã'are la ē me a sũure puam. ²⁹ Fu zvugɔ nifo sãn yeti a boti fu base Nawēnne sore, fu kirge ē lobe base zãazãare, se'ere n soe la, fu iyã sela ayıla sãn ka bɔna mĩ sõi ba wun lobe fu iyã wuu bug-tēṅa*. ³⁰ La fu zvugɔ nu'ugo sãn yeti a boti fu base Nawēnne sore, fu wike ē lobe base

zãazãare, se'ere n soe la, fu ñyã sela ayula sãn ka bõna mĩ sõi ban wun lobe fu ñyã wuu bug-tēja. > >

Azezi zãsum pɔka lebsgo yelle

(Amatie 19:9, Amarku 10:11-12, Aluki 16:18)

³¹ < < Ba yuun yeti: < Nër-seka n lebse a pɔga, a bɔ ẽ gõŋɔ n pa'ale ti a lebse ẽ me. > ³² La mam yeti ya me ti, nër-seka woo n lebse a pɔga, ti la sãn dagna ti a gã la buraasi, a wun boti pɔka la sã'am me, a sãn ele sira ayẽma. La nër-seka n di pɔg-seka ti ba lebse la, ẽŋe la be'em wu nẽra n gã'are la a tadãana pɔga. > >

Azezi zãsum pɔre yelle

³³ < < Ya ken wõm ti ba yuun yele kurum dõma yeti: < Da viige ya pɔre. Fu sãn bĩŋe nõore pɔi ti fu ẽŋe sela bɔ Zuudãana Nawẽnne, dẽni ti fu ẽŋe bela. > ³⁴ La mam yeti ya ti, ya põn da pɔi. Da pɔi saazuum, bẽm ñyã, a de la Nawẽnne na'am bĩmbĩnne. ³⁵ Da pɔi tēja, bẽm ñyã, a de la a nãma dɔglɔ zẽ'a. Da pɔi Zerizalem, bẽm ñyã, a de la Nawẽnne n de na-kãte la tēja. ³⁶ Da pɔi fu zuugo, bẽm ñyã, fu ka tã wun base ti fu zomto baa ayula lebge pɛelga bu sabga. ³⁷ Base-ya ti ya < ẽe > dena < ẽe >, ti ya < ayeti > dena < ayeti >. La sãn gãŋe bela, sela n pa'ase la de la be'em dãana bõnɔ. > >

Da lebse be'em be'em ñyã

(Aluki 6:29-30)

³⁸ < < Ya wõm ti ba daan yeti: < Nẽra sãn pusge a tadãana nifo, ba mẽ pusge a nifo, nẽra sãn vike a tadãana yẽnne, ba mẽ vike a yẽnne. > ³⁹ La mam yeti ya me ti, nẽra sãn ẽŋe ya be'em, ya da ẽŋe be'em lebse. La nẽra sãn wẽ fu zuugo pɛka, fu base ti a wẽ fu gɔbga pɛka pa'ase. ⁴⁰ La nẽra sãn sãm fɔ ti a to'oge fu fu-pika, fu base ti a

to'oge fu fu-kāte pa'ase. ⁴¹La nēra sān pēge fɔ ti fu kɔlge ē kilomētri ayula, fu kɔlge ē kilomētri bayi. ⁴²Nēra sān sose fu sɛla, fu bɔ ē. La nēra sān bɔɔra ti a peje sɛla fu zē'am, da mōje ē. > >

Nōje-ya ya be'eba

(Aluki 6:27-28, 32-36)

⁴³< < Ya wōm ti ba daan yeti: < Fu nōje fu tadāana, dee sise fu be. > ⁴⁴La mam yeti ya me ti, ya nōje ya be'eba, dee pu'usra Nawēnne bɔ'ɔra seba n nāmsri ya la. ⁴⁵Ya sān ēje bela, ya wun dena ya Sɔ Nawēnne n boe saazuum na kɔma, se'ere n soe la, ēja n boti wuntɛɛja yēkra bɔ'ɔra nēr-sōma la nēr-be'ero, dee boti saaga niira bɔ'ɔra seba ɔrgɔ n mase, la seba ɔrgɔ n ka mase. ⁴⁶Yāma sān nōje seba n nōje ya la mā'a, bēm yɔɔɔɔ ti ya wun yē Nawēnne zē'am? Lampo-to'ɔsrɪba* mē iti la bela. ⁴⁷La yāma sān pu'usra la ya sobiisi mā'a, bēm ti yāma iti gānna ya taaba la? Nēr-seba n ka doli Nawēnne na mē iti la bela. ⁴⁸Bela, dena-ya nērba ti ya ɔrgɔ wuu wun mase, wu ya Sɔ Nawēnne n boe saazuum ɔrgɔ wuu n mase se'em na. > >

6

Azezi zāsɔm nērba sōje, la Nawēnne pu'usgo, la nōorlva yelle

(Aluki 11:2-4)

¹< < Guuse-ya, da ita-ya ɪ-sōma nērba nējam ti ba yēta ya. Ya sān ita bela, ya kān to'oge yɔɔɔɔ ya Sɔ Nawēnne n boe saazuum zē'am.

²Bela, fu sān yeti fu sōje nasa, da kān mōole nērba zē'am wu pulibsum dōma n iti se'em ba wēndeto puam, la sorɔɔɔɔ zuto ti nērba pēge ba la. Mam yeti ya la sɪra, ti bāma pōn to'oge ba yɔɔɔɔ me. ³Fu sān yeti fu sōje nasdōma, da base ti fu gɔbga nu'ugo bāje fu zuugo

nu'ugo n uti sela. ⁴Bela nēra nēra kãn bãnje ti fu sōnje nasdōma, la fu Sɔ Nawēnne n yē fōn sugε ēnje la, a wun lebse fo.

⁵Ya sãn pu'usra Nawēnne, da ita-ya wu pulibsum dōma n uti se'em na, bāma nōnje la ba ze ba wēndeto puam, la sorɔ-puursi zuto pu'usra Nawēnne ti nērba yēta ba. Mam yeti ya la sɔra, ti ba pōn to'oge ba yɔɔɔ mε. ⁶Fu sãn yeti fu pu'use Nawēnne, fu kē fu deem yu kulija pu'use fu Sɔ Nawēnne n boe zē'a n sugε la. La fu Sɔ la n yē ti fu sugε mε pu'use la, a wun yɔ fo.

⁷Ya sãn pu'usra Nawēnne, ya da tɔgra yetɔga n ka tarɪ vōore kaana wu nēr-seba n ka mi Nawēnne n uti se'em na, ba tē'ese ti bāma n tɔgrɪ zɔ'ɔra la iyā, Nawēnne wun lerge bāma pu'usgɔ mε. ⁸Bela, da āna-ya wu bāma n ān se'em na, se'ere n soe la, lan dēnje ya wun sose ya Sɔ Nawēnne, a pōn mina yāma n boort sela mε. ⁹Bela, pu'usra-ya wāna:

< Tōma Sɔ Nawēnne n boe saazuum,
boti fu yu'bre yēta pēka,

¹⁰wa'am wa di na'am nērba tējasuka,
boti fōn boort se'em ēnje tēja zuo,
wu lan uti fōn yire se'em na.

¹¹Bɔ tɔ ti zina dia.

¹²Base ti tōon-be'ero taale,
wu tōma n mē base seba n ēnje tōma be'em taale se'em na.

¹³Da base ti yelle paage tɔ ti ti lui.

Fāage tɔ be'em dāana nu'usum base.

((Ti fōn soe so'olum, la pānja, la nā'asgɔ wakate n ka ba'asri.

Amina!)) >

¹⁴Ya sãn base nēr-seba n ēnje ya be'em na taale, ya Sɔ Nawēnne mē wun base ya tōon-be'ero taale. ¹⁵La ya sãn ka base nēr-seba n ēnje ya be'em na taale, ya Sɔ Nawēnne mē kãn base ya taale.

¹⁶Ya sãn lu nõore, da zũje-ya nẽja wu pulibsum dõma n zũri ba nẽnsi se'em, ti ba pa'ale nẽrba ti bãma lu la nõore la. Mam yeti ya la asira, ti ba põn to'oge ba yɔɔɔ mɛ. ¹⁷Fu sãn lu nõore, wire fu nẽja dee sãase fu zuugo, ¹⁸ti nẽrba da bãje ti fu lu la nõore. La fu So Nawẽnne n boe zẽ'a n sugɛ la wun bãje. La fu So la n yẽ fõn sugɛ lu nõore la, a wun yɔ fɔ. > >

Azezi zãsum Nawẽnne yire bõntarsõm yelle

(Aluki 12:33-34, 11:34-36, 16:13, 12:22-31)

¹⁹< < Da lagsri-ya bõntarsõm bĩra dũnia wã zuo, zẽ'e-seka ti bõn-mõgla la tẽjanzẽem wun sã'am ba, ti nayigba mẽ kẽ'era zũura.

²⁰Lagsra-ya bõntarsõm bĩra Nawẽnne yire, bilam ti mõka la tẽjanzẽem kãn sã'am ba, ti nayigba mẽ kãn kẽ zũ. ²¹Se'ere n soe la, ya bõntarsõm n boe zẽ'a na, ya putẽ'era mẽ boe la bilam.

²²Nini n nẽeri peelem bɔ'ɔra iyã wu fitla la. Bela, fu nini sãn ãna sõja, fu iyã wuu tari peelem mɛ. ²³La fu nini sãn ka ãna sõja, fu iyã wuu boe la lika puam. Peelem seka n wun nẽege fu puam na sãn dena lika, la de la lika mẽja mẽja.

²⁴Nẽra ka boe n tã wun sake zuudãandõma bayi, a wun sise ayila mɛ, dee nõje ayila, bu a wun nanna ayila la mɛ, dee pɔ'ɔra ayila la. Bela, yãma ka tã wun sake Nawẽnne n de ya Zuudãana, dee boti bõntarsõm mẽ dena ya zuudãana.

²⁵Bela n soe ti mam yeke ya yeti, ya da fabla ya vɔm yelle, yãma n wun di sela, ((bu ya wun yũ sela,)) la ya da fabla ya iyã yelle, ya wun ye sela. Vɔm ka gãnni dia? Bu iyã ka gãnni futo? ²⁶Bise-ya bõn-ẽgla, ba ka buti, ba mẽ ka lagsri bõnkɔla ita bã puam. La ya So Nawẽnne bɔ'ɔri ba dia mɛ. Yãma ka tari yõoro gãna bõn-ẽgla halı zozo'e?

²⁷~Ane n boe yãma puam n tã wun pa'ase a vɔm woglum fẽfẽ ãn fabli

la ñyã?

²⁸La bēm ti ya fabla futo yelle? Bise-ya mō-puuro n ãn sōŋa se'em, ba ka tōnni, ba mē ka wugri futo. ²⁹La mam yeti ya mē ti, baa naba Asalomō* na'am n yvun tari pãŋa la, a yvun ka tã'age ye fuugo n ãn sōŋa wu mō-puugo ayula. ³⁰La Nawēnne sãn boti mōoro n boe zina dee ti ba wun yō ba bugum beere ãna sōŋa bela, a kãn bise yãma yelle gãna bela? Bēm ti yãma ka bɔ Nawēnne sira zo'oge? ³¹Da fabla-ya yeti ti: <Bēm ti wun di? > bu <ti wun yū la bēm? > bu <ti wun ye la bēm? > ³²La de la nēr-seba n ka mi Nawēnne n eeri bōn-bãma wuu. La yãma Sɔ Nawēnne mi ti yãma boori bōn-bãma wuu mē. ³³Dēŋe-ya ε Nawēnne so'olum*, la sela n mase Nawēnne zē'am, ti a wun bɔ ya bōn-bãma wuu pa'ase. ³⁴Da fabla-ya beere yelle, ti beere ya wun bãŋe ya wun ēŋe se'em, daare woo n bisri a mēŋa yelle. > >

7

Da zerga-ya taaba

(Aluki 6:37-38, 41-42)

¹< <Da zerga-ya taaba, ti Nawēnne mē da zerge ya. ²Se'ere n soe la, yan wun zerge nērba se'em na, Nawēnne mē wun zerge ya la bela. La sela ti ya dıke make bɔ nērba la, ēŋa ti Nawēnne wun dıke make bɔ ya. ³Bēm ti fu bisra sɔkɔ n boe fu sɔbia nifum, dee ka bisra dɔɔɔ n boe fu mēŋa nifum na? ⁴Fōn ēŋe la wãne yeti fu sɔbia yeti, a base ti fu yese sɔkɔ a nifum, dee ti dɔɔɔ bɔna fōn mēŋa nifum? ⁵Pulibsum dãana, dēŋe yese dɔɔɔ la fu mēŋa nifum, dee yãŋa tã'age yē sōŋa yese sɔkɔ la n boe fu sɔbia nifum na.

⁶Da dıke-ya Nawēnne bōn-sōma bɔ baasi, la ya da dıke sela n tari

yōorɔ zozo'e lobge kurkurdōma nējam, ti ba wun nē ba me la ba nāma, dee ti baasi la wērgε dōn ya zōrzōrum. > >

Azezi zāsum pu'usgɔ yelle

(Aluki 11:9-13, 6:31)

⁷< < Sose-ya Nawēnne, ti a wun bɔ ya. E-ya, ti ya wun yē. Wē-ya kulɪɲa, ti a wun yo'oge bɔ ya. ⁸Se'ere n soe la, nēr-seka woo n sosru Nawēnne, a wun bɔ ē. La nēr-seka woo n eerɪ, wun yē. La nēr-seka n wē'eri kulɪɲa, ba wun yo'oge bɔ ē. ⁹Āne n boe yāma puam ti a bia wun sose ē borborɪ, ti a bɔ ē kugre? ¹⁰Bu a sān sose zūfo, ti a bɔ ē bōnsela? ¹¹Yāma nērsaalba n de tōon-be'ero dōma la sān mina ti ya bɔ ya kɔma bōn-sōma, ya Sɔ Nawēnne n boe saazuum kān bɔ yāma seba n sosru ē na bōn-sōma n gānnɪ bela?

¹²Yāma n boori ti nērba ita se'em bɔ'ɔra ya la, yāma mē ita bela bɔ'ɔra ba. Ena de la Nawēnne lɔɔ*, la a nōtɔ'ɔsrɪba* n gulse se'em n bela. > >

Sorɔɔrɔ bayi yelle

(Aluki 13:24)

¹³< < Doose-ya zanōre n ān mika kē, se'ere n soe la, zanō-yalɲa, la so-kāte la we'estɪ la sǎ'aɲɔ zē'am, la nērba zozo'e doli la bilam. ¹⁴La zanō-mika, la so-bāalga we'estɪ la vɔm zē'am. La de la nērba fēe n doli ē. > >

Tɪa woo la a bie

(Aluki 6:43-44)

¹⁵< < Guuse ya mēɲa la nēr-seba n parɪ ti bāma de la Nawēnne nōtɔ'ɔsrɪba la. Ba wun ēɲe ba mēɲa wu saasaadōma n dɪke piisi gāna fure ba mēɲa wa'am ya zē'am wu ba de la piisi la, dee ti ba puam ba

sā'ana wu saasaadōma la. ¹⁶Ba tōoma puam ti ya wun bāņe ba. Bēm īyā, zāaņa ka tā wun wōm tā'ama, la kēkō ka tā wun wōm kēnkāma. ¹⁷Ti-sōņo woo wōnni na bie sōma, la ti-be'ego woo wōnni na bie be'ero. ¹⁸Ti-sōņo ka tā wun wōm bie be'ero, la ti-be'ego mē ka tā wun wōm bie sōma. ¹⁹Ti-seka woo n ka wōnni bie sōma, ba wun lube ē me yō la bugum. ²⁰Bela, la de la nērba la tōoma puam ti yāma wun bāņe ban de nēr-seba. > >

Nēr-seba n sakri Nawēne asira sira

(Aluki 13:25-27)

²¹Azezi daan le yele yeti: < <Dagi nēr-seka woo n wi'iri mam ti <Zuudāana, Zuudāana> la n wun kē Nawēne so'olum* puam. La de la nēr-seka n iti mam So Nawēne n boe saazuum n boori se'em na n wun kē.

²²Sariyadia daare, nērba zozo'e wun yele mam yeti: <Zuudāana, Zuudāana, tōma daan dūke la fōn yu'vre to'oge Nawēne yetoga tōge bō nērba. La fōn yu'vre ti tōma daan dūke dige kulkā'arsi, dee daan tōm tōon-yālma zozo'e la fōn yu'vre.> ²³La mam wun yele ba yeti: <Mam pōn ka mina ya, sēņe-ya fōrge, tōon-be'ero dōma wā.> > >

Deto bayi mēa makre

(Aluki 6:47-49)

²⁴< <Nēr-seka woo n wōm mam yetoga wā, dee ēņe wu yetoga la n yele se'em na, a dāana ān wu yem dāana n mē a yire tāmpīa zuo. ²⁵Ti saaga ni, ti ko'om pūre kulsi zoe wē ē, ti kusebgo vuge wē ē, ti a ka lui, se'ere n soe la, a mē la tāmpīa zuo.

²⁶La nēr-seka woo n wōm mam yetoga wā, dee ka sake ita yetoga la n yele se'em na, a ān wu yalma n mē a yire tēntōnbīlīsgo zuo. ²⁷Ti

saaga ni, ti ko'om pure kulst zoe wē ē, ti kusebgo vuge wē ē, ti a wuu lui saam saam. > >

²⁸La Azezi n tōge yetōga la ki'ulum na, zāsṅo la di'ige nērba la zozo'e me. ²⁹Se'ere n soe la, a zāsṅo la tari la pāṅa, la ka ān wu ba loo* karēnsāandōma n zāsni se'em na.

8

Azezi boti kōnkonne yē ĩmā'asum

(Amarki 1:40-45, Aluki 5:12-16)

¹Azezi daan ze'ele la tāṅa la zuo sige, ti nēr-kuvṅo zozo'e dola ē. ²Ti kōnkonne* wa'am a zē'am wa ka dūma tēṅa a nēṅam yele ē yeti: < <Zuudāana, fu sān bōra, fu tā wun base ti m yē ĩmā'asum me le āna sōṅa. > > ³Ti Azezi tēge a nu'ugo kalum ē, dee yeti: < <Mam bōra, yē ĩmā'asum le āna sōṅa. > > Bilam mēṅa ti kōnkōm na base ē, ti a le āna sōṅa. ⁴Ti Azezi yele ē yeti: < <Da yele nēra nēra. La sēṅe Nawēne kāabgo* kēema zē'am ka pa'ale ē fo mēṅa ti a bise, dee bo bōn-seba ti Amoyisi* yuun gulse yeti ba bo la, ti la pa'ale ba ti fu suri yē ĩmā'asum. > >

Azezi boti suda-ke'ema tōntōnna yē ĩmā'asum

(Aluki 7:1-10)

⁵Azezi daan sēṅe ka paage kē'era la Kapernaum tēṅa puam, ti Rom* dōma suda-ke'ema wa'am a zē'am wa sose ē ⁶yeti: < <Zuudāana, mam tōntōnna n bē'eri kōrōm gā yire, a ba nāmsra me zozo'e. > > ⁷Ti Azezi yele ē yeti: < <Mam wun wa'am wa boti a yē ĩmā'asum. > > ⁸Ti suda-ke'ema la lebse yele ē yeti: < <Mam ka nari ti fōn wa'am mam yire. Wen tōge yetōga mā'a, ti mam tōntōnna la

wun yē ĩmā'asum. ⁹Se'ere n soe la, nērba n soe mam, la mam mē soe la sudaasi baseba. Mam sãn yelee suda-seka yeti: < Sēŋe >, a we'esti mē. La mam sãn yelee ayēma yeti: < Wa'am >, a sēm mē. Mam sãn yelee m tōntōnna yeti: < Eŋe wāna >, a uti mē. > > ¹⁰Azezi n wōm bela la, la di'ige ē mē. Tı a yelee nēr-seba n doli ē na yeti: < < Mam yeti ya la asira, tı mam nãn ka yē nēra n bɔ mam sira wu bura-ēna wā, baa lsrayeli* buuri la puam mam ka yē. ¹¹Mam yeti ya tı, nērba zozo'e wun ze'ele zanō-bɔba, la dapɔ-bɔba wa'am wa zı'ire la Abraham*, la A'izaki, la Azakɔbi di Nawēnne so'olum puam. ¹²La ba wun lobge lsrayeli dōma n wun soe nı Nawēnne so'olum na base la yēŋa lika puam, bilam ba wun kaasra, dee dıke ba nu'usi gu nōorum. > >

¹³A yelee bela, dee yelee suda-ke'ema la yeti: < < Kule, tı la wun ēŋe wu fōn bɔ mam sira se'em na. > > La wakat-ēŋa mēŋa tı a tōntōnna la yē ĩmā'asum.

Azezi botı nērba zozo'e yē ĩmā'asum

(Amarkı 1:29-34, Aluki 4:38-41)

¹⁴Bela poorum, Azezi sēŋe la Apıyeeri yire ka yē Apıyeeri dēem-pɔka n bē'eri gā, tı a ĩyā tulge. ¹⁵Tı Azezi kalum pɔka la nu'ugo, tı bā'aga la base ē. Tı a isge ēŋe Azezi sāane. ¹⁶Tı zaanōore paage, tı ba tari nērba zozo'e tı kulkā'arsi* tari ba wa'am Azezi zē'am. Tı a tɔge yetɔga dige kulkā'arsi la, dee botı seba wuu n de bā'adōma yē ĩmā'asum. ¹⁷La de la bela tı Nawēnne nōtɔ'ɔsa A'ezayi* n yuun yelee se'em na ēŋe. A yuun yeti: < < Eŋa n to'oge tōma tooro, la tı bā'asi base. > >

Azezi doosgo yelle

(Aluki 9:57-62)

¹⁸Azezi n yē nēr-kvṃṃṃ n kaage ē na, tɪ a yeke a karēnbiisi la yeti: < < Tɪ dooge-ya mōgrɛ la doone ke bɔba. > > ¹⁹Tɪ lɔɔ* karēnsāama ayɪla wa'am a zē'am wa yeke ē yeti: < < Karēnsāama, mam won dɔla fu sēna zē'e-seba wuu tɪ fu won sēna. > > ²⁰Tɪ Azezi yeke ē yeti: < < Puna tari yogro mɛ, tɪ niinto tara tvgrɔ, la Nērsaala Dayva*f2* la ka tari zē'a won gā'are vo'ose. > > ²¹Tɪ a karēnbɪa ayɪla yeke ē yeti: < < Zuudāana, base tɪ m dēṃɛ sēṃɛ ka laage m sɔ dee wa'am wa dɔla fu. > > ²²Tɪ Azezi yeke ē yeti: < < Dɔla mam dee base seba n ka tari vɔm Nawēnne zē'am tɪ ba laage ba kūm. > >

Azezi botɪ kusebgo yōke

(Amarkɪ 4:35-41, Alukɪ 8:22-25)

²³Azezi daan kē la ṓorṃṃ, tɪ a karēnbiisi la doose ē. ²⁴Tɪ kuseb-kāte wa'am wa vugra mōgrɛ la zuo. Tɪ ko-mī'isi botɪ ṓorṃṃ la zɪgra la a mise. La Azezi daan gīsri mɛ. ²⁵Tɪ a karēnbiisi la paage nēege ē yeti: < < Zuudāana, fāage tɔ, tōma yeti ki mɛ. > > ²⁶Tɪ Azezi yeke ba yeti: < < Bēm tɪ ya zɔta dabeem, ya ka bɔ mam sɪra zo'oge. > > Azezi yeke bɛla, dee isge tāse kusebgo, la ko'om na mɛ, tɪ ba āna sīm. ²⁷Tɪ ba wuu palēṃa ēke, tɪ ba yeti: < < Bēm nēra n de ēna tɪ kusebgo, la ko'om sakra a nōore? > >

Kulkā'arsɪ n dolɪ buraasɪ bayi, tɪ Azezi dige ba

(Amarkɪ 5:1-20, Alukɪ 8:26-39)

²⁸Ba daan dooge mōgrɛ la doone ke bɔba paage la Gadara dōma tēṃa pvam, tɪ buraasɪ bayi tɪ kulkā'arsɪ* dolɪ ba ze'ele yɔɔɔ zē'a sēna tv'usra ē. Ba daan de la zɔl-wēensɪ, tɪ nērba zɔta ka sakra dɔla bilam tɔlla. ²⁹Tɪ ba kaasra tagursɪ yeti: < < Nawēnne Dayva, bēm boe tōma la fōn tēṃasvka? Fōn wa'am tɪ fu nāmse tōma mɛ dee tɪ wakate

la nān ka paage? > > ³⁰La kurkurdōma n daan zo'oge lem bilam obra. ³¹Ti kulkā'arsı la sose Azezi yetı: < <Fu sān yetı fu dige to ti ti yese, fu base ti ti sēņe ka kē kurkurdōma la. > > ³²Ti Azezi yele ba yetı: < <Sēņe-ya. > > Ti ba yese sēņe ka kē kurkurdōma la. Ti kurkurdōma la ze'ele tāja zuo zoe sige ka lui mōgre la puam ki. ³³Ti seba n gu'uri kurkurdōma la zoe sēņe tēja puam ka yele lan ēņe se'em na wuu, la bōn-seka n ēņe seba ti kulkā'arsı la daan dolı la. ³⁴Ti tēja la dōma wuu yese tu'usra Azezi, la ban yē ē na, ba sose ē yetı, a fōrgē dee base ba tēja.

9

Azezi botı kōrņo yē ĩmā'asum

(Amarkı 2:1-12, Aluki 5:17-26)

¹Azezi daan kē ōorņo lebe dooge la mōgre la ke bōba kule Kapernaum, ēn kē'eri zē'a la. ²Ti nērba baseba ze buraa ayıla n de kōrņo n gā a bōn-gā'ala puam wa'am a zē'am. Ti Azezi yē ban bō ē sira la, yele kōrņo la yetı: < <M bia, keņe fu sūure, fu tōon-be'ero taale ka le bōna fu zuo. > >

³Ti lōw* karēnsāandōma baseba tē'esra ba sūure puam yetı: < <Bura-ēna pō'orı la Nawēnnε. > > ⁴La Azezi mi ban tē'esrı se'em na me, ti a yele ba yetı: < <Bēm ti yāma tē'esra putē'e-be'ero ya sūure puam? ⁵Bēm n de nāana gānna? Mam sān yele buraa la yetı, a tōon-be'ero taale ka le bōna a zuo, bu mam sān yele ē yetı, a isge sēnna n de nāana gānna? ⁶Mam wun botı ya bāņe ti Nērsaala Dayva*f3* tarı nōore dūnia zuo wun base tōon-be'ero taale. > > Azezi yele bela, dee yele kōrņo la yetı: < <Isge, dıke fu bōn-gā'ala la kule. > > ⁷Ti a isge kule. ⁸Ti nēr-kuorņo la yē bela, ti dabeem yōke

ba, ti ba nã'asra Nawënne ên bɔ nërtaalba nōor-ēŋa la ïyã.

Azezi wi Amatie ti a dɔla ẽ

(Amarki 2:13-17, Aluki 5:27-32)

⁹Azezi daan ze'ele la bilam sēnna tɔlla, yẽ bura a yu'vɔrɛ n de Amatie*f4* n zĩ tɔ'ɔsra lampo. Tɪ a ye le ẽ yetu: < < Isge dɔla mam. > > Tɪ Amatie isge dɔla ẽ. ¹⁰Tɪ Azezi sēŋɛ ka zēa Amatie yire dita, ti lampo-tɔ'ɔsrɪba, la tōon-be'ero dōma zozo'e wa'am wa lagum na Azezi la a karēnbiisi la zēa dita. ¹¹Tɪ Farisi* dōma yẽ bela, soke a karēnbiisi la yetu: < < Bēm ti yāma karēsāama la lagum na lampo-tɔ'ɔsrɪba*, la tōon-be'ero dōma dita. > > ¹²Tɪ Azezi wōm bela, ye le ba yetu: < < Seba n tarɪ ïmã'asum ka eerɪ tɪba, la de bā'adōma n eerɪ tɪba. ¹³Sēŋɛ-ya ka zāsum Nawënne gōŋɔ n ye le se'em na vōore, Nawënne yetu: < Mam boorɪ ti nërtaalba zɔta la taaba ninbāalga, dee dagɪ ti ba dɪkɛ ba bōnɔ kāabra bɔ'vra mam. > Bela, mam ka wa'am ti m wi seba dōma n yetu bāma mase mɛ na, mam wa'am na tōon-be'ero dōma ïyã. > >

Ba soke Azezi nōorɪva yelle

(Amarki 2:18-22, Aluki 5:33-39)

¹⁴Tɪ Azã*f5* karēnbiisi wa'am Azezi zē'am wa soke ẽ yetu: < < Bēm ti tōma la Farisi dōma lɔta nōore, dee ti fōn karēnbiisi la ka lɔta? > > ¹⁵Tɪ Azezi ye le ba yetu: < < Nēra sãn di pɔka ēŋɛ kibsa wi a tadāandōma ti ba wa'am naage la ẽ dita, ba tã wun ēŋɛ sũ-sã'aŋɔ wakat-seka ti pɔgdita la ken bɔna la ba le mɛ bu? Ayɛɪ. La dabsa sēm mɛ, ti ba wun yese pɔgdita la ba zē'am. Bela ti ba yāŋa wun lu nōore. ¹⁶Nēra kãn dɪkɛ tãn-paalga lige fu-kɛka. A sãn ēŋɛ bela, tãn-paalga la wun botɪ fu-kɛka la āage mɛ gāŋɛ bela.

¹⁷La nēra kǎn dıke dā-paalga sūm wǎ-kegsı puam. A sǎn ēnje bela, dā-paalga la sǎn kella, ba wun botı wǎsı la tǎse me, tı dāam na ka'age, tı wǎsı la mē sǎ'am. La mase tı ba dıke dā-paalga sūm na wǎ-paalsı puam, bela tı ba wuu kǎn sǎ'am. > >

Pǎka n yē ĩmǎ'asum, la pugla vo'ore yelle

(Amarkı 5:21-43, Aluki 8:40-56)

¹⁸Azezi n ken tǎgra la ba bela la, tı Zıfdǎma nējadǎana ayıla wa'am a zē'am, wa ka dūma tēnja a nējam yeleye yetı: < < Mam pǎyua n ki lēele wǎ, wa'am wa dıke fu nu'ugo pagle a zuo, tı a vo'oge. > > ¹⁹Tı Azezi la a karēnbiisi la daan isge dǎla ē we'esa.

²⁰Ban daan we'esı la, tı pǎka ayıla n luti sıkēnja yuuma pia la ayı tı la ka gǎ'ora, wa'am Azezi poorum wa kalum a fuugo nǎore. ²¹Se'ere n soe la, a daan tē'esrı a sūurum yetı: < < Mam sǎn kalum a fuugo mǎ'a, mam wun yē ĩmǎ'asum. > > ²²Tı Azezi gelge yē ē, yeleye ē yetı: < < M bia, keje fu sūure! Fǎn bǎ mam sıra la n base tı fu yē ĩmǎ'asum. > > Tı pǎka la yē ĩmǎ'asum bilam mēnja.

²³Tı Azezi paage Zıfdǎma nējadǎana la yire yē wı-pēebrıba la nēr-kuvıjǎ n bǎgrı. ²⁴Tı a yeleye ba yetı: < < Yese-ya, tı pugla la ka ki, a gısri me. > > Tı nērba la la'ara ē. ²⁵La ēn botı nēr-kuvıjǎ la yese la, a kē la deem gure pugla la nu'ugo, tı a isge. ²⁶Tı yel-ēna saage tēnja la wuu.

Azezi botı fǎsı bayi yēta

²⁷Azezi daan yese zē'e-ēnja me fǎrgra, tı fǎsı bayi dǎla ē tǎgra ke'enke'em yetı: < < Adavıdı* yuıja, zoe tı ninbǎalga! > > ²⁸Tı Azezi paage kē yire, tı fǎsı la paage a zē'am, tı a soke ba yetı: < < Yǎma bǎ sıra tı mam wun tǎ'age ēnje yan boortı se'em na? > > Tı ba lerge yetı: < < Ee! Zuudǎana. > > ²⁹Tı a kalum ba nini dee yetı: < < La

wɔn ɛ̃ŋe wu yan bɔ sɪra se'em na. > > ³⁰Tɪ ba nini na pike yɛta. Tɪ a kã'an ba yetu: < <Da base-ya ti nɛra bãŋe. > > ³¹La ban fõrge la, ba moolɛ bõn-ɛ̃ŋa mɛ tɛ̃ŋa la zɛ'a woo.

Azezi botɪ muko tɔgra

³²Ban daan yesɪ la, ti ba tarɪ nɛra ti kulkã'arga dolɪ ɛ̃, ti a dena muko, wa'am Azezi zɛ'am. ³³Tɪ Azezi dige kulkã'arga la, ti a yese. Tɪ muko la tɔgra. Tɪ la di'ige nɛr-kuvuŋɔ la, ti ba yetu: < <Nɛra nɛra nãn ka yɛ wãna buuri lɪrayɛɪ puam. > > ³⁴La Farisi* dõma daan yetu: < <La de la kulkã'arsɪ naba n bɔ ɛ̃ pãŋa, ti a tara digra kulkã'arsɪ la. > >

Azezi zoe nɛr-kuvuŋɔ ninbãalga

³⁵Azezi daan kaarɪ la tɛn-kãra la tɛn-pɪgsɪ wuu, zãsna nɛrba Zifdõma wɛndeto puam, moola Nawɛnne so'olum* kõ-yɛlga, dee botɪ bã'adõma, la kobro buuri wuu yɛta ãmã'asum. ³⁶La Azezi n yɛ nɛr-kuvuŋɔ la, ba ninbãalga n yõke ɛ̃. Se'ere n soe la, ba targɛ mɛ bãlɛ, ãna wu piisi n ka tarɪ dũnsĩina. ³⁷Tɪ a yele a karɛnbiisi la yetu: < <Va'am na bõnkɔɔla lagsgɔ zo'oge mɛ, la tõntõntɪba n wɔn lagse bõnkɔɔla la pɔ'ɔrɪ mɛ. ³⁸Bela ãyã, sose-ya va'am na dãana ti a tõm tõntõntɪba pa'ase ti ba lagse bõnkɔɔla la. > >

10

Azezi looge a karɛnbiisi pia la ayi tõm ba

(Amarkɪ 3:13-19, 6:7-13, Aluki 6:12-16, 9:1-6)

¹Azezi daan wi a karɛnbiisi pia la ayi la mɛ bɔ ba pãŋa ti ba dige kulkã'arsɪ, dee botɪ bã'adõma buuri wuu, la kobro buuri wuu yɛ ãmã'asum. ²Karɛnbiisi pia la ayi la ti a looge ti a tõm na yu'ura n

wāna: Pɔspɔsi dāana de la Asimō tɪ ba wi'iri tɪ Apɪyɛɛri, la a yɪbga A'āndre, la Azebede dayɔɔsi Azaki la a yɪbga Azā, ³la Afilipi, la Abatelemi, la Atoma, la Amatie n de lampo-tɔ'ɔsa la, la Azaki n de Alfe dayua, la Atade, ⁴la Asimō n daan de Zelɔti* nēra ayula la, la Azudaasi Iskariyo, seka n wun pa'ale tɪ ba yōke Azezi la.

⁵La de la bāna pia la ayi tɪ Azezi daan tōm, yele ba yeti: < <Da sēŋɛ-ya bu-zāŋsi* la zē'am, la da kē-ya Samaari* dōma tēnsɪ puam. ⁶Sēŋɛ-ya Israyeli* dōma n ān wu piisi n bɔɪ la zē'am, ⁷ka mōola yeti: < Nawēnne so'olum* na lem mɛ. > ⁸La ya botɪ bā'adōma yē ĩmā'asum, dee botɪ kūm vo'oge, dee botɪ kōnkɔma* yē ĩmā'asum le āna sōŋa, dee dige kulkā'arsi. Yāma to'oge la zāŋa, bela bɔ-ya zāŋa. ⁹Da dɪke-ya sālma bu ligri sūm sēŋɛ. ¹⁰La ya da dɪke tāmpɔkɔ sore la sēnne ĩyā, da dɪke-ya futo bayi, bu tagra, bu doore. Ba wun bɔ tōntōnna ěn boori sɛla.

¹¹Ya sān paage tēn-kāte bu tēn-pɪka puam, soke-ya bāŋɛ nēr-sōŋɔ sān bɔna mɪ wun to'oge ya tɪ ya kē'era a yire, bɔna-ya bilam ka paage daar-sɛka tɪ ya wun fōrge tēŋa la. ¹²Ya sān paage kē yire puam, ya pu'use ba yeti: < Sū-mā'asum wun bɔna la ya. > ¹³La yire la dōma sān to'oge ya, ya sū-mā'asum wun bɔna la ba. La ba sān zagse ka to'oge ya, ya sū-mā'asum wun weege ya zē'am. ¹⁴La yi-sɛka, bu tēn-sɛka nērba sān ka to'oge ya, bu ka selse ya yetɔga, ya yese zē'e-ēŋa dee puse ya nāma tēntōnno base mɪ. ¹⁵Mam yeti ya la sira sira, tɪ sariyadia daare tēn-ēŋa dōma wun yē toogo gānna Sodom* la Gomōori tēnsɪ nērba. > >

Azezi yeti nāmsgɔ n wun wa'am

(Amarki 13:9-13, Aluki 21:12-17)

¹⁶Azezi le yeti: < <Biɛ-ya, mam tōm ya wu piisi saasaadōma

tēnasuka. Bela ñyã, dena-ya yem dōma wu bōnse'edōma, la ya āna wu na'adawema n ka tarɪ yelle se'em na. ¹⁷Guuse-ya ya mēŋa la nērba la. Se'ere n soe la, ba wun wa yōge ya me tarɪ sēŋe sariyadia zē'esum, dee wē ya ba wēndeto* puam. ¹⁸La ba wun yōge ya sēŋe gōmnadōma, la na'adōma nēŋam, yāma n doli mam na ñyã, ti ya wun dena kaset-dōma tōge bō bāma la bu-zāŋsi*. ¹⁹La ba sān tarɪ ya sēŋe, da fabla-ya yāma n wun tōge se'em, bu yāma n wun tōge sela yelle. Se'ere n soe la, wakat-ēŋa mēŋa Nawēnne Sia* wun bō ya bōn-seka ti ya wun tōge. ²⁰La dagi yāma mēŋa n wun tōge, la de la ya So Nawēnne Sia la n boe ya puam na n wun tōge.

²¹Sōbia wun boti ba yōke a sōbia ku. La sōdōma mē wun ēŋe ba kōma bela. La kōma mē wun zēbe la ba dōgrɪba, boti ba ku ba.

²²Nērba wuu wun sise ya mam yu'ure la ñyã. La seka n ze'ele kāŋkāŋe ka paage ba'asgo, a wun yē fāare. ²³Ba sān nāmse ya tēŋa ayila puam, ya zoe sēŋe tēŋa ayēma. Mam yeti ya la sira, ti ya kān yāŋe kaage lsrayeli tēnsi ba'ase dee ti mam n de Nērsaala* Dayua la leme wa'am.

²⁴Karēnbia ka gānni a karēnsāama, la tōntōnna mē ka gānni a zuudāana. ²⁵La karēnbia sān wa āna wu a karēnsāama la, la tōntōnna sān wa āna wu a zuudāana la, la seke me. Ban wi'iri yidāana la ti Abelzebuli n de Asūtāana* la, ba wun tura a yire la dōma gānna la bela. > >

La mase ti ya zōta la Nawēnne

(Aluki 12:2-9)

²⁶< < Bela, da zōta-ya nērsaalba, ti bōn-seka woo n lile, wun lilge. La bōn-seka woo n sūge, wun puke. ²⁷Mam n yeke ya se'em lika puam wā, tōge-ya ē peelem puam. La sela ti mam waasum ya la, zom-ya deto zuto mōole ē. ²⁸Da zōta-ya seba n kuvri ñyã, dee ka tāna wun ku

sia la. Zɔta-ya Nawēnne n tā wɔn boti ya ɪyā, la ya sia sǎ'am bug-tēŋa* la. ²⁹Ba ka koosɪ mōom niinto bayi la lag-kōbre ayɪla mā'a? La baa niila ayɪla kǎn ki, ti la sǎn dagna ya Sɔ Nawēnne n sake. ³⁰La baa yāma zuugo zomto, Nawēnne mi ba wuu kǎlle mɛ. ³¹Bela ɪyā, da zɔta-ya dabeem, yāma tari yōoro gǎnna niinto zozo'e mɛ.

³²Nēr-seka woo n wɔn ze'ele nērba nēŋam yeti ēŋa de la mam nēra, mam mē wɔn ze'ele mam Sɔ Nawēnne n boe saazuum nēŋam yeti a de la mam nēra. ³³La nēr-seka woo n sɪ'se nērba nēŋam yeti ēŋa ka mi mam, mam mē wɔn sɪ'se mam Sɔ Nawēnne n boe saazuum nēŋam ti mam ka mi ē. > >

Tɪ nōŋe Azezi gǎnna

(Aluki 12:51-53, 14:26-27)

³⁴< < Da tē'esɛ-ya ti mam tari la nō-yēnne wa'am dūnia zuo. Mam ka wa'am ti m boti nērba dɛna nōore ayɪla dūnia zuo, la de la welgre ti mam tari wa'am. ³⁵Se'ere n soe la, mam wa'am ti m welge la dayɔɔsi la ba sɔdōma, la pugunto la ba madōma, la dayɔɔsi pɔgba la ba sɪrba madōma. ³⁶Tɪ nēra mēŋa yir-dōma wɔn dɛna a bɛ'eba. ³⁷Nēr-seka n nōŋe a sɔ bu a ma gǎnna mam, a ka mase ti a dɛna mam nēra. La nēr-seka woo n nōŋe a dayva bu a pɔyva gǎnna mam, a ka mase ti a dɛna mam nēra. ³⁸La nēr-seka woo n ka sake nāmsgɔ wu nēra n zɛɛɪ a kūm dɔ-puurŋa* dɔla mam, a ka mase ti a dɛna mam nēra. ³⁹La nēr-seka woo n boori ti a gu a vɔm, a wɔn koŋe ē. La nēr-seka n base a vɔm mam ɪyā, a wɔn yē ē. > >

Nēr-seba n tari yɔɔro

(Amarki 9:41)

⁴⁰< < Nēr-seka woo n to'oge ya, a to'oge la mam. La nēr-seka woo n

to'oge mam, a to'oge la seka n tōm mam na. ⁴¹La nēr-seka woo n to'oge Nawēnne nōtɔ'ɔsa ɛn de Nawēnne nōtɔ'ɔsa la ïyã, a wun to'oge Nawēnne nōtɔ'ɔsa yɔɔɔ. La nēr-seka woo n to'oge sira dāana ɛn de sira dāana la ïyã, a wun to'oge sira dāana yɔɔɔ. ⁴²La nēr-seka woo n bɔ mam nērba wã ayɩa ko-mã'asga tɩ a yũ, ɛn de mam karēnbia la ïyã, mam yetɩ ya la sira, tɩ a kãn koŋe yɔɔɔ. > >

11

Azã n mise nērba ko'om puam tōm a karēnbiisi Azezi-krisi zē'am

(Aluki 7:18-35)

¹Azezi n daan pa'ale a karēnbiisi pia la ayi la kɩ'ɩlum na, a yese bilam sēŋe la so'olum na tēnsɩ la wuu puam ka zāsna nērba, dee mōola Nawēnne kō-yēlga.

²Tɩ Azã daan bɔna yu'a deem, wōm Krisi* tōoma la yelle, tōm a karēnbiisi a zē'am, ³tɩ ba sēŋe ka soke ɛ yetɩ: < < Fɔn de la seka tɩ Nawēnne yetɩ a wun wa'am na bu, tɩ gu'ura nēra ayēma? > > ⁴Tɩ Azezi lerge ba yetɩ: < < Sēŋe-ya ka yele Azã yāma n wōnnɩ se'em, la yāma n yēti se'em na: ⁵Fɔɔsɩ nini yēti mɛ, tɩ kɔɔrnɔ sēnna, tɩ kōnkɔma yēta ïmã'asum le āna sōŋa, tɩ wansɩ wōnna, tɩ kūm wɔ'ɔra, tɩ nasdōma wōnna Nawēnne kō-yēlga. ⁶La nēr-seka n ka lebrɩ poorum mam ïyã la tarɩ zu-yēlga. > >

⁷Azã karēnbiisi la n fōrge la, tɩ Azezi yāŋa tɔgra Azã yelle bɔ'ɔra nēr-kuvɔŋɔ la yetɩ: < < Bēm tɩ yāma daan sēŋe ka bise weem? Yāma sēŋe ka bise la mōorɔ tɩ kusebgo mīini bu? Ayɛɩ. ⁸La bēm tɩ yāma sēŋe ka bise? Nēra n ye fu-sōma? Ayɛɩ. Nēr-seba n ye fu-sōma la boe na'adōma yie. ⁹La yāma sēŋe ka bise la bēm? Ya sēŋe ka bise la Nawēnne nōtɔ'ɔsa bu? Ee. La mam yetɩ ya tɩ a de la nēra n gānnɩ

Nawēnne nōtɔ'ɔsa. ¹⁰La de la ēña yelle ti la gulse Nawēnne gōŋɔ
puam ti Nawēnne yeti:

< Mam tōntōnna n wāna
ti mam tōm ti a dēŋe fu nēŋa
malge sore bɔ fɔ. >

¹¹Mam yeti ya la sira, ti nērsaalba ti ba dɔge la wuu puam, nēra ka
boe n gānni Azā n mise nērba ko'om puam na. La nēr-seka n de pika
Nawēnne so'olum* na puam gānni Azā me. ¹²Lan pɔse Azā n misri
nērba ko'om puam na wa paam læele wā, Nawēnne so'olum sēnni
nēŋa la pāŋa, la pānsi dōma n mōrgri ti ba fāage ē. ¹³Nawēnne
nōtɔ'ɔsrɔba* la wuu, la lɔɔ* gōnnɔ la wuu dēŋe tɔge so'olum na yelle
me halɔ wa paage Azā wakate. ¹⁴La ya sān bɔɔra ti ya bāŋe a vōore,
Azā n de A'eli* ti ba yvun yeti a wun wa'am na. ¹⁵Seka n wōm yetɔga
wā, a selse sōŋa sōŋa.

¹⁶Mam wun dɔke la bēm make la zamāan-ēna wā nērba? Ba ān wu
kɔma n zɪ da'am wi'ira taaba yeti: ¹⁷< Tōma peebe wusɔ me, ti yāma
zagse ka wa. Ti tōma yōom kuvre yōoma, ti yāma zagse ka yōom. >

¹⁸Se'ere n soe la, Azā wa'am me wa lɔta nōore dee ka yūura dāam, ti
ba yeti kulkā'arga n dolɔ ē. ¹⁹Ti Nērsaala Dayva*f6* la wa'am wa dita
dee yūura, ti ba yeti, a de la dita, la dā-yūura, la lampo-tɔ'ɔsrɔba*, la
tōon-be'ero dōma sire. Yem dāana tōoma n pa'alɔ ti a tari yem. > >

Azezi zerge tēn-seba nērba n ka bɔ ē sira la

(Aluki 10:13-15)

²⁰Bela poorum ti Azezi zerge nēr-seba ti a tōm tōon-yālma zozo'e ba
tēnsɔ puam, dee ti ba ka teege yem base tōon-be'ero la yeti:

²¹< < Korazē dōma, ya wun yē toogo! Betisayida dōma, ya wun yē
toogo! Se'ere n soe la, tōon-yālma seba n tōm ya tēnsɔ puam na, daan

sān tōm nɪ na Tiiri*, la Sidō tēnsɪ pvam, ba wun teege nɪ yem base tōon-be'ero halɪ kurum kurum, ye bɔra futo ēŋe tāmpeglum ēŋe ba zuto tɪ la pa'ale tɪ ba teege yem. ²²Bela īyā tɪ mam yetɪ ya tɪ sariyadia daare, la wun dena toogo bɔ yāma gānna Tiiri, la Sidō dōma. ²³La yāma Kapernaum dōma, yāma tē'ese tɪ ya wun zēke mɛ ka paage saazuum bu? Ayei, ya wun sige mɛ halɪ ka paage kɪ'un-tēŋa. Se'ere n soe la, tōon-yālma seba tɪ mam tōm ya zē'am na daan sān tōm nɪ na Sodom* tēŋam, a wun ken boe nɪ mɛ zīna. ²⁴La mam yetɪ ya tɪ sariyadia daare, Sodom dōma kǎn yē toogo paage yāma. > >

Azezi tɔge ēŋa la a Sɔ Nawēnne yelle

(Aluki 10:21-22)

²⁵Wakat-ēŋa Azezi tɔge mɛ yetɪ: < < Mam Sɔ Nawēnne n de saazuum la tēŋa wā Zuudāana, mam pēgrɪ fɔ, se'ere n soe la, fōn sugɛ bōn-bāna wā mɛ tɪ yem dōma la bāŋrɪba ka mina, dee pa'ale nēr-seba n ān wu kɔm-pɪgsɪ la. ²⁶Ēe, mam Sɔ, la de la fōn boorɪ bela la īyā. > >

²⁷< < Mam Sɔ dɪke sela woo ēŋe la mam nu'usum. La nēra ka mi mam n de Nawēnne Dayua la n de seka, sān dagna mam Sɔ la, la nēra mē ka mi mam Sɔ la n de se'em, sān dagna mam n de a Dayua la, la seba tɪ mam wun botɪ ba bāŋe ē na. > >

Azezi n bɔ'ɔrɪ nērba vo'osgo

²⁸< < Wa'am-ya mam zē'am, yāma seba wuu n tu ze-tɪbsa targe la, tɪ mam wun bɔ ya vo'osgo. ²⁹Dɪke-ya mam sɔgrɪga sɔge ya mēŋa, zāsɪm sela tɪ mam wun pa'ale ya la, tɪ ya wun yē vo'osgo. Se'ere n soe la, mam de la sū-bugsum dāana, la sik-m-mēŋa dāana. ³⁰Mam sɔgrɪga la fake mɛ, la mam zeero la ka tɪbge. > >

12

Vo'osgo daare yelle

(Amarki 2:23-28, Aluki 6:1-5)

¹Wakat-ēṇa, Azezi la a karēnbiisi la daan dolı la vato puam, Zifdōma vo'osgo* daare tolla. Tı a karēnbiisi kōm dōnna, tı ba kō si wēena obra. ²Tı Farisi* dōma yē, yele Azezi yetı: < < Bıse, fu karēnbiisi la utı la sela n sisri vo'osgo daare. > > ³Tı Azezi lerge ba yetı: < < Yāma ka karēṇe Adavidi* la a nērba la kōm n yuun dōnnı tı ba ēṇe se'em na? ⁴A yuun kē la Nawēnne deego la puam dıke borborı seba tı ba bıṇe bō Nawēnne na obe, dee bō a nērba la. La sisri me, nēra nēra ka obrı ba, sān dagna kāabgō* kēma la mā'a. ⁵Bı yāma ka karēṇe lō* gōṇō la puam n yetı, vo'osgo daare, kāabgō* kēma la n tōnnı Wēnde-kāte* la puam na sā'anı vo'osgo daare sisgo la me tı taale ka bōna? ⁶Mam yetı ya me tı nēra n gānnı Wēnde-kāte la n boe kalam. ⁷La gulse tı Nawēnne yetı: < Mam boorı tı nērsaalba zōta la taaba ninbāalga, dee dagı tı ba dıke ba bōnō kāabra bō'ora mam. > Yāma sān bāṇe nı yetōg-ēna wā vōore, ya kān yele nı seba n ka tōm be'em tı ba tuuge ya. ⁸Se'ere n soe la, Nērsaala* Dayva*f6* la n soe vo'osgo daare. > >

Buraa nu'ugo n ki, tı Azezi botı a yē ĩmā'asum

(Amarki 3:1-6, Aluki 6:6-11)

⁹Azezi fōrge bilam sēṇe la ba wēndeem. ¹⁰Tı buraa ayıla daan bōna mī, tı a nu'ugo ki. Tı Farisi* dōma bōra tı ba dōre Azezi, soke ē yetı: < < Sore boe tı ba botı nēra yē ĩmā'asum vo'osgo* daare? > > ¹¹Tı Azezi lerge ba yetı: < < Nēr-kāna n boe yāma puam wun tara pesgo, tı a lui boko puam vo'osgo daare, tı a kān yōke ē tı a dooge?

¹²Nērsaala tarı yōorō mē gānna pesgo zozo'e. Bēla, sore boe mē ti nēra ēņe sōņa vo'osgo daare. > > ¹³La Azezi yelee buraa la yetı: < < Tēege fu nu'ugo la. > > Tı a tēege, ti a nu'ugo la āna sōņa wu nu'ugo ayēma la. ¹⁴Tı Farisi dōma la yese yēņa ka bām bāma n wun ēņe se'em kv Azezi.

Azezi de la Nawēnne tōntōnna

¹⁵Tı Azezi bāņe bēla, fōrge bilam. Tı nēba zozo'e doose ē. Tı a botı bā'adōma wuu yē ĩmā'asum. ¹⁶Dee kā'an ba yetı, ba da botı nēra bāņe. ¹⁷A ēņe la bēla ti Nawēnne n yvun botı a nōtō'osa A'ezayi* yelee se'em na ēņe.

¹⁸A yvun yetı:

< < Mam tōntōnna ti mam looge n wāna:

Nēr-seka ti mam nōņe, a paage la mam yem.

Mam wun base ti m Sia* pāņa bōna la ē,

ti a mōole sira, la sela n mase mam yem bō buuri wuu.

¹⁹A kān wē'era nōke'ene, la a kān zebra.

La nēra kān wōm a kōa sorōrō zuto.

²⁰A kān kō'oge mō-seka n kō'oge la ba'ase.

La a kān kīņe fitla gōngōņo la n diti fēfē la ba'ase,

halı ti la ka paage wakat-seka ti a wun botı sira, la sela n mase

to'oge zē'a wuu.

²¹Tı buuri la wuu wun te'ege ē. > >

Azezi pāņa gānnı Asūtāana

(Amarkı 3:20-30, Aluki 11:14-23, 6:43-45)

²²Tı ba tarı nēra ayıla ti kulkā'arga dolı ē, ti a dena fva la muko wa'am Azezi zē'am, ti Azezi botı a yē ĩmā'asum, tōgra dee yēta.

²³Tı la di'ige nēr-kvōņo la wuu, ti ba yetı: < < Bura-ēna wā kān

dɛna naba Adavidi* yuŋa la? > > ²⁴Tɪ Farisi dōma wōm bɛla, yele yeti: < < Bura-ēna tari la Abelzebuli*f7* n de kulkā'arsɪ naba la pāŋa digra kulkā'arsɪ la. > > ²⁵Tɪ Azezi bāŋɛ ban tē'esrɪ se'em na, yele ba yeti: < < So'olum sɛka woo nērba n welge wērgɛ zɛbra la taaba, so'olum na wun sā'am mɛ. La tēn-sɛka woo, bu yi-sɛka woo nērba n welge zɛbra la taaba, a wun wōrgɛ mɛ. ²⁶La Asūtāana* sān digra Asūtāana, a welge mɛ zɛbra la a mēŋa. Bɛla, a so'olum na kān tā'agɛ ze'ele. ²⁷Yāma n yeti mam digri kulkā'arsɪ la Abelzebuli pāŋa la, yāma nērba tari la āne pāŋa digra kulkā'arsɪ? Bɛla, ya nērba la mēŋa n wun pa'alɛ tɪ ya ka tari buurɔ. ²⁸La de la Nawēnne Sia pāŋa tɪ mam tari digra kulkā'arsɪ, bɛla pa'alɛ tɪ Nawēnne n wa'am wa dita na'am ya tēŋasvka.

²⁹Nēra ka tā wun kē pāŋa dāana yire vaagɛ a lɔgrɔ, sān dagna tɪ a dēŋɛ lu pāŋa dāana la mɛ dee yāŋa vaagɛ a lɔgrɔ la.

³⁰Sɛka n ka boe la mam, sisri mam mɛ. La sɛka n ka lagim na mam lagsra, a wurgrɪ mɛ. ³¹Bɛla n soe tɪ mam yele ya yeti, tōon-be'ero wuu, la pɔ'ɔrɛ yetɔga wuu tɪ nērsaalba utɪ la, Nawēnne tā wun base ba taalɛ. La sɛka n tɔgɛ pɔ'ɔgɛ Nawēnne Sia, a kān base ɛ taalɛ. ³²La nēr-sɛka n tɔgrɪ Nērsaala* Dayva la tɔg-be'ero, a wun base ɛ taalɛ. La sɛka n tɔgrɪ Nawēnne Sia la tɔg-be'ero, Nawēnne kān malɪn base ɛ taalɛ dūnia ēna wā pvam, la dūni-sɛka n sēm na pvam.

³³Ya sān yeti, tia ān sōŋa, ya yeti a biɛ ān sōŋa. Bu ya sān yeti, tia de tɪ-be'ego, ya yeti a biɛ mē de la biɛ be'ero. Se'ere n soe la, tia biɛ n botɪ ba bāŋra ēn de tɪ-sɛka. ³⁴Yāma ān wu kāmpēesɪ buuri, yāma n de nēr-be'esɪ wāna wā, ya wun ēŋɛ la wāne tɔgɛ tɔg-sōma? Se'ere n soe la, sɛla n zo'oge sūure pvam na tɪ nōore tɔgrɪ. ³⁵Nēr-sōŋɔ tɔgrɪ la bōn-sōma tɪ a tari a sūure pvam. La nēr-be'ego tɔgrɪ la bōn-be'ero tɪ a tari a sūure pvam. ³⁶Mam yeti ya tɪ sarɪyadia daare, nērsaalba wun

ka tɔge yetɔg-yaalsɪ tɪ ba tɔge la wuu yelle Nawēnne nēŋam. ³⁷La de la fu yetɔga puam tɪ fu wun yē buurɔ, la, la de la fu yetɔga puam tɪ fu wun koŋe buurɔ. > >

Nērba boorɪ tɪ ba yē bōn-yālma

(Amarkɪ 8:11-12, Alukɪ 11:29-32)

³⁸Azezi n tɔge bela la, tɪ lɔɔ* karēnsāandōma, la Farisi* dōma yeŋe ē yetɪ: < < Karēnsāama, tōma boorɪ tɪ fu ēŋe la bōn-yālma n pa'ale tɪ fōn ze'ele la Nawēnne zē'am tɪ tɪ yē. > > ³⁹Tɪ a yeŋe ba yetɪ: < < Zamāan-ēna wā nērba n de nēr-be'esi, dee ka dɔla Nawēnne la sura la, boorɪ tɪ ba yē la bōn-yālma n wun pa'ale Nawēnne pāŋa, la ba kān yē bōn-yālma, sān dagna bōn-yālm-seka n yuun ēŋe Nawēnne nōtɔ'ɔsa Azonaasi* la. ⁴⁰Wu Azonaasi n yuun boe zūn-kāte la puurum dabsa atā wuntɛŋa la yu'ɔŋɔ la, bela Nērsaala* Dayua la mē wun bɔna yɔɔgɔ puam na dabsa atā, wuntɛŋa la yu'ɔŋɔ. ⁴¹Saryadia daare, Niniivi* dōma wun isge zerge zamāan-ēna wā dōma me ba tōon-be'ero la iŋyā. Se'ere n soe la, Azonaasi n yuun mōole Nawēnne yetɔga bɔ ba la, ba yuun teege yem me base tōon-be'ero. La nēra n gānnɪ Azonaasi n boe kalam, dee tɪ yāma ka teege yem. ⁴²La saryadia daare, na-pɔka la n yuun yese wēntulle gɔbga bɔba la, wun isge me zerge zamāan-ēna wā nērba ba tōon-be'ero la iŋyā, se'ere n soe la, a daan ze'ele la zē'a n zāage wa'am wa selse naba Asalomō* yem yetɔga. La nēra n gānnɪ Asalomō n boe kalam, dee tɪ yāma ka selsra ē. > >

Kulkā'arga n yese dee leme makre

(Alukɪ 11:24-26)

⁴³Azezi le yetɪ: < < Kulkā'arga sān yese dee base nēra, a sēŋe la

pəgəntusɪ puam ka ɛɛra zē'a tɪ a vo'ose, la a sãn ka yē, ⁴⁴a yetɪ mɛ tɪ:
< Mam wun lebe la m yi-sɛka tɪ m yese dee base la puam. > La a sãn
lebe ka paage yē tɪ deego la de la voore, puse malge āna sōŋa, ⁴⁵a
wun lebe mɛ ka tarti kulkā'arsɪ bayopɔɪ n de wēensɪ gānna ēŋa,
wa'am wa kē bɔna mĩ. La nēra la toogo wun gānna kurum toogo la.
La mē wun dena la bela bɔ zamāan-ēna wā nēr-be'estɪ la. > >

Azezi ma, la a yɪbsɪ

(Amarkɪ 3:31-35, Aluki 8:19-21)

⁴⁶Azezi daan ken tɔgra la nēr-kuvŋɔ la, tɪ a ma, la a yɪbsɪ daan ze
yēŋa bɔɔra tɪ ba tɔge la ē. ⁴⁷Tɪ nēra ayɪla yele ē yetɪ: < < Fv ma, la fv
yɪbsɪ n wāna n ze yēŋa bɔɔra tɪ ba tɔge la fv. > > ⁴⁸Tɪ Azezi yele sɛka
n tɔgrɪ la ē na yetɪ: < < Ane n de mam ma, la āndōma n de mam
yɪbsɪ? > > ⁴⁹Dee tēege a nu'ugo pa'alɛ a karēnbiisi la yetɪ: < < Mam
ma, la mam yɪbsɪ n wāna. ⁵⁰Nēr-sɛka woo n ttɪ mam Sɔ Nawēnne n
boe saazuum n boortɪ se'em, ēŋa n de mam yɪbga, la mam tā, la mam
ma. > >

13

Kaara n lobge a bōnbuuri makre

(Amarkɪ 4:1-9, Aluki 8:4-8)

¹Daar-ēŋa, Azezi yese yire sēŋe ka zēa la mōgre la nōorum. ²Tɪ nēr-
kuvŋɔ zozo'e lagse a zē'am, tɪ a kē ōorŋɔ la puam zɪ'ire, dee tɪ nēr-
kuvŋɔ la ze mōgre la nōorum. ³Tɪ a make magsa tɔge yela zozo'e bɔ
ba yetɪ: < < Kaara n daan yese tɪ a lobge a bōnbuuri. ⁴La ēn lobgrɪ
bōnbuuri la, baseba lui la sore nōorum, tɪ niinto wa'am wa di ba. ⁵Tɪ
baseba lui tāmpīa zuo, zē'a tɪ tēntōnnɔ ka zo'oge. Tēntōnnɔ n ka

zo'oge la ñyã, ba yese la tɔtɔ. ⁶Ti wuntɛɛŋa yêke wê ba, ti ba ki, ba yêga n ka kē tēŋa la ñyã. ⁷Ti baseba lui gō'ost zē'a, ti gō'ost la yese fure ba. ⁸Ti baseba lui zē'e-sōŋɔ zē'a, wɔm biɛ. Baseba wɔm na bie kɔbga kɔbga, ti baseba wɔm pisyooob-yoobi, baseba pitã-tã. ⁹Seka n wōm yetɔga wã, a selse sōŋa sōŋa. > >

Sela n soe ti Azezi make magsa la

(Amarki 4:10-12, Aluki 8:9-10)

¹⁰Ti a karēnbiisi la lɛm ẽ soke yeti: < <Bēm ñyã ti fōn makra magsa tɔgra bɔ'ɔra ba? > > ¹¹Ti a lerge ba yeti: < <Nawēnne boti yāma bāŋɛ a so'olum yelle n sugɛ la mɛ. La a ka boti bāma bāŋɛ. ¹²Seka n tari wun to'oge pa'ase, ti la zo'oge. La seka n ka tari, baa sela ti a tari fēe la, ba wun to'oge ẽ. ¹³Bela ñyã ti mam magsra magsa tɔgra bɔ'ɔra ba, se'ere n soe la, ba bɪsrɪ mɛ, dee ka yēta, wōnna, dee ka bāŋra a vōore. ¹⁴Nawēnne nōtɔ'ɔsa A'ezayi* n yuun yele se'em na ɪti la bāma le. A yuun yeti:

< Ya wun wōm,
la ya kãn bāŋɛ a vōore,
ya wun bɪsɛ,
la ya kãn yē.
¹⁵Se'ere n soe la,
nēr-bāna putē'era ka like,
ba li ba tuba mɛ,
dee mūm ba nini,
ti ba nini da yē,
ti ba tuba da wōm,
ti ba da wōm a vōore.
Sān dagɪ nɪ bela,

ba wun teege ni yem
leme wa'am mam zē'am,
ti m bɔ ba laafe. >

¹⁶La, la sãn dena yãma, ya tarɪ zu-yēlga, yãma tarɪ la nini n yēti, dee tara tuba n wõnni. ¹⁷Mam yeti ya la sira, ti Nawēnne nõtɔ'ɔsrɪba, la nēr-sõma zozo'e yuun boori ti ba yē yãma n yē sela la me, la ba ka yē, ba yuun boori ti ba wõm sela ti yãma wõm na me, la ba ka wõm. > >

Azezi pa'ale bõnbuuri makre la võore

(Amarkɪ 4:13-20, Aluki 8:11-15)

¹⁸< < Bela, selse-ya seka n lobge bõnbuuri la makre la võore. ¹⁹Sore la nõorum ti bõnbuuri seba lui la, ãn wu nēr-seka n wõm Nawēnne so'olum kō-yēlga* la, dee ka bãŋe a võore. Ti Asūtãana* n de tõon-be'ero dãana la wa'am wa yese yetɔga la a sũure puam. ²⁰Tãmpãa zuo ti bõnbuuri seba lui la, ãn wu nēr-seka n wõm kō-yēlga la, to'oge ē bilam mēŋa la sũ-yēlga. ²¹La ban ka kē a sũure puam na ñyã, a sake la wakate fee. La toogo bu nãmsgɔ sãn paage ē Nawēnne yetɔga la ñyã, a basri me tɔtɔ. ²²La gõ'osi la zē'a ti bõnbuuri seba lui la, ãn wu nēr-seka n wõm Nawēnne so'olum kō-yēlga la, ti a yem yɔɔra la dũnia wã yela, ti bõntarsõm yela pã'asra ē, boti yetɔga la ka tãna wun wõm bie a sũure puam. ²³La zē'e-sõŋɔ la ti bõnbuuri seba lui la, ãn wu nēr-seka n wõm Nawēnne kō-yēlga la, wõm a võore, wõnna bie. Ti baseba wõm kɔbga kɔbga, ti baseba pisyooob-yoobi, ti baseba pitã-tã. > >

Kanarsɪ makre

²⁴Azezi le make la makre ayɪla bɔ ba yeti: < < Nawēnne so'olum ãn wu buraa n bure si sõma a va'am. ²⁵Ti wēnne kē, ti nērba gã gĩsra, ti a be tarɪ kanarsɪ sēŋe ka bure lagum mĩ. ²⁶Ti si la yese bi waage. Ti

kanarɪ la mē waage, tɪ ba yē tɪ ba dagɪ si. ²⁷Tɪ tōntōnɪba la sēŋe va'am na dāana zē'am ka soke ē yetɪ: < Zuudāana, dagɪ si sōma tɪ fōn daan bure fu va'am na? La bēm tɪ kanarɪ bɔna mī zozo'e? > ²⁸Tɪ a yeke yetɪ: < La de la mam be n ēŋe bela. > Tɪ tōntōnɪba la soke ē yetɪ: < Fōn boort tɪ tɪ sēŋe ka vō kanarɪ la me bu? > ²⁹Tɪ a yeke ba yetɪ: < Ayɛɪ, ya sān vō kanarɪ la, ya wun po vō la si. ³⁰Base-ya tɪ ba wuu bɪ ka paage bōnkɔɔla lagsgɔ wakate, tɪ mam wun yeke seba n lagsɪ bōnkɔɔla la tɪ ba dēŋe vō kanarɪ la, bobɛ ba yō bugum, dee yāŋa lagse si la dɪge m bāare puam. > > >

Sɔ'ɔrɔ biire, la dābille makre

(Amarkɪ 4:30-32, Alukɪ 13:18-21)

³¹Azezi le make la makre ayɪla bɔ ba yetɪ: < < Nawēnne so'olum ān wu sɔ'ɔrɔ biire tɪ buraa bure a va'am. ³²A āna pɪka pɪka gāna bōnbuuri la wuu biɛ, la ba sān bure ē, a bitɪ me gāna zēvōorɔ buuri wuu, āna wu tia la, tɪ niinto sēna te'era ba tɔgrɔ a wila zuo. > >

³³La a le make la makre ayɪla bɔ ba yetɪ: < < Nawēnne so'olum ān wu dābille tɪ pɔka dɪke ēŋe borbortɪ zom la-kāra batā puam wē, tɪ dābille la botɪ ba wuu uke. > >

Sela n soe tɪ Azezi magsra magsa

(Amarkɪ 4:33-34)

³⁴Bela wuu Azezi magsɪ la magsa tɔgra bɔ'ɔra nēr-kuuŋɔ la, a ka tɔge yetɔga bɔ ba, tɪ la sān dagna magsa. ³⁵A ēŋe bela tɪ Nawēnne nōtɔ'ɔsa* n yuun gulse se'em na n ēŋe. A yuun yetɪ: < < Mam wun make la magsa tɔge bɔ ba, mam wun pa'ale yel-seba n sugɛ halɪ dūnia pī'iluŋɔ wakate wa paam lēɛɛ wā. > >

Azezi pa'ale si, la kanarɪ la makre vōore

³⁶Azezi daan base nēr-kvunjo la mε, dee kule yire. Tı a karēnbiisi wa'am wa yele ē yetı: < < Pa'ale tɔ kanarɪ la makrε vōore. > > ³⁷Tı a yele ba yetı: < < Sεka n bure si sōma la, de la mam n de Nērsaala* Dayva la. ³⁸La va'am na de la dūnia, tı si sōma la dena Nawēnne so'olum* nērba. Tı kanarɪ la dena Asūtāana* nērba. ³⁹Tı be la n bure kanarɪ la dena Asūtāana. Tı bōnkɔla lagsgɔ wakate la dena dūnia ba'asgɔ. Tı seba n lagsrı bōnkɔla la dena Nawēnne malekadōma*. ⁴⁰Ban lagse kanarɪ la lobe base bugum puam se'em na, la wun ēnje la bela mē dūnia ba'asgɔ. ⁴¹Nērsaala Dayva la wun tōm na a malekadōma tı ba lagse seba n pā'ase nērba tı ba base Nawēnne sore, la tōon-be'ero dōma wuu, yese ba Nawēnne so'olum puam, ⁴²lobe ba base bugum puam. Zē'e-seka tı ba wun kella, dee dıke ba nu'usi gi nōorum. ⁴³La nēr-seba n ēnje sela n mase wun yēgra ba Sɔ Nawēnne so'olum puam wu wuntεεja la. Seka n wōm yetɔga wā, a selse sōja sōja. > >

Bōn-sōja n gānnı wuu makrε

⁴⁴Azezi le yele ba yetı: < < Nawēnne so'olum* ān wu tvulum bōnɔ tı ba dıke sugε va'am puam, tı nēra yē ē. Tı a sūure ēnje yēlum, tı a le sugε ē pa'ase, dee sēnje ka koose ēn tarı sela wuu, sēnje ka da va'am na.

⁴⁵Nawēnne so'olum le āna wu læba n eeri kug-sōma n de tvulum bōnɔ tı a da. ⁴⁶La a yē la ayula n ba āna sōja tı a ligri zo'oge, tı a lebe kule ka koose ēn tarı sela wuu, sēnje ka da ē. > >

Yuka makrε

⁴⁷< < Nawēnne so'olum* ken āna wu yuka tı ba lobge ko-kāte puam yōge zūma buuri wuu, ⁴⁸tı yuka la pıre. Tı ba ve'ege ē dooge doone, gāse zūn-seba n ān sōja ēnje pıtɔ puam, dee lobe seba n ka ān sōja la

base. ⁴⁹La wun āna la bela dūnia ba'asgɔ wakate. Malekadōma* n wun wa'am wa gāse nēr-be'esi, nēr-sōma la puam, ⁵⁰lobe ba base bugum puam, zē'e-ēṅa ti ba wun kella, dee dıke ba nu'usi gı nōorum. > >

⁵¹Azezi tɔge bela, dee soke ba yetı: < < Yāma wōm bela wuu vōore? > > Tı ba lerge ē yetı: < < Ee. > > ⁵²Tı a yele ba yetı: < < Nēr-seka woo n de lɔɔ* karēnsāama dee zāsım Nawēnne so'olum yelle pa'ase, ān wu yidāana n loort bōn-kegı, la bōn-paalsı a bōntarsōm puam bɔ'ɔra nērba. > >

Nazaretı nērba ka bɔ Azezi sıra

(Amarkı 6:1-6, Aluki 4:16-30)

⁵³Azezi daan magse magsa la kı'ulım, dee fōrge bilam sēṅe la a mēṅa tēṅa. ⁵⁴La ēn paage a mēṅa tēṅa la, a kē la ba wēndeego* puam zāsna nērba, ti a zāsṅɔ la di'ige nērba la, ti ba yetı: < < A yē yem ēna la be? A ēṅe la wāne tōnna tōon-yālma wā? ⁵⁵Dagı ēna n de dɔ-wāta la dayva la? Dagı ēna ma yu'ure n de Amaari la, ti a yıbsı dena Azakı, la Azozefu, la Asimō, la Azudi la? ⁵⁶Dagı a tāpa wuu n boe ti zē'am wā? A yē bōn-bāma wuu la be? > > ⁵⁷Bela ti ba daan ka bɔ ē sıra. Tı Azezi yele ba yetı: < < Nawēnne nōtɔ'ɔsa yēti pēka me, sān dagna a mēṅa tēṅa, la a yir-dōma tēṅasuka mā'a ti a ka yēti pēka. > > ⁵⁸A daan ka tōm tōon-yālma zozo'e bilam, ban ka bɔ ē sıra la iyā.

14

Azā kūm yelle

(Amarkı 6:14-29, Aluki 9:7-9)

¹Wakat-ēṅa ti Galile naba A'erɔdı* daan wōm ban tɔgrı Azezi yelle,

²ti a yeke a tōntōniba yeti: < <Ena de la Azā n daan misri nērba ko'om puam na n vo'oge. La de la bela n soe ti a tara pāṅa tōnna tōon-yālma. > >

³Se'ere n soe ti a yeke bela la, A'erōdi mēṅa n daan boti ba yōke Azā lu tari ka kē'esē yu'a deem a kēema Afilipi pōga A'erodiadi iṅyā.

⁴Se'ere n soe la, A'erōdi daan fāage la Afilipi pōga di, ti Azā daan yeke ē yeti: < <La ka mase ti fu fāage ē di. > > ⁵A'erōdi daan boori ti a ku Azā me, dee zōta tēṅa la nērba, se'ere n soe la, ba tē'esē ti Azā de la Nawēnne nōtō'sa.

⁶La A'erōdi daan wa ita la a dōka daare kibsa, ti A'erodiadi pōyua wa nērba nēṅam, ti A'erōdi sūure ēṅe yēlum halt zozo'e, ⁷ti a pōi yeke pugla la yeti, bōn-seka wuu ti a wun sose, ēṅa wun bō ē. ⁸Ti a ma boti a yeke naba A'erōdi yeti: < <Di ke Azā n mise nērba ko'om puam na zuugo ēṅe la-pesṅa puam bō mam kalam. > > ⁹Ti naba la sūure sā'am, la ēn pōi la iṅyā, la sāama la iṅyā, ti a bō nōore yeti ba bō pugla la ēn boori sela la. ¹⁰Dee tōm nēra ti a sēṅe yu'a deem ka wike Azā zuugo. ¹¹Ti a sēṅe ka wike zuugo la ēṅe la-pesṅa puam tari ka bō pugla la, ti a to'oge ka bō a ma. ¹²Ti Azā karēnbiisi wa'am wa dike kūm na ka laage, dee sēṅe ka yeke Azezi.

Azezi bō nēr-kuvṅo dia

(Amarki 6:30-44, Aluki 9:10-17, Azā 6:1-14)

¹³Azezi n daan wōm bela la, a kē la ōorṅo fōrge we'esa kēnkēṅa, zē'a ti nērba ka boe. Ti nēr-kuvṅo la bāṅe, ze'ele tēnsi puam babsē ē la nāma. ¹⁴Ti Azezi paage ze'ele ōorṅo la zuo sige, yē nēr-kuvṅo la, ti ba ninbāalga yōke ē, ti a boti ba bā'adōma yē iṅmā'asum. ¹⁵Ti zaanōore paage, ti karēnbiisi la lem Azezi yeke ē yeti: < <Zē'a wā de la mōom, dee ti wēnne kē'era, bela boti nērba la sēṅe tēnsi la puam

ka da dia di. > > ¹⁶Ti Azezi yele ba yetu: < <La ka de pēgrε ti ba sēņε, ya mēņa bɔ ba dia. > > ¹⁷Ti ba lerge ē yetu: < <Tōma tarı la borbortı banuu, la zūma bayi mā'a. > > ¹⁸Ti Azezi yele ba yetu: < <Tarı-ya ba wa'am wa bɔ ma. > > ¹⁹Dee botı nēr-kuvuŋɔ la zī'ire mōorɔ zuo. Ti a dıke borbortı banuu, la zūma bayi la, gorge bıse saazuum pu'vse Nawēnne, dee fiise borbortı la bɔ a karēnbiisi la ti ba puı nēr-kuvuŋɔ la, ti ba to'oge puı ba. ²⁰Ti ba wuu di tıge, dee ti karēnbiisi la vaage bōn-gito n deege pıre pıɔ pia la ayi. ²¹Sεba n daan di dia la, buraası daan de wu tusanuu, ti pɔgsı la kɔma källe ka pa'ase.

Azezi sēnnı ko'om zuo

(Amarkı 6:45-52, Azā 6:15-21)

²²Bela poorum ti Azezi base a karēnbiisi la ti ba kē ōorŋɔ dēņε ē dɔɔra mōgrε la doone ke bɔba, dee ti a mēņa weege ti a keese nēr-kuvuŋɔ la. ²³Ēn daan keese nēr-kuvuŋɔ la ki'ulum na, a sēņε la kēnkεrŋa ka zom tāņa zuo ti a pu'vse Nawēnne. Ti wēnne kē, ti ēņa ayıla mā'a bɔna mı. ²⁴La ōorŋɔ la daan boe la mōgrε la puam zāazāare, ti komı'si wē'era ē, ti ba nāmsra, se'ere n soe la, kusebgo n vugri tu'usra ba. ²⁵Ti beere yɔna wiire, ti Azezi sēnna ko'om na zuo wε'esa a karēnbiisi la bɔba. ²⁶Ti karēnbiisi la yē ti a sēnnı ko'om na zuo, ti ba palēņa ēke, ti ba yetu: < <A de la ki-isgne. > > Ti dabeem yōke ba, ti ba kaasra tagursı. ²⁷Bilam mēņa ti Azezi yele ba yetu: < <Keņε-ya ya sūıure, la de la mam, da zoe-ya dabeem. > > ²⁸Ti Apıyεerı yele yetu: < <Zuudāana, la sān sırtı dena la fōn, bɔ mam nōore ti m sēņε ko'om na zuo wa'am fu zē'am. > > ²⁹Ti Azezi yele ē yetu: < <Wa'am. > > Ti Apıyεerı yese ōorŋɔ la puam sēnna ko'om na zuo wε'esa Azezi zē'am. ³⁰La Apıyεerı bıse la kusebgo la n vugri zo'oge la,

ti dabeem yōke ē. Tı a bōna mī ti a mise, kaase yetı: < <Zuudāana, fāage ma.> > ³¹Tı Azezi dare tēge nu'ugo gure ē dee yetı: < <Fu ka bō mam sira zo'oge, bēm ti fu yem yōra?> > ³²Tı ba kē ōorŋo la puam, ti kusebgo la go'oge. ³³Tı karēnbiisi la n boe ōorŋo la puam na ka dūma Azezi nējam yetı: < <Fōn siri de la Nawēnne Dayua la.> >

Azezi botı bā'adōma yē ĩmā'asum Zenezareti

(Amarkı 6:53-56)

³⁴Tı ba pārgε mōgrε la dooge paage Zenezareti tēja. ³⁵Tı zē'e-ēja nērba bāŋε Azezi, tōm nērba tēn-sēba n lem na wuu, ti ba tarı bā'adōma wuu wa'am a zē'am. ³⁶Ba daan sose ē yetı a base ti bā'adōma la kalum a fuugo nōore mā'a. La sēba wuu n daan kalum a fuugo la yē ĩmā'asum me.

15

Yaabdōma zāsŋo, la sela n botı nēra dena dēgrō

(Amarkı 7:1-23)

¹Tı Farisi* dōma, la lō* karēnsāandōma n ze'ele Zerizalem wa'am wa soke Azezi yetı: ²< <Bēm ti fōn karēnbiisi la ka sakra ti yaabdōma malŋo la? Ba sān yetı ba di, ba ka peerı nu'usi wu ti yaabdōma n utı se'em na.> > ³Tı a lebe soke ba yetı: < <Bēm ēŋε ti yāma mē s'ısrā Nawēnne nōore la, ya mēja malŋo ĩyā? ⁴Nawēnne yetı: <Nanna fu sō, la fu ma.> Dee le yetı: <Sēka n tōge a sō bu a ma be'em, dēnı ti ba ku ē.> ⁵La yāma yetı, nēra sān yele a sō bu a ma yetı: <Mam n tarı nı bōn-sēka ti m sōŋε fō la, de la Nawēnne bōnō>, la ka le dena ti a ēŋε sela bō a sō. ⁶Bela, ya basrı ti Nawēnne

yetɔga la lebge la zāṅa, dee dɔla ya mēṅa malṅɔ. ⁷Pulibsum dōma wā, A'ezayi* yvun sɪrɪ to'oge Nawēnne yetɔga tɔge ya yelle, tɪ Nawēnne yetu:

⁸ < Nēr-bāna wā pēgrɪ mam na ba nōore yetɔga, la ba sūure zāage la mam mɛ.

⁹ Ban nā'asrɪ mam na, la de la zāṅa.

Se'ere n soe la, ba zāsɪ na zāsṅɔ n de nērsaalba lɔɔ. > > >

¹⁰ La Azezi wi nēr-kvɔṅɔ la, tɪ ba wa'am na a zē'am, tɪ a yeke ba yetu: < < Selse-ya sōṅa sōṅa wōm a vōore: ¹¹ La dagɪ sɛla n kē'ertɪ nērsaala nōorum n botɪ a dɛna dēgrɔ, la de la sɛla n ze'etɪ nērsaala nōorum yesra n botɪ a dɛna dēgrɔ. > >

¹² Bela tɪ a karēnbiisi la lɛm ē, soke ē yetu: < < Fōn mi tɪ Farisi dōma la n wōm fōn tɔge bela la, la dōn ba sūure mɛ? > > ¹³ Tɪ Azezi lerge yetu: < < Sɛla woo tɪ mam Sɔ Nawēnne ka bure, ba wun vōoge ē base.

¹⁴ Base-ya ba, tɪ ba ān wɔ fɔɔsɪ n ve'ertɪ fɔɔsɪ. Fua sān ve'era fua, bāma bayi wuu wun lui la boko pvam. > >

¹⁵ Tɪ Apɪyɛertɪ yeke ē yetu: < < Pa'ale tɔ makre la vōore. > > ¹⁶ Tɪ Azezi soke ba yetu: < < Yāma yem mē ka like? ¹⁷ Yāma ka mi tɪ bōn-sɛka woo n kē'ertɪ nērsaala nōorum tollɪ la a pvorum, tɪ a yē'era ba basra? ¹⁸ La sɛla n yesrɪ nērsaala nōorum ze'ele la a sūure pvam, la de la bōn-bāma n botɪ a dɛna dēgrɔ. ¹⁹ Se'ere n soe la, putē'e-yooro ze'etɪ la nērsaala sūure pvam botɪ a bɔɔra tɪ a ēṅɛ be'em: Nēr-kva, la yalsɪ, la taaba pɔgba la taaba sɪrba gā'a, la nayigum, la pōmpɔrṅɔ, la pɔ'ore yetɔga. ²⁰ La de la bāna wā n dēgrɪ nērsaala. La nēra sān di dee ka peege nu'usi, bela ka dēgrɪ nēra. > >

Kanaan pɔka bɔ Azezi sɪra

(Amarkɪ 7:24-30)

²¹Azezi daan fōrge bilam sēŋe la Tiiri*, la Sidō so'olum. ²²Ti Kanaan*f8* pōka ze'ele tēn-bāma wa'am a zē'am wa tōgra ke'enke'em yeti: << Zuudāana, Adavidi* yuŋa, zoe m ninbāalga, mam pōyua ti kulkā'arga nāmsra ē halı zozo'e. >> ²³Ti Azezi ka lerge ē se'ere. Ti a karēnbiisi la paage a zē'am yele ē yeti: << Eŋe bō ē ti a fōrge, ti a kaasrı dōla tō. >> ²⁴Ti Azezi lerge ba yeti: << Nawēnne tōm mam na lsrayeli dōma n ān wu piisi n bō la mā'a zē'am. >> ²⁵Ti pōka la paage ka dūma tēŋa a nēŋam yele ē yeti: << Zuudāana, sōŋe ma. >> ²⁶Ti Azezi lerge yeti: << La ka mase ti ba dıke kōma dia bō baası. >> ²⁷Ti pōka la lerge yeti: << Zuudāana, la de la sra. La baası diti la di-zōra n luti ba dāana taablı tilum. >> ²⁸Ti Azezi lerge ē yeti: << Pōka, fu bō mam sra zo'oge me. La wun ēŋe wu fōn boori se'em na bō fō. >> La wakat-ēŋa mēŋa ti a pōyua la yē ĩmā'asum.

Azezi boti nērba zozo'e yē ĩmā'asum

²⁹Azezi daan ze'ele bilam sēŋe la Galile mōgre la nōorum, ka zom tāŋa zuo zēa. ³⁰Ti nēr-kuvuŋo zozo'e tari kōornō, la fōosi, la kobro, la mugro, la bā'adōma baseba zozo'e wa'am Azezi nēŋam. Ti Azezi boti ba yē ĩmā'asum. ³¹La nērba la n daan yē mugro la n tōgrı, ti kobro la yeege, ti kōornō na sēnna, ti fōosi la yēta la, la daan di'ige ba me, ti ba pēgra Nawēnne n de lsrayeli dōma Zuudāana la.

Azezi le bō nēr-kuvuŋo dia

(Amarkı 8:1-10)

³²Azezi daan wi a karēnbiisi la me yele ba yeti: << Nēr-kuvuŋo wā ninbāalga n tari mam, se'ere n soe la, la de la dabsa atā n wāna ti ba boe mam zē'am, dee ka tara dia wun di. La mam ka boori ti m base ba ti ba kule la kōm, ba tā wun ka vibe sore me. >> ³³Ti a karēnbiisi la soke ē yeti: << Ti wun yē dia la be, zē'e-ēna n de mōom wā, bō

nēr-kuvḡo wā wuu ti la seke ba? > > ³⁴Ti Azezi soke ba yeti:
 < < Yāma tarı la borborı bale? > > Ti ba lerge yeti: < < Bayopı, la
 zūn-pıgsı fēe. > > ³⁵Ti Azezi yele nēr-kuvḡo la yeti, ba zı'ire tēḡa.
³⁶Dee dıke borborı bayopı la, la zūma la pu'use Nawēnne, dee fiise
 bɔ a karēnbiisi la, ti ba to'oge puı nēr-kuvḡo la. ³⁷Ti ba wuu di tıge,
 dee ti ba vaage bōn-gito n deege pıre pıto bayopı. ³⁸Seba n daan di
 dia la, buraası de la tusa anaası, ti pıgsı la kɔma källe ka pa'ase.
³⁹Bela poorım, Azezi base nēr-kuvḡo la ti ba kule me, dee kē õorḡo
 sēḡe Magdala.

16

Farisi dōma, la Saduse dōma pulibsum

(Amarkı 8:11-21, Aluki 12:54-56)

¹Ti Farisi* dōma, la Saduse* dōma baseba wa'am Azezi zē'am wa
 bɔra ti ba make ē bıse, yele ē yeti, a ēḡe bōn-yālma pa'ale ti ēḡa
 ze'ele la Nawēnne yire. ²Ti Azezi lerge ba yeti: < < Zaanōore, sawara
 sān mō'oge, yāma yeti saaga kān ni. ³La bulika, sawara sān mō'oge
 sobge, yāma yeti saaga n won ni. Yāma bısrı la sawara mina la ān
 se'em, dee ka tāna won bāḡe bōn-seba n utı leele wā n pa'alı sela.
⁴Zamāan-ēna nērba n de nēr-be'estı, dee ka dɔla Nawēnne la sıra la,
 boorı ti ba yē la bōn-yālma, la ba kān yē bōn-yālma, sān dagna
 Nawēnne nōtɔ'ɔsa Azonaası* bōn-yālma la. > > La a base ba me dee
 fōrge.

⁵Ti ēḡa la a karēnbiisi la dɔra mōgrε la doone ke bɔba, ti a
 karēnbiisi la yīm ka dıke borborı. ⁶Ti Azezi yele ba yeti: < < Guuse-
 ya ya mēḡa la Farisi dōma, la Saduse dōma dābille la. > > ⁷Ti
 karēnbiisi la tē'esra yeti: < < Tōma n ka dıke borborı la iyā ti a yele

bɛla. > > ⁸Tɪ Azezi bāŋɛ ban tē'esrɪ se'em na, yele ba yetɪ: < < Ya ka bɔ mam sɪra zo'oge. Bēm tɪ yāma tē'esra yetɪ, la de la yāma n ka tarɪ borbɔrɪ la iyā? ⁹Yāma nān ka bāŋɛ a vōore? Yāma ka tērɪ, borbɔrɪ banuu la tɪ buraasɪ tusanuu daan di tɪgɛ deege la, yāma daan vaage di-sɛba n daan deege la pɪrɛ la pɪtɔ balɛ? ¹⁰La borbɔrɪ bayopɔɪ la, tɪ buraasɪ tusanaasɪ la daan di tɪgɛ deege la, yāma vaage di-sɛba n deege la pɪrɛ la pɪtɔ balɛ? ¹¹Bēm tɪ ya ka bāŋɛ tɪ la dagɪ borbɔrɪ yelle tɪ mam tɔgrɪ la ya? Guuse ya mēŋa la Farisi dōma, la Saduse dōma dābille la yelle. > > ¹²Tɪ ba yāŋa bāŋɛ tɪ a ka yele ba tɪ ba guuse ba mēŋa la dābille sɛba tɪ ba tarɪ gaana borbɔrɪ zom na, la de la Farisi dōma, la Saduse dōma zāsŋɔ la tɪ a tɔgrɪ.

Apɪyɛerɪ pa'alɛ Azezi n de nēr-sɛka

(Amarkɪ 8:27-30, Aluki 9:18-21)

¹³Azezi daan paage la tēŋa yv'vɛrɛ n de Filipɪ Sezaare, soke a karēnbiisi la yetɪ: < < Nērba yetɪ mam n de Nērsaala* Dayva la de la āne? > > ¹⁴Tɪ ba lerge yetɪ: < < Sɛba yetɪ fōn de la Azā n daan misri nērba ko'om pvam na. Tɪ sɛba yetɪ fōn de la Nawēnne nōtɔ'ɔsa A'eli*. Tɪ baseba yetɪ fōn de la Nawēnne nōtɔ'ɔsa Azeremi, bu Nawēnne nōtɔ'ɔsrɪba la nēra ayɪla. > > ¹⁵Tɪ a lebe soke ba yetɪ: < < La yāma yetɪ mam de la āne? > > ¹⁶Tɪ Asimō-pɪyɛerɪ lerge ẽ yetɪ: < < Fōn de la Kriɪ*, Nawēnne n de vɔm dāana la Dayva. > > ¹⁷Tɪ Azezi lebe yele ẽ yetɪ: < < Asimō, Azā dayva, fɔ tarɪ zu-yēlga, se'ere n soe la, la dagɪ nērsaala n pa'alɛ fɔ wāna, la de la mam Sɔ Nawēnne n boe saazuum na. ¹⁸Mam yetɪ fɔ tɪ fɔ de la Apɪyɛerɪ, a vōore de la tāmpɪa, la tāmpɪ-ēna zuo tɪ mam wun vigle m nērba lagsgɔ zē'a. La kūm pāŋa kān tā'age ẽ. ¹⁹Mam wun bɔ fɔ Nawēnne so'olum* kulɪnbɪɛ. La bōn-sɛka woo tɪ fɔ wun lɔ dūnia wā zuo, bōn-ēŋa wun lɔ Nawēnne yire.

La bõn-seka woo ti fu wun lorge dũnia wã zuo, bõn-ẽᅇa wun lorge Nawẽnne yire. > > ²⁰Azezi yele bẽla dee kã'an a karẽnbiisi la yeti, ba da yele nẽra nẽra ti ẽᅇa de la Kriisi.

Azezi dẽᅇe tɔge a kũm yelle

(Amarki 8:31-9:1, Aluki 9:22-27)

²¹Wakat-ẽᅇa ti Azezi daan pɔse zãsna a karẽnbiisi la yeti: < < Dẽni ti mam sẽᅇe Zerizalem, ti tẽᅇa la kẽma, la kãabgɔ* kẽma nẽᅇadõma, la lɔɔ* karẽnsãandõma ka nãmse mam halı zozo'e, la ba wun ku mam me. La dabsa atã daare mam wun vo'oge. > > ²²Ti Apıyɛeri tari ẽ yese kẽnkernᅇa ka yele ẽ yeti: < < Zuudãana, da le tɔge bẽla, Nawẽnne wun gu fo, la kãn ẽᅇe fu bẽla. > > ²³Ti Azezi gelge yele Apıyɛeri yeti: < < Lebe mam poorum, Asũtãana wã. Fõn boori ti fu boti mam lebe la poorum. Fu tẽ'esgɔ la dagi Nawẽnne tẽ'esgɔ, la de la nẽrsaala tẽ'esgɔ. > >

²⁴Dee yele a karẽnbiisi la yeti: < < Nẽra sãn bɔɔra ti a dɔla mam, dẽni ti a base a mẽᅇa n boori se'em, dee sake nãmsgɔ wu nẽra n buke a kũm dɔ-puurᅇa* dɔla mam. ²⁵Se'ere n soe la, nẽr-seka woo n boori ti a gu a vɔm, a wun koᅇe ẽ. La nẽr-seka woo n sake ti a koᅇe a vɔm mam ãyã, a wun yẽ vɔm. ²⁶La nẽra sãn yẽ dũnia wã sela woo, dee koᅇe vɔm Nawẽnne zẽ'am, a yõorɔ de la bẽm? Sela ka boe ti nẽra wun duke teege vɔm. ²⁷Nẽrsaala Dayva*f9* la wun leme wa'am me la a Sɔ Nawẽnne na'am pãᅇa, la a malekadõma*. La wakat-ẽᅇa a wun yo nẽra woo mase la a tõone. ²⁸Mam yeti ya la sira, ti nẽr-seba n ze kalam wã baseba kãn ki, sãn dagna ti ba wa yẽ la Nẽrsaala Dayva la n sẽm, la a na'am. > >

17

Azezi nēŋa teere

(Amarki 9:2-13, Aluki 9:28-36)

¹Dabsa ayoobi n daan tole, ti Azezi boti Apityeeri, la Azaki, la a yibga Azā doose ē sēŋe kēnkernja ka zom tān-kāte zuo. ²Ti a nēŋa teege ba nēŋam, yēgra wu wuntēŋa la. Ti a futo pelge halu wu peelem na. ³Ti Amoyisi* la A'eli* puke ba zē'am tōgra la Azezi. ⁴Ti Apityeeri yele Azezi yeti: << M Zuudāana, tōma n boe kalam wā, la ān sōŋa me. Fu sān bōra, mam wun ti pōnsi batā, bō fōn ayula, bō Amoyisi ayula, bō A'eli ayula. >> ⁵La ēn nān ken bōna mī tōgra la, ti sawate n yēgru wa'am wa lile ba. Ti kōa ze'ele sawate la puam yeti: << Ēna de la mam Dayva ti mam nōŋe la m sūure wuu, a paage la mam yem. Selse-ya a yetōga. >> ⁶La a karēnbiisi la n wōm bela la, ti dabeem yōke ba zozo'e, ti ba lui dike nēnsi vōgle tēŋa.

⁷Ti Azezi lem kalum ba yeti: << Isge-ya, da zoe-ya dabeem. >>

⁸Ti ba gorge buse, ka le yē nēra, sān dagna Azezi mā'a.

⁹La ban daan ze'ele tāŋa la zuo sigra la, Azezi kā'an ba yeti: << Da yele-ya nēra sela ti ya yē wā, sān dagna ti Nērsaala* Dayva la wa ki me dee vo'oge. >> ¹⁰Ti a karēnbiisi la soke ē yeti: << Wāne ti loo karēnsāandōma yeti, dēni ti A'eli wun dēŋe Krisi* wa'am? >>

¹¹Ti Azezi lerge ba yeti: << La de la sira ti A'eli n wun dēŋe wa'am wa le malge sela woo. ¹²La mam yeti ya me ti A'eli pōn wa'am me, ti ba ka bāŋe ē, dee ēŋe ē ban boori se'em. Ba mē wun nāmse Nērsaala* Dayva la bela. >> ¹³Ti a karēnbiisi la yāŋa bāŋe ti la de la Azā n daan misri nērba ko'om puam na yelle ti a tōge.

Kinki'ire n tarti bia, ti Azezi boti a yē ĩmā'asum

(Amarki 9:14-29, Aluki 9:37-43a)

¹⁴Ban daan lebe ka paara nēr-kuvŋo la zē'am na, ti buraa wa'am wa

yigle Azezi nējam, ¹⁵yele ē yetu: << M Zuudāana, zoe m dayva ninbāalga, a luti la kinki'ire tı la nāmsra ē zozo'e. La sān ēn girge ē, a luti la bugum puam, bu ko'om puam. ¹⁶Bela tı mam tarı ē wa'am fu karēnbiisi la zē'am, la ba ka yāņe botı a yē ĩmā'asum. >> ¹⁷Tı Azezi ye le ba yetu: << Zamāan-ēna nērba, ya ka bɔ'ɔrı mam sira, la ya ka utı sōņa. Mam wun bɔna la yāma, mǎ'age m mēņa halı ka paage la wakat-kāna? Tarı-ya bia la wa'am. >> ¹⁸La Azezi daan tāse kulkā'arga la mε, tı a yese dee base bia la, tı a yē ĩmā'asum bilam mēņa.

¹⁹Tı karēnbiisi la sēņe Azezi zē'am bāma mǎ'a, ka soke ē yetu: << Bēm tı tōma ka yāņe dige kulkā'arga la tı a yese? >> ²⁰Tı a lerge ba yetu: << Yan ka bɔ sira zo'oge la ĩyā. Mam yetu ya la sira sira, tı yāma n bɔ mam sira la, sān āna baa pıka wu sɔ'ɔrɔ biire la, ya tā wun ye le tǎn-ēna yetu: < Vurge sēņe ke >, la a wun ēņe la bela. La sela ka boe tı ya kǎn tā'age ēņe. ((²¹La de la pu'usgɔ, la nōorlua mǎ'a tı ya wun yāņe dige kulkā'ar-ēņa buuri.)) >>

Azezi le tɔge a kūm, la a vo'ore yelle

(Amarkı 9:30-32, Aluki 9:43-45)

²²Daare ayıla tı Azezi la a karēnbiisi la lagum bɔna Galile, tı a ye le ba yetu: << Ba wun dıke Nērsaala* Dayva la ēņe la nērba nu'usum, ²³tı ba ku ē. La dabsa atā daare a wun vo'oge mε. >> En ye le bela la, tı ba sūure sǎ'am zozo'e.

Wēnde-kāte lampo yua yelle

²⁴Azezi la a karēnbiisi la daan paage la Kapernaum tēņa, tı Wēnde-kāte* la lampo-tɔ'srıba sēņe ka soke Apıyεrı yetu: << Ya karēnsāama la yɔɔrı Wēnde-kāte la lampo mε bu? >> ²⁵Tı a lerge yetu: << Ee, a yɔɔra. >> Tı Apıyεrı kule yire, tı Azezi dēņe soke ē

yeti: < < Asimō, fōn tē'esrɪ tɪ dūnia wā na'adōma to'osrɪ ba lampo la āndōma zē'am? Tēŋa dōma zē'am bu, seba n de sāama la zē'am? > >
²⁶Tɪ Apɪyɛrɪ yeti: < < Sāama zē'am. > > Tɪ Azezi yele ē yeti:
 < < Bɛla, tēŋa la dōma nēŋa ka boe mĩ. ²⁷La tōma n ka boorɪ tɪ tɪ sã'am ba sũure la ãyã, sēŋe ka lobge zũmbãŋa mōgre pvam, fōn yōke zũn-sɛka yien na, fu ya'age a nōore, tɪ fu wun yē lag-kōbre, dɪke sēŋe ka yɔ mam, la fōn ãyã. > >

18

Āne n wun dɛna nēr-kāte Nawēnne so'olum pvam

(Amarkɪ 9:33-48, Alukɪ 9:46-48, 17:1-2)

¹Wakat-ēŋa tɪ karēnbiisi la daan lɛm Azezi soke ē yeti: < < Āne n de nēr-kāte Nawēnne so'olum* pvam? > > ²Tɪ Azezi wi bi-pɪka ze'ele ba tēŋasuka, ³dee yele ba yeti: < < Mam yeti ya la sɪra sɪra, tɪ ya sãn ka teege yɛm āna wu kɔma la, ya kãn kē Nawēnne so'olum pvam. ⁴Bɛla, sɛka woo n sike a mēŋa āna wu bi-pɪka la, a wun dɛna nēr-kāte Nawēnne so'olum pvam. ⁵La sɛka n to'oge bi-pɪka n ãn wu ēna, mam yu'urɛ ãyã, a to'oge la mam mēŋa.

⁶La nēra sãn botɪ kɔm-pɪgsɪ bãna wã n bɔ mam sɪra la ayɪla base Nawēnne sore, sɪbgrɛ sɛka tɪ a wun yē la, ba sãn dɪke nēerɛ kug-kāte lɔ yulɛ a yugla lobe ē base ko-kāte pvam n sōɪ.

⁷Toogo boe dūnia zuo, nērba n pã'asrɪ nērba tɪ ba basrɪ Nawēnne sore la ãyã. Dɛnɪ tɪ pã'asgɔ wa'am, la nēr-sɛka n pã'asrɪ la wun yē toogo.

⁸Fu nu'ugo bu fu nã'are sãn yeti a botɪ fu base Nawēnne sore, wige ba base. Fu sãn tara nu'u-yēŋɔ bu nã'a-yēŋɔ dee kē Nawēnne yire vɔa, n sōɪ fōn tarɪ nu'usi bayi, la nãma bayi, dee tɪ ba lobe fu base bugum

n ka kīŋri puam. ⁹La fu nifo sãn yeti a boti fu base Nawēnne sore, kurge ē base. Fu sãn tara nin-yēŋɔ dee kē Nawēnne yire vɔa, n sōi fōn tarti nini bayi, dee ti ba lobe fu base bug-tēŋa*. > >

Pesgo n bɔi makre

(Aluki 15:3-7)

¹⁰Azezi le yeke ba yeti: < < Guuse-ya da pɔ'ora kɔm-bāna wā baa ayula. Mam yeti ya ti ba malekadōma n boe Nawēnne yire, boe mam Sɔ Nawēnne nēŋam me wakate woo.

((¹¹Nērsaala* Dayva la wa'am ti a fāage la nēr-seba n bɔi la.))

¹²Yāma tē'esri la bēm? Nēra sãn tara piisi kɔbga, ti ayula bɔi, a kãn base piswei la awei la kũnkũnne zuo ti ba ɔbra, dee sēŋe ka ε ayula n bɔi la? ¹³La mam yeti ya la sira, ti a sãn yē ē, a sũure won ēŋe yēlum me la ayula la gānna piswei la awei n ka bɔi la. ¹⁴Ya Sɔ Nawēnne mē ān na bela, a ka boori ti kɔm-piɔsi bāna ayula bɔi. > >

Nērba n won malge ba yelle la taaba se'em

¹⁵Ti Azezi le yeti: < < Fu sɔbia sãn ēŋe be'em, sēŋe ka yē ē fōn na ēŋa mā'a, pa'ale ē a tuure la. A sãn sake fu nōore, fu to'oge ē base.

¹⁶La a sãn zagse fu nōore la, fu doose nēra ayula bu bayi sēŋe a zē'am.

Ti nērba bayi bu batā dena kaset-dōma yelle la māalgɔ iyā, wu Nawēnne gōŋɔ n yeke se'em na. ¹⁷La a sãn zagse ka selse ba, fu yeke wēndeego la nērba. La a sãn zagse ka selse wēndeego la nērba, ya bɔsra ē wu nēra n ka doli Nawēnne, bu tōon-be'ero dāana. ¹⁸La mam yeti ya la sira sira, ti bōn-seka woo ti ya won lu dūnia wā zuo, won lu Nawēnne yire. La sela ti ya won lorge dūnia wā zuo, won lorge Nawēnne yire. ¹⁹Mam ken yeti ya ti nērba bayi sãn naage nōore dūnia wā zuo sose mam Sɔ Nawēnne sela, a won ēŋe bɔ ba. ²⁰La

nērba bayi bu batā sãn lagse taaba mam yu'ure iyā, mam boe la ba le

mε. > >

Tõntõnna n ka bɔ'ɔri sugri makre

²¹Ti Apıyεeri lem Azezi soke ẽ yeti: < < M Zuudãana, mam sɔbia sãn ẽɲε mam be'em, nõore wãne ti mam wun base ẽ taale? Nõore ayopɔi bu? > > ²²Ti Azezi yele ẽ yeti: < < Mam ka yeti nõore ayopɔi mã'a, mam yeti nõore pisyopɔi nõore buyopɔi.

²³La de la bela, ti Nawenne so'olum ãna wu naba n boori ti a tõntõnıba geele a tõoma pa'ale ẽ. ²⁴La ẽn pɔse bɔna mı geela la, ti ba tarı nẽra ayula n di a sãnne lig-kõba yu'vre n de talã*f10* tuspia wa'am. ²⁵La a daan ka tarı sela wun yɔ, ti a zuudãana la bɔ nõore yeti, ba koose ẽ, la a pɔga la a kɔma, la a lɔgrɔ wuu yɔ sãnne na. ²⁶Ti tõntõnna la ka dũma tẽɲa a zuudãana la nẽɲam sose ẽ yeti, a ẽɲε sugri ti ẽɲa wun yɔ sãnne na wuu. ²⁷Ti a zuudãana la zoe a ninbãalga, base sãnne na, dee base ẽ ti a fõrge.

²⁸La tõntõn-ẽɲa n yesrı la, a tu'vse la a tõntõn-tadãana n di a sãnne lig-kõba yu'vre n de deniye*f11* kɔbga, yõke ẽ kẽke a kõnkɔa, dee yele ẽ yeti: < Yɔ ma m sãnne na. > ²⁹Ti a tõntõn-tadãana la ka dũma tẽɲa a nẽɲam sose ẽ yeti, a ẽɲε sugri ti ẽɲa wun yɔ a sãnne na. ³⁰Ti a zagse, dee tarı ẽ sẽɲε ka kẽ'ese yu'a deem yeti, a sãn ka yɔ ẽɲa a sãnne na, a kãn yese.

³¹La a tõntõn-taaba la n yẽ bela la, ti ba sũure sã'am zozo'e. Ti ba sẽɲε ba zuudãana la zẽ'am ka yele ẽ sela n ẽɲε la wuu. ³²Ti zuudãana la botı ba wi ẽ, ti a yele ẽ yeti: < Tõntõn-be'ego wã, sãn-seka wuu ti fõn di la, mam base mε ti la ba'ase, fõn sose mam na ıyã. ³³La mase nı mε ti fu mẽ zoe fu tadãana la ninbãalga, wu mam n zoe fõn ninbãalga se'em na. > ³⁴La a zuudãana la sũure yĩige mε, ti a base ti ba tarı ẽ sẽɲε ka kẽ'ese yu'a deem ti ba nãmse ẽ halı ti a yɔ sãnne na

wuu.

³⁵Mam So Nawēnne mē wun ēnje ya la bela, ya sãn ka base ya sɔbiisi tōon-be'ero taale la ya sũure wuu. > >

19

Pɔka lebsgo yelle

(Amarki 10:1-12)

¹Azezi n daan tɔge bela k'ulum na, a yese Galile sēnje la Zude so'olum Zurdē doone ke bɔba. ²Ti nēr-kuvuɔ zozo'e doose ē, ti a boti ba bā'adōma yē ĩmā'asum.

³Ti Farisi* dōma baseba wa'am a zē'am ti ba di a yem buse, soke ē yeti: < <Sore boe ti buraa lebse a pɔga n wen ēnje bōn-sɛka woo me bu? > > ⁴Ti Azezi lerge yeti: < <Yāma ka karēnje Nawēnne gōɔ la? Pĩ'iluɔ wakate, Nawēnne n nāam nērsaalba la, a nāam na buraa la pɔka. ⁵Bela ĩyā ti a yeti, buraa ga base a sɔ, la a ma, dee lagum na a pɔga, ti bāma bayi lebge ayula. ⁶Bela, ba ka le dɛna nērba bayi, ba yāɔa lebge la ayula. Bela, sela ti Nawēnne lagum na taaba, nērsaala da welge ba. > >

⁷Ti Farisi dōma la soke ē yeti: < <La bēm ĩyā ti Amoyisi* yuun bɔ nōore yeti, buraa sãn yeti a lebse a pɔga, a bɔ ē pɔgdire lebsgo gōɔ, dee tarı ē ka lebse? > > ⁸Ti Azezi lerge yeti: < <La de la ya sũure n ke ti ya ka sake pa'algɔ la ĩyā, ti Amoyisi yuun sake ti ya lebse ya pɔgba. Pĩ'iluɔ wakate, la yuun ka ān wāna. ⁹La mam yeti ya ti, buraa ga sãn lebse a pɔga ti la sãn dagna ti a gā la buraasi, a sãn le di pɔka ayēma, a ēnje la be'em wu nēra n gā'are la a tadāana pɔga. > >

¹⁰Ti a karēnbiisi la yeke ē yeti: < <Buraaga la a pɔga yelle sãn dɛna bela, buraa ga sãn ka di pɔka n sōi. > > ¹¹Ti a yeke ba yeti: < <La

dagı nērba wuu n wun yāņe to'oge yetɔg-ēna, sān dagna seba ti Nawēnne sōņe ba ti ba to'oge. ¹²Nērba baseba n boe ti ba dɔge ba ti ba āna wu ba fɔ ba mē na, ka dita pɔgsı. Tı nērba mē fɔ buraasi baseba. Tı Nawēnne so'olum ĩyā, ti seba mē ka dita pɔgsı. Sēka n tā wun yāņe to'oge yetɔg-ēna, a to'oge. > >

Azezi pu'use Nawēnne bɔ kɔm-pıgsı

(Amarkı 10:13-16, Aluki 18:15-17)

¹³Tı nērba tarı kɔm-pıgsı wa'am Azezi zē'am ti a dıke nu'usi pagle ba zuto pu'use Nawēnne bɔ ba. Tı a karēnbiisi la zēbe nērba la. ¹⁴Tı Azezi yele yetı: < <Base-ya kɔm-pıgsı la ti ba wa'am mam zē'am, da gu'ura-ya ba. Se'ere n soe la, Nawēnne so'olum de la nēr-seba n ān wu kɔma wā bōnɔ. > > ¹⁵La a dıke la a nu'usi pagle ba zuto pu'use Nawēnne bɔ ba, dee fōrge.

Budib-polle n de bōntarsa yelle

(Amarkı 10:17-31, Aluki 18:18-30)

¹⁶Tı buraaga wa'am Azezi zē'am wa soke ē yetı: < <Karēsāama, mam wun tōm na tōon-sōņɔ kāna yē vɔm n ka ba'asrı? > > ¹⁷Tı a lerge ē yetı: < <Bēm ti fu sakra ma sela n ān sōņa yelle? Nawēnne mā'a n ān sōņa. Fu sān bɔɔra ti fu yē vɔm n ka ba'asrı, fu sake Nawēnne n bɔ a nōore se'em na. > > ¹⁸Tı a soke yetı: < <Nawēnne nōore yetɔg-bāna? > > Tı Azezi lerge ē yetı: < <Da ku nēra, da gā'are la fu tadāana pɔga, da zū, da tɔge pōmpɔrņɔ kaseto, ¹⁹nanna fu sɔ, la fu ma, la fu nōņe fu tadāana wu fu mēņa. > > ²⁰Tı budib-polle la yele ē yetı: < <Mam pōn sakra bōn-bāna wuu mē, bēm n deege? > > ²¹Tı Azezi yele ē yetı: < <Fu sān bɔɔra ti fu mase sela woo puam, sēņe ka koose fōn tarı sela la wuu dıke bɔ nasdōma, ti fu

wun yē bōntarsōm Nawēnne yire, dee wa'am wa dōla mam. > >

²²Budib-polle la n wōm bēla la, a fōrge mē la sū-sā'anjō, se'ere n soe la, a tarī la bōntarsōm zo'oge.

²³Tī Azezi yele a karēnbiisi la yeti: < < Mam yeti ya la sira sira, ti la tō mē bō bōntarsa ti a kē Nawēnne so'olum puam. ²⁴La mam le yeti ya ti, la de la nāana ti yugne doose fupīim yoko puam yese, gānna bōntarsa n wun kē Nawēnne so'olum puam. > > ²⁵La a karēnbiisi la n wōm bēla la, ti la di'ige ba halī zozo'e, ti ba yeti: < < La sān dēna bēla, āne n wun tā'age yē fāare? > > ²⁶Tī Azezi bīra ba, dee yeti: < < Nērsaala ka tā wun ēje bōn-ēna, la Nawēnne tā sēla woo ita mē. > >

²⁷Tī Apīyēri yele Azezi yeti: < < Tōma base sēla woo mē, dee dōla fōn. Bēm ti tōma wun yē? > > ²⁸Tī Azezi yele ba yeti: < < Mam yeti ya la sira sira, ti wakat-seka ti sēla woo wun lebge paalsi la, Nērsaala Dayva*f12* la n wun zī'ire a na'am bīmbīnne zuo la, yāma sēba n dolī mam na mē wun zī'ire na'am bīmbīna pia la ayi zuto, di Israyeli buuri pia la ayi la sarīya. ²⁹La sēba wuu n base ba yiē, bu ba kēendōma, la ba yībsi, bu ba sōdōma, bu ba madōma, bu ba kōma, bu ba vatō mam yu'bre īyā, ba wun to'oge bāma n base sēla la nōore kōbga, dee yē vōm n ka ba'asri. ³⁰La nējam dōma zozo'e wun lebge poorum dōma, ti poorum dōma zozo'e lebge nējam dōma. > >

20

Tōntōnība yōwō makre

¹Azezi le yeti: < < Nawēnne so'olum* ān wu yidāana n yese bulika yu'ujō yu'ujō, sēje ka dīke tōntōnība ti ba tōm a va'am. ²La a tōge ku la tōntōnība la ti ēja wun yō ba lag-kōbre ayīla daare puam, dee tōm

ba a va'am na ti ba ka tōm. ³Ti wuntɛɛŋa bi fɛe, ti a le yese yɛ nɛrba baseba n ze da'am ka tōnna, ⁴ti a yele ba yeti: <Ya mɛ sɛŋɛ mam va'am na ka tōm, ti mam wun yɔ ya lan mase se'em.> ⁵Ti ba isge sɛŋɛ va'am na. Ti a le yese wuntɛɛŋa zuu-tɛŋasuka, la wɛngɛlɛŋa le ɛŋɛ bɛla. ⁶Ti a le yese wɛnne n we'esti lua, le yɛ nɛrba baseba n ze, ti a soke ba yeti: <Bɛm iɣɛ ti yɛma ze kalam daare la wuu puam ka ita sɛla sɛla?> ⁷Ti ba lerge yeti: <Nɛra nɛra ka dɪkɛ tōma tōoma.> Ti a yele ba yeti: <Ya mɛ sɛŋɛ m va'am na ka tōm.>

⁸Ti wɛnne kɛ, ti va'am na dɛana yele sɛka n bisri a tōoma la yelle yeti: <Wi tōntōnɪba la ti ba wa'am ti fu yɔ ba. Dɛŋɛ yɔ sɛba n sɛŋɛ poorum na ka paage sɛba n dɛŋɛ sɛŋɛ la.> ⁹Ti sɛba n sɛŋɛ wɛnne n we'esti lua la wuu to'ose lag-kōbre ayila ayila. ¹⁰Ti sɛba n dɛŋɛ sɛŋɛ la tɛ'esra ti bɛama wun to'ose gɛnna sɛba n wa'am poorum na. La ba wuu to'ose la lag-kōbre ayila ayila wu sɛba n sɛŋɛ poorum na n to'ose se'em na. ¹¹La sɛba n dɛŋɛ sɛŋɛ la n to'ose lag-kōbre ayila ayila la, ba yōnni yidɛana la mɛ, ¹²yeti: <Sɛba n wa'am poorum na tōm na karf-ayila mɛ'a, la fōn base ti ba to'ose zōna la tōma sɛba n tōm halɪ daare la wuu puam nɛmɛ la wuntɛɛŋa la.> ¹³Ti a lebe yele ba nɛra ayila yeti: <M sɛɛ, mam ka ɛŋɛ fu sɛla n ka mase. Ti tɔgɛ ku, ti fu sake ti fōn wun to'oge la lag-kōbre ayila. ¹⁴To'oge fu yɔɔɔ sɛŋɛ fōrgɛ. La de la mam n boori ti m yɔ sɛba n wa'am poorum na zōna la fōn. ¹⁵Mam ka tari nōore ti m dɪkɛ m bōnɔ ɛŋɛ sɛla ti mam boori? Bu mam n ɛŋɛ sōŋa la iɣɛ ti fōn ita sūure?> ¹⁶Bɛla, nɛŋam dōma wun lebge poorum dōma, ti poorum dōma lebge nɛŋam dōma.> >

Azezi le tɔgɛ a kūm, la a vo'ore yelle

(Amarki 10:32-34, Aluki 18:31-34)

¹⁷Azezi daan we'esti la Zerizalem welge a karɛnbiisi pia la ayi la

mā'a, yele ba yeti: ¹⁸< <Ya yē ya, ti we'esti la Zerizalem, bilam ba wun dūke Nērsaala* Dayva la me ka ēṅe kāabgɔ* kēma nēṅadōma, la bɔ* karēnsāandōma nu'usum, ti ba wun tɔge a yelle ku yeti, a mase la kūm. ¹⁹La ba wun dūke ē ēṅe la bu-zāṅsi* nu'usum, ti ba la ē, wē ē na ka'asa, dee ka ē dɔ-puurṅa* zuo ku. La dabsa atā daare a wun vo'oge.> >

Azaki la Azā ma sosgo

(Amarki 10:35-45, Aluki 22:24-27)

²⁰Ti Azebede pɔga daan doose la a dayɔɔsi paage Azezi zē'am ka dūma tēṅa a nēṅam ti a sose ē ti a ēṅe sɛla bɔ ē. ²¹Ti Azezi soke ē yeti: < <Fōn boori ti m ēṅe la bēm bɔ fɔ? > > Ti pɔka la lerge yeti: < <Bɔ nōore ti fu sān wa dita fu na'am na, ti m dayɔɔsi bayi wā ayula zī'ire fu zuvgɔ, ti ayula zī'ire fu gɔbga.> > ²²Ti Azezi lerge ba yeti: < <Ya ka mi yāma n sosri sɛla. Ya wun tā'age nāmse nāmsgɔ sɛka ti mam wun nāmse wā? > > Ti ba yeti: < <Ti wun tā'age ēṅe bɛla.> > ²³Ti Azezi yele ba yeti: < <Ya wun siri nāmse nāmsgɔ sɛka ti mam wun nāmse la. La, la dagi mam n wun looge sɛka n wun zī'ire mam zuvgɔ bu mam gɔbga. Mam So Nawēnne māasum zē'e-bāma ti a bɔ la nēr-sɛba ti a yeti a bɔ la.> >

²⁴La karēnbiisi pia la n wōm bela la, ba sūure n isge la ba tadāandōma bayi la. ²⁵Ti Azezi wi ba wuu yeti: < <Ya mi ti dūnia wā na'adōma soe ba nērba la pāṅa, dee ti ke'endōma pēgrā nērba ti ba ita bāma n boori se'em. ²⁶La yāma puam, la kān dena bɛla. Nēr-sɛka n boori ti a lebge nēr-keko ya puam, la mase mɛ ti a dena ya tōntōnna. ²⁷La nēr-sɛka n mē boori ti a dena nēṅadāana ya puam, la mase mɛ ti a dena ya yamṅa wu Nērsaala* Dayva la. ²⁸Nērsaala Dayva la ka wa'am ti nērba tōm bɔ ē, a wa'am ti a tōm mɛ bɔ, dee

dike a vom bo tu nerba zozo'e ye faare. > >

Azezi botu fosti bayi nini yeta

(Amarki 10:46-52, Aluki 18:35-43)

²⁹Azezi daan ze'ele la Zeriko tēja puam yesra, tu ner-kuvuḡo zozo'e dola ē. ³⁰Ti fosti bayi zēa sore noorum wōm ti Azezi n tolli, ti ba tii togra yeti: < < Zuudāana, Adavidi* yuḡa, zoe ti ninbāalga. > > ³¹Ti ner-kuvuḡo la tāse ba yeti, ba sina. Ti ba malun tii togra gānna bela yeti: < < Zuudāana, Adavidi yuḡa, zoe ti ninbāalga. > > ³²Ti Azezi ze'ele dee wi ba, soke ba yeti: < < Yāma boori ti m eḡe la bēm bo ya? > > ³³Ti ba lerge yeti: < < Zuudāana, tōma boori la ti nini yeta. > > ³⁴Ti Azezi zoe ba ninbāalga, kalum ba nini, ti ba nini na yeta bilam mēḡa, ti ba dola ē.

21

Azezi kē'eri Zerizalem la na'am

(Amarki 11:1-11, Aluki 19:28-40, Azā 12:12-19)

¹Azezi la a karēnbiisi la daan sēḡe ka lem na Zerizalem, paage tēja yu'vre n de Betifaazi, Oliivi tēja sta. Ti Azezi tōm a karēnbiisi bayi ²yele ba yeti: < < Sēḡe-ya tēja la n boe ya nēḡa la puam, ti ya wun ye bōḡ-yā'aḡa n lu ze la a biire, lorge-ya ē tari ba wa'am wa bo ma. ³Nēra sān yele ya se'ere, ya yele ē yeti: < Zuudāana la n boori ba >, ti a wun base ti ya tari ē wa'am totō. > >

⁴La eḡe la bela ti Nawēnne nōtō'osa* la n yuun toḡe se'em na eḡe. ⁵A yuun yeti:

< < Yele-ya Siyō*f13* tēja nerba yeti:

< Ya naba la n wāna n sēm.

A sike a mēŋa bā la bōŋa,
la a biire sēna. > > >

⁶Ti karēnbiisi la sēŋe ka ēŋe Azezi n yele ba se'em na, ⁷tari bōŋ-
yā'aŋa la a biire wa'am, wa dıke ba futo pagle ba zuto ti Azezi bā. ⁸Ti
nēr-kuvŋo zozo'e yerge ba futo sore zuo, ti seba ko tusti vōoro yerge
sore zuo. ⁹Ti nēr-seba n daan boe a nēŋa, la seba n boe a poorum na
wuu tii tōgra yeti:

< < Ozaana, naba Adavidi* yuŋa.

Pēge-ya nēr-seka n sēm na

Zuudāana Nawēnne yu'ure la.

Ozaana! Nā'ase-ya Nawēnne n boe saazuum. > >

¹⁰Ban daan sēnni kē'era Zerizalem na, tēŋa la wuu dām me, ti ba
sokra taaba yeti: < < Ane n de ēna? > > ¹¹Ti nēr-kuvŋo la lerge ba
yeti: < < La de la Nawēnne nōtō'osa Azezi n ze'ele Nazareti n boe
Galile so'olum na. > >

Azezi dige nērba n koosri Wēnde-kātum na

(Amarki 11:15-19, Aluki 19:45-48, Azā 2:13-22)

¹²Azezi daan kē la Wēnde-kāte la zēnzakam digra seba wuu n
koosri, la seba n da'aru la, ti ba yesra, dee zā'age seba n teeri ligri
taablūdōma, la seba n koosri na'adawema kugsi lube. ¹³Dee yele ba
yeti: < < La gulse Nawēnne gōŋo puam ti Nawēnne yeti: < Ba wun
wi'ira mam deego la ti pu'usgo deego. > La yāma dıke ē ēŋe la
nayigba lagsgo zē'a. > >

¹⁴Ti fōosi, la wōbsi wa'am a zē'am Wēnde-kātum na, ti a boti ba yē
īmā'asum. ¹⁵La kāabgo* kēma nēŋadōma, la loo* karēnsāandōma n yē
tōon-yālma la ti Azezi tōnni, la kōma n malun tii tōgra Wēnde-kātum
na yeti ti: < < Ozaana! Pēge-ya naba Adavidi yuŋa > > la, ba sūure

n daan yĩige. ¹⁶Tı ba yele Azezi yetı: <<Fõn wõm ban yetı se'em na? >> Tı a lerge yetı: <<Ee, mam wõm ya. Yāma nān ka karēŋe Nawēnne gõŋo la yetoŋ-ēna n yetı: <Fõn botı koma, la bilēestı n nā'asra fõn.> >> ¹⁷La Azezi base ba bilam, dee sēŋe la Betani ka gā'are.

Kēnkāŋa n ka tarı biε yelle

(Amarkı 11:12-14, 20-24)

¹⁸Beere n daan wiige bulika, tı Azezi lebra Zerizalem, tı a kom dõnna. ¹⁹Tı a yē kēnkāŋa n ze sore nõorum, sēŋe tı a ka bise, la a paage yē la vōoro mā'a. Tı a yele kēnkāŋa la yetı: <<Fv kån le malın wom biε.> > La bilam mēŋa tı kēnkāŋa la kuı. ²⁰La a karēnbiisi la n yē bela la, la di'ige ba me, tı ba yetı: <<La ēŋe la wāne tı kēnkāŋa wā dare kuı wāna?> > ²¹Tı Azezi lerge ba yetı: <<Mam yetı ya la asıra, tı ya sān bõ Nawēnne sıra dee ka sē'ena, ya mē wun tā'age ēŋe wu mam n ēŋe tı-ēna se'em wā, la, la dagı bela mā'a, ya wun tā'age yele tån-ēna yetı: <Vōoge ka lui mōgre puam>, la a wun ēŋe bela. ²²La ya sān sose Nawēnne sela dee bõ ē sıra, ya wun to'oge.> >

Āne n bõ Azezi nõore tı a tõnna?

(Amarkı 11:27-33, Aluki 20:1-8)

²³Azezi daan kē la Wēnde-kātum na zāsna nērba, tı kāabgo kēma nēŋadõma, la tēŋa la kēma wa'am wa soke ē yetı: <<Fõn yē nõore la be ita bõn-bāna? La āne n bõ fõn nõore tı fõn ita?> > ²⁴Tı Azezi lerge ba yetı: <<Mam wun soke ya sokre ayıla, tı ya sān lerge mam, mam mē wun yele ya nõor-sēka tı mam tarı ita bõn-bāna. ²⁵Yele-ya ma, Azā n daan misri nērba ko'om puam na, la de la Nawēnne n tõm

ē bu, la de la nērsaalba? > > Tɪ ba bām na taaba yetɪ: < <Tɪ sān yetɪ la de la Nawēnne n tōm ē, a wun yetɪ, bēm īyā tɪ tōma ka sake ē? ²⁶Tɪ mē ka tā wun yetɪ, la de la nērsaalba n tōm ē, dēnɪ tɪ zɔta nērba la, se'ere n soe la, ba wuu sake tɪ Azā de la Nawēnne nōtɔ'ɔsa. > > ²⁷Tɪ ba koŋe lerge ē yetɪ: < <Tōma ka mi. > > Tɪ a mē ye le ba yetɪ: < <Mam mē kān ye le ya mam n yē nōore zē'e-seka ita bōn-bāna. > >

Dayɔɔsɪ bayi makre

²⁸Azezi daan le ye le ba yetɪ: < <Pa'alē-ya ma yāma n tē'esrɪ se'em: Bura n daan boe tarɪ a dayɔɔsɪ bayi, ye le pɔspɔsɪ dāana la yetɪ: <M dayva, sēŋe ka tōm m va'am na zīna. > ²⁹Tɪ a dayva la lerge ē yetɪ: <Mam kān sēŋe. > Tɪ la ēŋe fēe, tɪ a teege yem sēŋe. ³⁰Tɪ a sēŋe a dayva buyi dāana la zē'am ka ye le ēŋa mē yetɪ, a sēŋe ka tōm a va'am na. Tɪ a ye le ē yetɪ: <M sɔ, mam wun sēŋe. > La a ye le bela dee ka sēŋe. ³¹Bāma bayi, āne n ēŋe a sɔ la n boorɪ se'em na? > > Tɪ ba lerge yetɪ: < <Pɔspɔsɪ dāana la. > > Tɪ Azezi ye le ba yetɪ: < <Mam yetɪ ya la sɪra sɪra, tɪ lampo-tɔ'ɔsrɪba*, la pɔg-yalsɪ dōma wun dēŋe ya nēŋa kē Nawēnne so'olum* pɔam. ³²Se'ere n soe la, Azā wa'am wa pa'alē ya la sore tɪ ya wun doose mase Nawēnne zē'am, la ya ka bɔ ē sɪra. La lampo-tɔ'ɔsrɪba, la pɔg-yalsɪ dōma n bɔ ē sɪra. La baa yāma n yē bela la, ya ken ka teege yem bɔ ē sɪra. > >

Nērba n bɪsrɪ va'am makre

(Amarkɪ 12:1-12, Alukɪ 20:9-19)

³³Azezi daan le ye le ba yetɪ: < <Selse-ya makre ayɪla. Yidāana ayɪla n daan kɔ a va'am sele tɪsrɪ yu'ure n de viinye*, mē lalga kaage ē, tū boko tɪ ba wēkra viinye la biε, dee mē de-woko tɪ ba zɔnna bɪsra a va'am na, yāŋa dɪke nērba tɪ ba bɪsra va'am na, dee sēŋe sore.

³⁴Ti viinye la biε go'osgo wakate paage, ti a tōm a tōntōnɪba ti ba sēŋe seba n bɪsrɪ va'am na zē'am, ka to'oge a viinye la biε wa bɔ ē.

³⁵Ti seba n bɪsrɪ va'am na yōge tōntōnɪba la wē ayɪla, ku ayɪla, dee lobe ayēma la kuga ku. ³⁶Ti a le tōm tōntōnɪba baseba n zo'oge gānna pɔspɔsɪ dōma la. Ti ba le ēŋe bāma mē bela. ³⁷Ti a yāŋa tōm a mēŋa dayua seba n bɪsrɪ va'am na zē'am, dee tē'esra yeti: <Ena n de mam mēŋa dayua la, ba wun nan ē.> ³⁸La seba n bɪsrɪ va'am na n yē ē na, ba yele taaba yeti: <Ena n wun wa sɔɔge sɔna a sɔ bōntarsōm na. Base-ya ti ti ku ē, dee ti bōntarsōm na lebge tōma bōnɔ.> ³⁹Ti ba yōke ē ve'ege yese va'am na kēnkernja ka ku ē.

⁴⁰Bela, va'am na dāana sān wa'am, a wun ēŋe seba n bɪsrɪ va'am na la wāne? > >

⁴¹Ti ba lerge yeti: <<A wun nāmse nēr-be'esɪ bāna mε halɪ ku ba, dee dɪke va'am na bɔ nēr-seba n wun bɔ ē a viinye la biε ba go'osgo wakate, ti ba bɪsra.> >

⁴²Ti Azezi yele ba yeti: <<Yāma nān ka karēŋe Nawēnne gōŋɔ la n yeti:

<Kug-sɛka ti tōnmētba zagse la

n lebge kugre n botɪ deego la tara pāŋa.

La de la Zuudāana Nawēnne n ēŋe bōn-ēna,

ti la dɛna yel-di'iŋa bɔ tōma.>

⁴³Bela, mam yeti ya ti Nawēnne wun to'oge a so'olum ya zē'am dɪke bɔ buur-seba n wun tōm Nawēnne so'olum tōoma. ((⁴⁴La kug-sɛka ti tōnmētba zagse la, nēr-sɛka woo n lui kug-ēŋa zuo, a wun kɔ kɔ mε. La kugre la sān lui sɛka zuo, a wun mērgε ē.))> >

⁴⁵La kāabgɔ kēma nēŋadōma, la Farisi* dōma n wōm makre la, ba bāŋe ti a tɔgrɪ la bāma yelle. ⁴⁶Ti ba bɔɔra ti ba yōke ē, dee zɔta nērba la, se'ere n soe la, ba sake ti Azezi de la Nawēnne nōtɔ'ɔsa.

22

Naba dayva pɔgdire kibsa makɛ

(Aluki 14:15-24)

¹Azezi daan le makɛ la makɛ yele ba yeti: ²< < Nawɛnnɛ so'olum*
ān wu naba n ɛŋɛ a dayva pɔgdire kibsa, ³tɔm a tɔntɔnɪba yeti, ba
sɛŋɛ ka wi nɛr-seba ti ɛŋa daan wi la. Ti nɛrba la ka bɔɔra ti ba
wa'am. ⁴Ti a le tɔm tɔntɔnɪba baseba yeti: < Sɛŋɛ-ya ka yele seba ti
mam daan wi la yeti, mam māasum sela woo mɛ, mam kv la lɔlɔ, la
dūnsi n nɔbɛ, māasum sela woo ze'ele, ba wa'am kibsa la. > ⁵Ti ba
sɛŋɛ ka wi ba, ti ba zagɛ, dee sɛŋɛ ba sɛnnɛ. Ti ayɪla sɛŋɛ a va'am, ti
ayɛma sɛŋɛ a koosgo zɛ'am. ⁶Ti baseba la yɔgɛ tɔntɔnɪba la nāmse ba
dee kv ba. ⁷Ti naba la sūure yīige, ti a tɔm a zɛbzɛbrɪba ti ba sɛŋɛ ka
kv nɛr-kvɪrba la, dee yɔ ba tɛŋa la. ⁸La a yele a tɔntɔnɪba la yeti:
< Kibsa la sela woo māasum ba'ase mɛ, la mam n daan wi seba la ka
mase ti ba di kibsa la. ⁹Bela, sɛŋɛ-ya sorɔ-puursi zuto ka wi nɛr-seba
wuu ti ya won yɛ ti ba wa'am pɔgdire kibsa la zɛ'am. > ¹⁰Ti
tɔntɔnɪba la sɛŋɛ sorɔ-puursi zuto ka wi nɛr-seba wuu ti ba yɛ, nɛr-
sɔma la nɛr-bɛ'esɪ. Ti nɛrba wa'am wa purɛ kibsa la zɛ'am.

¹¹Ti naba la sɛŋɛ ti a bise nɛrba la, yɛ ti nɛra n boe mī ka ye
pɔgdire kibsa la fuugo. ¹²Ti a yele ɛ yeti: < M sɪrɛ, la ɛŋɛ la wāne ti
fɔn wa'am kibsa la, dee ka ye a fuugo? > Ti a ka yāŋɛ lerge se'ere.
¹³Ti naba la yele a tɔntɔnɪba yeti, ba lu a nu'usi, la a nāma lobe ɛ
base yɛŋa lika pvam. Bilam ti nɛrba won ka kella, dee dɪkɛ ba nu'usi
gɪ nōorum. ¹⁴La de la nɛrba pāi ti ba wi, la fɛɛ ti ba tū'use. > >

Lampo yva yelle

(Amarkɪ 12:13-17, Aluki 20:20-26)

¹⁵Tı Farisi* dōma sēņe ka bām bāma n wun ēņe se'em botı Azezi tōge tuuge tı ba yē sore yōke ē. ¹⁶Bela tı ba daan tōm ba karēnbiisi, la naba A'erōdı* nērba tı ba sēņe Azezi zē'am ka yeke ē yetı: < < Karēnsāama, tōma mi tı fōn de la sira dāana, dee zāsna nērba Nawēnne sore yela la sira. Fōn ka fablı nērba n tōgrı fōn yelle se'em na, la fōn ka tū'usri nērba. ¹⁷Yeke to fōn tē'esrı se'em. Sore boe tı tı yō lampo bō Rom* na-keko bu, sore ka boe? > > ¹⁸Tı Azezi bāņe ba putē'e-be'ero la, yeke ba yetı: < < Pulibsum dōma wā, bēm tı ya bēta mam? ¹⁹Pa'ale-ya ma lag-sēka tı ba tarı yōra lampo la. > > Tı ba dıke lag-kōbre pa'ale ē. ²⁰Tı a soke ba yetı: < < Ane yinyisņa, la āne yu'vre n gulse a zuo? > > ²¹Tı ba lerge yetı: < < La de la Rom na-keko la. > > Tı Azezi yeke ba yetı: < < La sān dēna bela, bō-ya na-keko la ēņa n soe bōn-sēka, dee bō Nawēnne ēn soe bōn-sēka. > > ²²Ban wōm bela la, tı la di'ige ba, tı ba base ē dee fōrge.

Kūm vo'ore yelle

(Amarkı 12:18-27, Aluki 20:27-40)

²³Daar-ēņa tı Saduse dōma n yetı nēra sān ki a kām vo'oge la, bāma nērba baseba n wa'am Azezi zē'am wa soke ē yetı: ²⁴< < Karēnsāama, Amoyisi* daan gulse yetı, buraaga sān ki dee ka tara bia, a sōbia di pōkōore la dōge kōma bō sēka n ki la.

²⁵Buraastı bayopı n daan boe tōma puam dēna sōbiisi, tı pōspı dāana la di pōka ki dee ka dōge bia. ²⁶Tı buyi dāana la di pōkōore la mē ki dee ka dōge bia. Tı butā dāana la mē ēņe bela, la bāma bayopı la wuu ēņe la bela. ²⁷Tı pōka la mē yāņa ki. ²⁸Bela, ba sān wa vo'oge kūm vo'ore daare, bāma bayopı la puam, āne n wun sōna pōka la, bāma wuu n lagım di ē na? > > ²⁹Tı Azezi lerge ba yetı: < < Ya tuuge me, yāma n ka mi Nawēnne gōņo n yeke se'em vōore, la

Nawēnne pāṅa n ān se'em na īyā. ³⁰Kūm vo'ore daare, buraasi ka diti pɔgsi, la pɔgsi mē ka elli sɪrba. Ba wɔn āna wu malekadōma* n boe Nawēnne yire la. ³¹La sān dena kūm vo'ore yelle, yāma nān ka karēṅe Nawēnne n yeke ya a gōṅɔ la puam se'em yeti: ³²< Mam de la Abraham*, la A'izaki, la Azakɔbi Nawēnne > na? La pa'ale ti bāma wuu vɔa me Nawēnne zē'am. Se'ere n soe la, Nawēnne dagi seba n ki Nawēnne, a de la nēr-seba n vɔa Nawēnne. > > ³³Nēr-kvɔṅɔ la n daan wōm a zāsṅɔ la, la di'ige ba me.

Nawēnne n bɔ nōore ti ba ita se'em na, bōn-kāna n gānni?

(Amarki 12:28-34, Aluki 10:25-28)

³⁴Farisi* dōma n daan wōm ti Azezi lerge Saduse* dōma, ti ba ka le tā'age ya'age nōore la, ti ba lagse a zē'am. ³⁵Ti ba nēra ayila n de lɔɔ* karēnsāama bɔɔra ti a di a yem bise, soke ē yeti: ³⁶< < Karēnsāama, Nawēnne n bɔ nōore ti ba ita se'em na, bōn-kāna n gānni wuu? > > ³⁷Ti a lerge ē yeti: < < < Nōṅe fu Zuudāana Nawēnne la fu sūure wuu, la fu sia wuu, la fu yem wuu. > ³⁸Ēna n de Nawēnne nōore la pɔspɔsi dāana, ēṅa n gānni wuu. ³⁹La buyi dāana n ān wu ēṅa n wāna n yeti: < Nōṅe fu tadāana wu fōn nōṅe fu mēṅa se'em na. > ⁴⁰Amoyisi lɔɔ la wuu, la Nawēnne nōtɔ'ɔsrɪba n gulse sela la wuu boe la nō-bāma bayi puam. > >

Krisi de la naba Adavidi Zuudāana

(Amarki 12:35-37, Aluki 20:41-44)

⁴¹Farisi dōma n lagse taaba la, ti Azezi soke ba yeti: ⁴²< < Yāma tē'esri la bēm la Krisi* yelle: Āne yuṅa n de ē? > > Ti ba lerge yeti: < < A de la naba Adavidi* yuṅa. > > ⁴³Ti a yeke ba yeti: < < La ēṅe la wāne ti Nawēnne Sia* daan boti Adavidi wi ē ti Zuudāana yeti:

⁴⁴< Zuudāana Nawēnne yele mam Zuudāana yeti,
zī'ire m zovgo boba halı tı m wa ēņe fu be'eba tı ba bōna fu nāma
tēņa. >

⁴⁵Adavidi sãn wi ē yeti, Zuudāana, la wun ēņe la wāne tı a dena
Adavidi yuņa? > > ⁴⁶Tı nēra nēra ka yāņe lerge ē se'ere. Lan pōse
daar-ēņa, nēra ka le saage soke ē sokre.

23

Azezi tōge loo karēnsāandōma, la Farisi dōma yelle

(Amarkı 12:38-40, Aluki 11:37-54, 20:45-47)

¹Tı Azezi yele nēr-kuvņo, la a karēnbiisi la yeti: ²< < Loo*
karēnsāandōma, la Farisi* dōma n sooge Amoyisi* zē'a. ³Bela, ban
zāsni ya se'em na, ya ita bela, dee da ita bāma n itı se'em na. Se'ere n
soe la, bāma n zāsni se'em na, ba ka itı bela. ⁴Ba zāsņo la ān wu ze-
tıbsa tı ba lu zelge nērba, la ba mēņa ka boortı tı ba kalum ba la ba
nu'ubiire. ⁵Ba tōnnı ba tōoma la wuu tı nērba n bısra ba, bela tı ba
dıke gāna gulse Nawēnne yetoga ba puam dıke lu ba đia bu ba
kēnkānsı. Dee pe fu-wogro ēņe bisa tı ba wōge tı nērba nā'asra ba.
⁶Ba nōņe la nā'asgo zē'estı dia zē'esum, la ba wēndeto puam. ⁷Ba nōņe
tı nērba n pu'vsra ba da'astı puam, dee bōra tı ba wi'ira ba yeti:
< Karēnsāama. > ⁸La yāma da base tı ba wi'ira ya tı karēnsāama.
Se'ere n soe la, yāma tartı la karēnsāama ayıla mā'a, la ya wuu de la
sobiisi la taaba. ⁹Da wi'ira-ya nēra tı so dūnia wā zuo Nawēnne sore
la doosgo iyā. Se'ere n soe la, ya tartı la So ayıla mā'a n boe saazuum.
¹⁰La ya da base tı nēra wi'ira ya tı nēņadāana. Se'ere n soe la, ya tartı
la nēņadāana ayıla mā'a n de Kriši*. ¹¹Seka n de nēr-keko ya puam, a
dena ya tōntōnna. ¹²Seka n zēke a mēņa, Nawēnne wun sike ē. La

sɛka n sike a mɛŋa, Nawɛnnɛ wun zɛkɛ ɛ.

¹³Yāma Farisi dōma, la lɔɔ karɛnsāandōma, pulibsum dōma wā, ya wun yɛ toogo. Se'ere n soe la, yāma gu'uri la nɛrba tɪ ba da kɛ Nawɛnnɛ so'olum* puam. Ya ka kɛ'eri ya mɛŋa, dee mɛ ka basra nɛr-sɛba n boortɪ tɪ ba kɛ la sore tɪ ba kɛ.

((¹⁴Yāma Farisi dōma, la lɔɔ karɛnsāandōma, pulibsum dōma wā, ya wun yɛ toogo, se'ere n soe la, ya to'osri la pɔkōpa n tari sɛla la wuu, dee pu'usra Nawɛnnɛ pu'us-wogro tɪ nɛrba bisra ya. Ya wun yɛ sɪbgrɛ gānna wuu.))

¹⁵Yāma lɔɔ karɛnsāandōma, la Farisi dōma, pulibsum dōma wā, ya wun yɛ toogo, se'ere n soe la, ya kaari la dūnia zɛ'esɪ wuu ɛɛra tɪ ya yɛ nɛra ayɪla tɪ a sake dɔla ya sore la. La ya sān yɛ nɛra ayɪla, ya base tɪ a lebge la tōon-be'ero dāana gānna ya mɛŋa nōore ayi, wun sɛŋɛ bug-tɛŋa*.

¹⁶Yāma sɛba n de nɛŋadōma de la fɔɔsi, ya wun yɛ toogo, se'ere n soe la, yāma yetɪ, nɛra sān pɔɪ Wɛnde-kāte la, la de la zāŋa. La sɛka sān pɔɪ sālma la n boe Wɛnde-kāte la puam na, dɛnɪ tɪ a ɛŋɛ ɛn pɔɪ tɪ a ɛŋɛ se'em na. ¹⁷Yāma ka wōnnɪ sɛla vōore, dee āna wu fɔɔsi la. Bɛm n gānnɪ? Sālma la bu, Wɛnde-kāte la n botɪ sālma la dɛna Nawɛnnɛ tɔvlum bōnɔ na n gānnɪ? ¹⁸Ya ken yetɪ, nɛra sān pɔɪ Nawɛnnɛ kāabgɔ* bɪmbɪnne na, la de la zāŋa. La nɛra sān pɔɪ sɛla tɪ ba dɪkɛ kāabe bɪŋɛ bɪmbɪnne na zuo la, dɛnɪ tɪ a ɛŋɛ ɛn pɔɪ tɪ a ɛŋɛ se'em na. ¹⁹Fɔɔsi, bɛm n gānnɪ? Sɛla tɪ ba dɪkɛ kāabe la bu, kāabgɔ bɪmbɪnne na n botɪ sɛla tɪ ba dɪkɛ kāabe la dɛna Nawɛnnɛ tɔvlum bōnɔ na n gānnɪ? ²⁰Bɛla, sɛka n pɔɪ kāabgɔ bɪmbɪnne na, a po pɔɪ la sɛla n boe a zuo la wuu. ²¹La sɛka n pɔɪ Wɛnde-kāte la, a po pɔɪ la Nawɛnnɛ n boe mɪ na. ²²La sɛka n pɔɪ Nawɛnnɛ yire, a pɔɪ la Nawɛnnɛ na'am bɪmbɪnne na, la sɛka n zɪ a zuo la.

²³Yāma lɔɔ karēnsāandōma, la Farisi dōma, pulibsum dōma wā, ya wun yē toogo. Se'ere n soe la, yāma bɔ'ɔrɪ Nawēnne zēvōorɔ buuri wuu pia pure me, baa ba sān āna pɪka pɪka, dee basra yel-seba n de kāŋkāŋe lɔɔ la puam na, ka ita. La de la sela n mase, la ninbāal-zua, la sakre. La de la bōn-bāna tɪ ya wun dēŋe ita, dee yāŋa ita sela tɪ ya uti la pa'ase. ²⁴Yāma nēŋadōma de la fɔɔsɪ, yāma yoorɪ ya bōn-yūula me yesra lislīma basra, dee vɔlla yugma.

²⁵Yāma lɔɔ karēnsāandōma, la Farisi dōma, pulibsum dōma wā, ya wun yē toogo. Yāma peerɪ ya laasɪ, la ya wama pɔa me tɪ ba āna sōŋa, dee tɪ ba puam pure la nayigum, la be'ero bōnɔ. ²⁶Yāma Farisi dōma, ya de la fɔɔsɪ! Peege-ya ya laasɪ la puam pɔspɔsɪ, tɪ ba poore la mē wun āna sōŋa.

²⁷Yāma lɔɔ karēnsāandōma, la Farisi dōma, pulibsum dōma wā, yāma ān wu yɔɔrɔ tɪ ba take tɪ ba zuum pelge āna sōŋa sōŋa, dee tɪ ba puam pure la kōba, la pō'osgɔ wuu. ²⁸Yāma mē ān na bela. Yāma botɪ nērba bisra ya tɪ ya āna wu nērba n utɪ sela n mase, dee tɪ ya puam pure la pulibsum, la tōon-be'ero.

²⁹Yāma lɔɔ karēnsāandōma, la Farisi dōma, pulibsum dōma wā, ya wun yē toogo. Ya mētɪ la Nawēnne nōtɔ'ɔsrɪba* yɔɔrɔ, dee malgra nēr-seba n ēŋe sela n mase yɔɔrɔ tɪ ba āna sōŋa. ³⁰Dee yetɪ, yāma daan sān boe nɪ yāma yaabdōma wakate la, yāma daan kān po lagum na ba ku Nawēnne nōtɔ'ɔsrɪba la. ³¹Ya mēŋa n bɔ'ɔrɪ ya mēŋa kaseto tɪ yāma de la seba n yuun ku nōtɔ'ɔsrɪba la yusɪ. ³²Tɔ. Ken sēŋe-ya nēŋa ēŋe ya yaabdōma la n daan ēŋe sela la ba'ase. ³³Bōnse'edōma wā! Kāmpēesɪ buuri! Yāma wun ēŋe la wāne pōse sarɪyadia tɪ ba kān kē'esɛ ya bug-tēŋa? ³⁴Bela tɪ mam yeta ya tɪ mam wun tōm m nōtɔ'ɔsrɪba, la yem dōma, la lɔɔ karēnsāandōma. La ya wun ku seba, dee ka baseba dɔ-puursɪ* zuto ku, wē seba la ka'asa ya wēndeto

puam, dee dola ba nāma tēja tēja nāmsra ba. ³⁵Bela ti pupeelem dōma la wuu ti ba ku dūnia zuo la taale wun bōna ya zuto, lan pōse la Abeli* kua halı wa paage Abaraki dayva Azakari ti ya ku Wēnde-kāte* zē'e-sōṅɔ, la kāabgɔ bimbīnne na tēṅasuka la. ³⁶Mam yeti ya la sira sira, ti bōn-bāna taale wun bōna zamāan-ēna nērba wuu zuto. > >

Azezi sūure sã'am Zerizalem dōma ãyã

(Aluki 13:34-35)

³⁷Azezi daan yeti: < < Zerizalem nērba, Zerizalem nērba, yāma kuvri la Nawēnne nōtɔ'ɔsrɪba, dee lɔbra seba ti Nawēnne tōm ba ya zē'am na kuga kuvra. Nōore faa ti mam boori ti m lagse ya wu nō-yã'aṅa n lagsri a kōma ũna a kempagsı puam se'em na, ti ya ka bōora.

³⁸Bāṅe-ya ti Nawēnne wun base ya tēja la ti a lebge la daboto.

³⁹Mam yeti ya ti ya kãn le malın yē mam, halı ti ya wun wa yeti: < Pēge-ya seka n sēm na Zuudāana Nawēnne yu'vɔre la. > > >

24

Wēnde-kāte la sã'aṅɔ, la dūnia ba'asgɔ toogo

(Amarkı 13:1-23, Aluki 17:22-24, 21:5-24)

¹Azezi daan ze'ele la Wēnde-kāte la puam yese fōrgra. Tı a karēnbiisi la lem ē pa'ale ē ti a buse Wēnde-kāte la n mē sōṅa se'em.

²Tı a yeke ba yeti: < < Yāma yē bōn-bāna wã wuu? Mam yeti ya la sira, ti ba wun lobe ba wuu me saam saam, ti kugre baa ayula kãn weege a tadāana zuo. > >

³La a daan sēṅe ka zēa la Oliivi tãṅa zuo, ti a karēnbiisi la mã'a sēṅe a zē'am ka yeke ē yeti: < < Yeke to wakat-seka ti bōn-bāma wuu wun

ēņe, la sela n wun pa'ale fōn lemņo, la dūnia ba'asgɔ wakate. > > ⁴Ti a yele ba yeti: < < Guuse ya mēņa ti nēra da pā'ase ya ti ya tuuge. ⁵Nērba zozo'e n wun dīke mam yu'ure wa'am wa pā'asra ya, ti ba nēra woo yeti: < Mam n de Krisi* la. > La ba wun boti nērba zozo'e tuuge me. ⁶Ya wun wa wōm zebre yelle, la zebre dāmne. La da base-ya ti dabeem tari ya. Dēni ti bōn-bāma ēņe, la, la nān dagi dūnia ba'asgɔ. ⁷Buuri ayila nērba wun isge zebra la buuri ayēma nērba, ti so'olum ayila isge zebra la so'olum ayēma, la kōm, la tēn-mīiņo wun bōna zē'esti zozo'e. ⁸La bōn-bāma nān de la toogo la sēņre, la ān wu pōka virgre toogo n nān sēņri la. ⁹Ba wun yōge ya me tari ka bɔ ti ba nāmse ya, ku ya, la buuri wuu wun sira ya mam yu'ure iyā. ¹⁰Nērba zozo'e wun base sira sore, dee ita taaba zāmɔ, dee sira taaba. ¹¹La nērba zozo'e wun isge parim yeti bāma de la Nawēne nōtɔ'ɔsriba pā'ase nērba zozo'e ti ba tuuge. ¹²Tōon-be'ero wun wa pa'ase me halu ti nērba zozo'e nōņre ba'ase. ¹³La nēr-seka n wun mōrgē ze'ele kāņkāņe ka paage ba'asgɔ wun yē fāare. ¹⁴Nawēne so'olum* kō-yēlga wun mōole dūnia wuu me, ti buuri wuu wōm, dee ti dūnia ba'asgɔ yāņa paage.

¹⁵Ya wun wa yē seka n de bōn-be'ego n sā'anu sela woo la, seka ti Nawēne nōtɔ'ɔsa Adanyeli yuun tōge a yelle la, ti a boe Nawēne zē'e-sōņɔ* la. > > Seka n karēņri mōrgē wōm a vōore.

¹⁶< < Ya sān wa yē bela, nēr-seba n boe Zude zoe zom tānsi zuto. ¹⁷La nēr-seka n boe gɔsgɔ da sige bɔɔra ti a kē deem dīke sela. ¹⁸La nēr-seka n boe va'am da kān lebe kule yire ti a dīke a fuugo. ¹⁹Dabs-bāma, la wun dēna la toogo bɔ pɔg-seba n tari pva, la seba n tari kōma ti ba mōgra la. ²⁰Sose-ya Nawēne ti ya zva la wakate da dēna ɔɔɔ wakate, bu vo'osgo* daare. ²¹Se'ere n soe la, wakat-ēņa, la wun dēna la toogo halu zozo'e ti ba nān ka yē halu dūnia n pī'ilum wa

paam wakat-ēṅa, la toog-ēṅa buuri kân le malun wa'am. ²²Nawēnne sãn ka bo'oge ni dabs-bāma sōore, nēra nēra ka boe n wun pōse. La nēr-seba ti a looge la iyã ti a bo'oge dabs-bāma sōore.

²³La nēr-seka sãn yeke ya yeti: < Bise-ya, Krisi la boe la kalam >, bu < bise-ya, a boe la ke >, ya da sake. ²⁴Nērba wun wa'am wa parum ti bāma n de Krisi, la nērba wun wa'am wa parum ti bāma n de Nawēnne nōt'ɔsrɪba tōnna tōon-yālma, la yel-kɪrsɪ, bɔɔra ti ba sãn tã'age, ba boti nēr-seba ti Nawēnne looge la tuuge. ²⁵Mam dēṅe yeke ya me ti la nãn ka paam. ²⁶Bela, ba sãn yeke ya yeti: < Bise-ya, a boe la weem >, da sēṅe-ya. Bu, ba sãn yeti: < A boe la deem >, ya da sake. ²⁷Nērsaala Dayva*f14* la lemṅo wun āna wu saaga n ēn yãke dapooore bɔba nēege ka paage zanōa bɔba la. ²⁸Bōn-kɪ'ɪsɪ n boe zē'e-seka la, zōa lagsɪ taaba la bilam. > >

Azezi n de Nērsaala Dayva la lemṅo

(Amarkɪ 13:24-37, Aluki 17:26-36, 21:25-33)

²⁹< < Toogo dabsa la poorum, wēntulle wun sobge me, ti wōrga kân le nēera a peelem, ti wōrbiε wun ze'ele saazuum lui. La bōn-seba n boe saazuum wun mīim me. ³⁰La sela n pa'alɪ Nērsaala* Dayva la lemṅo la wun puke saazuum. Ti dūnia nērba buuri wuu wun kaasra fabla. La ba wun yē Nērsaala Dayva la n boe sawara puam sēna la pãṅa, ti a na'am pãṅa peelem nēege zozo'e. ³¹La a wun tōm na a malekadōma*, ti benkonne peebe, ti ba sēṅe dūnia zuugɔ, la gɔbga, la dapooore, la zanōre ka lagse nēr-seba ti Nawēnne looge la, halɪ ka paage dūnia teka wuu.

³²Dike-ya makre la kēnkãṅa bãṅe zãṣṅɔ la vōore. Kēnkãṅa wila sãn wa pusra vō-paala, ya mi ti sigre lem me. ³³Bela, ya mē sãn wa yē ti bōn-bāna wuu ɪti, ya bãṅe ti Nērsaala Dayva la lem me, a boe la

zanõrum. ³⁴Mam yeti ya la sira, ti bõn-bãna wuu wun ita me, dee ti zamãan-ẽna yãña tole. ³⁵Saazuum la tẽña wun tole me, la mam yetõga la kãn malin tole.

³⁶Nẽra nõra ka mi daar-seka la wakat-seka ti Nẽrsaala Dayua la wun leme wa'am, baa malekadõma n boe Nawẽnne yire, bu Dayua la mẽña ka mi, sãn dagna So Nawẽnne mã'a. ³⁷Nẽrsaala Dayua la lemño, la wun ãna wu Anoe* wakate n yuun ãn se'em na. ³⁸Se'ere n soe la, lan dẽñe sã'añõ sa-kãte la, nõrba yuun diti me dee yũura, ti buraasi dita põgsi, ti põgsi ulla sirba, dee tara ba põyõõsi sira, halı wa paage daar-seka ti Anoe kẽ õorñ-kãte la puam na. ³⁹Ba yuun ka bãñe ti yelle boe, halı ti saaga wa ni, ti ko'om pe'ege nõrba la wuu. La mẽ wun ãna la bela Nẽrsaala Dayua la lemño wakate. ⁴⁰Daar-ẽña buraasi bayi wun bõna va'am, ti ba dıke ayula, dee base ayẽma. ⁴¹Tı põgsi bayi wun bõna nõerum, ti ba dıke ayula, dee base ayẽma. ⁴²Bela, guuse ya mẽña, se'ere n soe la, ya ka mi daar-seka ti ya Zuudãana la wun leme wa'am. ⁴³Bãñe-ya ti yidãana sãn mina nayiga n wun wa'am yu'õñõ wakat-seka wa zũ ã, a wun gu'ura a yire me, a kãn base ti nayiga la kẽ zũ ã. ⁴⁴Bela, mãasum-ya gu'ura, ti Nẽrsaala Dayua la sēm na wakat-seka ti ya ka tẽ'esrı ti a wun wa'am na. > >

Tõntõn-sõñõ, la tõntõn-be'ego makre

(Aluki 12:41-48)

⁴⁵Azezi le yeti: < < Ane n de tõntõn-sõñõ n tari yem? La de la ãña ti a zuudãana wun yeti a bisra a yire yelle, bõ'õra a tõntõnıba dia wu lan mase, dee sẽñe sore. ⁴⁶Zuudãana la sãn leme wa yẽ ti tõntõnna la tõm wu ãña n yele ã se'em na, tõntõnna la tari zu-yẽlga. ⁴⁷Mam yeti ya la sira, ti a zuudãana la wun dıke ãña n tari sela la wuu bõ ã me ti a bisra.

⁴⁸La a sãn dena tōntōn-be'ego, tē'ese yeti ēṅa zuudāana la yuuri me ka kulna, ⁴⁹yāṅa wē'era a tōntōn-taaba la, dita dee yūura la dā-yūuriba, ⁵⁰a zuudāana la wun kulum na daar-seka ti a ka tē'esri ti a wun wa'am, la wakat-seka ti a ka mi, wa di'ige ē. ⁵¹La a wun dige ē me boti a lagum na pulibsum dōma yē sibgrε. Zē'e-ēṅa ti ba wun kella, dee dīke ba nu'usi gi nōorum. > >

25

Pug-sarsı pia makre

¹Azezi ken yeti: < <Wakat-ēṅa Nawēnne so'olum* wun āna wu pug-sarsı pia n dīke ba fitladōma yese sēṅe ti ba ka tu'vse pōgdita.

²Banuu ka tarı yem, dee ti banuu dena yem dōma. ³Tı seba n ka tarı yem na dīke ba fitladōma, dee ka dīke kaam pa'ase. ⁴La seba n tarı yem na dīke ba fitladōma me, dee dīke kaam pa'ase. ⁵Tı pōgdita la yuuge ka sēna, ti gēem yōke ba, ti ba wuu gise.

⁶Tı sōnsua, ti ba kaase tagurga yeti: <Pōgdita la sēm me, isge-ya yese tu'vse ē.> ⁷Tı pug-sarsı la wuu nēege malge ba fitladōma. ⁸Tı seba n ka tarı yem na, yele yem dōma la yeti: <Purge-ya ya kaam na bɔ tɔ, ti tōma fitladōma la kīṅri me.> ⁹Tı yem dōma la lerge yeti: <Ayeyi, tōma sãn ēṅe bela, kaam na kãn seke tōma, la yāma. Sēṅe-ya ka-kɔsribba la zē'am ka da ya mēṅa bōnɔ.>

¹⁰Tı ba sēṅe ti ba ka da, dee ti pōgdita la paam, ti banuu la n māasum ki'ulum na doose pōgdita la kē pōgdire la zē'am, dee ti ba yu zanōre.

¹¹Bela poorum ti pug-sarsı banuu la n weege la wa'am wa wi'ira yeti: <Zuudāana, zuudāana, yo'oge bɔ tɔ.> ¹²Tı pōgdita la lerge yeti: <Mam yeti ya la sira, ti mam ka mi ya.>

¹³Bela, guuse ya mēŋa, se'ere n soe la, ya ka mi daar-seka bu wakat-seka ti Nērsaala* Dayua la wun leme wa'am. > >

Tōntōnɔba batā makre

(Aluki 19:11-27)

¹⁴< < Nawēnne so'olum ken āna wu buraaga n boori ti a sēŋe sore, wi a tōntōnɔba dɩke a bōntarsōm puɪ ba ti ba bɪsra. ¹⁵A bɔ tōntōnna ayula la talā*f15* banuu, bɔ ayula talā bayi, dee bɔ ayula talā ayula. A bɔ nēra woo mase la ēn wun tā'age se'em tōm, dee sēŋe. ¹⁶Tɪ nēr-seka n to'oge talā banuu la dare tōm yē yōoro talā banuu pa'ase. ¹⁷Tɪ seka n to'oge talā bayi la mē tōm yē talā bayi pa'ase. ¹⁸La seka n to'oge talā ayula la sēŋe ka tū la boko pī a zuudāana ligri la.

¹⁹Tɪ la yuuge, ti tōntōnɔba la zuudāana la leme kulum, wa yele ba ti ba geele bāma n tōm se'em. ²⁰Tɪ seka n daan to'oge talā banuu la, tarɪ talā banuu la ti a yē pa'ase la wa'am wa yetɪ: <M zuudāana, fōn daan bɔ mam na talā banuu, mam tōm yē la talā banuu pa'ase, ban wāna.> ²¹Tɪ a zuudāana la yele ē yetɪ: <La ān sōŋa. Fu de la tōntōn-sōŋɔ n de sira dāana. Fōn ēŋe sira la sɛla fēe ti mam bɔ fu la iyā, mam wun base ti fu sɔna bōnɔ zozo'e bɪsra. Wa'am wa naage la mam ēŋe sū-yēlga.>

²²Tɪ seka n to'oge talā bayi la mē wa'am wa yetɪ: <M zuudāana, fōn daan bɔ mam na talā bayi, mam tōm yē la talā bayi pa'ase, ban wāna.> ²³Tɪ a zuudāana la yele ē yetɪ: <La ān sōŋa. Fu de la tōntōn-sōŋɔ n de sira dāana. Fōn ēŋe sira la sɛla fēe ti mam bɔ fu la iyā, mam wun base ti fu sɔna bōnɔ zozo'e bɪsra. Wa'am wa naage la mam ēŋe sū-yēlga.>

²⁴Tɪ seka n to'oge talā ayula la wa'am wa yetɪ: <M zuudāana, mam mi ti fōn de la nēra yelle n tɔɪ. Fōn lagsrɪ la bōnkɔɔla seba ti fōn ka

bure, dee vaara bõn-seba ti fõn ka yerge. ²⁵Bela ti mam zoe dabeem dıke fu ligri la sēnje ka tū boko pī. Fu bõnɔ n wāna, to'oge. > ²⁶Tı a zuudāana la yelee ē yetı: < Tõntõn-be'ego wā, fu de la zēyāka. Fõn mi ti mam lagsrı la bõnkɔɔla seba ti mam ka bure, dee vaara bõn-seba ti mam ka yerge la, ²⁷bela, la de ni na fu dıke m ligri la bınje bānku puam, ti mam sān leme wa'am, m to'oge m ligri la, la yõorɔ. > ²⁸A yelee bela dee yetı: < To'oge-ya a talā la bɔ seka n tarı talā pia la. ²⁹Se'ere n soe la, nēr-seka n tarı, a wun to'oge pa'ase ti la zo'oge. La seka n ka tarı, baa sela fēe ti a tarı la, ba wun to'oge ē. ³⁰La tõntõn-seka n ka tarı yõorɔ la, lobe-ya ē base yēnja lika puam. Zē'e-ēnja ti ba wun kella, dee dıke ba nu'usi gi nõorum. > > >

Azezi won di buuri wuu sarıya dūnia ba'asgo daare

³¹< < Nērsaala Dayva*f16* la sān leme wa'am la a na'am pānja, la a malekadōma wuu, a wun zı'ire la a na'am bımbıne zuo. ³²Tı dūnia so'olum wuu nērba wun lagsɛ a nējam, ti a welge nērba la yēma yēma wu dūnsıina n welgrı a piisi, la a buusi se'em na. ³³La a wun ze'ele piisi la a zıvgɔ bɔba, dee ze'ele buusi a gɔbga bɔba.

³⁴Tı naba la wun yelee seba n boe a zıvgɔ la yetı: < Wa'am-ya, yāma seba n tarı mam Sɔ Nawēnne yel-sõnne na. To'oge-ya so'olum na ti Nawēnne daan põn māasum ti a bɔ ya halı lan dēnje dūnia pı'ılujo la. ³⁵Se'ere n soe la, mam kɔm daan dõnnı me, ti yāma bɔ mam dia. Koyūuro daan tarı mam me, ti yāma bɔ mam ko'om ti mam yū. Mam daan de la sāana, ti yāma to'oge mam. ³⁶Mam daan de la beele, ti yāma bɔ mam futo ti mam ye. Mam daan bē'eri me, ti yāma wa'am wa bıse mam, la mam daan boe la yu'a deem, ti yāma wa'am mam zē'am. > ³⁷La nēr-seba n ēnje sela n mase la wun lerge yetı: < Zuudāana, la de la wakat-kāna ti tōma yē fõn, ti fõn kɔm dõnnı, ti

tōma bɔ fōn dia? Bu koyūuro tarɪ fōn, tɪ tōma bɔ fōn ko'om? ³⁸La wakat-kāna tɪ tōma yē fōn, tɪ fōn dēna sāana, tɪ tōma to'oge fōn? Bu fōn de beele, tɪ tōma bɔ fōn futo tɪ fōn yē? ³⁹La wakat-kāna tɪ fōn bē'eri, tɪ tōma wa'am wa buse fōn, bu fōn boe yu'a deem, tɪ tōma wa'am fōn zē'am? > ⁴⁰Tɪ naba la wun lerge ba yetɪ: < Mam yetɪ ya la sɪra, tɪ yāma n daan ēŋe sɛla wuu bɔ mam nērba la, baa la sān dēna la nēr-pɪka ayɪla tɪ ya ēŋe bɔ, la de la mam tɪ ya bɔ. >

⁴¹La a wun yeke sɛba n boe a gɔbga bɔba la yetɪ: < Sēŋe-ya fōrge, Nawēnne kā'a-be'ego boe ya zuo. Sēŋe-ya ka kē bugum n ka kīŋri tɪ Nawēnne māasum tɪ a kē'ese Asūtāana*, la a malekadōma la puam.

⁴²Se'ere n soe la, mam kɔm daan dōnnɪ mɛ, tɪ yāma ka bɔ mam dia. Tɪ koyūuro daan tara mam, tɪ yāma ka bɔ mam ko'om tɪ mam yū.

⁴³Mam daan de la sāana, tɪ yāma ka to'oge mam. Mam daan de la beele, tɪ yāma ka bɔ mam futo tɪ mam yē. Mam daan bē'eri mɛ, tɪ yāma ka wa'am wa buse mam. Mam daan boe la yu'a deem, tɪ yāma ka wa'am mam zē'am. > ⁴⁴La ba wun lerge ē yetɪ: < Zuudāana, la de la wakat-kāna tɪ tōma daan yē fōn, tɪ fōn kɔm dōnnɪ, bu koyūuro tarɪ fōn, bu fōn de sāana, bu beele, bu fōn bē'eri, bu fōn boe yu'a deem, dee tɪ tōma ka sōŋe fōn? > ⁴⁵Tɪ a wun lerge ba yetɪ: < Mam yetɪ ya la sɪra, tɪ yāma n daan ka utɪ bela bɔ'ɔra mam nērba la, baa la sān dēna la nēr-pɪka ayɪla tɪ ya ka ēŋe bɔ ē, la de la mam tɪ ya ka ēŋe bɔ. >

⁴⁶La bāma wun sēŋe ka kē nāmsgɔ n ka ba'asɪ puam. La sɛba n ēŋe sɛla n mase la wun yē vɔm n ka ba'asɪ. > >

26

Ba eeri sore tɪ ba yōke Azezi

(Amarkɪ 14:1-2, Alukɪ 22:1-2, Azā 11:45-53)

¹Azezi n daan tɔge yetɔg-bāma wuu kɪ'ulum na, a yele a karēnbiisi la yeti: ²< < Yāma mi ti la deege la dabsa ayi ti Zɔɔg-base kibsapaage, ti ba won yōke Nērsaala* Dayua la ka bɔ ti ba ka ē dɔ-puurŋa* zuo ku. > >

³Nawēnne kāabgɔ* kēma nēŋadōma, la tēŋa la kēma daan sēŋe ka lagse la taaba Akayifu yire. Akayifu daan de la Nawēnne kāabgɔ kēma nēŋadōma la nēŋadāana. ⁴Ba daan tɔge la taaba ku yeti, ba ēŋe yem yōke Azezi ku. ⁵La ba yeti: < < Tɪ da kān ēŋe-ya bela kibsapaage la puam, ti nērba la won gire mɛ. > >

Pɔka n ka'age tɪdare kaam ēŋe Azezi zuo

(Amarki 14:3-9, Azã 12:1-8)

⁶Azezi daan boe la Betani tēŋa, Asimō n wa dena kōnkonne na yire. ⁷Tɪ ba daan bɔna mɪ dita, ti pɔka tarɪ albatrɪ* dugla n purɛ la tɪdare ka-sōma ligri n zo'oge, wa'am Azezi zē'am wa ka'age kaam na ēŋe Azezi zuogo. ⁸Tɪ a karēnbiisi la yē bela, ti ba sūure sã'am. Tɪ ba yele taaba yeti: < < Bēm ti a sã'am kaam na wāna? ⁹Ba tā nɪ won koose kaam wã ligri zo'oge mɛ, dɪke bɔ nasdōma. > > ¹⁰Tɪ Azezi bāŋe ba tē'esgɔ la, yele ba yeti: < < Bēm ēŋe ti ya tɔgra pɔka la ti a sūure sã'am? Ēn ēŋe sɛla bɔ mam na de la tōon-sōŋɔ. ¹¹Nasdōma boe la ya le mɛ wakate wuu, la mam kān bɔna la ya wakate wuu. ¹²Ēŋa n ka'age kaam na ēŋe mam zuo la, a ēŋe la ba won ēŋe mam se'em mam laare daare. ¹³Mam yeti ya la sɪra, ti dūnia wã zē'e-sɛka wuu ti ba won mōole Nawēnne kō-yēlga la, ba mē won tɔge pɔka wã n ēŋe mam se'em wã, ti ba tēra a yelle. > >

Azudaasi eerɪ sore tɪ a pa'ale tɪ ba yōke Azezi

(Amarki 14:10-11, Aluki 22:3-6)

¹⁴Ti Azezi karēnbiisi pia la ayi la nēra ayila yu'ure n de Azudaasi Iskariyo, daan sēŋe kāabgɔ kēma nēŋadōma zē'am ¹⁵ka yeke ba yeti: < <Ya wun bɔ mam na bēm, ti m pa'ale ya sore ti ya yōke Azezi? > > Ti ba bɔ ē lig-kōba pitā*f17*. ¹⁶La pɔse la wakat-ēŋa ti a ɛera sore ti a pa'ale ti ba yōke Azezi.

Azezi diti Zɔɔg-base kibsa la a karēnbiisi

(Amarki 14:12-26, Aluki 22:7-23, Azā 13:21-30, 1 Korēnti 11:23-25)

¹⁷Borbori n ka tarɔ dābulle kibsa la pɔspɔsi daare, ti Azezi karēnbiisi la sēŋe a zē'am ka soke ē yeti: < <Fōn boori ti ti sēŋe la be ka māasum Zɔɔg-base* kibsa la ti fu di? > > ¹⁸Ti a lerge ba yeti: < <Sēŋe-ya tēŋa la puam Abōnɔ yire ka yeke ē yeti: <Karēnsāama la yeti, ēŋa wakate paage mɛ, la de la fōn yire ti ēŋa wun di Zɔɔg-base kibsa la, la a karēnbiisi. > > > ¹⁹Ti karēnbiisi la ēŋe Azezi n yeke ba se'em na, māasum Zɔɔg-base kibsa la.

²⁰Ti wēnne daan mā'age, ti Azezi la a karēnbiisi pia la ayi la sēŋe yire la puam ka zēa dita. ²¹Ban daan dita la, ti Azezi yeke ba yeti: < <Mam yeti ya la sira sira, ti ya nēra ayila n wun pa'ale ti ba yōke mam. > > ²²Ti a karēnbiisi la sūure sā'am halɔ, ti ba sakra ē ayila ayila yeti: < <Zuudāana, la de la mam bu? > > ²³Ti a lerge ba yeti: < <Seka n wun yegle la mam tūm a nu'ugo laaga puam na, la de la ēŋa n wun pa'ale ti ba yōke mam. ²⁴Nērsaala Dayva*f18* la wun ki wu la yuun pōn gulse a yelle se'em Nawēnne gōŋɔ puam na. La nēr-seka n wun pa'ale ti ba yōke Nērsaala Dayva la wun yē toogo. Nēr-ēŋa ma daan sān ka dɔge ni ē n sōi. > > ²⁵Ti Azudaasi n de nēr-seka n daan wun pa'ale ti ba yōke Azezi la soke ē yeti: < <Karēnsāama, la de la mam bu? > > Ti Azezi yeke ē yeti: < <Fōn yeke la bela. > >

²⁶Ban daan boe mī dita la, ti Azezi dɔke borbori pu'use Nawēnne,

dee fiise bɔ a karēnbiisi la yeti: << To'oge-ya di. Ēna de la mam ãyã. >> ²⁷Dee dɩkɛ bõn-yũula pu'vse Nawēnne, dee bɔ ba yeti: << To'oge-ya ya wuu yũ. ²⁸Bãna wã de la mam zum n wun yese saage nērba zozo'e ãyã, pa'alɛ tɩ Nawēnne bĩje nõore la ba tɩ a base ba tõon-be'ero taale. ²⁹Mam yeti ya tɩ, mam kãn le yũ viinye biɛ bõn-yũula wã, halɩ tɩ la ka paage daar-sɛka tɩ mam wun le naage la ya yũ ba mam Sɔ Nawēnne so'olum puam. >> ³⁰Tɩ ba daan yõom yõoma pège Nawēnne, dee yese wɛ'esa Oliivi tãŋam.

Azezi yeti Apɩyɛɛɩ wun sɩ'ise ɛŋa

(Amarkɩ 14:27-31, Aluki 22:31-34, Azã 13:36-38)

³¹Tɩ Azezi yele a karēnbiisi la yeti: << Yãma wuu wun lebe la poorum dee base mam zina yu'vɔŋ, se'ere n soe la, la gulse Nawēnne gõŋɔ puam yeti: <Mam wun ku dũnsiina, dee tɩ piisi la wɩrɛ. >> ³²La Azezi le yele ba yeti: << La mam sãn wa vo'oge, mam wun dɛŋɛ ya nɛŋa sɛŋɛ Galile. >> ³³Tɩ Apɩyɛɛɩ yele yeti: << Baa bãna wuu sãn lebe poorum dee base fõn, mam kãn malɩn base fõn. >> ³⁴Tɩ Azezi yele ɛ yeti: << Mam yeti fu la sɩra, tɩ zina yu'vɔŋ wã, lan dɛŋɛ nõ-rɔɔgɔ n wun kaase, fu wun sɩ'ise nõore atã tɩ fõn ka mi mam. >> ³⁵Tɩ Apɩyɛɛɩ yele yeti: << Baa la sãn dena tɩ mam lagum na fõn ki, mam kãn malɩn sɩ'ise fõn. >> Tɩ Azezi karēnbiisi la wuu lagum yele bela.

Azezi pu'vse Nawēnne Getsemane

(Amarkɩ 14:32-42, Aluki 22:39-46)

³⁶Azezi la a karēnbiisi la daan sɛŋɛ ka paage la zɛ'e-sɛka tɩ ba wi'iri tɩ Getsemane, tɩ a yele a karēnbiisi la yeti: << Zi'ire-ya kalam, dee tɩ m sɛŋɛ nɛŋa ka pu'vse Nawēnne. >> ³⁷La Azezi tartɩ la Apɩyɛɛɩ, la

Azebede dayɔɔsi bayi la sɛŋɛ. Tɪ a sũure sã'am halɪ zozo'e, tɪ a palɛŋa ẽgra. ³⁸Tɪ a yeɛ ba yetɪ: < < Sũ-sã'anjɔ n tarɪ mam zozo'e tɪ la ɛna wu mam yetɪ m ki mɛ na. Weege-ya kalam gu'ura mam, da gĩse-ya. > >

³⁹La a sɛŋɛ la nɛŋa fɛe ka vɔglɛ a nɛŋa tɛŋa pu'usɛ Nawɛnnɛ yetɪ: < < M Sɔ, la sãn tãna, fu base tɪ nãmsgɔ ɛna tole dee base ma. La, la da kãn dena mam n boorɪ se'em, la dena fɔn boorɪ se'em. > >

⁴⁰La a lebe a karɛnbiisi la zɛ'am ka yɛ tɪ ba gĩsri mɛ. Tɪ a soke Apɪyɛɛɪ yetɪ: < < Yãma ka tã'age naage la mam gu karf-ayula mã'a ka gĩse? ⁴¹Base-ya gɛem dee pu'usɛ Nawɛnnɛ tɪ yelle da paage ya tɪ ya lui. Ya sia boorɪ mɛ, la ya ɪyã la ka tarɪ pãŋa. > >

⁴²La a daan le lebe mɛ ka pu'usɛ yetɪ: < < M Sɔ, nãmsgɔ wã sãn ka tãna wun tole dee base mam, la sãn dena tɪ mam nãmse, base tɪ fɔn boorɪ se'em ɛŋɛ. > > ⁴³La a le lebe a karɛnbiisi la zɛ'am ka yɛ tɪ ba le gĩsra mɛ, se'ere n soe la, gɛem n daan ba tara ba.

⁴⁴Tɪ a base ba, dee le lebe nɔore atã puam ka pu'usɛ Nawɛnnɛ tɔge yetɔg-bãma mɛŋa. ⁴⁵Dee leme wa'am a karɛnbiisi la zɛ'am wa soke ba yetɪ: < < Ya gĩsri mɛ dee vɔ'ɔsra? Wakate paage mɛ, tɪ ba wun dɪke Nɛrsaala* Dayva la ɛŋɛ tɔon-be'ero dɔma nu'usum. ⁴⁶Isge-ya tɪ tɪ sɛŋɛ. Sɛka n wun pa'ale tɪ ba yɔke mam na n wãna n sɛm. > >

Ba yɔke Azezi

(Amarkɪ 14:43-50, Aluki 22:47-53, Azã 18:3-12)

⁴⁷Azezi n daan ken tɔgra la, tɪ Azudaasi n de a karɛnbiisi pia la ayi la nɛra ayula doose la nɛr-kuvɔŋɔ zozo'e sɛŋɛ paam. Ba daan tarɪ la sukɔbrɔ la dɔa. La de la kãabgɔ kɛma nɛŋadɔma, la tɛŋa la kɛma n daan tɔm ba. ⁴⁸La Azudaasi n wun pa'ale tɪ ba yɔke ɛ na, pɔn pa'ale ba mɛ yetɪ: < < Sɛka tɪ mam wun kɔke ɛ na, la de la ɛŋa, yɔke-ya ɛ. > >

⁴⁹La ěn paam na, a sēņe me tɔtɔ lɛm Azezi, pu'use ě yeti:
 < < Karēnsāama, zaanōore > >, dee kɔke ě. ⁵⁰Ti Azezi yeke ě yeti:
 < < M sure, ēņe fōn wa'am ti fu ēņe se'em na. > > Ti nērba la paage
 yōke Azezi. ⁵¹Ti nēr-seba n daan boe la Azezi la, nēra ayula fooge a
 sukɔbgɔ se kāabgɔ kēma nēņadāana tōntōnna tubre fiige. ⁵²Ti Azezi
 yeke ě yeti: < < Lebse sūm fu su'a la a fuvɔgɔ puam, se'ere n soe la,
 seba n zɛbrɪ la su'usu, su'usu n wun ku ba. ⁵³Fōn ka mi ti mam tā wun
 sose m So Nawēnne, ti a tōm malekadōma* n gānnɪ tusa tusa pia la
 ayi? ⁵⁴La mam sān ēņe ni bela, Nawēnne gōņɔ n yeti la wun ēņe
 se'em na, wun ēņe la wāne ēņe? > >

⁵⁵A tɔge bela, dee soke nēr-kuvɔņɔ la yeti: < < Yāma sēm na sukɔbrɔ,
 la dɔa ti ya yōke mam wu mam de la fāara la? Mam daan boe la
 yāma me Wēnde-kātum na daare woo zāsna nērba, ti yāma ka yōke
 mam. ⁵⁶La bōn-bāna wuu ēņe ti Nawēnne nōtɔ'ɔsrɪba* n yvun yeke
 se'em Nawēnne gōņɔ puam na n ēņe. > > Ti a karēnbiisi la wuu zoe
 dee base ě.

Ba tari Azezi sēņe Zifdōma sarɪyaditba zē'am

(Amarkɪ 14:53-65, Aluki 22:54-55, 63-71, Azā 18:13-14, 19-24)

⁵⁷Seba n daan yōke Azezi la, tari ě sēņe la kāabgɔ kēma nēņadāana
 Akayifu yire. Bilam ti lɔɔ karēnsāandōma, la tēņa la kēma daan lagse.
⁵⁸Ti Apɪyɛeri daan bɔna poorum zāazāare dɔla ka paage kāabgɔ kēma
 nēņadāana la yire, kē naage la tōntōnɪba zēa ti a buse yelle la n wun
 ba'ase se'em. ⁵⁹Kāabgɔ kēma nēņadōma, la sarɪyaditba la wuu daan
 eeri la yelle ti ba parum bɔ Azezi botɪ ba ku ě. ⁶⁰La ba ka yē, baa la
 nērba zozo'e n parum pōmpɔrɔņɔ kaseto bɔ ě na. Ti nērba bayi yāņa
 isge ⁶¹yeti: < < Bvraa wā daan yeti, ēņa tā wun wōrge Wēnde-kāte la,
 dee le mē ě dabsa atā puam. > >

⁶²Ti k̄aabgɔ k̄ema n̄ɛɔad̄aana la isge soke Azezi yeti: < < Ban tɔge f̄ɔn se'em na, f̄ɔn k̄an lerge se'ere? > > ⁶³Ti Azezi ka lerge se'ere. Ti k̄aabgɔ k̄ema n̄ɛɔad̄aana la ye le ẽ yeti: < < Pɔi la Naw̄enne n de vɔm d̄aana la yu'vre, fu s̄an d̄ena la Krisi*, Naw̄enne Dayua la, ye le to. > > ⁶⁴Ti Azezi lerge ẽ yeti: < < La de la f̄ɔn ye le se'em na. La mam yeti ya ti ya wun ȳe N̄ersaala* Dayua la, ti a z̄i Naw̄enne n de p̄aɔa d̄aana la zvugɔ bɔba, ya wun ȳe ti a boe sawara puam s̄ena. > > ⁶⁵Ti k̄aabgɔ k̄ema n̄ɛɔad̄aana la āasum a m̄ɛɔa futo, dee yeti: < < A tuuri la Naw̄enne. Ti ka le ɛera ti n̄era le bɔ kaseto. Ya w̄ɔm ɛn tuuri Naw̄enne se'em. ⁶⁶Ȳama t̄e'es̄e la b̄em? > > Ti ba lerge yeti: < < A mase la k̄um. > >

⁶⁷Ti ba tubse n̄ɔt̄oorum m̄i a n̄ɛɔa, dee w̄e ẽ na k̄unk̄ura. Ti baseba w̄e a p̄egsi, ⁶⁸dee ye le ẽ yeti: < < Krisi, b̄aɔe s̄eka n w̄e f̄ɔn tɔge pa'ale tɔ. > >

Ap̄iȳeri si'ise ti ɛɔa ka mi Azezi

(Amarki 14:66-72, Aluki 22:56-62, Az̄a 18:15-18, 25-27)

⁶⁹Ap̄iȳeri daan z̄i la yire la z̄enzakam, ti t̄ɔnt̄ɔn-pɔka lem ẽ ye le ẽ yeti: < < F̄ɔn m̄e daan boe la Azezi n de Galile n̄era la le. > > ⁷⁰Ti a si'ise ba wuu n̄ɛɔam yeti: < < Mam ka b̄aɔe f̄ɔn boori ti fu ye le se'em. > > ⁷¹Ti Ap̄iȳeri yese yaɔa n̄oorum, ti t̄ɔnt̄ɔn-pɔka aȳema ȳe ẽ, ye le s̄eba n boe m̄i na yeti: < < Ena m̄e daan boe la Azezi n ze'ele Nazareti la le. > > ⁷²Ti Ap̄iȳeri le si'ise pɔi yeti: < < Mam ka mi buraaga w̄a. > > ⁷³Ti la ɛɔe f̄ee, ti s̄eba n ze m̄i na, lem Ap̄iȳeri yeti: < < Asura, f̄ɔn de la ba n̄era ayula, se'ere n soe la, fu yetɔga n pa'ale f̄ɔn ze'ele z̄e'a. > > ⁷⁴Ti Ap̄iȳeri pɔi yeti: < < Mam ka mi buraaga w̄a, mam s̄an parum me, Naw̄enne sibge ma. > > Wakat-ɛɔa m̄ɛɔa ti n̄o-rɔɔgɔ kaase. ⁷⁵Ti Ap̄iȳeri yaɔa t̄eege Azezi n daan ye le ẽ yeti:

< < Lan dēŋe nō-rɔɔɔ n wɔn kaase, fu wɔn si'ise nōore atā ti fōn ka mi mam > > na. Tɪ Apɪyɛeri yese yēŋa ka kella la sū-sā'aŋɔ zozo'e.

27

Ba tarɪ Azezi sēŋe ɔmna Apilatɪ zē'am

(Amarkɪ 15:1, Alukɪ 23:1-2, Azã 18:28-32)

¹Beere n daan wiige bulika, ti kãabɔ kēma nēŋadōma, la tēŋa la kēma la wuu lagse tɔge ku yetɪ ba ku Azezi. ²Tɪ ba lu ē tarɪ sēŋe Apilatɪ n de ɔmna zē'am ka bɔ ē.

Azudaasɪ kūm

(Tōoma Gōŋɔ 1:18-19)

³Azudaasɪ n de sɛka n daan pa'ale ti ba yōke Azezi la, n yē ti ba tɔge Azezi yelle ku yetɪ ba ku ē na, a sūure sã'am mɛ. Tɪ a tarɪ lig-kōba pitã la sēŋe ti a ka lebse kãabɔ kēma nēŋadōma, la tēŋa la kēma la, ⁴dee yetɪ: < < Mam ēŋe la be'em, mam n pa'ale ti ba yōke sɛka n ka ēŋe be'em ti ba ku ē na. > > Tɪ ba yeke ē yetɪ: < < La ka pake tōma. La de la fōn yelle. > > ⁵Tɪ Azudaasɪ dɪke ligri la lobge Wēnde-kãte la puam, dee sēŋe ka pire mĩ'isi ki. ⁶Tɪ kãabɔ kēma la dɪke ligri la yetɪ: < < Ba de la zum ligri, la ka mase ti ti dɪke ba naage la Wēnde-kãte la ligri. > > ⁷Tɪ ba bãm, dɪke ligri la da yagba va'am ti a dena sãama laare zē'am. ⁸Bela n soe ti ba ken wi'ira zē'e-ēŋa ti zum va'am, halɪ wa paam zĩna. ⁹La de la bela ti Nawēnne nōtɔ'ɔsa Azeremi n yuun gulse se'em na ēŋe.

A yuun yetɪ: < < Ba dɪke la lig-kōba pitã, lig-sɛba ti lsrayelɪ dōma sake ti ba dɪke da ē na, ¹⁰ba dɪke la bãma da yagba va'am wu Zuudãana Nawēnne n yeke mam se'em na. > >

Ba tɔgɛ kv yeti ba kv Azezi

(Amarki 15:2-20, Aluki 23:3-5, 13-25, Azã 18:33-19:16)

¹¹Ban daan tarɪ Azezi sɛŋɛ gɔmna la zɛ'am na, tɪ a soke ẽ yeti:
< <Fɔn de la Zifdɔma naba? > > Tɪ Azezi lerge ẽ yeti: < <La de la
fɔn yeke se'em na. > > ¹²La kãabgɔ kɛma nɛŋadɔma, la tɛŋa la kɛma
daan dɔrɛ ẽ mɛ, tɪ a ka lerge se'ere. ¹³Tɪ Apilatɪ yeke ẽ yeti: < <Fɔn
ka wɔm ban tɔgrɪ se'em wuu dɔta fɔ? > > ¹⁴Tɪ Azezi ka lerge yetɔga
la baa ayɪla, tɪ la di'ige gɔmna la halɪ zozo'e.

¹⁵La Zɔɔg-base kibsa wakate woo gɔmna la ɛn yese la nɛra ayɪla yu'a
deem base, nɛr-sɛka tɪ nɛr-kuvɔŋɔ la boori. ¹⁶La wakat-ɛŋa bibɛ'a ayɪla
n daan boe yu'a deem, tɪ a yu'ure dena Abarabasɪ, tɪ nɛrba wuu mina
a yelle. ¹⁷Tɪ nɛr-kuvɔŋɔ la n lagɛ la, tɪ Apilatɪ soke ba yeti: < <Ane tɪ
yãma boori tɪ m yese base bɔ ya, Abarabasɪ bu Azezi tɪ ba wi'iri tɪ
Krisi* la? > > ¹⁸Apilatɪ daan mi tɪ la de la sũure ãyã tɪ ba yɔke Azezi
wa bɔ ɛŋa.

¹⁹La Apilatɪ n daan zɪ saryadia zɛ'am na, tɪ a pɔga tɔm tɪ ba wa
yeke ẽ yeti: < <Yese fu nu'ugo pɔpeelem dãana la yelle pɔam, se'ere
n soe la, mam zãasɔm mɛ a yelle yu'ɔŋɔ, tɪ la nãmse mam zozo'e. > >

²⁰La kãabgɔ kɛma nɛŋadɔma, la tɛŋa la kɛma daan yeke nɛrba la mɛ
tɪ ba sose Apilatɪ tɪ a base Abarabasɪ bɔ ba, dee kv Azezi. ²¹Tɪ gɔmna
la le soke ba yeti: < <Nɛr-bãna bayi wã, yãma boori tɪ m base la ãne
bɔ ya? > > Tɪ ba lerge yeti: < <Abarabasɪ. > > ²²Tɪ a soke ba yeti:
< <Bɛla, yãma boori tɪ m ɛŋɛ Azezi tɪ ba wi'iri tɪ Krisi la, la
wãne? > > Tɪ ba wuu lerge yeti: < <Ka ẽ dɔ-puurŋa* zuo. > > ²³Tɪ a
soke ba yeti: < <A ɛŋɛ la bɛm n de be'em? > > Tɪ ba malɪn tɔgra
ke'enke'em yeti: < <Ka ẽ dɔ-puurŋa zuo. > > ²⁴La Apilatɪ n yɛ tɪ ɛŋa
kãn yãŋɛ ɛŋɛ sɛla, dee tɪ nɛrba la gita pa'asra la, tɪ a dɪke ko'om

peege a nu'usi nēr-kvṽṽṽṽ la wuu nēṅam, dee yeḷe yeti: < < Mam nēṅa ka boe ēna wā kva pvam. La de la yāma yelle. > > ²⁵Ti nēr-kvṽṽṽṽ la wuu lerge yeti: < < A kva la taale bōna tōma la ti kōma zuto. > > ²⁶Ti Apilatı base Abarabası bō ba, dee botı ba wē Azezi la ka'asa, dee dıke ē bō ti ba ka ka ē dō-puurṅa zuo.

²⁷Ti gōmna la sudaası tarı Azezi kē gōmna la yire, ti sudaası wuu lagse kaage ē. ²⁸Ti ba yeese Azezi futo, dee ye ē fuugo n de gomusga, ²⁹dıke gō'osi wuge mūṅa vuge ē, dıke dasaare zānte a zvṽṽṽṽ nu'ugo, yāṅa ka dūma tēṅa a nēṅam la'ara ē yeti: < < Zıfdōma naba, naa! > > ³⁰La ba daan tubsrı la nōtōorum ita ē, dee tō'sra dasaare la wē'era a zuugo. ³¹La ban la ē kılum na, ba yeegge gomusga fuugo la me, dee dıke a mēṅa fuugo la lebe ye ē, tara ē we'esa ti ba ka ka dō-puurṅa zuo.

Ba ka Azezi dō-puurṅa zuo

(Amarkı 15:21-32, Alukı 23:26-43, Azã 19:17-27)

³²Ban daan ze'ele tēṅa pvam yesra la, ba tv'use la buraaga ayıla yv'vre n de Asımō n ze'ele Sırenı, ti ba pērgē ē ti a to'oge Azezi kım dō-puurṅa la buke. ³³Ti ba paage zē'a ti ba wı'iri a yv'vre ti Golgota, a vōore de la zuwanṅre zē'a, ³⁴dıke dāam n gaam na tum n ān toogo bō Azezi ti a yū. Ti a leme ba, zagse ka yū. ³⁵Ti ba daan ka ē dō-puurṅa zuo, dee dıke a futo ti ba pvı la taaba, pōse ti ba bāṅe nēra woo n wun to'oge seka. ³⁶Dee yāṅa zēa gu'ura ē. ³⁷Ba daan gulse la gulsgo pa'ale se'ere n soe ti ba kv ē, lable a zuum dō-puurṅa la zuo. Ba daan gulse yeti:

< < Ēna de la Azezi
n de Zıfdōma naba la. > >

³⁸Ba daan tarı la fāarba bayi wa po ka dō-puursı zuto, ayıla Azezi

zuvgo boba, ayema a gobga boba. ³⁹Ti seba n doli bilam tolla la, lobra ba zuto dee tvura e ⁴⁰yeti: <<Dagi fon daan yeti fon wun worge Wende-kate la, dee le me e dabsa ata puam? Fu san siri dena la Nawenne Dayva, faage fu menja ze'ele do-puurja la zuo sige.>> ⁴¹Kaabgo kema nenjadoma, la loo karensandoma, la tenja la kema me daan tvuri e me yeti: ⁴²<<A daan faagri nerba baseba me, dee ka tana wun faage a menja. A san dena Israyeli doma naba, a ze'ele do-puurja la zuo sige nananne wa, ti toma wun bo e sira. ⁴³A te'ege Nawenne me yeti enja de la Nawenne Dayva, Nawenne san noje e, a faage e leele wa.>> ⁴⁴Ti faarba la ti ba ka do-puursi zuto lem e na me togra e be'em.

Azezi kum

(Amarki 15:33-41, Aluki 23:44-49, Azã 19:28-30)

⁴⁵La daan pose la wontenja zuu-tenjasuka, ti tenja la wuu lebge lika tari ka paage zaanore karf-ata. ⁴⁶Karf-ata la wakate ti Azezi toge ke'enke'em yeti: <<Eli, Eli, lama sabaktani.>> La vore de la: <<Mam Wennaam, mam Wennaam, bem ti fon base mam?>> ⁴⁷Ti seba n ze lem bilam na baseba wom bela, yeti: <<A wi'iri la A'eli*.>> ⁴⁸Ti ba nera ayila zoe senje ka dika netuja luse da-m'isgo puam zeke la doogo bo e ti a yu. ⁴⁹Ti seba yeti: <<Base ti gu bise A'eli la san wun wa'am wa faage e.>> ⁵⁰Ti Azezi le kaase ke'enke'em, dee ki. ⁵¹Ti fuugo la n yuli Wende-kate* la puam beje ze'e-sono la aage pusuka saazuum halu ka paage tenja. Ti tenja miim, ti tampiisi wore. ⁵²Ti yoro be'ese, ti pupeelem doma zozo'e n yuun ki vo'oge. ⁵³Ti Azezi n wa vo'oge la, ti ba ze'ele yoro puam yese ke Zerizalem, ti nerba zozo'e ye ba. ⁵⁴La Rom* sudaasi ke'ema, la sudaasi la n ze gu'ura Azezi la n ye tenja la n miim, la bon-seba n enje

la, dabeem n yōke ba zozo'e, ti ba yeti: << A siri de la Nawēnne Dayua. >>

⁵⁵La pɔgsi zozo'e n daan ze zāazāare dee bɪsra, ba daan ze'ele la Galile doose Azezi ti ba sōŋra ě. ⁵⁶Amaari n ze'ele Magdala, la Amaari n de Azaki la Azozefu ma, la Azebede dayɔɔsi la ma n daan boe pɔg-bāma puam.

Azezi laare

(Amarki 15:42-47, Aluki 23:50-56, Azã 19:38-42)

⁵⁷Buraaga ayila n daan de bōntarsa, n ze'ele Arimate, ti a yu'ure dena Azozefu. A de la Azezi karēmbia. ⁵⁸Wēnne n daan mā'age, ti a sēŋe Apilatı zē'am ka sose ě ti a base ti a dıke Azezi kūm na sēŋe ka laage. Tı Apilatı bɔ nōore ti ba bɔ ě. ⁵⁹Tı Azozefu dıke kūm na, dıke tãn-paale n ãn sōŋa vile ě, ⁶⁰tarı ě ka laage yɔ-paale puam ti a botı ba tũ tãmpĩa ĩyã, a mēŋa ĩyã. Tı ba bilge kug-kãte lige yɔɔɔ la nōore dee fōrge. ⁶¹Amaari n ze'ele Magdala, la Amaari ayēma la daan zı me ti ba nēŋa tɔ yɔɔɔ la.

⁶²Daar-seka ti Zıfdōma māasnı ba vo'osgo* daare la n tole ti beere wiige, ti kãabɔ kēma nēŋadōma, la Farisi* dōma lagse taaba sēŋe Apilatı zē'am, ⁶³ka yeke ě yeti: << Zuudãana, tōma tēri ti pōmpã'asum dãana wã, ěn daan nãn vɔa la, a daan yeti: <Mam wun vo'oge dabsa atã daare.> ⁶⁴Bela, bɔ nōore ti ba gu'ura yɔɔɔ la sōŋa sōŋa ka paage dabsa atã daare, la sãn dagna bela, a karēmbiisi la wun wa zı kūm na me dee yeke nērba ti a vo'oge me. Pã'asgo ěna wã yãŋa wun dena be'em gãna pɔspɔsi la. >> ⁶⁵Tı Apilatı yeke ba yeti: << Tarı-ya gu'urba sēŋe ka base ti ba gu'ura yɔɔɔ la wu yãma n boori se'em na. >> ⁶⁶Tı ba sēŋe ka bı yɔɔɔ la nōore dee base ti gu'urba gu'ura ě.

28

Azezi vo'ore

(Amarki 16:1-10, Aluki 24:1-12, Azã 20:1-10)

¹Zifdōma vo'osgo daare n daan tole, ti beere wiige Lasrı daare bulika yu'uhɔ yu'uhɔ, ti Amaari n ze'ele Magdala, la Amaari ayēma isge sēɲe ti ba ka buse yɔɔɔ la. ²Ti tēɲa daan mĩim zozo'e, ti Zuudāana Nawēnne maleka* ze'ele saazuum sigum wa bilge kugre la bĩɲe kēnkernɲa zēa a zuo. ³A nēɲa daan yēgrı wu sa-yāka. Ti a futo pelge āna yulu yulu. ⁴Ti dabeem yōke seba n gu'uri yɔɔɔ la. Ti ba gōgra dee āna wu ba ki me na.

⁵Ti maleka la yele pɔgsı la yetı: < < Da zoe-ya dabeem, mam mi ti ya eeri la Azezi ti ba ka dɔ-puurɲa* zuo ku la. ⁶A ka boe kalam. A vo'oge me wu ēn daan yele se'em na. Wa'am-ya wa buse ban daan bĩɲe ē zē'e-seka la, ⁷dee sēɲe-ya tɔtɔ ka yele a karēnbiisi la yetı, a vo'oge me. La a wun dēɲe ya nēɲa sēɲe Galile. Bilam ti ya wun ka yē ē. Sela ti mam tarı ti m yele ya n bela. > > ⁸Ti pɔgsı la fōrge yɔɔm na tɔtɔ la dabeem, dee tara sũ-yēlga zozo'e, zɔta wē'esa ti ba ka yele Azezi karēnbiisi la sela n ēɲe la.

⁹Ti Azezi dare tu'use pu'use ba. Ti ba lem ē ka dūma tēɲa a nēɲam gure a nāma nā'ase ē. ¹⁰Ti Azezi yele ba yetı: < < Da zoe-ya dabeem, sēɲe-ya ka yele m sɔbiisi la yetı, ba sēɲe Galile, ti la de la bilam ti ba wun yē mam. > >

¹¹Pɔgsı la n daan boe sore wē'esa la, ti seba n gu'uri yɔɔɔ la nērba baseba sēɲe tēɲa puam ka tɔge pa'ale kāabgɔ kēma nēɲadōma bōn-seba wuu n ēɲe la. ¹²Ti kāabgɔ kēma nēɲadōma, la tēɲa la kēma la lagse ku nōore ayula, bɔ sudaasi la ligri zozo'e, ¹³dee yele ba yetı:

< < Yele-ya nērba la yeti, yu'ḅḅḅ ti yāma gā gīsra dee ti Azezi karēnbiisi la wa'am wa zū kūm na. ¹⁴La gōmna la sān wōm bela, tōma wun tōge la ē le, yese ya yelle la puam. > > ¹⁵Ti sudaasi la to'oge ligri la, dee ēḅe wu ban yele ba se'em na. Ti yetḅḅ-ēḅa saage Zifdōma la tēḅasuka halı wa paam zīna.

Azezi puke a mēḅa pa'ale a karēnbiisi

(Amarkı 16:14-18, Aluki 24:36-49, Azā 20:19-23, Tōoma 1:6-8)

¹⁶Karēnbiisi pia la ayula la daan sēḅe la Galile, ka zom tān-seka ti Azezi bō ba nōore yeti ba sēḅe la zuo. ¹⁷La ba yē ē mē, ka dūma tēḅa a nēḅam nā'ase ē, la baseba daan sē'eni mē. ¹⁸Ti Azezi lem ba, yele ba yeti: < < Nawēnne bō mam pāḅa wuu n boe saazuum, la tēḅa wā zuo mē. ¹⁹Bela, sēḅe-ya dūnia wuu ka boti nērba buuri wuu lebge mam karēnbiisi. Mise-ya ba ko'om puam, la So Nawēnne, la a Dayva, la a Sia* yu'ḅḅ. ²⁰La ya zāsum ba ti ba sake bōn-seba wuu ti mam bō ya nōore ti ya ita la. La bāḅe-ya ti mam boe la ya mē wakate wuu, halı ti la ka paage dūnia ba'asgō. > > \f1 3:11 Karēḅe-ya Tōoma gōḅḅ 2:1-13. \f2 8:20 9:6 Azezi sān ēn yeti ti Nērsaala* Dayva la, la de la a mēḅa ti a tōgrı. \f3 9:6 Azezi sān ēn yeti ti Nērsaala* Dayva la, la de la a mēḅa ti a tōgrı. \f4 9:9 Amatie yu'ḅḅ ayula n de Alevi (Amarkı 2:14). \f5 9:14 La de la Azā seka n daan misri nērba ko'om puam na. Biḅe-ya Amatie sapıtrı 3. \f6 11:19 Azezi sān ēn yeti ti Nērsaala* Dayva la, la de la a mēḅa ti a tōgrı. \f6 12:8 Azezi sān ēn yeti ti Nērsaala* Dayva la, la de la a mēḅa ti a tōgrı. \f7 12:24 Abelzebuli de la Asūtāana yu'ḅḅ ayēma. \f8 15:22 Nēr-seba n yuun kē'era Kanaan dagı Zifdōma. \f9 16:27 Azezi sān ēn yeti ti Nērsaala* Dayva la, la de la a mēḅa ti a tōgrı. \f10 18:24 Talā ayula de wu nēra ayula yuuma pia la anuu tōoma yōḅḅ. \f11 18:28 Deniye ayula de wu nēra

daare ayila tōone yōōrō. \f12 19:28 Azezi sãn ěn yeta ti Nĕrsaala* Dayua la, la de la a mĕŋa ti a tōgru. \f13 21:5 Siyō de la Zerizalem yu'ure ayĕma. \f14 24:27 Azezi sãn ěn yeta ti Nĕrsaala* Dayua la, la de la a mĕŋa ti a tōgru. \f15 25:15 Talã ayila de wu nĕra ayila yuuma pia la anuu tōoma yōōrō. \f16 25:31 Azezi sãn ěn yeta ti Nĕrsaala Dayua la, la de la a mĕŋa ti a tōgru. \f17 26:15 Ba yuun taru lig-kōba pitã da'ara la yamŋa ayila. \f18 26:24 Azezi sãn yeti Nĕrsaala Dayua, la de la a mĕŋa ti a tōgru. \e

MRK

Amarku

Azezi-krisi kō-yĕlga ti Amarku gulɛ

Bilgre

Amarku yuun doose la Apolu, la Apuyeeru tōm Nawĕnne tōoma. (Tōoma 13:5, Kolosu 4:10, 1 Puyeeru 5:13).

Amarku gōŋo wã pa'ale me ti Azezi de la Nawĕnne Dayua n taru nōore la sɛla woo (Amarku 1:1 la 15:39).

A gōŋo la pōɛe tōgra la Azã sɛka n yuun misri nĕrba ko'om puam na n wa'am wa malge sore bo Azezi yelle, la Azezi n botu Azã mise ě ko'om puam, la Asūtãana n make Azezi yelle (1:1-13).

A pa'ale ti Azezi wi la nĕrba ti ba dola ě, zãsum ba, botu bã'adōma yĕ ĩmã'asum, dige kulkã'arsu, ti ba yese dee base nĕrba, dee base nĕrba tōon-be'ero taale (1:14 - 10:52).

A ken yetu Azezi dĕŋe yele a karĕnbiisi la me ti ěŋa sãn sĕŋe Zerizalem, ěŋa wun yĕ la nãmsgo, dee ki, la ěŋa wun vo'oge me. La ba ka wōm a yetoga la vōore (8:31-32, 9:30-32, 10:32-34).

A yetu Azezi we'esi la Zerizalem sĕŋe ka paage kĕ'era tĕŋa la puam,

tɪ nēr-kvʊŋɔ nā'asɛ ẽ zozo'e, dee tɪ Zifdōma nēŋadōma sise ẽ. La a zāsum la nēr-kvʊŋɔ, la a karēnbiisi, la a bɛ'ɛba mē wuu (sapɪtrɪ 11 - 13).

Gõŋɔ la ba'asgɔ, Amarkɪ gulɛ yetɪ Azezi ki la dɔ-puurŋa zuo, dee vo'oge (sapɪtrɪ 14 - 16).

Azezi-krisi kō-yēlga tɪ

Amarkɪ

gulɛ

1

Azā n mōolɪ Nawēnne yetɔga la yelle

(Amatie 3:1-12, Aluki 3:1-18, Azā 1:19-28)

¹Nawēnne Dayva Azezi-krisi kō-yēlga n pɔsɛ se'em n wāna: ²La ẽŋɛ wʊ Nawēnne nōtɔ'ɔsa A'ezayi* n yuʊn pōn gulɛ se'em, tɪ Nawēnne yetɪ:

< < Bɪsɛ, mam wʊn tōm m tōntōnna
tɪ a dēŋɛ fʊ nēŋa ka malɛ sore bɔ fɔ.

³La de la seka n mōolɪ weem tɔgra ke'enke'em yetɪ:

< Malɛ-ya sore sōŋa gu'ura Zuudāana.

Malɛ-ya sɔa la tɪ ba tɔ tēntēesi bɔ ẽ. > > >

⁴Bɛla tɪ Azā daan bɔna weem misra nērba ko'om* puam, dee mōola yetɪ: < < Teege-ya yɛm basɛ tōon-be'ero, dee botɪ ba mise ya ko'om puam, tɪ Nawēnne basɛ ya tōon-be'ero taalɛ. > > ⁵Tɪ nērba zozo'e ze'ele Zude* so'olum wuu, la Zerizalɛm* wuu sēnna Azā zē'am tɔgra ba tōon-be'ero pa'ala ẽ. Tɪ Azā misra ba kulaa yu'vɛ n de Zurdɛ

puam.

⁶Azã daan ye la fuugo n de yugma kõbrɔ, dee dıke sagãnne lu a sia. A daan diti la seero la saniiro.

⁷A daan moolı yetı: < < Nëra n boe mam poorum sëna, ëña tari pãña gãnna mam mε. Mam ka mase ti m dõbre a nëjam pirge a tagra. ⁸Mam misri ya la ko'om puam, la ëña wun mise ya la Nawënnε Sia*. > >

Azezi ko'om misga, la Asütãana n make ë bıse

(Amatie 3:13-4:11, Aluki 3:21-22, 4:1-13)

⁹Wakat-ëña Azezi* ze'ele la Nazareti n boe Galile so'olum wa'am Azã zë'am, ti a mise ë Zurdë ko'om na puam. ¹⁰Tı Azezi ze'ele ko'om na puam dɔɔra, yë ti saazuum dare yo'oge, ti Nawënnε Sia ãna wu na'adawenne na sige a zuo, ¹¹ti kõa ze'ele Nawënnε yire yetı: < < Fõn de la mam Dayva ti mam nõñe la m sũure wuu, fu paage la mam yem. > >

¹²Bilam mëña ti Nawënnε Sia botı Azezi sëñe weem. ¹³A daan boe weem na dabsa pinaasi, ti Asütãana* wa'am wa make ë bıse. A daan boe la we-dũnsi le, ti Nawënnε malekadõma* sõñra ë.

Azezi wi nërba banaasi ti ba dɔla ë

(Amatie 4:12-22, Aluki 4:14-15, 5:1-11)

¹⁴Ba daan yõke Azã yu la yu'a deego puam. Bela poorum ti Azezi sëñe Galile ka moola Nawënnε kõ-yëlga yetı: ¹⁵< < Wakate paage mε, Nawënnε so'olum* lem mε. Teege-ya yem base tõon-be'ero dee sake kõ-yëlga la. > >

¹⁶Azezi daan dolt la Galile mõgre la nõorum, yë Asimõ la a yıbga A'andre n boe mĩ lɔbra yuka mõgre la puam, ba daan de la zün-

yōgriba. ¹⁷Ti a yeke ba yeti: < < Dɔla-ya mam, ti mam wun boti ya
εεra nērba ti ba dɔla mam wu yāma n yōgru zūma se'em na. > > ¹⁸Ti
ba base ba yugsi la bilam mēŋa, dee dɔla ē.

¹⁹Ti a sēŋe fēe yē Azebede dayɔɔsi Azaki la a yibga Azā n boe ōorŋo
puam malgra ba yugsi. ²⁰Ti a dare wi ba, ti ba base ba sɔ Azebede la
a tōntōniba ōorŋo la puam, dee dɔla ē.

Kulkā'arga n taru buraa ti Azezi boti a yese

(Aluki 4:31-37)

²¹Ti Azezi la a karēnbiisi sēŋe Kapernaum. Ti Zifdōma vo'osgo*
daare paage, ti Azezi kē ba wēndeem zāsna nērba. ²²La zāsŋo la di'ige
nērba la mε, se'ere n soe la, a zāsŋo la daan taru la pāŋa, la ka ān wu
lɔɔ* karēnsāandōma n zāsni se'em na.

²³Ti buraa daan bɔna wēndeem na ti kulkā'arga* tara ē, ti buraa la
kaase yeti: ²⁴< < Azezi n de Nazareti nēra, fōn bēm yelle n boe la
tōma? Fōn wa'am ti fu sā'am na tōma? Mam mi fōn de seka. Fōn de
la pupeelem dāana n ze'ele Nawēnne zē'am. > >

²⁵Ti Azezi tāsε kulkā'arga la yeti: < < Go'oge, yese dee base ē. > >
²⁶Ti kulkā'arga la bigse buraa la ti a gōgra, dee kaase tagurga yese
dee base ē. ²⁷Ti ba wuu ze yeri, sakra taaba yeti: < < Wāna de la
bēm? La de la zāsŋo paalga n taru pāŋa. A tɔgru la kulkā'arsi, ti ba
sakra a nōore. > > ²⁸Ti Azezi yu'vre dare saage Galile so'olum zē'a
woo.

Azezi boti bā'adōma yē imā'asum

(Amatie 8:14-17, Aluki 4:38-41)

²⁹Ti Azezi la a nērba daan yese Zifdōma wēndeem na, ti Azaki la
Azā doose ba, ti ba sēŋe ka kē Asimō la A'āndre dōma yire. ³⁰Ti

Asimō dæem-pɔka ïyā ba tʉlge, tɪ a gā. Tɪ Azezi paage, tɪ ba dare tɔge pɔka la yelle bɔ ē. ³¹Tɪ Azezi sēŋe lem ē, gure a nu'ugo botɪ a isge. Tɪ bā'a la base ē, tɪ a ēŋe ba sāanɔ.

³²Tɪ wēnne wa lui sobe, tɪ ba tarɪ bā'adōma wuu, la seba tɪ kulkā'arsɪ tarɪ ba wa'am Azezi zē'am. ³³Tɪ tēŋa la nērba wuu lagse taaba yire la zanōrum. ³⁴Tɪ Azezi botɪ nērba zozo'e tɪ bā'asɪ to'oto'ore tarɪ ba yē ïmā'asum, dee dige kulkā'arsɪ zozo'e, tɪ ba yese. La a ka sake tɪ kulkā'arsɪ la tɔge, se'ere n soe la, ba pōn mina ē mɛ.

Azezi mōole Nawēnne kō-yēlga Galile

(Aluki 4:42-44)

³⁵Azezi daan isge la bulika yu'ʉŋɔ yu'ʉŋɔ yese tēŋa la puam sēŋe zē'a tɪ nērba ka boe, tɪ a ka pu'ʉsɛ. ³⁶Tɪ Asimō la nēr-seba n daan boe la ē na yese ɛera ē. ³⁷La ba daan yē ē mɛ, yele ē yetɪ: << Nērba wuu eerɪ fu mɛ. >> ³⁸Tɪ Azezi lerge ba yetɪ: << Base-ya tɪ tɪ sēŋe tēn-seba n lem na tɪ m ka mōole kō-yēlga la bilam mē, tɪ la de la bela ïyā tɪ mam wa'am. >> ³⁹Tɪ a kaage Galile so'olum wuu mōole kō-yēlga la Zifdōma* wēndeto puam, dee dige kulkā'arsɪ tɪ ba yese dee base nērba.

Azezi botɪ kōnkonne yē ïmā'asum

(Amatie 8:1-4, Aluki 5:12-16)

⁴⁰Buraa ayɪla n de kōnkonne* n wa'am Azezi zē'am wa ka dūma tēŋa a nēŋam sose ē yetɪ: << Fu sān bɔɔra, fu tā wun base tɪ m yē ïmā'asum mɛ le āna sōŋa. >> ⁴¹Tɪ a ninbāalga yōke Azezi, tɪ a tēege a nu'ugo kalum ē yetɪ: << Mam bɔɔra, yē ïmā'asum le āna sōŋa. >> ⁴²Tɪ bā'a la base ē bilam mēŋa, tɪ a le āna sōŋa. ⁴³Tɪ Azezi yele ē yetɪ a fōrge, dee kā'an ē yetɪ: ⁴⁴<< Da kān yele nēra nēra, la sēŋe

Nawēnne kāabgɔ* kēema zē'am ka pa'ale ē fɔ mēŋa tɪ a bise, dee bɔ ē bōn-seba tɪ Amoyisi* yuun gulse yetɪ ba bɔ la, tɪ la pa'ale ba tɪ fu sɪrɪ yē ĩmā'asum. > > ⁴⁵La bura la fōrge me ka dɪke yelle la mōole pa'ale la ēŋe se'em. Bela tɪ Azezi daan ka le tāna wun kē tēŋa puam, sān dagna tɪ a li'ise me kē. A daan boe la zē'e-seba tɪ nērba ka boe mĩ na, tɪ nērba daan ze'eta zē'a woo sēnna a zē'am.

2

Azezi botɪ kɔɔrŋɔ yē ĩmā'asum

(Amatie 9:1-8, Aluki 5:17-26)

¹Bela poorum, dabsa fēe n tole, tɪ Azezi lebe Kapernaum. Tɪ nērba wōm tɪ a boe yire, ²lagse halɪ zozo'e tɪ zē'a ka bɔna, baa deego la nōorum. Tɪ a tɔgra Nawēnne yetɔga bɔ'ɔra ba. ³Tɪ nērba banaasɪ ze kɔɔrŋɔ wa'am Azezi zē'am. ⁴La nērba la n zo'oge la, ba ka tā wun ze ē paage Azezi zē'am, tɪ ba zom gɔsgɔ ka lake gɔsgɔ la bɔbre ayula, doose bilam sike kɔɔrŋɔ la, la a bōn-gā'ala deego la puam Azezi nēŋam. ⁵Tɪ Azezi yē ban bɔ ēŋa sɪra se'em na, yele kɔɔrŋɔ la yetɪ: < < M bia, fu tōon-be'ero taale ka le bɔna fu zuo. > > ⁶La lɔɔ* karēnsāandōma baseba n daan boe mĩ, daan zēa tē'esra ba sūurum yetɪ: ⁷< < Bēm tɪ ēna tɔgra bela? A tɔgrɪ pɔ'ɔra la Nawēnne. An tā wun base tōon-be'ero taale, sān dagna Nawēnne mā'a? > > ⁸Tɪ Azezi bāŋe a putē'erum ban tē'esrɪ se'em ba sūurum na, yele ba yetɪ: < < Bēm tɪ ya tē'esra wāna ya sūurum? ⁹Bēm n de nāana gānna, mam sān yele kɔɔrŋɔ la yetɪ, a tōon-be'ero taale ka le bɔna a zuo, bu mam sān yele ē yetɪ, a isge dɪke a bōn-gā'ala sēnna n de nāana? ¹⁰Bela m wun botɪ ya bāŋe tɪ Nērsaala Dayva*f1* la tarɪ pāŋa dūnia wā zuo me, wun base tōon-be'ero taale. > > Azezi yele bela, dee yele

kɔɔɾŋɔ la yeti: ¹¹ < < Isge dɪkɛ fʊ bɔ̃n-gã'ala kule. > > ¹² Tɪ kɔɔɾŋɔ la isge kalam dɪkɛ a bɔ̃n-gã'ala la ba wuu nifum yese. Tɪ ba wuu zɛ yɛɾɪ, pɛgra Nawɛnnɛ yeti: < < Tɔ̃ma nãn ka yɛ wãna. > >

Azezi wi Alevi tɪ a dɔla ɛ

(Amatie 9:9-13, Aluki 5:27-32)

¹³ Azezi le sɛŋɛ la mɔ̃grɛ la nɔ̃orum, tɪ nɛrba zozo'e sɛna a zɛ'am, tɪ a zãsna ba. ¹⁴ La Azezi sɛnnɪ tɔlla mɛ yɛ Alfe dayva Alevi* tɪ a zɪ lampo to'osgo deem tɔ'ɔsra lampo, tɪ a yeke ɛ yeti: < < Dɔla mam. > > Tɪ a isge dɔla ɛ.

¹⁵ Tɪ Azezi sɛŋɛ ka zɛa Alevi yire dita, tɪ lampo-tɔ'ɔsrɪba la tɔ̃on-be'ero dɔma zozo'e lagum na Azezi la a karɛnbiisi la dita, se'ere n soe la, nɛr-bãma buuri n daan zo'oge dɔla ɛ. ¹⁶ Tɪ lɔɔ karɛnsãandɔma n de Farisi* dɔma la yɛ Azezi n diti la lampo-tɔ'ɔsrɪba, la tɔ̃on-be'ero dɔma la, tɪ ba soke a karɛnbiisi la yeti: < < Bɛm tɪ a lagum na lampo-tɔ'ɔsrɪba*, la tɔ̃on-be'ero dɔma dita? > > ¹⁷ Tɪ Azezi wɔm bela, yeke ba yeti: < < Sɛba n tarɪ ãmã'asum ka eerɪ tɪba, sɛba n bɛ'erɪ n eerɪ tɪba. Mam ka wa'am tɪ m wi sɛba dɔma n yeti bãma mase mɛ na, mam wa'am na tɔ̃on-be'ero dɔma ãyã. > >

Ba soke Azezi nɔ̃orlva yelle

(Amatie 9:14-17, Aluki 5:33-39)

¹⁸ Azã karɛnbiisi, la Farisi dɔma daan lutɪ la nɔ̃orɛ. Tɪ ba wa'am wa soke Azezi yeti: < < Bɛm tɪ Azã karɛnbiisi, la Farisi dɔma karɛnbiisi la luta nɔ̃orɛ dee tɪ fɔ̃n karɛnbiisi la ka luta nɔ̃orɛ? > > ¹⁹ Tɪ Azezi yeke ba yeti: < < Nɛra sãn ɛŋɛ pɔgdire kibsa wi a sɪrdɔma tɪ ba wa'am, ba tã wun lɔ nɔ̃orɛ mɛ wakat-seka tɪ pɔgdita la ken bɔna ba zɛ'am na bu? Ayɛɪ, pɔgdita la sãn ken bɔna ba zɛ'am, ba kãn tã'age lɔ

nōore. ²⁰Wakate sēm me ti ba wun yese pɔgdita la ba zē'am, wakat-
ēŋa ti ba yāŋa wun lu nōore.

²¹Nēra kǎn dıke tǎn-paale lige fu-kɛka. A sǎn ēŋe bela, tǎn-paalga la
wun botı fu-kɛka la āage me gǎnna kurum na. ²²La nēra mē kǎn dıke
dǎ-paalga sūm wɔ-kegsı pɔam. A sǎn ēŋe bela, dǎ-paalga la sǎn kella,
ba wun botı wɔɔsı la tǎse me, ti dǎam na, la wɔɔsı la wuu sǎ'am. La
mase ti ba dıke dǎ-paalga sūm na wɔ-paalsı pɔam. > >

Vo'osgo daare yelle

(Amatie 12:1-8, Aluki 6:1-5)

²³Zıfdōma vo'osgo daare ayula ti Azezi la a karēnbiisi daan dɔla vato
pɔam tɔlla, ti a karēnbiisi la kɔ si wēena ɔbra. ²⁴Tı Farisi* dōma yele
ē yetı: < < Bıse, bēm ti ba ita sɛla n sisri vo'osgo* daare? > > ²⁵Tı
Azezi lerge ba yetı: < < Yāma nǎn ka karēŋe Adavidi* la a nēba la
kɔm n yuun dōnnı ti ba bɔɔra dia ti ba di, ti Adavidi yuun ēŋe se'em,
²⁶wakat-seka ti Abiata de Nawēnne kǎabgɔ kēma nēŋadāana la? A
yuun kē la Nawēnne deego la pɔam dıke borbortı sɛba ti ba bıŋe bɔ
Nawēnne na obe. La sisri me, nēra nēra ka obrı ba, sǎn dagna
Nawēnne kǎabgɔ* kēma mǎ'a. La Adavidi yuun obe ba me, dee bɔ
nēr-sɛba n boe a zē'am na. > > ²⁷Azezi yele bela dee le yele ba yetı:
< < La de la nērsaala ĩyǎ ti Nawēnne ēŋe vo'osgo daare, a ka ēŋe
nērsaala vo'osgo daare ĩyǎ. ²⁸Bela, Nērsaala* Dayva la n soe sɛla woo,
baa la vo'osgo daare. > >

3

Buraa nu'ugo n ki, ti Azezi botı a yē ĩmǎ'asum

(Amatie 12:9-14, Aluki 6:6-11)

¹Bela poorum, Azezi le kē la Zifdōma wēndeem. Tı buraa bōna mī ti a nu'ugo ki. ²Tı ba bısra Azezi wun botı buraa la yē ĩmā'asum vo'osgo* daare bu, a kān botı a yē ĩmā'asum. Ba daan eeri la ba doose bilam dōre ē. ³Tı Azezi yele buraa la nu'ugo n ki la yetı: < < Isge ze'ele tēnasuka. > > ⁴Dee soke seba n bısri ē na yetı: < < Sore boe ti nēra ēņe sōņa vo'osgo daare bu, a ēņe be'em? Sore boe ti a fāage nēra vo'osgo daare bu, a kv ē? > > Tı ba sīna. ⁵Tı Azezi sūure yīige, ti a buse nērba la kaage, ti a sūure sā'am, ba sūure n ke la ĩyā. La a yele buraa la yetı: < < Tēege fu nu'ugo la. > > Tı a tēege, ti nu'ugo la yāņa tēege āna sōņa. ⁶Tı Farisi* dōma yese toto ka bām la naba A'erōdı* nērba bāma n wun ēņe se'em kv Azezi.

Nērba zozo'e n lagse Azezi zē'am Galile mōgrum

⁷Azezi la a karēnbiisi la yese sēņe la Galile mōgrum bōba. Tı nērba zozo'e ze'ele Galile, la Zude, ⁸la Zerizalem, la Idume, la Zurdē kulaa doone, la tēn-seba n lem Tiiri* la Sidō doose ē. Nēr-kuvņo la daan wōm na ēn ēņe se'em na wuu, ti ba sēņe a zē'am. ⁹Tı Azezi yele a karēnbiisi la yetı, ba vuta ōorņo lem na ti nērba la da wa mike ē. ¹⁰A daan botı bā'adōma zozo'e n yē ĩmā'asum, bela ti bā'adōma wuu daan mikra taaba bōra ti ba paage kalum ē. ¹¹La kulkā'arsı n doli nēr-seba la sān ēn yē ē, ba luti la a nēņam kaasra tagursi yeta ti: < < Fōn de la Nawēnne Dayua. > > ¹²Tı Azezi daan zebe kulkā'arsı la yetı, ba da botı nēra bāņe ēņa n de nēr-seka.

Azezi looge a karēnbiisi pia la ayi

(Amatie 10:1-4, Aluki 6:12-16)

¹³La bela poorum Azezi daan sēņe ka zom na tāņa zuo, dee wi nēr-seba ti a boori la ti ba wa'am a zē'am. ¹⁴Tı a looge nērba pia la ayi ti ba bōna la ē, ti a tōnna ba ti ba sēnna mōola Nawēnne kō-yēlga,

¹⁵dee bɔ ba pãŋa tɪ ba digra kulkã'arsɪ tɪ ba yesra. ¹⁶Sɛba tɪ a looge la daan de la Asimõ tɪ Azezi sɪ a yu'urɛ tɪ Apɪyɛɛrɪ, ¹⁷la Azebede dayɔɔsɪ Azakɪ la a yɪbga Azã, tɪ a sɪ ba yu'urɛ tɪ Buanɛrgɛsɪ. A võore de la nɛrba n ãn wu sa-dãmŋɔ. ¹⁸La A'ãndre, la Afilipi, la Abatelemi, la Amatie, la Atoma, la Alfe dayva Azakɪ, la Atade, la Asimõ sɛka n de Zelɔtɪ* nɛra ayula la, ¹⁹la Azudaasɪ Iskariyo, sɛka n wun pa'ale tɪ ba yõkɛ Azezi la.

Azezi pãŋa gãnnɪ Asûtãana

(Amatie 12:22-32, Aluki 11:14-23, 12:10)

²⁰La Azezi daan kule la yire, tɪ nɛrba le lagse zozo'e. Tɪ Azezi la a karɛnbiisi la ka yɛ folle wun di. ²¹Tɪ ba daan yetɪ Azezi yirsri mɛ, tɪ a yir-dõma wõm belã sɛŋɛ tɪ ba ka yõkɛ ẽ.

²²Tɪ lɔɔ* karɛnsãandõma n ze'ele Zerizalɛm wa'am wa yetɪ:

< < Abelzebuli*f2* n dolɪ ẽ, la de la ɛŋa n de kulkã'arsɪ naba la pãŋa tɪ a tarɪ digra kulkã'arsɪ tɪ ba yesra. > > ²³Tɪ Azezi wi ba, make

makre bɔ ba yetɪ: < < Asûtãana* wun ɛŋɛ la wãne dige Asûtãana?

²⁴So'olum ayula nɛrba sãn welge zɛbra taaba, so'olum ɛŋa wun wõrgɛ mɛ. ²⁵La yire ayula dõma sãn welge zɛbra taaba, yi-ɛŋa wun wõrgɛ

mɛ. ²⁶La Asûtãana sãn isge zɛbe la a mɛŋa welge, a pãŋa la ba'ase mɛ, a kãn tã'agɛ ze'ele.

²⁷La nɛra ka tã wun kɛ pãŋa dãana yire ka vaage a lɔgrɔ, sãn dagna tɪ a dɛŋɛ lu pãŋa dãana la mɛ, dee vaage a lɔgrɔ la.

²⁸Mam yetɪ ya la sɪra, tɪ Nawɛnnɛ tã wun basɛ nɛrsaalba tõon-be'ero la wuu tɪ ba ɪtɪ la, la ba pɔ'ɔrɛ yetɔga la wuu taale. ²⁹La nɛra sãn

pɔ'ɔgɛ Nawɛnnɛ Sia*, Nawɛnnɛ kãn malɪn basɛ ẽ taale. Tõon-be'e-ɛna taale boe la a dãana zuo wakate wuu. > > ³⁰Ban yetɪ kulkã'arga n

dolɪ ẽ na ãyã, tɪ a yeke belã.

Azezi ma, la a yıbsı

(Amatie 12:46-50, Aluki 8:19-21)

³¹Tı Azezi ma, la a yıbsı wa'am wa ze yēŋa dee tōm yetı, ba wi ē ti a wa'am. ³²La nēr-kuvuŋo n daan zı kaage ē, ti ba yeke ē yetı: < <Fu ma, la fu yıbsı n wāna n boe yēŋa ɛra fɔ. > > ³³Tı Azezi yeke ba yetı: < <Āne n de mam ma, la āndōma n de mam yıbsı? > > ³⁴Dee buse nēr-seba n zı kaage ē na, yetı: < <Mam ma, la mam yıbsı n wāna. ³⁵Se'ere n soe la, nēr-seka woo n tı Nawēnne n boortı se'em na n de mam yıbga, la mam tā, la mam ma. > >

4

Kaara n lobge a bōnbuuri makre

(Amatie 13:1-9, Aluki 8:4-8)

¹Azezi le bōna la mōgre la nōorum zāsna nērba. Tı nēr-kuvuŋo zozo'e lagse a zē'am. Bela ti a kē ōoruŋo la n boe mōgre la puam na zı'ire, dee ti nēr-kuvuŋo la wuu bōna mōgre la nōorum. ²Tı a make magsa zāsum ba yela zozo'e. A zāsŋo la puam a yeke ba yetı: ³< <Selse-ya, kaara n daan yese ti a lobge a bōnbuuri. ⁴La ēn sēŋe ka lobgra bōnbuuri la, baseba lui la sore zuo, ti niinto wa'am wa di ba. ⁵Tı baseba lui zē'a n de tāmpıisi ti tēntōnno ka zo'oge mı. Tēntōnno n ka zo'oge mı na iyā, ti ba bule tɔtɔ yese, ⁶ti wuntɛŋa yēke wē ba ti ba ki, ba yēga n ka kē tēŋa la iyā. ⁷Tı bōnbuuri baseba lui gō'osi zē'a. Tı gō'osi la yese fure ba, ti ba ka wɔm biɛ. ⁸Tı bōnbuuri baseba lui zē'e-sōŋo puam bule yese, bı wɔm biɛ. Baseba wɔm na biɛ pitā-tā, ti baseba wɔm pısyoob-yoobi, ti baseba wɔm kɔbga kɔbga. > > ⁹A yeke bela dee yetı: < <Seka n wōm yetɔga wā, a selse sōŋa sōŋa. > >

Azezi pa'ale magsa vōore

(Amatie 13:10-23, Aluki 8:9-15)

¹⁰La Azezi yese la kēnkernja ti seba n kaage ē na, la a karēnbiisi pia la ayi la soke ē magsa la vōore. ¹¹Ti a yele ba yeti: < < Nawēnne boti yāma bāņe a so'olum yelle n sugē la mē. La seba n ka boe tōma puam na, yela wuu de la magsa bɔ ba.

¹²< Bela ti ba wun bise yē dee kān bāņe.

Ba wun wōm dee kān bāņe a vōore.

Sān dagi ni bela, ba wun leme wa'am Nawēnne zē'am,

ti a base ba tōon-be'ero taale. > > >

¹³La Azezi le yele ba yeti: < < Yāma sān ka bāņe makre ēna wā vōore, yāma wun ēņe la wāne bāņe magsa la wuu vōore? ¹⁴Bōnbuuri la ti kaara la lobge la, de la Nawēnne yetoga. ¹⁵Sore la zuo ti bōnbuuri seba lui la, ān wu nēr-seba n wōm yetoga la, ti Asūtāana* wa'am tɔtɔ wa yese yetoga la ba sūure puam. ¹⁶La tāmpīa la zuo ti bōnbuuri seba lui la, ān wu nēr-seba n wōm yetoga la dee sake to'oge ba tɔtɔ la sū-yēlga. ¹⁷La yetoga la n ka kē ba sūure puam na īyā, ba sake la wakate fēe, la toogo bu nāmsgɔ sān paage ba yetoga la īyā, ba basri mē tɔtɔ. ¹⁸La gō'osi la zē'a ti bōnbuuri seba lui la, ān wu nēr-seba n wōm yetoga la, ¹⁹ti ba yem yɔɔra la dūnia wā yela, ti bōntarsōm yela pā'asra ba, ti yela baseba yemleego tara ba, boti yetoga la ka tāna wun wɔm biē ba sūure puam. ²⁰La zē'e-sōņo la ti bōnbuuri seba lui la, ān wu nēr-seba n wōnni kō-yēlga la sakra, wɔm biē. Ti baseba wɔm pitā-tā, ti baseba pisyooob-yoobi, ti baseba kɔbga kɔbga. > >

Fitla makre

(Aluki 8:16-18)

²¹Azezi le yeke ba yeti: < < Ba yō'ori fitla dīke pī'igō vuge ē, bu ba dīke ē ze'ele gōrgō tilum? Ayei, ba wun dīke ē zoole la sela zuo.

²²Bela, bōn-sēka n sūge, dēni ti a puke. La bōn-sēka wuu n lile wun lilge. ²³Nēr-sēka n wōm yetōga wā, a selse sōṅa sōṅa. > >

²⁴A le yeke ba yeti: < < Mōrgē-ya wōm yāma n selsri se'em na vōore. Bōn-sēka ti ya dīke make bō nērba la, Nawēnne wun make la bela lebse ya, le make pa'ase. ²⁵Se'ere n soe la, sēka n tari, a wun bō ē pa'ase. La sēka n ka tari, bōn-sēka ti a tari la, a wun to'oge ē. > >

Bōnbuuri bia makre

²⁶Azezi le yeke ba yeti: < < Nawēnne so'olum* ān wu nēra n bure a bōnbuuri va'am puam. ²⁷A sān gīsra me bu a sān pīga me, wuntēṅa la yu'vṅō, bōnbuuri la bulli me yesra bita, ti a ka mina lan uti se'em. ²⁸Tēntōnno n boti bōnbuuri la yesra ba mēṅa, dēṅe puse vōoro, yāṅa yōge pua, wōm biē, ti ba bi. ²⁹La biē la sān bi, kaara la se'eri ba me, se'ere n soe la, bōnkōla lagsgō paage me. > >

Sō'oro biire makre

(Amatie 13:31-32, 34, Aluki 13:18-19)

³⁰Azezi le yeke ba yeti: < < Ti wun dīke la bēm make la Nawēnne so'olum, bu ti wun yeti a wōn na bēm? ³¹A ān wu sō'oro biire n ān pīka pīka gānna bōnbuuri wuu n boe dūnia zuo. ³²La ba sān bure ē, a biti me puse wil-kāra gānna zēvōoro buuri wuu. Ti niinto tāna wun te ba tūgrō a zuo a mā'asum puam. > >

³³Azezi daan dīke la magsa zozo'e n ān wu bāna tōge bō ba, mase wu ban wun tā'age wōm se'em na. ³⁴A ka tōge bō ba ti la sān dagna magsa. La a sān yese la a karēnbiisi la mā'a kēnkerṅa, ti a pa'ali ba yela la wuu vōore.

Azezi boti kusebgo yōke

(Amatie 8:23-27, Aluki 8:22-25)

³⁵Daar-ēṅa mēṅa zaanōore, ti Azezi yele a karēnbiisi la yeti: <<Ti dooge-ya mōgre la ke bɔba.>> ³⁶Ti a karēnbiisi la base nēr-kuyɔ la, dee sēṅe ka kē ōorɔ la ti Azezi boe mī na puam, dɪke ē ti ba we'esa. La ōornɔ baseba n daan mē boe ba zē'am. ³⁷Ti kuseb-kāte wa vugra ke'enke'em, ti ko-mī'isi wē'era kē'era ōorɔ la puam deege la ba pure ē. ³⁸La Azezi gā la ōorɔ la poorum kuke dafeere gisra. Ti a karēnbiisi la nēege ē, soke ē yeti: <<Karēnsāama, tōma n yeti ki wā, la ka pake fōn?>> ³⁹Ti a isge tāse kusebgo la, dee yele ko-mī'isi la yeti: <<Go'oge-ya, āna-ya sīm.>> Ti kusebgo, la ko-mī'isi la go'oge āna sīm. ⁴⁰Ti a soke ba yeti: <<Bēm ti ya zɔta dabeem bela? Bēm ti ya ka bɔ Nawēnne sira?>> ⁴¹Ti dabeem ba kē ba. Ti ba sakra taaba yeti: <<Ane n de ēna ti kusebgo la ko'om sakra a nōore?>>

5

Kulkā'arsɪ n dolɪ buraaga, ti Azezi dige ba

(Amatie 8:28-34, Aluki 8:26-39)

¹La Azezi la a karēnbiisi la dooge paage la mōgre la doone Geraza dōma tēṅa puam. ²Ti Azezi ze'ele ōorɔ la puam sige. Ti buraaga ti kulkā'arga dolɪ ē dare ze'ele yɔɔrum sēnna tu'usra ē. ³Buraaga la daan kē'eri la yɔɔɔ la tēṅasuka. Ti ba daan ka le tāna wun ba ē na bānsɪ. ⁴Se'ere n soe la, ba daan ēn ba la a nāma la a nu'usi la bānsɪ, ti a ēn kɔ ba base. Ti nēra nēra daan ka tāna wun yāṅe ē. ⁵Wunteṅa la yu'uyɔ a ēn ɛera la yɔɔrum, la tānsɪ tēṅasuka kaasra tagursi, dee wē'era a mēṅa la kuga pɔgna.

⁶Ti a yē Azezi zāazāare, zoe sēṅe ka ka dūma tēṅa a nēṅam, ⁷dee

tɔɣɛ ke'enke'em yeti: << Azezi, Nawēnne n gānni wuu Dayva, bēm n boe mam na fōn tēnasuka? Mam sosri fu mɛ Nawēnne iyā, da nāmse ma. >> ⁸Azezi dēɣe yele kulkā'arga la mɛ yeti a yese dee base ē. Bɛla n soe ti kulkā'arga la yele bɛla. ⁹Ti Azezi soke ē yeti: << Fōn yu'vrɛ? >> Ti a lerge yeti: << Mam yu'vrɛ de la Atusa, se'ere n soe la, tōma zo'oge mɛ. >> ¹⁰Ti a belem Azezi yeti, a da dige bāma ti ba yese tēɣa la puam. ¹¹La kurkurdōma zozo'e n daan boe tāɣa zuo ɔbra. ¹²Ti kulkā'arsi la belem Azezi yeti: << Bɔ ti nōore ti ti sēɣe ka kē kurkurdōma la. >> ¹³Ti a sake ban yele se'em na. Ti kulkā'arsi la base buraa la dee sēɣe ka kē kurkurdōma la. Ti ba wuu zoe sige ka lui mōɣre puam ki. Ba källe daan de wu tɔsayi.

¹⁴Ti seba n daan gu'uri kurkurdōma la zoe sēɣe tēɣa puam, la kēnkɛrsi la wuu ka yele sela n ēɣe la. Ti ba sēɣe ti ba ka bise lan ēɣe se'em. ¹⁵La ban paage Azezi zē'am na, ba yē buraa la ti kulkā'arsi la daan doli ē na n zī mī, yɛ futo, ti a yem bɔna sōɣa sōɣa. Ti dabeem kē ba. ¹⁶Ti seba n yē lan ēɣe se'em na, tɔɣɛ pa'alɛ ba bōn-sɛka n ēɣe buraa la, la bōn-sɛka n ēɣe kurkurdōma la. ¹⁷Ti ba belem Azezi yeti a fōɣe bāma tēɣa.

¹⁸Ti Azezi daan kē'era ɔorɣɔ la puam, ti buraa la ti kulkā'arsi daan doli ē na belem Azezi yeti, a base ti a dɔla ē. ¹⁹Ti Azezi ka sake, dee yele ē yeti: << Kule ya yire ka yele fu yir-dōma Zuudāana n zoe fu ninbāalga se'em, la ēn ēɣe sela wuu bɔ fu la. >> ²⁰Ti buraa la sēɣe Dekapɔli* so'olum ka mōola Azezi n ēɣe bōn-seba wuu bɔ ēɣa. Ti la daan di'ige ba wuu.

Azayirusi pɔyva, la pɔka n kalum Azezi fuugo yelle

(Amatie 9:18-26, Aluki 8:40-56)

²¹Azezi daan lebe dooge la mōɣre la doone ke bɔba la ɔorɣɔ la,

daan bɔna mōgre la nōorum, ti nēr-kvuŋɔ zozo'e lagse a zē'am. ²²Ti Zifdōma wēndeego nējadōma nēra ayula yu'vre n de Azayirusi wa'am mī wa yē Azezi, ka dūma tēŋa a nēŋam, ²³belem ē na a sūure wuu yeti: < < Mam pɔyva n bē'eri deege la a ki, wa'am wa dīke fu nu'usi pagle a zuo ti a pōse da ki. > > ²⁴Ti Azezi dɔla ē wē'esa, ti nēr-kvuŋɔ dɔla ē mikra ē.

²⁵La pɔka n daan boe nērba la tēŋasuka luta sukēŋa yuuma pia la ayi, ti la ka gɔ'ɔra. ²⁶A daan nāmse me zozo'e tɔbdōma zē'am, dīke ēn tari sela wuu sā'am, dee ti la ka sōna, la malɪn gānna la bela. ²⁷Ti pɔka la daan wōm Azezi yelle, wa'am wa firge nēr-kvuŋɔ la tēŋasuka paage Azezi poorum kalum a fuugo. ²⁸A daan yele a putē'erum yeti: < < Mam sān kalum a fuugo mā'a, mam wun yē ĩmā'asum. > > ²⁹La ēn kalum fuugo la, a zum na n yesri la ze'ele me ka le yesra, ti a bāŋe a ĩyā puam ti ēŋa yē ĩmā'asum. ³⁰La bilam mēŋa ti Azezi bāŋe ti pāŋa n yese ēŋa puam ēŋe sela, ti a gelge soke nēr-kvuŋɔ la yeti: < < An kalum mam fuugo? > > ³¹Ti a karēnbiisi la lerge ē yeti: < < Fōn yē la nēr-kvuŋɔ n mikri fōn wāna, dee sɔkra ti ān kalum fōn. > >

³²Ti Azezi buse kaage ti a bāŋe nēr-seka n ēŋe bela. ³³Ti dabeem tara pɔka la, ti a gōgra. La ēn bāŋe sela n ēŋe ē na, a wa'am me wa ka dūma tēŋa Azezi nēŋam tɔge ē a sira wuu. ³⁴Ti Azezi yele ē yeti: < < M bia, fōn bɔ mam sira la n boti fu yē ĩmā'asum. Sēŋe la sū-mā'asum, fu bā'a la base ya. > >

³⁵La Azezi n ken bɔna mī tɔgra la, ti nērba ze'ele Zifdōma wēndeego nējadāana la yire wa'am wa yele ē yeti: < < Fu pɔyva la ki me. Da le nāmse karēnsāama. > > ³⁶Ti Azezi wōm ban yele se'em na, dee yele Zifdōma wēndeego nējadāana la yeti: < < Da zoe dabeem, wen bɔ mam sira. > > ³⁷La Azezi daan ka base ti nēra nēra kɔlge ē, sān dagna Apɪyɛri, la Azaki, la a yɪbga Azā mā'a. ³⁸La ban sēŋe ka paage

Zifdōma wēndeego nēṅadāana yire la, tɪ Azezi yē nēr-kuuṅɔ n voolɪ, kaasra dee fabla zozo'e. ³⁹Tɪ a kē yire la ye le ba yetɪ: << Bēm tɪ ya vɔɔla dee kella? Bia la ka ki, a gīsri mɛ. >> ⁴⁰Tɪ ba la'ara ē. Tɪ a botɪ nērba la wuu yese yēṅa, dee doose bia la sɔ, la a ma, la a karēnbiisi batã la kē bia la n boe zē'a na, ⁴¹gure a nu'ugo dee ye le ē yetɪ: << Talita kumi. >> A vōore de la: << Pugla, mam yetɪ fu tɪ fu isge. >> ⁴²Tɪ pugla la daan dare isge sēna. Tɪ la di'ige nērba la, tɪ ba zɛ yerɪ. Pugla la daan tartɪ la yuuma pia la ayi. ⁴³Tɪ Azezi daan kã'an ba yetɪ, ba da kãn botɪ nēra nēra bāṅɛ bōn-ēṅa. Dee yetɪ, ba bɔ pugla la dia tɪ a di.

6

Nazaretɪ nērba ka bɔ Azezi sɪra

(Amatie 13:53-58, Aluki 4:16-30)

¹Azezi daan base tēn-ēṅa dee sēṅɛ la a mēṅa tēṅam, tɪ a karēnbiisi la doose ē. ²Tɪ Zifdōma vo'osgo* daare tɪ a kē ba wēndeem zāsna nērba. Tɪ nērba pãɪ wōm a zāsṅɔ la, tɪ la di'ige ba, tɪ ba sɔkra taaba yetɪ: << Bura-ēna yē zāsṅɔ ēna la be? Ane bɔ ē yem ēna? A ēṅɛ la wāne ita bōn-yālma bela? ³Dagɪ ēna n de dɔ-wāta la? Dagɪ ēna n de Amaari dayva, tɪ a yɪbsɪ dɛna Azakɪ, la Azoze, la Azudi, la Asimō la? Dagɪ a tãpa n boe tōma zē'am kalam wã? >> Bela tɪ ba zagse ka bɔ Azezi sɪra. ⁴Tɪ a ye le ba yetɪ: << Nawēnne nōtɔ'ɔsa yētɪ pēka mɛ, sãn dagna a mēṅa tēṅa, la a buuri, la a yir-dōma tēṅasuka mā'a tɪ a ka yētɪ pēka. >> ⁵La a daan ka yāṅɛ tōm tōon-yālma bilam, sãn dagna bã'adōma fēe tɪ a daan dɪke a nu'usi pagle ba zuto, tɪ ba yē ãmã'asum. ⁶La ban daan ka bɔ ē sɪra la, la di'ige ē mɛ.

Azezi tōm a karēnbiisi pia la ayi

(Amatie 10:5-15, Aluki 9:1-6)

Azezi daan kaartı la tēnsı la n boe bilam na zāsna nērba, ⁷daan wi a karēnbiisi pia la ayi la, tı ba wa'am a zē'am tı a tōm ba bayi bayi, dee bɔ ba pāŋa tı ba dige kulkā'arsı. ⁸Dee daan yele ba yetı: <<Da dıke-ya sɛla sɛla sore la sēnne iyā, dıke-ya dasaare mā'a, da tara-ya dia, bu tāmpɔkɔ, bu ligri sūm sēŋe. ⁹La pire-ya tagra, dee da ye-ya futo bayi bayi.>> ¹⁰A le yele ba yetı: <<Yan sēŋe ka sige yi-sɛka, kē'era-ya bilam ka paage daar-sɛka tı ya wun yese fōrge tēŋa la. ¹¹La tēn-sɛka nērba n ka to'oge ya, bu ka selse ya yetɔga, ya yese zē'e-ēŋa dee puse ya nāma tēntōnno base mī. Ya sān ēŋe bela, la wun pa'ale ba tı ba ka ēŋe sōŋa.>> ¹²Tı karēnbiisi la sēŋe ka mōola yetı, ba teege yem base tōon-be'ero. ¹³Dee dige kulkā'arsı zozo'e tı ba yese, dee ēŋe kaam ēŋe bā'adōma zozo'e zuto, tı ba yē ĩmā'asum.

Azā n mise nērba ko'om puam na kūm yelle

(Amatie 14:1-12, Aluki 9:7-9)

¹⁴Tı naba A'erɔdı* wōm Azezi yelle, se'ere n soe la, Azezi yu'ure daan yese la zē'a woo. Tı nērba baseba daan yeta tı: <<A de la Azā n daan misri nērba ko'om puam na n vo'oge, bela n soe tı a tara pāŋa tōnna tōon-yālma.>> ¹⁵Tı baseba yetı: <<A de la Nawēnne nōtɔ'ɔsa A'eli* n leme wa'am.>> Tı sɛba yetı: <<A de la Nawēnne nōtɔ'ɔsa ayēma wu Nawēnne nōtɔ'ɔsrıba baseba n daan boe la.>> ¹⁶Tı naba A'erɔdı daan wōm bela, yetı: <<A de la Azā sɛka tı mam daan botı ba wike a zuugo la n vo'oge.>>

¹⁷Se'ere n soe la, A'erɔdı mēŋa n daan botı ba yōke Azā lu tartı ka kē'esɛ yu'a deem, a kēema Afilipi pɔga A'erodıadı iyā. Se'ere n soe la, a daan fāage la a kēema pɔga di. ¹⁸Tı Azā daan yele ē yetı, la ka mase tı a fāage a kēema pɔga di. ¹⁹Tı A'erodıadı sūure yīige la Azā, tı a

zıgra ti a ku ē, la A'erɔdı iyā a ka tā'age ku ē. ²⁰A'erɔdı daan zoti Azā me, a daan mi ti a de la nēr-sōŋɔ, dee dena pupeelem dāana, bela iyā ti a gu'ura ē ti sela da ēŋe ē. A daan sān ēn selsra Azā yetɔga, la dāanı ē me zozo'e, la baa bela, a ēn selsra ē me la sū-yēlga.

²¹La daare ayula ti A'erɔdı ēŋe a dɔka daare kibsa, wi a tēŋa nērzuto, la suda-ke'endōma, la Galile nēnadōma. Tı A'erodiadı yē sore ēŋe ēŋa n boori se'em na. ²²A'erodiadı pɔyua n daan kē ka wa, ti A'erɔdı, la sāama la sūure ēŋe yēlum. Tı naba la yele pugla la yetı: << Sose mam fōn boori sela ti m bɔ fɔ. >> ²³Dee pɔı yetı: << Bōn-sēka wuu ti fu wun sose mam, baa la sān dena mam so'olum pusuka, mam wun bɔ fɔ. >> ²⁴Tı pugla la yese ka soke a ma yetı: << M sose bēm? >> Tı a ma lerge ē yetı: << Sose Azā n mise nērba ko'om puam na zuugo. >> ²⁵Tı pugla la lebe naba la zē'am tɔtɔ ka yele ē yetı: << Mam boori ti fu dıke la Azā n mise nērba ko'om puam na zuugo ēŋe la-pesŋa puam bɔ ma læle wā. >> ²⁶Tı naba la sūure sā'am halı, la ēn pɔı nērba la zē'am na iyā, a ka boori ti a mōŋe ē. ²⁷Tı a tōm a sudaaga tɔtɔ yetı, a sēŋe ka wike Azā zuugo tari wa'am. Tı a yese sēŋe yu'a deem na ka wike Azā zuugo, ²⁸dıke ēŋe la-pesŋa puam tari wa'am wa bɔ pugla la. Tı pugla la dıke zuugo la bɔ a ma. ²⁹Tı Azā karēnbiisi wōm, sēŋe ka dıke kūm na laage.

Azezi bɔ nēr-kuvŋɔ dia

(Amatie 14:13-21, Aluki 9:10-17, Azā 6:1-14)

³⁰Azezi n tōm seba la leme me wa lagse taaba a zē'am tɔge pa'ale ē bāma n ēŋe sela, la bāma n zāsum se'em wuu. ³¹La nērba zozo'e n daan sēnnı mĩ dee fōrgra, ti Azezi la a karēnbiisi la daan ka yē folle wun di. Tı Azezi yele a karēnbiisi la yetı: << Wa'am-ya ti ti yese kēnkernja zē'e-seka ti nērba ka boe mĩ na, ti ya ka vo'ose fēe. >> ³²Tı

ba kē ōorŋo we'esa kēnkernja zē'e-seka ti nērba ka boe.

³³Ti nērba zozo'e daan yē ban we'esti la bāŋe ba, daan yese tēnsti la wuu puam lagim sēŋe tɔtɔ dēŋe Azezi la a karēnbiisi la zē'e-seka ti ba we'esti la. ³⁴Ti Azezi paage ze'ele ōorŋo la zuo sige, yē nēr-kuvŋo la, ti ba ninbāalga yōke ē, se'ere n soe la, ba ān wu piisi n ka tarɪ dūnsīina. Ti a daan zāsna ba yela zozo'e. ³⁵Ti wēnne daan kē'era, ti a karēnbiisi la sēŋe ka yele ē yeti: < < Kalam zē'a de la mōom dee ti wēnne kē'era, ³⁶base nērba la ti ba sēŋe yiε, la tēn-pɪgsɪ la ka da dia di. > > ³⁷Ti a lerge ba yeti: < < Yāma mēŋa bɔ ba dia ti ba di. > > Ti ba soke ē yeti: < < Ti wun sēŋe ka da borborɪ lig-kōba*f3* kɔbsyi tarɪ wa'am wa bɔ ba ti ba di? > > ³⁸Ti Azezi soke ba yeti: < < Yāma tarɪ la borborɪ bale? Sēŋe-ya ka bɪsε. > > Ti ba sēŋe ka bɪsε, dee leme wa yeti: < < Tōma tarɪ la borborɪ banuu la zūma bayi. > >

³⁹Ti Azezi yele ba yeti, ba base ti nērba la welse sill-sille zī'ire mō-mā'asa la zuo. ⁴⁰Ti ba daan zī'ire kɔbga kɔbga, ti baseba zī'ire pinu-nu. ⁴¹Ti Azezi dɪke borborɪ banuu, la zūma bayi la gorge bɪsε saazuo pu'usε Nawēnne, dee fiise borborɪ la bɔ a karēnbiisi la yeti, ba pu nērba la, dee dɪke zūma bayi la fiise bɔ ba wuu. ⁴²Ti ba wuu di tɪge. ⁴³Ti a karēnbiisi la vaage borbor-gito, la zūn-gito n deege pɪre pɪtɔ pia la ayi. ⁴⁴Nērba la n daan di dia la, buraasɪ de la tusanuu.

Azezi sēnnɪ ko'om zuo

(Amatie 14:22-33, Azã 6:15-21)

⁴⁵Bela poorum ti Azezi dare base ti a karēnbiisi la kē ōorŋo dēŋe ē dɔɔra mōgre la doone ke bɔba, Betisayida tēŋa bɔba. Dee ti a mēŋa weege ti a keese nērba la. ⁴⁶La ēn keese ba la, a sēŋe la tāŋa zuo ti a ka pu'usε. ⁴⁷Ti wēnne kē ti ōorŋo la bɔna ko-kāte la tēŋasvka, dee ti Azezi bɔna doone ēŋa ayɪla mā'a. ⁴⁸Ti Azezi yē ti a karēnbiisi la n

mõnni õorņo la nāmsri me zozo'e, se'ere n soe la, kusebgo n vugri tu'usra ba. Tī beere yōna wiire, tī a sēna ko'om na zuo we'esa ba bōba, bōra tī a gāņe ba tole. ⁴⁹La ban yē ēn sēnni ko'om na zuo la, ba tē'ese tī a de la ki-isgne, tī ba kaase tagursi. ⁵⁰Ba wuu yē ē me, tī dabeem kē ba. Tī a dare yeke ba yeti: < < La de la mam, keņe-ya ya sūure, da zoe-ya dabeem! > > ⁵¹Dee zom ba zē'am õorņo la puam, tī kusebgo la go'oge. Tī karēnbiisi la palēņa ēke, tī ba ze yeri, se'ere n soe la, ⁵²ba ka bāņe borbori bōn-yālma la vōore, ba putē'era ka like.

Azezi boti bā'adōma yē ģmā'asum Zenezareti tējam

(Amatie 14:34-36)

⁵³Ba pārge mōgre la dooge paage la Zenezareti, ze'ele mōgre la nōorum. ⁵⁴La ban daan ze'ele õorņo la puam dooge la, tī nērba la bāņe Azezi totō. ⁵⁵Tī ba zoe kē so'olum na wuu, tī ba ze bā'adōma ba bōn-gā'ala puam wa'am, bāma n wōm tī Azezi boe zē'e-seka la. ⁵⁶La Azezi daan sān ēn sēņe zē'e-seka woo, tēn-kāra, la tēn-piģsi, la yie n boe kēņkersti la, ba tari la bā'adōma sēna gā'ata da'asi puam, dee bēlna ē yeti, a base tī bā'adōma la kalum a fuugo nōore mā'a. La seba wuu n daan kalum a fuugo la yē ģmā'asum me.

7

Yaabdōma zāsņo, la bōn-seba n boti nēra dena dēgro

(Amatie 15:1-20)

¹Farisi* dōma, la lōo* karēnsāandōma baseba n ze'ele Zerizalem daan wa'am wa lagse Azezi zē'am, ²yē tī a karēnbiisi la baseba diti la nu'usi n ka ān sōņa, la boori tī la yeti ba ka peege nu'usi wu Zifdōma sisgo n yeti ba ita se'em na.

³Farisi dōma, la Zifdōma wuu sãn ka wobse nu'usi wu ba yaabdōma malɲɔ la, ba ka diti. ⁴Ba sãn ze'ele da'am wa'am, ba wun peege ba mēɲa mɛ dee di. La malɲɔ baseba zozo'e ti ba uti, la de la wama, la yɔa, la kuto laasi peere.

⁵Ti Farisi dōma, la lɔɔ karēnsãandōma la soke Azezi yeti: < < Bēm ti fõn karēnbiisi la ka sakra ti yaabdōma malɲɔ la, dita dia la nu'usi n ka ãn sōɲa? > > ⁶Ti Azezi lerge ba yeti: < < A'ezayi* n yuun to'oge Nawēnne yetɔga la tɔge ya yelle la, a tari buurɔ, yāma de la pulibsum dōma wu lan gulse se'em na. La gulse ti Nawēnne yeti:

< Nēr-bāna pēgrɪ mam na nōore yetɔga,
la ba sūure la zāage la mam mɛ.

⁷Ban nā'asrɪ mam na,
la de la zāɲa.

Se'ere n soe la, ba zāsni la zāsɲɔ n de nērsaalba nōore. >

⁸Ya base Nawēnne nōore mɛ dee dɔla nērsaalba malɲɔ. > >

⁹Azezi le yele ba yeti: < < Ya sɪrɪ zagse Nawēnne lɔɔ mɛ, dee ti ya dɔla ya mēɲa malɲɔ. ¹⁰Amoyisi* yuun yeti: < Nanna fu sɔ, la fu ma. > Dee le yeti: < Nēr-sɛka sãn tɔge a sɔ bu a ma be'em, dɛni ti ba ku ē. > ¹¹La yāma yeti: < Nēra sãn yele a sɔ, bu a ma yeti: < < Mam n tari bõn-sɛba ti m sōɲɛ fu la de la < Kɔrbā >, (a vōore de la < Nawēnne bõnɔ >) > >, ¹²la ka le mase ti a ita sela bɔ'ɔra a sɔ, la a ma. > ¹³Yāma mēɲa malɲɔ la ti ya zāsni nērba la, boti ya base ti Nawēnne yetɔga la dena la zāɲa. La bõnɔ zozo'e n wõm na bela ti ya uti. > >

¹⁴La Azezi le wi la nēr-kuvɲɔ, ti ba wa'am a zē'am, ti a yele ba yeti: < < Yāma wuu, selse-ya mam sōɲa wõm a vōore. ¹⁵Sela n ze'eti yēɲa kē'eri nērsaala puurum ka tã wun boti a dena dēgrɔ. Bõn-sɛka n ze'eti nērsaala puam yesra n boti a dena dēgrɔ. ((¹⁶Sɛka n wõm yetɔga wā,

a selse sōᅇa sōᅇa.)) > >

¹⁷La a daan ze'ele nēᅇba la zē'am kē la deem. Tı a karēnbiisi la soke ē makre la vōore. ¹⁸Tı a yeᅇle ba yetı: < < Yāma yem mē ka like? Yāma ka bāᅇe tı sela n ze'eti yēᅇa kē'era nēᅇsaala puurum ka tā wun botı a dēna dēgrō? ¹⁹Se'ere n soe la, bōn-bāma ka kē'eri sūure puam, ba kē'eri la puure puam tı ba yē'era ba basra. > > (Azezi n daan yeᅇle beᅇla la, a boori tı a yetı dia ka bō'ori dēgrō, nēra tā wun di dia wuu mē.) ²⁰Dee daan le yetı: < < La de la bōn-seka n ze'eti nēᅇsaala puam yeᅇsra n botı a dēna dēgrō. ²¹Se'ere n soe la, puᅇtē'e-yooro ze'eti la nēᅇsaala sūure puam botı a bōora tı a ēᅇe be'em: yalsı, la nayigum, la nēᅇ-kua, ²²la taaba pōᅇgba la taaba sırba gā'a, la nēra n nōᅇe bōnō, la puᅇᅇvlgō, la yeᅇmkēᅇgsıga, la tōon-dēgrō, la nēra n ıtı sūure la a tadāana bōnō, la pō'ore yetōga, la pa'al-m-mēᅇa, la yalm-tōoma. ²³Bōn-be'ero bāna wuu ze'eti la nēᅇsaala sūure puam botı a dēna dēgrō. > >

Pōka n bō Azezi sira

(Amatie 15:21-28)

²⁴Azezi daan ze'ele zē'e-ēᅇa sēᅇe la Tiiri* so'olum ka kē yire puam, dee ka bōora tı nēra bāᅇe tı ēᅇa boe bilam. La a daan ka tā'age suᅇe. ²⁵Tı pōka ayıla tı kulkā'arga daan doli a pōyua, wōm Azezi yelle, sēᅇe ka ka dūma tēᅇa a nēᅇam, ²⁶sose ē yetı, a dige kulkā'arga la tı a yeᅇe dee base a pōyua la. Pōka la daan de la Grektı*f4*, ba dōᅇe ē na Fenisi tēᅇa n boe Siiri so'olum puam. ²⁷Tı Azezi lerge ē yetı: < < Base tı kōma dēᅇe di tıᅇe, se'ere n soe la, la ka mase tı ba dıke kōma dia bō baasi. > > ²⁸Tı pōka la lerge ē yetı: < < M Zuudāana, la de la sira, la baasi n boe ba dāana taabı tilum diti la kōma di-zōra n luti la. > > ²⁹Tı Azezi yeᅇle ē yetı: < < Fōn lerge se'em wā ıyā, kule, tı kulkā'arga

la base fu pɔyva la. > > ³⁰Tɪ pɔka la daan lebe kule, la ɛn paage yire la, a yɛ tɪ a pɔyva la gā la bɔn-gā'ala pɔam, la kulkā'arga la surɪ yese dee base ɛ mɛ.

**Azezi botɪ buraa n de waɲa, dee ka tāna tɔgra sɔɲa, tā'age tɔgra
dee wɔnna**

³¹Azezi le ze'ele Tiiri so'olum doose la Sidō, doose Dekapɔɪ* tɛnsɪ pɔam lebe Galile mɔgre la bɔba. ³²Tɪ ba tarɪ buraa n de waɲa, dee ka tāna tɔgra sɔɲa wa'am a zɛ'am, wa belem ɛ yetɪ, a dɪke a nu'ugo pagle waɲa la zuo. ³³Tɪ Azezi tarɪ ɛ nɛr-kuvɔɲɔ la pɔam yese kɛnkɛɲa dɪke a nu'ubie tɔm a tuba pɔam, dee tubse nɔtɔorum kalum buraa la zɪɲa. ³⁴Dee gorge saazuo sɪ'im vo'ose fɔo, dee yele buraa la yetɪ: < <Efata> >, a vɔore de la < <yo'oge!> > ³⁵Bilam mɛɲa tɪ buraa la tuba yo'oge, tɪ a zɪɲa lake, tɪ a tɔgra sɔɲa sɔɲa. ³⁶Tɪ Azezi kā'an ba yetɪ, ba da tɔge bɔ nɛra nɛra. La ɛn daan kā'an ba yetɪ, ba da tɔge bɔ nɛra nɛra la, ba daan tɔn tɔgra mɛ zozo'e. ³⁷Tɪ la di'ige ba zozo'e halɪ tɪ ba yetɪ tu: < <A ɛɲe sɛla woo la sɔɲa, botɪ wansɪ wɔnna, tɪ mugro tɔgra.> >

8

Azezi le bɔ nɛr-kuvɔɲɔ dia

(Amatie 15:32-39)

¹Dabs-bāma pɔam nɛr-kuvɔɲɔ n daan le lagse, tɪ dia ka bɔna tɪ ba wun di. Tɪ Azezi wi a karɛnbiisi la yele ba yetɪ: ²< <Nɛr-kuvɔɲɔ wā ninbāalga n tarɪ mam, se'ere n soe la, dabsa atā tɪ ba boe mam zɛ'am dee ka tara dia wun di. ³Mam sān base ba tɪ ba kule ba yie la kɔm, ba wun ka vibe mɛ sore, se'ere n soe la, baseba ze'ele la zɛ'a n zāage wa'am.> > ⁴Tɪ a karɛnbiisi la lerge ɛ yetɪ: < <Tɪ wun ɛɲe la wāne

tā'age yē dia tɪ la seke nēr-bāna wuu, zē'e-ēna n de mōom wā? > >

⁵Tɪ Azezi soke ba yetɪ: < < Yāma tarɪ la borborɪ bale? > > Tɪ ba lerge yetɪ: < < Bayopɔɪ. > >

⁶Tɪ a botɪ nērba la zī'ire tēŋa. Dee dɪke borborɪ bayopɔɪ la pu'use Nawēnne, dee fiise bɔ a karēnbiisi la tɪ ba puɪ nērba la. Tɪ ba puɪ nērkuvɔŋa la. ⁷La ba daan tarɪ la zūn-pɪgsɪ mē fēe. Tɪ Azezi pu'use Nawēnne zūma la iyā, dee botɪ a karēnbiisi la dɪke puɪ nērba la. ⁸Tɪ nērba la daan di tɪge. Dee tɪ a karēnbiisi la vaage dia n weege pɪre pɪtɔ bayopɔɪ. ⁹Nērba la n daan di dia la, buraasɪ de wu tusanaasɪ. Tɪ Azezi daan botɪ ba kule, ¹⁰dee tɪ ēŋa la a karēnbiisi la kē ōorɔŋa sēŋe Dalmanuta so'olum.

Farisi dōma pulibsum yelle

(Amatie 16:1-12)

¹¹Tɪ Farisi* dōma daan wa'am wa wē'era nōke'ene la Azezi, yetɪ ba make ē buse, yele ē yetɪ, a botɪ bōn-yālma ze'ele saazuo ēŋe n pa'ali tɪ ēŋa ze'ele la Nawēnne yire. ¹²Tɪ Azezi sī'im vo'ose fōo, dee soke yetɪ: < < Bēm tɪ zamāana ēna nērba ɛera bōn-yālma? Mam yetɪ ya la sɪra, tɪ mam kān botɪ bōn-yālma n pa'ale bela ēŋe tɪ zamāana ēna yē. > >

¹³La Azezi base ba me dee le kē ōorɔŋa dɔɔra mōgre la doone ke bɔba. ¹⁴Tɪ a karēnbiisi la daan yīm ka dɪke borborɪ, sān dagna borborɪ ayɪla mā'a tɪ ba tarɪ ōorɔŋa la puam. ¹⁵Tɪ Azezi kā'an ba yetɪ: < < Guuse-ya ya mēŋa la Farisi dōma, la naba A'erɔdɪ* dābille la. > > ¹⁶Tɪ karēnbiisi la tɔgra la taaba yetɪ: < < Tōma n ka tarɪ borborɪ la iyā tɪ a yele bela. > > ¹⁷Tɪ Azezi daan bāŋe, soke ba yetɪ: < < Bēm tɪ ya tɔgra la taaba tɪ la de la yāma n ka tarɪ borborɪ la iyā? Yāma ka wōm a vōore? Yāma yem ka like? ¹⁸Yāma tarɪ la nini dee ka yēta? Ya tarɪ la tuba dee ka wōnna? Yāma ka tēri? ¹⁹Mam n daan

fiise borbori banuu la bɔ buraasi tusanuu ti ba di la, borbori gito n deege la, pitɔ bale ti yāma daan vaage? > > Tɪ ba lerge ẽ yeti:
 < < Pitɔ pia la ayi. > > Tɪ a le soke ba yeti: ²⁰< < La mam n daan fiise borbori bayopɔi la puɪ buraasi tusanaasi la, yāma daan vaage sɛba n deege la pitɔ bale? > > Tɪ ba lerge yeti: < < Pitɔ bayopɔi. > >
²¹Tɪ a soke ba yeti: < < Yāma nān ka wōm a vōore? > >

Azezi boti fua nini yēta

²²Azezi la a karēnbiisi la daan sēŋe la Betisayida. Tɪ ba tari fua wa'am Azezi zē'am wa belem ẽ yeti a kalum ẽ. ²³Tɪ Azezi gure fua la nu'ugo ve'ege ẽ tēŋa la puam yese kēnkernja, ka tubse nōtōorum ēŋe a nini, dee dɪke a nu'usi pagle a zuo, soke ẽ yeti: < < Fōn yēti sela me bu? > > ²⁴Tɪ buraa la dɔ'ɔge zuugo bise, yeti: < < Mam yēti nērba ti ba āna wu tust la, la ba sēnni mɛ. > > ²⁵Tɪ Azezi le dɪke a nu'usi kalum fua la nini. Tɪ a nini pike yɪlɪŋe, ti a yēta sela woo sōŋa sōŋa. ²⁶Tɪ Azezi base ẽ yeti a kule, a da le kē tēŋa la puam.

Apɪyɛeri pa'ale Azezi n de nēr-sɛka

(Amatie 16:13-20, Aluki 9:18-21)

²⁷La Azezi la a karēnbiisi la daan we'esɪ la tēnsɪ n lɛm tēŋa yu'vɛre n de Filipi Sezaare. La ban boe sore wɛ'esa la, ti a soke ba yeti:
 < < Nērba yeti mam de la āne? > > ²⁸Tɪ ba lerge yeti: < < Seba yeti fōn de la Azā n daan misri nērba ko'om puam na. Tɪ baseba yeti fōn de la Nawēnne nōtɔ'ɔsa A'eli*. Tɪ seba yeti fōn de la Nawēnne nōtɔ'ɔsrɪba* n yuun boe la nēra ayɪla. > > ²⁹Tɪ a soke ba yeti: < < La yāma yeti mam de la āne? > > Tɪ Apɪyɛeri lerge yeti: < < Fōn de la Kriisi* ti Nawēnne tōm na. > > ³⁰Tɪ Azezi kā'an ba yeti, ba da tɔge ēŋa yelle bɔ nēra nēra.

Azezi dēņe tōge a nāmsgō, la a kūm yelle

(Amatie 16:21-28, Aluki 9:22-27)

³¹Tı Azezi yāņa zāsna a karēnbiisi la, yele ba yetı: < < Dēnı tu mam n de Nērsaala* Dayva la nāmse zozo'e. Tēņa wā kēma, la kāabgō* kēma nēņadōma, la lō* karēnsāandōma nifo wun kē mam me, tu ba ku mam, la dabsa atā daare mam wun vo'oge me. > > ³²A daan tōge ba la vēelga vēelga. Tı Apıyεeri wi ē yese kēnkērņa ka yele ē yetı, a da le tōge bela. ³³Tı Azezi gelge buse a karēnbiisi la, dee tāsε Apıyεeri yetı: < < Asūtāana, sēņe lebe mam poorum, se'ere n soe la, fu tē'esgō la dagı Nawēnne tē'esgō, la de la nērsaala tē'esgō. > > ³⁴Dee wi nēr-kuvņō la, la a karēnbiisi la a zē'am, yele ba yetı: < < Nēra sān bōora ti a doose mam, dēnı tu a base a mēņa n boori se'em, dee sake nāmsgō daare woo wu nēra n buke a kūm dō-puurņa* dōla mam. ³⁵Nēr-seka woo n boori ti a gu a vōm, a wun koņe ē. La nēr-seka woo n sake ti a koņe a vōm mam ĩyā, la kō-yēlga la ĩyā, a wun yē vōm. ³⁶Nēra sān yē dūnia sela woo dee koņe vōm Nawēnne zē'am, a yōoro de la bēm? ³⁷Bēm ti nērsaala wun dıke teege vōm? Sela kai. ³⁸Nēr-seka n zoe yānne mam ĩyā, la mam yetōga la ĩyā, zamāana ēna wā n ka doli Nawēnne la sira, dee dēna tōon-be'ero dōma wā tēņasoka, Nērsaala Dayva la*f5* mē wun zoe yānne na ē, wakat-seka ti a wun leme wa'am la a Sō Nawēnne na'am pāņa, la a malēkadōma* la. > >

9

¹La a le yele ba yetı: < < Mam yetı ya la sira, tu yāma nēr-seba n boe kalam wā, baseba kān ki, sān dagna ti ba wa yē la Nawēnne so'olum* n sēm na pāņa. > >

Azezi nēņa teere

(Amatie 17:1-13, Aluki 9:28-36)

²Ti dabsa ayoobi daan tole, ti Azezi boti Apıyεrı, la Azaki, la Azã mã'a doose ē ti ba sēɲe kēnkernja ka zom tãn-kãte zuo. Ti a nēɲa teege ba nēɲam. ³Ti a futo pelge yuli yuli yēgra halı, ti nēra ka bɔna dūnia wã zuo tãna wun peege ti ba pelge bela. ⁴Ti A'eli*, la Amoyisi* puke ba zē'am tɔgra la Azezi. ⁵Ti Apıyεrı yeke Azezi yeti:

< < Karēnsãama, tōma n boe kalam wã, la ãn sōɲa me. Base ti ti fi pōnstı batã, bɔ fōn ayıla, bɔ Amoyisi ayıla, bɔ A'eli ayıla. > > ⁶A daan ka mi ēɲa n tɔge se'em, se'ere n soe la, dabeem n daan kē ba. ⁷Ti sawate wa'am wa lile ba la a mã'asum. Ti kōa ze'ele sawate la puam yeti: < < Ena de la mam Dayua ti mam nōɲe. Selse-ya a yetɔga. > > ⁸Bilam mēɲa ti ba buse kaage ka le yē nēra, sãn dagna Azezi mã'a n boe ba zē'am.

⁹Ti ba ze'ele tãɲa la zuo sığra, ti Azezi kã'an ba yeti: < < Da tɔge-ya pa'ale nēra nēra yãma n yē sela la, sãn dagna ti Nērsaala* Dayua la wa ki me, dee vo'oge. > > ¹⁰Ti ba to'oge ēn yeke se'em na, dee sokra taaba yeti: < < Kūm vo'ore vōore de la bēm? > > ¹¹Ti ba soke Azezi yeti: < < Bēm ti lɔɔ karēnsãandōma yeti, dēni ti A'eli dēɲe wa'am, ti Krisi* yãɲa wa'am poorum? > > ¹²Ti a lerge ba yeti: < < Asıra, A'eli n wun dēɲe wa'am wa malge sela woo. La bēm ti la gulse Nērsaala Dayua la yelle yeti, a wun nãmse me zozo'e dee yē pɔ'ore? ¹³La mam yeti ya me ti A'eli pōn wa'am me, ti nēba ēɲe ē ban boortı se'em, wu lan gulse a yelle Nawēnne gōɲɔ puam se'em na. > >

Kulkã'arga n dolı bia, ti Azezi dige ē ti a yese

(Amatie 17:14-21, Aluki 9:37-43)

¹⁴Ban lebe ka lem karēnbiisi baseba la zē'am na, ba yē la nēr-kuvɲɔ zozo'e n kaage ba, ti lɔɔ karēnsãandōma baseba wē'era nōke'ema la

ba. ¹⁵La nērba la n daan yē Azezi la, la di'ige ba mε, ti ba zoe ka pu'use ē. ¹⁶Ti Azezi soke ba yeti: << Bēm yelle ti yāma wē'era nōke'ene la ba? >>

¹⁷Ti nēra ayula ze'ele nēr-kuvuᵛo la tēᵛasuka yeke yeti: << Karēnsāama, mam taru la m dayva wa'am fōn zē'am, kulkā'arga n doli ē boti a dena muko. ¹⁸La kulkā'arga la sān ēn girge ē, a lubri ē mε ti nōtōn-fulunfuka yesra, ti a ᵛbra yēna dee gorᵛe. Bela ti mam taru ē wa'am wa sose fu karēnbiisi la yeti ba dige kulkā'arga la ti a yese, ti ba ka yāᵛe. >>

¹⁹Ti Azezi yeke ba yeti: << Zamāan-ēna nērba, ya ka bō'ori mam sira, mam wun bōna la yāma mā'age m mēᵛa halu ka paage la wakat-kāna? Taru-ya bia la wa'am. >> ²⁰Ti ba taru ē wa'am a zē'am. La kulkā'arga la n yē Azezi la, bilam mēᵛa a dāan bia la mε, ti a lui tēᵛa bilna, ti nōtōn-fulunfuka yesra a nōorum. ²¹Ti Azezi soke bia la so yeti: << Wakat-kāna ti bōn-ēna ēᵛe ē? >> Ti a lerge yeti: << A bōnbi'ulum. ²²La kulkā'arga la ēn lubri ē na bugum, bu ko'om puam, bōora ti a kv ē. Fu sān tāna wun ēᵛe sela, zoe ti ninbāalga sōᵛe tᵛ. >> ²³Ti Azezi lerge ē yeti: << Bēm ti fu yeti, fōn sān tāna? Nēr-seka woo n bō Nawēnne sira, a tā wun ēᵛe sela woo bō ē mε. >> ²⁴Bilam mēᵛa ti bia la so tᵛge ke'enke'em yeti: << Mam bō sira, la sōᵛe mam ti m bō sira pa'ase. >>

²⁵La Azezi daan yē ti nēr-kuvuᵛo n zoti sēna a zē'am, ti a tāse kulkā'arga la yeti: << Kulkā'arga n boti nēra dena muko la waᵛa, mam yeti fu yese dee base ē, da le doose ē. >> ²⁶Ti kulkā'arga la kaase tagurga, dee bigse bia la ke'enke'em, dee yese. Ti bia la āna wu kūm na. Ti nērba zozo'e yeti a ki mε. ²⁷Ti Azezi gurε a nu'ugo zēke ē, ti a isge ze'ele saazuo.

²⁸La Azezi daan kē la deem, ēᵛa la a karēnbiisi la mā'a, ti ba soke ē

yetu: << Bēm ti tōma ka tā'age dige kulkā'ar-ēna? >> ²⁹Ti a lerge ba
yetu: << Sān dagna pu'usgo, sela sela ka boe n tā wun dige kulkā'ar-
ēna buuri. >>

Azezi le tōge a kūm, la a vo'ore yelle

(Amatie 17:22-23, Aluki 9:43-45)

³⁰La ba daan yese bilam doose la Galile tēṅa tole. La Azezi daan ka
boori ti nēra bāṅe ēṅa n boe zē'a. ³¹A daan zāsum a karēnbiisi la yetu:
<< Ba wun dike Nērsaala* Dayva la ēṅe la nērba nu'usum, ti ba ku
ē. La ba sān ku ē, dabsa atā daare a wun vo'oge me. >> ³²Ti ba daan
ka bāṅe yetoga la vōore, dee zōta ka soke ē.

Āne n wun dena nēr-kāte?

(Amatie 18:1-9, Aluki 9:46-50, 17:1-2)

³³Ti ba sēṅe ka paage Kapernaum kē deem. Ti Azezi soke a
karēnbiisi la yetu: << Bēm yelle ti yāma wē'eri ni nōke'ene sore zuo
la? >> ³⁴Ti ba sīna, se'ere n soe la, ba wē'eri la nōke'ene la taaba
bōora ti ba bāṅe sēka n de nēr-kāte gāna. ³⁵Ti Azezi zī'ire, wi a
karēnbiisi pia la ayi la yele ba yetu: << Nēra sān bōora ti a dena
nēṅadāana, dēni ti a dena poorum dāana, la nērba wuu
tōntōnna. >> ³⁶Azezi yele bela dee tari la bi-pika wa ze'ele ba
tēṅasuka, dike a nu'usi kōke bia la, dee yele ba yetu: ³⁷<< Nēra sān
to'oge bi-pika ēna tadāana mam yu'vre īyā, a to'oge la mam mēṅa, la
nēra sān to'oge mam mēṅa, la dagi mam ti a to'oge, a to'oge la sēka n
tōm mam na. >>

³⁸Ti Azā yele ē yetu: << Karēsāama, tōma daan yē la buraa n tari
fōn yu'vre digra kulkā'arsi, la ēṅa n ka po dena tōma nēra la īyā ti
tōma gu ē. >> ³⁹Ti Azezi yele ba yetu: << Da gu-ya ē, se'ere n soe

la, nēra ka boe wun tōm tōon-yālma la mam yu'vre, dee ti la ēṅe fēe ti a le tā'age tɔge mam be'em. ⁴⁰Nēr-seka n ka sisri tōma, a de la tōma nēra. ⁴¹Mam yeti ya la asura, ti nēra sãn bɔ ya ko'om ti ya yū, yāma n de mam n de Krisi* nērba la ãyã, ēṅa dāana kãn koṅe a yɔɔɔ.

⁴²La nēra sãn boti kɔm-pɪgsɪ bāna wã n bɔ mam sira la ayula base Nawēnne sore, sibgre seka ti a wun yē la, ba sãn dɪke nēere kug-kāte lu yulse a yugla lobe ē base ko-kāte puam n sōi. ⁴³La fu nu'ugo sãn yeti a boti fu base Nawēnne sore, fu wike ē base, se'ere n soe la, fu sãn tara nu'u-yēṅɔ dee kē Nawēnne yire* vɔa, n sōi fōn wun tara nu'usi bayi dee kē bug-tēṅa*, ((⁴⁴zē'e-ēṅa ti zūnzūa boe mĩ dita nērba ãyã ka kiira, dee ti bugum na ka kɪṅra.)) ⁴⁵La fu nã'are sãn yeti a boti fu base Nawēnne sore, fu wike ē base, se'ere n soe la, fu sãn tara nã'a-yēṅɔ dee kē Nawēnne yire vɔa, n sōi fōn wun tara nāma bayi dee ti ba dɪke fu lobe base bug-tēṅa, ((⁴⁶zē'e-ēṅa ti zūnzūa boe mĩ dita nērba ãyã ka kiira, dee ti bugum na ka kɪṅra.)) ⁴⁷La fu nifo sãn yeti a boti fu base Nawēnne sore, fu kɪrge ē base, se'ere n soe la, fu sãn tara nin-yēṅɔ dee kē Nawēnne so'olum, n sōi fōn wun tara nini bayi dee ti ba lobe fu base bug-tēṅa, ⁴⁸zē'e-ēṅa ti zūnzūa boe mĩ dita nērba ãyã ka kiira, dee ti bugum na ka kɪṅra.

⁴⁹Ba wun dɪke la bugum make nērba wuu wu ban dɪke yaarum yugse sela. ⁵⁰Yaarum ãn sōṅa me, la yaarum sãn sabge, ba wun ēṅe la wāne boti a le ãna yēlum?

Ãna-ya wu yaarum n tarti yēlum se'em na, dee tara sū-mã'asum la taaba. > >

10

Pɔka lebsgo yelle

(Amatie 19:1-12, Aluki 16:18)

¹La Azezi daan ze'ele zē'e-ēṅa sēṅe la Zude so'olum, Zurdē doone ke bɔba. Tɪ nērba zozo'e le lagse a zē'am, tɪ a zāsna ba wu ēṅa n ēn ita se'em na.

²Tɪ Farisi* dōma baseba wa'am tɪ ba di a yem buse, soke ē yeti:
< <Buraa tarɪ nōore tɪ a lebe a pɔga me bu? > > ³Tɪ a lebe soke ba yeti: < <Amoyisi* yuun bɔ ya nōore yeti bēm? > > ⁴Tɪ ba lerge yeti:
< <Amoyisi yuun sake tɪ tɪ gulse la pɔgdire lebsgo gōṅɔ, dee tarɪ ē ka lebe. > > ⁵Tɪ Azezi yele ba yeti: < <La de la ya sūure n ke tɪ ya ka sake pa'algo la iyā tɪ Amoyisi yuun gulse nōor-ēṅa bɔ ya. ⁶La halɪ dūnia pī'iluṅo, Nawēnne n yuun nāam nērsaalba la, a nāam la buraa la pɔka. ⁷Bela iyā tɪ buraa wun base a sɔ, la a ma, dee lagum na a pɔga. ⁸La ba ka le dēna bayi, ba lebege la ayɪla. ⁹Bela, sela tɪ Nawēnne lagum na taaba, nērsaala da welge ba. > >

¹⁰La Azezi la a karēnbiisi la kē la deem, tɪ ba le soke ē yelle ēṅa vōore. ¹¹Tɪ a yele ba yeti: < <Buraa sān lebe a pɔga dee di pɔka ayēma, a ēṅe la be'em wu nēra n gā'arɪ la a tadāana pɔga. ¹²La pɔka mē sān base a sira dee ele buraa ayēma, a mē ēṅe la be'em wu a gā'are la buraa n dagɪ a sira. > >

Azezi kā kā'a-sōma bɔ kɔma

(Amatie 19:13-15, Aluki 18:15-17)

¹³Tɪ nērba zozo'e tarɪ kɔm-pɪgsɪ wa'am Azezi zē'am tɪ a dɪke a nu'usi pagle ba zuto. Tɪ a karēnbiisi la zēbe nērba la. ¹⁴La Azezi n yē bela la, la ka ēṅe a sūure yēlum, tɪ a yele ba yeti: < <Base-ya kɔm-pɪgsɪ la tɪ ba wa'am mam zē'am, da gu'ura-ya ba, se'ere n soe la, Nawēnne so'olum* de la nēr-seba n ān wu kɔma wā bōnɔ. ¹⁵Mam yeti ya la sira, tɪ nēr-seka n ka sake tɪ Nawēnne sɔna ē wu bia la, a kān kē

Nawēnne so'olum puam. > > ¹⁶A yele bela, dee to'ose kɔma la mε, dɩke a nu'usi pagle ba zuto kã kã'a-sōma bɔ ba.

Bōntarsa yelle

(Amatie 19:16-30, Aluki 18:18-30)

¹⁷Azezi daan base bilam dee le dɩke la sore sēna. Tɩ buraa zoe wa'am a zē'am, wa ka dūma a nējam soke ē yetu: < < Karēnsāama, fōn de la nēr-sōŋɔ, mam wun ēŋe la wāne yē vɔm n ka ba'asrɩ? > > ¹⁸Tɩ Azezi yele ē yetu: < < Bēm ti fōn wi'ira mam ti nēr-sōŋɔ? Nēra ka boe n ān sōŋa sān dagna Nawēnne mā'a. ¹⁹Fōn mi Nawēnne n bɔ nōore ti ba ita se'em: < Da ku nēra, da gā'are la fu tadāana pɔga, da zū, da tɔge pōmpɔrŋɔ kaseto, da wēge nēra, nanna fu sɔ, la fu ma. > > ²⁰Tɩ buraa la lerge ē yetu: < < Karēnsāama, halɩ mam bōnbɩ'ulum ti mam pōn sakra bōn-bāma wuu. > > ²¹Tɩ Azezi buse ē nōŋe ē, dee yele ē yetu: < < Sela ayɩla n deege dēna fu ēŋe: Sēŋe ka koose fōn tarɩ sela la wuu dɩke ligri la bɔ nasdōma, ti fu wun yē bōntarsōm Nawēnne yire, dee wa'am wa dɔla mam. > > ²²La ēn wōm wāna la, ti a nēŋa zūŋe ti a fōrge la sū-sā'aŋɔ, se'ere n soe la, a tarɩ la bōntarsōm zo'oge.

²³Tɩ Azezi buse a karēnbiisi la kaage, dee yele ba yetu: < < La tɔ mε bɔ bōntatba ti ba kē Nawēnne so'olum puam. > > ²⁴Tɩ a yetɔga la di'ige a karēnbiisi la. Tɩ Azezi le yele ba yetu: < < M kɔma, la tɔ mε ti nēra kē Nawēnne so'olum puam. ²⁵La de la nāana ti yugne doose fupīim yoko puam yese, gānna bōntarsa n wun kē Nawēnne so'olum puam. > >

²⁶Tɩ la di'ige ba halɩ zozo'e, ti ba sakra taaba yetu: < < La sān dēna bela, āne n wun tā'age yē fāare? > > ²⁷Tɩ Azezi busra ba dee yetu: < < Nērsaala ka tā wun ēŋe bōn-ēna, la Nawēnne tā wun ēŋe mε.

Se'ere n soe la, Nawēnne tā sela woo ita mε. > >

²⁸Ti Apıyεrı yele ē yeti: < <Tōma base sela woo mε dee dola fōn. > > ²⁹Ti Azezi yele yeti: < <Mam yeti ya la sıra, ti nēr-seka n base a yire, bu a kēendōma, la a yıbsı, bu a ma, bu a sɔ, bu a kōma, bu a vato mam İyā, la Nawēnne kō-yēlga la İyā, ³⁰dūnia wā zuo a wun to'oge yie, la kēendōma, la yıbsı, la madōma, la kōma, la vato nōor-kɔbga, la a wun yē nāmsgɔ. La wakate n sēm, a wun yē vɔm n ka ba'asrı. ³¹La nējam dōma zozo'e wun lebge poorum dōma, ti poorum dōma lebge nējam dōma. > >

Azezi le tɔge a kūm, la a vo'ore yelle

(Amatie 20:17-19, Aluki 18:31-34)

³²Ba daan boe la sore we'esa Zerizalem, ti Azezi bɔna ba nēja. Ti a karēnbiisi la palēja ēgra, dee ti dabeem tara nēr-seba n daan doli ba la. Ti Azezi le tarı a karēnbiisi pia la ayi la sēje ka tɔgra pa'ala ba bōn-seba n wun wa ēje ēja, ³³yeti: < <Ya yē ya, ti we'esı la Zerizalem, bilam ti ba wun dıke Nērsaala* Dayva la ka ēje Nawēnne kāabɔ* kēma nējadōma, la lɔɔ* karēnsāandōma nu'usum. Ti ba wun tɔge a yelle ku yeti a mase la kūm, dıke ē ēje bu-zānşı* nu'usum, ³⁴ti ba la ē, dee tubse nōtōorum mı ē, wē ē na ka'asa dee ku ē. La a wun vo'oge dabsa atā daare. > >

Azaki la Azā sosgo

(Amatie 20:20-28)

³⁵Ti Azebede kōma Azaki la Azā sēje lem Azezi yele ē yeti: < <Karēnsāama, tōma boorı la tōma n wun sose fōn bōn-seka la, fu ēje bɔ tɔ. > > ³⁶Ti a soke ba yeti: < <Yāma boorı ti m ēje la bēm bɔ ya? > > ³⁷Ti ba lerge ē yeti: < <Fu sān wa dita fu na'am na, boti

tōma nēra ayula zī'ire fu zuvgo, ti ayula zī'ire fu gōbga. > > ³⁸Ti Azezi lerge ba yeti: < < Ya ka mi yāma n sosri sela. Ya wun tā'age nāmse nāmso sēka ti mam nāmsri wā, bu ya wun tā'age nāmse wu mam n sake ti m nāmse se'em na halı ka ki? > > ³⁹Ti ba ye le ē yeti: < < Ti wun tā'age ēṅe bela. > > Ti Azezi lebe ye le ba yeti: < < Asira, ya wun nāmse nāmso sēka ti mam nāmsri wā halı ka ki. ⁴⁰La, la dagi mam n wun looge sēka n wun zī'ire mam zuvgo bu mam gōbga. Nawēnne māasum zē'e-bāma ti a bō la nēr-sēba ti a yeti a bō la. > > ⁴¹La karēnbiisi pia la n wōm bela la, ba sūure n isge la Azaki la Azā. ⁴²Ti Azezi wi ba wuu, ye le ba yeti: < < Ya mi ti dūnia wā na'adōma soe ba nērba la pāṅa, dee ti ke'endōma pērga nērba ti ba ita bāma n boori se'em. ⁴³La yāma puam, la kān dena bela. Nēr-sēka n boe ya puam bōra ti a lebge nēr-keko, la mase me ti a dena ya tōntōnna. ⁴⁴La nēr-sēka n boori ti a dena nēṅadāana ya puam, la mase me ti a dena ya wuu yamṅa. ⁴⁵Se'ere n soe la, Nērsaala* Dayva la ka wa'am ti nērba tōm bō ē, a wa'am ti a tōm me bō, dee dıke a vōm bō ti nērba zozo'e yē fāare. > >

Azezi botı Abartime nini yēta

(Amatie 20:29-34, Aluki 18:35-43)

⁴⁶Azezi la a karēnbiisi la daan sēṅe ka paage dōla la Zeriko tēṅa puam tōlla, la ban daan ze'ele tēṅa la puam yesra la, nēr-kuvuṅo n doli ba. Ti fva zēa sore nōorum sōsra, a yu'vre de la Abartime, a de la Atime dayva. ⁴⁷La ēn wōm ti ba tōgrı ti la de la Azezi n ze'ele Nazareti la, ti a tii tōgra yeti: < < Azezi, Adavidi* yuṅa, zoe m ninbāalga. > > ⁴⁸Ti nērba zozo'e tāsē ē yeti: < < Go'oge fu yetōga la. > > Ti a malun tii tōge yeti: < < Adavidi yuṅa, zoe m ninbāalga. > > ⁴⁹Ti Azezi ze'ele dee yeti: < < Wi-ya ē ti a

wa'am. > > Tɪ ba wi ẽ yeke ẽ yetu: < < Keŋe fu sũure, isge ti a wi'iri fo. > > ⁵⁰Tɪ a lobe a fugɔbga base, dee vaa isge sēŋe Azezi zē'am. ⁵¹Tɪ Azezi soke ẽ yetu: < < Fõn boori ti m ẽŋe la bẽm bɔ fo? > > Tɪ a yetu: < < M Zuudãana, mam boori ti m le yēta mɛ. > > ⁵²Tɪ Azezi yeke ẽ yetu: < < Sēŋe, fõn bɔ mam sira la ñyã ti fu yē laafe. > > Tɪ fua la yēta bilam mēŋa, dɔla Azezi sore la zuo.

11

Azezi kē'eri Zerizalem la na'am

(Amatie 21:1-11 Aluki, 19:28-40, Azã 12:12-19)

¹Azezi la a karēnbiisi la daan sēŋe ka yɔna la Zerizalem, lem Betufaazi la Betani, Oliivi tāŋa la zē'am. Tɪ a tōm a karēnbiisi bayi, ²yeke ba yetu: < < Sēŋe-ya tēn-sɛka n boe ya nēŋa la puam. Ya sãn paage mĩ, ya wun yē bõn-biire ti ba lu ze'ele, ti nēra nãn ka bã ẽ. Ya lorge ẽ tari wa'am. ³La nēra sãn soke ya yetu: < Wãne ti ya lɔrga ẽ? >, ya lerge ẽ yetu: < Zuudãana la n boori ẽ >, ti a wun base ti ya tari ẽ leme wa'am tɔtɔ. > > ⁴Tɪ ba sēŋe ka yē bõn-biire la n lu zanõrum sore nõorum, ti ba lorge ẽ. ⁵La nērba baseba n daan ze bilam soke ba yetu: < < Wãne ti yãma lɔrga bõn-biire la? > > ⁶Tɪ ba lerge wu Azezi n yeke ba se'em na, ti nērba la base ba. ⁷Tɪ ba tari bõn-biire la sēŋe Azezi zē'am, ka dɩke ba futo pagle a zuo, ti Azezi bã. ⁸Tɪ nērba zozo'e yerge ba futo sore zuo, ti baseba sēŋe va'am ka kɔ võorɔ wa yerge sore zuo. ⁹Tɪ nēr-sɛba n boe a nēŋa, la sɛba n boe a poorum na daan fii tɔgra yetu:

< < Ozaana! Pēge-ya nēr-sɛka n sēm
la Zuudãana Nawēnne yu'vre la.

¹⁰Pēge-ya nēr-sɛka n sēm ti a di ti yaaba Adavidi* na'am na.

Ozaana! Nā'ase-ya Nawēnne n boe saazuum. > >

¹¹Ti Azezi paage Zerizalem kē Wēnde-kātum na bise sela woo kaage. Ti wēnne mā'age, ti ēṅa la a karēnbiisi pia la ayi la yese sēṅe Betani.

Azezi kā be'em bɔ kēnkāṅa

(Amatie 21:18-19)

¹²Ti beere wiige, ti ba ze'ele Betani lebra Zerizalem, ti Azezi kom dōnna. ¹³Ti a yē kēnkāṅa n ze zāazāare tara vōorɔ, ti a sēṅe ti a ka bise a na'an wun yē sela kēnkāṅa la zuo. La ēn paage la, a ka yē sela a zuo, a yē la vōorɔ mā'a. Se'ere n soe la, kēnkāma wakate daan nān ka paage. ¹⁴Ti Azezi yele kēnkāṅa la yetu: < < Nēra kān le malun di fu biε. > > Ti a karēnbiisi la wōm.

Azezi dige nērba n koosri loḡrɔ Wēnde-kātum na

(Amatie 21:12-17, Aluki 19:45-48, Azā 2:13-22)

¹⁵Ti ba paage Zerizalem, ti Azezi kē Wēnde-kāte* la zēnzakam digra nēr-seba n koosri, la seba n da'ari Wēndeem na ti ba yesra. Dee zā'age lig-tēerba taabludōma, la seba n koosri na'adawema la kugsi lube. ¹⁶La a daan ka sake ti nēra zēera sela dola Wēnde-kāte la zēnzakam. ¹⁷Dee daan zāsna nērba la yetu: < < La gulse Nawēnne gōṅɔ puam ti Nawēnne yetu: < Ba wun wi'ira mam deego la ti pu'usgɔ deego buuri wuu iyā. > La yāma dīke ē ēṅe la nayigba lagsgɔ zē'a. > >

¹⁸Ti Nawēnne kāabgɔ* kēma nēṅadōma, la loɔ* karēnsāandōma wōm bela, εera bāma n wun ēṅe se'em ku ē, la ba zoti ē mε, se'ere n soe la, a zāsṅɔ la daan kē nēr-kuvṅɔ la sūure me zozo'e. ¹⁹Ti zaanōore daan mā'age, ti Azezi la a karēnbiisi yese tēṅa la puam.

Kēnkāṅa n ku yelle

(Amatie 21:20-22)

²⁰Ti bulika yu'uhɔ yu'uhɔ ti ba dɔla sore la, yē kēnkāŋa la n kuɪ la yēga wuu. ²¹Ti Apiyɛɛri tēge lan ēŋe se'em na, yele Azezi yeti: < < Karēnsāama, bise, kēnkāŋa la ti fu kā be'em bɔ ē na kuɪ mɛ. > > ²²Ti Azezi yele ba yeti: < < Bɔ-ya Nawēnne sira. ²³Mam yeti ya la asira, ti nēra sān yele tān-ēna yeti: < Vōoge ka lui mōgre puam >, dee bɔ sira a sūure puam ti ēŋa n yele se'em na wun ēŋe, dee ka sē'ena, la wun siri ēŋe. ²⁴Bɛla ti mam yeti, ya sān pu'usra Nawēnne sɔsra sela, bɔ-ya Nawēnne sira ti ya to'oge ya, ti ya wun siri to'oge. ²⁵La ya sān bɔna mɪ pu'usra Nawēnne, ya sān tara yelle la nēra, base-ya ē taale, ti ya Sɔ Nawēnne n boe saazuum mē base ya tōon-be'ero taale. ((²⁶Yāma sān ka base nēr-seba n ēŋe ya be'em na taale, ya Sɔ Nawēnne n boe saazuum mē kān base ya tōon-be'ero taale.)) > >

Āne n bɔ Azezi nōore ti a tōnna?

(Amatie 21:23-27, Aluki 20:1-8)

²⁷Azezi la a karēnbiisi la le sēŋe la Zerizalem, ti Azezi kē Wēnde-kātum na ɛera. Ti kāabgɔ kēma nēŋadōma, la lɔɔ karēnsāandōma, la tēŋa la kēma sēŋe a zē'am, ²⁸ka soke ē yeti: < < Fōn yē nōore la be utā bōn-bāna? Bu āne n bɔ fōn nōore ti fōn utā bōn-bāna? > > ²⁹Ti Azezi lerge ba yeti: < < Mam wun soke ya sokre ayɪla, ti ya sān lerge mam, mam mē wun yele ya nōor-seka ti mam tarɪ utā bōn-bāna. ³⁰Azā n daan misri nērba ko'om puam na, la de la Nawēnne n tōm ē bu, la de la nērsaalba? Lerge-ya ma. > > ³¹Ti ba bām na taaba yeti: < < Ti sān lerge yeti, la de la Nawēnne n tōm ē, a wun yeti, bēm iyā ti tōma ka sake ē? ³²Ti mē kān tā'age yeti la de la nērsaalba n tōm ē. > > Ba daan zoti la nērba la, se'ere n soe la, nērba la wuu daan sake ti Azā siri de la Nawēnne nōtɔ'ɔsa. ³³Ti ba koŋe lerge ē yeti: < < Tōma ka mi. > > Ti Azezi yele ba yeti: < < Mam mē kān yele ya

mam n yē nōore zē'e-sēka ita bōn-bāma. > >

12

Nērba n bısru va'am makre

(Amatie 21:33-46, Aluki 20:9-19)

¹Bela poorum, Azezi daan magsru la magsa tɔgra bɔ'ɔra ba yetu:
< < Bura a ayila n daan kɔ a va'am sele tusu yu'vɔre n de viinye*, mē
lalga kaage ē, dee tū boko tɪ ba wēkra viinye la bie, dee mē de-woko
tɪ ba zɔnna bısra a va'am na, yāŋa dıke va'am na bɔ nērba tɪ ba bısra,
dee sēŋe sore. ²Tɪ viinye la bie go'osgo wakate paage, tɪ a tōm a
tōntōnna tɪ a sēŋe sēba n bısru va'am na zē'am ka to'oge a pure wa'am
wa bɔ ē. ³Tɪ ba yōke tōntōnna la wē, botɪ a lebe kule zāŋa. ⁴Tɪ va'am
na dāana le tōm nēra ayila ba zē'am, tɪ ba wē a zuugo āage, dee
yaale ē. ⁵Tɪ a le malun tōm nēra ayila, tɪ ba ku ē. Tɪ a tōm nērba
zozo'e, tɪ ba wē baseba, dee ku baseba.

⁶La nēra ayila mā'a n daan deege tɪ a tāna wun tōm, la de la a bi-
nōŋre. Tɪ a daan tōm ē sēba n bısru va'am na zē'am, dee tē'esra yetu:
< Ēna n de mam dayva la, ba wun nan ē. > ⁷Tɪ sēba n bısru va'am na
yele taaba yetu: < Ena n wun wa sɔge sɔna a sɔ bōntarsōm na, base-
ya tɪ tɪ ku ē, tɪ bōntarsōm na lebe tōma bōnɔ. > ⁸Tɪ ba yōke ē ku,
tari ē yese va'am na kēnkēŋa ka base.

⁹Bela, va'am na dāana yāŋa wun ēŋe la wāne? A wun wa'am wa ku
sēba n bısru va'am na mε, dee to'oge va'am na bɔ baseba. ¹⁰Yāma pōn
karēŋe Nawēnne gōŋɔ zē'e-sēka n gulse yetu:

< Kug-sēka tɪ tōnmētba zagse la
n lebe kugre n botɪ deego la tara pāŋa.

¹¹La de la Zuudāana Nawēnne n ēŋe bōn-ēna,

ti la dena yel-di'inja bɔ tōma. > > >

¹²Ti Zifdōma nējadōma la daan ɛera ti ba yōke Azezi, se'ere n soe la, ba mi ti la de la bāma ãyã ti a make makre ēña, la ba daan zoti la nērba la, ti ba base ē dee fōrge.

Ba soke Azezi lampo yua yelle

(Amatie 22:15-22, Aluki 20:20-26)

¹³Ti ba tōm Farisi* dōma baseba, la naba A'erɔdi* nērba baseba, ti ba sēŋe ka soke Azezi sokre ti a tɔge tuuge ti ba yē sore yōke ē. ¹⁴Ti ba wa'am wa yele ē yeti: << Karēnsāama, tōma mi ti fōn de la sira dāana, dee ka fabla nērba n tɔgru fōn yelle se'em na, fōn ka tū'usri nērba, la fōn zāsni nērba Nawēnne sore yela la sira. Tōma yeti ti soke bise, sore boe ti ti yɔ lampo bɔ Rom* na-keko bu, sore ka boe? Ti yɔ bu ti da yɔ? >> ¹⁵Ti Azezi bāŋe ti ba boori ti ba bēre ēña me, soke ba yeti: << Bēm ti ya bēta ma? Tari-ya lagfɔ wa'am ti m bise. >> ¹⁶Ti ba tari lagfɔ la wa'am wa bɔ ē. Ti Azezi soke ba yeti: << Ane yinyisña, la āne yu'vre n gulse a zuo? >> Ti ba lerge yeti: << La de la Rom na-keko la. >> ¹⁷Ti Azezi yele ba yeti: << Bɔ-ya na-keko la ēña n soe bōn-sɛka, dee bɔ Nawēnne ēn soe bōn-sɛka. >> Ti Azezi yetɔga la di'ige ba.

Ba soke Azezi kūm vo'ore yelle

(Amatie 22:23-33, Aluki 20:27-40)

¹⁸Saduse dōma n yeti nēra sãn ki a kãn vo'oge la, bāma nērba baseba n wa'am Azezi zē'am wa soke ē yeti: ¹⁹<< Karēnsāama, Amoyisi* yuun gulse bɔ tōma yeti: <Nēra sɔbia sãn ki deege a pɔga dee ka tara bia, a di pɔkōore la dɔge kɔma bɔ sɛka n ki la. >> ²⁰La buraasti bayopɔi n daan boe dena sɔbiisi. Ti pɔspɔsi dāana la di pɔga,

ki dee ka dɔge bia. ²¹Tɪ buyi dāana la di pɔkɔore la, mē ki dee ka dɔge bia. Tɪ butā dāana la mē ēnje bela. ²²La bāma bayopɔɪ la wuu lagum di pɔka la mē, ki dee ka dɔge bia. Bela poorum tɪ pɔka la mē ki. ²³Bāma bayopɔɪ wuu n lagum di pɔka la dee ki la, ba sān wa vo'oge kūm vo'ore daare, āne n wun sɔna pɔka la? > >

²⁴Tɪ Azezi yele ba yeti: < <Ya tuuge mē, yāma n ka mi Nawēnne gōɲɔ n yele se'em, la Nawēnne pāɲa n ān se'em na īyā. ²⁵Kūm vo'ore daare, buraasi ka diti pɔgba, la pɔgsɪ mē ka elli sɪrba, ba wuu wun āna wu malekadōma* n boe Nawēnne yire la. ²⁶La sān dena kūm vo'ore yelle, yāma nān ka karēnje Amoyisi gōɲɔ la puam Nawēnne n yuun ze'ele tūntuugo la puam tɔge la ē se'em na? A yuun yele yeti: < Mam de la Abraham*, la A'izaki, la Azakɔbi Nawēnne. > ²⁷La pa'ale tɪ bāma wuu vɔa mē Nawēnne zē'am, se'ere n soe la, Nawēnne dagɪ sɛba n ki Nawēnne, a de la sɛba n vɔa Nawēnne. Ya tuuge mē zozo'e. > >

Nawēnne n bɔ nōore tɪ ba ita se'em na, bōn-kāna n gānnɪ?

(Amatie 22:34-40, Aluki 10:25-28)

²⁸Tɪ lɔɔ karēnsāandōma nēra ayɪla wōm ban tɔgrɪ la taaba, dee bānje tɪ Azezi lerge Saduse dōma la sōɲa, tɪ a lem ē, soke ē yeti:

< <Nawēnne n bɔ nōore tɪ ba ita se'em na wuu puam, bōn-kāna n gānnɪ? > >

²⁹Tɪ Azezi lerge ē yeti: < <Sɛka n gānnɪ wuu n wāna:

< Israyeli dōma, selse-ya. Zuudāana n de tɪ Nawēnne na, de la

Zuudāana ayɪla. ³⁰Nōnje Nawēnne n de fu Zuudāana la fu sūure wuu,

la fu sia wuu, la fu yem wuu, la fu pāɲa wuu. > ³¹La buyi dāana n

wāna: < Nōnje fu tadāana wu fōn nōnje fu mēɲa se'em na. > Nōore

ayēma ka boe n gānnɪ bāna. > > ³²Tɪ lɔɔ karēnsāama la yele ē yeti:

< <Karēnsāama, fōn yele se'em na ān sōɲa, la de la sɪra, Nawēnne

de la ayula, ayēma ka boe s̄an dagna ēṅa mā'a. ³³Fu nōṅe Nawēnne la fu sūure wuu, la fu yem wuu, la fu p̄aṅa wuu, la fu nōṅe fu tadāana wu fōn nōṅe fu mēṅa se'em na, ān sōṅa me gānna kāabgɔ* buuri wuu. > >

³⁴Ti Azezi yē ēn lerge la yem na, ti a yele ē yeti: < < Fu ka zāage la Nawēnne so'olum*. > > Ti nēra nēra ka le saage soke ē sokre.

Krisi de la naba Adavidi Zuudāana

(Amatie 22:41-46, Aluki 20:41-44)

³⁵Azezi n daan z̄asn̄i nērba Wēnde-kātum na, a soke ba yeti: < < Wāne ti lɔɔ karēnsāandōma yeti Krisi* de la naba Adavidi* yuṅa? ³⁶Dee ti Nawēnne Sia* yuun boti Adavidi mēṅa tɔge yeti: < Zuudāana Nawēnne yele mam Zuudāana yeti, zī'ire m zɔvgɔ bɔba hal̄i ti m wa ēṅe fu be'eba la ti ba bɔna fu nāma tēṅa. >

³⁷Adavidi mēṅa s̄an wi ē yeti: < Zuudāana >, la wun ēṅe la wāne ti a dena Adavidi yuṅa? > > Ti nēr-kuvṅɔ la selsra a yetɔga la sū-yēlum.

Azezi yele nērba ti ba da āna wu lɔɔ karēnsāandōma

(Amatie 23:1-36, Aluki 20:45-47)

³⁸Azezi n z̄asn̄i nērba la, a yele ba yeti: < < Guuse ya mēṅa la lɔɔ* karēnsāandōma n eeri kaara la fu-wogro bɔɔra ti nērba pu'usra nā'asra ba da'asum, ³⁹dee bɔɔra nā'asgɔ zē'est̄i wēndeto puam, la dia zē'esum ti ba zēa la. ⁴⁰Ba to'osri la p̄okōpa n tari sela la wuu, dee pu'usra Nawēnne pu'us-wogro ti nērba b̄isra ba. Ba wun yē sibgre gānna wuu. > >

P̄okōore bɔ'a yelle

(Aluki 21:1-4)

⁴¹Azezi daan zĩ la Wēnde-kātum ligri daka la zē'am dee bɪsra nēr-
 kuvɔ la n sēnni ita ligri daka la puam. Tɪ bōntatba zozo'e ita ligri
 pāi. ⁴²Tɪ pɔkōore n de nasa wa'am wa dɪke lig-kōb-pɪgsɪ bayi mā'a
 ẽɲe mĩ. ⁴³Tɪ Azezi wi a karēnbiisi la, yele ba yetu: < < Mam yetu ya la
 asɪra, tɪ pɔkōore ẽna n de nasa la ẽɲe ligri daka la puam zo'oge gānna
 ba wuu mɛ. ⁴⁴Se'ere n soe la, bāma wuu looge la bāma n tarɪ sela pāi
 la puam wa ẽɲe mĩ. La ẽɲa n de nasa la, dɪke la a dia ligri wuu wa
 ẽɲe mĩ. > >

13

Wēnde-kāte la sā'aɲɔ, la dūnia ba'asgɔ nāmsgɔ yelle

(Amatie 24:1-28, Aluki 21:5-24)

¹Azezi daan ze'ele la Wēnde-kātum na yesra, tɪ a karēnbɪa ayɪla yele
 ẽ yetu: < < Karēnsāama, bɪse kuga n ba āna sōɲa tɪ ba dɪke mē de-
 kāra se'em. > > ²Tɪ Azezi yele ẽ yetu: < < Fōn yē de-kāra wā, ba wun
 lɔbe ba wuu mɛ saam saam tɪ kugre baa ayɪla kān weege a tadāana
 zuo. > >

³La Azezi daan sēɲe ka zēa la Oliivi tāɲa zuo tɪ a nēɲa bɪsra Wēnde-
 kāte la. La Apɪyɛeri, la Azaki, la Azā, la A'āndre mā'a n daan boe a
 zē'am, ⁴soke ẽ yetu: < < Yele to, wakat-kāna tɪ bōn-ẽɲa wun ẽɲe, la
 bēm n wun pa'ale tɪ wakate la paage mɛ tɪ bōn-bāma wuu wun
 ẽɲe? > > ⁵Tɪ Azezi yele ba yetu: < < Guuse-ya tɪ nēra da pā'ase ya tɪ
 ya tuuge. ⁶Nērba zozo'e n wun dɪke mam yu'ure wa'am wa pā'asra ya,
 tɪ ba nēra woo yetu: < Mam n de Kɪsɪ* la. > La ba wun botɪ nērba
 zozo'e tuuge mɛ. ⁷Ya sān wa wōm zebre dāmne, la zebre yelle, da
 base-ya tɪ dabeem kē ya, dēni tɪ bōn-bāma ẽɲe. La, la nān ka de
 dūnia ba'asgɔ. ⁸Buuri ayɪla wun isge zebra la buuri ayēma, tɪ so'olum

ayula isge zebra la so'olum ayēma. La tēŋa wun fii mīim me zē'esti zozo'e, la kōm wun bōna. Bela wuu nān de la toogo la sēŋre, la ān wu pōka virgre toogo n nān sēŋri la.

⁹Guuse ya mēŋa, ti nērba wun tari ya me sēŋe ka sām ba sariyadia zē'esum, ti ba wē ya ba wēndeto* puam. La ba wun tari ya sēŋe gōmnadōma, la na'adōma nēŋam mam ūyā. La ya wun tōge mam yela pa'ale ba. ¹⁰La dēni ti Nawēnne kō-yēlga la dēŋe mōole bō buuri wuu, dee ti dūnia ba'asgō paage. ¹¹La ba sān wa yōge ya tari sēŋe ka sām sariyadia zē'am, ya da fabla yāma n wun tōge se'em, wakate sān wa paage, tōge-ya yetōg-seba ti Nawēnne wun bō ya la, se'ere n soe la, la dagi ya mēŋa n wun tōge, la de la Nawēnne Sia n wun sōŋe ya.

¹²Sōbia wun boti ba yōke sōbia ku, ti sō mē wun ēŋe a bia bela, la kōma wun zebra la ba sōdōma, la ba madōma boti ba ku ba. ¹³Nērba zozo'e wun sise ya mam yu'ure ūyā. La nēr-seka n wun mōrge ze'ele kāŋkāŋe ka paage ba'asgō wun yē fāare.

¹⁴Ya wun wa yē seka n de bōn-be'ego n sā'anī sela woo la, ti a boe zē'e-seka n ka mase ti a bōna la. > > (Seka n karēŋri la mōrge wōm a vōore.) < < Ya sān yē bela, seba n boe Zude zoe zom tānsi zuo. ¹⁵La nēr-seka n boe gōsgō da sige bōra ti a kē deem dīke sela. ¹⁶La nēr-seka n boe va'am da kān lebe kule yire ti a dīke a fuugo. ¹⁷Dabs-bāma, la wun dēna la toogo bō pōg-seba n tari pua la, la seba n tari kōma ti ba mōgra la. ¹⁸Sose-ya Nawēnne ti yel-bāma da wa dēna cōrō wakate. ¹⁹Se'ere n soe la, dabs-bāma wun dēna la toogo zozo'e, ti ba nān ka yē halī pī'iluŋo ti Nawēnne nāam dūnia wa paam zīna, la toog-ēŋa buuri kān le malin wa'am. ²⁰Nawēnne sān ka bo'oge ni dabs-bāma sōore, nēra ka boe ni n wun pōse. La Nawēnne mēŋa nērba ti a looge la ūyā, ti a bo'oge dabs-bāma sōore.

²¹La nēra sān yele ya yeti: < Bise-ya, Krisi boe la kalam > , bu

< bise-ya, a boe la ke >, ya da sake. ²²Nērba n wun wa'am wa parum ti bāma n de Krisi, la nērba n wun wa'am wa parum ti bāma n de Nawēnne nōt'osrɪba tōm tōon-yālma, la yel-kɪrsɪ, bɔɔra ti ba sān tā'age, ba boti nēr-seba ti Nawēnne looge la tuuge doose ba. ²³Guuse ya mēŋa, ti mam dēŋe yeke ya sela woo mɛ. > >

Azezi n de Nērsaala Dayva la lemŋo

(Amatie 24:29-44, Aluki 21:25-36)

²⁴Azezi le yeke yeti: < < Toogo la dabsa poorum, wēntulle wun sobge mɛ, ti wōrga kān le nēera a peelem. ²⁵La wōrbie wun ze'ele saazuum lui. La bōn-seba n boe saazuum wun mīim mɛ. ²⁶La ba wun yē Nērsaala* Dayva la n boe sawara puam sēna la pān-kāte, ti a na'am pāŋa peelem nēege. ²⁷La a wun tōm a malekadōma* mɛ ti ba sēŋe dūnia gɔbga la zuugo, la dapooore la zanōre, ka lagse nēr-seba ti a looge la halɪ ka paage dūnia teka wuu. > >

²⁸Azezi le yeke ba yeti: < < Dike-ya makre la kēnkāŋa bāŋe zāsŋo la vōore. Kēnkāŋa wila sān wa pusra vōoro, ya mi ti sigre lem mɛ.

²⁹Bela mē, ya sān wa yē ti bōn-bāma wuu iti, ya bāŋe ti Nērsaala Dayva la lem mɛ, a boe la zanōrum. ³⁰Mam yeti ya la sira, ti bōn-bāna wun ita mɛ dee ti zamāan-ēna yāŋa tole. ³¹Saazuum la tēŋa wun tole mɛ, la mam yetoga kān malɪn tole.

³²Nēra nēra ka mi daar-seka la wakat-seka ti Nērsaala Dayva la wun leme wa'am. Baa malekadōma n boe Nawēnne yire, bu Dayva la mēŋa ka mi, sān dagna So Nawēnne mā'a. ³³Guuse ya mēŋa sōŋa, la ya māasum, se'ere n soe la, ya ka mi wakate la. ³⁴La wun āna wu buraa n we'esti sore dee dɪke a yire gu'ule a tōntōnɪba, bɔ tōntōnna woo a tōone, dee yeke zanōr-gu'ura ti a gu'ura. ³⁵Bela iyā gu'ura-ya, se'ere n soe la, ya ka mi wakat-seka ti yidāana la wun leme wa'am. A

tā wun leme wa'am zaanōore me, bu sōnsua, bu nō-rōōgo kaasga wakate, bu bulika. ³⁶Guuse-ya ti yidāana la da wa'am wa di'ige ya, ti ya gīsri me. ³⁷Mam n yeti ya se'em na, mam yeti nērba wuu la bela, gu'ura-ya. > >

14

Zifdōma nēḡadōma eeri sore ti ba kv Azezi

(Amatie 26:1-5, Aluki 22:1-2, Azā 11:45-53)

¹La daan deege la dabsa ayi ti Zōōg-base kibsa ti ba obrt borbort n ka taru dābille dabsa paage. Tū kāabgō* kēma nēḡadōma, la lōō* karēnsāandōma era sore ti ba sugē yōke Azezi kv. ²Tū ba yele taaba yeti: < < Tū da kān ēḡe-ya bela kibsa wā puam, ti nērba la wun gire me. > >

Pōka n ka'age kaam ēḡe Azezi zuo

(Amatie 26:6-13, Azā 12:1-8)

³Azezi daan boe la Betani, Asimō n wa dena kōnkonne yire, ti ba daan bōna mī dita. Tū pōka taru albatru* dugla n pure la tidare ka-sōma ligri n zo'oge ti ba wi'iri ti naaru, wa'am wa vuke dugla la, ka'age kaam na ēḡe Azezi zuugo. ⁴Tū nērba baseba n boe bilam na sūure sā'am, ti ba yele taaba yeti: < < Bēm tū pōka la sā'am ka-sōma la wāna? ⁵Ba tā nū wun koose ba gāḡe lig-kōba kōbstā me, dike ligri la bō nasdōma. > > Tū ba zerge pōka la.

⁶Tū Azezi yele ba yeti: < < Base-ya pōka la bāalam, bēm tū ya tōgra ē tū a sūure sā'am? Ēn ēḡe sela bō mam na de la tōon-sōḡo. ⁷Nasdōma boe la ya le me wakate wuu, ya tā wun ēḡe ba sōḡa me yan boori wakat-seka, la mam kān bōna la ya le wakate wuu. ⁸Ēḡa n taru sela la,

ti a ɛ̃ɲɛ. En ka'age ka-sōma la ɛ̃ɲɛ mam iyā la, a dɛ̃ɲɛ ɛ̃ɲɛ la ban wun ɛ̃ɲɛ mam se'em mam laare daare. ⁹Mam yeti ya la asira, ti dūnia wā zē'e-seka wuu ti ba wun wa mōole Nawēnne kō-yēlga la, ba mē wun tɔge pɔka wā n ɛ̃ɲɛ mam se'em wā, ti ba tēra a yelle. > >

Azudaasi eeri sore ti a pa'ale ti ba yōke Azezi

(Amatie 26:14-16, Aluki 22:3-6)

¹⁰Ti Azudaasi Iskariyo n de Azezi karēnbiisi pia la ayi la nēra ayula sēɲɛ kāabgo kēma nēɲadōma zē'am, ka yele ba ti ɛ̃ɲa wun pa'ale ti ba yōke Azezi. ¹¹La ban daan wōm ɛ̃n yele se'em na, ti ba sūure ɛ̃ɲɛ yēlum, ti ba yeti bāma wun bɔ ɛ̃ ligri. Ti Azudaasi yāɲa ɛera so-seka ti a wun pa'ale ti ba yāɲɛ yōke ɛ̃ na.

Azezi diti Zɔɔg-base kibsa la a karēnbiisi

(Amatie 26:17-30, Aluki 22:7-23, Azā 13:21-30, 1 Korēnti 11:23-25)

¹²Borbori n ka tari dābille kibsa la pɔspɔsi daare ti ba kuvri pebilsi dita Zɔɔg-base kibsa la n daan paage. Ti Azezi karēnbiisi la soke ɛ̃ yeti: < < Fōn boori ti ti sēɲɛ la be ka māasum Zɔɔg-base kibsa la ti fu di? > > ¹³Ti Azezi tōm a karēnbiisi bayi yele ba yeti: < < Sēɲɛ-ya tēɲa la puam, ti ya wun tu'vse buraaga n tu yoore la ko'om, ya doose ɛ̃ ¹⁴sēɲɛ yi-seka ti a wun kē la, ka yele yidāana la yeti: < Karēnsāama la yeti, deego boe la be, ti ɛ̃ɲa la a karēnbiisi wun di Zɔɔg-base kibsa la? > ¹⁵A wun pa'ale ya de-kāte n boe ayēma zuo, ti sela woo māasum bɔna mī. Bilam ti ya wun māasum ti ti di kibsa la. > > ¹⁶Ti a karēnbiisi la yese sēɲɛ tēɲa la puam ka yē sela woo wu Azezi n yele ba se'em na. Ti ba māasum Zɔɔg-base kibsa la bilam.

¹⁷Ti wēnne daan mā'age, ti Azezi la a karēnbiisi pia la ayi la wa'am, ¹⁸wa zēa dita, ti Azezi yele ba yeti: < < Mam yeti ya la asira, ti ya

nēra ayɫa n diti la mam kalam n wun pa'ale tɪ ba yōke mam. > >
¹⁹Tɪ la daan sã'am ba sũure. Tɪ ba sakra ē ayɫa ayɫa yetɪ: < <La de la mam? > > ²⁰Tɪ a lerge ba yetɪ: < <La de la ya nērba pia la ayi la nēr-sɛka n wun yegle la mam tũm a nu'ugo laaga puam na. ²¹Nērsaala Dayva*f6* la wun ki wu lan pōn gulse a yelle Nawēnne gōŋɔ puam se'em na. La sɛka n yetɪ a pa'ale tɪ ba yōke Nērsaala Dayva la wun yē toogo. Nēr-ēŋa ma sãn ka dɔge nɪ ē n sōɪ. > >

²²La ban daan diti la, tɪ Azezi dɪke borbortɪ pu'use Nawēnne, dee fiise bɔ a karēnbiisi la yetɪ: < <To'oge-ya di, ēna wã de la mam ãyã. > > ²³Dee dɪke bōn-yũula pu'use Nawēnne, dee bɔ ba, tɪ ba wuu yũ. ²⁴Dee yele ba yetɪ: < <Bãna wã de la mam zum n wun yese saage nērba zozo'e ãyã, pa'ale tɪ Nawēnne bɪŋe nōore la ba. ²⁵Mam yetɪ ya la asɪra, tɪ mam kãn le yũ viinye* biɛ bōn-yũula wã, halt tɪ la ka paage daar-sɛka tɪ mam wun le yũ ba Nawēnne so'olum puam. > > ²⁶Tɪ ba yōom yōoma pēge Nawēnne, dee yese wɛ'esa Oliivi tãŋam.

Azezi yetɪ Apɪyɛertɪ wun sɪ'ise ēŋa

(Amatie 26:31-35, Aluki 22:31-34, Azã 13:36-38)

²⁷Tɪ Azezi yele a karēnbiisi la yetɪ: < <Yãma wuu wun lebe la poorum dee base mam, se'ere n soe la, la gulse Nawēnne gōŋɔ puam yetɪ: < Mam wun kv dũnsiina dee tɪ piisi la wɪrge. > > > ²⁸La Azezi le yele ba yetɪ: < <La mam sãn wa vo'oge, mam wun dēŋe ya sēŋe Galile. > > ²⁹Tɪ Apɪyɛertɪ yele ē yetɪ: < <Baa ba wuu sãn lebe poorum dee base fōn, mam kãn base fōn. > > ³⁰Tɪ Azezi yele ē yetɪ: < <Mam yetɪ fu la sɪra, tɪ zĩna, yu'ɔŋɔ ēna wã, lan dēŋe nō-rɔɔgo n wun kaase nōore ayi, fu wun sɪ'ise nōore atã tɪ fōn ka mi mam. > > ³¹Tɪ Apɪyɛertɪ le tɔge ke'enke'em yetɪ: < <Baa la sãn dena tɪ mam

lagum na fõn ki, mam kãn malun s'ise fõn. > > Tı karẽnbiisi la wuu lagum ye le bela.

Azezi pu'vse Nawẽnne Getsemane

(Amatie 26:36-46, Aluki 22:39-46)

³²Tı ba paage zẽ'e-sẽka yv'vre n de Getsemane la. Tı Azezi ye le a karẽnbiisi la yetı: < < Zi'ire-ya kalam dee ti m sẽnge ka pu'vse Nawẽnne. > > ³³La a tarı la Apıyẽeri, la Azakı, la Azã sẽnge. Tı a sũure sã'am zozo'e, ti la dãn ã. ³⁴Tı a ye le ba yetı: < < Sũ-sã'anjõ n tarı mam zozo'e ti mam ãna wu m yetı m ki me na. Weege-ya kalam gu'ura, da gĩse-ya. > > ³⁵La a sẽnge la nẽnja fẽe, ka võgle tẽnja pu'vse Nawẽnne yetı, la sãn tãna, toogo la fõrge dee base ã. ³⁶Dee yetı: < < M So, fõn tã sela woo ita, base ti nãmşgõ ãna fõrge dee base ma. La, la da kãn dena mam n boorı se'em, la dena fõn boorı se'em. > >

³⁷La a leme a karẽnbiisi batã la zẽ'am wa yẽ ti ba gĩsri me, ti a soke Apıyẽeri yetı: < < Asimõ, fõn gĩsri me? Fõn ka tã wun gu karf-ayıla ka gĩse? > > ³⁸Dee ye le ba yetı: < < Base-ya gẽem dee pu'vse Nawẽnne ti yelle da paage ya ti ya lui. Ya sia la boorı me, la ya iyã ka tara pãña. > >

³⁹La a daan le lebe ka pu'vse Nawẽnne wu ãn pu'vse se'em na. ⁴⁰Dee le leme wa yẽ ti ba gĩsri me, se'ere n soe la, gẽem n ba tarı ba. Tı ba ka mina ban wun ye le ã se'em.

⁴¹A daan le sẽnge me, dee leme wa'am nõore atã puam wa soke ba yetı: < < Ya ken v'õsra me dee gĩsra? La ãnge ba'ase me, wakate paage me ti ba wun dıke Nẽrsaala* Dayva la ãnge tõon-be'ero dõma nu'usum. ⁴²Isge-ya ti sẽnge, ti sũka n wun pa'ale ti ba yõke mam na n wãna sãm. > >

Ba yõke Azezi

(Amatie 26:47-56, Aluki 22:47-53, Azã 18:3-12)

⁴³Azezi n daan ken tɔgra la, tɪ Azudaasi n de a karēnbiisi pia la ayi la nēra ayɪla, doose la nēr-kvuŋɔ sēŋe paam. La nēr-kvuŋɔ la daan tarɪ la sukɔbrɔ, la dɔa dɔla ě. La de la kãabgɔ kēma nēŋadōma, la lɔɔ karēnsãandōma, la tēŋa la kēma n tōm ba. ⁴⁴La Azudaasi n wun pa'ale tɪ ba yōke ě na, pōn tɔge me pa'ale ba yetɪ: < < Sɛka tɪ mam wun kɔke ě na, ēŋa n bela, yōke-ya ě, tarɪ ě sōŋa fōrge. > >

⁴⁵La Azudaasi n paam na, a sēŋe lem na Azezi, yeke ě yetɪ: < < Karēnsãama. > > Dee kɔke ě. ⁴⁶Tɪ nērba la paage yōke ě. ⁴⁷Tɪ nēr-seba n daan boe mɪ na nēra ayɪla fooge a sukɔbgɔ se kãabgɔ kēma nēŋadãana tōntōna tubre fiige. ⁴⁸Tɪ Azezi soke ba yetɪ: < < Yãma tarɪ la sukɔbrɔ, la dɔa sēna tɪ ya yōke mam wu mam de la fãara la? ⁴⁹Mam daan boe la yãma le Wēnde-kātum na daare woo zãsna nērba, tɪ ya ka yōke mam. La, la de la tɪ bōn-seka n gulse Nawēnne gōŋɔ puam na ēŋe. > > ⁵⁰Tɪ a karēnbiisi la wuu zoe dee base ě.

⁵¹La budib-polle ayɪla n daan lobe fugɔbga mã'a dɔla Azezi. Tɪ ba daan ze ě tɪ ba yōke, ⁵²tɪ a base a fugɔbga la dee zoe beele fōrge.

Ba tarɪ Azezi sēŋe Zifdōma sarɪyaditba zē'am

(Amatie 26:57-68, Aluki 22:54-55, 63-71, Azã 18:13-14, 19-24)

⁵³Ba daan tarɪ Azezi sēŋe la kãabgɔ kēma nēŋadãana la yire, bilam tɪ kãabgɔ kēma nēŋadōma, la tēŋa la kēma, la lɔɔ karēnsãandōma la wuu tigse. ⁵⁴Tɪ Apɪyɛɛɪ daan bɔna poorum zãazãare dɔla, ka paage kē kãabgɔ kēma nēŋadãana la yire zēnzakam, zēa la tōntōnɪba ɔɔsra bugum.

⁵⁵La kãabgɔ kēma nēŋadōma, la sarɪyaditba la wuu daan eeri la yelle tɪ ba dōre Azezi botɪ ba ku ě, la ba ka yē. ⁵⁶Tɪ nērba zozo'e daan

parum bɔ Azezi, la ba yetɔga la ka doose taaba.

⁵⁷Tɪ nɛrba baseba daan isge parum bɔ ɛ yetu: ⁵⁸< <Tɔma wɔm ti a yetu: < Mam wun wɔrgɛ Wɛnde-kɛte la ti nɛrsaalba mɛ la, dee le mɛ ayɛma dabsa atɔ puam n dagɪ nɛrsaalba mɛa. > > > ⁵⁹Baa bɔn-ɛɲa puam ba yetɔga la ka doose taaba.

⁶⁰Tɪ kɛabgɔ kɛma nɛɲadɛana la isge ze'ele ba wuu nɛɲam soke Azezi yetu: < <Ban tɔgɛ fɔn se'em na, fɔn kɛn lerge se'ere? > > ⁶¹Tɪ Azezi daan sɪna ka lerge se'ere. Tɪ kɛabgɔ kɛma nɛɲadɛana la le soke ɛ yetu: < <Fɔn de la Krisi*, Nawɛnne ti tɔma pɛgrɪ la Dayua la? > > ⁶²Tɪ Azezi lerge yetu: < <Ee, mam de la ɛɲa. La ya wun yɛ Nɛrsaala* Dayua la ti a zɪ Nawɛnne n de pɛɲa dɛana la zɔugɔ bɔba, ya wun yɛ ti a boe sawara puam sɛna. > > ⁶³Tɪ kɛabgɔ kɛma nɛɲadɛana la ɛasum a mɛɲa futo, dee yetu: < <Tɪ le ɛera la bɛm kaset-dɔma? ⁶⁴Ya wɔm ɛn sɛ'am Nawɛnne yu'ure. Yɛma tɛ'esɛ la wɛne? > > Tɪ ba wuu yetu: < <A mase la kɔm. > >

⁶⁵Tɪ ba nɛrba baseba daan sɛɲe tubsra nɔtɔorum ita Azezi, dɪke tɛnne pɪ a nini, mɔm kɔnkɔra wɛ ɛ, dee yetu ɛ ti: < <Bɛɲe pa'ale tɔ nɛr-sɛka n wɛ fɔ? > > Tɪ gu'urba la to'oge ɛ, wɛ a pɛgsɪ.

Apɪyɛɛrɪ sɪ'ise ti ɛɲa ka mi Azezi

(Amatie 26:69-75, Aluki 22:56-62, Azɛ 18:15-18, 25-27)

⁶⁶La Apɪyɛɛrɪ daan ken bɔna la zɛnzakam na, ti kɛabgɔ kɛma nɛɲadɛana tɔntɔn-pɔka wa'am mɪ, ⁶⁷wa yɛ Apɪyɛɛrɪ n ɔɔsrɪ bugum na, ti a bɪsra ɛ, dee yetu: < <Fɔn mɛ daan po bɔna la Nazareti buraa Azezi le. > > ⁶⁸Tɪ Apɪyɛɛrɪ sɪ'ise yetu: < <Mam ka mi, mam ka bɛɲe fɔn ye'le se'em na vɔore. > > Apɪyɛɛrɪ ye'le bela dee yese ka ze la zanɔrum, ti nɔ-rɔɔgɔ kaase. ⁶⁹Tɪ tɔntɔn-pɔka la le yɛ ɛ, ye'le sɛba n boe mɪ na yetu: < <Bura-ɛna de la Azezi nɛra ayɪla. > > ⁷⁰Tɪ

Apıyεeri le st'ıse. Tı la ε̄nje f̄ee, tı n̄er-sεba n ze m̄ı na le yele Apıyεeri yetı: <<Asıra, f̄on de la ba n̄era ayıla. F̄on de la Galile n̄era.>>
⁷¹Tı Apıyεeri p̄ı Naw̄enne yetı: <<Mam ka mi bura-seka tı ya t̄grı a yelle w̄ã.>> ⁷²Bilam m̄ε̄ja tı n̄o-r̄ōgo le kaase n̄ore ayi puam. Tı Apıyεeri t̄eege Azezi n daan yele ε̄ yetı: <<Lan d̄ε̄je n̄o-r̄ōgo n wun kaase n̄ore ayi, fu wun st'ıse n̄ore at̄a tı f̄on ka mi mam>> na. Tı a s̄ıure s̄a'am, tı a kella.

15

Ba tarı Azezi s̄ε̄je ḡomna Apilatı z̄ε'am

(Amatie 27:1-2, 11-14, Aluki 23:1-5, Azã 18:28-38)

¹Beere n daan wiige bulika, tı k̄aabgo k̄ema n̄εjad̄oma, la t̄εja la k̄ema, la l̄ō kar̄ens̄and̄oma, b̄ama wuu n de sarıyaditba la daan lagse m̄ε t̄oge ku, botı ba lv Azezi tarı ε̄ s̄ε̄je Apilatı z̄ε'am. ²Tı Apilatı soke Azezi yetı: <<F̄on de la Zıf̄d̄oma naba?>> Tı a lerge yetı: <<La de la f̄on ye le se'em na.>> ³Tı k̄aabgo k̄ema n̄εjad̄oma la d̄ore ε̄ yela zozo'e. ⁴Tı Apilatı le soke Azezi yetı: <<F̄on w̄om yet̄og-sεba wuu tı ba t̄oge b̄o fu w̄ã, f̄on k̄an lerge se'ere?>> ⁵Tı Azezi ka le lerge se'ere, tı la di'ige Apilatı.

Ba t̄oge tı ba ku Azezi

(Amatie 27:15-26, Aluki 23:13-25, Azã 18:39-19:16)

⁶Z̄ōg-base kibsa woo Apilatı daan ε̄n botı ba yese la n̄er-sεka tı n̄erba la boortı la yu'a deem base. ⁷La buraa ayıla yu'ure n de Abarabası, ε̄ja la n̄erba baseba n daan d̄ame t̄εja, ku n̄era tı ba ȳoge ba yu. ⁸Tı n̄er-kuv̄ō la s̄ε̄je Apilatı z̄ε'am ka sose ε̄ yetı, a ε̄je ε̄ja n utı se'em na b̄o ba. ⁹Tı a soke ba yetı: <<Ya boortı tı m yese la

Zifdōma naba la base bɔ ya? > > ¹⁰Se'ere n soe la, a bāŋe ti k̄aabgɔ k̄ema n̄ɛnadōma la ɛŋe la sūure boti ba yōke Azezi wa bɔ ɛ. ¹¹La k̄aabgɔ k̄ema n̄ɛnadōma la daan sa'ase n̄r-kuvuɔ la mɛ, ti ba s̄ɛŋe ka sose Apilatɪ ti a yese Abarabasi base bɔ ba. ¹²Tɪ Apilatɪ le soke ba yeti: < <Bela, seka ti ya wi'iri ti Zifdōma naba la, yāma boori ti m ɛŋe ɛ na wāne? > > ¹³Tɪ ba tɔgra ke'enke'em yeti: < <Ka ɛ dɔ-puurŋa* zuo. > > ¹⁴Tɪ Apilatɪ soke ba yeti: < <A ɛŋe la b̄em n de be'em? > > Tɪ ba malun tɔgra ke'enke'em yeti: < <Ka ɛ dɔ-puurŋa zuo. > > ¹⁵La Apilatɪ daan boori ti a ɛŋe ti n̄rba la sūure n ɛŋe ȳelum, ti a yese Abarabasi base bɔ ba. Dee boti ba w̄e Azezi la ka'asa, dee dɪke ɛ bɔ ti ba ka ɛ dɔ-puurŋa zuo.

Sudaasi yaale Azezi

(Amatie 27:27-31, Azã 19:2-3)

¹⁶Tɪ sudaasi tarɪ Azezi k̄e gɔmna la yire z̄enzakam, dee wi sudaasi la wuu, ti ba lagsɛ. ¹⁷Tɪ ba dɪke fuugo n de gomusga ye Azezi, dee dɪke gō'osi wugɛ mūŋa vuge ɛ. ¹⁸Dee yāŋa pu'usra ɛ yeti: < <Zifdōma naba, naa! > > ¹⁹Dee dɪke dasaare w̄e a zuugo, tubsɛ nōtōorum m̄i ɛ, dee ka dūma t̄ɛŋa a n̄ɛŋam n̄a'asra ɛ. ²⁰Ban yaale ɛ ki'ulum na, ba yeɛge gomusga fuugo la mɛ, dee le ye ɛ a futo, tarɪ ɛ yese ti ba s̄ɛŋe ka ka dɔ-puurŋa zuo ku.

Ba ka Azezi dɔ-puurŋa zuo

(Amatie 27:32-44, Aluki 23:26-43, Azã 19:17-27)

²¹Ban daan tarɪ Azezi wɛ'esa la, ba daan tu'vse la buraaga ayɪla yu'vre n de Asimō n ze'ele Sireni, a de la Alegsāndri la Arufusi sɔ. A daan ze'ele la va'am lemna. Tɪ sudaasi la p̄erge ɛ, ti a to'oge Azezi k̄um dɔ-puurŋa la buke. ²²Ba daan tarɪ Azezi s̄ɛŋe la z̄e'a ti ba wi'iri ti

Golgota, a vōore de la zuwanre zē'a. ²³Ba daan dīke la dāam n gaam na tum yu'ure n de miiri bō ē ti a yū, ti a zagse ka yū. ²⁴Ti ba daan ka ē dō-puurŋa zuo, dee dīke a futo ti ba pu taaba, pōse ti ba bāŋe nēra woo n wun to'oge se'em. ²⁵La daan de la bulika karf-awei wakate ti ba ka ē dō-puurŋa zuo. ²⁶Ba daan gulse la gulsgo pa'ale bōn-seka n boti ba ka ē lable dō-puurŋa la zuo. Ba daan gulse yeti: < < Zifdōma naba. > > ²⁷Ba daan tari la fāarba bayi wa po ka dō-puursi zuto, ayula a zugo bōba, ayēma a goḅga bōba. ((²⁸La de la bela, ti Nawēnne gōŋo n gulse se'em na ēŋe. La gulse yeti: < < Ba geele ē pa'ase la tōon-be'ero dōma puam. > >))

²⁹Ti nēr-seba n doli bilam tōlla la lōbra ba zuto, dee tūra ē yeti: < < Ēhēe, faa! Dagi fōn yeti fōn wun wōrgē Wēnde-kāte la dee le mē ē dabsa atā puam? ³⁰Fāage fu mēŋa dō-puurŋa la zuo sige. > > ³¹Ti kāabgo kēma nēŋadōma, la lō karēsāandōma la mē la'ara ē yeti taaba yeti: < < A daan fāagri nērba baseba me, dee ka tāna wun fāage a mēŋa. ³²A sān dena Krisi*, Israyeli dōma naba la, a ze'ele dō-puurŋa la zuo sige nānanne wā ti ti yē dee sake. > > Ti nēr-seba ti ba ka dō-puursi zuto lem ē na mē tōge ē be'em.

Azezi kūm

(Amatie 27:45-56, Aluki 23:44-49, Azā 19:28-30)

³³Wuntēŋa zuu-tēŋasuka n daan paage, ti tēŋa la wuu lebge lika halı ka paage zaanōore karf-atā. ³⁴Karf-atā la wakate ti Azezi tōge ke'enke'em yeti: < < Eloi, Eloi, lama sabaktani. > > La vōore de la: < < Mam Wēnnaam, mam Wēnnaam, bēm n soe ti fōn base mam? > > ³⁵Ti seba n ze bilam na baseba wōm bela, yeti: < < Selsey-a, a wi'iri la A'eli*. > > ³⁶Ti nēra ayēma zoe ka dīke nētuŋa luse dā-mī'isgo puam zēke la dōgo bō ē ti a yū, dee yeti: < < Base-ya ti ti gu

bise A'eli la sãn wun wa sike ã do-puurŋa la zuo. > > ³⁷Ti Azezi le kaase ke'enke'em dee yãŋa ki.

³⁸Wakat-ẽŋa, ti fuugo la n yuli Wẽnde-kãte* la puam beŋe zẽ'e-sõŋo la ãage pusuka saazuum ka paage tẽŋa.

³⁹Ti Rom* sudaasi ke'ema daan ze Azezi nẽŋam yẽ ãn ki se'em, ti a yeti: < < Bura-ẽna wã siri de la Nawẽnne Dayva. > > ⁴⁰La pɔgsi baseba n mẽ daan boe mĩ ze kẽnkerŋa bisra. Amaari n ze'ele Magdala, la Amaari n de Azaki pika la Azoze ma, la Asalome n daan boe ba puam. ⁴¹Azezi n daan boe Galile la, ba daan doli ã me dee sõŋra ã. La pɔgsi baseba zozo'e n daan lagum doose ã wa'am Zerizalem n boe mĩ.

Azezi laare

(Amatie 27:57-61, Aluki 23:50-56, Azã 19:38-42)

⁴²Ti wẽnne daan bõna mĩ kẽ'era, la daan de la beere n wun wiige Zifdõma vo'osgo* daare, ti ba daan bõna mĩ mãasna. ⁴³Ti bura ayula yu'ure n de Azozefu, a ze'ele la Arimate, a de la sarıyaditba la nẽra ayula ti ba nannu. A mẽ daan gu'uri la Nawẽnne n wun wa'am wa di na'am nẽrba tẽŋasuka. Lan daan de beere n wun wiige vo'osgo daare la ãyã, ti a ke'em sũure sẽŋe Apilatı zẽ'am ka sose Azezi kũm na. ⁴⁴La Apilatı n wõm ti Azezi dare ki me na, la di'ige ã me. Ti a botı ba wi suda-ke'ema la, ti a soke bãŋe Azezi ki yuuge me? ⁴⁵La Apilatı n wõm suda-ke'ema la lergre la, ti a bõ Azozefu sore ti a sike kũm na. ⁴⁶Ti Azozefu da tãnne sike kũm na do-puurŋa la zuo, dıke tãnne la vile ã, tari ã sẽŋe ka laage yɔɔgo ti ba daan tũ tãmpĩa ãyã, yãŋa bilge kug-kãte lige yɔɔgo la nõore. ⁴⁷Amaari n ze'ele Magdala, la Azoze ma Amaari daan ze me bisra zẽ'e-seka ti ba bĩŋe ã na.

16

Azezi vo'ore

(*Amatie 28:1-8, Aluki 24:1-12, Azã 20:1-10*)

¹Zifdõma vo'osgo* daare n daan tole, ti Amaari n ze'ele Magdala, la Azaki ma Amaari, la Asalome da tudare yũuño n ãn sõña ti ba tarti sêñe ka êñe Azezi ñyã. ²Ti Lasri daare bulika wenne n doorti se'em mã'a la, ti ba we'esa yoom na, ³dee togra la taaba sore yetu: < <Ane n wun bilge kugre la yooño la nõorum bo to? > > ⁴La ban paage la, ba ye ti kugre la n ba ãna kãte la pøn bilge me gã. ⁵Ti ba kã yooño la puam, ye budib-polle n ye fu-pæelga zãa zvugõ bõba, ti ba palẽña êke. ⁶Ti a ye ba yetu: < <Da base-ya ti ya palẽña êgra, mam mi ti ya eeri la Azezi n ze'ele Nazareti, ti ba ka do-puurña* zuo ku la. A vo'oge me, a ka boe kalam. Base-ya zẽ'e-seka ti ba daan biñe ã na n wãna. ⁷Sêñe-ya ka ye Apityeri, la a karẽnbiisi baseba la yetu: < A wun dẽñe ya nẽña sêñe Galile. Bilam ti ya wun ye ã, wu ãn daan ye la se'em na. > > > ⁸Ti ba yem boi, ti ba ñyã gõgra, ti ba yese yooño la puam zoe, la ba daan ka ye nãra nãra sela, se'ere n soe la, dabeem n tarti ba.

Azezi dũke a mẽña pa'ale nãrba

(*Amatie 28:9-10, 16-20, Aluki 24:13-49, Azã 20:11-23*)

((⁹Azezi n daan vo'oge Lasri daare bulika yu'ũño yu'ũño la, a dẽñe dũke a mẽña pa'ale la Amaari n ze'ele Magdala. La de la ãña ti kulka'arsi bayopõ daan doli ã ti Azezi dige ba, ti ba yese la. ¹⁰Ti a sêñe ka ye nãr-seba n daan doli Azezi la. Ba daan zi la sũ-sã'ãño la nintãm. ¹¹La ban daan wõm ti Azezi vo'oge me ti Amaari ye ã na, ba daan ka sake.

¹²Bela poorum ti Azezi le teege nēḡa ayēma dıke a mēḡa pa'ale a karēnbiisi bayi n daan boe sore we'esa tēn-pıka ayıla. ¹³Tı ba lebe ka yebe ba taaba la, ti ba ka sake.

¹⁴La bela poorum, ti a karēnbiisi pia la ayıla la daan zēa dita, ti Azezi dıke a mēḡa pa'ale ba. Dee zεbe ba, ban daan ka bɔ sira, la ba sūure n ke la ıyā. Se'ere n soe la, ba daan ka sake seba n daan yē ē yetı a vo'oge me na yetɔga. ¹⁵A yebe bela, dee yebe ba yetı: < < Sēḡe-ya dūnia zē'a woo ka mōole Nawēnne kō-yēlga la bɔ nērba wuu. ¹⁶Seka woo n bɔ sira, botı ba mise ē ko'om puam, a wun yē fāare. La seka woo n ka bɔ sira, ba wun di a sariya sıbge ē. ¹⁷La seba n wun bɔ mam sira la, wun ita la bōn-yālma bāna pa'ale Nawēnne pāḡa: Ba wun dıke la mam yu'vre digra kulkā'arsı, dee tɔgra yetɔg-zāḡsı. ¹⁸La ba sān yōge bōnse'edōma, bu yū yabga, la kān ēḡe ba sela. La ba wun dıke ba nu'usi pagle bā'adōma zuto, ti ba yē ımā'asum. > >

Azezi zom Nawēnne yire

(Aluki 24:50-53, Tōoma 1:9-11)

¹⁹Zuudāana Azezi n daan tɔge la ba k'ulum na, a zēke me zom Nawēnne yire, ka zı'ire Nawēnne zıvɔɔ. ²⁰Tı a karēnbiisi la sēḡe ka mōole kō-yēlga la zē'estı wuu. Tı Zuudāana la sōḡe ba, botı ba tōm tōon-yālma pa'ale ti ba kōa la mōolɔ de la sira.)) \f1 2:10 Azezi sān ēn yetı ti Nērsaala* Dayva la, la de la a mēḡa ti a tɔgrı. \f2 3:22 Abelzebulı de la Asūtāana yu'vre ayēma. \f3 6:37 Lag-kōbre la yu'vre de la denıye, denıye de wu nēra daare ayıla tōone yɔɔɔ. \f4 7:26 Ba sān yetı nēra de la Gręki, la vōore de la a dagı Zıfu. \f5 8:38 Azezi sān ēn yetı ti Nērsaala Dayva la, la de la a mēḡa ti a tɔgrı. \f6 14:21 Azezi sān ēn yetı ti Nērsaala* Dayva la, la de la a mēḡa ti a tɔgrı. \e LUK

Aluki

Azezi-krisi kō-yēlga ti Aluki gulɛ

Bilgre

Aluki yuun de la logtore, dɔla Apoli tōnna Nawēnne tōoma (Afilmō 24). Ēŋa n ken gulɛ Azezi-krisi Tōntōnɔba Tōoma Gōŋɔ. A dagi Zifu. A yuun mōrge me doose Azezi yela la wuu nāma sōŋa sōŋa, gulɛ bɔ bu-zāŋsi yeti ēŋa yeti a pa'ale ba me ti ba bāŋe ti ban zāsum ba se'em na de la sira (Aluki 1:1-4).

Aluki pa'ale ti Azezi de la Zifdōma, la dūnia buuri wuu nērba Fāagra, la ēŋa n zoti nasdōma, la bā'adōma, la seba ti nērba sisri ninbāalga zozo'e. A ken pa'ale ti Azezi tōm na Nawēnne Sta pāŋa le, dee yeti Nawēnne kō-yēlga la bɔ'ɔri la sū-yēlga zo'oge (Aluki 2:10, 24:52).

A pa'ale la Azezi vɔm n doose se'em wu Amatie, la Amarku n mē gulɛ se'em na. A pa'ale la Azezi tōoma pī'iluŋo, la ēn zāsum nērba, dee boti nērba yē imā'asum, la ēn sēŋe Zerizalem ti ba yōke ē ka dɔ-puurŋa zuo, ti a ki, dee vo'oge, zom Nawēnne yire.

Aluki gōŋɔ la tarti la yela zozo'e n ka gulɛ gōnnɔ baseba la puam:

- Nawēnne n tōm maleka ti a wa'am wa yeke Amaari Azezi dɔka yelle, la Azā n yuun misri nērba ko'om puam na mē dɔka yelle (sapitri 1).
- Azezi dɔka n doose se'em, la malegsi n pa'ale dūnsīima ti ba sēŋe ka pēge Azezi (2:1-20).
- Ban dɔke Azezi bɔ Nawēnne, ti Asimeyō, la A'annu tɔge Azezi yelle se'em (2:22-40).

- Azezi n tari yuuma pia la ayi wakate la, ěn sěnje Wěnde-kātum ka ěnje se'em (2:41-52).

- Samaari něra n sōnje něra makre (10:30-35), bōntarsa n ka tari yem makre (12:13-21), la bia n base a sō yire, le lebe kule makre (15:11-32).

Azezi-krisi kō-yělga ti

Aluki

gulse

1

Se'ere n soe ti Aluki gulse gōᅇo la

¹Mam sir-sōᅇo Ateofili, něrba zozo'e n mōrge gulse yel-seba wuu n ěnje tōma zě'am na. ²Ba gulse yel-bāma wuu wu něrba baseba n daan yě yela la wuu halı ba pı'iluᅇo, dee mōole kō-yělga la tōge pa'ale ti tōma wōm se'em na. ³Bela ĩyā ti mam mā'age m měᅇa doose yel-bāma nāma sōᅇa sōᅇa halı ba pı'iluᅇo puam, ti mam tě'ese ti la ān sōᅇa ti m gulse yela la n doose taaba se'em na bō fō. ⁴Mam gulsru wāna ti fu bāᅇe me ti yel-bāna wuu ti ba pa'ale fu la de la sira.

Azakari bia Azā ti ba wun dōge yelle

⁵Se'emwěnum ti A'erōdı* daan de Zude* těᅇa naba la, buraa n daan boe ti a yu'vre dena Azakari. A daan de la Zifdōma kāabgō* kěema, a de la Abiya buuri něra. Ti a pōga yu'vre dena A'elizabetı, ěᅇa mě daan de la kāabgō kěema něᅇadāana Aarō* buuri. ⁶Bāma bayi daan de la něrba n uti sōᅇa Nawěnne nifum, dee sakra Nawěnne nōore, la a lōō* la wuu sōᅇa. ⁷La ba daan ka tari bia, se'ere n soe la, A'elizabetı

daan de la kōndɔgrɛ, la bāma bayi la wuu mē kurgɛ mɛ.

⁸La wakate n daan paage ti Abiya buuri kē Wēnde-kāte* la puam ti ba tōm. Tɪ Azakari mē kē ti a tōm. ⁹Kāabgɔ kēma la malɔɔ daan de la ba pɔsɛ looge nēr-seka n wun kē zē'e-sōɔɔ puam yō tɪdare bɔ Nawēnne. Tɪ ba daan pɔsɛ, ti la yōke Azakari. Tɪ Azakari kē ti a yō.

¹⁰La tɪdare la yō'a wakate nēr-kuvɔɔ la wuu boe la yēɲa pu'usra Nawēnne.

¹¹Tɪ Nawēnne maleka* dare wa'am Azakari zē'am wa ze tɪdare yō'a bīm̄bīnne na zuvɔɔ bɔba. ¹²La Azakari n yē ē na, a palēɲa n ēke halɪ, ti dabeem kē ē. ¹³Tɪ maleka la yele ē yeti: < <Azakari, da zoe dabeem, ti Nawēnne wōm fu pu'usgɔ mɛ. Fu pɔga A'elizabethɪ wun dɔge la budibla, ti fu sɪ a yu'vɔre ti Azā. ¹⁴La fu wun ēɲe sū-yēlga sɪvum. La nērba zozo'e wun ēɲe sū-yēlga bia la dɔka iyā. ¹⁵A wun dena la nēr-keko Zuudāana Nawēnne nifum, la a kān yū dāam bu bōn-yūula n bugri. Nawēnne Sia* wun bɔna la ē halɪ lan pɔsɛ ēn boe a ma puuvum, la wakate wuu. ¹⁶A wun botɪ Israyelɪ* nērba zozo'e lebe sake ba Zuudāana Nawēnne. ¹⁷La a wun dēɲe Zuudāana nēɲam tara Nawēnne Sia pāɲa wu Nawēnne nōtɔ'ɔsa A'eli* n daan tarɪ se'em na. La a wun naage sɔdōma la ba kɔma yela, dee wun botɪ nēr-seba n sɪ'isrɪ Nawēnne nōore la tara yem ita wu seba n utɪ sela n mase la. A wun botɪ nērba māasum sōɲa gu'ura ti Zuudāana. > >

¹⁸Tɪ Azakari soke maleka la yeti: < <Bēm n wun botɪ mam bāɲe ti bōn-ēna de la sɪra? Se'ere n soe la, mam de la bura-yā'aɲa dee ti mam pɔga mē kurgɛ. > > ¹⁹Tɪ maleka la lerge ē yeti: < <Mam yu'vɔre de la Agabriyelɪ, mam ze la Nawēnne nēɲam. Ēɲa n tōm mam yeti, m wa'am yele fu yetɔg-yēlga wā. ²⁰La fōn ka sake mam yetɔga la iyā, fu nōore n wun māam. La wakate sān paage, bōn-seba ti mam yele fu la wun ēɲe. La fu kān le tāna tɔgra, halɪ ti la paage daar-seka ti bōn-

bāna wun ēŋe la. > >

²¹Wakat-ēŋa, nērba la daan gu'uri me ti Azakari yese. La ēn daan boe zē'e-sōŋo la puam yuura la, ba palēŋa n ēke. ²²La ēn yāŋa wa yese la, a ka tā'age tōge la nērba la. A nōorum n māam ti a tara nu'usi magra pa'ala ba. Bela ti ba bāŋe ti a yē la bōn-yālma zē'e-sōŋo la puam.

²³Dabs-seba ti Azakari daan wun tōm Wēnde-kāte la puam n ba'ase la, a daan lebe kule la a yire.

²⁴Dabs-bāna poorum, ti a pōga A'elizabethi yōke puure bōna yire wōr-sinuu. ²⁵Dee yeti: < <Wāna de la Zuudāana Nawēnne tōoma. Wakat-ēna ēŋa n yāŋa bise mam yelle, dee yese bōn-ēna n de ni yānne bō mam nērba tēŋasvka. > >

Maleka n tōge Azezi dōka yelle

²⁶⁻²⁷Pugla ayula n daan boe Galile tēŋa ayula yu'ure n de Nazareti, ti a yu'ure dena Amaari. A daan nān ka mi buraa. La buraa ayula yu'ure n de Azozefu n yeti a di ē. Azozefu de la naba Adavidi* buuri nēra. La wakat-seka ti A'elizabethi daan taru puure wōr-siyooobi puam na, ti Nawēnne tōm a maleka* Agabriyelu ti a sēŋe Amaari zē'am. ²⁸Ti maleka la sēŋe Amaari zē'am ka pu'vse ē yeti: < <Fu tōoma. Zuudāana Nawēnne boe la fu me, a ēŋe fu yel-sōnne me. > > ²⁹La Amaari n daan wōm maleka yetōga la, a palēŋa n ēke, ti a tē'esra maleka la n yele se'em na vōore n de sela. ³⁰Ti maleka la yele ē yeti: < <Amaari, da zoe dabeem, ti Nawēnne ēŋe fu yel-sōnne me. ³¹Fu wun yōke la puure dōge budibla, si a yu'ure ti Azezi*. ³²A wun dena la nēr-keko. La ba wun wi'ira ē ti, Nawēnne n gānnu wuu Bia. La Zuudāana Nawēnne wun bō ē a yaaba Adavidi na'am, ³³ti a dena Azakōbi* buuri naba wakate wuu, a na'am na kān malun ba'ase. > >

³⁴Ti Amaari soke maleka la yeti: < < Mam ka mi buɾaa, la wun ɛɲe la wãne ti mam yõke puɾe? > > ³⁵Ti maleka la lerge ẽ yeti: < < Nawẽnne n gãnni sela wuu Sia wun sige fu zuo, la Nawẽnne pãɲa wun bɔna la fo, bela bia la ti fu wun dɔge la wun welge la to'ore, ba wun wi'ira ẽ ti Nawẽnne Dayua. ³⁶Bãɲe ti fu sɔogo A'elizabeti ti ba yeti a de la kɔndɔgre la, a tari la puɾe wɔr-siyooɔi n wãna. Baa la ɛn kɔrge la, a wun dɔge la budibla. ³⁷Se'ere n soe la, sela sela ka boe ti Nawẽnne ka tã ita. > > ³⁸Ti Amaari lerge yeti: < < Mam de la Zuudãana Nawẽnne tɔntɔn-pɔka. Nawẽnne boti la ɛɲe wu fɔn yele se'em na. > > Ti maleka la fɔrge dee base ẽ.

Amaari sɛɲe ka bise A'elizabeti

³⁹La dabsa bãma puam, ti Amaari isge sɛɲe tɔtɔ paage Zude so'olum tɛɲa ayila ti tãnsi boe mĩ. ⁴⁰La ɛn paage la, a kɛ la Azakari yire pu'use A'elizabeti. ⁴¹La A'elizabeti n wɔm a pu'usgo la, bia la wɛrge me a puɾum. Ti Nawẽnne Sia* wa'am A'elizabeti zɛ'am la pãɲa, ⁴²ti a tii tɔge yeti: < < Nawẽnne ɛɲe la fɔn yel-sɔnne gãnna pɔgsi la wuu. La bia la ti fu wun dɔge la, tari yel-sɔnne me. ⁴³Mam de la ãne ti mam Zuudãana ma sɛna mam zɛ'am? ⁴⁴Se'ere n soe la, mam wɔm fɔn pu'usgo la, bia la n boe mam puɾum na wɛrge me la sũ-yɛlga. ⁴⁵Fɔn sake ti Zuudãana Nawẽnne yetɔga ti a tɔge bɔ fu la wun siri ɛɲe la, fu yɛ zu-yɛlga. > >

Amaari n yoom yooma pɛge Nawẽnne la yelle

⁴⁶Ti Amaari yele yeti:

< < Mam pɛgru Zuudãana Nawẽnne la m sũure wuu.

⁴⁷Mam tari sũ-yɛlga me, Nawẽnne n de mam Fãagra la iyã,

⁴⁸se'ere n soe la, a bise mam n de a tɔntɔn-pɔg-tarma la yelle me.

Bela lan pɔse leele wã we'esa, zamãana wuu nɛrba wun wi'ira mam

ti zu-yēlga dāana.

⁴⁹Se'ere n soe la, Nawēnne n tā wuu la n ēje bōn-kāra bɔ mam.

A de la pupeelem dāana.

⁵⁰La nēr-seba n zoti ē na,

a zoti ba ninbāalga me zamāana wuu.

⁵¹A dūke la a nu'ugo tōm tōon-kāra,

dee boti zēk-m-mēṅa dōma la zoe wūrge la ba zēk-m-mēṅa

putē'era la.

⁵²La sān dena pānsi dōma,

a sikri ba me ba na'am puam,

dee zēkra sik-m-mēṅa dōma.

⁵³La seba n ka tarı sēla la,

a bɔ'ɔri ba bōntarsōm zɔ'ɔra me,

dee boti bōntatba lebe fōrge dee ka to'oge sēla sēla.

⁵⁴A tēerı zɔta tōma İsrayeli* nērba n de a tōntōnıba la ninbāalga

me, dee sōṅra tōma,

⁵⁵wu ēn yuun bıje a nōore la tōma yaaba Abraham*, la tōma sɔ-

yaabdōma, la ba yusi la wuu ti a wun sōṅra tōma wakate

wuu se'em na. > >

⁵⁶La Amaari daan weege A'elizabethi zē'am ēje wu wōr-sitā, dee yāṅa lebe kule.

Azā dɔka yelle

⁵⁷A'elizabethi dɔka wakate n daan paage la, a dɔge la budibla. ⁵⁸Tı a sawiiba, la a yir-dōma wōm ti Zuudāana Nawēnne zoe a ninbāalga zo'oge, ti ba wuu lagum ita sū-yēlga la ē. ⁵⁹Bia la dɔka dabsa anii daare ti ba wa'am ti ba wā* ē, daan bɔɔra ti ba si a yu'ure a sɔ Azakari yu'ure. ⁶⁰La a ma ka sake, yeti: < < Ayei, a yu'ure wun dena

la Azā. > > ⁶¹Ti ba lerge yeti: < < Ya yir-dōma la puam nēra ka boe mĩ ti a yu'vre dena Azā. > > ⁶²Ti ba yibse la nu'usi soke bia la so ti ba bāṅe ēṅa n boori ti ba si bia la yu'vre se'em. ⁶³Ti a boti ba bɔ ē dɔ-palaka, ti a to'oge gulse yeti: < < A yu'vre de la Azā. > > Ti la di'ige nērba la waa wuu. ⁶⁴La ēn gulse yele bela la, bilam mēṅa ti a ziluṅa lake, ti a tā'age tɔgra pēgra Nawēnne. ⁶⁵Ti dabeem yōke seba n lem bilam na wuu. Ti kō-ēṅa saage Zude tēn-seba ti tānsi boe mĩ na wuu. ⁶⁶Bāma wuu n daan wōm yela la, ba daan tē'esri me dee sakra yeti: < < Bi-ēna yeti a wa āna la wāne? > > Zuudāana Nawēnne pāṅa boe la ē me.

Azakari n to'oge Nawēnne yetɔga bɔ nērba la yelle

⁶⁷Nawēnne Sia n wa'am bia la so Azakari zē'am la pāṅa. Ti a to'oge Nawēnne yetɔga tɔge yeti:

⁶⁸< < Base-ya ti pēge Nawēnne n de Israyeli* Zuudāana la, se'ere n soe la, a wa'am me wa buse a nērba yelle, fāage ba base.

⁶⁹A bɔ tōma la Fāagra n tari pāṅa n wun yese a tōntōnna Adavidi*
buuri la puam,

⁷⁰wu ēṅa n yuun boti a nōtɔ'ɔsriɔba* tɔgra kurum se'em na.

⁷¹A yeti a wun fāage tɔ ti be'eba nu'usum,
la nēr-seba n sisri tōma la nu'usum.

⁷²Bela, a zoe ti yaabdōma ninbāalga me,
dee tēge ēn yuun bīṅe a nōore la ba la yelle.

⁷³Se'ere n soe la, a yuun bīṅe nōore me la ti yaaba Abraham*

⁷⁴ti a wun fāage tɔ ti be'eba nu'usum,
dee wun boti ti tōm a tōoma, ti dabeem kana.

⁷⁵Dee dɔla ē la pupeelem,
dee ita ti la masra ēn boori se'em ka paage ti vom teka.

⁷⁶La fõn, m bia, ba wun wi'ira fu ti Nawēnne n gānni wuu nõtɔ'ɔsa.
Bela ïyã, fõn wun dēŋe ti Zuudāana la nēŋam malge sore bɔ ē,
⁷⁷dee yele Nawēnne nērba la ti ba bāŋe ti a wun fāage ba base ba
tõon-be'ero taale.

⁷⁸La de la Nawēnne n zoti tōma ninbāalga la ïyã
ti a wun boti a peelem n ān wu wuntεεŋa n yēke bulika la,
⁷⁹nēege bɔ nēr-seba n boe lika pvam,
la nēr-seba n zoti kūm dabeem na,
dee pa'ale ti so-seka ti ti wun doose yē sū-mã'asum. > >

⁸⁰Ti bia la daan bita, ti a put'e'ere pa'asra. A daan boe la weem ka
paage daar-seka ti a wa'am Israyeli dōma la zē'am ti ba bāŋe ē.

2

Azezi dɔka yelle

(Amatie 1:18-25)

¹Ban daan dɔge Azã la, wakat-ēŋa ti na-keko A'ogisti daan bɔ nõore
yeti, ba kãale a tēŋa la wuu nērba. ²La daan de la pɔspɔsi n bela ti ba
kãale nērba la, wakat-seka ti Akirinusi daan de Siiri tēnsi gɔmna la.

³Ti nērba wuu kule ba mēnsi tēnsuvm ti ba kãale ba.

⁴Ti Azozefu mē yese Nazareti n boe Galile so'olum sēŋe Betelem n
boe Zude so'olum pvam, zē'e-ēŋa ti ba yuun dɔge naba Adavidi*.
Se'ere n soe ti a sēŋe bilam na, a de la naba Adavidi buuri. ⁵ēŋa la
Amaari n de pɔg-seka n yeti a ele ē na sēŋe me ti ba kãale ba, wakat-
ēŋa Amaari tarti la pvure. ⁶La ban nãn boe Betelem la, ti a dɔka daare
paage. ⁷Ti a dɔge a budib-kēema, vile ē na fuugo gã'are dūnsi yɔnnɔ
daka pvam. Se'ere n soe la, zē'a n ka boe sãama yire la pvam ti ba
wun gã'are.

Dūnsīima la malekadōma yelle

⁸La tēn-ēṅa dūnsīima daan boe la sēkam gu'ura ba dūnsi yu'ḥṅ. ⁹Ti Nawēnne maleka* sige ba zē'am. Ti Nawēnne na'am pāṅa peelem nēege gilge ba. Ti dabeem ba kē ba halu. ¹⁰Ti maleka la yeke ba yeti: < <Da zoe-ya dabeem, ti mam taru la kō-yēlga ti m yeke ya, n wun base ti nērba wuu sūure ēṅe yēlum. ¹¹La de la yu'ḥṅ-ēna ti ba dōge ya Fāagra la Adawidi* tēṅa puam, ēṅa n de Zuudāana Kriisi* la. ¹²La bōn-ēna n wun boti ya bāṅe ti la de la sira, ya wun yē bilta ti ba vile ē na fuugo gā'are dūnsi yōnno daka puam. > >

¹³Ti Nawēnne malekadōma kuvuṅ-kuvuṅ dare wa'am wa naage la ayula la. Ti ba pēgra Nawēnne yeti: ¹⁴< <Nawēnne n boe saazuum n soe pēka, la nēr-seba ti a nōṅe la taru sū-mā'asum dūnia zuo. > > ¹⁵La malekadōma la lebe la Nawēnne yire, dee ti dūnsīima la yeke taaba yeti: < <Base-ya ti ti sēṅe Betelem ka bise sela n ēṅe ti Nawēnne yeke ti la. > >

¹⁶La ba isge me toto sēṅe ka paage yē Amaari, la Azozefu, la bilta la ti a gā dūnsi yōnno daka puam. ¹⁷La dūnsīima la n yē ē na, ba tōge bia la yelle wu maleka la n yeke ba se'em na. ¹⁸Ti seba wuu n wōm dūnsīima la n yeke se'em na, la di'ige ba me. ¹⁹La Amaari tē'esru yela wā wuu me a sūure puam. ²⁰Dee ti dūnsīima la daan lebra dee pēgra Nawēnne yu'ure zozo'e, se'ere n soe la, ba wōm dee yē maleka la n yeke ba se'em na.

Azezi yu'ure sia yelle

²¹La dabsa anii la daare n daan paage, ti ba boti ba wā* bia la wu Amoyisi* gōṅ n pa'ale ti ba wā ba budimto se'em na. Ti ba si a yu'ure ti Azezi*, yu'ur-seka ti maleka daan yeke ba ti ba si ē na, wakat-seka ti Amaari daan nān ka yōke a puure la.

Ba tarı Azezi ka bɔ Nawēnne

²²La wakate la n paage ti Amaari malge a mēŋa Nawēnne zē'am wu Amoyisi ɔɔ* gōŋɔ n yeke se'em na. Ti Azozefu la Amaari tarı bia la sēŋe Zerizalem* Wēnde-kātum ti ba dıke ē bɔ Nawēnne. ²³Se'ere n soe la, la gulse Nawēnne ɔɔ gōŋɔ la puam ti budib-kēema woo wun dena la Nawēnne bōnɔ. ²⁴Ba daan sēŋe ti ba kāabe la sela bɔ Nawēnne wu Nawēnne ɔɔ la n yeke se'em na. La yeti, ba bɔ mōom dawema bayi bu na'adawen-bie bayi.

²⁵Wakat-ēŋa ti buraa daan boe Zerizalem ti a yu'ure dena Asimeyō. A de la nēr-sōŋɔ dee sakra Nawēnne sōŋa, dee gu'ura Israyeli* Fāagra la n sēm na. Ti Nawēnne Sia* bɔna la ē. ²⁶La Nawēnne Sia la daan pōn yeke ē ti a kān ki, sān dagna ti a yē la Krisi* ti Zuudāana Nawēnne wun tōm ti a wa'am na. ²⁷Ti Nawēnne Sia la boti a sēŋe Wēnde-kātum na, la wakat-ēŋa ti Azezi sɔ, la a ma daan tarı ē sēŋe ti ba ēŋe Nawēnne ɔɔ n yeke se'em na. ²⁸Ti Asimeyō to'oge bia la a nu'usum, pu'use Nawēnne yeti:

²⁹ < < Zuudāana, leeɛ wā, fōn bīŋe nōore se'em na ēŋe me.

Fu yāŋa tā base mam n de fōn tōntōnna sore
ti m base dūnia dee wa'am fōn yire la sū-mā'asum.

³⁰Se'ere n soe la, m nini yē Fāagra la ti fu tōm na,

³¹ēŋa ti fu māasum bɔ ti dūnia nērba wuu yē.

³²ēŋa n de peelem n wun boti la nēege bɔ buuri wuu ti ba bāŋe
fōn,

dee wun boti tōma Israyeli dōma n de fōn nērba yē pēka. > >

³³La Asimeyō n tɔge bia la yela la, la daan di'ige bia la sɔ, la a ma me.

³⁴Ti Asimeyō kā kā'a-sōma bɔ ba, dee yeke bia la ma Amaari ti Nawēnne looge bi-ēna ti a boti Israyeli dōma zozo'e lui me, dee ti zozo'e mē isge. ēŋa n wun pa'ale Nawēnne tōoma, dee ti nērba zozo'e

wun zagse ē. ³⁵Ēṅa n wun nēege pa'ale sela n svge ba putē'era puam na. Dee yeti, Amaari mēṅa wun yē sū-sā'anjō wu sv'a ti ba suse lu nēra sūure la.

³⁶Wakat-ēṅa Nawēnne nōtō'os-pōka n mē daan boe ti a yu'ure dena A'anni. Ti a sō yu'ure dena Afanuyeli, a de la Azēeri buuri nēra. Ēṅa daan de la pug-sa'are dee ele sira paage yuuma ayopōi ti a sira la ki.

³⁷La a sira la n ki la, a yāṅa de la pōkōore kurgē halı ka paage yuuma pinii la anaasi. A daan boe la Wēnde-kātum na wakatē wuu, tōnna bō'ora Nawēnne wuntēṅa la yu'ujō wuu ka basra, dee luta nōore sōsra Nawēnne. ³⁸Wakat-ēṅa ti a paage ba zē'am, pu'use Nawēnne a yel-sōnne, dee tōgra bia la yelle bō'ora seba wuu n gu'uri wakat-seka ti Nawēnne wun le fāage Zerizalem nērba la base.

³⁹La ban ēṅe sela woo ba'ase wu Nawēnne lōō la n yeke se'em na, ti Azozefu la Amaari lebe kule Nazareti n boe Galile so'olum na. ⁴⁰Ti bia la bita tara pāṅa la yem, dee ti Nawēnne yel-sōnne bōna la ē.

Azezi daan de la bia, dee weege Zerizalem

⁴¹Yuune woo Azezi sō, la a ma sēnni la Zerizalem dita Zōōg-base* kibsā. ⁴²La Azezi daan tarı la yuuma pia la ayi, dee ti ba sēṅe kibsā la wu ban ēn ita se'em na. ⁴³La kibsā la dabsā n ba'ase la, ti ba lebe kulla. Dee ti Azezi weege Zerizalem, ti a sō la a ma daan ka bāṅe ti a weege ya. ⁴⁴Ba daan tē'esē ti a dolı la ba tēṅa dōma, dee sēṅe dabsre mōone sēnne. La ban ε ē ba nērba la, la ba sirdōma zē'am dee ka yē ē na, ⁴⁵ba daan lebe la Zerizalem ka εera ē. ⁴⁶La dabsā atā daare ti ba yē ē Wēnde-kātum na, ti a zı la karēnsāandōma selsra, dee sōkra ba sokrusı. ⁴⁷Azezi n daan tarı yem la ēn lergrı se'em na, di'ige seba wuu n daan wōm na mē. ⁴⁸La a dōgrıba la n yē ē na, la ba di'ige ba mē. Ti a ma soke ē yeti: < <M bia, bēm ti fu ēṅe ti wāna? Mam la fu sō ε fu

me halı la sũ-sã'aŋɔ. > > ⁴⁹Tı a lerge ba yetı: < < Bẽm tı ya ẽera ma? Yãma ka mi tı la mase me tı mam bɔna m So yire wã bu? > > ⁵⁰Tı ba ka bãŋe Azezi yetɔga la vooɛ.

⁵¹Tı Azezi doose ba kule Nazareti, dee sake ba nõore. Tı a ma tẽ'esra yel-bãma wuu a sũurum. ⁵²Tı Azezi bita, tı a yem pa'asra, tı Nawẽnne la nẽrba nõŋe ẽ.

3

Azã mooli Nawẽnne yetɔga dee misra nẽrba ko'om puam

(Amatie 3:1-12, Amarkı 1:1-8, Azã 1:19-28)

¹Na-keko Atibeeri n daan di na'am na, a yuuma pia la anuu yuune, tı Apõnsı-pilatı de Zude gɔmna, dee tı A'erɔdı* dena Galile naba, tı a sobia Afilipi mẽ dena Itiire la Trakoniti naba. Tı Alisaniyası dena Abilenı naba. ²La A'annı, la Akayifu de la Nawẽnne kãabgɔ* kẽma nẽŋadõma. Wakat-ẽŋa tı Azakari bia Azã daan boe moom tı Nawẽnne tɔge bɔ ẽ. ³Bela tı Azã sẽŋe tẽn-seba n boe Zurdẽ kulaa nõorum la wuu ka moola yetı, ba teege yem base tõon-be'ero, tı ba mise ba ko'om* puam tı Nawẽnne base ba tõon-be'ero taale. ⁴Azã n mooli se'em na ẽŋe wu Nawẽnne nõtɔ'ɔsa A'ezayi* n yuun gulse gõŋɔ puam se'em na. A yuun yetı:

< < Nẽra n mooli weem tɔgra ke'enke'em yetı:

Malge-ya sore sõŋa gu'ura Zuudãana,
malge-ya sɔa la tı ba tɔ tẽntẽesi bɔ ẽ.

⁵Pale-ya bɔgsı la wuu,
sirge-ya tãnsı la kũnkũma la wuu,
mãale-ya so-gɔlma tı ba tɔ tẽntẽesi,
pale-ya sorɔɔɔ bogro tı ba naage taaba.

⁶Bela nērsaalba wuu wun yē Nawēnne n uti se'em fāagra nēriba
basra. > >

⁷La nēriba zozo'e n sēᅇ ka lagse Azā zē'am tɪ a mise ba ko'om puam.
Tɪ a yeke ba yetɪ: < <Yāma ān wu kāmpeesi buuri, āne n yeke yāma
yetɪ, ya tā wun zoe pōse Nawēnne sibgre n sēm na? ⁸Tōm-ya tōon-
seba n pa'alɪ tɪ ya teege yem base tōon-be'ero. Da kān tē'esē-ya tɪ
Abraham* n de yāma yaaba la, ya wun pōse Nawēnne sibgre mē.
Mam yetɪ yāma mē tɪ, Nawēnne tā wun dɪke kuga wā botɪ ba lebge
Abraham yusi. ⁹Nēra n pōn tara lia a nu'usum tɪ a lubē tusi. Tɪ-seka
woo n ka wōnnɪ biē sōma la, a wun lubē ē mē, lobge bugum puam tɪ
bugum di ē. > >

¹⁰Tɪ nēr-kuvᅇᅇ la soke ē yetɪ: < <Tɪ wun ēᅇ la wāne? > > ¹¹Tɪ Azā
lerge ba yetɪ, seka n tarɪ futo bayi, a looge bɔ seka n ka tarɪ. Tɪ seka n
tarɪ dia, mē ēᅇ bɔ seka n ka tarɪ. ¹²Tɪ lampo-t'ɔsrɪba* mē wa'am tɪ a
mise ba ko'om puam, soke ē yetɪ: < <Karēsāama, tɪ wun ēᅇ la
wāne? > > ¹³Tɪ a lerge ba yetɪ: < <Da to'oge-ya ligri gāᅇ ban yeke
ya se'em na. > > ¹⁴Tɪ sudaasi mē soke ē yetɪ: < <Dee tōma, tɪ wun
ēᅇ la wāne? > > Tɪ a yeke ba yetɪ: < <Da to'oge-ya nēra bōᅇ la
pāᅇa bu dōre nēriba to'oge sela. Base-ya tɪ ya yōᅇ la seke ya. > >

¹⁵Tɪ nēriba daan ze gu'ura tɪ Nawēnne fāage ba, la ba wuu daan
sokrɪ la ba mēᅇa bōᅇra tɪ ba bāᅇ, Azā na'an dena Krisi* tɪ ba gu'ura
la bu? ¹⁶La ban tē'esrɪ bela la, tɪ Azā yeke ba yetɪ: < <Mam misri ya
la ko'om puam, la nēra n boe tara pāᅇa gāᅇna mam sēna, la mam
pōn ka mase tɪ m pirge a tagra bɔ ē. ᅇᅇa n wun mise ya Nawēnne
Sia*, la bugum puam. ¹⁷A wun welge nēriba wu nēra n zālɪ pɪ'ᅇᅇ a
nu'usum tɪ a vaage a si zēᅇa yeele ēᅇ a bāare puam, dee yō urgo la,
la bugum n ka kīᅇri. > >

¹⁸Yetᅇᅇ-bāna, la yetᅇᅇa baseba zozo'e tɪ Azā daan dɪke zāsum nēriba

la pa'ale ba Nawēnne kō-yēlga la.

¹⁹La Azā daan zerge naba A'erōdi* me, se'ere n soe la, a daan fāage la a kēema pōga yu'ure n de A'erodiadi di, dee tōm tōon-be'ero baseba zozo'e pa'ase, ti Azā yele ē yeti la ka ān sōṅa. ²⁰La A'erōdi daan yōke Azā ka page me, bela A'erōdi maln tōm la tōon-be'ero pa'ase.

Azezi ko'om misga

(Amatie 3:13-17, Amarki 1:9-11)

²¹Azā n daan misri nērba wuu ko'om puam na, a daan mē mise Azezi me. La Azezi daan pu'usri la Nawēnne, ti saazuum yo'oge, ²²ti Nawēnne Sta sige a zuo, ti ba yē ē ti a wōn na na'adawenne. Ti kōa ze'ele Nawēnne yire yeti: < <Fōn de la mam Dayua ti mam nōṅe la m sūure wuu. Fu paage la mam yem.> >

Azezi yaabdōma

(Amatie 1:1-17)

²³La Azezi n daan pī'ilum a tōoma la, a daan tari la yuuma pitā, ti nērba daan tē'esra ti a de la Azozefu bia.

Azozefu sō daan de la Aheli,

²⁴ti Aheli sō dena Amata,

ti Amata sō dena Alevi,

ti Alevi sō dena Amelki,

ti Amelki sō dena Azanayi,

ti Azanayi sō dena Azozefu,

²⁵ti Azozefu sō dena Amatatiasi,

ti Amatatiasi sō dena Amōsi,

ti Amōsi sō dena Anahum,

tı Anahum sɔ dɛna A'esli,
tı A'esli sɔ dɛna Anagayi,
²⁶tı Anagayi sɔ dɛna Amatı,
tı Amatı sɔ dɛna Amatatıası,
tı Amatatıası sɔ dɛna Asemeyẽ,
tı Asemeyẽ sɔ dɛna Azozɛkı,
tı Azozɛkı sɔ dɛna Azoda,
²⁷tı Azoda sɔ dɛna Azoanã,
tı Azoanã sɔ dɛna Areza,
tı Areza sɔ dɛna Azorobabelı,
tı Azorobabelı sɔ dɛna Asalatıyɛltı,
tı Asalatıyɛltı sɔ dɛna Aneri,
²⁸tı Aneri sɔ dɛna Amelki,
tı Amelki sɔ dɛna Adi,
tı Adi sɔ dɛna Akozam,
tı Akozam sɔ dɛna A'elmadam,
tı A'elmadam sɔ dɛna A'eri,
²⁹tı A'eri sɔ dɛna Azoze,
tı Azoze sɔ dɛna A'eliezɛɛrı,
tı A'eliezɛɛrı sɔ dɛna Azorim,
tı Azorim sɔ dɛna Amata,
tı Amata sɔ dɛna Alevi,
³⁰tı Alevi sɔ dɛna Asimeyõ,
tı Asimeyõ sɔ dɛna Azuda,
tı Azuda sɔ dɛna Azozɛfv,
tı Azozɛfv sɔ dɛna Azonam,
tı Azonam sɔ dɛna A'eliakim,
³¹tı A'eliakim sɔ dɛna Ameleya,

tı Ameleya sɔ dɛna Amena,
tı Amena sɔ dɛna Amatata,
tı Amatata sɔ dɛna Anatã,
tı Anatã sɔ dɛna Adavidi*,
³²tı Adavidi sɔ dɛna Azese*,
tı Azese sɔ dɛna A'obɛɛdɪ,
tı A'obɛɛdɪ sɔ dɛna Aboozɪ,
tı Aboozɪ sɔ dɛna Asala,
tı Asala sɔ dɛna Anaasõ,
³³tı Anaasõ sɔ dɛna Aminadabɪ,
tı Aminadabɪ sɔ dɛna Admẽ,
tı Admẽ sɔ dɛna Arni,
tı Arni sɔ dɛna A'esrɔm,
tı A'esrɔm sɔ dɛna Afarestɪ,
tı Afarestɪ sɔ dɛna Azuda,
³⁴tı Azuda* sɔ dɛna Azakɔbɪ,
tı Azakɔbɪ sɔ dɛna A'izakɪ,
tı A'izakɪ sɔ dɛna Abraham*,
tı Abraham sɔ dɛna Atara,
tı Atara sɔ dɛna Anakɔrɪ,
³⁵tı Anakɔrɪ sɔ dɛna Aseruki,
tı Aseruki sɔ dɛna Arago,
tı Arago sɔ dɛna Afalekɪ,
tı Afalekɪ sɔ dɛna A'ebɛrɪ,
tı A'ebɛrɪ sɔ dɛna Asala,
³⁶tı Asala sɔ dɛna Akayinam,
tı Akayinam sɔ dɛna Arfasadɪ,
tı Arfasadɪ sɔ dɛna Asem,

tɪ Asem sɔ dɛna Anoe*,
tɪ Anoe sɔ dɛna Alemɛkɪ,
³⁷tɪ Alemɛkɪ sɔ dɛna Amatusala,
tɪ Amatusala sɔ dɛna A'enõkɪ,
tɪ A'enõkɪ sɔ dɛna Azaredɪ,
tɪ Azaredɪ sɔ dɛna Amalelelɪ,
tɪ Amalelelɪ sɔ dɛna Akayinam,
³⁸tɪ Akayinam sɔ dɛna A'enõsɪ,
tɪ A'enõsɪ sɔ dɛna Asetɪ,
tɪ Asetɪ sɔ dɛna Adam,
la Nawɛnnɛ n nãam Adam*.

4

Asūtãana make Azezi

(Amatie 4:1-11, Amarkɪ 1:12-13)

¹Azezi daan ze'ele la Zɔrdɛ kulaam lebe, tɪ Nawɛnnɛ Sɪa la kɔ'ɔn bɔna la ẽ. La Nawɛnnɛ Sɪa la tarɪ ẽ sɛŋɛ la weem. ²Bilam tɪ Asūtãana* make ẽ dabsa pinaasɪ. La dabsa pinaasɪ la puam a ka di sɛla sɛla, tɪ a kɔm dõnna. ³Bɛla tɪ Asūtãana yele ẽ yetɪ: << Fv sãn sɪrɪ dɛna la Nawɛnnɛ Dayva, fv yele kugre wã tɪ a lebge dia. >> ⁴Tɪ Azezi lerge ẽ yetɪ: << La gulɛ Nawɛnnɛ gõŋɔ puam yetɪ:

<Nɛrsaala kãn vɔa dia mã'a iyã. > > >

⁵Tɪ Asūtãana tarɪ ẽ sɛŋɛ ka zom tãŋa zuo, pa'alɛ ẽ dũnia so'olum wuu nif-kabsɪɔ puam. ⁶Dee yele ẽ yetɪ: << Bãna wuu de la mam n soe, bɛla mam tã wun bɔ nɛr-seka woo tɪ mam boorɪ mɛ. Mam wun bɔ fɔ dũnia wã na'am la wuu, la so'olum bãma wuu pɛka. ⁷Fv sãn ka dũma tɛŋa nã'ase mam, ba wuu wun dɛna la fõn dɛnnɛ. >> ⁸Tɪ Azezi lerge

ē yetu: < < La gulse Nawēnne yetōga puam yetu:

< Nā'asra Zuudāana Nawēnne,
dee sakra ēṅa ayula mā'a. > > >

⁹Ti Asūtāana le taru ē sēṅe Zerizalem ka zom Wēnde-kāte la zuo ye
ē yetu: < < Fu sān sūri dena la Nawēnne Dayva, fu ze'ele kalam ēke
bisge tēṅa, ¹⁰ti la gulse yetu:

< Nawēnne wun tōm a malekadōma* ti ba gu fo.

¹¹La ba wun kōke fu la ba nu'usi
ti fu kān wē fu nā'are la kugre. > > >

¹²Ti Azezi lerge yetu: < < Nawēnne gōṅṅo ye le tu:

< Da make fu Zuudāana Nawēnne bise. > > >

¹³La Asūtāana n daan make Azezi bela wuu zige koṅe la, a base ē dee
gu'ura la a sān le yē folle.

Azezi n pī'ilum a tōoma Galile tēṅa

(Amatie 4:12-17, Amarki 1:14-15)

¹⁴La Azezi daan lebe Galile la Nawēnne Sia la pāṅa, ti a yu'vre kō'on
saage zē'a wuu. ¹⁵La a ēn zāsna la nērba Nawēnne yetōga Zifdōma*
wēndeto puam, ti ba wuu pēgra ē.

Nazareti nērba ka bō Azezi sira

(Amatie 13:53-58, Amarki 6:1-6)

¹⁶La Azezi daan sēṅe la Nazareti, ban daan uge ē tēn-sēka la. Ti
Zifdōma vo'osgo* daare ti a kē ba wēndem wu ēṅa ēn kē'era se'em
na, yāṅa isge ze'ele ti a karēṅe. ¹⁷Ti ba dīke gōn-sēka ti Nawēnne
nōtō'ōsa A'ezayi* yuun gulse la bō ē. Ti a lake gōṅṅo la yē zē'e-sēka ti a
boori la, yāṅa karēṅe wu zē'a la n ye le se'em na:

¹⁸< < Zuudāana Nawēnne Sia* n boe la mam,

ēŋa n looge mam bɔ mam pāŋa,
 ((ti m bugle sū-sā'aŋɔ dōma sūure,))
 ti m mōole kō-yēlga la bɔ nasdōma,
 dee tōm mam ti m tɔge bɔ yamsɪ ti ba wun yē yolsgo,
 dee tɔge bɔ fɔɔsɪ ti ba nini wun pike,
 dee yese sɛba n boe nāmsgɔ pɔam la base,
¹⁹dee mōole ti wakate paage ya,
 ti Zuudāana wun ēŋe nērba yel-sōnne. > >

²⁰La ēn karēŋe ba'ase la, a lebe lagle gōŋɔ la mɛ bɔ seka n gu'uri
 gōnno la, dee zī'ire*f1*. Tɪ nēr-sɛba wuu n boe wēndeem na bɪsra ē
 zīi. ²¹Tɪ a yele ba yetɪ: << Zina, lɛɛle wā, sela ti ba gulse Nawēnne
 gōŋɔ pɔam ti yāma wōm wā, la ēŋe wu lan yele se'em na. >> ²²Tɪ ba
 tɔge pēge ē, la a yetɔg-sōma la ti a tɔge la di'ige ba mɛ. Dee ti ba
 sɔkra yetɪ, la ka de Azozefu dayɔa la n wāna? ²³Tɪ Azezi yele ba yetɪ:
 << Mam pōn mina ti ya wun make makre ēna bɔ mam yetɪ: < Tum
 dāana, tibe fu mēŋa. > La ya wun ken yele mam yetɪ: < Bōn-sɛba ti
 fu daan ēŋe Kapernaum tēŋam ti tōma wōm na, ēŋe bela nōo fu mēŋa
 tēŋam kalam mē. > > > ²⁴Tɪ Azezi le yele ba yetɪ: << Mam yetɪ ya
 la sira, ti ba ka nannɪ Nawēnne nōtɔ'ɔsa baa ayɪla a mēŋa tēŋam. ²⁵La
 de la sira ti mam yetɪ ya ti: Pɔkōpa zozo'e yuun boe Israyeli tēŋam
 A'eli* wakatum na mɛ, la saaga ka ni yuuma atā la wōr-sɪyoobi, ti
 kɔm yuun ba bɔna tēŋa la wuu pɔam. ²⁶La Nawēnne ka tōm A'eli yetɪ
 a sēŋe pɔkō-bāma zē'am. A tōm ē na pɔkōore n boe Sarepita n boe
 Sidō* so'olum pɔam na zē'am. ²⁷La kōnkɔma* zozo'e yuun boe
 Israyeli tēŋam A'elize wakatum na mɛ, la baa ayɪla ka yē ĩmā'asum,
 la Anāamā seka n yese Siiri so'olum na mā'a n yē ĩmā'asum. >> ²⁸La
 ban wōm bela la, sɛba n boe wēndeego la pɔam wuu sūure daan
 yīige mɛ. ²⁹Tɪ ba isge ve'lege Azezi tēŋa la pɔam yese. Tēŋa la boe la

tāņa zuo. Tī ba tari ē sēņe zē'e-sēka n zāage la tēņa la, ba daan boori ti ba zā'age ē base me ti a lui ki. ³⁰La Azezi kē la nēr-kuvņo la tēņasuka fōrge.

Buraaga ti kulkā'arga tari ē

(Amarki 1:21-28)

³¹Bela poorum, Azezi sēņe la Galile tēņa ayēma yu'vre n de Kapernaum, ti Zifdōma vo'osgo daare daan paage, ti a sēņe ba wēndeem ka zāsna nērba Nawēnne yetoga. ³²Tī a zāsņo la daan di'ige ba, a yetoga la n tari pāņa la īyā. ³³Tī buraa daan bōna wēndeem na ti kulkā'arga* tara ē, ti a fii kaase yetu: ³⁴<<A'a! Azezi n de Nazareti nēra, fōn bēm yelle n boe la tōma? Fōn wa'am ti fu sā'am na tōma? Mam mi fōn de sēka, fōn de la pupeelem dāana n ze'ele Nawēnne zē'am. >> ³⁵Tī Azezi tāse kulkā'arga la yetu: <<Go'oge, yese dee base buraa la! >> Tī kulkā'arga la lube ē nērba la wuu nēņam, dee yese, la a ka pōglum ē. ³⁶Tī ba wuu palēņa ēke ti ba yele taaba yetu: <<Yetoga ēna de la bēm? A tari la pāņa la ke'eņo, dee tāsra kulkā'arsi, ti ba yesra. >> ³⁷Tī Azezi yu'vre saage zē'e-bāma wuu.

Azezi boti nērba zozo'e yē īmā'asum

(Amatie 8:14-17, Amarki 1:29-34)

³⁸Tī Azezi isge ba wēndeego la puam yese ka kē Asimō yire. Tī Asimō dēem-pōka bē'era, ti a īyā ba tulge. Tī ba tōge a yelle bō Azezi, ³⁹ti a sēņe ka suure a zuo, dee tāse bā'a la yetu a base ē. La ēn yele la, bā'a la base ē me, ti a isge tōtō ēņe ba sāano.

⁴⁰Tī wēnne daan bōna mī kē'era, ti ba tari bā'adōma ti bā'asi buuri to'oto'ore tari ba, sēņe Azezi zē'am. Tī Azezi dūke a nu'usi pagle ba nēra woo zuo, ti ba wuu yē īmā'asum. ⁴¹La kulkā'arsi daan yesri me

dee basra nērba zozo'e, dee kaasra yeti: <<Fōn de la Nawēnne Dayua.>> Tı Azezi tāse ba, ka base ti ba tɔge sɛla sɛla, se'ere n soe la, ba daan bānje ti a de la Krisi n de Fāagra la.

Azezi mōoli Nawēnne kō-yēlga Zifdōma wēndeto puam

(Amarkı 1:35-39)

⁴²Tı beere wiige, ti Azezi yese tēnja la puam sēnje zē'e-seka ti nēra ka boe mī. Tı nērba zozo'e ɛera ẽ. La ba daan yē ẽ me, bɔɔra ti ba gu ẽ ti a da le yese ba zē'am. ⁴³La Azezi yele ba yeti: <<Dēni ti mam mōole kō-yēlga pa'ale Nawēnne so'olum* n ān se'em tēnsi baseba mē puam, la de la bela iyā ti Nawēnne tōm mam.>> ⁴⁴La a ẽn mōola kō-yēlga la Zifdōma wēndeto puam me.

5

Azezi wi a pɔspɔsi karēnbiisi

(Amatie 4:18-22, Amarkı 1:16-20)

¹Daare ayula Azezi ze la Zenezareti mōgre nōorum, ti nēr-kuvɔɔ kaage ẽ mikra taaba bɔɔra ti ba wōm Nawēnne yetɔga. ²Tı a yē òornɔ bayi n ze mōgre la nōorum, ti zūn-yōgrɔba sige pɛera ba yugsi dee base. ³La òornɔ ayula daan de la Asimō bōnɔ. Tı Azezi kē òornɔ la puam, dee yele Asimō yeti: <<Mōm òornɔ la ti a sēnje nēnja fēe.>> La Azezi n yele bela la, Asimō mōm òornɔ la me, ti a lebe ko'om puam fēe. Tı Azezi zı'ire òornɔ la puam pa'ale nērba la.

⁴La ẽn pa'ale ba ba'ase la, ti a yele Asimō yeti: <<Mōm òornɔ la ti a sēnje kulko'om ti ya lobe yugsi la.>> ⁵Tı Asimō lerge ẽ yeti: <<Zuudāana, tōma nāmse me yu'ɔnɔ wā wuu dee ka yōke sɛla sɛla. La fōn yele la iyā, ti wun lobe ti yugsi la.>> ⁶Tı ba sēnje kulko'om

ka lobe ba yugsi la, yāṅa yōge zūma ba zo'oge, ti ba yugsi la zıgra la ba āasum. ⁷Ti ba yıbse ba taaba ḡornɔ ayula la puam yeti, ba wa'am sōṅe ba. La ba taaba la sēṅe me ka sōṅe ba, ti ba pure ḡornɔ bayi la wuu la zūma, halı ti ba zıgra la ba mise. ⁸La Asimō yu'vre ayula n de Apıyεeri n yē bela la, ti a ka dūma tēṅa Azezi nēṅam yele ē yeti: < < Zuudāana, fōrge mam zē'am, se'ere n soe la, mam de la tōon-be'ero dāana. > > ⁹Se'ere n soe ti Apıyεeri yele bela la, ēṅa la a taaba la n daan yē zūma la ti ba yōge se'em na botı ba palēṅa n ēke. ¹⁰La dabeem mē n daan kē Azebede dayɔɔsi Azakı la Azā n daan ēn dɔla la Asimō tōnna la. Ti Azezi yele Asimō yeti: < < Da zoe dabeem, ti lan sēṅe zına we'esa wuu, fu wun εera la nērba ti ba dɔla mam wu yāma n yōgrı zūma se'em na. > > ¹¹La Azezi n yele bela la, ba tarı ḡornɔ la dooge me yāṅa base sela woo dee dɔla Azezi.

Azezi botı kōnkonne yē ĩmā'asum

(Amatie 8:1-4, Amarkı 1:40-45)

¹²La Azezi daan boe la tēṅa ayēma puam, ti buraa mē bɔna mı dena kōnkonne*, la bā'a la kē a ĩyā zo'oge me. Ti a yē Azezi ka ka dūma Azezi nēṅam dıke a nēṅa vōgle tēṅa sose ē yeti: < < Zuudāana, fu sān bɔɔra, fu tā wun base ti m yē ĩmā'asum me le āna sōṅa. > > ¹³Ti Azezi tēege a nu'ugo kalum ē dee yeti: < < Mam bɔɔra, yē ĩmā'asum le āna sōṅa. > > Ti bā'a la base ē bilam mēṅa.

¹⁴Ti Azezi yele ē yeti: < < Da kān yele nēra nēra, la sēṅe Nawēnne kāabgɔ* kēema zē'am ka pa'ale ē fu mēṅa ti a bise, dee bɔ Nawēnne sela ti Amoyisi* yuun gulse yeti ba bɔ la, ti la pa'ale ba ti fu sıri yē ĩmā'asum. > > ¹⁵La bela wuu, Azezi yelle daan malın saage la zē'estı zozo'e, ti nērba zozo'e lagsε ti ba selse a yetɔga la, dee ti a botı ba bā'adōma yē ĩmā'asum. ¹⁶La Azezi ēn sēnna la zē'e-sεka ti nērba ka

boe la pu'usra Nawēnne.

Azezi boti kōwrjō isge sēnna

(Amatie 9:1-8, Amarki 2:1-12)

¹⁷La daare ayula ti Azezi bōna mī pa'ala nērba Nawēnne yetōga, ti Farisi* dōma, la Nawēnne lōw* karēnsāandōma n ze'ele Galile, la Zude, la Zerizalem mē zēa mī selsra. Tī Zuudāana Nawēnne pāṇa daan bōna la Azezi, ti a boti bā'adōma yē ĩmā'asum. ¹⁸Tī buraasi zē bura n de kōwrjō gā a bōn-gā'ala puam wa'am. La ba boori ti ba tarī ē kē la de-seka ti Azezi boe mī na puam, ka bīje ē Azezi nēṇam. ¹⁹La nērba la mike mē, ti ba ka yē folle tarī ē kē. Bela ĩyā ti ba zē kōwrjō la zom gōsgō, ka lake gōsgō la bōbre ayula, doose bilam sike ē la a bōn-gā'ala la nērba la sukam bīje ē Azezi nēṇam.

²⁰Tī Azezi yē ban bō ēṇa sira se'em na, yele kōwrjō la yeti: < < M sure, fu tōon-be'ero taale ka le bōna fu zuo. > > ²¹Tī Nawēnne lōw karēnsāandōma, la Farisi dōma la tē'esra yeti: < < A tē'esē ti ēṇa de la āne tōgra pō'ora Nawēnne. Ane n tā wun base nēra tōon-be'ero taale, sān dagna Nawēnne mā'a? > > ²²Tī Azezi bāṇe ban tē'esri se'em na, soke ba yeti: < < Bēm ti ya tē'esra wāna wā? ²³Bēm n de nāana gānna, mam sān yele kōwrjō la yeti, a tōon-be'ero taale ka le bōna a zuo n de nāana, bu mam sān yele ē yeti, a isge sēnna n de nāana? ²⁴Bela m wun boti ya bāṇe ti Nērsaala Dayva*f2* la tarī pāṇa dūnia zuo wun base nērba tōon-be'ero taale. > > A yele bela dee yele kōwrjō la yeti: < < Mam yeti fu ti fu isge dīke fu bōn-gā'ala la kule. > > ²⁵Bilam mēṇa ti kōwrjō la isge ba wuu nēṇam dīke a bōn-gā'ala la kulla, dee pēgra Nawēnne. ²⁶Tī nērba la wuu palēṇa ēke, ti dabeem kē ba, ti ba pēgra Nawēnne yeti: < < Tī zīna yē bōn-yālma. > >

Azezi wi Alevi tu a dɔla ẽ

(*Amatie 9:9-13, Amarkı 2:13-17*)

²⁷Bela poorum tu Azezi yese s̃eɣe ka yẽ lampo-tɔ'ɔsa yu'ure n de Alevi*, tu a zĩ lampo to'osgo deem. Tı a yele ẽ yetı: < < Isge dɔla mam. > > ²⁸Tı a isge base s̃ela woo dee dɔla ẽ. ²⁹Tı Alevi dıge dia zo'oge ẽɣe kibsa a yire bɔ Azezi, tu ẽɣa la lampo-tɔ'ɔsrıba, la ñerba zozo'e z̃ea dita. ³⁰Tı Farisi d̃oma baseba, la ba lɔɔ kar̃ens̃and̃oma ỹonna Azezi kar̃enbiisi la yetı: < < B̃em ıỹa tu ỹama lagum na lampo-tɔ'ɔsrıba*, la t̃oon-be'ero d̃oma dita? > >

³¹Tı Azezi lerge ba yetı: < < Ñer-seba n tarı ım̃a'asum ka eerı tıba. S̃eba n b̃e'eri n eerı tıba. ³²Mam ka wa'am d̃unia zuo seba d̃oma n yetı b̃ama mase ya la ıỹa, mam wa'am tu m yele la t̃oon-be'ero d̃oma tu ba teege yem base t̃oon-be'ero. > >

Ba soke Azezi ñoorıva yelle

(*Amatie 9:14-17, Amarkı 2:18-22*)

³³Tı ñerba la yele Azezi yetı: < < Az̃a kar̃enbiisi, la Farisi d̃oma kar̃enbiisi ẽn lıta ñore me dee pu'usra Naw̃enne, dee tu f̃on kar̃enbiisi dita dee ỹuura. > > ³⁴Tı a lerge ba yetı: < < Ñera n di p̃aka ẽɣe kibsa, tu a tad̃and̃oma b̃ona mı tu ba naage la ẽ di kibsa la, ỹama wun sake tu ba lu ñore me dee tu p̃ogdita la ken b̃ona ba z̃e'am bu? ³⁵Aỹei. La wakate wun wa'am tu ba wun yese p̃ogdita la ba z̃e'am, wakat-ẽɣa tu ba ỹaɣa wun lu ñore. > > ³⁶Tı Azezi le make makre bɔ ba yetı: < < Ñera k̃an āage fu-paale dıke lige fu-k̃eka. A s̃an ẽɣe bela, a wun s̃a'am fu-paale la me, la t̃an-paale la k̃an mase la fu-k̃eka la. ³⁷La ñera m̃e k̃an dıke d̃a-paalga s̃um wɔ-k̃egsı puam. A s̃an ẽɣe bela, d̃a-paalga la s̃an kella, ba wun botı wɔɔsı la t̃ase me. Bela d̃am na wun ka'age me s̃a'am, tu wɔɔsı la m̃e s̃a'am.

³⁸La mase ti ba dıke dā-paalga sūm na wɔ-paalsı puam. ³⁹La nēra sān yū dā-kēka n kele la, a ka le bɔɔra dā-paalga. A wun yetı, dā-kēka la n ān sōŋa. > >

6

Vo'osgo daare yelle

(Amatie 12:1-8, Amarkı 2:23-28)

¹Zıfdōma vo'osgo* daare ayula ti Azezi la a karēnbiisi dɔla vato puam tɔlla, ti a karēnbiisi kɔ si wēena ɔbra. ²Tı Farisi* dōma nēba baseba yē ban ēŋe bela la, yele ba yetı: < < Bēm ti yāma ēŋe sela n sisri tōma vo'osgo daare? > >

³Tı Azezi lerge soke ba yetı: < < Yāma ka karēŋe Adavidi* la a nēba la kɔm n yuun dōnnı ti Adavidi ēŋe se'em na? ⁴A yuun kē la Nawēnne deego puam dıke borborı seba ti ba bıŋe bɔ Nawēnne na obe. La sisri mē, nēra nēra ka obrı ba, sān dagna Nawēnne kāabgɔ* kēma la mǎ'a. La Adavidi yuun obe borborı bāma mē, dee bɔ a nēba la ti ba obe. > > ⁵La Azezi ken yele ba mē yetı: < < Nērsaala* Dayva la n soe vo'osgo daare. > >

Buraa nu'ugo n ki, ti Azezi botı a yē ĩmǎ'asum

(Amatie 12:9-14, Amarkı 3:1-6)

⁶Vo'osgo* daare ayēma ti Azezi kē Zıfdōma wēndeem zāsna nēba Nawēnne yetɔga. Tı buraa daan bɔna mǐ, ti a zuvgɔ nu'ugo ki. ⁷Tı Nawēnne lɔɔ* karēnsāandōma, la Farisi dōma la daan busra Azezi wun botı nēra la yē ĩmǎ'asum vo'osgo daare la bu, a kǎn botı a yē ĩmǎ'asum. Se'ere n soe la, ba daan eerı la so-seka ti ba wun yetı a sǎ'am bāma sisgo dōre ē. ⁸Tı Azezi bāŋe ba tē'esgɔ la, yele buraa la

nu'ugo n ki la yeti: < < Isge ze'ele nērba la tēņasuka. > > Tı a isge ze'ele. ⁹Tı Azezi yele ba yeti: < < Mam yeti m soke ya me buse, sore boe ti nēra ēņe sōņa vo'osgo daare bu, a ēņe be'em? Sore boe ti a fāage nēra vo'osgo daare bu, a ku ē? > > ¹⁰Dee buse ba wuu kaage, dee yele buraa la yeti: < < Tēege fu nu'ugo la. > > Tı a tēege a nu'ugo la, ti a nu'ugo la yāņa tēege āna sōņa. ¹¹Tı ba sūnsōa yīige halı ti ba bānna ban wun ēņe Azezi se'em.

Azezi looge a karēnbiisi pia la ayi

(Amatie 10:1-4, Amarkı 3:13-19)

¹²La wakat-ēņa ti Azezi daan sēņe ka zom tāņa zuo ti a pu'vse Nawēnne, bōna bilam pu'usra Nawēnne yu'vņo wuu. ¹³Tı beere wiige, ti a wi a karēnbiisi la, ti ba wa'am a zē'am. Tı a looge karēnbiisi pia la ayi bāma puam. Bāma n de nēr-seba ti a wun tōm na. ¹⁴Ba daan de la Asimō ti Azezi sı a yu'vre ti Apyeeri, la A'āndre n de Apyeeri yıbga, la Azakı, la Azā, la Afilipi, la Abatelemi, ¹⁵la Amatie, la Atoma, la Azakı sēka n de Alfe bia la, la Asimō sēka n daan de Zelotı* nēra ayıla la, ¹⁶la Azudaası n de Azakı bia la, la Azudaası Iskariyo sēka n wun zām Azezi la.

¹⁷La Azezi la a karēnbiisi la ze'ele la tāņa la zuo sige zē'e-sēka n naage taaba. La a karēnbiisi baseba zozo'e, la nēr-kuvņo zozo'e n yese Zude, la Zerizalem, la Tiiri* la Sidō so'olum n boe ko-kāte nōorum na n lagse bilam. ¹⁸Ba wa'am ti ba selse la Azezi yetōga, dee ti a bō ba bā'adōma ĩmā'asum. La nērba baseba n daan boe mı ti kulkā'arsı dōla ba, ti ba daan yē ĩmā'asum. ¹⁹Tı nēr-kuvņo la wuu eera ti ba kalum ē, se'ere n soe la, pāņa n yesrı a puam bō'bra ba wuu ĩmā'asum.

Zu-yēlga la toogo yelle

(Amatie 5:1-12)

²⁰Ti Azezi gorge bise a karēnbiisi la yeti: < < Yāma seba n de nasdōma la tari zu-yēlga, se'ere n soe la, Nawēnne so'olum* de la ya bōnɔ. ²¹Yāma seba kɔm n dōnni lēle wā tari zu-yēlga, se'ere n soe la, ya wun ka di seke. Yāma seba n kaasri lēle wā tari zu-yēlga, se'ere n soe la, ya wun ka la'ara. ²²Yāma seba ti nērba sisri ya, dee bokra ya, tvura ya, dee ka nanna ya wu ya de la tōon-be'ero dōma, mam n de Nērsaala* Dayva la iyā la, tari zu-yēlga. ²³Wakat-seka ti ba iti yāma bela la, ēŋe-ya sū-yēlga srum, se'ere n soe la, ya wun yē yɔɔɔ zo'oge me Nawēnne yire*. Bāŋe-ya ti ba yaabdōma yvun ēŋe Nawēnne nōtɔ'ɔsrɪba la bela.

²⁴La yāma seba n de bōntatba la wun yē toogo, yāma n pōn yē bōn-sōma la iyā. ²⁵La yāma seba n tari sela woo lēle wā ti la seke la, wun yē toogo, se'ere n soe la, ya wun ka sēna la kɔm. La yāma seba n la'ari lēle wā wun yē toogo, se'ere n soe la, ya sūure wun ka sā'am ti ya kaase. ²⁶La yāma seba ti nērba wuu pēgrɪ ya la, wun yē toogo. Bāŋe-ya ti ba yaabdōma mē yvun pēgrɪ nōtɔ'ɔs-seba n de pōmpɔrndōma la bela. > >

Nōŋe-ya ya be'eba

(Amatie 5:38-48, 7:12)

²⁷Azezi le yele ba yeti: < < La mam yeti yāma seba n selsri mam wā ti, ya nōŋe ya be'eba, la seba n sisri ya la, ya ita ba sōŋa. ²⁸La ya kā'ara kā'a-sōma bɔ'ɔra seba n kā be'em bɔ'ɔra ya la, dee pu'usra Nawēnne bɔ'ɔra seba n iti ya be'em na. ²⁹Nēra sān wē fu pēka ayɪla, fu base ti a wē ayēma la pa'ase. La nēra sān fāage fu fu-kāte, fu base ti a to'oge fu fu-pika pa'ase. ³⁰La nēra sān sose fu sela, fu bɔ ē. La nēra sān dɪke sela n de fu bōnɔ, fu da yeti a bɔ fɔ fu bōnɔ na. ³¹La yāma n boori ti nērba ita bōn-seba bɔ'ɔra ya la, ya mē ita bela bɔ'ɔra ba.

³²La ya sãn nõņę seba n nõņę ya la mã'a, Nawẽnne wun bɔ ya sela me bu? Baa la tɔon-be'ero dɔma nõņę seba n nõņę ba me. ³³La ya sãn uta seba n uti ya sɔņa la mã'a sɔņa, Nawẽnne wun bɔ ya sela me bu? Baa la tɔon-be'ero dɔma uti la bela. ³⁴La ya sãn peņra seba ti ya tẽ'esru ti ba wun yẽ lebose ya la, Nawẽnne wun bɔ ya sela me bu? Baa la tɔon-be'ero dɔma peņri tɔon-be'ero dɔma me dee le tɔ'ɔsra bela.

³⁵La, la sãn dena yãma, nõņę-ya ya be'eba, dee eņę ba sɔņa. Peņe-ya nẽrba dee da tẽ'esra ti ba le bɔ ya. Ya sãn eņę bela, ya yɔɔɔ wun zo'oge me, la ya wun dena Nawẽnne n gãnni sela wuu kɔma, se'ere n soe la, a uti seba n ka mi yel-sɔnne, la putvul-dɔma sɔņa me. ³⁶Zɔta-ya nẽrba ninbãalga, wu ya Sɔ Nawẽnne n zoti nẽrba ninbãalga se'em na. > >

Da zergra-ya taaba

(Amatie 7:1-5)

³⁷< < Da tɔgra-ya nẽra yelle yeti a eņę be'em, ti Nawẽnne mẽ kãn tɔę ya yelle yeti ya eņę be'em. Da zergra-ya nẽrba, ti Nawẽnne mẽ kãn zergę ya. Base-ya taaba taale, ti Nawẽnne mẽ wun base ya taale. ³⁸Bɔ-ya ya taaba, ti Nawẽnne mẽ wun bɔ ya. Nawẽnne wun bɔ ya zo'oge wu ban dıke wan-kãte make pure sɔņa ti la saara. Bɔn-sęka ti yãma dıke make bɔ ya taaba la, bɔn-ẽņa ti Nawẽnne mẽ wun dıke make bɔ ya. > >

³⁹Ti Azezi daan make makre bɔ ba yeti: < < Fva tã wun ve'ege fva me ti ba wuu kãn lui boko puam? ⁴⁰Karẽnbia ka gãnni a karẽnsãama, la karẽnbia sãn zãsum sela woo ba'ase, a ãn wu a karẽnsãama la.

⁴¹Bẽm ti fu bısra sɔkɔ n boe fu sɔbia nifum, dee ka bısra dɔɔgɔ n boe fu mẽņa nifum na? ⁴²Fɔn eņę la wãne yeti fu sɔbia yeti, a base ti fu yese sɔkɔ a nifum, dee ka bısra dɔɔgɔ n boe fu mẽņa nifum?

Pulibsum dāana, dēņe yese dōwɔ la fu mēņa nifum, dee yāņa tā'age
yē sōņa yese sōkɔ la n boe fu sōbia nifum na. > >

Tɪa woo la a biε

(Amatie 7:16-20, 12:33-35)

⁴³< < Tɪ-sōņɔ ka wōnnɪ biε be'ero. Tɪ-be'ego mē ka wōnnɪ biε sōma.
⁴⁴Ba bāņri tustɪ wuu la ba biε pɔam. Gō'osɪ kān wɔm kēnkāma, la
kēkɔ mē kān wɔm tā'ama.

⁴⁵Nēr-sōņɔ sūure n ān sōņa botɪ a tɔgra la bōn-sōma, la nēr-be'ego
sūure n ka ān sōņa botɪ a tɔgra la bōn-be'ero. Se'ere n soe la, bōn-
sēba n boe nērsaala sūurum n yesrɪ a nōorum. > >

Nawēnnε yetɔga sakrε yelle

(Amatie 7:24-27)

⁴⁶< < Bēm ĩyā tɪ yāma wi'ira mam tɪ < Zuudāana, Zuudāana >, dee
ka ita mam n yetɪ ya ita se'em na? ⁴⁷Nēr-sēka woo n sēm mam zē'am,
dee selsra mam yetɔga, dee sakra ita mam n yeke se'em na, mam wun
pa'ale ya ēņa dāana n ān se'em: ⁴⁸A ān wu nēra n boortɪ tɪ a mē a yire,
tū paage tāmpīa, ēebe a yire tāmpīa la zuo. Tɪ saaga ni, tɪ ko'om purε
kulsɪ zoe wē yire la, tɪ a ka lui, ēn mē sōņa la ĩyā. ⁴⁹La nēr-sēka n
wōnnɪ mam yetɔga, dee ka ita mam n yeke se'em na, ān wu nēra n
mē a yire tēntōnnɔ zuo, dee ka tū ēebe. Tɪ saaga ni, tɪ ko'om purε
kulsɪ zoe wa wē yire la, tɪ a kɔ'ɔn lui saam saam. > >

7

Azezi botɪ Rom suda-ke'ema tōntōnna yē ĩmā'asum

(Amatie 8:5-13)

¹Azezi tɔge bela wuu bɔ nērba la ba'ase, dee sēņe la Kapernaum. ²Tɪ

Rom* suda-ke'ema bɔna mĩ tara a tɔntɔnna tɪ a nɔŋɛ. Tɪ tɔntɔnna la bẽ'era dee la a ki. ³Tɪ suda-ke'ema la wɔm Azezi yelle, tɔm Zifdɔma kẽma baseba a zẽ'am tɪ ba sose ẽ yeti, a wa'am wa botɪ a tɔntɔnna la yẽ ãmã'asum. ⁴Tɪ ba sɛŋɛ Azezi zẽ'am ka tii belem ẽ yeti: <<Buraa la de la nẽr-sɔŋɔ. ⁵A nɔŋɛ tɔma buuri mɛ, la ɛŋa n mẽ wẽndeego bɔ tɔma. Bela ãyã, mɔrgɛ sɔŋɛ ẽ.>> ⁶Tɪ Azezi dɔla ba wɛ'esa ka lem yire la, tɪ suda-ke'ema la le tɔm a sɪrdɔma tɪ ba yele ẽ yeti:
 <<Zuudãana, da nãmse fu mɛŋa. Mam ka narɪ tɪ fu wa'am mam yire, ⁷bela ãyã tɪ mam tẽ'ese yeti mam mɛŋa ka narɪ tɪ m wa'am fɔn zẽ'am. Wen tɔge yetɔga mã'a, tɪ m tɔntɔnna la wun yẽ ãmã'asum.
⁸Se'ere n soe la, nẽrba n soe mam, la mam mẽ soe la sudaasi baseba. Mam sãn yele suda-sɛka yeti: <Sɛŋɛ>, a wɛ'esɪ mɛ. La mam sãn yele ayẽma yeti: <Wa'am>, a sɛm mɛ. Mam sãn yele m tɔntɔnna yeti: <Ëŋɛ wãna>, a tɪ mɛ.>> ⁹Azezi n wɔm bela la, la daan di'ige ẽ mɛ, tɪ a wɛrgɛ yele nẽr-sɛba n dolɪ ẽ na yeti: <<Mam yeti yãma mɛ tɪ mam nãn ka yẽ nẽra n bɔ mam sɪra wu bura-ɛna wã, baa lsrayɛlɪ buuri la puam mam ka yẽ.>> ¹⁰Tɪ suda-ke'ema la n tɔm sɛba la lebe a yire ka yẽ tɪ tɔntɔnna la tarɪ ãmã'asum.

Azezi botɪ pɔkɔore bia vo'oge

¹¹Bela poorum, Azezi wɛ'esɪ la tɛŋa ayula yu'ure n de Nayin, tɪ a karɛnbiisi, la nẽrba zozo'e dɔla ẽ. ¹²La Azezi paage tɛŋa la nɔorum, tu'vse la nẽrba n zɛertɪ budibla n ki wɛ'esa tɪ ba ka laage. Budibla la ma de la pɔkɔore. La a bia de la ɛŋa mã'a. Tɪ tɛŋa la nẽrba zozo'e daan kɔlge ẽ dɔla wɛ'esa. ¹³La Zuudãana Azezi n yẽ pɔkɔore la, tɪ a ninbãalga yɔke ẽ, tɪ a yele ẽ yeti: <<Da kɛlla.>> ¹⁴A yele bela dee sɛŋɛ paage kalum na sãŋandɛ la, tɪ nẽr-sɛba n zɛertɪ kũm na ze'ele, tɪ a yele kũm na yeti: <<Budib-polle, mam yeti fu tɪ fu isge.>> ¹⁵Tɪ

sɛka n ki la vo'oge isge zĩ'ire, yãŋa tɔgra. Tɪ Azezi ye le a ma la yeti:
< <Fu bia n bɛla. > > ¹⁶Tɪ dabeem kɛ ba wuu, tɪ ba pɛgra Nawɛnne
yeti: < <Nawɛnne nɔtɔ'ɔs-kãte n wa'am tɔma zɛ'am. > > Dee le yeti:
< <Nawɛnne n wa'am tɪ a sɔŋe a nɛrba. > > ¹⁷Tɪ yetɔga la saage
Zude so'olum, la tɛn-sɛba n lɛm na wuu, tɪ ba wɔm Azezi n ɛŋe se'em.

Azã n mise nɛrba ko'om puam tɔm a karɛnbiisi Azezi zɛ'am

(Amatie 11:2-19)

¹⁸Tɪ Azã karɛnbiisi tɔge bɔn-bãma wuu pa'ale ɛ. Tɪ Azã wi a
karɛnbiisi bayi ¹⁹tɔm ba Zuudãana Azezi zɛ'am, tɪ ba ka soke ɛ yeti:
< <Fɔn de la sɛka tɪ Nawɛnne yeti a wun wa'am na bu, tɪ gu'ura
nɛra ayɛma? > > ²⁰Tɪ karɛnbiisi la sɛŋe ka paage Azezi zɛ'am ye le ɛ
yeti: < <Azã sɛka n mise nɛrba ko'om puam na n tɔm tɔma yeti, tɪ
soke fu bise, fɔn de sɛka tɪ Nawɛnne yuun yeti a wun wa'am na bu, tɪ
gu'ura nɛra ayɛma? > > ²¹Wakat-ɛŋa Azezi daan botɪ bã'adɔma
zozo'e tɪ bã'asɪ to'oto'ore tari ba, la sɛba tɪ kulkã'arsɪ dolɪ ba n yɛ
ĩmã'asum, dee botɪ fɔɔsɪ zozo'e nini yɛta. ²²Tɪ Azezi lerge sɛba tɪ Azã
tɔm na yeti: < <Sɛŋe-ya ka ye le Azã yãma n yɛ bɔn-sɛba, dee wɔm
se'em na wuu: Fɔɔsɪ nini yɛtɪ mɛ, tɪ kɔɔrnɔ sɛnna, tɪ kɔnkɔma* yɛ
ĩmã'asum le ãna sɔŋa, tɪ wansɪ wɔnna, tɪ kũm vɔ'ɔra, tɪ nasdɔma
wɔnna Nawɛnne kɔ-yɛlga. ²³La nɛr-sɛka n ka lebrɪ poorum mam ãyã
tari zu-yɛlga. > >

²⁴Sɛba tɪ Azã tɔm na lebe kule mɛ. Tɪ Azezi yãŋa tɔge nɛrba la Azã
yelle yeti: < <Yãma daan sɛŋe mɔom tɪ ya ka bise la bɛm? Yãma
sɛŋe ka bise la mɔogɔ tɪ kusebgo mĩini bu? Ayei. ²⁵La bɛm tɪ yãma
sɛŋe ka bise? Yãma sɛŋe ka bise la nɛra n ye fu-sɔma bu? Ayei. Nɛr-
sɛba n yeeri fu-sɔma dee tari bɔn-sɔma la, kɛ'eri la na'adɔma yie
puam. ²⁶La yãma sɛŋe ka bise la bɛm? Ya sɛŋe ka bise la Nawɛnne

nōtɔ'ɔsa bu? Ee. La mam yeti ya ti a de la nēra n gānni Nawēnne nōtɔ'ɔsa. ²⁷La de la ēṅa yelle ti la gulse Nawēnne gōṅɔ puam ti Nawēnne yeti:

< Mam tōntōnna n wāna

ti mam tōm ti a dēṅe fu nēṅa malge sore bɔ fɔ. >

²⁸Mam yeti ya ti nērsaalba ti ba dɔge la wuu puam, nēra ka boe n gānni Azā, la nēr-seka n de pika Nawēnne so'olum* na puam gānni Azā me.

²⁹La nērba la wuu, baa la lampo-tɔ'ɔsrɔba* la n wōm Azā yetɔga la, ba base ti Azā mise ba ko'om* puam me. Bela pa'ali me ti ba sake me ti Nawēnne n tarɔ sira. ³⁰La Farisi* dōma, la Nawēnne lɔɔ* karēnsāandōma n zagse ti Azā ka mise ba ko'om puam na, ba zagse la bōn-seba ti Nawēnne yeti a ēṅe bɔ ba la. > >

³¹Ti Azezi le yeti: < < Bēm ti mam wun duke make la zamāan-ēna wā nērba n uti se'em na. Ba ɔrgɔ wōn na bēm? ³²Ba ān wu kɔma n zɪ da'am wi'ira taaba yeti: < Tōma peebe wusɪ me, ti yāma zagse ka wa. Ti tōma yōom kuvre yōoma, ti yāma ka kella. > ³³Se'ere n soe la, Azā n misri nērba ko'om puam na wa'am me wa luta nōore, dee ka yūura dāam, ti ba yeti kulkā'arga n doli ē. ³⁴Ti Nērsaala Dayva*f3* la wa'am wa dita dee yūura, ti ba yeti, a de la dita, la dā-yūura, la lampo-tɔ'ɔsrɔba la tōon-be'ero dōma sɪre. ³⁵Nēr-seba n sakri Nawēnne yem n boori se'em na n mi ti a tarɔ yem. > >

Azezi boe Asimō yire

³⁶Farisi nēra ayɔla yu'vɔre n de Asimō n daan wi Azezi ti a wa'am ēṅa yire ti ba di. Ti Azezi sēṅe yire la ka zɪ'ire bɔna mɪ ti a di. ³⁷La pɔka n boe tēṅa la puam tōnna yalsɪ tōoma. La pɔka la n wōm ti Azezi boe Farisi nēra la yire dita la, ti a tarɔ albatɪ* dugla n purɛ la tɪdare kaam

yūuŋo n ān sōŋa wa'am Azezi zē'am. ³⁸Yāŋa ze'ele lem Azezi nāma bɔba kella. Tɪ a nintām yesra tɔgra Azezi nāma zuo. Tɪ pɔka la suure duuse Azezi nāma la, la a zomto, dee kɔke a nāma la, sōoge ba la tɪdare kaam na.

³⁹Tɪ Farisi nēra la n wi Azezi la yē bela, tē'esē yetɪ: < < Bura-ēna sān dena Nawēnne nōtɔ'ɔsa, a wɔn bāŋe nɪ pɔg-ēna n kalum ē wā n de nēr-seka, a wɔn bāŋe nɪ tɪ a tōnnɪ la yalsɪ tōoma. > >

⁴⁰Tɪ Azezi yele ē yetɪ: < < Asimō, mam tarɪ la sela tɪ m yele fo. > > Tɪ Asimō lerge ē yetɪ: < < Karēnsāama, yele! > > ⁴¹Tɪ Azezi yele ē yetɪ: < < Nēra n daan boe tɪ nērba bayi tara a sānne. Nēra ayɪla sānne de la lig-kōba*f4* kɔbsnuu. Tɪ ayēma la mē sānne dena lig-kōba pinuu. ⁴²Tɪ ba daan ka tāna wɔn yɔ ē a ligri la. Tɪ a base ligri la bɔ ba. Bāma bayi la, āne n wɔn nōŋe ligri la dāana gāna? > > ⁴³Tɪ Asimō lerge ē yetɪ: < < Mam tē'esē tɪ seka sānne n zo'oge la. > > Tɪ Azezi yele ē yetɪ: < < Fōn lerge se'em na de la sɪra. > > ⁴⁴Dee gelge bɪsē pɔka la, yele Asimō yetɪ: < < Fōn yē pɔka wā? Mam n kē fōn yire la, fōn ka bɔ mam ko'om tɪ mam peege m nāma. La pɔka la peege mam nāma mē la a nintām, dee duuse ba la a zomto. ⁴⁵Fōn ka kɔke mam tɪ la pa'ale tɪ fɔ to'oge mam sōŋa. La mam n kē'em na, pɔka la kɔke mam nāma mē ka base. ⁴⁶La fōn ka nā'ase mam ēŋe kaam mam zuugo, la a sōoge mam nāma mē la tɪdare kaam. ⁴⁷Bela īyā tɪ mam yele fɔ yetɪ, Nawēnne base a tōon-be'ero n zo'oge la taale mē. Bela n soe tɪ a nōŋre la zo'oge. La nēr-seka tɪ Nawēnne base a tōon-be'ero taale fēfēe la, a nōŋre mē de la fēe. > >

⁴⁸Azezi yele bela, dee yele pɔka la yetɪ: < < Fɔ tōon-be'ero taale ka le bɔna fɔ zuo. > > ⁴⁹Tɪ seba n daan diti la ē na tɔgra la taaba sɔkra yetɪ: < < A tē'esē tɪ ēŋa de la āne base nērba tōon-be'ero taale? > > ⁵⁰Tɪ Azezi yele pɔka la yetɪ: < < Fōn bɔ mam sɪra la īyā n fāage fɔ

base. Sēņe la sū-mā'asum. > >

8

Pɔgsɪ n dolt Azezi

¹Bela poorum, Azezi sēņe la tēn-kāra, la tēn-pɔgsɪ puam ka mōola Nawēnne so'olum* kō-yēlga. Tɪ a karēnbiisi pia la ayi la dola ē. ²La pɔgsɪ baseba n mē daan dolt ē. La kulkā'arsɪ, la bā'asɪ n daan nāmsrɪ pɔg-bāma, tɪ Azezi botɪ ba yē ĩmā'asum. Pɔgsɪ la ayɪla yu'ure de la Amaari n yese Magdala, ēņa tɪ kulkā'arsɪ bayopɔɪ daan yese dee base ē na. ³La ayēma yu'ure de la Azanɪ. Eņa de la Asuza n bɪsrɪ naba A'erɔdɪ* yire yelle la pɔga. La ayɪla yu'ure de la Asuzanɪ. Pɔg-bāna, la pɔgsɪ zozo'e n tarɪ ba mēņa lɔgrɔ sōņra Azezi la a karēnbiisi la.

Nēra n yese tɪ a lobge a bōnbuuri makre

(Amatie 13:1-23, Amarkɪ 4:1-20)

⁴La nēra n ze'ele tēnsɪ to'oto'ore sēnna Azezi zē'am. Nēra la n daan lagse zo'oge pāɪ la, tɪ Azezi make makre bɔ ba yetɪ: ⁵< <Kaara n daan yese tɪ a lobge a bōnbuuri. Ĕņa n boe mĩ lɔbgra la, tɪ bōnbuuri la baseba lui sore zuo tɪ nēra nē ba, dee tɪ niinto mē wa'am wa di ba. ⁶Tɪ baseba lui tāmpīa zuo bule, la mā'asre n ka boe mĩ na ĩyā tɪ ba zēke ki. ⁷Tɪ bōnbuuri baseba lui gō'osɪ zē'a, tɪ bāma la gō'osɪ la wuu lagum yese, tɪ gō'osɪ la fure ba. ⁸Tɪ baseba lui zē'e-sōņɔ zē'a yese, wɔm biε zo'oge paage kɔbga kɔbga. > > Azezi n tɔge bela la, dee yetɪ: < <Seka n wōm yetɔga wā, a selse sōņa sōņa. > >

⁹Tɪ a karēnbiisi la soke ē makre la vōore. ¹⁰Tɪ a lerge ba yetɪ: < <Nawēnne botɪ yāma bāņe a so'olum yelle n sɔge la mε, la seba n ka boe tōma puam na, mam makrɪ la magsa bɔ'ɔra ba.

< Bela tɪ ba wɔn bɪsra,

dee ka yēta,
ba wun wōnna,
dee ka bāŋra ba vōore. >

¹¹Makre la vōore n wāna: Bōnbuuri la de la Nawēnne yetōga. ¹²Sore la zuo ti bōnbuuri seba lui la, ān wu nēr-seba n wōm yetōga la, ti Asūtāana* wa'am wa yese yetōga la ba sūure puam, boti ba kān sake yē fāare. ¹³La tāmpīa la zuo ti bōnbuuri seba lui la, ān wu nēr-seba n wōm yetōga la, dee sake la sū-yēlga, la yetōga la ka kē ba sūure puam sōŋa. Ba sake la wakate fēe, ti yelle sān paage ba, ti ba base. ¹⁴La gō'osi la zē'a ti bōnbuuri seba lui la, ān wu nēr-seba n wōm Nawēnne yetōga, ti ba yem yōra la ba wōm yelle, ti bōntarsōm la dūnia yēlum yemleego boti ba ka tāna wun bi Nawēnne sore la puam. ¹⁵La zē'e-sōŋo la ti bōnbuuri seba lui la, ān wu nēr-seba n wōm yetōga la, dee sakra dikra yetōga la ita ba sūure puam sōŋa sōŋa, mōрге ze kāŋkāŋe Nawēnne sore la puam wu bōnbuuri la n wōm biε se'em na. > >

Mōрге-ya bāŋe yāma n selsri se'em na vōore

(Amarki 4:21-25)

¹⁶Azezi le yeti: < < Nēra ka yō'ori fitla dīke lōko vuge ē, bu dīke ē sugε gōrgo tilum. A wun dīke ē zoole la sela zuo, ti a nēege peelem ti seba n kē'eri la yēta. ¹⁷Bōn-sēka woo n lile la wun lilge mε, la bōn-sēka woo n sugε wun wa puke mε ti nērba bāŋe. ¹⁸Mōрге-ya bāŋe yāma n selsri se'em na vōore. Se'ere n soe la, nēr-sēka n tari sela, ba wun bō ē pa'ase, la nēr-sēka n ka tari sela, bōn-seba fēe ti a tē'esε ti a tara la, ba wun to'oge ba. > >

Azezi ma, la a yībsi

(Amatie 12:46-50, Amarki 3:31-35)

¹⁹Azezi ma, la a yĩbsi n daan wa'am ti ba yē ē. La nē̄rba zo'oge me ti ba ka tā'age paage a zē'am. ²⁰Ti ba yele Azezi yeti: <<Fu ma, la fu yĩbsi n boe yē̄ŋa bɔɔra ti ba yē fu.>> ²¹Ti a lerge ba yeti: <<Nēr-seba wuu n wōnni Nawē̄nne yetɔga, dee sake ita lan yele se'em na, n de mam ma, la mam yĩbsi.>>

Azezi boti kusebgo yōke

(Amatie 8:23-27, Amarki 4:35-41)

²²Daare ayula ti Azezi la a karē̄nbiisi kē ōorŋɔ, ti a yele ba yeti: <<Base-ya ti dooge ya mōgre la ke bɔba doone.>> Ti ba mōnna ōorŋɔ la wē'esa. ²³La ban mōnni wē'esa la, ti gēem yōke Azezi, ti a gīse. Ti kuseb-kāte isge ko'om na zuo vugra, ti ko'om kē'era ōorŋɔ la puam, ti la lebge pakre bɔ ba. ²⁴Ti ba paage nēege Azezi, yele ē yeti: <<Karē̄nsāama, karē̄nsāama, tōma yeti ti ki me.>> Ti a isge tāse kusebgo, la ko-mĩ'isi ti ba āna sīm. Ti kusebgo la ko-mĩ'isi la yōke, ti la āna sīm. ²⁵Ti a soke a karē̄nbiisi la yeti: <<Bēm ti ya ka bɔ mam sira?>> Ti dabeem kē ba. Ti ba palē̄ŋa ēke, ti ba sakra taaba yeti: <<Āne n de ēna tā'age tāsra kusebgo la ko'om, ti ba sakra a nōore?>>

Kulkā'arsu n doli buraaga, ti Azezi dige ba

(Amatie 8:28-34, Amarki 5:1-20)

²⁶La ba paage la Geraza dōma tē̄ŋa. Mōgre la boe la tē̄n-ē̄ŋa la Galile tē̄ŋasuka. ²⁷Ti Azezi ze'ele ōorŋɔ puam sige. Ti tē̄ŋa la buraaga ayula ti kulkā'arsu doli ē sē̄nna tu'usra ē. A ka yeeri fuugo, halu ti la yuuge, la a ka kē'eri yire, a boe la zē'e-seba ti yɔɔɔ boe mĩ na. ²⁸²⁹Nōor-faa ti kulkā'arga la ēn girge ē. Ti ba gu'ura ē, dee ba a nāma, la a nu'usi wuu la bānsi. Ti a kɔ'ora bānsi la. La kulkā'arga la ēn taru ē

sēņe la mōom.

La buraaga la n yē Azezi la, a kaase me ka dūma tēņa a nēņam, tīi tōgra yeti: < < Azezi, Nawēnne n gānni wuu Dayva, bēm boe mam la fōn tēņasuka? M sosri fu me ti fu da nāmsē mam. > > Azezi dēņe yeke kulkā'arga la me ti a yese dee base bura la, bela n soe ti kulkā'arga la yeke bela. ³⁰Ti Azezi soke ē yeti: < < Fōn yu'vre? > > Ti a lerge yeti: < < Mam yu'vre de la Atusa. > > Se'ere n soe ti a yeke bela la, kulkā'arsi la n doli ē na zo'oge me. ³¹Ti kulkā'arsi la sose Azezi yeti, a da boti ba sēņe bug-tēņa* bog-ko'ogo la puam.

³²La kurkurdōma n daan zo'oge bōna tēņa zuo ōbra yōnnō. Ti kulkā'arsi la belem Azezi yeti, a bō ba nōore ti ba kē kurkurdōma la. Ti Azezi sake ban yeke se'em na. ³³Ti kulkā'arsi la base bura la, dee sēņe ka kē kurkurdōma la. Ti ba wuu zoe sige ka lui mōgre puam ki.

³⁴La sēba n gu'uri kurkurdōma la n yē bōn-seka n ēņe la, ba zoe sēņe la tēņa puam, la kēnkērsi wuu ka yeke sela n ēņe la. ³⁵Ti nērba sēņe ti ba ka bise lan ēņe se'em na. La ban paage Azezi zē'am na, ba yē bura la ti kulkā'arsi la yese dee base ē na, ti a ye la futo zēa Azezi nēņam, dee tari yem sōņa sōņa. Ti dabeem kē ba. ³⁶Ti sēba n yē bōn-seka n ēņe la, yeke ba lan ēņe se'em ti kulkā'arsi la yese dee base bura la. ³⁷Ti Geraza tēņa nērba la wuu belem Azezi yeti, a fōrge dee base ba tēņa, se'ere n soe la, dabeem n ba kē ba. Ti Azezi kē'era ōorņō la ti a fōrge. ³⁸Ti bura la ti kulkā'arsi la yese dee base ē na, sose Azezi ti a base ti a doose ē. Ti Azezi zagse, dee yeke ē yeti: ³⁹< < Lebe kule ya yire, ka pa'ale bōn-seba wuu ti Nawēnne ēņe bō fu la. > > Ti a doose tēņa la wuu puam, mōola pa'ala Azezi n ēņe bōn-seba wuu bō ē na.

Azayirusi pōyva, la pōka n kalum Azezi fuugo yelle

(Amatie 9:18-26, Amarkı 5:21-43)

⁴⁰Azezi daan lebe dooge la mōgrε la ke bɔba. La nēr-kuvuɔ n pōn lagse bilam ze gu'ura ē. Azezi n daan paage mĩ na, ba to'oge ē me sōɲa sōɲa. ⁴¹La buraa ayula n boe mĩ ti a yu'ure dena Azayirusi, a de la Zifdōma wēndeego nēɲadāana, wa'am wa ka dūma tēɲa Azezi nēɲam sose ē yeti: < < Wa'am mam yire, ⁴²ti mam pɔyva n tari yuuma pia la ayi n dee la a ki. > > Buraa la bia de la ēɲa ayula mā'a.

Ti Azezi dɔla ē we'esa, ti nēr-kuvuɔ la mikra ē. ⁴³La pɔka n daan boe mĩ luta sikēɲa yuuma pia la ayi ti la ka gɔ'ɔra. Ti a daan dıke ēn tari sela la wuu sã'am tıbdōma zē'am, la baa ayula ka yāɲe boti a yē ĩmã'asum. ⁴⁴Ti a paage Azezi poorum, kalum Azezi fuugo nōore. La bilam mēɲa ti a zum na ze'ele ka le yesra. ⁴⁵Ti Azezi soke yeti: < < Āne n kalum mam? > > Ti nēra woo sı'ıse. Ti Apıyeeri yeti: < < Zuudāana, nērba wã wuu n lagum gilge fōn mikra se'em wã ti fōn sɔkra? > > ⁴⁶Ti Azezi yeti: < < Nēra n kalum mam, se'ere n soe la, mam bāɲe me ti pāɲa n yese mam zē'am. > > ⁴⁷La pɔka la n bāɲe ti a kãn yāɲe suge la Azezi la, ti a gōgra wa'am wa ka dūma tēɲa Azezi nēɲam, yele ē nērba la wuu nēɲam se'ere n soe ti ēɲa kalum ē, la ēɲa n yē ĩmã'asum bilam mēɲa se'em. ⁴⁸Ti Azezi yele pɔka la yeti: < < M bia, fōn bɔ mam sira la ĩyã n boti fu yē ĩmã'asum. Sēɲe la sũ-mã'asum. > >

⁴⁹La Azezi n nãn boe mĩ tɔgra la, ti nēra ze'ele Zifdōma wēndeego nēɲadāana la yire wa'am wa yele ē yeti: < < Fu pɔyva la ki me, da le nãmse karēnsãama la. > > ⁵⁰La Azezi n wōm bela la, ti a yele Azayirusi yeti: < < Da zoe dabeem, wen bɔ mam sira, ti fu pɔyva la wun yē ĩmã'asum. > > ⁵¹Ti Azezi sēɲe ka paage a yire, la a ka boti nēra nēra doose ē kē, sãn dagna Apıyeeri, la Azakı, la Azã, la bia la sɔ, la a ma mā'a. ⁵²La nērba la wuu daan kellı me fabla bia la ĩyã. Ti

Azezi yele ba yetu: < <Da kaasra-ya, bia la ka ki, a gīsri mε. > > ⁵³Tı ba la'ara Azezi, ban mi tı bia la ki mε na ĩyã. ⁵⁴Tı Azezi gure bia la nu'ugo, tĩi tɔge ĩ yetu: < <Bia, isge. > > ⁵⁵Tı bia la vɔm leme, tı a isge bilam mēŋa. Tı Azezi yele ba yetu: < <Bɔ-ya bia la dia tı a di. > > ⁵⁶Tı la daan di'ige bia la sɔ, la a ma. Tı Azezi kã'an ba yetu, ba da yele nēra nēra sela n ēŋe la.

9

Azezi tōm a karēnbiisi pia la ayi tı ba sēŋe ka mōole Nawēnne yetɔga

(Amatie 10:5-15, Amarkı 6:7-13)

¹Azezi daan wi a karēnbiisi pia la ayi la lagse mε, bɔ ba pãŋa, la nōore tı ba dige kulkã'arsı dee botı bã'adōma yē ĩmã'asum. ²Dee tōm ba yetu ba mōole Nawēnne so'olum* yelle, dee botı bã'adōma yē ĩmã'asum. ³La a yele ba yetu: < <Da dıke-ya sela sela sēŋe. Da dıke-ya dasaare, bu tãmpɔkɔ, bu dia, bu ligri. Da dıke ya futo bayi bayi. ⁴La yi-seka tı ya paage tı ba to'oge ya, bɔna-ya yi-ēŋa pɔam ka paage daar-seka tı ya wun fōrge tēŋa la. ⁵La zē'e-seka tı nērba ka to'oge ya, yese-ya tēn-ēŋa pɔam, dee puse ya nãma tēntōnnɔ base. Ya sãn ēŋe bela, la wun pa'ale ba tı ba ka ēŋe sōŋa. > > ⁶Azezi n yele bela la, karēnbiisi la yese mε sēŋe tēn-pıgsı wuu pɔam ka mōola Nawēnne kō-yēlga, dee botı bã'adōma yēta ĩmã'asum.

A'erɔdı boorı tı a bãŋe Azezi n de nēr-seka

(Amatie 14:1-12, Amarkı 6:14-29)

⁷Galile Naba A'erɔdı* n daan wōm bōn-seba wuu n utı la, a palēŋa n ēke, se'ere n soe la, nērba baseba n daan yele ĩ tı Azezi de la Azã

sɛka n daan misri nērba ko'om puam na n vo'oge. ⁸Ti nērba baseba yeti, Nawēnne nōtɔ'ɔsa A'eli* n le wa'am dūnia zuo, ti nērba baseba yeti, kurum kurum Nawēnne nōtɔ'ɔsa ayēma n vo'oge. ⁹Ti A'erɔɔɔ yeti: < < Mam daan boti ba wike Azā zuugo mɛ, dee ti āne n de ēna wā ti mam wōm a yelle wāna wā? > > La a daan boori ti a yē Azezi mɛ.

Azezi bɔ nēr-kuvɔɔ dia

(Amatie 14:13-21, Amarki 6:30-44, Azā 6:1-14)

¹⁰Azezi karēnbiisi pia la ayi la ti a daan tōm na, lebe mɛ ka tɔge pa'ale ē bāma n ēɲɛ se'em na wuu. Ti Azezi boti ba doose la ē yese kēnkɛrɲa ka lɛm tēɲa yu'vɛ n de Betisayida. ¹¹Ti nēr-kuvɔɔ la bāɲɛ ēn sēɲɛ zē'am na, babsɛ ē. Ti a to'oge ba, tɔge Nawēnne so'olum yelle bɔ ba, dee boti bā'adōma yē ĩmā'asum.

¹²La wēnne n daan boe mī ti a kē, ti karēnbiisi pia la ayi la wa'am a zē'am wa yele ē yeti: < < Boti nērba la sēɲɛ tēn-pɔgsɔ, la yie n lɛm na ka ε dia, la gā'a-zē'a, se'ere n soe la, tun boe zē'e-sɛka wā de la mōom. > > ¹³Ti Azezi yele ba yeti: < < Yāma mēɲa bɔ ba dia ti ba di. > > Ti ba lerge yeti: < < Tōma tarti la borborti banuu, la zūma bayi mā'a, sān dagna ti ti sēɲɛ ka da dia wa'am wa bɔ nēr-bāna wuu. > > ¹⁴La buraasi n daan boe mī de wu tusanuu. Ti Azezi yele karēnbiisi la yeti: < < Base-ya ti nērba la welse zī'ire pinu-nu. > >

¹⁵Ti karēnbiisi la boti nērba la wuu zī'ire bɛla. ¹⁶Ti Azezi dɔke borborti banuu, la zūma bayi la gorge bise saazuum pu'vɛ Nawēnne dia la ĩyā, dee fiise borborti la zūma la bɔ a karēnbiisi la ti ba to'oge pu nērba la. ¹⁷Ti ba wuu di tɔge, dee ti karēnbiisi la vaage bōn-gito n deege pure pitɔ pia la ayi.

Aptɔyɛri yeti Azezi de la Kisi ti Nawēnne tōm

(Amatie 16:13-21, Amarki 8:27-31)

¹⁸Daare ayula Azezi daan boe la kēnkernja pu'usra Nawēnne, ti a karēnbiisi la bōna a zē'am, ti a soke ba yeti: < < Nērba yeti mam de la āne? > > ¹⁹Ti ba lerge yeti: < < Nērba baseba yeti fōn de la Azā sēka n daan misri nērba ko'om puam na, ti nērba baseba yeti, fōn de la Nawēnne nōtō'osa A'eli*, ti baseba yeti, fōn de la kurum kurum Nawēnne nōtō'osa ayēma n vo'oge. > > ²⁰Ti a soke ba yeti: < < Dee yāma yeti mam de la āne? > > Ti Apıyēerı lerge yeti: < < Fōn de la Krişi* ti Nawēnne tōm na. > >

²¹Ti Azezi kā'an ba yeti, ba da yele nēra nēra, ²²dee yeti: < < Dēni ti mam n de Nērsaala* Dayua la nāmse zozo'e. Tēnja wā kēma, la kāabgo* kēma nējadōma, la lo* karēnsāandōma nifo wun kē mam me, ti ba ku mam, la dabsa atā daare mam wun vo'oge me. > >

Azezi doosgo yelle

(Amatie 16:24-28, Amarki 8:34-9:1)

²³Azezi yele bela dee yele nērba la wuu yeti: < < Nēra sān bōra ti a doose mam, dēni ti a base a mēnja n boori se'em, dee sake nāmsgo daare woo wu nēra n buke a kūm dō-puurja* dola mam. ²⁴Nēr-sēka woo n boori ti a gu a vōm, a wun koje ē, la nēr-sēka n sake ti a koje a vōm mam iyā, a wun yē vōm. ²⁵Nēra sān yē dūnia sēla woo dee koje vōm Nawēnne zē'am, a yōoro de la bēm? ²⁶Nēr-sēka n zoe yānne mam iyā, la mam yetōga la iyā, mam n de Nērsaala* Dayua la mē wun zoe yānne la ē wakat-sēka ti mam wun leme wa'am la m na'am pānja, la Nawēnne, la a malekadōma* na'am pānja la. ²⁷Mam yeti ya la sra sra, ti yāma nēr-sēba n boe kalam wā baseba kān ki, sān dagna ti ba wa yē la Nawēnne so'olum*. > >

Azezi nēnja teere

(Amatie 17:1-18, Amarkı 9:2-8)

²⁸Yetɔg-bāma poorum, la daan ɛɲe wu dabsa anii, tı Azezi botı Apıyɛɛrı, la Azakı, la Azã doose ẽ zom tãɲa zuo tı a ka pu'vse Nawēnne. ²⁹La ẽn boe mĩ pu'vsra la, tı a nēɲa teege, tı a futo pelge yēgra. ³⁰Tı buraası bayi dare ze tɔgra la ẽ. Ba de la Amoyisi*, la A'eli* ³¹n puke ba mēɲa nēege la Nawēnne na'am peelem tɔgra la Azezi, ɛɲa n wun ki Zerizalem se'em tı bõn-sɛka tı a wa'am tı a ɛɲe la, ɛɲe ba'ase yelle. ³²La gēem n daan tarı Apıyɛɛrı la a taaba la tı ba gıse, yãɲa nēege yē Azezi n yēgrı, tı nērba bayi la ze a zē'am. ³³Tı nērba bayi la daan bõna mĩ tı ba fõrge, tı Apıyɛɛrı yeke Azezi yetı: < < M Zuudāana, tõma n boe kalam wã, la ãn sõɲa me. Base tı tı fı põnsı batã, ayıla bɔ fõn, ayıla bɔ Amoyisi, la ayıla bɔ A'eli. > > A daan wen tɔge me, a ka mi ẽn tɔgrı se'em na. ³⁴La ẽn daan boe mĩ tɔgra bela la, tı sawate wa'am wa lile ba la a mã'asum. La sawate la n lile ba la, dabeem n yõke karēnbiisi la. ³⁵Tı kõa ze'ele sawate la puam yetı: < < Ena de la mam Dayua tı mam looge. Selse-ya ẽ. > > ³⁶La kõa la n tɔge la, ba yē la Azezi mã'a n ze. Tı ba daan sına wakat-ɛɲa ka yeke nēra nēra bāma n yē sela la.

Kulkã'arga n tarı bia, tı Azezi botı a yē imã'asum

(Amatie 17:14-18, Amarkı 9:14-27)

³⁷Tı beere daan wiige, tı Azezi la a karēnbiisi la ze'ele tãɲa la zuo sige, tı nēr-kuvɲɔ daan tu'vse ẽ. ³⁸La buraa ayıla n daan boe nēr-kuvɲɔ la puam fı tɔge yetı: < < Karēnsāama, mam belnı fu me, buse m bia wã. A de la mam bi-yēɲa, la kulkã'arga n dolı ẽ. ³⁹Kulkã'arga la sãn ẽn girge ẽ, a botı a kaasra me, dee luta kinki'ire, tı nõtõorum yesra a nõorum. Kulkã'arga la ẽn nãmse ẽ zo'oge me, pɔglum ẽ dee base ẽ. ⁴⁰Bela tı mam belem fu karēnbiisi yetı, ba dige ẽ tı a yese, tı

ba ka yāņε. > > ⁴¹Tı Azezi yetı: < < Zamāan-ēna nērba, ya ka bō'oru mam sira, la ya ka ttı sōņa. Mam wun mā'age m mēņa la yāma yuuge paage la wakat-kāna? > > A yele bēla dee yele buraa la yetı: < < Tarı bia la wa'am. > > ⁴²La bia la n paarı Azezi zē'am na, ttı kulkā'arga la lubε ē ttı a gōgra. Tı Azezi tāsε kulkā'arga la ttı a base bia la. Tı kulkā'arga la base bia la, ttı a yē ĩmā'asum, ttı Azezi dıke ē lebse a so. ⁴³La nērba la wuu n yē Nawēnne pān-kāte la, la di'ige ba mε.

Azezi tōge a kūm yelle

(Amatie 17:22-23, Amarkı 9:30-32)

Nērba la wuu daan ken ze la yerı la bōn-seba wuu ttı Azezi ēņε la. Tı Azezi yele a karēnbiisi la yetı: ⁴⁴< < Selse-ya yetōg-ēna ttı mam yetı m tōge wā sōņa: Ba wun yōke Nērsaala* Dayua la sēņε ka ēņε la nērsaalba nu'usum. > > ⁴⁵La ba daan ka bāņε a yetōga la vōore. Yetōga la daan svge mε ttı ba ka tā'age bāņε a vōore, dee zōta dabeem ka soke ē.

Āne n wun dena nēr-kāte Nawēnne zē'am?

(Amatie 18:1-5, Amarkı 9:33-37)

⁴⁶Azezi karēnbiisi la daan wē'erı la nōke'ene la taaba, bōora ttı ba bāņε bāma puam nēr-seka n wun dena nēr-kāte gānna. ⁴⁷Tı Azezi bāņε ban tē'esrı se'em na, yōke bia ze'ele lem a mēņa, ⁴⁸dee yetı: < < Nēr-seka woo n to'oge bi-pıka n ān wu ēna mam yu'ure ĩyā, a to'oge la mam, la seka n mē to'oge mam, a to'oge la seka n tōm mam na. Nēr-seka n de pıka ya zē'am na, ēņa n de nēr-kāte. > >

Nēr-seka n ka sisri yāma, a de la ya nēra

(Amarkı 9:38-40)

⁴⁹Tı Azā yele Azezi yetı: < < Zuudāana, tōma yē la buraa n digri

kulkā'arsı la fōn yu'ure ti ba yesra, la ēṅa n ka po dena tōma nēra la īyā, ti tōma gu ē yeti a base. > > ⁵⁰Ti Azezi lerge ba yeti: < < Da gu-ya ē, nēr-seka n ka sisri yāma, a de la ya nēra. > >

Samaari tēṅa nērba ka bɔ Azezi sira

⁵¹Dabs-seba ti Azezi daan wun zēke sēṅe Nawēnne yire la n daan lem, ti a kɔ'ɔn yeti, dēni ti ēṅa sēṅe Zerizalem. ⁵²A daan tōm na nērba yeti ba dēṅe nēṅam. Ti nērba la daan dēṅe sēṅe ka kē Samaari* tēn-ptka puam ti ba māasna sela woo dee gu'ura ē. ⁵³Ti tēṅa la nērba zagse ti bāma kān to'oge ē, ēn we'esı Zerizalem na īyā. ⁵⁴La a karēnbiisi Azaki la Azā n bāṅe bela la, ti ba soke Azezi yeti: < < Zuudāana, fōn boori ti ti wi bugum ti ba ze'ele saazuum wa di ba me bu? > > ⁵⁵Ti Azezi wērgē, gi ba ((yeti: < < Yāma ka mi sı-seka n tartı ya la. ⁵⁶Nērsaala Dayua*f5* la ka wa'am ti a sā'am nērba vɔm, a wa'am ti a fāage ba me. > >)) Ti ba wē'esa tēṅa ayēma.

Azezi doosgo yelle

(Amatie 8:19-22)

⁵⁷Ban boe sore wē'esa la, ti buraaga yele Azezi yeti: < < Mam wun dɔla fɔ sēnna zē'e-seba wuu ti fu wun sēnna. > > ⁵⁸Ti Azezi lerge ē yeti: < < Puna tartı yogro me, ti niinto mē tara tɔgrɔ, la Nērsaala Dayua*f5* la ka tartı zē'a wun gā'are vo'ose. > > ⁵⁹Dee le yele buraa ayēma mē yeti: < < Doose mam. > > Ti buraa la lerge ē yeti: < < Base ti m sēṅe ka laage m sɔ dee wa'am wa dɔla fɔ. > > ⁶⁰Ti Azezi lerge ē yeti: < < Base ti seba n ka tartı vɔm Nawēnne zē'am na laage ba kūm. Dee ti fōn sēṅe ka mōole Nawēnne so'olum kō-yēlga la. > > ⁶¹Ti buraa ayıla yele ē yeti: < < Zuudāana, mam wun doose fo, la base ti m sēṅe ka keese m yir-dōma. > > ⁶²Ti Azezi lerge ē yeti: < < Nēr-seka n gure nii-kūure kɔra dee bısra poorum, ka tā wun tōm

Nawēnne so'olum tōoma. > >

10

Azezi tōm a karēnbiisi pisyopɔi la ayi ti ba sēŋe ka mōole Nawēnne kō-yēlga

¹Bela poorum, Azezi looge la karēnbiisi baseba pisyopɔi la ayi ti a tōm ba bayi bayi ti ba dēŋe nēŋa sēŋe tēn-seba, la zē'e-seba wuu ti ēŋa mēŋa wun sēŋe la. ²A yele ba yeti: <<Va'am na bōnkɔɔla lagsgɔ zo'oge mɛ, la tōntōnɔba n wun lagse bōnkɔɔla la pɔ'ɔri mɛ. Bela iyā sose-ya va'am na dāana ti a tōm tōntōnɔba pa'ase ti ba lagse bōnkɔɔla la.>> ³Dee yāŋa yele ba yeti: <<Sēŋe-ya, yāma ān wu piisi ti mam tōm saasaadōma tēŋasuka. ⁴Da dɔke-ya putmāane, bu tāmpɔkɔ, la da dɔke-ya tagra pa'ase, da ze'ele-ya sore bɔ nēra gā'a. ⁵La ya sān yeti ya kē yire puam, ya dēŋe pu'use yire la dōma yeti: <Nawēnne wun bɔ ya sū-mā'asum.> ⁶Nēra sān bɔna mī bɔɔra sū-mā'asum, ya sū-mā'asum wun bɔna la ě. La nēra sān ka bɔna mī bɔɔra sū-mā'asum, ya sū-mā'asum wun leme ya mēŋa zē'am. ⁷Da lɔsna-ya yiɛ, bɔna-ya yire ayula puam, yūura dee dita bōn-seba ti ba bɔ ya la, se'ere n soe la, la mase mɛ ti tōntōnna to'oge a yɔɔɔ. ⁸Ya sān paage tēn-seka woo puam ti ba to'oge ya, di-ya bōn-seba ti ba bɔ ya la, ⁹la ya boti tēn-ēŋa bā'adōma yē ĩmā'asum, dee yele nērba la yeti: <Wakate lem mɛ ti Nawēnne wun di na'am ya tēŋasuka.> ¹⁰La tēn-seka woo puam ti ya kē ti ba ka to'oge ya, ya yese sore dee yele tēŋa la nērba wuu yeti: ¹¹<Tōma pusri la ya tēŋa tēntōnno n tabe tōma nāma la, ti la pa'ale ti ya ka ēŋe sōŋa. La bāŋe-ya ti wakate lem mɛ ti Nawēnne wun di na'am nērba tēŋasuka.> ¹²Mam yeti ya mɛ ti sariyadia daare, Sodom* nērba kān ba yē toogo wu tēn-ēŋa nērba n wun yē toogo

se'em na.

¹³Korazē dōma, ya wun yē toogo! Betisayida dōma, ya wun yē toogo! Se'ere n soe la, tōon-yālma seba n tōm ya tēnsi puam na, daan sãn tōm ni na Tiiri*, la Sidō tēnsi puam, ba wun teege ni yem base tōon-be'ero halı kurum kurum, ye bōra futo ēṅe tāmpeglum ēṅe ba zuto ti la pa'ale ti ba teege yem. ¹⁴La sariyadia daare, la wun dena toogo bɔ yāma gānna Tiiri, la Sidō dōma. ¹⁵La yāma Kapernaum dōma, yāma tē'ese ti ya wun zēke me ka paage saazuum bu? Ayei, ya wun sige me ka paage bug-tēṅa*. > >

¹⁶La Azezi le yele a karēnbiisi la yeti: < <Seka n selsri ya yetoga, a selsri la mam yetoga, la seka n zagse ya, a zagse la mam. La seka n zagse mam, a zagse la seka n tōm mam na. > >

¹⁷La karēnbiisi pisyopɔi la ayi la sēṅe me dee leme wa'am la sū-yēlga wa yeti: < <Zuudāana, baa la kulkā'arsı sakri tōma nōore me, ban zoti fōn yu'ure la iyā. > > ¹⁸Ti Azezi yele ba yeti: < <Mam yē la Asūtāana* n ze'ele saazuum lui tēṅa wu saaga n yāke la. ¹⁹Bāṅe-ya ti mam bɔ ya pāṅa me ti ya nē bōnse'edōma, la nānsı, dee yāṅe Asūtāana la a pāṅa wuu, la sela sela ka tā wun ēṅe ya be'em. ²⁰La da ita-ya sū-yēlga kulkā'arsı n sakri ya nōore la iyā, ita-ya sū-yēlga ya yu'ura n gulse Nawēnne yire* vɔm gōṅɔ puam na iyā. > >

Azezi itı sū-yēlga

(Amatie 11:25-27, 13:16-17)

²¹Wakat-ēṅa ti Nawēnne Sia boti Azezi sūure ēṅe yēlum, ti a yeti: < <Mam Sɔ Nawēnne n de saazuum la tēṅa wā Zuudāana, mam pēgri fɔ, se'ere n soe la, fōn svge bōn-bāna wā me ti yem dōma la bāṅriɓa ka mina, dee pa'ale nēr-seba n ān wu kɔm-pıgsı la. Ee, mam Sɔ, la de la fōn boori bela la iyā. > >

²²< < Mam So dıke sela woo ẽje la mam nu'usum. La nẽra ka mi mam n de Nawẽnne Dayua la n de seka, sãn dagna mam So la, la nẽra mẽ ka mi mam So la n de se'em, sãn dagna mam n de a Dayua la, la seba ti mam wun boti ba bãje ẽ na. > >

²³Azezi yele bela dee wẽrge la a karẽnbiisi la boba, yele bãma mã'a yeti: < < Yãma seba n yeti sela ti ya yeti wã, tari zu-yẽlga. ²⁴La mam yeti ya ti Nawẽnne nõtɔ'ɔsrıba*, la na'adõma zozo'e yuun boori ti ba yẽ yãma n yẽ sela la me, la ba ka yẽ, ba yuun boori ti ba wõm sela ti yãma wõm na me, la ba ka wõm. > >

Samaari nẽra n sõje a tadãana makre

²⁵Tı lɔɔ* karẽnsãama isge ti a di Azezi yem bise, soke ẽ yeti: < < Karẽnsãama, mam wun ẽje la wãne yẽ vɔm n ka ba'asrı? > > ²⁶Tı Azezi lerge ẽ yeti: < < La gulse Nawẽnne lɔɔ gõɔɔ la puam yeti bẽm? Fõn karẽnrı ẽ na, a yeti bẽm? > > ²⁷Tı a lerge yeti: < < La yeti: Nõje fu Zuudãana Nawẽnne la fu sũure wuu, la fu sia wuu, la fu pãña wuu, la fu yem wuu, dee nõje fu tadãana wu fõn nõje fu mẽña se'em na. > > ²⁸Tı Azezi yele ẽ yeti: < < Fu yele sõña. Ẽje bela ti fu wun yẽ vɔm na. > >

²⁹La ẽña n boori ti a bɔ a mẽña buuro la, ti a soke Azezi yeti: < < Ẽne n de mam tadãana? > > ³⁰Tı Azezi lerge ẽ yeti: < < Nẽra n daan yese Zerizalem we Zeriko, ti fãarba yõke ẽ fã a lɔgrɔ wuu, dee wẽ ẽ ti a dee la a ki, ti ba base ẽ dee fõrge. ³¹Tı Nawẽnne kãabgɔ* kẽema ayıla dɔla so-ẽña tɔlla, yẽ ẽ, lɔke tole dee base ẽ. ³²Tı Leviti* nẽra mẽ wa'am tɔlla, yẽ ẽ, burge tole dee base ẽ. ³³La Samaari* nẽra n mẽ daan doli so-ẽña tɔlla yẽ ẽ, ti a ninbãalga yõke ẽ. ³⁴Tı a paage a zẽ'am dıke dãam peege a nõtɔ la, ẽje kaam ımĩ vile. Yãña yõke ẽ bã a bõña zuo, tari ẽ sẽje sãama yire ka bise a yelle. ³⁵Tı beere wiige ti a

dıke lig-kōba*f6* bayi bɔ nēr-seka n bısri sāama yire yelle la, dee yeke ẽ yetu: < Bısra a yelle, ligri la sãn pɔ'ɔge, mam sãn leme, mam wun yɔ fɔ. > > ³⁶Azezi tɔge bela ki'ulum dee soke ẽ yetu: < <Nērba batã wã, fõn tẽ'esε ti ãne n de nēra la ti fāarba yōke la tadāana? > > ³⁷Ti lɔɔ karēnsāama la lerge yetu: < <Seka n zoe a ninbāalga sōñε ẽ na. > > Ti Azezi yeke ẽ yetu: < <Sēñε mē ka ēñε bela. > >

Amartı la Amaari yelle

³⁸Azezi la a karēnbiisi daan sēnnı me ka kē tēña ayıla pɔam. Ti pɔka yu'vɔre n de Amartı bɔna tēn-ēña pɔam to'oge ẽ a yire. ³⁹Amartı tartı la yıbga ti a yu'vɔre dena Amaari. Ti Amaari zēa Zuudāana Azezi nāma bɔba selsra a yetɔga.

⁴⁰La Amartı tōoma yelle n daan mō'oge a nini, ti a sēñε ka yeke Azezi yetu: < <Mam Zuudāana, mam yıbga la n base ti mam m yıla mã'a tōnna la, fõn yetu bēm? Yeke ẽ ti a wa'am wa sōñε ma. > > ⁴¹Ti Zuudāana Azezi lerge ẽ yetu: < <Amartı, Amartı, fõn botı fu yem n yɔɔra la yeke zozo'e yelle. ⁴²La bõnɔ ayıla mã'a n de yel-kāñkāñε. Amaari looge la bõn-sõñɔ, la nēra nēra kãn tã'age to'oge bõn-ēña a zē'am. > >

11

Azezi pa'ale a karēnbiisi ba wun pu'vsra se'em

(Amatie 6:9-13, 7:7-11)

¹Azezi daan boe la zē'a ayıla pu'vsra Nawēnnε. La ēn pu'vse ki'ulum na, ti a karēnbıa ayıla yeke ẽ yetu: < <Zuudāana, pa'ale tɔ tōma n wun pu'vsra Nawēnnε se'em, wu Azã n pa'ale a karēnbiisi se'em na. > > ²Ti a yeke ba yetu: < <Ya sãn pu'vsra, ya yetu:

< Tōma Sɔ, botı fu yu'vɔre yēta pēka,

wa'am wa di na'am nērba tēḡasuka,

³bɔ'ɔra tɔ daare woo la a dia.

⁴Base ti tōon-be'ero taale,

ti tōma mē basri seba n ēḡe tōma be'em taale mε.

Da base ti yelle paage tɔ ti ti lui. > > >

⁵Dee le yele ba yeti: < < Tē'esε-ya bise, yāma nēr-seka sān tara sire, ti a wa'am a zē'am yu'vḡɔ wa sose ē yeti: < M sire, bɔ ma borbori batā, ⁶mam sire n ze'ele sore wa'am, ti mam ka tara sela wun bɔ ē ti a di. > ⁷Ti a sire la bɔna deem dee lerge ē yeti: < Da dāam mam, mam yu m zanōre mε, ti mam la m kɔma gā, mam kān yāḡe isge bɔ fɔ fōn boori sela la. > ⁸Mam yeti ya mε ti, baa a sān pōn kān isge bɔ ē sela ban de sitɔ la īyā, a wun isge bɔ ē ēn boori sela la mε, ēn bule ē na īyā. ⁹Bela mam yeti ya mε ti ya sose Nawēnne, ti a wun bɔ ya, ya ε, ti ya wun yē, ya wē kuliḡa, ti a wun yo'oge bɔ ya. ¹⁰Se'ere n soe la, nēr-seka woo n sosri Nawēnne, a wun bɔ ē. La nēr-seka n eeri, wun yē. La nēr-seka n wē'eri kuliḡa, ba wun yo'oge bɔ ē. ¹¹Āne n boe yāma puam ti a bia wun sose ē zūfo, ti a dike bōnsela bɔ ē? ¹²Bu a sān sose ē zelle, ti a dike nāḡa bɔ ē? ¹³Yāma n de tōon-be'ero dōma la sān mina ti ya bɔ ya kɔma bōn-sōma, Nawēnne n de ya Sɔ n boe saazuum n ān sōḡa la wun bɔ nēr-seba n sosri ē a Sia* la gānna. > >

Azezi pāḡa gānni Asūtāana

(Amatie 12:22-30, Amarki 3:22-27)

¹⁴La Azezi daan dige la kulkā'arga n tari buraa ti a dena muko, ti kulkā'arga la daan yese, dee ti buraa la n de muko la yāḡa tā'age tɔgra, ti la di'ige nērba la. ¹⁵Ti nērba la baseba yele ē yeti: < < En digri kulkā'arsi la, la de la Abelzebuli*f7* n de kulkā'arsi naba la pāḡa ti a tari digra ba. > > ¹⁶Ti nērba baseba bɔra ti ba make ē bise,

yele ẽ yeti, a tōm tōon-yālma n pa'ale ti a pāņa la ze'eti la Nawēnne zē'am. ¹⁷Ti Azezi bāņe ban tē'esri se'em na, yele ba yeti: << So'olum sēka woo nērba n welge wēрге zebra la taaba, so'olum na wun sā'am mε. La so'olum ēņa yie mē wun lui mε. ¹⁸La Asūtāana* sān welge zebra la a mēņa, a so'olum na kān tā'age ze'ele. Yāma n yeti mam digri kulkā'arsi la Abelzebuli pāņa la ĩyā ti mam yele bela. ¹⁹Yāma n yeti mam digri kulkā'arsi la Abelzebuli pāņa la, yāma nērba tari la ān pāņa digri kulkā'arsi? Bela, ya nērba la mēņa n wun pa'ale ti ya ka tari buuro. ²⁰La de la Nawēnne pāņa ti mam tari digra kulkā'arsi, bela pa'ale ti Nawēnne wa'am mε wa dita na'am ya tēņasuka. ²¹Pāņa dāana sān māasum sōņa la a budaan-lōgrō gu'ura a yire, sela kān ēņe a bōntarsōm. ²²La nēra n tari pāņa gānna ẽ sān wa'am wa zebe yāņe ẽ, a wun fāage la a zebre lōg-seba ti a te'ege la yien, dee yāņa vaage a yire lōgrō la pu.

²³Nēr-seka n ka boe la mam, sisri mam mε, la nēr-seka n ka lagum na mam lagsra, a wirgru mε. > >

Kulkā'arga n yese dee leme makre

(Amatie 12:43-45)

²⁴Azezi le yeti: << Kulkā'arga sān yese dee base nēra, a sēņe la pōgēntusi puam ka εera zē'a ti a vo'ose, la a sān ε zē'a koņe, a yeti me ti: < Mam wun lebe la m yi-sēka ti m yese dee base la puam. > ²⁵La a sān lebe ka yē ti a puse mε malge āna sōņa, ²⁶a wun lebe mε ka tari kulkā'arsi bayopu n de wēensi gānna ēņa mēņa wa'am, ti ba kē lagum bōna mī. Bela, nēr-ēņa toogo yāņa wun gānna a kurum toogo la mε. > >

Nēr-seba n sakri Nawēnne yetoga tari zu-yēlga

²⁷Azezi n tōge bela kī'ulum na, ti pōka ze'ele nērba la tēņasuka tii

tɔgɛ yetu: <<Pɔg-sɛka n dɔgɛ fɔ, tɪ fɪ mɔgɛ a bɪ'isum na, tari zu-yɛlga.>> ²⁸Tɪ Azezi lerge yetu: <<Nɛr-sɛba n wɔnnɪ Nawɛnnɛ yetɔga, dee sakra ita lan ye le se'em na, n tɔn tari zu-yɛlga.>>

Nɛrba boori tɪ ba yɛ la bɔn-yɛlma

(Amatie 12:38-42)

²⁹Nɛr-kuvuɔ n lagse Azezi zɛ'am zo'oge, tɪ a ye le ba yetu:
<<Zamɛan-ɛna wɛ nɛrba de la nɛr-bɛ'ɛsɪ. Ba eerɪ la bɔn-yɛlma n wun pa'ale Nawɛnnɛ pɛɔɔ, la ba kɛn yɛ bɔn-yɛlma ayɛma, sɛn dagna bɔn-yɛlma sɛka n yuun ɛɔɔ Nawɛnnɛ nɔtɔ'ɔsa Azonaasi* la. ³⁰Bɔn-sɛka n yuun ɛɔɔ Azonaasi la, pa'ale Niniivi dɔma la Nawɛnnɛ pɛɔɔ, bela Nɛrsaala Dayva*f8* la mɛ de la sɛka n pa'alɪ zamɛan-ɛna dɔma Nawɛnnɛ pɛɔɔ. ³¹Sariyadia daare, na-pɔka la n yuun yese wɛntulle gɔbga bɔba la wun isge mɛ zerge zamɛan-ɛna wɛ dɔma ba tɔon-be'ero la ɪyɛ. Se'ere n soe la, a yuun ze'ele la zɛ'a n zɛage wa'am wa selse naba Asalomɔ* yem yetɔga la, la sɛka n gɛnnɪ Asalomɔ n boe kalam, dee tɪ yɛma ka selsra ɛ. ³²Sariyadia daare, Niniivi* dɔma mɛ wun isge zerge zamɛan-ɛna wɛ dɔma mɛ ba tɔon-be'ero la ɪyɛ. Se'ere n soe la, Azonaasi n yuun mɔole Nawɛnnɛ yetɔga bɔ ba la, ba yuun teege yem mɛ base tɔon-be'ero. La sɛka n gɛnnɪ Azonaasi n boe kalam, dee tɪ yɛma ka teege yem.>>

Peelem yelle

(Amatie 5:15, 6:22-23)

³³<<Nɛra kɛn yɔ fitla svge, bu dɪke pɪ'ɪgɔ vuge ɛ, a wun dɪke ɛ zoole la sela zuo tɪ a nɛege bɔ sɛba n kɛ'eri la. ³⁴Fɪ nini n nɛeri peelem bɔ'ɔra fɪ ɪyɛ wu fitla la, bela fɪ nini sɛn ɛna sɔɔɔ, fɪ ɪyɛ wuu tari peelem mɛ. La fɪ nini sɛn ka ɛna sɔɔɔ, fɪ ɪyɛ wuu boe la lika

puam. ³⁵Bela ñyã, guuse ti bõn-seka n de peelem fu puam na, da dena lika. ³⁶La fu ñyã wuu sãn tara peelem sõña, ti baa bõbre ayula ka tara lika, fu ñyã wuu taru peelem me wu fitla n taru peelem nẽera bõ'ora nẽrba se'em na. > >

Azezi zerge Farisi dõma la loo karẽnsãandõma

(Amatie 23:1-36, Amarku 12:38-40)

³⁷Azezi n daan toge ku'ulum na, ti Farisi* nẽra ayula wi ã ti a wa'am ãña yire ti ba di. Ti a sãñe ka kã zĩ'ire bõna mĩ ti a di. ³⁸Ti Farisi nẽra la yẽ ti Azezi ka peege nu'usi wu ban uti ba sisgo se'em na, dee yetu a di, ti la di'ige ã. ³⁹Ti Zuudãana Azezi yele ã yetu: < <Yãma Farisi dõma peeru ya wama la ya laasi pãa me, la yãma mẽña puam pure la dẽgru n de fãaga la putvulgo. ⁴⁰Ya de la geto! La dagu Nawẽnne n ãñe poorum na, n ken ãñe puam na? ⁴¹Dike-ya yan taru sela la bõ nasdõma la ya sũure wuu, ti sela woo wun ãna sõña bõ ya.

⁴²Farisi* dõma, ya wun yẽ toogo. Se'ere n soe la, yãma bõ'oru Nawẽnne zẽvõoro buuri wuu pia pure me, baa ba sãn ãna pika pika, la ya ka uti sela n mase, la ya ka nõñe Nawẽnne. La de la bõn-bãna ti ya wun dẽñe ita, dee yãña ita sela ti ya uti la pa'ase.

⁴³Farisi dõma, ya wun yẽ toogo. Se'ere n soe la, yãma eeri la zẽ'esu nẽña ti ya zĩ'ire wẽndeto puam, dee bõra ti ba nã'asra ya da'asi puam. ⁴⁴Ya wun yẽ toogo. Se'ere n soe la, ya ãn wu yõõru n naage la tẽña ti nẽrba nẽera ba zuto tolla, dee ka mina ti yõõru n boe mĩ. > >

⁴⁵Ti loo* karẽnsãama ayula yele ã yetu: < <Karẽnsãama, fu sãn togra bela fu po põ'ora la tõma wuu. > > ⁴⁶Ti Azezi lerge yetu: < <Yãma loo karẽnsãandõma mẽ wun yẽ toogo. Se'ere n soe la, yãma n botu nẽrba la ita se'em na, ãn wu ze-tibsa ti ya zelgru nẽrba la, la yãma mẽña ka booru ti ya kalum ba la ya nu'ubiire. ⁴⁷Ya wun yẽ

toogo. Se'ere n soe la, yāma mēti la yɔɔɔ bɔ'ɔra Nawēnne nōtɔ'ɔsrɪba* la. La yāma yaabdōma n yuun ku ba. ⁴⁸La yāma n mēti sɛba ti ya yaabdōma ku la yɔɔɔ la, la pa'ale ti ya sake ti ban yuun tōm se'em na ān sōŋa mɛ. ⁴⁹Bela ɪyā ti Nawēnne n tari yem na yuun yeti: < Mam wun tōm nōtɔ'ɔsrɪba, la Tōntōnɪba bɔ ba, la ba wun ku baseba, dee nāmse baseba. > ⁵⁰Bela Nawēnne wun sɪbge zamāan-ēna wā dōma wu la de la bāma n ku nōtɔ'ɔsrɪba la halɪ dūnia pī'iluŋo, wa paam lɛɛɛ wā, ⁵¹lan pɔsɛ la Abelɪ* kua, halɪ wa paage Azakari ti ba ku kāabgɔ bɪmbɪnne, la Nawēnne zē'e-sōŋɔ* tēŋasuka la. Mam yeti ya la sɪra, ti tōon-be'ero bāma wuu taale boe la zamāan-ēna nērba zuo.

⁵²Yāma lɔɔ karēnsāandōma la wun yē toogo. Se'ere n soe la, yāma n gu'uri nērba ti ba ka bāŋra Nawēnne sɪra. Yāma mēŋa ka sakri Nawēnne sɪra la, dee mē gu'ura nēr-sɛba n boori ti ba sake la. > >

⁵³La Azezi n ze'ele bilam fōrge la, ti lɔɔ karēnsāandōma la Farisi dōma sūure ba isge la ē. Ti ba bɔɔra ti ba bēre ē, sokra ē sokrisɪ zozo'e ⁵⁴bɔɔra ti a tɔge tuuge ti ba yōke ē.

12

Da dena-ya pulibsum dōma

(Amatie 10:26-27)

¹Wakat-ēŋa nēr-kuvŋɔ n lagse zo'oge mikra taaba, nēera taaba nāma, ti Azezi dēŋe yele a karēnbiisi la yeti: < < Guuse ya mēŋa la Farisi* dōma pulibsum na n ān wu dābille n botɪ dāam wuu kella la.

²Bōn-seka woo n lile wun lilge, la bōn-seka woo n sugɛ wun puke.

³Bela, bōn-seka woo ti ya tɔge lika puam, ba wun tɔge ē na peelem puam ti nērba wuu wōm, la bōn-seka ti ya waasum deem na, ba wun zom na gɔsgɔ mōole ti nērba wuu wōm. > >

La mase ti ya zota la Nawēnne

(Amatie 10:28-31)

⁴< < M sirdōma, mam yeti ya ti ya da zota dabeem la seba n kuuri ñyā mā'a, dee ka tāna wun ēñe sela pa'ase la. ⁵Mam wun pa'ale ya lan mase ti ya zota seka. Zota-ya Nawēnne n tā wun ku, dee tara pāña wun kē'ese ya bug-tēña* la. Asura, zota-ya Nawēnne. ⁶Ba ka koosru mōom niinto banuu la lig-kōba bayi mā'a? La Nawēnne ka yīnni baa ayula yelle. ⁷La baa yāma zuugo zomto, Nawēnne mi ba wuu källe me. Bela ñyā, da zota-ya dabeem, ti yāma tari yōoro gānna niinto zozo'e me. > >

Seka n sakri Azezi, Nawēnne Sia wun sōñe ē me

(Amatie 10:32-33, 12:32, 10:19-20)

⁸< < La mam yeti ya ti nēr-seka woo n ze'ele nērba nēñam yeti ēña de la mam nēra, mam n de Nērsaala* Dayva la mē wun ze'ele Nawēnne malekadōma* nēñam yeti a de la mam nēra. ⁹La nēr-seka woo n si'ise nērba nēñam ti ēña dagi mam nēra, mam mē wun si'ise Nawēnne malekadōma nēñam ti a dagi mam nēra. ¹⁰La nēr-seka woo n tōge Nērsaala Dayva la be'em, Nawēnne wun base a tōon-be'ero taale, la nēr-seka woo n pō'oge Nawēnne Sia*, Nawēnne kān base a tōon-be'ero taale.

¹¹Ba sān yōge ya sēñe ba wēndeto puam, bu na'adōma nēñam, bu ke'endōma nēñam ti ba di ya sarıya, da fabla-ya yan wun lerge se'em, bu yan wun tōge se'em to'oge ya mēña. ¹²Se'ere n soe la, Nawēnne Sia n wun pa'ale ya wakat-ēña yan wun tōge se'em. > >

Bōntarsa n ka tari yem makre

¹³Azezi n tōge ki'ulum na, ti nēra ayula n boe nēr-kuuñjo la puam ye

ē yeti: < < Karēnsāama, yele m kēema ti a dīkε tōma sɔ n ki dee bōn-
sēba la, puɪ bɔ ma m bōnɔ. > > ¹⁴Ti Azezi soke ē yeti: < < Ane n bɔ
mam nōore ti m dena ya sarɪyadita, bu m puta ya bōntarsōm bɔ'ɔra
ya? > > ¹⁵Dee yele nērba la wuu yeti: < < Guusra-ya ya mēŋa, da
εera bōntarsōm zozo'e, se'ere n soe la, la dagɪ nēra n tari bōntarsōm
zo'oge ïyā ti a tari yōvore. > >

¹⁶A yele bela, dee make la makre bɔ ba yeti: < < Buraaga n daan
boe dena bōntarsa, ti a vato bōnkɔɔla māale sōŋa, ¹⁷ti a tē'esε a
putē'erum yeti: < Zē'a ka boe ti m wun sūm m bōnkɔɔla la. Bela ïyā,
mam wun ēŋε la wāne? > ¹⁸Yāŋa yele a mēŋa yeti: < Mam mi mam
wun ēŋε se'em. Mam wun wōre m bā la mε, malge mē bā-kāra, sūm
m bōnkɔɔla, la m sɛla woo. ¹⁹Dee yele m sūurum yeti: M tari
bōntarsōm zo'oge, la wun seke ma paage yuuma zozo'e. Bela m wun
vo'ose mε di dee yū, dee ēŋε sū-yēlga. > ²⁰Ti Nawēnne yele ē yeti:
< Gergo wā, yu'vŋ-ēna wā m wun to'oge fu vɔm na. La āne n wun
sɔna bōn-sēba ti fu bīŋε la? > > ²¹La Azezi le yeti: < < La de la
bela la nēr-seka woo n lagsɪ bōntarsōm bīŋra a mēŋa ïyā, dee ka tara
sɛla sɛla Nawēnne zē'am. > >

Nawēnne n bɪsɪ ti yelle

(Amatie 6:25-34)

²²Bela poorum, Azezi yele a karēnbiisi la yeti: < < Bela ïyā, mam
yeti ya ti ya da fabla ya vɔm yelle, ya wun di sɛla, bu ya wun ye fu-
sēba la yelle. ²³Vɔm yelle gānnɪ dia mε, ti ïyā yelle mē gānna futo.
²⁴Bise-ya gōoro, ba ka butɪ, ba ka lagsɪ bōnkɔɔla, la ba ka tari bāare
bu dia bīŋre zē'a, la Nawēnne n bɔ'ɔrɪ ba dia. La yāma ka tari yōoro
gānna bōn-ēgla zo'oge sɪra? ²⁵Āne n boe ya puam n tā wun pa'ase a
vɔm woglum fēfēe ēn fablɪ la ïyā? ²⁶La yāma sān ka tāna wun ēŋε

bela n de bõn-pıka, bẽm ìyã tı yãma fabla bõn-sẽba n weege la yelle?
²⁷Bıse-ya mõ-puuro n ãn sõña se'em, ba ka tõnnı, ba mẽ ka wugrı
futo. La mam yetı ya me tı, baa naba Asalomõ* na'am n yuun tarı
pãña la, a yuun ka tã'age ye fuugo n ãn sõña wu mõ-puugo ayıla. ²⁸La
Nawẽnne sãn botı mõoro n boe zına dee tı ba wun yõ ba bugum
beere ãna sõña bela, a kãn bıse ya yelle sõña gãna bela me bu? Bẽm
tı yãma ka bõ Nawẽnne sira zo'oge? ²⁹Da base-ya tı yan wun di sela,
bu yan wun yũ sela yelle pake ya. ³⁰La de la nẽr-sẽba n ka mi
Nawẽnne n eeri bõn-bãma wuu. La yãma Sõ Nawẽnne mi tı yãma
boortı bõn-bãma wuu me. ³¹Ɛ-ya Nawẽnne so'olum* na gãna wuu, tı
a wun bõ ya bõn-bãma pa'ase. > >

Bõntarsõm n ka sã'anı

(Amatie 6:19-21)

³²< < M nẽrba, ya ka zo'oge, la da zota-ya dabeem, se'ere n soe la,
la paage ya Sõ Nawẽnne yem me tı a yetı a bõ ya a so'olum. ³³Koose-
ya yãma n tarı sela la dıke ligrı la bõ nasdõma. Ya sãn eñe bela, ya
eeri la bõntarsõm n ka sã'anı. Ɛ-ya bõntarsõm tı ba bõna Nawẽnne
yire wakate wuu, bilam tı nayigba kãn tã'age zũ, tı bõn-mõgla mẽ
kãn tã'age sã'am ba. ³⁴Se'ere n soe la, ya bõntarsõm n boe zẽ'a na, ya
putẽ'era mẽ boe la bilam. > >

Mãasum-ya gu'ura

³⁵Azezi le yetı: < < Mãasum-ya lu ya sagãna ya susı tı ya wun
tã'age tõm, dee yõ ya fitladõma, ³⁶ãna wu nẽrba n gu'uri ba zuudãana
n wun ze'ele pɔgdire kibsa wa'am, tı a sãn wa'am wa wi, tı ba yo'oge
yaña toto bõ ẽ. ³⁷Tõntõn-sẽba tı ba zuudãana wun paam tı ba ze
gu'ura ẽ, tarı zu-yẽlga. Mam yetı ya la sira tı, a wun base tı ba zĩ'ire,
tı zuudãana la mẽña mãasum wa puı ba dia. ³⁸A sãn wa'am sõnsua,

bu bewiine, wa yē ti ba ken gu'ura ē, ba tarı zu-yēlga. ³⁹Bāņe-ya ti yidāana sān mina wakat-seka ti nayiga wun wa zū ē, a wun gu'ura a yire me kān base ti nayiga la kē zū ē. ⁴⁰Bela, yāma mē māasum ze sōņa, ti Nērsaala Dayva*f9* la sēm na wakat-seka ti yāma ka tē'esri ti a wun wa'am na. > >

Tōntōnna mase me ti a ita a zuudāana n boori se'em na

(Amatie 24:45-51)

⁴¹Ti Apıyεeri soke ē yeti: < < Zuudāana, fōn make makre ēna wā la tōma mā'a bu, nērba wuu? > > ⁴²Ti Zuudāana Azezi lerge ē yeti: < < Āne n de tōntōn-sōņo n tarı yem? La de la ēņa ti a zuudāana wun yeti a bısra a yire yelle, bō'ora a tōntōnıba dia wu lan mase, dee sēņe sore. ⁴³Zuudāana la sān leme wa yē ti tōntōnna la tōm wu ēņa n yeke se'em na, tōntōnna la tarı zu-yēlga. ⁴⁴Mam yeti ya la sira ti, a zuudāana la wun dıke ēņa n tarı sela la wuu bō ē me ti a bısra.

⁴⁵La tōntōnna la sān tē'ese yeti, ēņa zuudāana la yuuri me ka kulna, yāņa wē'era tōntōn-bıraasi, la tōntōn-pōgsı, dita, dee yūura bugra, ⁴⁶a zuudāana la wun kulum na daar-seka ti a ka tē'esri ti a wun wa'am, la wakat-seka ti a ka mi, wa di'ige ē. La a wun dige ē me botı a lagum na seba n ka bō ēņa sira la yē sıbgre. ⁴⁷Tōntōn-seka n mi a zuudāana n boori se'em, dee ka māasum bu ka tōm ēn boori se'em na, ba wun wē ē me zozo'e. ⁴⁸La tōntōn-seka n ka mi a zuudāana n boori se'em, dee ēņe sela n mase ti ba wē ē, ba wun wē ē na fēe. Seka ti ba bō ē zo'oge, ba mē wun soke ē yela zozo'e yelle me, la seka ti ba gu'ule ē zo'oge, ba mē wun soke ē halı yela zozo'e yelle gānna me. > >

Nēr-seba n ka dolı Azezi wun welge me la seba n dolı Azezi

(Amatie 10:34-36)

⁴⁹ < < Mam wa'am ti m tũre la bugum dũnia wã zuo, la mam boori ni me zozo'e ti bugum na pũn dare dita. ⁵⁰ La dẽni ti mam yẽ nãmsgo zozo'e wu mam mise la ko'om puam na, la a yelle la wun nãmse mam me halı ti la wa ẽje ba'ase. ⁵¹ Ya tẽ'ese ti mam wa'am ti m boti nẽrba nõore n dena ayıla dũnia zuo bu? Ayei, mam yeti ya ti mam tari la welgre wa'am. ⁵² La, lan pãse leelee wã we'esa, nẽrba banuu sãn bõna yire ayıla puam, nẽrba batã wun welge me sira nẽrba bayi la, ti nẽrba bayi la mẽ sira nẽrba batã la. ⁵³ La so wun sise a dayua, ti dayua mẽ sise a so. La ma wun sise a poyua, ti poyua mẽ sise a ma. La dayua poga wun sise a sira ma, ti sira ma mẽ sise a dayua poga. > >

Bãje-ya bõn-seba n uti leelee wã võore bõke

(Amatie 16:2-3)

⁵⁴ Ti Azezi yele nẽr-kũũjo la yeti: < < Ya sãn yẽ ti wara sobge bõbre ayẽma, ya yeti me tãtã ti saaga wun ni me, ti a siri ni. ⁵⁵ La ya sãn le yẽ ti kusebgo vugri bõbre ayẽma, ya yeti me ti wõlgo lem me, ti wõlgo wun siri paage. ⁵⁶ Pulibsum dõma wã! Yãma bĩsri me mina tẽja, la saazuum yela n ãn se'em. La bẽm ti yãma ka mina bõn-seba n uti leelee wã võore bõke? > >

Malge fu yela la Nawẽnne

(Amatie 5:25-26)

⁵⁷ < < Bẽm ti ya mẽja ka tẽ'ese bãje sela n mase ti ya wun ẽje bõke? ⁵⁸ Fu sãn tara yelle la nẽra, ti a tari fu we'esa sariyadia zẽ'am, mõrge ti ya mãale yelle la sore, ti a da dike fu bõ sariyadita, ti a tãge fu yetõga la dike fu bõ gu'ura, ti a kẽ'ese fõ yu'a deem. ⁵⁹ Mam yeti fu la sira, ti fu kãn yẽ sore yese yu'a deem na, halı ti fu wun wa yõ fu

sānne na wuu ba'ase. > >

13

Teege-ya yem base tōon-be'ero

¹La wakat-ēṅa nērba baseba n wa'am wa tɔge pa'ale Azezi, gɔmna Apilatı n daan botı ba kv Galile nērba baseba wakat-seka tı ba boe mĩ kāabra bɔ'ɔra Nawēnne, tı ba zum yese gaam na kāabgɔ la zum. ²Tı Azezi lerge ba yetı: < < Yāma tē'ese tı Galile nēr-bāma n daan yē nāmsgɔ ēṅa la, bāma n de tōon-be'ero dōma gānna Galile dōma baseba la bu? ³Mam yetı ya tı ayeyı, yāma sān ka teege yem base tōon-be'ero, yāma wuu mē wun sā'am na bela. ⁴La nērba pia la anii tı de-tugma yvun lui kv ba Silo tēṅa la, yāma tē'ese tı bāma n de tōon-be'ero dōma gānna Zerizalem nērba baseba la bu? ⁵Mam yetı ya tı ayeyı, yāma sān ka teege yem base tōon-be'ero, yāma wuu mē wun sā'am na bela. > >

Kēnkāṅa n ka wɔnnı makre

⁶Azezi le make la makre ēna wā yetı: < < Buraaga n tarı kēnkāṅa n sele a va'am pvam, yāṅa wa'am tı a bise a sān tara bie, ka yē sela sela. ⁷Tı a yele va'am na gu'ura yetı: < Bise, yvuma atā n wāna tı mam sēnnı dee ka yēta bie kēnkāṅa wā zuo. Se ē base, tı a yēre la zē'a. > ⁸Tı gu'ura la lerge ē yetı: < Zuudāana, base ē yvun-ēna mā'a, tı mam wun kɔ gilge a tille, ēṅe bugulgo base ē, ⁹la yvune sān kaage tı a wɔm, la ān sōṅa, la a sān ken ka wɔm, fu yāṅa se ē base. > > >

Azezi botı pɔka yē ĩmā'asum vo'osgo daare

¹⁰Azezi daan boe la Zifdōma wēndeem vo'osgo* daare zāsna nērba, ¹¹tı pɔka ayula bɔna mĩ tı kulkā'arga tara ē botı a dena kobgo paage

yuumma pia la anii, yũre ka tãna wun dɔ'ɔge. ¹²Ti Azezi yẽ pɔka la, wi
 ẽ yeti: < <Pɔka, fu yẽ yolsgo, fu bã'aga la base fu.> > ¹³Dee dɩke a
 nu'usi pagle pɔka la zuo, ti bã'aga la base pɔka la bilam mẽɲa, ti a
 tã'age dɔ'ɔra, yãɲa pẽgra Nawẽnne. ¹⁴Ti wẽndeego la naba sũure isge
 la Azezi, ẽɲa n boti pɔka la yẽ ãmã'asum vo'osgo daare la ãyã. Ti a
 yele nẽrba la yeti: < <Dabsa ayoobi n boe ti ya tãna wun tɔm.
 Wa'am-ya dabs-bãma puam wa tibe ya mẽɲa, dee da senna vo'osgo
 daare tibra ya mẽɲa.> > ¹⁵Ti Zuudãana Azezi lerge ẽ yeti:
 < <Pulibsum dõma wã! Yãma nẽra woo ka lorgru a lolga, bu a bõɲa
 senna yũula ko'om vo'osgo daare me bu? ¹⁶Ti pɔg-ẽna wã n de
 Abraham* yuɲa ti Asũtãana* lu ẽ yuumma pia la anii wã, la ka nari ti
 mam lorge ẽ vo'osgo daare?> > ¹⁷La ẽɲa n yele bela la, ti yãnne yõke
 a be'eba la wuu, ti nẽr-kuuɲo la wuu sũure ẽɲe yelum la a tɔon-yãlma
 seba wuu ti a ẽɲe la.

Nawẽnne so'olum wõn na bẽm?

(Amatie 13:31-33, Amarki 4:30-32)

¹⁸Ti Azezi yele ba yeti: < <Nawẽnne so'olum* wõn na bẽm? La
 mam wun dɩke la bẽm make la ẽ? ¹⁹A ãn wu sɔ'ɔro biire ti nẽra bure a
 va'am puam, ti a bi lebge ti-kãte. Ti niinto senna te'era ba tugro a
 wila zuo.> >

²⁰La a le yeti: < <Mam wun le dɩke la bẽm make la Nawẽnne
 so'olum? ²¹A ãn wu dãbille ti pɔka dɩke gaam na borbori zom la-kãra
 batã wẽ, ti dãbille la boti ba wuu uke.> >

Nẽrba n wun ẽɲe se'em kẽ Nawẽnne so'olum

(Amatie 7:13-14, 21-23)

²²Azezi daan we'esti la Zerizalem dola tẽn-kãra la tẽn-pɩgsu puam

zāsna nērba. ²³Ti nēra soke ē yeti: << Zuudāana, nērba fēe mā'a n wun yē fāare bu? >> Ti a lerge ba yeti: ²⁴<< Narge-ya pāṅa doose zanōre n ān mika kē Nawēnne so'olum puam, ti mam yeti ya me ti nērba zozo'e wun wa eera me ti ba kē, la ba kān yāṅe. ²⁵La wakate sān paage, yidāana wun isge yu yaṅa la me, la ya sān weege yēṅa, ya wun wē'era me kōkō yeti: <Zuudāana, yo'oge ti ti kē.> La a wun lerge ya yeti: <Mam ka mi yāma n ze'ele zē'a.> ²⁶La ya wun yele ē yeti: <Dagi tōma la fōn n daan lagum dita, dee yūura, ti fu sēna tōma tēṅam zāsna nērba?> ²⁷La a wun le lerge ya yeti: <Mam ka mi yāma n ze'ele zē'a, fōrge ya mam zē'am, yāma de la tōon-be'ero dōma.> ²⁸La ya wun ka yē Abraham*, la A'izaki, la Azakōbi, la Nawēnne nōtō'osrība* wuu, ti ba boe Nawēnne so'olum puam, la yāma wun weege la yēṅa kella dee dīke ya nu'usi gi nōorum. ²⁹La nērba wun yese dapō-bōba, la zanō-bōba, la zūvgō bōba, la gōbga bōba wa'am wa zī'ire Nawēnne so'olum puam di. ³⁰Bāṅe-ya ti nērba baseba n de poorum dōma wun lebge nēṅam dōma, ti baseba n mē de nēṅam dōma wun wa lebge poorum dōma. >>

Azezi sūure sã'am me Zerizalem dōma ïyã

(Amatie 23:37-39)

³¹La wakat-ēṅa ti Farisi* dōma baseba sēṅe ka yele Azezi yeti: << Base kalam dee sēṅe zē'a ayēma, ti Naba A'erōdi* eeri fu me ti a ku.>> ³²Ti a lerge ba yeti: << Sēṅe-ya ka yele yem be'ero dāana la yeti: <Zina la beesã, mam wun dige kulkā'arsi me ti ba yese, dee boti bā'adōma yē ïmã'asum, la dabsa atã daare ti mam wun ba'ase m tōoma la wuu.> ³³La dēni ti mam sēṅe m sēnne na zīna, la beesã, la dabsa atã daare, se'ere n soe la, la ka mase ti Nawēnne nōtō'ōsa ki zē'a ayēma, sān dagna Zerizalem puam.

³⁴Zerizalem nērba, Zerizalem nērba, yāma kuvri la Nawēnne nōtɔ'ɔsrɪba, dee lɔbra seba ti Nawēnne tōm ba ya zē'am la kuga kuvra. Nōore faa ti mam boori ti m lagse ya wu nō-yā'aŋa n lagsri a kɔma ūna a kempagsi puam se'em na, ti ya ka bɔɔra. ³⁵Bela, Nawēnne wun base ya tēŋa bɔ ya, ti a lebge daboto. Mam yeti ya ti ya kān le yē mam, halɪ ti ya wun wa yeti: < Pēge-ya seka n sēm na Zuudāana Nawēnne yu'ure la. > > >

14

Azezi boti buraaga yē ĩmā'asum vo'osgo daare

¹Vo'osgo daare ayɪla ti Azezi daan sēŋe Farisi* dōma naba ayɪla yire ti ba di. Tɪ nērba la n boe mĩ na bɪsra ěn wun ěŋe se'em. ²La buraaga ayɪla n boe mĩ ti ĩ-fvɔsŋɔ bā'aga tara ě, ti a zε Azezi nēŋam. ³Tɪ Azezi soke lɔɔ* karēnsāandōma, la Farisi dōma la yeti: < < Sore boe ti nēra boti nērba yē ĩmā'asum vo'osgo* daare bu, sore ka boe? > > ⁴Tɪ ba sīna. Tɪ Azezi boti buraaga la yē ĩmā'asum, base ě ti a kule. ⁵Dee soke ba yeti: < < Ane n boe yāma puam ti a dayva, bu a lɔlga wun lui lua puam vo'osgo daare ti a kān zoe tɔtɔ sēŋe ka yaage ě? > > ⁶Tɪ ba make ti ba lerge ě koŋe.

Dena-ya sik-m-mēŋa dōma

⁷Tɪ Azezi yē nēr-seba ti ba wi ti ba wa'am wa di la n loosri zē'e-sōma zĩ'ita, ti a make makre yeke ba yeti: ⁸< < Nēra sān ěŋe pɔgdire kibsa wi fo, da kān sēŋe ka zĩ'ire zē'e-sōŋɔ, tā ti a mē wi la nēra n gānnɪ fōn. ⁹Tɪ seka n wi ya wuu la, da wa'am wa yeke fu yeti: < Isge, dee ti ěna zĩ'ire. > Tɪ fu yāŋa isge sēŋe ka zĩ'ire poorum poorum la yānne. ¹⁰Nēra sān wi fo, sēŋe ka zĩ'ire poorum, ti seka n wi fu la sān wa'am yē fɔ, a wun yeti: < M sure, wa'am wa zĩ'ire nēŋam. > Bela ti

fu wun yē nā'asgɔ nēr-seba ti fu zī la ba la zē'am. ¹¹Nēr-seka woo n zēkri a mēŋa, Nawēnne wun sike ē, la nēr-seka n sikri a mēŋa, Nawēnne wun zēke ē. > >

¹²La Azezi yele seka n wi ē na yeti: < <Fu sãn yeti fu ēŋe dia wuntæŋa, bu yu'ɔŋɔ wi nērba ti ba wa'am wa di, da wi'ira fu sirdōma, bu fu sɔbiisi, bu fu nērba, bu fu sawiiba n de bōntatba, se'ere n soe la, ba mē wun wa ēŋe bela daar-seka mē wi fo lebse bela sãnne. ¹³Fu sãn yeti fu ēŋe dia wi nērba ti ba wa'am di, wi nasdōma, la kɔɔrnɔ, la wɔbsɪ, la fɔɔsɪ. ¹⁴Fu sãn ēŋe bela, fu wun tara zu-yēlga, se'ere n soe la, ba kãn yãŋe ēŋe lebse fo. Bela, wakat-seka ti Nawēnne wun boti nēr-seba n ēŋe sela n mase a yem na vo'oge la, fu wun yē yɔɔrɔ. > >

Kibs-kāte makre

(Amatie 22:1-10)

¹⁵La nērba la n lagse zēa dia zē'a la Azezi la, ba wōm ēn yele se'em na mē, ti nēra ayula yele ē yeti: < <Nēr-seka woo n wun po di dia Nawēnne so'olum* puam na tarɪ zu-yēlga. > > ¹⁶Tɪ Azezi make makre bɔ ē yeti: < <Buraa ayula n daan boe, ēŋe dia zozo'e, wi nērba zozo'e ti ba wa'am wa di. ¹⁷Tɪ dia la wakate paage, ti a tōm a tōntōnna yeti, a sēŋe ka yele nērba la ti ēŋa yeti: <Wa'am-ya ti mam māasum ba'ase mē gu'ura ya. > ¹⁸Tɪ ba nēra woo yeta lan pake ēŋa se'em, ti ēŋa sɔsra sugri. Pɔspɔsɪ dāana la yele ē yeti: <Mam da la va'am, ti m sēŋe ka buse lan ãn se'em, bela ti mam sɔsra ē sugri. > ¹⁹Tɪ ayula yeti: <Mam da la nii-kɔɔrsɪ pia bɔɔra ti m make ba bayi bayi kɔ buse, bela ti mam sɔsra ē sugri. > ²⁰Tɪ ayēma mē yeti: <Mam di la pɔg-sāana, bela ti mam kãn yãŋe wa'am. >

²¹Tɪ tōntōnna la lebe ka tɔge bela bɔ a zuudāana la. Tɪ a zuudāana

la sũure yĩige, ti a yeke a tũntũnna la yeti: <Yese tũtũ sũnje tũnja la sorũũũ zuto ka tari nasdũma, la kũũũũ, la fũũũũ, la wũũũũ wa'am ti ba di. > ²²Ti tũntũnna la sũnje ka ũnje a zuudũana la n yeke se'em na, dee yeke ũ yeti: <M zuudũana, fũn yeti mam ũnje se'em na, mam ũnje mũ, la zũ'a ken dee mũ. > ²³Ti zuudũana la le yeke a tũntũnna la yeti: <Yese tũnja la puam sũnje sorũ-pũũũ la wuu zuo, ka mũũũũ tari nũrba la wa'am ti ba kũ ti mam yire puũ. >

²⁴La mam yeti yũma mũ ti nũr-sũba ti mam dũnje yeke ba ti ba wa'am, ti ba zagũ la, ba nũra nũra kũn le malũ di mam dia la. > >

Azezi karũbia n mase ti a ũnje se'em

(Amatie 10:37-38, 5:13, Amarkũ 9:50)

²⁵Azezi daan sũnnũ mũ, ti nũr-kũũũũ dũla ũ, ti a gelge yeke ba yeti: ²⁶< <Nũra sũn yeti a doose mam dee ka nũnje mam gũnna a sũ, la a ma, la a puũga, la a kũma, la a sũbiisi, la a tũpa, bu a sũn ka nũnje mam gũnna a mũnja wũm, a kũn tũ'age dena mam karũbia. ²⁷La seka woo n ka sake nũmsũũ wũ nũra n zeeri a kũm dũ-puũũũ* dũla mam, a kũn tũ'age dena mam karũbia.

²⁸Ya mi ti nũra sũn bũna ya puam bũũra ti a mũ de-tũgma, a wun dũnje zũ'ire mũ geele bũũ, ũn tari se'em na wun seke ti a yũnje mũ ba'asũ, bu la kũn seke? ²⁹La sũn dagna bela, a sũn ũũũũ ũũũũ dee ka yũnje mũ ba'asũ, seba wuu n yũ bela la wun la ũ mũ ³⁰yeti: <Nũr-ũna ũũũũ la deego, dee ka yũnje mũ ba'asũ. > ³¹Bu naba sũn we'esa ti a zeũũ la a na-tadũana, dũnũ ti a dũnje tũ'ese bũũ, ũnja n tari nũrba tũspia la, a wun tũ'age zeũũ la na-seka n tari nũrba tũspisi, bu a kũn tũ'age? ³²La a sũn bũnje ti a kũn tũ'age, naba ayũma la n ken zũage la, a wun dũnje tũm na a tũntũnũba ti ba sũnje naba la zũ'am ka soke ũ bũũ, bũma wun ũnje la wũne ti zeũũ la ba'asũ. ³³Bela mũ, yũma nũr-

sɛka woo n ka basri bōn-seba wuu ti a tari la, ka tā wun dena mam karēmbia.

³⁴Yaarum ān sōŋa mɛ, la a sān sabgɛ, ba wun ɛŋɛ la wāne boti a le āna yēlvu? ³⁵A ka le tara yōoro la tēŋa, la a ka tā wun dena bugulgo mē, ba lobri ɛ basra mɛ. Sɛka n wōm yetɔga wā, a selse sōŋa > >

15

Pesgo, la lagfɔ n bɔi makre

(Amatie 18:12-14)

¹Lampo-t'ɔsrɪba*, la tōon-be'ero dōma zozo'e n daan sēŋɛ Azezi zē'am ti ba selse a yetɔga. ²Ti Farisi* dōma, la lɔɔ* karēnsāandōma la yōnna yeti: < < Bura-ēna wā to'ori la tōon-be'ero dōma, dee dita la ba. > > ³Ti Azezi make makre wā soke ba yeti: ⁴< < Bura-kāna n boe ya pvam tara piisi kɔbga, ti ayula sān bɔi, ti a kān lagse piisi piswei la aweɪ la base dūnsēkam, dee sēŋɛ ka ɛ ayēma n bɔi la halɪ yāŋa yē ɛ?

⁵La a sān yē ɛ, a wun yōke ɛ mɛ buke la sū-yēlga. ⁶La a sān kule yire, a wun wi a surdōma, la a sawiiba mɛ yele ba yeti: < Naagɛ-ya la mam ti ti ɛŋɛ sū-yēlga, se'ere n soe la, mam yē m pesgo la n bɔi la mɛ. >

⁷Bela mam yeti ya ti tōon-be'ero dāana ayula sān teege yem base tōon-be'ero, sū-yēlga boe Nawēnne yire pvam la bela gānna nēr-sōma piswei la aweɪ n ka eeri ti ba teege yem.

⁸Bu, pɔg-kāna n boe wun tara lig-kōba*f10* pia, ti ayula sān bɔi, ti a kān yō fitla puse deego la ɛ lagfɔ la sōŋa halɪ wa yē ɛ? ⁹La a sān yē ɛ, a wun wi a surdōma, la a sawiiba mɛ yele ba yeti: < Naagɛ-ya la mam ti ti ɛŋɛ sū-yēlga, se'ere n soe la, mam yē m lagfɔ la n bɔi la mɛ. > ¹⁰Bela mam yeti ya ti tōon-be'ero dāana ayula sān teege yem

base tōon-be'ero, sū-yēlga boe Nawēnne malekadōma* zē'am na
bēla. > >

Budibla n base a sɔ yire, la a kēema makre

¹¹Ti Azezi le yele ba yeti: < < Bura n daan boe tara a dayɔɔsi bayi.
¹²Ti yɔbga la yele a sɔ yeti: < M sɔ, pɔɔ fɔ bōntarsōm na bɔ mam m
bōnɔ. > Ti a sɔ pɔɔ a bōntarsōm na bɔ ba. ¹³Ti la ēɲe dabsa fēe, ti
yɔbga la lagse a bōntarsōm na wuu yese sēɲe tēɲa n zāage, ka tōm
tōon-yooro sā'am ēn tari sela la wuu. ¹⁴La ēn sā'am a bōntarsōm na
wuu ba'ase la, kɔm kāte n wa'am tēɲa la pɔam, ti a ka le tara sela
wun di. ¹⁵Ti a sēɲe tēɲa la nēra ayɔla zē'am ti a dɔke ē ti a tōnna. Ti
nēra la dɔke ē boti a sēɲe mōom ka gu'ura a kurkurdōma. ¹⁶Ti a kɔm
dōnna ti a bɔɔra ti a di kurkuri dia. Ti nēra nēra ka bɔ ē. ¹⁷Ti a tē'ese
a sūurum yeti: < Mam sɔ tari tōntōnɔba zo'oge me ti ba dita tɔgra dee
basra, dee ti mam bɔna kalam kiira la kɔm. > ¹⁸Yāɲa yeti: < Mam
wun lebe kule la m sɔ yire ka yele ē yeti, mam tōm na Nawēnne la
fōn be'em, ¹⁹mam ka le mase ti ba wi mam ti fɔ bia. lta mam wu fɔ
tōntōnɔba la ayɔla. > ²⁰Dee isge kulla a sɔ yire. La ēn nān boe
zāazāare la, ti a sɔ la yē ē, ti a ninbāalga yōke ē, ti a zoe tu'ɔse kōke
ē, mōbge ē. ²¹Ti bia la yele ē yeti: < M sɔ, mam tōm na Nawēnne la
fōn be'em. Mam ka mase ti ba le wi'ira mam ti fɔ bia. > ²²Ti a sɔ la
yele a tōntōnɔba yeti: < Sēɲe-ya tɔtɔ ka tari fu-seka n ān sōɲa gānna
la wa'am wa ye ē, dee dɔke nutva pire a nu'ubiire, dee dɔke tagra pire
ē. ²³La ya yōke lɔl-polle n nōbe wa'am wa kv ti ti ēɲe dia di, dee ēɲe
sū-yēlga. ²⁴Se'ere n soe la, mam bia wā daan wōn na a ki mɛ, dee le
vo'oge. A daan bɔɔ mɛ, ti ti le yē ē. > Ti ba yāɲa ita sū-yēlga.

²⁵Wakat-ēɲa ti a dayɔ-kēema la boe la va'am. La ēn lebe kulna wa
lem yire la, a wōm na duursi ti ba wē'eri wa'ara. ²⁶Ti a wi a sɔ

tōntōnna ayula soke ē yeti: < Bēm n ēņe? > ²⁷Ti tōntōnna la lerge ē yeti: < Fu yɪbga la n wa'am, ti fu sɔ kv lɔl-polle n nōbe, ēņa n yē fu yɪbga la ti a tari ɪmā'asum na ɪyā. > ²⁸Ti kēema la sūure yīige hal. Ti a zagse ti ēņa kān kē yire. Ti a sɔ yese belem ē yeti, a wa'am wa kē. ²⁹Ti a lerge a sɔ la yeti: < Bɪse, yvuma zozo'e ti mam tōnni fu tōoma, dee ka zagse fu nōore baa daare ayula, la fōn ka bɔ mam bulla baa daare ayula ti m kv ti mam la m sɪrdōma ēņe sū-yēlga. ³⁰La fu bi-ēna wā n dɪke fu bōntarsōm sēņe ka tōm yalsi tōoma sā'am ba wuu dee kulum wā, fu kv la lɔl-polle bɔ ē. > ³¹Ti a sɔ lerge ē yeti: < M bia, fōn boe la mam zē'am daare woo. La mam n tari sela wuu la de la fōn bōnɔ. ³²La, la mase me ti ti ēņe sū-yēlga sɪrum, se'ere n soe la, fu yɪbga wā daan wōn na a ki me, dee le vo'oge. A daan bɔi me. Ti ti le yē ē. > > >

16

Tōntōnna n de yem dāana makre

¹Ti Azezi le yele a karēnbiisi la yeti: < < Buraaga n daan boe dena bōntarsa, tara tōntōnna ti a bɪsra a yire yelle. Ti ba wa'am wa yele bōntarsa la yeti, tōntōnna la sā'anɪ a bōntarsōm na me. ²Ti zuudāana la wi a tōntōnna la yeti: < Bēm ti ba tɔgra fōn yelle ti mam wōnna wāna? Geele pa'ale ma fōn ēņe mam bōntarsōm na se'em. Fu kān le bɪsra mam yire yelle. > ³Ti tōntōnna la yele a mēņa yeti: < Mam zuudāana la yeti a dige mam a tōoma la pvam me, mam wun ēņe la wāne? Kva? Mam ka tari pāņa wun kɔ. La yānne n wun tara mam la sosgo. ⁴Mam mi mam wun ēņe se'em, ti a sān wa dige ma, m tara sɪrdōma n wun to'oge mam ba yie sōņa. > ⁵Ti a wi a zuudāana sānditba ayula ayula, soke pɔspɔsi dāana la yeti: < Fōn tari mam

zuudāana sānne la wāne? > ⁶Ti a lerge yeti: < Mam tari a sānne na kaam dugl-kāra kɔbga. > Ti a yele ē yeti: < To'oge fu sānne gōṅṅ tɔtɔ zī'ire gulse yeti, kaam dugl-kāra pinuu. > ⁷Dee soke ayēma yeti: < Fōn tari mam zuudāana sānne na wāne? > Ti a lerge yeti: < Mam tari a sānne na mui bɔra kɔbga. > Ti a yele ē yeti: < To'oge fu sānne gōṅṅ gulse yeti pinii. > ⁸Baa la tōntōnna wā ɔrgɔ n ka doose sore la, a zuudāana pēge ē mɛ, ēn tōm na yem na iyā. Dūni-ēna wā dōma tari la yem tōnna la taaba gānna nēr-seba n bāṅe Nawēnne peelem.

⁹Bela iyā, mam yeti ya ti ya dīke dūnia bōntarsōm yōge sirdōma, ti dūnia bōntarsōm na sān wa ba'ase, ba wun to'oge ya ti ya bɔna Nawēnne yire wakate n ka ba'asri. > >

Bōntarsōm sira sira

¹⁰< < Nēr-seka woo n de sira dāana bōn-pɔgsɔ puam, mē de la sira dāana bōn-kāra puam. La seka n ka de sira dāana bōn-pɔgsɔ puam, mē ka de sira dāana bōn-kāra puam. ¹¹Bela, ya sān ka dena sira dōma dūnia wā bōntarsōm puam, āne n wun dīke bōntarsōm sira sira gu'ule ya? ¹²La ya sān ka dena sira dōma la bōn-seba n dagi ya mēṅa bōnɔ, āne n wun dīke bōnɔ bɔ ya ti la dena ya mēṅa bōnɔ? ¹³Tōntōnna ka tā wun sake zuudāandōma bayi. A wun sise ayula mɛ, dee nōṅe ayula, bu a wun nanna ayula la mɛ, dee pɔ'ɔra ayula la. Bela, yāma ka tā wun sake Nawēnne n de ya Zuudāana, dee boti bōntarsōm mē dena ya zuudāana. > >

Nawēnne lɔɔ, la a so'olum yelle

(Amatie 11:12-13, 5:31-32, Amarki 10:11-12)

¹⁴Farisi* dōma n nōṅe ligri la n wōm bela la, ba la'ari Azezi mɛ. ¹⁵Ti Azezi yele ba yeti: < < Yāma pa'ali ya mēṅa nērba nēṅam wu ya de la nēr-sōma. La Nawēnne mi ya putē'era n ān se'em mɛ. Bōn-seka ti

nērsaalba pēgru la, de la bōn-dēgru Nawēnne zē'am.

¹⁶Amoyisi loɔ*, la Nawēnne nōtɔ'ɔsrɪba n yuɔn pa'alɪ nērba ban wun āna se'em, ka paage wakat-seka ti Azā wa'am na. Lan pɔse Azā n misri nērba ko'om puam na, ba mōole Nawēnne so'olum* kō-yēlga me, ti nēra woo nargra pāŋa ti a kē. ¹⁷La, la de la nāana ti saazuum la dūnia tole gāna ti Nawēnne loɔ la bōn-pɪka ayɪla bɔɪ.

¹⁸Nēr-seka woo n base a pɔga, dee le di pɔka ayēma, a ēŋe la be'em wu nēra n gā'arɪ la a tadāana pɔga, la seka woo n di pɔka ti a sɪra base mē ēŋe la be'em. > >

Bōntarsa, la nasa Alazaari makre

¹⁹Tɪ Azezi yeti: < < Bōntarsa n daan boe, yeera futo n ba āna sōŋa, dee tara sela woo daare woo ti la seke. ²⁰Tɪ nasa ayɪla mē daan bɔna, ti a yu'ure dena Alazaari, ti a iyā wuu tara nōtɔ. A daan ēn gā la bōntarsa la zanōrum, ²¹bɔɔra ti a di bōntarsa la n diti ti di-zōra luta la. Tɪ baasi sēna lēla a nōtɔ la. ²²Tɪ Alazaari wa ki. Tɪ Nawēnne malekadōma* tari ē sēŋe Nawēnne yire Abraham* zē'am. Tɪ bōntarsa la mē wa ki, ti ba laage ē.

²³Tɪ bōntarsa la daan bɔna bug-tēŋa* nāmsra, yāŋa gorge yē Abraham halɪ zē'a n zāage, ti Alazaari zēa a sakukɔ. ²⁴Tɪ bōntarsa la wi Abraham yeti: < M sɔ Abraham, zoe m ninbāalga, dee tōm Alazaari ti a dɪke a nu'ubiire tē'egē ko'om mā'ale m zɪlɪŋa, se'ere n soe la, mam boe la bugum puam nāmsra. > ²⁵Tɪ Abraham yele ē yeti: < M bia, tēegē ti fōn daan boe dūnia zuo wakat-seka la, fōn daan tari bōn-sōma me, dee ti Alazaari yēta toogo. La lēle wā, a sūure mā'age me, dee ti fōn yāŋa nāmsra. ²⁶La bōn-seka n pa'ase, bog-ko'ogo n beje tōma la yāma, ti nēra sān bɔɔra ti a ze'ele kalam sēŋe yāma zē'am, a kān tā'age. La nēra mē sān bɔɔra ti a ze'ele yāma zē'am

wa'am tōma zē'am, a kǎn tā'age. > ²⁷Ti a lerge Abraham yetu: <M sɔ Abraham, la sǎn dɛna bɛla, mam sosɾi fu mɛ ti fu tōm Alazaari ti a sɛŋɛ mam sɔ yire, ²⁸ti mam tari la sɔbiisi banuu, a sɛŋɛ ka kǎ'an ba, ti ba mɛ da wa'am nǎmsgɔ zē'a wǎ. > ²⁹Ti Abraham yeke ɛ yetu: <Ba tari Amoyisi* la Nawɛnne nōtɔ'ɔsrɪba* n gulse gōn-sɛba la mɛ. La mase ti ba sake la gōn-bǎma yetɔga. > ³⁰Ti a lerge ɛ yetu: <M sɔ, ayɛi, nɛra sǎn vo'oge lebe sɛŋɛ ba zē'am, ba wun teege yɛm base tōon-be'ero. > ³¹Ti Abraham lerge ɛ yetu: <Ba sǎn kǎn sake Amoyisi, la Nawɛnne nōtɔ'ɔsrɪba la nōore, baa nɛra n ki sǎn vo'oge lebe, ba kǎn sake. > > >

17

Ti da boti nɛra base Nawɛnne sore, la ti base taaba tōon-be'ero taale

(Amatie 18:6-7:21-22, Amarki 9:42)

¹Ti Azezi yeke a karɛnbiisi la yetu: <<La ka tā ti bōn-sɛba n pǎ'asɾi nɛrba ti ba basra Nawɛnne sore la ka wa'am. La nɛr-sɛka n wun boti bōn-bǎma wa'am na wun yɛ toogo. ²Ba sǎn dɪke nɛere kug-kǎte lu yulse a yugla lobe ɛ base ko-kǎte puam, n sōi ɛŋa n wun boti bi-pɪka ayɪla base Nawɛnne sore. ³Guuse-ya ya mɛŋa.

Fu sɔbia sǎn tōm be'em, fu kǎ'an ɛ. La a sǎn teege yɛm base tōon-be'ero la, fu base ɛ taale. ⁴La a sǎn ɛŋɛ fu be'em nōore ayopɔi daare ayɪla, dee leme fu zē'am nōore ayopɔi wa yetu: <Mam tōm na be'em, bɔ mam sugri >, dɛni ti fu base ɛ taale. > >

Ti bɔ Azezi sɾa

⁵Ti Zuudǎana Azezi karɛnbiisi pia la ayi la yeke ɛ yetu: <<Boti ti bɔ fu sɾa zo'oge. > > ⁶Ti Zuudǎana la yeke ba yetu: <<Ya sǎn bɔ

mam sura fēe wu sɔ'ɔɔ biire la, ya tā wun yeke kēnkāŋa wā ti a vōoge sēŋe ka sele mōgre puam ke, la a wun sake ya nōore me. > >

Tōntōnna mase me ti a tōm a tōone

⁷ < < Tē'esε-ya bise, nēra sān bōna yāma puam tara tōntōnna ti a kōra, bu gu'ura a dūnsi, ti tōntōnna la sān ze'ele va'am wa'am, a wun yeke ē me yeti, wa'am wa di bu? ⁸ Ayei, a wun yeke ē yeti: < Duge m dia, dee teege fuugo ye, tari dia la wa'am wa bō ma ti m di. M sān di dee yū ba'ase, ti fu mē yāŋa di dee yū. > ⁹ La zuudāana la n yeke tōntōnna la ti a ēŋe se'em, ti a ēŋe la, zuudāana la kān pu'use ē. ¹⁰ Bela mē, ya sān ēŋe sela woo ti Nawēnne yeke ya ti ya ēŋe la, ya yeti: < Tōma wen dena la tōntōnba, tōma ka nari pu'usgo, se'ere n soe la, la de la ti tōoma, la mase me ti ti tōm. > > >

Azezi boti kōnkōma pia yē imā'asum

¹¹ Azezi daan boe la sore we'esa Zerizalem dōla Samaari* la Galile tēŋasuka, ¹² paage tēŋa ayula puam, ti kōnkōma* pia tu'usra ē, ze'ele kēnkēŋa ¹³ kaasra yeti: < < Zuudāana Azezi, zoe ti ninbāalga. > > ¹⁴ La ēn yē ba la, ti a yeke ba yeti: < < Sēŋe-ya kāabgo* kēma la zē'am ti ba ka bise ya iyā la n ān se'em. > > La ban sēnni we'esa la, ti bā'asi la base ba, ti ba āna sōŋa. ¹⁵ La ba nēra ayula n yē ti a kōnkōm na base ē na, ti a lebra Azezi zē'am dee tōgra ke'enke'em pēgra Nawēnne, ¹⁶ sēŋe ka ka dūma dūke a nēŋa vōgle tēŋa Azezi nēŋam pu'use ē. A daan de la Samaari* nēra. ¹⁷ Tī Azezi yeti: < < La dagi bāma pia n yē imā'asum? Tī bawei la bōna la be? ¹⁸ Bēm ti ēna n de sāana la mā'a n leme wa'am ti a pu'use Nawēnne a yel-sōnne? > > ¹⁹ Dee yeke ē yeti: < < Fōn bō mam sura la n boti fu yē fāare, isge sēŋe. > >

Nawēnne n diti na'am se'em

(Amatie 24:23-28, 37-41)

²⁰Farisi* dōma soke Azezi me ti ba bāṅe wakat-seka ti Nawēnne wun di na'am nērba sukam. Ti a lerge ba yetu: < < Nawēnne sān wa dita na'am, la ka de sela ti nērba tā wun yē la nini. ²¹La nēra kān yetu: < Bise-ya, a boe la kalam >, bu < a boe la ke >. Bāṅe-ya ti Nawēnne boe la ya tēṅasuka dita na'am. > >

²²La Azezi yele a karēnbiisi la yetu: < < Wakate sēm me ti ya wun bōra ti ya yē Nērsaala Dayva*f11* la, baa la sān dena daare ayula, la ya kān yē ē. ²³La nērba wun yele ya yetu: < Bise-ya, a boe la ke >, bu < bise-ya, a boe la kalam. > Da kān sēṅe-ya, da doose-ya ba. ²⁴Se'ere n soe la, daar-seka ti Nērsaala Dayva la wun leme na, la wun āna wu saaga n ēn yāke saazuum ti la nēege zē'a wuu se'em na. ²⁵La, lan dēṅe ti bōn-bāma wun ēṅe, dēni ti a nāmse zozo'e ti zamāan-ēna wā dōma zagse ē.

²⁶Wakat-seka ti Nērsaala Dayva la wun leme wa'am na, la wun āna wu Anoe* wakate ti la yuun ān se'em na. ²⁷Nērba yuun diti me, dee yūura, ti buraasi dita pōgba, ti pōgsi mē ɛlla sūrba, ti la wa paage daar-seka ti Anoe kē ōorṅ-kāte la puam, dee ti ko'om yāṅa wa'am wa pure zē'a wuu libe nērba wuu ti ba ki. ²⁸La mē wun āna wu Alotu* wakate n yuun ān se'em na. Ba yuun diti me, dee yūura, dee da'ara, dee kōsra, dee buta, dee mēta, ²⁹ka paage daar-seka ti Alotu fōrge Sodom tēṅa la, dee ti bugum n diti kidibre ze'ele saazuum lui tēṅa ku ba wuu. ³⁰Nērsaala Dayva la lemṅo daare la mē wun di'ige ba la bela. ³¹Daar-ēṅa, nēr-seka n boe gōsgo dee ti a loṅro bōna deego puam, a da sige bōra ti a ze'ele dīke ba zoe. La nēr-seka n boe a va'am, da lebe kule. ³²Tēege-ya lan yuun ēṅe Alotu* pōga se'em na. ³³Nēr-seka woo n boori ti a gu a vōm, a wun koṅe ē, la nēr-seka n sake ti a koṅe a vōm, a wun yē ē.

³⁴Mam yeti ya ti nērba bayi sãn gã sōṅɔ ayila puam yu'ɔṅɔ, ba wun dıke ayila, dee base ayēma. ³⁵La pɔgsı bayi sãn bɔna nēerum nēena, ba wun dıke ayila, dee base ayēma. ³⁶((Buraası bayi sãn bɔna va'am, ba wun dıke ayila, dee base ayēma.)) > >

³⁷Tı karēnbiisi la soke Azezi yeti: < < Zuudāana, bōn-ēna wun ēṅɛ la be? > > Tı a lerge yeti: < < Zē'e-seka ti bōn-ki'ısi boe la, zē'e-ēṅa ti zōa lagsrı taaba. > >

18

Pɔkōore, la sarıyadita makre

¹Tı Azezi make makre pa'ale ba ti ba sɔsra Nawēnne wakate wuu da base, ²yele ba yeti: < < Sarıyadita n daan boe tēṅa ayila ka zɔta Nawēnne, dee ka nanna nērba. ³Tı pɔkōore mē bɔna tēṅa la puam sēnna a zē'am wakate wuu yeti ē ti: < Sōṅɛ ma ti m yē buurɔ m be zē'am. > ⁴La pɔkōore la sēṅɛ ka sose ē na nōor-faa, ti sarıyadita la ka sōṅɛ ē. La pɔkōore la ēn ken sēnna sɔsra ē na, sarıyadita la wa yele a putē'erum me yeti: < Baa mam ka zoti Nawēnne, dee ka nanna nērba la, ⁵pɔkō-ēna n sēnni dāana mam se'em wā, mam wun isge me sōṅɛ ē. La sãn dagna bela, a wun sēnna me nāmsra mam, a kãn base. > >

⁶Tı Zuudāana Azezi le yeti: < < Bıse-ya sarıyadita la n de nēr-be'ego la n yele se'em. ⁷La sãn dena bela, Nawēnne kãn sōṅɛ nēr-seba ti a looge la n sosrı ē wuntēṅa la yu'ɔṅɔ la, bɔ ba buurɔ gānna bela? A wun yuuge me dee sōṅɛ ba bu? ⁸Mam yeti ya me ti a wun wa sōṅɛ ba me tɔɔ. La Nērsaala* Dayva la sãn wa leme dūnia zuo, a wun yē nērba n bɔ ē sira me bu? > >

Farisi nēra, la lampo-tɔ'ɔsa makre

⁹Azezi le make la makre ayēma bɔ nēr-seba n tē'esrı ti bāma de la

nēr-sōma nē'esra nērba baseba la, yeti: ¹⁰<< Buraasi bayi n sēje Wēnde-kātum na ti ba ka pu'use Nawēnne, ayula de la Farisi* nēra, ti ayēma dena lampo-t'ɔsa*. ¹¹Ti Farisi nēra la ze saazuo pu'usra a sūurum yeti: <Nawēnne, mam pu'usrɪ fu, mam n ka wōn na nērba baseba la n ān se'em na, n de nayigba, bu nēr-be'ero, bu nērba n tōnnɪ yalsɪ, la mam n ka wōn na lampo-t'ɔs-ēna wā la iŷā. ¹²Dabsa ayopɔ wo puam, mam lutɪ nōore la buyi, la bōn-seba wuu ti mam yēti la, pia puam woo mam loori ayula b'ɔra fōn mɛ. > ¹³La lampo-t'ɔsa la ze'ele la kēnkernja pōn ka gorge a nēŋa saazuum, dee wē nupu'ugɔ yeti: <Nawēnne, zoe m ninbāalga, mam de la tōon-be'ero dāana. > > >

¹⁴Azezi yele bela dee yeti: << Mam yeti ya mɛ ti bura-ēna wā n kule la, a yelle mase mɛ Nawēnne zē'am, dee ti Farisi nēra la yelle ka mase. Se'ere n soe la, nēr-seka woo n zēkri a mēŋa, Nawēnne won sike ē mɛ, la nēr-seka n sikri a mēŋa, Nawēnne won zēke ē. > >

Ti āna wu kɔm-pɪgsɪ ti ti tā'age kē Nawēnne so'olum

(Amatie 19:13-15, Amarkɪ 10:13-16)

¹⁵Nērba baseba n daan tarɪ kɔm-pɪgsɪ wa'am Azezi zē'am ti a dɪke a nu'usi pagle ba zuto. La a karēnbiisi la n yē bela la, ba zebe nērba la mɛ. ¹⁶Ti Azezi wi a karēnbiisi la yele ba yeti: << Base-ya kɔma la ti ba wa'am mam zē'am, da gu'ura-ya ba, se'ere n soe la, Nawēnne so'olum* de la nēr-seba n ān wu kɔma wā bōnɔ. ¹⁷Mam yeti ya la sɪra, ti nēr-seka woo n ka sake ti Nawēnne sɔna ē wu bia la, a kān kē Nawēnne so'olum puam. > >

Bōntarsa yelle

(Amatie 19:16-30, Amarkɪ 10:17-31)

¹⁸Zifdōma nērzuo ayula n daan soke Azezi yeti: < < Karēnsāama, fōn de la nēr-sōṅṅ, mam wun ēṅṅ la wāne yē vɔm n ka ba'asri? > >
¹⁹Ti Azezi yele ē yeti: < < Bēm ti fōn wi mam ti nēr-sōṅṅ? Nēra ka boe n ān sōṅṅ, sān dagna Nawēnne mā'a. ²⁰Fōn mi Nawēnne n bɔ nōore ti ba ita se'em na: < Da gā'are la fu tadāana pɔga, da ku nēra, da zū, da tɔge pōmpɔrṅṅ kaseto, nanna fu sɔ la fu ma. > > >
²¹Ti a lerge yeti: < < Halt mam bōnbi'ulum ti mam pōn sakra bōn-bāma wuu. > >
²²Azezi n wōm ēn yele bela la, ti a yele ē yeti: < < Sela ayula n deege dēna fu ēṅṅ: Koose fōn tarɪ sela la wuu dɪke ligri la pu nasdōma, ti fu wun yē bōntarsōm Nawēnne yire, dee wa'am wa dɔla mam. > >
²³La buraa la n wōm bela la, ti a sūure ba sā'am, se'ere n soe la, a daan ba dēna la bōntarsa.

²⁴Azezi n yē ti a sūure sā'am bela la, ti a yeti: < < La tɔ mɛ bɔ bōntatba ti ba kē Nawēnne so'olum puam. ²⁵La de la nāana ti yugne doose fupīim yoko puam yese, gānna bōntarsa n wun kē Nawēnne so'olum puam. > >
²⁶Ti sēba n wōm bela la yele yeti: < < La sān dēna bela, āne n wun tā'age yē fāare? > >
²⁷Ti a yele ba yeti: < < Bōn-sēka ti nērsaalba ka tā wun ēṅṅ la, Nawēnne tā wun ēṅṅ mɛ. > >

²⁸Ti Apɪyɛɛɪ yele ē yeti: < < Tōma base tōma n tarɪ sela mɛ dee dɔla fōn. > >
²⁹Ti Azezi yele ba yeti: < < Mam yeti ya la sɪra, ti nēr-sēka n base a yire, bu a pɔga, bu a sɔbiisi, bu a sɔ la a ma, bu a kɔma, Nawēnne so'olum na īyā, ³⁰a wun to'oge zo'oge gānna ēn base sela la dūnia wā zuo, dee wun yē vɔm n ka ba'asri wakat-sēka n sēm na. > >

Azezi le tɔge a kūm, la a vo'ore yelle

(Amatie 20:17-19, Amarki 10:32-34)

³¹Azezi daan tarti a karēnbiisi pia la ayi la me yese kēnkernja, ka yele ba yeti: <<Ya yē ya, ti we'esti la Zerizalem, la bōn-seba wuu ti Nawēnne nōtō'srība* yuun gulse Nawēnne gōŋo puam Nērsaala* Dayva la yelle la, wun siri ēŋe me. ³²Ba wun yōke ē me ka ēŋe bu-zāŋsi* nu'usum, ti ba la ē, yaale ē, tubse nōtōorum mī ē, ³³wē ē na ka'asa, dee ku ē. La dabsa atā daare a wun vo'oge.>> ³⁴La ba ka bāŋe ēn yeles'em na vōore baa fēe, yetoga la daan soge me, ti ba ka tā'age bāŋe yetoga la vōore n boori ti la yeles'em.

Azezi boti fua yēta

(Amatie 20:29-34, Amarki 10:46-52)

³⁵Azezi daan we'esti ka lem na Zeriko, ti fua zēa sore kēnkernja sōsra, ³⁶wōm nēr-kvuŋo la n tolli la dāmne, soke yeti: <<Bēm ēŋe?>> ³⁷Ti ba yeles'em yeti: <<Azezi n de Nazareti nēra la n tolli.>> ³⁸Ti a tii tōgra yeti: <<Adavidi* yuŋa Azezi, zoe m ninbāalga.>> ³⁹Ti nēr-seba n boe a nēŋam na tāse ē yeti a sina. Ti a malun tii tōge yeti: <<Adavidi yuŋa, zoe m ninbāalga.>> ⁴⁰Ti Azezi ze'ele, yeti ba tarti ē wa'am. La ēn lem Azezi la, ti Azezi soke ē yeti: ⁴¹<<Fōn boori ti m ēŋe la bēm bō fō?>> Ti a lerge ē yeti: <<Zuudāana, mam boori ti m le yēta me.>> ⁴²Ti Azezi yeles'em yeti: <<Le yēta, fōn bō mam sura la iŋā n boti fu yē laafe.>> ⁴³Bilam mēŋa ti a le yēta dola Azezi pēgra Nawēnne. Ti nērba la wuu n yē bela la, mē nā'asra Nawēnne.

19

Azezi la Azase yelle

¹Azezi daan doli la Zeriko tēŋa puam tōlla, ²ti buraa bōna mī ti a yu'bre dena Azase. A de la lampo-tō'srība* naba, dee dena bōntarsa.

³A daan boori ti a bāŋɛ la Azezi n de nēr-seka. A de la nēr-gulga, la nērba la n zo'oge la iŷā, a ka tā wun yē Azezi. ⁴Ti a zoe tole nēŋam sēŋɛ Azezi n we zē'am bɔba la ka zom kēnkāŋa ti a buse Azezi. ⁵Ti Azezi sēŋɛ ka paage zē'e-ēŋa, gorge buse kēnkāŋa la zuo yē ē, yele ē yeti: << Azase, sige totɔ, se'ere n soe la, dēni ti mam gā'are fōn yire zīna. >> ⁶Ti Azase sige totɔ, to'oge ē sēŋɛ a yire la sū-yēlga.

⁷La nērba la n yē bela la, ba wuu yōnni me yeti: << A sēŋɛ ka kē ti a bɔna la tōon-be'ero dāana la yire. >> ⁸Ti Azase ze Azezi nēŋam, yele ē yeti: << M Zuudāana, mam wun dīke m bōntarsōm pusuka pu bɔ nasdōma. La mam sān pā'ase nērba to'oge ba sela, mam wun lebse bɔ ba nōor-anaasi. >> ⁹Ti Azezi yele ē yeti: << Zina yi-ēna dōma yē fāare, se'ere n soe la, ēna mē siri de la Abraham* yuŋa. ¹⁰Nērsaala* Dayva la wa'am dūnia zuo ti a ε la nēr-seba n bɔi la, fāage ba. >>

Nabia, la a tōntōnɔba makre

(Amatie 25:14-30)

¹¹Nērba la n daan selsiri Azezi yetɔga la, ti a make makre bɔ ba, se'ere n soe la, a daan lem na Zerizalem, ti nērba la tē'esra ti wakat-ēŋa ti ba wun yē ti Nawēnne diti na'am ba tēŋasuka. ¹²Bela ti a make bɔ ba yeti: << Nabia n yuun yeti a sēŋɛ tēŋa n zāage ka di na'am leme wa'am. ¹³En yuun yeti a sēŋɛ la, a wi la a tōntōnɔba pia bɔ ba sālma lag-kōbre ayula ayula, yele ba yeti: <Dike-ya ligri la lēbra, ti m sēŋɛ dee leme wa'am. > ¹⁴La a so'olum na nērba nifo kē ē me, ti en fōrge la, ti ba tōm tōntōnɔba ti ba babsē ē ka yeti, bāma ka boori ti a dena bāma naba.

¹⁵La baa la bela a di na'am na me, lebe kule ka base ti ba wi tōntōn-seba ti a daan bɔ ba ligri la, ti ba wa'am ti a soke ba bāŋɛ, nēra woo

n leebe yē yōorɔ se'em. ¹⁶Tɪ pɔspɔsɪ dāana la yelee ē yetu: < M zuudāana, mam dɪke fu sālma lag-kōbrɛ la leebe yē la yōorɔ sālma lig-kōba pia pa'asɛ. > ¹⁷Tɪ a yelee ē yetu: < Fu ēŋɛ sōŋa, fu de la tōntōn-sōŋɔ! Fōn ēŋɛ sɪra la bōnɔ fēe la ãyã, fu wun sɔna tēnsɪ pia bɪsra. > ¹⁸Tɪ buyi dāana la mē wa'am wa yelee ē yetu: < M zuudāana, mam dɪke fu sālma lagfɔ la leebe yē la yōorɔ sālma lig-kōba banuu pa'asɛ. > ¹⁹Tɪ a yelee ē mē yetu: < Fōn wun sɔna tēnsɪ banuu bɪsra. > ²⁰Tɪ ayēma mē wa'am wa yetu: < M zuudāana, fu lagfɔ la n wāna, mam vile ē na tānne sɔge, ²¹mam zotɪ fōn mɛ, se'ere n soe la, fōn de la nēra yelle n tɔɪ. Fōn to'ori la bōn-sɛba tɪ fu mēŋa ka tōm na yōorɔ, dee lagsra bōnkɔɔl-sɛba tɪ fōn ka bure. > ²²Tɪ a yelee ē yetu: < Fu de la tōntōn-be'ego, mam wun dɪke la fu nōore yetɔga la di fu sariya. Fōn mi tɪ mam de la nēra yelle n tɔɪ, tɔ'ɔra bōn-sɛba tɪ mam ka tōm na yōorɔ, dee lagsra bōnkɔɔl-sɛba tɪ mam ka bure la, ²³bēm ãyã tɪ fu ka tari m ligri la ka bɪŋɛ bānkɪ puam, tɪ m sān leme wa'am tɪ m to'oge m ligri la, la yōorɔ? > ²⁴Dee yelee sɛba n boe bilam na yetu: < To'oge-ya lagfɔ la bɔ sɛka n tari ligri pia la. > ²⁵Tɪ ba yelee ē yetu: < Zuudāana, a pōn tari la ligri pia. > ²⁶Tɪ a lerge ba yetu: < Mam yetu ya tɪ sɛka woo n tari, a wun to'oge pa'asɛ. La sɛka woo n ka tari, a wun koŋɛ sɛla fēe tɪ a tari la. ²⁷La sān dɛna mam bɛ'ɛba la n ka boori tɪ mam di na'am na, tari-ya ba wa'am wa kv ba mam nēŋam. > > >

Azezi kē'eri Zerizalem la na'am

(Amatie 21:1-11, Amarki 11:1-11, Azã 12:12-19)

²⁸La Azezi n daan tɔge bela ba'asɛ la, a tole la nērba la nēŋa tɪ ba wɛ'esa Zerizalem. ²⁹La ēn daan sēŋɛ ka lɛm Betɪfaazi, la Betani n boe Oliivi tāŋa zē'am na, a tōm na a karēnbiisi bayi ³⁰yetu: < < Sēŋɛ-ya tēn-sɛka n boe nēŋa la puam. Ya sān paage mĩ, ya wun yē bōn-biire tɪ

ba lu ze'ele, ti nēra nēra nān ka bā ē. Ya lorge ē tari wa'am. ³¹La nēra sān soke ya yeti: < Wāne ti ya lōrgra ē? >, ya lerge yeti: < Zuudāana la n boori ē. > > >

³²La ēṅa n tōm sēba la sēṅe ka paage, yē sela woo wu ēn yeke ba se'em na. ³³Ti ba lorge bōn-biire la, ti bōṅa la dōma soke ba yeti: < < Bēm ti ya lōrgra bōṅa la? > > ³⁴Ti ba lerge ba yeti: < < Zuudāana la n boori ē. > > ³⁵Ti ba tari bōṅa la sēṅe Azezi zē'am, ka dūke ba futo pagle a zuo, ti Azezi bā. ³⁶La ēn daan we la, nērba la yerge la ba futo sore la zuo. ³⁷En daan lem Zerizalem na, a doli la Oliivi tāṅa sore la sigra, ti nēr-kuvuṅo la wuu n de a karēnbiisi la uta sū-yēlga zēke ba kōosi pēgra Nawēnne ke'enke'em, a tōon-yālma ti ba yē la iyā, ³⁸yeta ti:

< < Pēge-ya na-seka n sēm na
Zuudāana Nawēnne yu'ure la.
Sū-mā'asum boe la Nawēnne yire,
nā'ase-ya Nawēnne n boe saazuum. > >

³⁹La Farisi* dōma baseba n boe nērba la puam yeke Azezi yeti: < < Karēnsāama, tāse fu karēnbiisi la ti ba sīna. > > ⁴⁰Ti a lerge ba yeti: < < Mam yeti ya me ti ba sān sīna, kuga wun kaase tagurga. > >

Azezi kelli Zerizalem nērba iyā

⁴¹Azezi n daan lem Zerizalem yē tēṅa la, a kelli me tēṅa la nērba iyā, ⁴²yeti: < < Ya sān mi ni zīna wā bōn-seka n wun bo ya sū-mā'asum, la wun ān ni sōṅa! La, la sugē me, ti ya nini ka yēta ē. ⁴³La wakate sēm me, ti ya be'eba wun wa'am wa mē lalga gilge ya tēṅa wā wuu gu, ti ya nērba kān tā'age yese. ⁴⁴Ba wun sā'am tēṅa la wuu me, dee ku yāma sēba wuu n boe a puam na. Ba wun sā'am ē saam saam

mε, ti kugre kân weege a tadāana zuo. Bōn-bāna n wun ēṅe la, de la yan ka bāṅe wakat-seka ti Nawēnne wa'am ti a fāage ya la īyā. > >

Azezi dige leebdōma Wēnde-kātum na

(Amatie 21:12-17, Amarku 11:15-19, Azā 2:13-22)

⁴⁵Azezi n tōge bela ba'ase la, a kē la Wēnde-kāte la zēnzakam digra seba n koosri la ti ba yesra, ⁴⁶dee yele ba yeti: < <La gulse Nawēnne gōṅṅ puam ti Nawēnne yeti: < Mam deego wā wun dena la pu'usgo deego. > La yāma dūke ē ēṅe la nayigba lagsgo zē'a. > >

⁴⁷La daare woo a boe la Wēnde-kātum na zāsna nērba Nawēnne yetoga. Ti kāabgo* kēma nēṅadōma, la loo* karēnsāandōma, la tēṅa la nērzuto daan εera sore ti ba ku ē. ⁴⁸La ba ka mi ba wun ēṅe se'em, se'ere n soe la, nērba la wuu daan ān na seli selsra a yetoga la.

20

Āne n bɔ Azezi nōore ti a tōnna?

(Amatie 21:23-27, Amarku 11:27-33)

¹Daare ayula Azezi boe la Wēnde-kātum na zāsna nērba, dee mōola kō-yēlga la bɔ'ora ba. Ti kāabgo* kēma nēṅadōma, la loo* karēnsāandōma, la tēṅa la kēma ²wa'am wa yele ē yeti: < <Yele to, fōn yē nōore la be uta bōn-bāna, bu āne n bɔ fōn nōore ti fōn uta? > >

³Ti a lerge ba yeti: < <Mam mē wun soke ya sokre ayula ti ya lerge ma: ⁴Azā n daan misri nērba ko'om puam na, la de la Nawēnne n tōm ē bu, la de la nērsaalba? > >

⁵Ti ba bām na taaba yeti: < <Ti sān yeti la de la Nawēnne n tōm ē, a wun yeti, bēm īyā ti tōma ka sake ē? ⁶La ti sān yeti la de la nērsaalba, nērba la wuu wun lobe ti la kuga ku, se'ere n soe la, nērba la sake ti Azā daan de la Nawēnne

nōtɔ'ɔsa. > > ⁷Tɪ ba koŋe lerge ẽ yetu: < <Tōma ka mi sɛka n tōm ẽ. > > ⁸Tɪ Azezi yeŋe ba yetu: < <Bela, mam mē kǎn yeŋe ya mam n yē nōore la zē'e-sɛka ita bōn-bāna wā. > >

Nērba n bɪsrɪ va'am makre

(Amatie 21:33-46, Amarkɪ 12:1-12)

⁹Tɪ Azezi make makre ẽna bɔ nērba la yetu: < <Buraaga n daan kɔ a va'am sele tustɪ yu'vɛrɛ n de viinye*, dɪke va'am na bɔ nērba tɪ ba bɪsra, dee sēŋe tēŋa n zāage ka yuuge.

¹⁰Tɪ viinye la biɛ go'osgo wakate paage, tɪ a tōm a tōntōnna tɪ a sēŋe sɛba n bɪsrɪ va'am na zē'am ka to'oge a pure wa'am wa bɔ ẽ. Tɪ sɛba n bɪsrɪ va'am na wē ẽ, dee botɪ a lebe kule zāŋa. ¹¹Tɪ a le tōm a tōntōnna ayula ba zē'am, tɪ ba wē ẽ, dee yaale ẽ, botɪ a mē lebe kule zāŋa. ¹²Tɪ a le malɪn tōm ayula butā puam, tɪ ba wē ẽ pɔglum, dee dige ẽ va'am na puam. ¹³Tɪ va'am na dāana la tē'esɛ yetu: < Mam wun ẽŋe la wāne? M yāŋa wun tōm na m mēŋa bi-nōŋre, tā tɪ ba wun nā'ase ẽŋa. > ¹⁴La sɛba n bɪsrɪ va'am na n yē va'am na dāana mēŋa dayva la, tɪ ba bām na taaba yetu: < Ɛna n wun wa sɔoge sɔna a sɔ bōntarsōm na, base-ya tɪ tɪ ku ẽ tɪ bōntarsōm na lebge tōma bōnɔ. > ¹⁵Tɪ ba yōke ẽ ve'ege yese va'am na kēnkɛrŋa ka ku ẽ.

Bela, va'am na dāana yāŋa wun ẽŋe nēr-bāna la wāne? ¹⁶A wun wa'am wa ku nērba la mɛ, dee to'oge va'am na bɔ nērba baseba tɪ ba bɪsra. > >

La nērba la n wōm bela la, ba yetu: < <La kǎn ẽŋe bela baa fēfēe. > > ¹⁷Tɪ Azezi bɪsra ba, dee yetu: < <La bela vōore de la bēm tɪ ba gulse Nawēnne gōŋɔ puam yetu:

< Kug-sɛka tɪ tōnmētba zagse la,

lebge la kugre n botɪ deego la tara pāŋa > ?

¹⁸La nēr-seka n lui kug-ēṅa zuo, a wun kɔ kɔ mɛ, la kugre la sãn lui nēr-seka zuo, a wun mērgɛ ẽ mɛ. > >

¹⁹Tɪ lɔɔ karēnsāandōma, la kāabgɔ kēma nēṅadōma la ɛera sore wakat-ēṅa tɪ ba yōke ẽ, se'ere n soe la, ba bāṅɛ mɛ tɪ la de la bāma ãyã tɪ a make makre la. La ba zotɪ la nērba la.

Lampo yva yelle

(Amatie 22:15-22, Amarkɪ 12:13-17)

²⁰Tɪ lɔɔ karēnsāandōma, la kāabgɔ kēma nēṅadōma la pigra Azezi. Bela tɪ ba tōm nērba n ãn wu ba de la nēr-sōma la tɪ ba sēṅɛ ka bēre Azezi la yetɔga, tɪ a sãn tɔgɛ tuuge, tɪ ba yē sore yōke ẽ sēṅɛ ka ēṅɛ gɔmna n soe nōore nu'usum. ²¹Tɪ nērba la sēṅɛ ka soke Azezi yetɪ: < < Karēnsāama, tōma mi tɪ fōn tɔgrɪ se'em na, la fōn zāsni se'em na mase mɛ, la fōn ka tū'usri nērba, dee zāsna nērba Nawēnne sore yela sra sra. ²²Bela, lɔɔ la bɔ sore tɪ tɪ yɔ lampo bɔ Rom* na-keko bu, a ka bɔ sore? > >

²³Tɪ a bāṅɛ ba yɛmkēgsɪga la, yele ba yetɪ: ²⁴< < Tari-ya lagfɔ ayɪla wa'am. > > Tɪ ba tari wa'am. Tɪ a soke ba yetɪ: < < Ane yinyisṅa, la ãne yu'ure n gulɛ a zuo? > > Tɪ ba lerge yetɪ: < < La de la Rom na-keko la. > > ²⁵Tɪ Azezi yele ba yetɪ: < < Bɔ-ya na-keko la ēṅa n soe bōn-seka, dee mē bɔ Nawēnne ēṅa n soe bōn-seka. > >

²⁶Azezi n daan tɔgɛ se'em nērba la nēṅam na, ba ka tā'agɛ yōke ẽ, a lergre la di'ige ba mɛ, tɪ ba sɪna.

Kūm vo'ore yelle

(Amatie 22:23-33, Amarkɪ 12:18-27)

²⁷Saduse dōma n daan yetɪ nēra sãn ki a kãn vo'oge la, bāma nērba baseba n wa'am Azezi zē'am wa ²⁸soke ẽ yetɪ: < < Karēnsāama,

Amoyisi* yuun gulɛ yeti: < Seka sɔbia sɔn tara pɔga, ki dee ti a ka tara bia, a di a pɔkɔɔrɛ la dɔge kɔma bɔ seka n ki la. > ²⁹La buraasi bayopɔi n daan boe dɛna sɔbiisi, ti pɔspɔsi dɔana la di pɔga ti a ka dɔge, dee ti a ki, ³⁰ti buyi dɔana la mɛ di pɔkɔɔrɛ la ki, dee ti a ka dɔge. ³¹Ti butɔ dɔana la mɛ ɛɲe bela. La bɔma bayopɔi la wuu lagum di pɔkɔɔrɛ la mɛ ki, ti ba nɛra nɛra ka dɔge bia. ³²Bela poorum ti pɔka la mɛ ki. ³³Bela, bɔma bayopɔi la wuu n di pɔka la, ba sɔn wa vo'oge kɔm vo'ore daare, ɔne n wun sɔna pɔka la? > >

³⁴Ti Azezi lerge ba yeti: < < Dɔni-ɛna nɛrba diti pɔgsi mɛ dee ɛlla sɔrba, ³⁵la nɛr-sɛba ti Nawɛnne bise ti ba mase ti ba vo'oge kɛ dɔnia seka n sɛm puam na ka diti pɔgba, la ba ka elli sɔrba. ³⁶La ba ka tɔ wun le ki, se'ere n soe la, ba ɔn wu malekadɔma* la. Ba de la Nawɛnne kɔma, ban vo'oge dee base kɔm na ɪyɔ. ³⁷La Amoyisi yuun pɔn pa'ale ti nɛr-sɛba n ki la wun vo'oge mɛ, zɛ'e-seka n tɔgru tɔntuugo n diti bugum yelle la, Amoyisi yeti Zuudɔana Nawɛnne n de Abraham*, la A'izaki, la Azakɔbi Nawɛnne. ³⁸Bela pa'ale ti bɔma vɔa mɛ, se'ere n soe la, Zuudɔana Nawɛnne dagi sɛba n ki Nawɛnne, a de la nɛr-sɛba n vɔa Nawɛnne. Nawɛnne zɛ'am nɛrba la wuu vɔa mɛ, baa la sɛba n ki la. > >

³⁹Ti lɔɔ karɛnsɔandɔma baseba lerge ɛ yeti: < < Karɛnsɔama, fu tɔge sɔɲa. > > ⁴⁰La ba daan ka le saage soke ɛ sela sela.

Krisi de la naba Adavidi Zuudɔana

(Amatie 22:41-46, Amarki 12:35-37)

⁴¹Ti Azezi yeke ba yeti: < < Wɔne ti ba yeti Krisi* de la Adavidi* yuɲa? ⁴²Dee ti Adavidi yuun pɔn dɛɲe yeke yɔoma gɔɲɔ puam yeti:
< Zuudɔana Nawɛnne yeke
mam Zuudɔana yeti,

zĩ'ire m zʊʊgɔ bɔba,
⁴³halɪ tɪ m ɛ̃ɲɛ fu bɛ'ɛba la
tɪ ba bɔna fu nāma tɛ̃ɲa. >

⁴⁴La Adavidi mɛ̃ɲa sãn wi ẽ yetɪ < Zuudãana >, la wun ɛ̃ɲɛ la wãne tɪ
a dɛna Adavidi yuɲa? > >

**Azezi yele a karɛ̃nbiisi tɪ ba guuse da ãna wu lɔɔ
karɛ̃nsãandõma**

(Amatie 23:1-36, Amarkɪ 12:38-40)

⁴⁵La nɛ̃rba la wuu n selsrɪ Azezi la, tɪ a yele a karɛ̃nbiisi la yetɪ:
⁴⁶< < Guuse ya mɛ̃ɲa la lɔɔ karɛ̃nsãandõma n eerɪ gilgra la fu-wogro,
bɔɔra tɪ nɛ̃rba pu'ʊsra nã'asra ba da'asum, dee bɔɔra nã'asgɔ zɛ'esi
wɛ̃ndeto puam, la dia zɛ'esum tɪ ba zɛa la. ⁴⁷Ba to'osrɪ la sela wuu tɪ
pɔkõpa tarɪ, dee pu'ʊsra Nawɛ̃nnɛ pu'ʊs-wogro tɪ nɛ̃rba bɪsra ba. Ba
wun yɛ sɪbgrɛ gãna wuu. > >

21

Pɔkõore bɔ'a yelle

(Amarkɪ 12:41-44)

¹Azezi daan boe la Wɛ̃nde-kãtum na, bɪsɛ yɛ bõntatba n tarɪ ba bɔ'a
uta ligri daka puam, ²dee yɛ pɔkõore n de nasa n ɛ̃ɲɛ lig-kõb-pɪgsɪ
bayi mã'a. ³Tɪ Azezi yetɪ: < < Mam yetɪ ya la sɪra, tɪ pɔkõore ɛ̃na n
de nasa la ɛ̃ɲɛ zo'oge gãna ba wuu mɛ. ⁴Bãma wuu looge la
bõntarsõm seba tɪ ba tarɪ zo'oge la puam wa'am wa ɛ̃ɲɛ mɪ. La ɛ̃ɲa n
de nasa la, dɪkɛ la a dia ligri wuu wa ɛ̃ɲɛ mɪ. > >

Dũnia ba'asgɔ nãmsgɔ, la Zerizalem sã'aɲɔ yelle

(Amatie 24:1-28, Amarkɪ 13:1-23)

⁵La nērba baseba n daan tɔge Wēnde-kāte la yelle yeti, ba dıke la kug-sōma mē ē, dee dıke bɔ'a ti ba bɔ Nawēnne malge ē, ti a āna sōŋa sōŋa. ⁶Ti Azezi yele ba yeti: < < Wakate sēm me ti ba wun lube bōn-seba ti ya yēti wā wuu saam saam, ti kugre baa ayula kān weege a tadāana zuo. > >

⁷Ti ba soke ē yeti: < < Karēsāama, bōn-bāna wun ēŋe la dabure? La bēm wun pa'ale tōma ti ti bāŋe ti bōn-bāna wun ēŋe? > > ⁸Ti Azezi lerge ba yeti: < < Guuse-ya ti nēra da pā'ase ya ti ya tuuge. Nērba zozo'e n wun dıke mam yu'ure wa'am wa pā'asra ya, ti ba nēra woo yeti: < Mam n de Krisi* >, bu ba wun yeti: < Wakate lem me. > Da doose-ya nēr-bāma. ⁹La ya sān wōm zebre, la tēn-dāmŋɔ yela, da base-ya ti dabeem yōke ya, dēni ti bōn-bāma dēŋe ēŋe, la, la nān ka de dūnia ba'asgɔ. > >

¹⁰Dee yele ba yeti: < < Buuri ayula wun isge zebra la buuri ayēma, ti so'olum ayula dōma isge zebra la so'olum ayēma, ¹¹la tēŋa wun tii mīim me, la kɔm, la bā'a-loŋrɪsɪ n wun wa'am zē'esti zozo'e, la yel-kāra n kē'esrɪ nērba dabeem, la bōn-yālma n wun ēŋe saazuum.

¹²La, lan dēŋe bōn-bāna wā n wun ēŋe, ba wun yōge ya me, nāmse ya, tarɪ ya sēŋe ka sām ba wēndetum sarɪyaditba zē'am, ti ba yu ya, la ba wun botɪ ya ze'ele na'adōma, la gɔmnadōma nēŋam mam yu'ure ūyā. ¹³La wun doose la bela ti ya yē folle tɔge mam yelle pa'ale ba.

¹⁴Bela, ēŋe ya sūurum ti la dagɪ ya fabla yan wun lerge se'em po'oge ya mēŋa. ¹⁵Mam mēŋa wun bɔ ya yem ti ya tɔge ti ya be'eba kān yāŋe lerge si'ise ya yetɔga. ¹⁶Baa la ya sɔdōma, la ya madōma, la ya sɔbiisi, la ya sɪrdōma wun yōge ya sēŋe ka bɔ, ti ba ku ya nērba baseba.

¹⁷Nērba wuu wun sise ya mam ūyā. ¹⁸La ya zomto baa ayula kān bɔ.

¹⁹Ya sān ze'ele kāŋkāŋe, ya wun yē vɔm Nawēnne zē'am.

²⁰Ya sān wa yē ti sudaasi gilgri Zerizalem, ya bāŋe ti a sā'aŋɔ lem

mε. ²¹Bela, nēr-seba n boe Zude tēja zoe zom tãnsı zuto, ti nēr-seba n boe Zerizalem puam na yese zoe, la seba n boe vatum na da kē tēja puam. ²²Dabsa bãma de la tōon-be'ero sibgre dabsa ti bōn-seba wuu n gulse Nawēnne gōḡo puam na wun ēḡe. ²³Wakat-ēḡa, la wun dena la toogo bɔ pɔg-seba n tarı pva, la seba n tarı bilēesı ti ba mōgra la. Se'ere n soe la, nãmsgo kãte n wun wa'am tēja wã puam, la Nawēnne sũure wun yĩige mε la tēja wã nērba. ²⁴Ba wun kv baseba mε la sukɔbrɔ, la ba wun yōge baseba mε tarı sēḡe bu-zãḡsı* tēnsuḡ ka ēḡe yamsı. Bu-zãḡsı wun sã'am Zerizalem mε, halı ti ba wakate wun wa ba'ase. > >

Azezi n de Nērsaala Dayva la lemḡo

(Amatie 24:29-35, 42-44, Amarkı 13:24-31)

²⁵< < Bōn-yãlma n wun ēḡe wēntulle, la wōrga, la wōrbie puam. La dũnia nērba buuri wuu wun fabla mε ze yerı, ko-kãte ko-mĩ'isi n wun tii wē'era ita voole la ĩyã. ²⁶La nērba wun tē'esra la bōn-seka n wun ēḡe dũnia wuu zuo la, ti dabeem wun botı ba palēḡa ēke ti ba yem bɔı, se'ere n soe la, bōn-seba n boe saazuum wun mĩim mε. ²⁷Wakat-ēḡa ba wun yē ti Nērsaala* Dayva la boe wara puam sēna la pãn-kãte, ti a na'am pãḡa peelem nēegε. ²⁸La ya sãn yē ti bōn-bãna pɔse ita, gorge-ya bise saazuum, ti ya fãare lem mε. > >

²⁹Azezi make la makre bɔ ba yetı: < < Bise-ya kēnkãḡa, la tusı wuu. ³⁰Ya sãn yē ti ba vōoro pusra, ya mēḡa mi ti sigre lem mε. ³¹Bela mē, ya sãn yē ti bōn-bãna ita, ya bãḡe ti wakate lem mε ti Nawēnne wun di na'am nērba tēḡasuka. ³²Mam yetı ya la sira, ti bōn-bãna wun ita mε dee ti zamãan-ēna yãḡa tole. ³³Saazuum la tēja wun tole mε, la mam yetɔga la kãn malın tole.

³⁴Guuse ya mēḡa ti ya yem da yɔɔra la di tige, la dã-yũure, la dũni-

ēna vɔm yela, ti Nērsaala Dayva la lemŋo daare da wa di'ige ya ³⁵wu bērgɔ la. Se'ere n soe la, daare ēŋa wun wa di'ige nērba wuu n boe tēn-gōŋɔ wā zuo mε. ³⁶Bela, da gīsra-ya, pu'usra-ya Nawēnne wakate wuu, ti ya wun yē pāŋa tā'age pōse bōn-seba wuu n wun wa ēŋe la, dee tā'age ze'ele Nērsaala Dayva la nēŋam. > >

³⁷Azezi daan ēn zāsna la nērba Wēnde-kātum na wuntεŋa, ti yu'uhɔ ti a ēn yese tēŋa la puam sēŋe ka gā'are Oliivi tāŋa la zuo. ³⁸La nērba wuu lagsri la a zē'am Wēnde-kātum na bulika yu'uhɔ yu'uhɔ selsra a yetɔga.

22

Azudaasi boori ti a boti Zifdōma nēŋadōma yōke Azezi

(Amatie 26:1-5, 14-16, Amarki 14:1-2, Amarki 14:10-11, Azā 11:45-53)

¹Borbori n ka tarti dābille kibsa yu'ure n de Zɔɔg-base* la daan dee la fēe la a paage. ²Ti kāabgɔ* kēma nēŋadōma, la lɔɔ* karēnsāandōma la εera bāma n wun ēŋe se'em ku Azezi, dee zɔta nērba la dabeem.

³Ti Asūtāana* kē Azudaasi ti ba wi'iri Iskariyo n de Azezi karēnbiisi pia la ayi la nēra ayila sūurum. ⁴Ti a sēŋe kāabgɔ kēma nēŋadōma, la Wēnde-kāte la gu'urba nēŋadōma zē'am, ka yele ba ēŋa n wun ēŋe se'em boti ba yōke Azezi. ⁵Ti ba sūure ēŋe yēlum, ti ba yeti bāma wun bɔ ē ligri, ⁶ti Azudaasi sake, εera sore ti a boti ba yōke Azezi ti nēr-kuvuhɔ la da bāŋe.

Azezi diti Zɔɔg-base kibsa la a karēnbiisi

(Amatie 26:17-30, Amarki 14:12-26, Azā 13:21-30, 1 Korēnti 11:23-25)

⁷Borborɪ n ka tarɪ dābɪllɛ kɪbsa la daare tɪ ba kʊvɪ pɛbɪlsi dita Zɔɔg-base* kɪbsa la n daan paage. ⁸Tɪ Azezi tōm Apɪyɛɛrɪ la Azā yetɪ: < < Sɛŋɛ-ya ka māasum kɪbsa la dia tɪ tɪ wa'am wa di. > > ⁹Tɪ ba soke ẽ yetɪ: < < Bɛ tɪ tɪ wɔn sɛŋɛ ka māasum? > > ¹⁰Tɪ Azezi yeɛ ba yetɪ: < < Selse-ya, ya sān ka kē'era tēŋa la pɔam, ya wɔn tu'ɔsɛ buraaga n tu yoore la ko'om, ya doose ẽ kē yi-sɛka tɪ a wɔn kē la pɔam. ¹¹La ya sān kē, ya yeɛ yidāana la yetɪ: < Karēnsāama la yetɪ, de-sɛka tɪ ɛŋa la a karēnbiisi la wɔn di Zɔɔg-base kɪbsa la boe la bɛ? > ¹²A wɔn pa'alɛ ya de-kāte n boe ayɛma zuo, tɪ loɔrɔ wuu bɔna mĩ. Māasum-ya bilam gu'ura to. > > ¹³Tɪ ba sɛŋɛ ka yē sɛla woo wu Azezi n yeɛ ba se'em na, tɪ ba māasum Zɔɔg-base kɪbsa la.

¹⁴Tɪ wakate la paage, tɪ Azezi zɪ'ire la a karēnbiisi pia la ayɪ la tɪ ba di. ¹⁵Tɪ a yeɛ ba yetɪ: < < Mam ba bɔɔra mɛ la m sūure wuu tɪ mam na yāma di Zɔɔg-base kɪbs-ɛna wā dee tɪ m yāŋa nāmsɛ. ¹⁶La mam yetɪ ya mɛ tɪ, mam kān le di Zɔɔg-base kɪbsa halɪ tɪ a vōore wa ɛŋɛ ba'asɛ Nawɛnnɛ so'olum pɔam. > > ¹⁷Dee dɪkɛ bōn-yūula pu'ɔsɛ Nawɛnnɛ, dee yetɪ: < < To'oge-ya bāna wā puɪ taaba yū. ¹⁸La mam yetɪ ya mɛ tɪ lɛɛɛ wā kɔ'ɔn wɛ'esa wuu, mam kān le yū viinye* biɛ bōn-yūula wā halɪ ka paage wakat-sɛka tɪ Nawɛnnɛ wɔn wa'am wa dita na'am nɛrba tēŋasɔka. > > ¹⁹Dee dɪkɛ borborɪ pu'ɔsɛ Nawɛnnɛ, dee fiise bɔ ba yetɪ: < < ɛna de la mam ãyã tɪ mam dɪkɛ bɔ yāma ãyã. lta-ya wāna tēra mam yelle. > > ²⁰La ban di kɪ'ulum na, a dɪkɛ la bōn-yūula yetɪ: < < Bōn-yūul-bāna pa'alɪ tɪ Nawɛnnɛ bɪŋɛ la nōor-paalga, mam zum n wɔn yese saage bɔ yāma la ãyã. ²¹La bɪsɛ-ya, sɛka n yetɪ a botɪ ba yōkɛ mam na lagum na mam kalam dita. ²²Nɛrsaala Dayva*f12* la wɔn ki wu Nawɛnnɛ n boorɪ tɪ la ɛŋɛ se'em na. La nɛr-sɛka n wɔn botɪ ba yōkɛ ẽ na wɔn yē toogo. > > ²³Tɪ karēnbiisi la sɔkra taaba tɪ ba bāŋɛ nɛr-sɛka n de ẽ bāma pɔam n yetɪ a ɛŋɛ bɛla.

Āne n gānni?

²⁴Karēnbiisi la daan wē'eri la nōke'ene bōra ti ba bāņe bāma puam nēr-seka n mase ti a dena nēr-keko gānna. ²⁵Ti Azezi yele ba yeti: < < Dūni-ēna na'adōma soe nērba la pāņa, la seba n tarı ke'eņo la boti nērba wi'ira ba ti: < Sōm-ıtba >. ²⁶La yāma puam, la kān dena bela. Seka n de nēr-keko yāma puam, a āna wu bōn-pıka la, la seka n de nējadāana āna wu tōntōnna. ²⁷La āne n de nēr-keko gānna, seka n zı dita la bu, seka n tōnni bō'ra ē na? La dagı seka n zı dita la? La mam boe ya puam wu tōntōnna la.

²⁸Yāma de la nērba n mōrge weege bōna la mam, yel-seba n paage mam na puam. ²⁹Bela mam wun bō ya so'olum, wu mam So Nawēnne n bō mam so'olum se'em na, ³⁰ti ya wun wa zı'ire mam so'olum puam dita dee yūura la mam, dee zı'ire na'am bīmbīna zuto di Israyeli* dōma buuri pia la ayi la sarıya. > >

Azezi yeti Apıyeeri wun st'ıse ēņa

(Amatie 26:31-35, Amarkı 14:27-31, Azā 13:36-38)

³¹La Azezi yele Asimō-pıyeeri yeti: < < Asimō, Asimō, bāņe ti Asūtāana* sose la sore ti a make ya bıse, wu nēra n yeele si yesra urgo la. ³²La mam pu'ıse Nawēnne me bō fō, ti fōn bō mam sıra la, fu da base. La fu sān wa leme wa dōla mam, fu bō fu sōbiisi la buraane ti ba ze'ele kāņkāņe. > > ³³Ti Apıyeeri lerge ē yeti: < < Zuudāana, mam sake me ti m kē yu'a deem la fōn, bu m ki la fōn. > > ³⁴Ti Azezi yele ē yeti: < < Apıyeeri, mam yeti fu me ti yu'ıņo ēna wā, fu wun st'ıse la nōore atā ti fōn ka mi mam, dee ti nō-rōgo kaase. > >

Azezi yele a karēnbiisi ti ba māasum ti nāmsgō n wun wa'am

³⁵La Azezi soke a karēnbiisi la yeti: < < Mam n daan tōm yāma ti

ya sēŋe ka mōole Nawēnne yetɔga, tɪ yāma ka dɪke putmāane, la tāmpɔkɔ, la tagra la, sela daan pɔ'ɔge ya me bu? > > Tɪ ba lerge yetɪ: < <Ayɛɪ. > > ³⁶Tɪ a ye le ba yetɪ: < <Lɛɛle wā, la ka le dɛna bɛla. Sɛka n tarɪ putmāane, a dɪke, la sɛka n mē tarɪ tāmpɔkɔ, a dɪke. La sɛka n ka tarɪ sukɔbgɔ, a koose a fuugo da sukɔbgɔ. ³⁷Se'ere n soe la, la gulse Nawēnne gōŋɔ pɔam yetɪ: < Ba dɪke ē naage la tōon-be'ero dōma >. Mam yetɪ ya tɪ la de la mam tɪ bōn-ēŋa wɔn ēŋe. Asɪra, bōn-sɛka n gulse tɔgra mam yelle la, yāŋa wɔn ēŋe me. > > ³⁸Tɪ ba yetɪ: < <Zuudāana, bɪse sukɔbrɔ bayi n wāna. > > Tɪ a ye le ba yetɪ: < <Base-ya tɪ la seke ya. > >

Azezi pu'vse Nawēnne Oliivi tāŋam

(Amatie 26:36-46, Amarkɪ 14:32-42)

³⁹Tɪ Azezi yese sēŋe Oliivi tāŋam wɔ ēŋa ēn ita se'em na, tɪ a karēnbiisi la doose ē. ⁴⁰La ēn paage mɪ na, a ye le ba yetɪ: < <Pu'vse-ya Nawēnne tɪ yelle da paage ya tɪ ya lui. > > ⁴¹Dee base ba sēŋe zāage fēe mase wɔ nēra n wɔn lobe kugre se'em, ka ka dūma tēŋa pu'vsra Nawēnne yetɪ: ⁴²< <M Sɔ, fu sān bɔɔra, base tɪ nāmsgɔ ēna tole dee base ma. La, da kān ēŋe mam n boorɪ se'em, ēŋe fōn boorɪ se'em. > > ((⁴³Tɪ maleka* ze'ele saazuum wa'am wa pa'ase ē pāŋa. ⁴⁴Tɪ Azezi sūure ba sā'am halɪ, tɪ a malɪn fɪi pu'vsra tɪ a mōrgre tɔgra tēŋa wɔ zum na.)) ⁴⁵Ēn daan pu'vse kɪ'ulum na, a lebe ka paage a karēnbiisi la zē'am, tɪ ba gɪsri me, ba sūure n sā'am īyā, ⁴⁶tɪ a soke ba yetɪ: < <Bēm tɪ yāma gɪsra? Isge-ya pu'vse Nawēnne tɪ yelle da paage ya tɪ ya lui. > >

Ba yōke Azezi

(Amatie 26:47-56, Amarkɪ 14:43-50, Azā 18:3-11)

⁴⁷Azezi n daan ken tɔgra la, tɪ nēriba zozo'e sēna paana. Tɪ Azudaasi n de a karēnbiisi pia la ayi la nēra ayula bɔna ba nēŋa, sēŋe lēm Azezi tɪ a kɔkɛ ē, pu'vse ē. ⁴⁸Tɪ Azezi yele ē yetɪ: < <Azudaasi, fōn yetɪ fu kɔkɛ Nērsaala* Dayva la mɛ botɪ ba yōkɛ ē? > >

⁴⁹Tɪ a karēnbiisi la n ze a zē'a, yē lan yetɪ la ēŋe se'em na yetɪ: < <Zuudāana, tɪ dɪkɛ tɪ sukɔbrɔ la zɛbɛ bu? > > ⁵⁰Tɪ ba nēra ayula dɪkɛ a sukɔbgɔ se kāabgɔ kēma nēŋadāana tōntōnna zvugɔ tvbre fiige. ⁵¹Tɪ Azezi yetɪ: < <Base-ya bɛla. > > Dee kalum buraaga la tvbre la, tɪ a lebe tablɛ. ⁵²Dee yele kāabgɔ kēma nēŋadōma, la Wēnde-kāte la gu'urba nēŋadōma, la kēma n yetɪ ba yōkɛ ē na yetɪ: < <Yāma tarɪ la sukɔbrɔ, la dasa sēna tɪ ya yōkɛ mam wu mam de la fāara la? ⁵³Mam daan boe la ya le mɛ Wēnde-kātum na daare woo, tɪ ya ka yōkɛ mam. La wakat-ēna wā ya tā wun ēŋe yan boorɪ se'em, se'ere n soe la, la de la lika pāŋa dāana wakatɛ. > >

Apɪyɛɛrɪ sɪ'ɪsɛ tɪ ēŋa ka mi Azezi

(Amatie 26:57-58, 69-75, Amarkɪ 14:53-54, 66-72, Azā 18:12-18, 25-27)

⁵⁴La ba yōkɛ Azezi mɛ tarɪ ē sēŋe ka kē kāabgɔ* kēma nēŋadāana yire, tɪ Apɪyɛɛrɪ bɔna zāazāare li'isra dɔla. ⁵⁵La ba tvbre la bugum yire la zēnzaka tēŋasvka lagse zēa, tɪ Apɪyɛɛrɪ mē lagum na ba zēa. ⁵⁶Tɪ tōntōn-pɔka ayula yē Apɪyɛɛrɪ n zɪ bugum na zē'am, bɪsra ē zɪi dee yetɪ: < <Bura-ēna mē dolɪ la Azezi. > > ⁵⁷Tɪ Apɪyɛɛrɪ sɪ'ɪsɛ yetɪ: < <Pɔka, mam ka mi ē. > > ⁵⁸Tɪ la le ēŋe fēe, tɪ nēra ayēma le yē ē yetɪ: < <Fōn mē de la ba nēra ayula. > > Tɪ Apɪyɛɛrɪ yetɪ: < <Buraaga, mam dagɪ ba nēra. > > ⁵⁹Tɪ la le ēŋe fēe mase wu karf-ayula, tɪ nēra ayula le yetɪ: < <Asira, bura-ēna ēn dɔla ē mɛ, a mē de la Galile nēra. > > ⁶⁰Tɪ Apɪyɛɛrɪ yetɪ: < <Buraaga, mam ka bāŋe fōn

tɔgɛ se'em na vɔore. > > La ɛn ken bɔna mĩ tɔgra la, tɪ nɔ-rɔɔgɔ kɔ'ɔn kaase. ⁶¹Tɪ Zuudāana la gelge bise Apɪyɛeri. Tɪ Apɪyɛeri tɛge Zuudāana n yelee ɛ yeti: << Fu wɔn si'ise mam nɔore atā me zina, dee tɪ nɔ-rɔɔgɔ kaase la. >> ⁶²Tɪ Apɪyɛeri yese yɛŋa ka kella la sũ-sā'aŋɔ zozo'e.

Ba la Azezi me, dee wɛ ɛ

(Amatie 26:67-68, Amarkɪ 14:65)

⁶³Bura-seba n gu'uri Azezi la daan la ɛ me, dee wɛ ɛ, ⁶⁴dike fuugo vile a nɛŋa wɛ ɛ, dee yelee ɛ yeti: << Bāŋɛ pa'ale tɔ seka n wɛ fɔ. >> ⁶⁵La ba tu ɛ na tvure baseba zozo'e pa'ase.

Ba tarɪ Azezi sɛŋɛ Zifdōma sarɪyaditba zɛ'am

(Amatie 26:59-66, Amarkɪ 14:55-64, Azā 18:19-24)

⁶⁶La beere n daan wiige, tɪ Zifdōma kɛma, la kāabgɔ kɛma nɛŋadōma, la lɔɔ karɛnsāandōma wuu lagsɛ tɪ ba tarɪ Azezi sɛŋɛ ba sarɪyadia zɛ'am, dee yelee ɛ yeti: ⁶⁷<< Fu sān sɪrɪ dena la Kɪsɪ* tɪ Nawɛnne bɪŋɛ nɔore tɪ a wɔn wa'am na, fu yelee to. >> Tɪ a lerge ba yeti: << Mam sān yelee ya, ya kān sake, ⁶⁸la mam sān soke ya sokre, ya mɛ kān lerge mam. ⁶⁹La lɛɛɛ wā kɔ'ɔn wɛ'esa wuu, Nɛrsaala* Dayva la wɔn zɪ'ire Nawɛnne n de pān-kāte dāana la zvugɔ. >> ⁷⁰Tɪ ba wuu soke ɛ yeti: << Bɛla fɔn sɪrɪ de la Nawɛnne Dayva? >> Tɪ a lerge ba yeti: << Yāma n yelee se'em na, mam de la bɛla. >> ⁷¹Tɪ ba yeti: << Tɪ le ɛera la bɛm kaset-dōma? Tōma mɛŋa wōm a nɔore yetɔga me. >>

23

Ba tarɪ Azezi sɛŋɛ gɔmna Apilatɪ zɛ'am

(Amatie 27:1-2, 11-14, Amarku 15:1-5, Azã 18:28-38)

¹Ti ba wuu taru Azezi sɛɲɛ Apilatɩ zɛ'am ²ka dõre ẽ yeti: < <Tõma yẽ bura-ẽna ti a boe mĩ dãmna la ti tɛɲa wã dee yeti ba da yɔɔra lampo bɔ'ɔra Rom* na-keko, dee ken yeti ɛɲa de la Krisi, ɛɲa de la naba.> > ³Ti Apilatɩ soke ẽ yeti: < <Fõn de la Zifdõma naba?> > Ti Azezi lerge ẽ yeti: < <La de la fõn yele se'em na.> > ⁴Ti Apilatɩ yele kãabgɔ kɛma nɛɲadõma la, la nɛr-kuvuɲɔ la yeti: < <Mam ka yẽ buraaga wã yel-seka n won boti ti di a sariya.> > ⁵Ti ba sɩna dee bula yeti: < <A zãsuɲɔ la ti a pɔse zãsum Galile la Zude wa paam kalam na, taru la dãmɲɔ sɛna nɛrba pvam.> >

Ba taru Azezi sɛɲɛ A'erɔdɩ zɛ'am

⁶Apilatɩ n wõm bela la, a soke me ti a bãɲɛ, bura-ẽna sãn dena Galile nɛra. ⁷La ɛn bãɲɛ ti a ze'ele la Galile n de naba A'erɔdɩ* so'olum pvam na, ti a boti ba taru ẽ sɛɲɛ ka bɔ naba A'erɔdɩ. A'erɔdɩ mɛ daan boe la Zerizalem wakat-ɛɲa. ⁸La A'erɔdɩ n yẽ Azezi la, a sũure ɛɲɛ yɛlum me halt, se'ere n soe la, a wõm Azezi yelle ti la yuuge me, ti a bɔɔra ti a yẽ ẽ. A taru putɛ'ere ti a won tõm na tõon-yãlma ti a yẽ. ⁹A'erɔdɩ daan soke Azezi la sokrusɩ zozo'e, ti a ka lerge ẽ. ¹⁰Ti kãabgɔ kɛma nɛɲadõma, la lɔɔ karɛnsãandõma n boe mĩ na dõre ẽ zozo'e yeti, a tõm na be'em. ¹¹Ti A'erɔdɩ la a sudaasɩ yaale ẽ, dɩke fu-sõɲɔ ye ẽ, ti ba la ẽ, dee taru ẽ lebe ka bɔ Apilatɩ. ¹²Daar-ɛɲa, A'erɔdɩ la Apilatɩ n de be'eba la taaba la, lebge la sɩɔ.

Apilatɩ di Azezi sariya ti ba kv ẽ

(Amatie 27:15-26, Amarku 15:6-15, Azã 18:39-19:16)

¹³Ti Apilatɩ wi kãabgɔ kɛma nɛɲadõma, la tɛɲa la kɛma, la nɛrba wuu ¹⁴yele ba yeti: < <Yãma taru bura-ẽna wa'am wa bɔ mam yeti a

tari la dāmṅɔ sēna nērba puam. La mam n soke ē yāma nēṅam kalam wā, mam ka yē a yel-sēka n boti yāma dōre ē na. ¹⁵La A'erɔdɪ mē ka yē a yelle, bela ti a tari ē leme wa'am wa bɔ tōma. Buraaga wā ka tōm be'em n mase ti ba ku ē. ¹⁶Mam wun boti ba wē ē me la ka'asa dee base ē ti a fōrge. > > ((¹⁷Zɔɔg-base kibsā wakate woo dēni ti Apilatɪ yese seba n boe yu'a deem nēra ayila base.)) ¹⁸Tɪ ba wuu kɔ'ɔn lagim tāsra yeti: < <Ku bura-ēna, dee yese Abarabasɪ bɔ tɔ. > > ¹⁹Abarabasɪ daan dāme na tēṅa, ku nēra, ti ba yōke ē yu. ²⁰Tɪ Apilatɪ le tɔgra la nēr-kuvṅɔ la bɔɔra ti a base Azezi. ²¹Tɪ ba zagse, dee kaasra yeti: < <Ka ē dɔ-puurṅa* zuo, ka ē dɔ-puurṅa zuo. > > ²²Tɪ Apilatɪ le yele ba nōor-atā puam yeti: < <Bēm be'em ti a tōm? Mam ka yē yel-sēka ti a tōm ti la mase ti ba ku ē. Mam wun boti ba wē ē na ka'asa dee base ē. > > ²³Tɪ ba ken kaasra ke'enke'em yeti: < <Ka ē dɔ-puurṅa zuo. > > Tɪ ba kaasga la zo'oge gāṅe. ²⁴Tɪ Apilatɪ sake ēṅe ban boort se'em na, ²⁵yese bura-sēka n daan dāme tēṅa ku nēra la base, ēṅa ti nērba la boort ti a base, dee dɪke Azezi bɔ sudaasɪ ti ba ēṅe ē nērba la n boort se'em na.

Ba ka Azezi dɔ-puurṅa zuo

(Amatie 27:32-44, Amarkɪ 15:21-32, Azā 19:17-27)

²⁶Ban tari Azezi wē'esa la, ba tu'vse la Sireni tēṅa buraaga yu'vre n de Asimō n ze'ele va'am lemna, ti ba yōke ē boti a to'oge dɔ-puurṅa la buke dɔla Azezi poore. ²⁷La nēr-kuvṅɔ n doli ē, ti pɔgsɪ kella fabla wē'era nupu'vɔ a iyā. ²⁸Tɪ Azezi wērgɛ ba bɔba yele ba yeti: < <Zerizalem pɔgsɪ, da kella-ya mam iyā, kella-ya ya mēṅa la ya kɔma iyā. ²⁹Se'ere n soe la, dabsa sēna ti ba wun yeti: <Pɔg-kōndɔgrɪba, la seba n ka dɔge, seba ti kɔma ka mōge ba bɪ'isum tari zu-yēlga. > ³⁰La nērba wun wa yele tānsɪ ti ba lui dɪ ba, dee yele

kūnkūma yeti, ba lile ba. ³¹Se'ere n soe la, ba sãn ita dɔ-mã'asa wãna, la wun ẽɲɛ dɔ-ke'esti la wãne? > >

³²La ba tarɪ la tɔon-be'ero dɔma bayi sɛɲɛ tɪ ba lagum ba la Azezi ku. ³³La ba paage la zẽ'a tɪ ba wi'iri tɪ Zuwanɲɛ, bilam tɪ ba ka Azezi dɔ-puurɲa zuo, dee ka tɔon-be'ero dɔma bayi la dɔ-puursi zuto, ayɪla a zɯɯgɔ bɔba, ayɪla a gɔbga bɔba. ³⁴Tɪ Azezi yeti: < < M Sɔ, base ba tɔon-be'ero taale, tɪ ba ka mi ban itɪ sela. > > Tɪ ba dɪke a futo tɪ ba puɪ taaba, pɔse tɪ ba bãɲɛ nẽra woo n wun to'oge fu-sɛka. ³⁵La nẽrba la ze la bilam bɪsra ẽ, tɪ Zifdɔma kẽma la la'ara ẽ yeti: < < A fãage nẽrba baseba mɛ, a sãn sɪrɪ dɛna la Kɪsɪ* tɪ Nawẽnne looge la, a fãage a mẽɲa. > > ³⁶Tɪ sudaastɪ la mẽ la'ara ẽ, lɛm dɪke dã-mĩ'isgo bɔ ẽ ³⁷yeti: < < Fv sãn dɛna Zifdɔma naba, fãage fv mẽɲa. > > ³⁸La ba gulɛ la gulsgɔ lable a zuum yeti:

< < Ẽna wã de la
Zifdɔma naba la. > >

³⁹Tɪ tɔon-be'ero dɔma la n boe dɔ-puursi zuto la ayɪla tɯ Azezi yeti: < < Dagi fɔn de Kɪsɪ la? Fãage fv mẽɲa dee fãage tɔma. > > ⁴⁰Tɪ ayẽma la tãse a tadãana la yeti: < < Fɔn ka zotɪ Nawẽnne? Ba wun ku tɔma wuu mɛ. ⁴¹La sãn dɛna tɔma, tɔma n tɔm tɔon-be'ero la, la mase mɛ tɪ ba ku tɔma, la nẽr-ẽna wã ka ẽɲɛ sela n de be'em. > > ⁴²Dee yele Azezi yeti: < < Fv sãn wa dita fv na'am na, fv tẽege m yelle. > > ⁴³Tɪ Azezi yele ẽ yeti: < < Mam yeti fv la sɪra, tɪ zina nõo fv wun bɔna la mam Nawẽnne yire. > >

Azezi kũm

(Amatie 27:45-56, Amarkɪ 15:33-41, Azã 19:28-30)

⁴⁴⁻⁴⁵La daan de wu wuntɛɲa zuu-tɛɲasuka, tɪ tɛɲa la wuu lebge lika, tɪ wuntɛɲa ka le yẽke halɪ ka paage zaanɔore karf-atã. Tɪ fuugo

la n yuli Wēnde-kāte* la puam beje zē'e-sōḡo la āage pusuka. ⁴⁶Ti Azezi tōge ke'enke'em yeti: < < M So, mam basri m sia la fōn nu'usum. > > A yeke la bela dee ki.

⁴⁷Ti Rom sudaasi ke'ema yē lan ēḡe se'em na, nā'asra Nawēnne yeti: < < Asira, buraaga wā de la nēr-sōḡo. > > ⁴⁸La nēr-kuvḡo la wuu n wa'am ti ba bise lan wun ēḡe se'em na, yē lan ēḡe se'em na me. Ti ba lebe kulla, dee wē'era nupu'uro. ⁴⁹La nēr-seba wuu n mi Azezi, la pōg-seba n doose ē halu Galile wa'am na, ze la kēnkerḡa bisra lan uti se'em na.

Azezi laare

(Amatie 27:57-61, Amarki 15:42-47, Azā 19:38-42)

⁵⁰Buraaga ayula yu'ure n daan de Azozefu. A de la Arimate tēḡa nēra, dee dena Zifdōma sarıyaditba nēra ayula. A de la nēr-sōḡo ti a ırgo wuu mase, ⁵¹la a daan gu'uri me ti Nawēnne wa'am wa di na'am nērba tēḡasuka. La ba sarıyaditba la n daan looge yem ti ba ēḡe se'em na, a daan ka sake. ⁵²Azezi n ki la, ēḡa n sēḡe Apilatı zē'am ka sose Azezi kūm na, ti Apilatı sake. ⁵³Ti a sike kūm na vile ē na tānne tartı ka bīḡe yōḡo ti ba tū tāmpīa iḡā nān ka laage nēra mī puam.

⁵⁴La de la daar-ēḡa ti Zifdōma māasnı ba vo'osgo* daare. Wēnne sān kē ti ba vo'osgo daare wun pōse.

⁵⁵Ti pōg-seba n doose Azezi Galile wa'am na, doose Azozefu sēḡe ka yē yōḡo la, dee yē ban bīḡe Azezi kūm na se'em, ⁵⁶dee lebe kule ka māasum tıdare kaam buuri to'oto'ore ti ba tartı wa ēḡe kūm na. La vo'osgo daare la ba vo'ose wu Amoyisi lōo* la n bō nōore se'em na.

24

Azezi vo'ore

(Amatie 28:1-10, Amarkı 16:1-8, Azã 20:1-10)

¹Lasrı daare bulika yu'vɔɔ yu'vɔɔ ti pɔgsı la isge dıke kaam na ti ba m̄asum na tarı s̄eɲe yɔɔm na. ²Ban paage la, ba yē ti kugre la ti ba dıke lige yɔɔɔ n̄ore la bilge me ḡã k̄enk̄erɲa. ³Tı ba kē yɔɔɔ la puam bıse ka yē Zuudãana Azezi k̄um na. ⁴Tı ba ze yerı, bilam m̄eɲa ti ba yē buraası bayi n ze lem ba, ye futo ti ba yēgra. ⁵Tı pɔgsı la palēɲa ēke, ti ba suure ba zuto tēɲa. Tı buraası la soke ba yetı: < < Bēm ti yāma eera n̄er-seka n vɔı seba n ki zē'am? ⁶A ka boe kalam. A vo'oge me. Tēege-ya ēɲa n daan n̄an boe Galile dee yele ya se'em na, ⁷a yetı, ba wun yōke N̄ersaala* Dayva la me tarı ka bɔ t̄on-be'ero d̄oma, ti ba ka ē dɔ-puurɲa* zuo, la dabsa atã daare, a wun vo'oge me. > > ⁸Tı ba yāɲa tēege a yetɔga la, ⁹ze'ele yɔɔm na lebe kule ka yele a karēnbiisi pia la ayıla la, la n̄erba baseba la wuu lan ēɲe se'em na wuu.

¹⁰Ba daan de la Amaari n ze'ele Magdala, la Azanı, la Azakı ma Amaari, la pɔgsı baseba, bāma n daan tɔge yel-bāna bɔ Azezi karēnbiisi pia la ayıla la. ¹¹La ba daan tē'ese ti pɔgsı la n yele ba se'em na ka tarı v̄ore, ti ba ka sake ti la de sira. ¹²La Apıyeeri isge me zoe s̄eɲe yɔɔm na ka veese bıse, yē t̄ana la m̄a'a, lebe kule ka ze yerı b̄on-seba n ēɲe la iyã.

Karēnbiisi tu'vse Azezi Emayusi sore zuo

(Amarkı 16:12-13)

¹³Daar-ēɲa m̄eɲa ti Azezi karēnbiisi bayi we'esa tēɲa ayıla yu'vre n de Emayusi. Bilam na Zerizalem z̄age mase wu kilomētri pia la ayıla. ¹⁴Ba daan tɔgrı la taaba b̄on-seba wuu n ēɲe la yelle. ¹⁵La ban daan s̄osrı la taaba la, ti Azezi lem ba, ti ba lagım s̄enna. ¹⁶La ba yem lige me, ti ba ka b̄aɲe ē. ¹⁷Tı a soke ba yetı: < < Bēm yelle ti yāma

sēnna dee tɔgra la taaba? > > Tɪ ba ze'ele zūŋe ba nēnsɪ. ¹⁸Tɪ ba nēra ayɪla yu'vɛɛ n de Akleopasi soke ē yetɪ: < < Fōn mā'a n boe Zerizalem ka bāŋe bōn-sɛka n ēŋe dabsa wā puam? > > ¹⁹Tɪ a soke ba yetɪ:

< < Bēm ēŋe? > > Tɪ ba yeɛ ē yetɪ: < < Azezi n ze'ele Nazareti la, a de la Nawēnne nōtɔ'ɔsa n tari pāŋa a tōoma la a yetɔga puam, Nawēnne la nērba wuu nifum. ²⁰Tɪ tōma kāabgɔ kēma nēŋadōma, la tēŋa la kēma botɪ ba yōke ē, di a sariya yetɪ ba kv ē, tɪ ba ka ē dɔ-puurŋa zuo, tɪ a ki. ²¹La tōma daan tari putē'ere tɪ la de la ēŋa n wun fāage Israyeli* dōma la. La zīna de la dabsa atā n wāna tɪ yel-ēna wā ēŋe. ²²La tōma pɔgsɪ baseba n botɪ tōma palēŋa ēke. Ba isge la bulika yu'vɛɛ yu'vɛɛ sēŋe yɔɔm na, ²³leme wa yeɛ tōma yetɪ bāma ka yē kūm na, bāma yē la malekadōma*, tɪ ba yeɛ bāma yetɪ a vo'oge mɛ. ²⁴Tɪ tōma nērba baseba mē sēŋe yɔɔm na, ka yē tɪ la sɪrɪ ān wu pɔgsɪ la n yeɛ se'em na. La ba ka yē Azezi. > >

²⁵Tɪ Azezi yeɛ ba yetɪ: < < Yem-ka-like dōma, bēm tɪ ya ka bɔ Nawēnne nōtɔ'ɔsɪba* n yuun yeɛ se'em na wuu sɪra tɔtɔ? ²⁶La ka mase nɪ tɪ Kɪsɪ* nāmse la bōn-bāna wuu, dee yāŋa di a na'am na? > > ²⁷Tɪ a yāŋa pa'ale ba bōn-sɛba wuu n gulse tɔgra ēŋa yelle Nawēnne gōnnɔ la puam, a pɔse pa'ale la Amoyisi*, la Nawēnne nōtɔ'ɔsɪba la wuu n gulse la vōore n de se'em.

²⁸La ban daan sēŋe ka lem tēn-sɛka tɪ ba we la, a ēŋe wu a boortɪ tɪ a tole mɛ na. ²⁹Tɪ ba sose ē yetɪ: < < Doose tōma kē gā'are, se'ere n soe la, wēnne kē mɛ, zē'a boe mī sɔbra mɛ. > > Tɪ a sake doose ba kē.

³⁰La ba daan zī'ire mɛ tɪ ba di, tɪ Azezi dɪke borborɪ pu'vse Nawēnne, dee fiise bɔ ba. ³¹Tɪ ba yem yāŋa like, tɪ ba bāŋe ēŋa n de nēr-sɛka. Tɪ a bɔɪ ba nēŋam bilam mēŋa. ³²Tɪ ba yetɪ taaba yetɪ: < < Eŋa n tɔge yetɔga la pa'ale tōma, dee tɔgra yel-sɛba n boe Nawēnne gōŋɔ puam pa'ala tōma sore zuo la, tōma sūure ka ēŋe yēlvum zo'oge sɪra? > >

³³Ti ba isge wakat-ēṅa lebe Zerizalem ka yē a karēnbiisi pia la ayila la, la seba n boe ba zē'am na ti ba lagse taaba me. ³⁴Ti ba yeke ba yeti: < <Ti Zuudāana la siri vo'oge me, Asimō yē ē me. > > ³⁵Ti nērba bayi la mē yeke ba bōn-seba n ēṅe sore la zuo, la ēṅa n fiisri borbori la, bāma n bāṅe ē se'em.

Azezi puke a mēṅa pa'ale a karēnbiisi

(Amatie 28:16-20, Amarki 16:14-18, Azā 20:19-23, Tōoma 1:6-8)

³⁶Ban boe mī tōgra bela la, ti Azezi dare wa'am wa ze ba tēṅasuka, yeke ba yeti: < <Sū-mā'asum bōna la ya. > > ³⁷Ti dabeem yōke ba, ti ba palēṅa ēke, ti ba tē'esē ti bāma yē la ki-isgne. ³⁸Ti a yeke ba yeti: < <Bēm ti ya palēṅa ēke, ti ya tē'esra putē'era buyi buyi? ³⁹Bise-ya mam nu'usi, la mam nāma, la de la mam. Sa'abe-ya mam bise, ki-isgne ka tari nēnnō, la kōba, wu yāma n yē mam n tari se'em wā. > > ⁴⁰A tōge bela dee pa'ale ba la a nu'usi, la a nāma. ⁴¹Ba sūre n ān yēlum dee ti la di'ige ba, ti ba ken ka bō sira, ti a soke ba yeti: < <Yāma tari sela wun di kalam me bu? > > ⁴²Ti ba dūke zūn-sē'ene bō ē. ⁴³Ti a to'oge obe ba nifum bilam.

⁴⁴Bela poorum, a yeke ba yeti: < <Mam n daan ken bōna la yāma la, mam n yeke ya bōn-seba la n wāna. Mam daan yeke ya yeti: Dēni ti bōn-seba wuu n gulse mam yelle Amoyisi lō* gōnnō puam, la Nawēnne nōtō'srība gōnnō puam, la yōoma gōnnō puam na ēṅe. > > ⁴⁵Ti Azezi like ba yem ti ba bāṅe bōn-seba n boe Nawēnne gōnnō puam na vōore, ⁴⁶yeke ba yeti: < <La gulse yeti, Kri* la wun nāmse me ki, la dabsa atā daare a wun vo'oge me. ⁴⁷Ḕṅa yu'ure iyā ti ba wun pōse Zerizalem mōole bō buuri wuu yeti, ba teege yem base tōon-be'ero, ti Nawēnne wun base ba tōon-be'ero taale. ⁴⁸Yāma n de bōn-bāma wuu kaset-dōma wun pa'ale nērba wuu. ⁴⁹La mam wun tōm

sɛka tɪ mam Sɔ daan bɪŋe nɔɔrɛ bɔ ya la, tɪ a wa'am wa bɔna la ya. Bɔna-ya Zerizalem gu'ura halɪ tɪ a ze'ele saazuum wa'am wa bɔ ya pãŋa. > >

Azezi zom Nawɛnne yire

(Amarkɪ 16:19-20, Tɔoma 1:9-11)

⁵⁰Bela poorum, Azezi tarɪ ba mɛ tɛŋa la puam yese sɛŋe ka lem Betani, zɛke a nu'usi saazuum kã kã'a-sɔma bɔ ba. ⁵¹Ɛŋa n boe mĩ kã'ara kã'a-sɔma bɔ'ɔra ba la, a base ba mɛ dee zom Nawɛnne yire. ⁵²Tɪ karɛnbiisi la ka dũma tɛŋa nã'ase ɛ, dee lebe Zerizalem la sũ-yɛlga zozo'e. ⁵³Ba daan boe la Wɛnde-kãtum na daare woo pɛgra Nawɛnne. \f1 4:20 Zifdɔma ɛn ze'ele la saazuo karɛŋe, dee zĩ'ire tɛŋa pa'alɛ bãma n karɛŋe se'em na vɔɔre. \f2 5:24 Azezi sãn ɛn yeta tɪ Nɛrsaala* Dayua la, la de la a mɛŋa tɪ a tɔgrɪ. \f3 7:34 Azezi sãn ɛn yeta tɪ Nɛrsaala* Dayua la, la de la a mɛŋa tɪ a tɔgrɪ. \f4 7:41 Lag-kɔbre la yu'urɛ de la deniye, deniye de wu nɛra daare ayula tɔone yɔɔrɔ. \f5 9:56, 9:58 Azezi sãn ɛn yeta tɪ Nɛrsaala* Dayua la, la de la a mɛŋa tɪ a tɔgrɪ. \f6 10:35 Lag-kɔbre la yu'urɛ de la deniye, deniye de wu nɛra daare ayula tɔone yɔɔrɔ. \f7 11:15 Abelzebuli de la Asũtãana yu'urɛ ayɛma. \f8 11:30 Azezi sãn ɛn yeta tɪ Nɛrsaala* Dayua la, la de la a mɛŋa tɪ a tɔgrɪ. \f9 12:40 Azezi sãn ɛn yeta tɪ Nɛrsaala* Dayua la, la de la a mɛŋa tɪ a tɔgrɪ. \f10 15:8 Lag-kɔbre la de wu nɛra dabsre tɔone yɔɔrɔ. \f11 17:22 Azezi sãn ɛn yeta tɪ Nɛrsaala* Dayua la, la de la a mɛŋa tɪ a tɔgrɪ. \f12 22:22 Azezi sãn ɛn yeta tɪ Nɛrsaala* Dayua la, la de la a mɛŋa tɪ a tɔgrɪ. \e

JHN

Azã

Azezi-krisi kɔ-yɛlga tɪ Azã gulɛ

Bilgre

Azã yuun de la Azezi karēnbiisi pia la ayi puam nēra ayula (Amatie 10:2).

Azã pa'ale ti Azezi de la seka ti Nawēnne tōm, wu ēn pōn bīje a nōore kurum kurum se'em na, a de la Nawēnne Dayua. Azezi n de sore ti nēra wun doose yē vōm n ka ba'asri. Eņa n de sira dāana, la peelem dāana n pa'ali nērba Nawēnne yela sira sira. Eņa n bisri tōma yelle, wun tarı ti paage ti So Nawēnne zē'am.

A dēje pa'ale ti Azezi de la Nawēnne Yetōga n boe wakate wuu, n lebge nērsaala kē'era tōma tējasuka. A yetı Azã seka n yuun misri nērba ko'om puam na tōge Azezi yelle me vēelga vēelga (sapıtrı 1).

Dee pa'ale Azezi n to'ose nērba buuri to'oto'ore se'em. Azã gulse la bōn-yālma bayopı n pa'ale Azezi n de nēr-seka (sapıtrı 2 - 12), dee pa'ale ēn zāsum a karēnbiisi se'em yu'vıje seka ti ba yōke ē na (sapıtrı 13 - 17).

Gōje la ba'asgı, a pa'ale la ban yōke Azezi di a saryı se'em, botı ba ka ē dı-puurņa zuo, ti a ki dee vo'oge, la ēn puke a mēņa pa'ale a karēnbiisi la se'em (sapıtrı 18 - 21).

Azã ka gulse bōn-seba wuu ti Amatie, la Amarkı, la Aluki gulse la. Eņa mā'a n tōgrı Azezi n ēje se'em Kana pōgdire kibsa la (2:1-12),
la ēn sōse la Anikodem (3:1-21),
ēn sōse la Samaari pōka la (4:1-26),
ēn botı kōrje yē ĩmā'asum Betesda (5:1-18),
la ēn botı Alazaarı vo'oge la (11:1-44).

Azezi-krisi kō-yēlga ti

Azã

gulse

1

Nawënne Dayva Azezi-krisi n de Yetɔga n bɔ'ɔri nërtaalba vɔm

¹Pĩ'iluɔo wakate, Yetɔga la pɔn bɔna me. La Yetɔga la yuun boe la Nawënne zẽ'am. Ëɲa la Nawënne de la buyɩa. ²A pɔn bɔna la Nawënne zẽ'am pĩ'iluɔo wakate. ³Nawënne la ëɲa n yuun nãam sela woo. Sela sela ka boe ti Nawënne la ëɲa ka nãam. ⁴Ëɲa n de vɔm dãana. La de la ëɲa n boti nërtaalba yẽta peelem. ⁵Peelem na nẽege lika pvam me, la lika ka yãɲe kɩɲe ẽ.

⁶Nawënne daan tɔm na nẽra ayɩa, a yu'vɛ de la Azã*f1*. ⁷A wa'am ti a tɔge la peelem na yelle pa'ale nërba ti ba wuu wun tã'age bɔ ẽ sira. ⁸Azã mẽɲa dagi peelem na, la a wa'am ti a tɔge la sɛka n de peelem na yelle pa'ale nërba.

⁹Sɛka n de peelem sira sira la, ze'ele la Nawënne zẽ'am wa'am dũnia zuo. Ëɲa n nẽege ti nërtaalba wuu yẽta peelem. ¹⁰Sɛka n de peelem na daan wa bɔna la dũnia zuo. Nawënne la ëɲa n yuun nãam dũnia. Baa la bela, nërtaalba ka boori ti ba bãɲe ẽ. ¹¹A daan wa'am na a mẽɲa tẽɲa pvam, la a nërba la ka to'oge ẽ. ¹²La sɛba wuu n to'oge ẽ bɔ ẽ sira la, a bɔ ba nɔore me ti ba lebge Nawënne kɔma. ¹³Ba ka lebge Nawënne kɔma wu nërtaalba n dɔgri se'em na, la ka de iyã n boori se'em, bu nërtaala n boori se'em. La de la Nawënne mẽɲa n boti ba lebge a kɔma.

¹⁴Sɛka n de Yetɔga la daan lebge la nërtaala, kẽ'era tɔma tẽɲasuka. Tɔma yẽ a na'am pãɲa me, na'am pãɲa n de Nawënne Bi-yẽɲa n

ze'ele a Sɔ zē'am na'am pãña. La Nawēnne yel-sōnne, la a sira wuu boe la a zē'am.

¹⁵La de la ēña yelle tɪ Azã daan tɔge ke'enke'em yetɪ: < <Ena n de sɛka tɪ mam pɔn tɔge a yelle yetɪ, nēra ayēma n boe mam poorum sēna, ēña gānnɪ mam mɛ, se'ere n soe la, a dēŋɛ mam mɛ bɔna. > >

¹⁶Ēña n botɪ tɔma wuu yēta yel-sōnne woo yel-sōnne, ēn ba tara Nawēnne yel-sōnne na ïyã.

¹⁷Nawēnne bɔ a lɔɔ la Amoyisi*, tɪ a bɔ tɔma. La, la sãn dɛna Nawēnne yel-sōnne, la a sira la, la doose la Azezi-krisi tɪ a bɔ tɔma.

¹⁸Nēra nēra nãn ka yē Nawēnne. La de la Nawēnne Bi-yēña la n boe la ē lɛ n botɪ tɔma bãŋɛ ě, ēña la Nawēnne de la buyɪla.

Azã bɔ Azezi kaseto

(Amatie 3:1-12, Amarkɪ 1:1-8, Aluki 3:1-17)

¹⁹Azã n daan bɔ kaseto se'em n wãna: Zifdõma* nēŋadõma sɛba n kē'erɪ Zerizalɛm* na daan tɔm na ba kãabgɔ* kēma, la Leviti* dõma tɪ ba sēŋɛ Azã zē'am, ka soke ě yetɪ: < <Fõn de la ãne? > > ²⁰Tɪ Azã tɔge ba vēelga yetɪ: < <Mam dagɪ Krisi* tɪ Nawēnne tɔm na. > >

²¹Tɪ ba le soke ě yetɪ: < <Fõn de la ãne? Fõn de la A'eli* bu? > > Tɪ a lerge ba yetɪ: < <Mam dagɪ A'eli. > > Tɪ ba le soke ě yetɪ: < <Fõn de la Nawēnne nõtɔ'ɔsa la n yetɪ a wa'am na bu? > > Tɪ a yetɪ: < <Ayɛɪ. > >

²²Tɪ ba le soke ě yetɪ: < <Bɛla fõn de la ãne? Tɪ tɪ tarɪ fõn lerge se'em na, sēŋɛ ka tɔge pa'alɛ sɛba n tɔm tɔma la. Fõn mēña yetɪ fõn de la ãne? > >

²³Ban soke ě bɛla la, tɪ Azã lerge ba yetɪ: < <Mam de la sɛka n mōolɛ weem tɔgra ke'enke'em yetɪ:

< Malge-ya sore tɪ a dɛna tēntēa bɔ Zuudãana la > > > ,

wu Nawēnne nōt'ɔsa A'ezayi* n yuun pōn yeke se'em na.

²⁴Nēr-seba n daan sēŋe Azā zē'am na, Farisi* dōma n daan tōm ba.

²⁵Ti ba daan soke ē yeti: << Fōn sān dagna Krisi la, bu A'eli, bu Nawēnne nōt'ɔsa la, bēm ti fōn misra nērba ko'om puam? >> ²⁶Ti Azā lerge ba yeti: << La sān dēna mam, mam misri ya la ko'om puam, la nēra ayula n boe ya tēŋasuka ti ya ka mina ē. ²⁷Ēŋa wa bōna la mam poorum, la mam ka mase ti m pirge a tagra. >>

²⁸Bōn-bāna wuu daan ēŋe la Betani, Zurdē kulaa la doone, zē'e-seka ti Azā daan misri nērba ko'om puam na.

Azā pa'ale ti Azezi n de Nawēnne Pebila

²⁹Ti beere wiige, ti Azā yē Azezi n sēm a zē'am. Ti a yeti: << Bise-ya, ēna n de Nawēnne Pebila* n yesri nērsaalba tōon-be'ero basra.

³⁰La de la ēŋa yelle ti mam daan yeke yeti: <Nēra n wa bōna mam poorum dēna nēr-keko gānna mam na, se'ere n soe la, a dēŋe mam me bōna. > ³¹Mam daan ka mi ēn de seka, la mam wa'am wa misra la nērba ko'om puam, ti m boti Israyeli dōma bāŋe ē. >>

³²Azā le tōge yeti: << Mam yē ti Nawēnne Sia* n ze'ele Nawēnne yire sigra āna wu na'adawenne, wa zoole a zuo. ³³La mam daan ka mi ē, la Nawēnne n tōm mam ti m mise nērba ko'om puam na, yeke mam ti: <Fu sān wa yē Nawēnne Sia n sige zoole seka zuo la, la de la ēŋa n misri nērba Nawēnne Sia la puam. > ³⁴La mam yē ē me, bo kaseto yeti, ēŋa n de Nawēnne Dayua la. >>

Azezi pōspōsi karēnbiisi

³⁵Ti beere wiige, ti Azā daan le ze bilam la a karēnbiisi bayi, ³⁶yē Azezi n sēnni, ti a yeti: << Nawēnne Pebila* la n wāna. >> ³⁷Ti a karēnbiisi bayi la wōm ēn yeke se'em na, isge dola Azezi. ³⁸Ti Azezi gelge yē ban doli ē, soke ba yeti: << Yāma eeri la bēm? >> Ti ba

soke ē yetu: <<Rabi, fōn kē'eri la bε?>> (Rabi vōore de la karēnsāama.)³⁹Tı Azezi lerge ba yetu: <<Wa'am-ya tı ya wun yē.>> Tı ba doose sēņe ka yē ēn kē'eri zē'a na, daan weege bōna a zē'am daar-ēņa, la daan de wu wēngelņa karf-anaasi.

⁴⁰Nērba bayi la n wōm Azā n tōge Azezi yelle se'em doose ē na, ayula yu'vre de la A'āndre, a de la Asimō-pıyεeri yıbga. ⁴¹Tı A'āndre dēņe sēņe ka yē a kēema Asimō-pıyεeri, yele ē yetu: <<Tōma yē Mesi la. La boortı tı la yetu Krisi.>> (A vōore de la sεka tı Nawēnne looge.)⁴²Tı a daan tartı Asimō sēņe Azezi zē'am, tı Azezi bıse ē, dee yetu: <<Fōn de la Azā bia Asimō. Ba wun wi'ira fu tı Asefası, bu Apıyεeri.>> (A vōore de la tāmpıa.)

Azezi wi Afilipi, la Anatanayelı

⁴³Tı beere wiige, tı Azezi bōra tı a sēņe Galile, yē Afilipi yele ē yetu: <<Dola mam.>> ⁴⁴Afilipi ze'ele la Betisayida tēņa, A'āndre la Apıyεeri mē ze'ele la bilam. ⁴⁵Tı Afilipi sēņe ka yē Anatanayelı, yele ē yetu: <<Tōma yē sεka tı Amoyisi* yuun gulse a yelle lō gōnno puam, tı a yelle ken gulse Nawēnne nōtō'srıba* gōnno puam na. A de la Azezi n ze'ele Nazaretı tēņa, Azozεfu dayva.>> ⁴⁶Tı Anatanayelı yele ē yetu: <<Bōn-sōņo tā wun ze'ele Nazaretı?>> Tı Afilipi lerge ē yetu: <<Yi wa'am wa bıse.>>

⁴⁷Tı Azezi yē Anatanayelı n sēm a zē'am, tı a tōge a yelle yetu: <<Ēna de la İsrayelı nēra sra sra n ka tartı yelle.>> ⁴⁸Tı Anatanayelı yele ē yetu: <<Fōn ēņe la wāne mina mam?>> Tı Azezi lerge ē yetu: <<Fōn boe kēnkāņa la tēņa, lan dēņe Afilipi n wun wi fu la, mam yē fu mε.>> ⁴⁹Tı Anatanayelı lerge ē yetu: <<Karēnsāama, fōn de la Nawēnne Dayva, la İsrayelı dōma naba.>> ⁵⁰Tı Azezi yele ē yetu: <<Mam n yele fōn tı mam yē fōn

boe kēnkāṅa tēṅa la īyā, tɪ fu bɔ mam sɪra? Fu wun yē bōn-kāra n gānnɪ bōn-bāna. > > ⁵¹Dee yele ē yetɪ: < < Mam yetɪ ya la sɪra, tɪ ya wun yē Nawēnne yire n yo'oge, tɪ Nawēnne malēkadōma* zonna dee sigra Nērsaala Dayva*f2* la zuo. > >

2

Pɔgdire kibsa n boe Kana tēṅa

¹La dabsa atā daare, pɔgdire kibsa n daan boe Kana, Galile so'olum puam. Tɪ Azezi ma daan bɔna mɪ. ²Tɪ ba mē wi Azezi la a karēnbiisi, tɪ ba wa'am kibsa la. ³Tɪ dāam*f3* daan pɔ'oge, tɪ Azezi ma yele ē yetɪ: < < Dāam na pɔ'oge mɛ. > > ⁴Tɪ Azezi lerge ē yetɪ: < < M ma, dagɪ fōn wun yele mam, mam n wun ēṅe se'em. Mam wakate nān ka paage. > > ⁵Tɪ Azezi ma la yele tōntōnɪba la yetɪ: < < Eṅa n yetɪ ya ēṅe se'em wuu, ya ēṅe. > >

⁶La kuga dɔgrɔ bayoobɪ n daan boe mɪ tɪ Zifdōma daan tara pɛera ba mēṅa wɔ ba sisgo n yetɪ ba ɪta se'em na. Ko'om lɪtrɪ pinii bu kɔbga n daan pɪtɪ dukɔ ayɪla. ⁷Tɪ Azezi yele ba yetɪ: < < Age-ya ko'om pɪre dɔgrɔ la. > > Tɪ ba āge pɪre ba. ⁸Tɪ Azezi yele ba yetɪ: < < Kābge-ya tarɪ ka bɔ sɛka n bɪsrɪ dia yelle la. > > Tɪ ba kābge tarɪ ka bɔ ē. ⁹La sɛka n bɪsrɪ dia la yelle la n leme ko'om na, ba lebge la dāam, tɪ a ka mina ban ze'ele zē'a. La tōntōnɪba la n āge ko'om na mi mɛ. Tɪ sɛka n bɪsrɪ dia la yelle la wi pɔgdita la, ¹⁰yele ē yetɪ: < < Nēra woo ēn dēṅe bɔ la dā-sōma, tɪ ba sān wa yū tɪge, tɪ ba yāṅa bɔ'ɔra dā-seba n ka ba āna sōṅa la. La fōn dɪke la dā-sōma ze'ele bɔ'ɔra poorum. > >

¹¹Ēna n de Azezi pɔspɔstɪ tōon-yālma tɪ a ēṅe. A ēṅe ē na Kana Galile so'olum puam, pa'ale a na'am pāṅa, tɪ a karēnbiisi la bɔ ē sɪra.

¹²Bela poorum, ēṅa la a ma, la a yibsi, la a karēnbiisi la sēṅe la Kapernaum. Ba kē bilam na dabsa fēe.

Azezi dige leebdōma Wēnde-kātum

(Amatie 21:12-13, Amarki 11:15-17, Aluki 19:45-46)

¹³La Zifdōma Zɔɔg-base* kibsa daare n daan lem, ti Azezi sēṅe Zerizalem, ¹⁴ka kē Wēnde-kāte* la zēnzakam yē nērba n koosri niigi, la piisi, la na'adawema, la lig-tæerba n zī mī. ¹⁵Ti a dūke mī'isi ēṅe ka'asre dige ba, la niigi, la piisi la wuu Wēnde-kāte la zēnzakam ti ba yese, dee zā'age lig-tæerba la taablūdōma lube, ti ba ligri la ka'ase.

¹⁶Dee yele seba n koosri na'adawema la yeti: < < Tari-ya ba yese. Da dūke-ya mam So deego la ēṅe leebgo zē'a. > > ¹⁷Ti a karēnbiisi la tēege ti la gulse yeti: < < Nawēnne, fōn deego la nōṅlum ti mam tari la, wun di mam wu bugum na. > >

¹⁸Ti Zifdōma nēṅadōma soke ē yeti: < < Tōon-yālma kāna ti fōn wun ēṅe pa'ale tōma ti fōn tari nōore ti fu ēṅe wāna? > > ¹⁹Ti Azezi lerge ba yeti: < < Sā'am-ya Wēnde-kāte wā, ti mam wun le mē ē dabsa atā puam. > > ²⁰Ti ba lerge ē yeti: < < Ba dūke la yuuma pinaasi la ayoobi mē Wēnde-ēna wā, ti fōn yeti, fōn wun mē ē dabsa atā puam? > >

²¹La Azezi n tɔgru Wēndeego yelle la, la de la a mēṅa iyā yelle ti a tɔgru. ²²La Azezi n daan wa ki dee vo'oge la, ti a karēnbiisi la tēege ti a daan yele la wāna, ti ba bɔ Nawēnne gōṅɔ yetɔga, la Azezi n daan yele se'em na sira.

Azezi mi nērsaala woo tagsgɔ

²³La Azezi n daan boe Zerizalem Zɔɔg-base kibsa la, nērba zozo'e n daan yē ti a tōnni tōon-yālma, ti ba bɔ ē sira. ²⁴La Azezi daan ka dūke a sūure wuu pa'ale ba, se'ere n soe la, a mi ba wuu mē. ²⁵A ka eeri ti

nëra tɔgɛ nërsaalba yelle bɔ ẽ, se'ere n soe la, a mi bôn-sɛka n boe nërsaalba sũure puam mɛ.

3

Azezi la Anikodem

¹Buraa ayula n daan boe Farisi* dõma puam ti a yu'vɔrɛ dɛna Anikodem. A daan de la Zifdõma nɛɲadãana. ²Bura-ɛɲa daan wa'am na Azezi zɛ'am yu'vɔɲɔ wa yele ẽ yeti: < < Karënsãama, tõma mi ti Nawënnɛ n tõm fõn ti fu dɛna karënsãama, se'ere n soe la, nëra ka tã wun ɛɲɛ bôn-yãlma wu fõn iti se'em wã wuu, sãn dagna Nawënnɛ n boe la a dãana. > > ³Ti Azezi lerge ẽ yeti: < < Mam yeti fu la sira sira, ti nëra sãn ka yẽ dɔg-paalga, a ka tã wun yẽ Nawënnɛ so'olum*. > > ⁴Ti Anikodem soke ẽ yeti: < < Nëra n kurgɛ wun ɛɲɛ la wãne ti ba le tã'agɛ dɔgɛ ẽ paalga? A wun le tã'agɛ mɛ kɛ a ma puurum ti ba le dɔgɛ ẽ bu? > > ⁵Ti Azezi lerge ẽ yeti: < < Mam yeti fu la sira sira, ti nëra sãn ka dɔgɛ la ko'om, la Nawënnɛ Sia*, a ka tã wun kɛ Nawënnɛ so'olum puam. ⁶Nërsaala n dɔgɛ sɛka la de la nërsaala, la Nawënnɛ Sia n dɔgɛ sɛka la tarɪ la Nawënnɛ Sia vɔm. ⁷Da base ti la di'ige fo, mam n yeti: Dɛni ti ba le dɔgɛ ya la iyã. ⁸Kusebgo vugri la ɛn boori zɛ'a, ti fu wõnna a dãmne, dee ka mina ɛn ze'ele zɛ'a sɛna, la ɛn we'esti zɛ'a. Nawënnɛ Sia n dɔgɛ sɛka la ãna belã. > > ⁹Ti Anikodem le soke ẽ yeti: < < Bôn-ɛɲa wun ɛɲɛ la wãne ɛɲɛ? > > ¹⁰Ti Azezi lerge ẽ yeti: < < Fõn de Israyeli karënsãam-ke'ema dee ken ka mina bôn-ɛna? ¹¹Mam yeti fu la sira sira, ti tõma tɔgrɪ la sɛla ti tõma mi, dee yetã sɛla ti tõma yẽ. La ya ka sake tõma yetɔga la. ¹²Mam sãn tɔgɛ dũnia wã yela pa'ale ya, ti ya ka sake, mam sãn tɔgɛ Nawënnɛ yire yela pa'ale ya, ya wun ɛɲɛ la wãne sake?

¹³Nëra nëra nân ka zom Nawënne yire, sãn dagna Nërsaala* Dayva la n ze'ele Nawënne yire sige. ¹⁴Wu Amoyisi* n yvun zêke bõnsela dõõgo zuo weego pvam se'em na*f4*, dëni ti ba zêke Nërsaala Dayva la mẽ bela. ¹⁵Ti nër-sëka woo n bõ ã sira wun tara vòm n ka ba'asri. > >

¹⁶Nawënne nõõge nërmaalba me halı, ti a tõm a Bi-yëña dũnia zuo, ti nër-sëka woo n bõ ã sira kãn sã'am, la a wun yë vòm n ka ba'asri.

¹⁷Nawënne ka tõm a Dayva la dũnia ti a di nërba sarıya sıbge ba, a tõm ã ti a fãage ba me base. ¹⁸La sëka n bõ ã sira, ba kãn di a sarıya. La sëka n ka bõ ã sira la, a põn koõge buurõ me, ãn ka bõ Nawënne Bi-yëña la sira la ãyã. ¹⁹Bõn-ëna n de sarıyadia la: Peelem wa'am dũnia pvam me, la nërmaalba nõõge la lika gãnna peelem na, ba tõoma n de tõon-be'ero la ãyã. ²⁰Nër-sëka woo n tõnnı tõon-be'ero sisri peelem me, a ka sëm peelem pvam, a zoti me ti a tõoma la wun puke. ²¹La nër-sëka woo n tõnnı sira sëm na peelem zë'am, ti a tõoma la pa'ale ti a sakrı la Nawënne.

Azã tõge Azezi yelle

²²Bela poorum, Azezi la a karënbıisi sëõge la Zude* so'olum ka bõna bilam misra nërba ko'om pvam. ²³Ti Azã mẽ daan bõna Enõ tëña n lem Salim tëña la misri nërba ko'om pvam, se'ere n soe la, ko'om n daan boe mĩ zo'oge. Ti nërba sënna, ti a misra ba. ²⁴Wakat-ëña ba daan nân ka këlese Azã yu'a deem.

²⁵Ti Azã karënbıisi baseba, la Zıfdõma nëra daan wë'era nõke'ene, Zıfdõma sisgo n yetı ba pëera ba mẽña malgra la yelle. ²⁶Ti ba sëõge Azã zë'am ka yeke ã yetı: < < Karënsãama, sëka n daan boe la fõn Zurdë doone ke bõba la, sëka ti fõn daan tõge a yelle la, ãn wãna n misri nërba ko'om pvam, ti nërba wuu sënna a zë'am. > > ²⁷Ti Azã lerge ba yetı: < < Nëra ka tã wun to'oge sela ti la sãn dagna

Nawēnne n bɔ ē. ²⁸Yāma mēŋa tã wɔn bɔ kaseto mɛ ti mam yeti:
<Dagɪ mam n de Krisi* la. La, ba tɔm mam mɛ ti m dēŋe a nēŋa
wa'am. > ²⁹La ãn wu nēra n di pɔga: Pɔgdita la n soe pɔka la, la
pɔgdita la sire n ze dee selsra a yetɔga la, a tari sũ-yēlga mɛ zozo'e.
Bela mam tari sũ-yēlga mɛ zozo'e. ³⁰Dēni ti ēŋa lebge kãte dee ti
mam lebge pɪka.

³¹Seka n yese saazuum wa'am n gãnni wuu, la seka n yese dũnia de
la dũnia nēra, la a tɔgrɪ la dũnia yelle. Seka n yese Nawēnne yire
wa'am na n gãnni wuu, ³²la a tɔgrɪ la ēn wɔm dee yē sela la, la nēra
nēra ka to'oge a yetɔga la. ³³Nēr-seka n to'oge a yetɔga la sake mɛ ti
Nawēnne de la sira dāana. ³⁴Se'ere n soe la, seka ti Nawēnne tɔm na
tɔgrɪ la Nawēnne yetɔga, Nawēnne n bɔ ē a Sia pãŋa zozo'e la ãyã.

³⁵Sɔ Nawēnne nɔŋe a Dayua la mɛ, ti a dɪke sela woo ēŋe a nu'usum.
³⁶Seka n bɔ a Dayua la sira tari la vɔm n ka ba'asri. La seka n ka sake
a Dayua la kãn yē vɔm n ka ba'asri, la Nawēnne sũ-isgre boe a dāana
zuo. > >

4

Azezi tɔgrɪ la Samaari pɔka

¹Azezi daan bãŋe mɛ ti Farisi* dɔma wɔm ti ēŋa yēti karēnbiisi
gãnna, dee misri ba ko'om pvam gãnna Azã. ²La, la daan dagɪ Azezi
mēŋa n misri ba ko'om pvam, la de la a karēnbiisi la. ³La Azezi n
daan bãŋe ban tɔgrɪ se'em na, ti a ze'ele Zude so'olum lebra Galile.
⁴La daan de la a doose Samaari* so'olum pvam tole. ⁵Ti a daan sēŋe
ka paage Samaari tēŋa yu'ure n de Sisaari n lem va-seka ti Azakɔbi*
yɔwɔn bɔ a bia Azozefu la. ⁶Azakɔbi lua n daan boe bilam, ti Azezi
sēŋe targɛ zĩ'ire lua la nɔorum. La daan de wu wunteŋa zuu-

tēŋasuka.

⁷Tɪ Samaari pɔka wa'am tɪ a āke ko'om. Tɪ Azezi yele ē yetɪ:
< < Ēŋe ko'om bɔ ma tɪ m yū. > > ⁸(Dee tɪ a karēnbiisi la daan sēŋe
tēŋa pɔam tɪ ba ka da dia.) ⁹Tɪ pɔka la soke ē yetɪ: < < Bēm tɪ fōn
dena Zifu sɔsra mam n de Samaari pɔka yetɪ, m bɔ fɔ ko'om tɪ fɔ
yū? > > Se'ere n soe la, Zifdōma* la Samaari dōma daan nē'esrɪ la
taaba.

¹⁰Tɪ Azezi yele ē yetɪ: < < Fɔ sān mina Nawēnne n bɔ'ɔrɪ sela, la
sɛka n yetɪ fɔ tɪ < bɔ ma ko'om tɪ m yū > la, fɔ wun sose nɪ ē, la a
wun bɔ fɔ ko'om n bɔ'ɔrɪ vɔm. > >

¹¹Tɪ pɔka la lerge yetɪ: < < M Zuudāana, fōn ka tarɪ lɔwanne, dee tɪ
lɔa la kɔ, fōn wun yē vɔm ko-bāma la be? ¹²Tōma yaaba Azakɔbɪ n bɔ
tōma lɔa la, ēŋa la a kɔma, la a dūnsi yū lɔa la ko'om mɛ. Fōn tē'esɛ
tɪ fōn gānnɪ tōma yaaba la bu? > > ¹³Tɪ Azezi lerge ē yetɪ: < < Sɛka
woo n yū lɔ-ēna ko'om na, koyūuro wun le tarɪ ē. ¹⁴La sɛka n wun yū
ko-sɛba tɪ mam wun bɔ ē na, koyūuro kān le malɪn tarɪ ē. La ko-sɛba
tɪ mam wun bɔ ē na wun lebge wɔ bulga, bulla a pɔam bɔ'ɔra ē vɔm
n ka ba'asrɪ. > >

¹⁵Tɪ pɔka la lerge ē yetɪ: < < M Zuudāana, bɔ ma ko-sɛba tɪ m wun
yū tɪ koyūuro kān le tara mam na, tɪ m da le wa'am kalam wa āke
ko'om. > >

¹⁶Tɪ Azezi yele ē yetɪ: < < Sēŋe ka wi fɔ sɪra tɪ ya wa'am. > > ¹⁷Tɪ
pɔka la lerge ē yetɪ: < < Mam ka tarɪ sɪra. > > Tɪ Azezi yele ē yetɪ:
< < Fɔ tarɪ bɔvɔ, fōn yetɪ fōn ka tarɪ sɪra la. ¹⁸Fɔ ele la sɪrba banuu,
la fōn boe la sɛka lɛɛɛ wā dagɪ fɔ sɪra, bela fɔ tɔge la asɪra. > >

¹⁹Tɪ pɔka la yele Azezi yetɪ: < < M Zuudāana, lɛɛɛ wā mam bāŋe tɪ
fōn de la Nawēnne nōtɔ'ɔsa. ²⁰Tōma yaabdōma yuun pɔ'ɔsrɪ Nawēnne
na tān-ēna zuo. Tɪ yāma Zifdōma yetɪ, dēnɪ tɪ nērba pɔ'ɔsra Nawēnne

Zerizalem. > > ²¹Ti Azezi yele ē yeti: < < Pɔka, bɔ mam yetɔga wā sira ti wakate n sēm ti ya kān pu'use Nawēnne n de ti Sɔ la tān-ēna zuo, bu Zerizalem. ²²Yāma Samaari dōma pu'usrɪ la sēka ti ya ka mi. La tōma Zifdōma pu'usrɪ la sēka ti tōma mi, se'ere n soe la, fāare ze'ele la Zifdōma zē'am. ²³La wakate sēna, la a paam mε, ti sēba n pu'usrɪ Nawēnne sira sira la, wɔn pu'use ē la a Sia* pāŋa, la sira. Ti Sɔ Nawēnne n boorɪ ti ba pu'usra ē se'em n bela. ²⁴Nawēnne de la Sia, dēni ti sēba n pu'usrɪ ē na, pu'usra ē la a Sia pāŋa, la sira. > >

²⁵Ti pɔka la lerge ē yeti: < < Mam mi ti Mesi la sēm mε, sēka ti Nawēnne looge, ti ba wi'ira ti Kriɪ* la. Eŋa sān wa'am, a wɔn pa'ale tɔ sela woo. > > ²⁶Ti Azezi yele ē yeti: < < Mam n de ēŋa n tɔgrɪ la fōn wā. > >

²⁷Bela mā'a ti a karēnbiisi la wa'am, ti la di'ige ba, ēn tɔgrɪ la pɔka la. La baa bela, nēra nēra ka soke ē yeti: < < Fōn boorɪ la bēm? > > bu: < < Fōn tɔgrɪ la pɔka la ti bēm? > >

²⁸Ti pɔka la base a yoore la, dee sēŋe tēŋa puam ka yele nērba yeti: ²⁹< < Wa'am-ya wa bise buraa n yele mam sela wuu ti mam ēŋe. A nōo kān dēna la Kriɪ la? > > ³⁰Ti ba yese tēŋa la puam sēŋe a zē'am.

³¹Wakat-ēŋa ti a karēnbiisi la mōrgra ē yeti: < < Karēsāama, di wε! > > ³²Ti Azezi yele ba yeti: < < Mam tarɪ la dia dita ti yāma ka mina. > > ³³Ti a karēnbiisi la daan sɔkra taaba yeti: < < Nēra n tarɪ dia wa'am wa bɔ ē bu? > > ³⁴Ti Azezi yele ba yeti: < < Mam dia de la m ēŋe sēka n tōm mam na n boorɪ se'em, dee tōm a tōone na ba'ase. ³⁵Yāma yeti: < La deege la wōr-sinaasɪ ti bōnkɔla lagsgɔ paage. > La mam yeti ya mε ti ya gorge bise vato la, ba bi mε paage lagsgɔ. ³⁶Seka n lagsrɪ la pōn tara la yɔɔrɔ. Lagsgɔ la de la nērba ti a lagsrɪ ti ba tara vɔm n ka ba'asrɪ. Bela ti sēka n bure, la sēka n lagsɛ la lagum ita sū-yēlga. ³⁷Yetɔg-ēna wā de la sira: < Ayēma n butɪ, ti

ayēma lagsra > . ³⁸Mam tōm ya ti ya sēŋe ka lagsē la nērba, wu va'am ti yāma ka tōm dee lagsra a bōnkɔla. La de la nērba baseba n tōm ti yāma po dita tōone na yōorɔ. > >

³⁹Samaari tēn-ēŋa nērba zozo'e bɔ Azezi sira me, pɔka la n yeke ba yeti: < < A yeke mam na sēla wuu ti mam ēŋe > > la iyā. ⁴⁰Bela ti Samaari dōma la wa'am Azezi zē'am wa sose ē yeti, a bɔna bāma zē'am. Ti a bɔna ba zē'am dabsa ayi.

⁴¹Ti nērba zozo'e daan le bɔ ē sira pa'ase, a yetɔga la iyā. ⁴²La ba daan yeke pɔka la yeti: < < La ka le dēna fōn yeke la iyā ti tōma bɔ ē sira. Tōma mēŋa wōm a yetɔga me, la tōma mi ti ēna siri de la dūnia Fāagra la. > >

Azezi boti naba tōntōn-ke'ema bia yē ĩmā'asum

⁴³La dabsa ayi la poorum, Azezi yese bilam sēŋe la Galile. ⁴⁴Azezi mēŋa daan yeti: < < Ba ka nanni Nawēne nōtɔ'ɔsa a mēŋa tēŋa. > >

⁴⁵La ēn paage Galile la, ba to'oge ē me sōŋa sōŋa, se'ere n soe la, ba mēŋa daan sēŋe Zerizalem Zɔɔg-base kibsa la wakate ka yē ēn ēŋe se'em na wuu me.

⁴⁶La Azezi daan le sēŋe la Kana n boe Galile so'olum na, zē'e-seka ti a daan boti ko'om lebge dāam na. La naba tōntōn-ke'ema n daan boe Kapernaum ti a dayua bē'era. ⁴⁷Ti a wōm ti Azezi ze'ele la Zude wa'am Galile, ti a sēŋe a zē'am ka sose ē yeti, ēŋa bia n boe mī ti a ki, a wa'am wa boti a yē ĩmā'asum. ⁴⁸Ti Azezi yeke ē yeti: < < Ya sān ka yē bōn-yālma, la yel-kırsı, ya ka bɔ'ɔrı mam sira. > > ⁴⁹Ti naba tōntōn-ke'ema la yeke ē yeti: < < M Zuudāana, wa'am tɔtɔ ti m bia la nān ka ki. > > ⁵⁰Ti Azezi yeke ē yeti: < < Sēŋe, fu bia la yeege me. > > Ti buraa la daan bɔ Azezi yetɔga la sira, kulla. ⁵¹La ēn boe sore kulla la, ti a tōntōnba tu'vse ē, yeke ē yeti: < < Fu bia la yeege

mε. > > ⁵²Ti a soke ba ti: < <Wakat-kāna ti la sōi? > > Ti ba lerge ē yeti: < <Zaam wuntēŋa karf-ayila ti a ɔɔɔ la base ē. > > ⁵³Ti a sɔ la bāŋe ti la de la wakat-ēŋa ti Azezi yele ēŋa ti a bia la yeege mε na. Ti ēŋa la a yir-dōma wuu bɔ Azezi sira. ⁵⁴Ēna de la bōn-yālma buyi dāana ti Azezi ēŋe Galile, ēn daan ze'ele Zude lebe Galile la.

5

Azezi boti kɔɔɔŋɔ yē ĩmā'asum

¹Bela poorum, Azezi sēŋe la Zerizalem ti a ka di Zifdōma kibsa. ²La kulga n daan boe Zerizalem ti a yu'ure la Ebre* yetɔga dena Betesda, a lem na piisi zanōre, ti pōnsti banuu bɔna mī. ³Ti bā'adōma zozo'e daan gā pōnsti la tēŋa, fɔɔsi la wɔbsi, la kɔɔɔŋɔ. ((Ba daan gu'ura la ko'om na sān wa dāme. ⁴Se'ere n soe la, Nawēnne maleka* n daan sigri kulga la puam wakat-wakate dāmna ko'om na. La maleka la sān dāme ko'om na, nēr-seka n dēŋe sige ko'om na puam, a yeti ĩmā'asum mε, baa bā'a-seka n tari ē.))

⁵La buraa ayila n daan boe mī ti bā'a tara ē yuuma pitā la anii. ⁶Ti Azezi yē ē gāi, bāŋe ti a bē yuuge mε, yele ē yeti: < <Fu boori ti fu yē ĩmā'asum? > > ⁷Ti bā'ara la lerge ē yeti: < <Zuudāana, mam ka tara nēra ti ko'om na sān wa dāme ti a won yōke mam base kulga la puam. Mam sān yeti m sige, ayēma n dēŋe mam sige. > > ⁸Ti Azezi yele ē yeti: < <Isge, dīke fu bōn-gā'ala sēŋe. > > ⁹Bilam zē'am ti buraa la daan yē ĩmā'asum, dīke a bōn-gā'ala sēnna.

La daar-ēŋa daan de la Zifdōma vo'osgo* daare. ¹⁰Bela ti Zifdōma nējadōma yele buraa la n yē ĩmā'asum na yeti: < <La de la vo'osgo daare, la sisri mε ti fu tu bōn-gā'ala. > > ¹¹Ti a lerge ba yeti: < <Seka n boti mam yē ĩmā'asum na, yele mam ti m dīke m bōn-

gā'ala sēŋɛ. > > ¹²Ti ba soke ē yeti: < < Nēr-kāna n yele fōn yeti, fu dıke fu bōn-gā'ala sēŋɛ? > > ¹³Ti sēka n yē ĩmā'asum na ka mina ēn de sēka, se'ere n soe la, Azezi daan kē la nēr-kuvuŋɔ n boe bilam na puam fōrge.

¹⁴Bela poorum ti Azezi yē buraa la Wēnde-kātum na, yele ē yeti: < < Bıse, fu yē ĩmā'asum. Da le tōm tōon-be'ero, ti sela n de be'em gānna bela da paage fɔ. > > ¹⁵Ti buraa la sēŋɛ ka yele Zıfdōma nēŋadōma la, ti nēr-sēka n boti ēŋa yē ĩmā'asum na de la Azezi. ¹⁶Ti ba daan ɛera ti ba nāmse Azezi, ēn boti kɔɔrŋɔ yē ĩmā'asum vo'osgo daare la ĩyā.

Nawēnne Dayva Azezi tari a Sɔ nōore me

¹⁷Ti Azezi yele ba yeti: < < Mam Sɔ tōnnı me wa paam nānanne wā, ti mam mē tōnna. > > ¹⁸Ti Zıfdōma nēŋadōma daan malın ɛera ti ba ku ē, la dagı ēn sā'am vo'osgo daare sisgo la mā'a ĩyā, la de la ēn ken wi'ira Nawēnne ti ēŋa Sɔ, ita a mēŋa wu Nawēnne na ĩyā.

¹⁹Ti Azezi yele ba yeti: < < Mam yeti ya la sira sira, ti Dayva la ka tā ita sela sela la a mēŋa nōore. A utı la ēn yē ti a Sɔ utı se'em na. Sɔ la n utı se'em na, a Dayva la mē utı la bela mēŋa. ²⁰Se'ere n soe la, Sɔ la nōŋe a Dayva la me, pa'ale ē sela wuu ti ēŋa mēŋa utı, la a wun pa'ale ē na tōon-kāra n gānnı bāna wā ti la di'ige ya. ²¹La wu Sɔ la n vo'ortı kūm bɔ'ɔra ba vɔm na, Dayva la mē bɔ'ɔra seba ti a boortı vɔm na bela. ²²La Sɔ la ka diti nēra nēra sarıya, a base sarıyadia la wuu bɔ la a Dayva la, ²³ti nērba wuu wun nā'asra Dayva la, wu ba nā'asrı a Sɔ la se'em na. La sēka n ka nā'asrı Dayva la, a ka nā'asrı Sɔ la n tōm ē na.

²⁴Mam yeti ya la sira sira, ti sēka n selse mam yetɔga dee bɔ sēka n tōm mam na sira, a tari la vɔm n ka ba'asrı. La ba kān di a sarıya. La

a yese la kũm puam tara vɔm n ka ba'asrɪ. ²⁵Mam yetɪ ya la sɪra sɪra, tɪ wakate sɛm mɛ, la a paam mɛ, tɪ seba n ka tarɪ vɔm na wun wɔm Nawɛnne Dayua la kɔa, la seba n wɔm na wun vɔa. ²⁶Se'ere n soe la, Sɔ Nawɛnne n tarɪ vɔm a mɛŋa bɔ'ɔra se'em na, a bɔ a Dayua la mɛ vɔm na bela, tɪ a tara bɔ'ɔra. ²⁷La a bɔ ɛ nɔore mɛ tɪ a dita sarɪya, ɛn de Nɛrsaala* Dayua la ɪyã. ²⁸Da base-ya tɪ mam n tɔge se'em na di'ige ya, se'ere n soe la, wakate sɛm mɛ tɪ seba wuu n boe yɔɔm wun wɔm a kɔa, ²⁹vo'oge ze'ele yɔɔɔ puam yese. Tɪ seba n ɛŋe sɔŋa yɛ vɔm Nawɛnne zɛ'am, la seba n ɛŋe be'em, a wun di ba sarɪya.

³⁰Mam ka tã wun ɛŋe sela sela la m mɛŋa nɔore. Mam diti sarɪya wu mam n wɔm se'em Nawɛnne zɛ'am na. La mam sarɪyadia mase mɛ. Se'ere n soe la, mam ka eerɪ tɪ m ɛŋe mam mɛŋa n boorɪ se'em, la de la seka n tɔm mam na n boorɪ se'em.

³¹Mam sãn bɔ m mɛŋa kaseto, a kãn dena kaseto asɪra. ³²La nɛra ayɛma n boe bɔ'ɔra mam kaseto, la mam mi tɪ a kaseto la tɪ a bɔ'ɔrɪ mam yelle la de la sɪra. ³³La yãma tɔm nɛra mɛ Azã zɛ'am, tɪ a tɔge sɪra kaseto bɔ ya. ³⁴Sãn dena mam, mam kaseto ka ze'eti nɛrsaala zɛ'am, la mam yele bela tɪ ya tã'age yɛ la fãare. ³⁵Azã daanãn wu fitla n laŋe nɛege, la yãma daan sake mɛ tɪ ya ɛŋe sũ-yɛlga wakate fɛe mã'a la a peelem na. ³⁶La mam tarɪ kaseto mɛ gãnna Azã dɛnne na. La de la tɔon-seba tɪ mam Sɔ bɔ mam tɪ m tɔm na, tɔon-bãma tɪ mam tɔnnɪ na n bɔ'ɔrɪ mam kaseto pa'ala tɪ mam Sɔ Nawɛnne n tɔm mam. ³⁷La mam Sɔ la n tɔm mam na bɔ'ɔrɪ mam kaseto mɛ. Yãma nãn ka wɔm a kɔa, la ya nãn ka yɛ ɛ. ³⁸La a yetɔga la ka boe ya sũure puam, bela n soe tɪ ya ka bɔ seka tɪ a tɔm na sɪra. ³⁹Yan eerɪ tɪ ya bãŋe Nawɛnne gɔŋɔ yetɔga la vɔore la, ya tɛ'esɛ tɪ ya wun yɛ la vɔm n ka ba'asrɪ a puam. La de la gɔn-ɛŋa n tɔgrɪ mam yelle. ⁴⁰La ya ka boorɪ tɪ ya wa'am mam zɛ'am wa yɛ vɔm na.

⁴¹Mam ka eeri nā'asgɔ nērsaalba zē'am. ⁴²La mam mi ya, mam mi ti ya ka nōŋe Nawēnne. ⁴³Mam wa'am na m Sɔ yu'ure, ti ya ka to'oge mam. La ayēma sān wa'am na a mēŋa yu'ure, ēŋa ti ya to'ori. ⁴⁴Yāma to'osri la pēka taaba zē'am, dee ka ɛera pēka n ze'eti Nawēnne ayɪla mā'a zē'am. Yāma wun ēŋe la wāne bɔ mam sɪra? ⁴⁵Da tē'esε-ya ti mam n wun yeti ya ka tari buurɔ mam Sɔ la zē'am, la de la Amoyisi* n wun yeti ya ka tari buurɔ, ēŋa ti ya te'ege. ⁴⁶Ya sān bɔ ni Amoyisi sɪra, ya wun bɔ mam mē sɪra mε, se'ere n soe la, a gulse mam yelle mε. ⁴⁷La ya sān ka bɔ ēŋa n gulse bōn-sɛba la sɪra, ya wun ēŋe la wāne bɔ mam yetɔga la sɪra? > >

6

Azezi bɔ nēr-kuvuŋɔ dia

(Amatie 14:13-21, Amarki 6:30-44, Aluki 9:10-17)

¹Bela poorum, Azezi daan sēŋe la Galile mōgre ti ba ken wi'ira ti Tiberiadɪ mōgre la doone. ²Tɪ nēr-kuvuŋɔ doose ē, ban yē ti a tōnnɪ tōon-yālma botɪ bā'adōma yēta imā'asum na iyā. ³Tɪ Azezi la a karēnbiisi zom tāŋa zuo ka zēa. ⁴La Zifdōma kibsa n de Zɔɔg-base* la daan lem mε. ⁵Tɪ Azezi zēke zuugo yē nēr-kuvuŋɔ n sēm a zē'am, ti a soke Afilipi yeti: < < Tɪ wun yē dia la bε da bɔ nēr-bāna wā ti ba di? > >

⁶A daan yele wāna ti a di la a yem bise, bēm iyā, a mēŋa daan pōn mina ēŋa n wun ēŋe se'em mε. ⁷Tɪ Afilipi lerge ē yeti: < < Baa ti sān da dia lig-kōba*f5* kɔbsyi, la ka tā wun seke ti nēra woo to'oge fēfēe. > > ⁸Tɪ Azezi karēnbia ayɪla yu'ure n de A'āndre n de Asimō-puyɛeri yɪbga yele ē yeti: ⁹< < Budibla n boe kalam tara borborɪ banuu, la zūn-pɪgsɪ bayi. La bāna de la bēm, ti ti wun dɪke bɔ nērba

n zo'oge wāna? > >

¹⁰Ti Azezi yeti: < < Base-ya ti nērba la zī'ire. > > La mōogo n daan boe zē'e-ēṅa zo'oge. Ti ba zī'ire, la buraasi källe daan de wu tusanuu.

¹¹Ti Azezi to'oge borbori la pu'vse Nawēnne, dee puᵛ bɔ nērba la n zī la, la a daan ken ēṅe zūma la mē na bēla. Ti nēra woo to'oge ēn boori se'em di tige.

¹²La ban daan di tige la, ti Azezi yele a karēnbiisi la yeti: < < Lagse-ya borbor-gito la n deege la, ti sēla da sā'am. > > ¹³Ti ba lagse borbori banuu la ti ba di deege la gito, ti ba pᵛre puᵛ pia la ayi.

¹⁴Nērba la n yē Azezi n ēṅe bōn-yālma la, ti ba yeti: < < Ena wā sᵛri de la Nawēnne nōᵛsa la ti ba yeti a sēm dūnia zuo la. > > ¹⁵La Azezi daan bāṅe mē ti ba boori ti ba pērgē ēṅa mē ti a di na'am, ti a lebe sēṅe tāṅa la zuo ēṅa ayula mā'a.

Azezi sēnni ko'om zuo

(Amatie 14:22-33, Amarki 6:45-52)

¹⁶Ti zaanōore daan paage, ti Azezi karēnbiisi la sige mōgrum, ¹⁷ka kē ōorṅo pārga ko'om na wē'esa Kapernaum, mōgre la ke bɔba. Ti wēnne daan sobe, dee ti Azezi nān ka sēṅe ba zē'am. ¹⁸Ti kuseb-kāte vugra ti ko'om na wē'era ke'enke'em. ¹⁹Ti ba sēṅe mase wu kilomētri anuu bu kilomētri ayoobi, yē ti Azezi sēnni ko'om na zuo lenna ōorṅo la, ti dabeem yōke ba. ²⁰Ti Azezi yele ba yeti: < < La de la mam. Da zoe-ya dabeem. > > ²¹Ti ba bɔra ti a kē ōorṅo la puam. Ti ōorṅo la dare paage zē'e-sēka ti ba wē'esu la.

Azezi de la dia n bɔ'vri vɔm

²²Ti beere daan wiige, ti nēr-seba n weege mōgre la doone ke bɔba la bāṅe ti ōorṅo ayula mā'a n zaam boe. La ba yē ti Azezi ka kē ōorṅo la puam la a karēnbiisi la, a karēnbiisi la mā'a n fōrgē. ²³Ti ōornɔ

baseba ze'ele Tiberiadi wa'am wa lem zē'e-seka ti Zuudāana Azezi daan pu'vse Nawēnne dia la iyā, dee ti ba di la. ²⁴La nēr-kυυηϋ la n yē ti Azezi, la a karēnbiisi la ka boe zē'e-ēᅇa la, ti ba kē ōornϋ sēᅇe Kapernaum ti ba ka ε ē.

²⁵La ba daan sēᅇe ka yē Azezi la mōgre la doone ke bōba, soke ē yeti: << Karēnsāama, wāne mā'a ti fōn wa'am kalam? >> ²⁶Ti a lerge ba yeti: << Mam yeti ya la sira sira, ti yan eeri mam na, dagi ti ya bāᅇe la mam bōn-yālma la vōore, la de la yan di tige la iyā. ²⁷Da tōnna-ya dia n wun sā'am iyā, tōnna-ya di-seba n bō'ori vōm n ka ba'asri iyā, Nērsaala Dayva*f6* n wun bō ya vōm ēᅇa. Se'ere n soe la, la de la ēᅇa ti Nawēnne n de Sō la bō ē a nōore. >> ²⁸Ti ba soke Azezi yeti: << Ti wun ēᅇe la wāne tōm tōon-seba ti Nawēnne boori? >> ²⁹Ti Azezi lerge ba yeti: << Tōon-seka ti Nawēnne boori ti ya tōm, de la ya sake seka ti a tōm na. >> ³⁰Ti ba yele ē yeti: << Tōon-yālma kāna ti fōn wun ēᅇe ti tōma yē, bō fu sira? Tōon-kāna ti fōn wun tōm? ³¹Ti yaabdōma yuun di la dia ti ba wi'iri ti manni* weem, wu lan gulse se'em na, a yuun bō ba la dia n ze'ele Nawēnne yire, ti ba di. >> ³²Ti Azezi lerge ba yeti: << Mam yeti ya la asira, ti la dagi Amoyisi* n yuun bō ya dia n ze'ele Nawēnne yire la, la de la mam Sō Nawēnne n bō'ori ya dia sira sira n ze'ele Nawēnne yire. ³³Dia sira sira ti Nawēnne bō ya la, de la seka n ze'ele Nawēnne yire sige dūnia bō'ora nērba vōm na. >> ³⁴Ti ba yele ē yeti: << Zuudāana, bō'ora tō di-ēᅇa daare woo. >>

³⁵Ti Azezi lerge ba yeti: << Mam n de dia n bō'ori vōm na. Nēr-seka woo n sēm mam zē'am, kōm kān malin yōke ē, la seka n bō mam sira, koyūuro kān malin tara ē. ³⁶La mam yele yāma me, ti ya yē mam me, la ya ka bō mam sira. ³⁷Seba wuu ti mam Sō Nawēnne bō'ori mam, sēm mam zē'am me. La seka n sēm mam zē'am, mam kān

dige nēra baa ayula base. ³⁸Se'ere n soe la, mam ka ze'ele Nawēnne yire sigum ti m ēnɛ mam n boori se'em, mam sigum ti m tōm na sɛka n tōm mam na n boori se'em. ³⁹La sɛka n tōm mam na n boori se'em de la m da boti nēr-seba wuu ti a bɔ mam na baa ayula sā'am, la de la m vo'oge ba wuu dūnia ba'asgɔ daare. ⁴⁰Mam Sɔ la n tōm mam na n boori se'em de la sɛka woo n yē a Dayva la, dee bɔ ē sira wun yē vɔm n ka ba'asri. Mam wun vo'oge ē dūnia ba'asgɔ daare. > >

⁴¹Ti Zifdōma yōnna Azezi, ēn yeti, ēɲa n de dia n ze'ele Nawēnne yire sigum na ãyã. ⁴²Ti ba daan yeti taaba yeti: < < Bura-ēna dagi Azozefv bia Azezi, sɛka ti tōma mi a sɔ, la a ma la? La bēm ti a yeti, ēɲa ze'ele la Nawēnne yire? > > ⁴³Ti Azezi yele ba yeti: < < Da yōnna-ya. ⁴⁴Nēra ka tā wun wa'am mam zē'am ti la sãn dagna mam Sɔ n tōm mam na n tari ē wa'am. La mam n wun vo'oge ē dūnia ba'asgɔ daare. ⁴⁵La gulɛ Nawēnne nōtɔ'ɔsrɪba* gōnnɔ puam yeti: < Nawēnne n wun pa'alɛ ba wuu. > La sɛka woo n selse mam Sɔ la, dee to'oge a pa'alɔ la, sēm mam zē'am mɛ. ⁴⁶Nēra nãn ka yē Sɔ Nawēnne, sãn dagna sɛka n ze'ele a zē'am na mǎ'a n yē ē. ⁴⁷Mam yeti ya la asira, ti sɛka n bɔ mam sira tari la vɔm n ka ba'asri. ⁴⁸Mam n de dia n bɔ'ɔri vɔm na. ⁴⁹Yãma yaabdōma yun di manni mɛ weego puam, la ba ki mɛ. ⁵⁰La di-sɛka n ze'ele Nawēnne yire sigum na, de la dia ti nēr-sɛka n di kãn ki. ⁵¹Mam n de di-sɛka n bɔ'ɔri vɔm n ze'ele Nawēnne yire sigum, ti nēra sãn di di-ēna, a wun vɔa wakate wuu. La di-sɛka ti mam wun bɔ dūnia dōma ti ba yē vɔm na, de la mam ãyã. > >

⁵²Ti Zifdōma la wē'era nōke'ene la taaba yeti: < < Nēr-ēna wã wun ēnɛ la wãne bɔ tōma a ãyã ti tōma di? > > ⁵³Ti Azezi yele ba yeti: < < Mam yeti ya la sira sira, ti ya sãn ka di Nērsaala* Dayva la ãyã, la ya sãn ka yū a zum, ya ka tari vɔm na ya puam. ⁵⁴Sɛka n diti mam

īyā dee yūura mam zum tarı la vɔm n ka ba'asrı, la mam wun vo'oge ē dūnia ba'asgɔ daare. ⁵⁵Se'ere n soe la, mam īyā de la dia mēŋa mēŋa, la mam zum de la bōn-yūula mēŋa mēŋa. ⁵⁶Seka n diti mam īyā, dee yūura mam zum boe la mam mε, ti mam bɔna la ē. ⁵⁷Mam Sɔ n tōm mam na, de la vɔm dāana, ēŋa īyā ti mam tara vɔm, bela, seka n diti mam īyā mē wun vɔa mam īyā. ⁵⁸Ēna de la dia n ze'ele Nawēnne yire sigum, a ka ān wu di-seka ti ya yaabdōma yuun di ki la. Seka n di di-ēna wun vɔa wakate wuu. > > ⁵⁹Azezi n daan zāsnu nērba Kapernaum wēndeego la puam na, ti a tɔge yetɔg-bāna.

⁶⁰La a karēnbiisi baseba zozo'e n daan wōm bela la, ti ba yele taaba yeti: < < Yetɔg-ēna to'ore tɔ mε, āne n wun tā'age sake yetɔg-ēna wā? > > ⁶¹Tı Azezi bāŋe ti a karēnbiisi la yōnnu mε bōn-ēna yelle, ti a yele ba yeti: < < Bōn-ēna botı yāma lebra la poorum kān le doose mam? ⁶²La ya sān yē ti Nērsaala Dayua la zonnı ēn daan boe zē'a na, ya wun ēŋe la wāne? ⁶³La de la Nawēnne Sia* n bɔ'ɔrı vɔm na, nērsaala ka tā wun ēŋe sela sela. Yetɔg-seba ti mam tɔge bɔ ya la, ze'ele la Nawēnne Sia zē'am bɔ'ɔra vɔm. ⁶⁴La baseba n boe ya tēŋasuka ka bɔ mam sira. > > Se'ere n soe ti Azezi yele bela la, a daan dēŋe bāŋe mε halı pɔspɔsı seba n kān bɔ ēŋa sira, la seka n wun pa'ale ti ba yōke ēŋa. ⁶⁵Tı a le yele ba yeti: < < Bela n soe ti mam yeti, nēra ka tā wun wa'am mam zē'am, ti la sān dagna mam Sɔ la n bɔ ē sore. > >

⁶⁶Azezi n tɔge bela la poorum, a karēnbiisi la zozo'e base ē mε dee fōrge ka le doose ē. ⁶⁷Tı Azezi soke a karēnbiisi pia la ayi la yeti: < < Yāma mē boorı ti ya base mam dee fōrge mε bu? > > ⁶⁸Tı Asimō-pyεeri lerge ē yeti: < < Zuudāana, tōma wun base fōn dee sēŋe la ān zē'am? Fōn tarı la yetɔga n bɔ'ɔrı vɔm n ka ba'asrı. ⁶⁹La tōma bɔ sira mε dee bāŋe ti fōn de la Pupelem Dāana ti Nawēnne

tõm. > > ⁷⁰Ti Azezi lerge ba yetu: < < Mam n looge yāma pia la ayi la. La ya nēra ayula de la Asūtāana* nēra. > > ⁷¹A daan tōgru la Asimō bia Azudaasi Iskariyo yelle. Se'ere n soe la, ēṅa n daan de a karēnbiisi pia la ayi la nēra ayula n wun wa pa'ale ti ba yōke ē.

7

Azezi yıbsı ka bɔ ē sɪra

¹Bela poorum, Azezi daan gilgri la Galile, a ka boortu ti a gilge Zude, Zifdōma nēṅadōma n eertu ē ti ba ku la iyā. ²Ti Zifdōma pōnsti* kibsa daan lem, ³ti Azezi yıbsı yele ē yetu: < < Base kalam dee sēṅe Zude ti fu karēnbiisi mē yē fu tōoma la ti fu tōnni na. ⁴Se'ere n soe la, nēra sān bɔɔra ti nērba bāṅe ē, a ka sugru a tōoma. Fōn tōnni tōon-bāna wā, botu nērba wuu bāṅe fɔ. > > ⁵La a yıbsı la daan ka bɔ ē sɪra. ⁶Ti Azezi yele ba yetu: < < Mam wakate nān ka paage, la wakate woo ān sōṅa me bɔ yāma. ⁷Dūnia dōma kān tā'age sise yāma, la ba sisri mam me, mam n tōgru pa'ala ti ba tōoma de la be'em na iyā. ⁸Yāma sēṅe kibsa la, ti mam nān kān sēṅe, se'ere n soe la, mam wakate nān ka paage. > > ⁹A yele ba bela dee weege la Galile.

Azezi boe la pōnsti kibsa

¹⁰La a yıbsı la n daan sēṅe kibsa la, a mē sēṅe me, la a ka botu nērba yē ē. ¹¹Ti Zifdōma nēṅadōma eera ē kibsa la puam, sɔkra yetu: < < A boe la be? > > ¹²Ti nērba waasna tōgra a yelle nēr-kvuṅɔ la puam zozo'e, ti seba yetu: < < A de la nēr-sōṅɔ > >, ti baseba yetu: < < Ayei, a pā'asru la nērba. > > ¹³La nēra nēra daan ka saage tōge a yelle nērba la zē'am, ban zoti Zifdōma nēṅadōma la iyā.

¹⁴La kibsa la daan paage la pusuka, ti Azezi kē Wēnde-kātum na zāsna nērba. ¹⁵Ti la di'ige Zifdōma, ti ba yetu: < < Bura-ēna ēṅe la

wāne mina Nawēnne gōŋɔ sōŋa, dee ka yē zāsŋɔ? > > ¹⁶Tɪ Azezi yele ba yeti: < < Mam zāsŋɔ la ka ze'ele mam mēŋa zē'am, la ze'ele la sēka n tōm mam na zē'am. ¹⁷Nēra sān bɔɔra ti a ēŋe Nawēnne n boori se'em, a wun bāŋe zāsŋɔ la sān ze'ele la Nawēnne zē'am, bu mam sān tɔgra la mam mēŋa pāŋa. ¹⁸Nēr-sēka n tɔgrɪ la a mēŋa pāŋa, eerɪ la a mēŋa pēka. La nēr-sēka n eerɪ sēka n tōm ē na pēka, ēŋa de la sɪra dāana, la sēla n ka mase ka boe a puam. ¹⁹Amoyisi n bɔ ya lɔɔ* la, dagɪ bela? La ya nēra nēra ka utɪ lɔɔ la n yele se'em na. Bēm ti ya εera mam ti ya ku? > > ²⁰Tɪ nēr-kuuŋɔ la lerge ē yeti: < < Kulkā'arga* n dolɪ fo! An eerɪ fu ti a ku? > > ²¹Tɪ Azezi lerge ba yeti: < < Mam daan tōm tōon-yālma ayula mε, ti la di'ige ya. ²²Amoyisi n yuun bɔ ya nōore yeti, ya wāta* ya budimto. La, la dagɪ Amoyisi n pɔse ēŋe bela, la de la ti sɔ-yaabdōma. La yāma wātɪ mε baa vo'osgo* daare. ²³Yāma sān wāta ya budimto vo'osgo daare ti la ka sā'am Amoyisi lɔɔ la, bēm ti yāma sūnsōa yīige la mam, mam n daan botɪ buraa la yē ĩmā'asum vo'osgo daare la ĩyā. ²⁴Da kān dɪke-ya nini n yē se'em mōŋe nēra buurɔ, bɔ-ya buurɔ wu lan mase se'em na. > >

²⁵Tɪ Zerizalem nērba baseba soke yeti: < < Dagɪ bura-ēna ti ba eerɪ ti ba ku la? ²⁶Bɪse-ya, a tɔgrɪ la nēr-kuuŋɔ puam, dee ti ba ka yele ē se'ere. Nēŋadōma la na'an bāŋe mε ti a de la Krisi ti Nawēnne tōm na bu? ²⁷Tōma mi bura-ēna n ze'ele zē'a, la Krisi la sān wa sēna, nēra kān bāŋe ēn ze'ele zē'a. > >

²⁸Bela ti a Azezi daan tɔge ke'enke'em ēn zāsɪ nērba Wēnde-kātum na yeti: < < Ya tē'esε ti ya mi mam mε dee bāŋe mam n ze'ele zē'a, la mam ka wa'am na m mēŋa nōore. La sēka n tōm mam na de la sɪra dāana, yāma ka mi ē. ²⁹La mam nōo mi ē, se'ere n soe la, mam ze'ele la ēŋa zē'am, ēŋa n tōm mam. > > ³⁰Tɪ ba εera sore ti ba yōke ē, la nēra nēra ka kalum ē, se'ere n soe la, a wakate daan nān ka paage.

³¹La nēr-kuvuḡo la nērba zozo'e daan bɔ ē sira mε, dee yetu tɪ:
< < Kriṣi la sǎn wa wa'am, a kǎn yǎḡe ēḡe bōn-yǎlma gǎnna bura-ēna
n ēḡe wǎ. > >

Farisi dōma tōm nērba tɪ ba yōke Azezi

³²Tɪ Farisi* dōma wōm nērba la n waasnɪ Azezi yelle, tɪ bǎma la
Nawēnne kǎabgɔ* kēma nēḡadōma tōm gu'urba tɪ ba ka yōke Azezi.

³³Tɪ Azezi yele yetu: < < Mam wun ken bɔna la ya la wakate fēe,
dee lebe sēka n tōm mam na zē'am. ³⁴Ya wun εera mam, la ya kǎn yē
mam, la mam n boe zē'a na, ya kǎn tā'age wa'am bilam. > > ³⁵Bela tɪ
Zifdōma yele taaba yetu: < < Bura-ēna wun wa sēḡe la be tɪ tōma kǎn
yē ē? A yetu a sēḡe la Zifdōma n wurge bɔna Grēkidōma* tēḡasuka la
zē'am, ka zāsɔm Grēkidōma bu? ³⁶Yetɔg-ēna wǎ vōore de la bēm tɪ a
yetu: < Ya wun εera mam, la ya kǎn yē mam, la mam n boe zē'a na,
ya kǎn tā'age wa'am bilam? > > >

Nawēnne Sia n bɔ'ɔrɪ vɔm

³⁷La kibsa la ba'asgɔ daare n de a dabs-kāte daare, tɪ Azezi daan isge
ze'ele tɔgra ke'enke'em yetu: < < Koyūuro sǎn tara nēr-sēka, a wa'am
mam zē'am wa yū. ³⁸Nēr-sēka n bɔ mam sira, ko'om n bɔ'ɔrɪ vɔm wun
bulla a puam, wu Nawēnne gōḡo n yele se'em na. > > ³⁹Azezi n yele
bela la, la de la Nawēnne Sia* tɪ seba n bɔ'ɔrɪ ē sira la wun wa to'oge.
Se'ere n soe la, Nawēnne daan nǎn ka bɔ a Sia la, Azezi n daan nǎn
ka yē a na'am pǎḡa la iyǎ.

Nērba la welse mε Azezi iyǎ

⁴⁰Nēr-kuvuḡo la n wōm yetɔg-bǎna la, tɪ baseba yetu: < < Ēna sɪrɪ de
la Nawēnne nōtɔ'ɔsa la. > > ⁴¹Tɪ baseba yetu: < < Ena de la Kriṣi*
la. > > Tɪ baseba daan yetu: < < Kriṣi la wun ze'ele la Galile bu?

⁴²Nawēnne gōṅṅ la yeke ti Krisi la wun dena la naba Adavidi* yuṅa, a wun ze'ele la Betelēm, tēn-sēka ti Adavidi yuṅn boe la. > > ⁴³Bela ti welgre wa'am nērba la puam Azezi iyā. ⁴⁴Ti ba nērba baseba daan bōra ti ba yōke ē, la nēra nēra ka kalum ē.

⁴⁵La gu'urba la ti kāabgō kēma nēṅadōma, la Farisi dōma la tōm na lebe ba zē'am me, ti ba soke ba yeti: < < Bēm ti ya ka yōke ē wa'am? > > ⁴⁶Ti ba lerge yeti: < < Nēra nān ka tōge wu bura-ēna wā. > > ⁴⁷Ti Farisi dōma la soke ba yeti: < < A pā'ase yāma mē yāṅe me? ⁴⁸Tōma nēṅadōma nēra ayila, bu Farisi nēra bō ē sira me bu? ⁴⁹La de la nēr-kvuṅṅ la n ka mi lō* la, ba wun yē la kā'a-be'ero. > > ⁵⁰Ti Anikodem n de ba nēra ayila n daan sēṅe ka yē Azezi la, yeke ba yeti: ⁵¹< < Tōma lō la bō sore ti ti mōṅe nēra buṅ, dee ka selse ē bāṅe ēṅa n ēṅe sēla? > > ⁵²Ti ba lebse yeke ē yeti: < < Fōn mē de la Galile nēra bu? E bise, fu wun bāṅe ti Nawēnne nōtō'osa ka ze'eti Galile. > > ((⁵³Ti nēra woo daan kule a yire.

8

Pōka n ēṅe yalsi

¹La Azezi sēṅe la Oliivi tāṅa zuo. ²Ti beere wiige bulika yu'ṅṅ yu'ṅṅ, ti a le lebe Wēnde-kātum na, ti nērba wuu daan sēṅe a zē'am, ti a zēa zāsna ba. ³Ti lō* karēnsāandōma, la Farisi* dōma tari pōka ti ba kuke ti a boe mī ita yalsi wa'am wa boti a ze'ele nērba la tēṅasuka, ⁴dee yeke Azezi yeti: < < Karēnsāama, tōma kuke la pōka wā ti a boe mī ita yalsi. ⁵Amoyisi* bō tōma nōore lō gōṅṅ la puam yeti, pōka sān ēṅe wāna, ti lobe ē na kuga kv. La fōn yeti bo? > >

⁶Ba yeke bela ti ba di la a yem bise, tā'age dōre ē. Ti Azezi suure tara a nu'ubiire gulsra tēṅa. ⁷Ti ba ken sōkra ē, ti a dō'oge yeke ba yeti:

< < Sɛka n boe yāma tēŋasuka ka tōm tōon-be'ego, a dēŋɛ dɪkɛ kugre lobe ẽ. > > ⁸Dee le suure gulsra tēŋa. ⁹La ban wōm bela la, bōnkegsɪ n dēŋɛ yese ayɪla ayɪla, tɪ ba wuu yese, dee base Azezi mā'a la pɔka la, tɪ a zɛ a nēŋam.

¹⁰Tɪ Azezi dɔ'ɔgɛ soke ẽ yetɪ: < < Pɔka, sɛba n yōkɛ fu wa'am na bɛɛ? Nēra nēra ka di fu sariya sɪbge fɔ? > > ¹¹Tɪ pɔka la lerge Azezi yetɪ: < < Ayɛɪ, Zuudāana. > > Tɪ Azezi yele ẽ yetɪ: < < Mam mē kān di fu sariya. Sēŋɛ, la da le tōm tōon-be'ero. > >))

Azezi de la dūnia peelem

¹²Tɪ Azezi le tɔgɛ la nērba la yetɪ: < < Mam de la dūnia peelem. Nēr-sɛka n doli mam, a kān malɪn sēnna lika puam, a wun yē peelem n bɔ'ɔrɪ vɔm. > >

¹³Tɪ Farisi dōma yele ẽ yetɪ: < < Fōn mēŋa n bɔ'ɔrɪ fu mēŋa kaseto, la dagɪ kaseto asɪra. > > ¹⁴Tɪ Azezi lerge ba yetɪ: < < Baa mam sān bɔ'ɔra m mēŋa kaseto, mam kaseto de la sɪra. Se'ere n soe la, mam mi mam n ze'ele zē'a wa'am, la mam n we'esɪ zē'a. La yāma ka mi mam n ze'ele zē'a, la mam n we'esɪ zē'a. ¹⁵Yāma diti sariya la nērsaala n boori se'em. La mam ka diti nēra nēra sariya. ¹⁶La baa mam sān dita sariya, mam sariyadia de la sɪra, se'ere n soe la, mam ka de m yula. La de la mam, la mam Sɔ n tōm mam na. ¹⁷La yāma lɔɔ la puam la gulsɛ yetɪ: < Nērba bayi kaseto de la sɪra. > ¹⁸Mam mēŋa n bɔ'ɔrɪ m mēŋa kaseto, la mam Sɔ la n tōm mam na mē bɔ'ɔrɪ mam kaseto mɛ. > > ¹⁹Tɪ ba soke ẽ yetɪ: < < Fōn Sɔ la boe la bɛ? > > Tɪ Azezi lerge ba yetɪ: < < Yāma ka mi mam, la ya ka mi mam Sɔ la. Ya sān mi ni mam, ya wun mi ni mam Sɔ la mē. > >

²⁰Azezi n daan zāsɪ nērba Wēnde-kātum na ligri lagsgɔ dagɪ zē'am na, tɪ a tɔgɛ yetɔg-bāna. La nēra nēra ka yōkɛ ẽ, a wakate n nān ka

paage la iyā.

Azezi pa'ale ēṅa n de seka

²¹Ti Azezi le yele ba yeti: < < Mam wun förgε mε, la ya wun ε mam koṅe, la ya wun ki la ya tōon-be'ero la puam. Mam n we'esı zē'a na, ya kãn tã'age wa'am bilam. > > ²²Ti Zifdōma sokra taaba yeti: < < En yeti: < Mam n we'esı zē'a na, ya kãn tã'age wa'am bilam > na, a yeti a ku la a mēṅa bu? > > ²³Ti Azezi yele ba yeti: < < Yāma ze'ele la tēṅa, la mam ze'ele la saazuum wa'am. Yāma de la dūnia wā nērba, la mam dagı dūnia wā nēra. ²⁴Bela iyā ti mam yeti, ya wun ki la ya tōon-be'ero la puam. Se'ere n soe la, ya sãn ka bɔ sira ti mam de la seka ti mam de la*f7*, ya wun ki la ya tōon-be'ero la puam. > > ²⁵Ti ba soke ē yeti: < < Fōn de la āne? > > Ti a lerge ba yeti: < < Mam de la seka ti mam yeti ya halı pɔspɔsı la. ²⁶Mam tarı nı yela zozo'e mε n wun tɔge yāma yelle, dee di ya sarıya. La seka n tōm mam na de la sira dāana, la sela ti mam wōm a zē'am n bela ti mam tɔgrı bɔ'ɔra dūnia dōma. > > ²⁷La ba ka bāṅε ti a tɔgrı ba la a Sɔ Nawēnne yelle. ²⁸Bela ti Azezi yele ba yeti: < < Ya sãn wa zēke Nērsaala* Dayua la, ya wun bāṅε ti mam de la seka ti mam de la. La ya wun bāṅε ti mam ka utı sela sela la m mēṅa nōore, mam Sɔ Nawēnne n pa'ale mam se'em na mǎ'a ti mam tɔgrı. ²⁹La seka n tōm mam na boe la mam mε, a ka base mam m yıla, se'ere n soe la, mam utı la sela n ān a sūure yēlum daare woo. > > ³⁰En tɔge bela la, ti nērba zozo'e bɔ ē sira.

Sira wun to'oge ya base

³¹Ti Azezi yele Zifdōma seba n daan bɔ ē sira la yeti: < < Ya sãn sakra mam yetɔga la ka base, ya sırı de la mam karēnbiisi. ³²La ya wun bāṅε sira, la sira la wun to'oge ya base. > > ³³Ti nērba la lerge ē

yeti: < < Tōma de la Abraham* yusi, tōma ka de nēra nēra yamsi. La wāne ti fōn yeti, ti wun to'oge ti mēṅa? > > ³⁴Ti Azezi lerge ba yeti: < < Mam yeti ya la sira sira, ti nēr-seka woo n tōnni tōon-be'ero de la tōon-be'ero yamṅa. ³⁵Yamṅa dagi yire la nēra wakate wuu, la yire la dayva de la yire la nēra wakate wuu. ³⁶Bela iyā, Nawēnne Dayva la sān to'oge ya base, ya siri to'oge ya mēṅa. ³⁷Mam mi ti ya de la Abraham yusi. La yāma eeri mam me ti ya ku, yāma n ka to'ori mam yetoga la iyā. ³⁸Mam togru la sela ti mam yē m So zē'am na. La yāma mē uti la sela ti ya wōm ya so zē'am na. > > ³⁹Ti ba lerge ē yeti: < < Abraham n de tōma so. > > Ti Azezi yele ba yeti: < < Ya sān de ni na Abraham kōma, ya wun tōm ni wu Abraham n tōm se'em na. ⁴⁰La yāma eeri mam me leele wā ti ya ku, mam n toge yāma sira la ti mam wōm Nawēnne zē'am na iyā. Abraham ka ēṅe bela. ⁴¹Ya tōnni na ya so n tōnni se'em na. > > Ti ba yele ē yeti: < < Tōma dagi tāmpīiba. Tōma tari la so ayila, n de Nawēnne. > > ⁴²Ti Azezi yele ba yeti: < < Nawēnne sān de ni ya so, ya wun nōṅe ni mam, se'ere n soe la, mam ze'ele la Nawēnne zē'am wa'am. Mam ka wa'am m mēṅa, ēṅa n tōm mam. ⁴³Bēm ti yāma ka wōnna mam yetoga la vōore? La de la yāma n ka boori ti ya sake mam yetoga la iyā. ⁴⁴Ya so de la Asūtāana*, la ya boori ti ya ēṅe la ya so la n boori se'em na. A de la nēr-kovra halu pī'iluṅo. A ka boe sira puam, sira n ka boe a puam na iyā. A sān parna, ēn ān se'em n bela, se'ere n soe la, a de la pōmporma, la pōmporṅo wuu so. ⁴⁵La, mam n togru sira la iyā ti ya ka bō'ora mam sira. ⁴⁶Yāma nēr-kāna n tā wun pa'ale ti mam tōm tōon-be'ego? La mam n togru sira la, bēm ti ya ka bō'ora mam sira? ⁴⁷Seka n de Nawēnne nēra selsri la Nawēnne yetoga. La yāma n dagi Nawēnne nērba la iyā, bela ti ya ka selsra. > >

⁴⁸Ti Zifdōma la yele ē yeti: < < Tōma tari buuro ti tōma yeti, fu de

la Samaari* nēra, kulkā'arga n dolı fo. > > ⁴⁹Tı Azezi lerge ba yetı: < < Kulkā'arga ka dolı mam, mam nā'asrı la m So, la yāma ka sake tı ya nā'asra mam. ⁵⁰Mam ka eerı m mēņa nā'asgɔ. Nēra ayıla n boe n eerı mam nā'asgɔ, dee dita sarıya. ⁵¹Mam yetı ya la sıra sıra, tı nēra sãn sake mam yetɔga, a kãn malın ki. > > ⁵²Tı Zifdōma yele ē yetı: < < Nānanne wā tōma bāņe me tı kulkā'arga n sırı dolı fo. Abraham la Nawēnne nōtɔ'ɔsrıba la ki me. Tı fōn yetı, nēra sãn sake fōn yetɔga, a kãn malın ki. ⁵³Fōn gānnı tōma yaaba Abraham n ki la me bu? Nawēnne nōtɔ'ɔsrıba la mē ki me. Fōn tē'esε tı fōn de la āne? > > ⁵⁴Tı Azezi lerge ba yetı: < < Mam sãn nā'asra m mēņa, mam nā'asgɔ la de la zāņa. La de la mam So la n nā'asrı mam, sεka tı ya wi'iri ya Nawēnne na. ⁵⁵La yāma ka mi ē. La mam nōo mi ē. Mam sãn yetı, mam ka mi ē, mam wun dena la pōmpɔrma wu yāma la. La mam mi ē me, dee sakra a yetɔga. ⁵⁶Ya sɔ Abraham yuun ēņe la sū-yēlga sırum tı a wun wa yē mam daare la, la a yē me, ēņe sū-yēlga. > > ⁵⁷Tı Zifdōma la yele Azezi yetı: < < Fōn nān ka paage yuuma pinuu mēņa dee yē Abraham? > > ⁵⁸Tı Azezi yele ba yetı: < < Mam yetı ya la sıra sıra, tı Abraham n yuun nān ka boe la, mam boe me. > > ⁵⁹Tı ba pı'ise kuga tı ba lobe ē. Tı Azezi li'ise Wēnde-kātum na yese.

9

Azezi botı fva yēta

¹La Azezi daan sēnnı tōlla me, yē buraa tı ba dɔge ē tı a dena fva.
²Tı a karēnbiisi soke ē yetı: < < Karēnsāama, nēr-kāna n tōm tōon-be'ero? Buraa wā bu a sɔ bu a ma n tōm tōon-be'ero, tı ba dɔge ē tı a dena fva? > > ³Tı Azezi lerge yetı: < < La dagı buraa wā bu a sɔ bu

a ma tōon-be'ero ÿyā, tı a dēna fva. La de la Nawēnne n yetı a tōm na ē pa'ale a tōoma. ⁴Dēnı tı tōma tōm seka n tōm mam na tōoma, la nān ken dēna wonteēŋa wā. Yu'buŋo sēm me tı nēra kān le tā'age tōm. ⁵Mam n nān boe dūnia puam wā, mam de la dūnia peelem. > > ⁶A yeke bela dee tubse la nōtōorum tēŋa būn tēntōnno bı fva la nini, ⁷dee yeke ē yetı: << Sēŋe ka wire fu nēŋa Silowe kulgam. >> (Silowe vōore de la << seka tı ba tōm >>.) Tı a sēŋe ka wire a nēŋa, dee lebra, tı a nini na yēta.

⁸Tı a sawiiba, la seba n mi ē kurum tı a sosrı me na yetı: << Dagi ēna n daan zı sōsra la? >> ⁹Tı seba yetı: << La de la ēŋa. >> Tı baseba yetı: << Ayei, a wōn na ēŋa dee la dagı ē. >> Tı a mēŋa yetı: << La de la mam. >> ¹⁰Tı ba soke ē yetı: << La ēŋe la wāne tı fōn nini na yāŋa yēta? >> ¹¹Tı a lerge ba yetı: << Bura la yu'ure n de Azezi la n būn tēntōnno bı mam nini, dee yeke mam tı m sēŋe Silowe kulgam ka wire. Tı mam sēŋe ka wire, yāŋa yēta. >> ¹²Tı ba soke ē yetı: << A boe la be? >> Tı a lerge yetı: << Mam ka mi. >>

Farisi dōma soke fva lan ēŋe se'em tı ēŋa yēta

¹³Tı ba tarı seka n daan de fva la sēŋe Farisi* dōma zē'am. ¹⁴La Azezi n daan būn tēntōnno bı fva la nini daar-seka tı a yēta la, daan de la Zifdōma vo'osgo daare. ¹⁵Tı Farisi dōma la mē le soke ē yetı: << La ēŋe la wāne tı fōn yēta? >> Tı a lerge ba yetı: << A būn na tēntōnno bı mam nini, tı mam wire, yāŋa yēta. >> ¹⁶Tı Farisi dōma baseba yetı: << Nēr-ēna wā ka ze'ele Nawēnne zē'am wa'am, se'ere n soe la, a ka sakrı vo'osgo* daare sisgo. >> Tı baseba yetı: << Nēra n de tōon-be'ero dāana wun ēŋe la wāne tōm tōon-yālma wāna? >> Tı welgre kē Farisi dōma la tēŋasoka.

¹⁷Ti ba le soke buraa la yetu: <<Fõn wun yeke a yelle ti bẽm, ẽn base ti fõn nini yẽta la?>> Ti a lerge ba yetu: <<A de la Nawẽnne nõta'õsa*.>> ¹⁸Ti Zifdõma nẽjadõma la ka bõra ti ba sake ti a daan de la fua dee yãña yẽta, ti ba wi a so la a ma, ¹⁹soke ba yetu: <<Ena de la yãma dayua la ti yãma yetu yãma dõge ẽ ti a dena la fua la? La ẽnge la wãne ti a yãña yẽta?>> ²⁰Ti a so la a ma lerge yetu: <<Tõma mi ti a de la tõma dayua, la tõma daan dõge ẽ ti a dena la fua. ²¹La tõma ka mi lan ẽnge se'em ti a yãña yẽta, bu saka n boti a nini na yẽta. Soke-ya ẽ, ti a ka le dena bia, a mẽña wun tõge.>> ²²A so la a ma la n zoti Zifdõma nẽjadõma la iyã ti ba yeke bela. Zifdõma nẽjadõma la daan dẽnge tõge ku me yetu, nẽra sãn sake ti Azezi de la Krisi*, bãma wun yese ẽ me ba wẽndeego la puam. ²³Bela n soe ti a so la a ma la yetu: <<Soke-ya ẽ ti a ka de bia.>>

²⁴Ti ba le wi bura-saka n daan de fua la nõore ayi puam, yeke ẽ yetu: <<Tõge sira Nawẽnne iyã. Tõma mi ti bura-ẽna de la tõon-be'ero dãana.>> ²⁵Ti a lerge yetu: <<A sãn dena tõon-be'ero dãana, bu a dagi tõon-be'ero dãana, mam ka mi. Mam n mi sela de la, mam daan de la fua, la læle wã mam yetu me.>> ²⁶Ti ba soke ẽ yetu: <<A ẽnge fõn na bẽm? A ẽnge la wãne boti fõn yẽta?>> ²⁷Ti a lerge ba yetu: <<Mam põn dẽnge yeke ya me, ti ya ka selse, bẽm ti ya le bõra ti ya wõm? Yãma mẽ boori ti ya lebge la a karẽnbiisi bu?>> ²⁸Ti ba tu ẽ, dee yetu: <<Fõn de a karẽnbia, tõma de la Amoyisi* karẽnbiisi. ²⁹Tõma mi ti Nawẽnne yuun tõge bõ la Amoyisi, la ẽna, tõma ka mi ẽn ze'ele zẽ'e-saka.>>

³⁰Ti buraa la yeke ba yetu: <<Ena de la yel-di'ija, yãma ka mi ẽn ze'ele zẽ'a, la ẽña n boti mam nini yẽta. ³¹Tõma mi ti Nawẽnne ka selsri tõon-be'ero dõma sosgo, la nẽra sãn pu'usra ẽ, dee ita ẽn boori se'em, a selsri la ẽña dãana sosgo. ³²Halı pĩ'iluño, ba nãn ka wõm ti

nēra boti nēra ti ba dɔge ē ti a dena fua nini yēta. ³³Bura-ēna sãn ka ze'ele ni Nawēnne zē'am, a kãn yãŋe ni ēŋe sela sela. > > ³⁴Ti ba lerge ē yeti: < < Ba dɔge fõn na tõon-be'ero puam, ti fõn yeti fu pa'ale tõma? > > Ti ba dige ē ba wēndeem na.

Sɛba n mi dee ka bɔɔra ti ba sake ãn wu fɔɔsi la

³⁵Ti Azezi wõm ti ba dige ē mɛ, yãŋa wa yē ē, soke ē yeti: < < Fõn bɔ Nērsaala* Dayva la sira mɛ? > > ³⁶Ti a lerge yeti: < < Zuudãana, Nērsaala Dayva la de la ãne? Yele ma ti m bɔ ē sira. > > ³⁷Ti Azezi yele ē yeti: < < Fu yē ē mɛ, ēŋa n tɔgrɪ la fu lɛ wã. > > ³⁸Ti bura la yeti: < < Zuudãana, mam bɔ fu sira mɛ > >, dee ka dũma Azezi nēŋam.

³⁹Ti Azezi yele yeti: < < Mam wa'am dũnia wã zuo ti welgre n bɔna, ti fɔɔsi yēta, dee ti sɛba n yēti la lebge fɔɔsi. > > ⁴⁰Ti Farisi dõma sɛba n daan boe mĩ na n wõm bɛla la, soke ē yeti: < < Tõma mē de la fɔɔsi bu? > > ⁴¹Ti Azezi lerge ba yeti: < < Ya sãn de ni fɔɔsi, ya tõon-be'ero taale ka boe ya zuo. La læle wã, yãma yeti yãma yēti mɛ, bɛla ti ya tõon-be'ero taale bɔna ya zuo. > >

10

Dũnsiina la a piisi makre

¹La Azezi daan yeti: < < Mam yeti ya la sira sira, ti nēr-seka n ka doli zanõre kē'era piisi denne puam, dee dɔla lalga kē'era, ēŋa de la nayiga la fãara. ²La nēr-seka n doli zanõre la kē'era, ēŋa n de piisi la dũnsiina. ³La zanõre la gu'ura yo'oru mɛ bɔ'ɔra ēŋa. Ti piisi la mina a kõa, ti a wi'ira ēn soe sɛba la yu'ura, boti ba dɔla ē yesra. ⁴La a sãn tari a piisi la wuu yese, a tolli la ba nēŋa sēnna, ti ba dɔla ē, ban mi a kõa la iŋã. ⁵La ba kãn malin doose sãana, ba wun zoe mɛ fõrge dee

base ē, ban ka mi a kōa la īyā. > >

⁶Azezi make la makre ēna wā bɔ ba, la ba ka bāŋe ēn tɔge se'em bɔ ba la vōore.

Azezi n de zanōre

⁷Ti Azezi le yele ba yeti: < < Mam yeti ya la sira sira, ti mam n de piisi denne na zanōre. ⁸Seba wuu n dēŋe mam wa'am na de la nayigba la fāarba, la piisi la ka selse ba. ⁹Mam n de zanōre la. La nēr-sēka n doli mam zē'am kē'era, a wun yē fāare. La a wun kē'era dee yesra, yēta a dia. ¹⁰Nayiga sēm ti a zū me, la a ku, la a sā'am mā'a, la mam wa'am ti nērba n yē vɔm sōŋa sōŋa. > >

Azezi n de dūnsiin-sōŋɔ

¹¹Ti Azezi le yele ba yeti: < < Mam n de dūnsiin-sōŋɔ. Dūnsiin-sōŋɔ sake kūm me a piisi īyā. ¹²La nēra n tōnni ti ba yɔɔra ē, ti a ka sɔna piisi la, a ka bɔrɔ ba sōŋa, la a sān yē saasaa n sēm, a bɔrɔ piisi la me dee zɔta. La saasaa la wun yōge piisi la me, boti ba wurge. ¹³Se'ere n soe la, a tōnni tɔ'ɔra la yɔɔɔ, a ka fabli piisi la yelle. ¹⁴Mam n de dūnsiin-sōŋɔ la, la mam mi m piisi la me, ti ba mē mina mam, ¹⁵wu mam Sɔ Nawēnne n mi mam, ti mam mē mina ē se'em na. Mam sake kūm me m piisi la īyā.

¹⁶La mam tarti piisi baseba me n ka boe denne wā puam. Dēni ti mam tarti ba wa'am, ti ba wōm mam kōa, lagum na bāna ti ba dena ayila, ti dūnsiina ayila bɔsra ba.

¹⁷Mam Sɔ nōŋe mam me, mam n dɔke m vɔm bɔ'ɔra nērsaalba, dee wun le to'oge ē na īyā. ¹⁸Nēra nēra ka to'ori mam vɔm. Mam mēŋa n wun dɔke ē bɔ. Mam tarti pāŋa me wun dɔke m vɔm bɔ, dee tara pāŋa wun le to'oge ē. Mam Sɔ n bɔ mam nōore ti m ēŋe se'em n bela. > >

¹⁹Yetɔg-bāna īyā ti welgre daan le wa'am Zifdōma la tēŋasvka. ²⁰Ti

baseba zozo'e yetu: << Kulkā'arga n doli ē, a de la zolgɔ, bēm ti ya selsra ē? >> ²¹Ti baseba yetu: << Yetɔg-bāna wā dagi kulkā'arga n doli nēra yetɔga. Kulkā'arga tā wun boti fua nini yēta? >>

Azezi la Nawēnne de la ayɩla

²²Wakat-ēŋa Zifdōma Wēnde-kātē* la malgre tēere kibsa n daan boe Zerizalem. La daan de la ɔɔɔ wakatē. ²³Ti Azezi sēŋe Wēnde-kātum na ka gilgra zē'e-sēka ti ba wi'iri ti Asalomō* vōnana la. ²⁴Ti Zifdōma lagse gilge ē, yele ē yetu: << Fōn wun base ti tōma sē'ena ka paage la dabure? Fu sān dena la Krisi la, sēka ti Nawēnne tōm na, fu yele to sira sira. >> ²⁵Ti Azezi lerge ba yetu: << Mam pōn yele ya mē, ti ya ka bɔ mam sira. Tōon-sēba ti mam tōnni na m Sɔ yu'ure la, pa'ali mam n de sēka mē. ²⁶La yāma ka bɔ mam sira, yāma n dagi mam piisi la iyā. ²⁷Mam piisi la wōnni mam kōa mē, mam mi ba mē, la ba doli mam mē. ²⁸Mam bɔ'uru ba la vɔm n ka ba'asri, ti ba kān malun sā'am, la nēra ka tā wun fāage ba mam nu'usum. ²⁹Mam Sɔ la n bɔ mam bāma la, a gānni sela woo mē, nēra ka tā wun fāage ba mam Sɔ la nu'usum. ³⁰Mam, la mam Sɔ la de la ayɩla. >>

³¹Ti Zifdōma le pīise kuga ti ba lobe ē ku. ³²Ti Azezi yele ba yetu: << Mam Sɔ boti mam tōm tōon-sōma zozo'e mē pa'ale ya. Tōon-sōma bāma puam, tōon-kāna iyā ti ya bɔɔra ti ya lobe mam na kuga? >> ³³Ti Zifdōma la lerge ē yetu: << La dagi tōon-sōma yelle ti tōma bɔɔra ti ti lobe fu la kuga ku, la de la Nawēnne yu'ur-sā'anɔ la iyā, fōn de nērsaala dee ēŋe fu mēŋa ti fōn de la Nawēnne na iyā. >> ³⁴Ti Azezi yele ba yetu: << La gulse ya lɔɔ* gōŋɔ la puam ti Nawēnne yetu: <Ya de la wēna. > ³⁵Ti mi ti Nawēnne gōŋɔ yetɔga la de la sira, la a ka tā wun sā'am. A wi'iri sēba ti a tɔge yetɔga bɔ ba la ti wēna. ³⁶La mam ti Nawēnne looge tōm dūnia zuo wā, yāma yele

mam ti m sã'anı la Nawēnne yu'vre, mam n yele ti mam de la Nawēnne Dayva la iyã? ³⁷Mam sãn ka tōnna m So tōoma, ya da bɔ mam sira. ³⁸La mam sãn tōnna a tōoma, baa ya sãn ka bɔ mam sira, ya bɔ m tōoma la sira, ti ya tã'age bãŋe, la ya sake sira ti mam So la boe la mam le me, ti mam mẽ bɔna la ě. > > ³⁹Tı ba le zıgra ti ba yōke ě, ti a pōse.

⁴⁰La ěn pōse la, a le dooge la Zurdē kulaa la doone, zē'e-seka ti Azã daan pɔse bɔna mĩ misri nērba ko'om puam na, ka bɔna bilam. ⁴¹Tı nērba zozo'e daan sēŋe a zē'am. Ba daan tɔgrı yetı: < < Azã ka tōm tōon-yälma baa ayıla, la Azã n daan tɔge bura-ēna yelle se'em wuu la de la sira. > > ⁴²La nērba zozo'e bɔ ě sira me bilam.

11

Alazaarı vo'ore

¹Buraa ayıla n daan boe Betani ti a yu'vre dena Alazaarı, ti bã'a yōke ě. A tãpa Amaari la a Amartı daan kē'eri la tēn-ēŋa puam. ²La de la Amaari ēŋa n daan ka'age tudare kaam ēŋe Azezi nãma, dıke a zomto duuse ba la. Ĕŋa tã n de Alazaarı n bē'eri la. ³Tı a tãpa la daan tōm ti ba ka yeke Azezi yetı: < < Zuudãana, fu sire la bē'eri me. > > ⁴La Azezi n wōm bela la, ti a yetı: < < Bã'a-ēna ba'asgɔ kãn dena kũm. La de la ti Nawēnne yu'vre yē zēkre, la ti Nawēnne Dayva la yu'vre wun zēke bōn-ēŋa puam. > >

⁵La Azezi daan nōŋe Amartı la a yıbga, la Alazaarı me. ⁶La ěn wōm ti Alazaarı bē'eri me na, a ken weege ěn daan boe zē'e-seka la dabsa ayı. ⁷Bela poorum ti a yeke a karēnbiisi la yetı: < < Tı lebe-ya Zude. > > ⁸Tı a karēnbiisi la yeke ě yetı: < < Karēnsãama, læle wã ti Zıfdōma daan eeri fōn ti ba lobe la kuga kv. Dee ti fōn le yetı fu lebe

bilam? > > ⁹Ti Azezi yele ba yeti: < < Bulika ti la ka paage zaanõore, la de la karf-pia la ayi ti wuntæŋa boe. Nëra sãn sënna wuntæŋa, a ka wë'eri a nãma, se'ere n soe la, dũnia peelem boe me, ti a yëta. ¹⁰La nëra sãn sënna yu'vŋɔ, a wë'eri a nãma me, se'ere n soe la, peelem ka boe ti a yëta. > >

¹¹Azezi yele bela dee yele ba yeti: < < Ti sure Alazaari gĩsri me, la mam wun sēŋe ka nēegē ē. > > ¹²Ti a karēnbiisi la yele ē yeti: < < Zuudāana, a sãn gĩsra, a wun yē ĩmã'asum. > > ¹³Azezi tɔge ba la Alazaari kũm yelle. La ba tē'ese ti a tɔgru la gēem yelle. ¹⁴Bela ti Azezi tɔge ba vēelga yeti: < < Alazaari ki me. ¹⁵La mam n daan ka boe mĩ na, mam uti sũ-yēlga me yãma ĩyã, ti ya wun bɔ mam sira. Ti sēŋe-ya a zē'am. > > ¹⁶Ti Atoma (seka ti ba wi'iri ti < < Luba > > la) yele a karēnbi-taaba yeti: < < Ti mē sēŋe-ya ti ti ka lagum ki. > >

¹⁷Azezi n daan paage la, ti ban laage Alazaari de la dabsa anaasi. ¹⁸La Betani daan lem Zerizalem mase wu kilomētri atã. ¹⁹Ti Zifdõma zozo'e wa'am ti ba pu'vse Amartu, la Amaari ba tã la kũm.

²⁰La Amartu n wõm ti Azezi sēm me na, a daan yese me tu'vse ē. Dee ti Amaari weege zēa yire. ²¹Ti Amartu yele Azezi yeti: < < Zuudāana, fõn daan sãn boe ni kalam, mam tã wã kãn ki. ²²La læele wã, mam ken mina ti bõn-seka woo ti fõn wun sose Nawēnne, a wun bɔ fɔ. > > ²³Ti Azezi yele ē yeti: < < Fu tã la wun vo'oge base kũm. > > ²⁴Ti Amartu lerge ē yeti: < < Mam mi ti a wun vo'oge dũnia ba'asgo daare, ti kũm wuu wun vo'oge la. > > ²⁵Ti Azezi yele ē yeti: < < Mam n de kũm vo'ore dāana, la vɔm dāana. Seka n bɔ mam sira, baa a sãn ki, a wun vo'oge. ²⁶La seka woo n vɔa dee bɔ mam sira, kũm kãn tã'age ē wakate wuu. Fõn bɔ bõn-ēna sira? > > ²⁷Ti Amartu lerge ē yeti: < < Ēe, Zuudāana, mam bɔ sira ti fõn de la Krisi, Nawēnne Dayva la n sēm dũnia zuo la. > >

²⁸La ěn yeŀe bela la, a fōrge me, sēŀe ka wi a yɪbga Amaari, suge yeŀe ě yetu: < <Karēnsāama wa'am me, dee wi'ira fōn. > > ²⁹La Amaari n wōm bela la, a isge me tɔtɔ we'esa a zē'am. ³⁰La Azezi daan nān ka paage tēŀa la puam, a ken bōna la Amartu n daan tu'use ě zē'e-sēka la. ³¹Tu Zifdōma sēba n wa'am wa pu'use kūm na, dee bōna la Amaari le yire la puam na, yē tu a isge tɔtɔ yesra, tu ba tē'esra tu a we'estu la yɔɔm tu a ka kaase, tu ba dɔla ě.

³²La Amaari n paage Azezi n boe zē'e-sēka la, yē ě na, a yigle me a nēŀam, yeŀe ě yetu: < <M Zuudāana, fōn daan sān boe nɪ kalam, mam tā wā kān ki. > > ³³La Azezi n daan yē tu a kellu me, la Zifdōma la n doli ě na mē kellu me na, tu a sūure sā'am halu, tu la dāam ě zozo'e, ³⁴tu a soke ba yetu: < <Yāma laage ě na be? > > Tu ba yeŀe ě yetu: < <Zuudāana, wa'am wa buse. > > ³⁵Tu Azezi kella. ³⁶Tu Zifdōma la n yē bela la, yetu: < <Buse-ya ěn nōŀe ě se'em. > > ³⁷Tu baseba yeŀe yetu: < <Dagu bura-ēna n daan botu fua la nini yēta la, a ka tā wun base nɪ tu ēna mē da ki? > >

³⁸Tu Azezi sūure le sā'am halu, tu a we'esa yɔɔm na. Yɔɔgɔ la daan de la tāmpā yoko, tu kugre lige a nōore. ³⁹Tu Azezi yetu: < <Lake-ya kugre la. > > Tu sēka n ki la tā Amartu yeŀe Azezi yetu: < <M Zuudāana, a pōn pō'oge me, se'ere n soe la, la de la dabsa anaasi n wāna tu a boe yɔɔm. > > ⁴⁰Tu Azezi soke ě yetu: < <Mam ka yeŀe fu yetu, fu sān bɔ mam sira, fu wun yē Nawēnne na'am pāŀa? > > ⁴¹Tu ba lake kugre la. Tu Azezi gorge saazuum yetu: < <M So, mam pu'usru fu, fōn selse mam pu'usgɔ la. > > ⁴²Mam mi tu daare woo fu selsru mam pu'usgɔ me. La mam yeŀe bela la nēr-kuuŀɔ wā iyā, tu ba wun bɔ sira tu fōn tōm mam. > > ⁴³A yeŀe bela dee tɔge la ke'enke'em yetu: < <Alazaari, yese! > > ⁴⁴Tu sēka n daan ki la isge yese. Tu tāna vile a nāma la a nu'usi, la tānne ayēma n vile a nēŀa. Tu Azezi yeŀe ba yetu:

< < Lorge-ya tãna la, dee base ē ti a fōrge. > >

Zifdōma nēṅadōma eerı sore ti ba ku Azezi

(Amatie 26:1-5, Amarkı 14:1-2, Aluki 22:1-2)

⁴⁵La Zifdōma seba n daan wa'am Amaari zē'am wa yē Azezi n ēṅe se'em na, ba zozo'e bɔ ē sira me. ⁴⁶Tı baseba sēṅe Farisi* dōma zē'am ka yele ba Azezi n ēṅe se'em na.

⁴⁷Tı kãabgɔ* kēma nēṅadōma, la Farisi dōma lagse ba sariyaditba kēma yetı: < < Tı wun ēṅe la wãne? Bura-ēna wã tōnnı la tōon-yãlma zozo'e. ⁴⁸Tı sãn base ē ti a ita bela, nērba wuu wun bɔ ē sira me, la Rom* dōma wun wa'am wa sã'am tı Wēnde-kãte wã, la tı so'olum wã wuu me. > >

⁴⁹Tı ba nēra ayıla yu'ure n de Akayifu n daan de kãabgɔ kēma nēṅadãana yuun-ēṅa, yele ba yetı: < < Yãma ka mi sela sela. ⁵⁰Ya ka mi tı buraa ayıla sãn ki nērba la ãyã, n sōi tı buuri la wuu n wun sã'am? > > ⁵¹La, la dagı a mēṅa yem tı a yele bela, la de la ēn daan de kãabgɔ kēma nēṅadãana yuun-ēṅa la tı a to'oge Nawēnne yetɔga tɔge yetı, dēntı tı Azezi wa ki bɔ bãma buuri la. ⁵²La, la dagı bãma buuri la mã'a ãyã tı la mase tı a ki, la de la Nawēnne kɔma n wurge zē'esı wuu la ãyã, tı a yetı a lagse ba tı ba lebge buuri ayıla.

⁵³La sēṅe la daar-ēṅa, tı Zifdōma nēṅadōma ēṅe nōore ayıla tı ba ku ē. ⁵⁴Bela ãyã tı Azezi ka le εera Zifdōma tēṅasvka tı ba yēta ē. A fōrge bilam sēṅe la tēnsı n lem mōom, ka kē'era tēṅa yu'ure n de Efrayim la a karēbiisi la.

⁵⁵La Zifdōma Zɔɔg-base* kibsa n daan lem, tı nērba zozo'e ze'ele tēn-pıgsı puam sēṅe Zerizalem lan dēṅe Zɔɔg-base kibsa la, tı ba ka malge ba mēṅa wu ba sisgo n yetı ba ita se'em na. ⁵⁶Tı ba εera Azezi, sēṅe ka ze Wēnde-kātum na sɔkra taaba yetı: < < Yãma tē'ese la

dēna? A siri kân wa'am kibsa wã? > > ⁵⁷La kâabgɔ kēma nēṅadōma, la Farisi dōma la daan bɔ la nōore ti nēra sãn mina ěn boe zē'a, a pa'ale ti ba yōke ě.

12

Amaari ka'age tɔdare kaam ěṅe Azezi

(Amatie 26:6-13, Amarkɩ 14:3-9)

¹Zɔɔg-base* kibsa daan deege la dabsa ayoobɩ la a paage, ti Azezi sēṅe Betani, ěn vo'oge Alazaari tēn-seka la. ²Tɩ ba daan ěṅe dia bilam bɔ ě, ti Amarti daan puɔta dia la. La Alazaari daan lagum na nērba la zēa la Azezi dita. ³Tɩ Amaari dɩke tɔdare ka-sōma ligri n zo'oge, ti ba wi'iri ti < <naari> > n paage litri pusoka wa'am wa ka'age ěṅe Azezi nāma, dɩke a zomto duuse ba. Tɩ yire la wuu lebge tɔdare kaam na yūuṅo. ⁴Tɩ Azezi karēmbia ayɩla yu'ure n de Azudaasi Iskariyo, seka n wun wa pa'ale ti ba yōke ě na, yeti: ⁵< <Tɩ sãn koose ni tɔdare kaam wã lig-kōba*f8* kɔbstã, ti kân dɩke ligri la bɔ nasdōma? > > ⁶Ěn yele bela la, dagɩ ti a fabɩ la nasdōma yelle, la de la ěn de nayiga, la ěṅa n tari ba ligri tãmpɔkɔ, zūura sela ti ba sūm a puam na. ⁷Tɩ Azezi yeti: < <Base-ya pɔka la bāalam, ti a dēṅe ěṅe la ba wun ěṅe mam se'em mam laare daare. ⁸Nasdōma boe la ya le me daare woo, la mam kân bɔna la ya daare woo. > >

⁹Tɩ Zifdōma zozo'e wōm ti Azezi boe la Betani. Tɩ ba sēṅe mĩ, la dagɩ Azezi mā'a ĩyã ti ba sēṅe, ba sēṅe ti ba mē ka yē la Alazaari ti Azezi daan vo'oge la. ¹⁰Tɩ kâabgɔ kēma nēṅadōma la bãm yeti, bāma mē wun ku Alazaari me, ¹¹ti la de la ěṅa ĩyã ti Zifdōma zozo'e base bāma dee bɔ Azezi sira.

Azezi kē'eri Zerizalem la na'am

(Amatie 21:1-11, Amarkı 11:1-11, Aluki 19:28-40)

¹²Tı beere wiige, ti nēr-kuvuḡo la n wa'am kibsa la wōm ti Azezi sēm Zerizalem. ¹³Tı ba kō karkōnsı vōoro tu'vsra ē, dee tōgra ke'enke'em yetı:

< < Ozaana! Pēge-ya nēr-seka n sēm na Zuudāana Nawēnne yu'vre
la,

ēḡa n de Israyelı dōma naba la. > >

¹⁴Tı Azezi yē bōn-biire bā ē wu lan gulse Nawēnne gōḡo puam se'em yetı:

¹⁵< < Siyō*f9* nērba, da zōta-ya dabeem.

Bıse-ya, ya naba n bā bōn-biire sēna la. > >

¹⁶La Azezi karēnbiisi la daan nān ka bāḡe yel-ēḡa vōore. La Azezi n yāḡa wa yē na'am pāḡa Nawēnne zē'am na, ti ba tēge ti bōn-ēḡa n gulse a yelle, la ba daan ēḡe la bela bō ē.

¹⁷La nēr-seba n wa bōna Azezi zē'am, wakat-seka ti a wi Alazaarı ti a vo'oge ze'ele yōḡo puam yese la, daan pa'ale nērba la ēn daan ēḡe se'em me. ¹⁸Bela n soe ti nēr-kuvuḡo la tu'vse ē, ban wōm ti a tōm na tōon-yālm-ēḡa la iyā. ¹⁹Bela ti Farisi dōma yetı taaba yetı: < < Ya yē ya, ya ka tā wun ēḡe sela sela. Bıse-ya, nērba wuu dolı ē me. > >

Grēkıdōma eerı ti ba yē Azezi, ti Azezi tōgra a kūm yelle

²⁰La Grēkıdōma* n daan boe nēr-seba n sēḡe Zerizalem kibsa ti ba pu'vse Nawēnne na puam. ²¹Bāma n sēḡe Afilipi n ze'ele Betisayida n boe Galile so'olum puam na zē'am, ka yele ē yetı: < < Ke'ema, tōma boorı ti ti yē la Azezi. > > ²²Tı Afilipi sēḡe ka yele A'āndre, ti A'āndre la Afilipi doose taaba sēḡe ka yele Azezi. ²³Tı Azezi lerge ba yetı:
< < Wakate la paage me ti Nērsaala* Dayva la wun yē a na'am pāḡa.

²⁴Mam yetı ya la sira sira, ti ba sān ka bure ke-biire ti a yem bule

yese dee ti a mēŋa pō'oge, ke-bi-ēŋa ayula mā'a n wun bōna, la ba sān bure ē ti a yem na bule yese dee ti a mēŋa ki, a wun wom biε zozo'e.

²⁵Nēr-seka n nōŋe a wom, a wun koŋe wom, la nēr-seka n ka nōŋe a wom dūnia wā zuo, a wun tara wom n ka ba'asri. ²⁶La nēra sān bōra ti a tōm bō mam, dēni ti a dōla mam. La mam n boe zē'e-seka la, mam tōntōnna mē wun bōna la bilam. La nēra sān tōnna bō'ra mam, mam So wun pēge ē.

²⁷Lεεle wā mam sūure sā'am mε, la m wun yeti bēm? Mam wun yeti: M So, sōŋe ma ti m pōse nāmsgō ēna wā bu? Ayei, la de la yel-ēna iyā ti mam wa'am ti m nāmsε. > > ²⁸A yele bela dee yeti:

< < Mam So, nā'ase fu yu'vre. > > Ti kōa ze'ele saazuum yeti:

< < Mam nā'ase m yu'vre mε, la mam wun le nā'ase ē. > >

²⁹Ti nēr-seba n ze bilam na wōm, yeti: < < Saaga n dāme. > > Ti baseba yeti: < < Maleka* n tōge la ē. > > ³⁰Ti Azezi yele yeti: < < La dagi mam iyā ti kō-ēŋa tōge, la de la yāma iyā. ³¹Lεεle wā de la dūnia wā saryadia wakate. Lεεle wā ba wun dige dūnia wā naba*f10* base yēŋa. ³²La ba sān wa zēke mam saazuum, mam wun taru nērba wuu wa'am mam zē'am. > > ³³Azezi yele bela pa'alε la ēŋa wun ki se'em.

³⁴Ti nēr-kuvuŋo la lerge ē yeti: < < La gulse lōw* gōŋo puam pa'alε tōma yeti, Krisi* wun bōna la wakate wuu, la bēm ti fōn yeti, dēni ti ba zēke Nērsaala* Dayua la saazuum? Ane n de Nērsaala Dayo-ēŋa? > > ³⁵Ti Azezi yele ba yeti: < < Peelem ken bōna la ya le mε wakate fēe. Peelem wā n ken bōna la ya wakat-seka la, sēnna-ya ti lika da wa liŋe ya. Sēka n sēnni lika puam ka mi ēn we'esu zē'a.

³⁶Wakat-seka ti peelem ken bōna la yāma la, bō-ya seka n de peelem na sira, ti ya lebge peelem na kōma. > >

Azezi yele la bela dee fōrge ba zē'am, sēŋe ka svge. ³⁷Baa la Azezi n ēŋe bōn-yālma zozo'e nērba la nēŋam na, ba ka bō ē sira. ³⁸Bela ti

Nawēnne nōt'ɔsa A'ezayi* n yuun ye le se'em na ēŋe. A yuun yeti:

< < Zuudāana, āne n bɔ tōma kōa la sira?

La Zuudāana la pāŋa puke pa'ale la āne? > >

³⁹Ba ka tã wun bɔ sira, se'ere n soe la, A'ezayi yuun le yeti:

⁴⁰< < Nawēnne pī ba nini me,

ti ba da yēta la ba nini na,

dee lige ba putē'era,

ti ba da wōm a yetɔga la vōore.

Sān dagi ni bela,

ba wun teege ni yem

ti a bɔ ba laafe. > >

⁴¹A'ezayi yuun ye le bela, se'ere n soe la, a yuun yē la Azezi na'am pāŋa, ti a yuun tɔge a yelle. ⁴²Baa la bela wuu, Zifdōma nēŋadōma la puam nērba zozo'e bɔ ē sira me, la Farisi* dōma la iyā ba ka sake ye le, ba zoti me ti ba wun dige ba ba wēndeego la puam. ⁴³Ba daan nōŋe la nērsaalba pēka gānna Nawēnne pēka.

Azezi yetɔga n diti nērba sariya

⁴⁴Azezi tɔge ke'enke'em yeti: < < Seka n bɔ'ɔri mam sira, la dagi mam mā'a ti a bɔ'ɔri sira, a bɔ'ɔri la seka n tōm mam na sira. ⁴⁵La

seka n yē mam, yē la seka n tōm mam na. ⁴⁶Mam de la peelem n wa'am dūnia zuo, ti nēr-seka n bɔ'ɔri mam sira kãn bɔna lika puam.

⁴⁷La nēra sãn wōm mam yetɔga, dee ka sake yetɔga la, la dagi mam n wun di a sariya, se'ere n soe la, mam ka wa'am ti m di dūnia dōma sariya, mam wa'am ti m fāage ba me. ⁴⁸Seka n zagse mam, ka sake mam yetɔga la, a tari seka n wun di a sariya. La de la yetɔga la ti mam tɔge la n wun pa'ale ti a ka tari buuro dūnia ba'asgo daare.

⁴⁹Se'ere n soe la, mam ka tɔgri la m mēŋa putē'ere. La de la mam So n

tõm mam na mēṅa n bɔ mam nōore mam wun ye le se'em, la mam wun tɔge sɛla yelle. ⁵⁰La mam mi ti sɛka n sake a nōore la tari la vom n ka ba'asri. La bõn-sɛba ti mam yeti la, la de la mam Sɔ n ye le mam se'em na n bela ti mam ye le. > >

13

Azezi peege a karēnbiisi nāma

¹Lan dēṅe Zɔɔg-base kibsa la, Azezi mi me ti ēṅa wakate paage me ti ēṅa wun fõrge dūnia sēṅe a Sɔ zē'am. La a daan nōṅe a nērba la n boe dūnia me, a nōṅe ba la halı nōṅlum zōnzōnnɔ.

²Azezi la a karēnbiisi la daan boe mĩ dita la zaanōore dia. La Asūtāana* daan põn botı Asimõ dayva Azudaası Iskariyo tē'ese a sūurum ti ēṅa wun pa'ale ti ba yõke Azezi. ³La Azezi daan mi ti ēṅa ze'ele la Nawēnne zē'am wa'am, la ēṅa lebrı la Nawēnne zē'am, la a mi ti ēṅa Sɔ Nawēnne dıke sɛla woo ēṅe la ēṅa nu'usum. ⁴Tı a isge dia la zē'am yege a fu-sɛka n boe zuum na, dee dıke tãnne lu a sia. ⁵Yãṅa purge ko'om ēṅe laaga pvam, pɛera a karēnbiisi la nāma, dıke tãnne la n lu a sia la duusra ba.

⁶Tı a daan paage Asimõ-pıyeeri zē'am, ti a soke ē yeti: < < M Zuudāana, fõn yeti fu peege la mam nāma? > > ⁷Tı Azezi lerge ē yeti: < < Fõn ka mi mam tı se'em wã vōore lɛle, la fu wun wa bãṅe. > > ⁸Tı Apıyeeri ye le ē yeti: < < Ayɛı! Fõn kãn peege mam nāma. > > Tı Azezi lerge ē yeti: < < Mam sãn ka peege fo, fu ka le tara pure la mam. > > ⁹Tı Asimõ-pıyeeri ye le ē yeti: < < M Zuudāana, da peege m nāma la mǎ'a, po peege m nu'usi la m zuugo. > > ¹⁰Tı Azezi ye le ē yeti: < < Sɛka n sɔ ıyã ka le bɔra ti a sɔ, sãn dagna a nāma mǎ'a ti a wun peege, se'ere n soe la, a ıyã wuu

dēke me sōṅa sōṅa. Ya dēke me āna sōṅa sōṅa, la, la daḡi ya wuu. > > ¹¹Azezi daan mi seka n yeti a pa'ale ti ba yōke ē na me, bela ãyā ti a yeti, daḡi ya wuu n ān sōṅa.

¹²La Azezi n peege ba nāma ki'ulum na, a le ye la a fuugo la, lebe ka zĩ'ire dia la zē'am, ye le ba yeti: < <Yāma bāṅe mam n ēṅe se'em na vōore? ¹³Yāma wi'iri mam ti Karēnsāama, la Zuudāana, ya ye le sōṅa. Mam de la bela. ¹⁴Mam n de ya Zuudāana, la ya Karēnsāama la sān peege ya nāma, yāma mē mase me ti ya pēera taaba nāma. ¹⁵Se'ere n soe la, la de la māmsgo ti mam ēṅe bo ya, ti ya mē ita wu mam n ēṅe ya se'em na. ¹⁶Mam yeti ya la sira sira, ti tōntōnna ka gānni a zuudāana, la seka ti ba tōm na ka gānni seka n tōm ē na. ¹⁷Yan mi bōn-bāma la, ya sān ēṅe bela, ya de la zu-yēlum dōma. ¹⁸La daḡi ya wuu yelle ti mam toḡri, mam mi seba ti mam looge la me, la dēni ti bōn-seba n gulse Nawēnne gōṅo puam na ēṅe. La yeti: < Nēr-seka n diti la mam na, wērgē me zebra la mam. > ¹⁹Mam dēṅe yeta ya me leele wā, ti la nān ka ēṅe. Ti la sān wa ēṅe, ya wun bo sira ti mam de la seka ti mam de la. ²⁰Mam yeti ya la sira sira, ti seka n to'ori seka ti mam tōm na, a to'ori la mam. La seka n to'ori mam na, a to'ori la seka n tōm mam na. > >

Azezi yeti nēra n wun pa'ale ti ba yōke ēṅa

(Amatie 26:20-25, Amarki 14:17-21, Aluki 22:21-23)

²¹Azezi n toḡe bela la, sū-sā'aṅo n tari ē zozo'e, ti a yeti: < <Mam yeti ya la sira sira, ti ya nēra ayula n wun wa pa'ale ti ba yōke mam. > > ²²Ti a karēnbiisi la daan bɪsra taaba, ka mina ēn toḡri nēr-seka yelle. ²³La Azezi karēnbiisi la ayula, seka ti a nōṅe la daan zĩ la Azezi sakuko. ²⁴Ti Asimō-pɪyeeri kābse ē ti a soke Azezi bāṅe la de la ān yelle ti a toḡri la. ²⁵Ti karēnbi-ēṅa dente Azezi, soke ē yeti:

< < Zuudāana, ān de ē? > > ²⁶Ti Azezi lerge yeti: < < A de la seka ti mam wun suke borborti girgo bo ē na. > > A dike borborti girgo la suke bo la Azudaasi n de Asimō Iskariyo dayua. ²⁷Ti Azudaasi to'oge borborti la, ti Asūtāana kē a sūurum. Ti Azezi yele ē yeti: < < Fōn yeti fu ēṅe se'em na, ēṅe ē tōtō. > > ²⁸La seba n daan lagum bōna mī dita la, nēra nēra ka bāṅe se'ere n soe ti a yele ē bela. ²⁹La Azudaasi n daan zēri ligri tāmpōkō la, nērba baseba tē'ese ti Azezi yele ē ti a sēṅe ka da la bōn-seba ti ba boorti ti ba dike ēṅe kibsa la, bu a bo nasdōma sela. ³⁰Azudaasi n daan to'oge borborti la, dee kō'on yese. La daan de la yu'ḡḡ.

Azezi bo a karēnbiisi nōor-paalga

³¹Azudaasi n yese la, ti Azezi yeti: < < Lēle wā Nērsaala* Dayua la wun yē a na'am pāṅa, la Nawēnne wun yē nā'asgō a iyā. ³²Nawēnne sān yē nā'asgō a iyā, Nawēnne mēṅa wun nā'ase ē. Lēle wā ti a wun nā'ase ē. ³³M kōma, mam ken bōna la ya la wakate fēe mā'a. La ya wun ε mam, la mam yeti ya lēle wā wu mam n daan yele Zifdōma se'em na: Ya ka tā wun wa'am zē'e-seka ti mam we'esi la.

³⁴Mam bō'orti ya la nōor-paalga: Nōṅe-ya taaba. Wu mam n nōṅe ya se'em na, ya mē nōṅe taaba bela. ³⁵Ya sān nōṅe taaba, nērba wuu wun bāṅe ti ya de la mam karēnbiisi. > >

Azezi dēṅe tōge ti Apīyēri wun si'ise ēṅa

(Amatie 26:31-35, Amarki 14:27-31, Aluki 22:31-34)

³⁶Ti Asimō-pīyēri soke Azezi yeti: < < Zuudāana, fōn we'esi la be? > > Ti a lerge ē yeti: < < Mam n we'esi zē'a na, fu ka tā wun doose mam sēṅe lēle wā. La fu wun wa doose mam poore wa'am. > > ³⁷Ti Apīyēri soke ē yeti: < < Zuudāana, bēm ēṅe ti mam kān tā'age doose fōn sēṅe lēle wā? Mam sake ti m ki me fōn iyā. > >

³⁸Tɪ Azezi lerge ẽ yetɪ: < < Fõn wɔn sake tɪ fu ki mam ỹã? Mam yetɪ fu la sɪra sɪra, tɪ lan dẽŋe nõ-rɔɔgɔ n wɔn kaase, fu wɔn si'ise nõore atã tɪ fõn ka mi mam. > >

14

Azezi n de sore n we'estɪ Nawẽnne zẽ'am

¹Azezi le yele ba yetɪ: < < Da base-ya tɪ ya sũure sã'am. Bɔ-ya Nawẽnne sɪra, la ya bɔ mam mẽ sɪra. ²Kẽ'a zẽ'estɪ boe mam Sɔ Nawẽnne yire zo'oge mɛ. Mam we'estɪ tɪ m ka malge la zẽ'a ya ỹã. La sãn dagɪ nɪ bela, mam kãn yele nɪ ya. ³La mam sãn sẽŋe ka malge zẽ'a la ya ỹã, mam wɔn leme wa'am wa tarɪ ya sẽŋe mam zẽ'am, tɪ mam n boe zẽ'a na, yãma mẽ bɔna bilam. ⁴La mam n we'estɪ zẽ'e-seka la, ya mi a sore la. > > ⁵Tɪ Atoma yele ẽ yetɪ: < < Zuudãana, tõma ka mi fõn we'estɪ zẽ'a na, tõma wɔn ẽŋe la wãne tã'age bãŋe a sore? > > ⁶Tɪ Azezi lerge ẽ yetɪ: < < Mam n de sore, la sɪra, la vɔm dãana. Nẽra nẽra ka tã wɔn wa'am mam Sɔ zẽ'am, tɪ la sãn ka doose la mam. ⁷Ya sãn mi ni mam, ya wɔn mi ni mam Sɔ la mẽ. La læle wã, ya mi ẽ, la ya yẽ ẽ. > >

⁸Tɪ Afilipi yele ẽ yetɪ: < < Zuudãana, pa'ale tɔ fu Sɔ la, tɪ bela seke tõma mɛ. > > ⁹Tɪ Azezi lerge ẽ yetɪ: < < Afilipi, mam boe la ya yuuge mɛ, tɪ fõn nãn ken ka mina mam? Seka n yẽ mam, yẽ mam Sɔ mɛ. La ẽŋe la wãne tɪ fõn yetɪ, m pa'ale ya m Sɔ la? ¹⁰Fõn ka bɔ sɪra tɪ mam boe la mam Sɔ la le, tɪ mam Sɔ la bɔna la mam le? Yetɔg-seba tɪ mam tɔgrɪ la yãma la, ka ze'eti mam mẽŋa zẽ'am, la de la mam Sɔ la n boe la mam le la n tõnnɪ a tõoma. ¹¹Bɔ-ya mam sɪra, mam n yetɪ mam boe la m Sɔ la le, tɪ mam Sɔ la bɔna la mam le la. La ya sãn ka sake bela, ya bɔ mam sɪra m tõoma la ỹã.

¹²Mam yeti ya la sira sira, ti seka n b'oru mam sira la, a mẽ wun tòm tōon-seba ti mam tōnni na, la a wun tòm tōon-kāra n gānni bela, se'ere n soe la, mam we'esti la m Sɔ zē'am. ¹³La bōn-seba wuu ti ya wun sose la mam yu'ure, mam wun ɛɲe bɔ ya ti m Sɔ la yē nā'asgo a Dayva la ɪyā. ¹⁴Ya sān sose sela la mam yu'ure, mam wun ɛɲe. > >

Nawēnne Sia wa'aŋɔ

¹⁵< < Ya sān nōɲe mam, ya wun sake mam nōore la mɛ. ¹⁶La mam wun sose m Sɔ la, ti a bɔ ya Sōŋra ayēma ti a bɔna la ya le wakate n ka ba'asri. ¹⁷A de la sira Sia* ti dūnia dōma ka tā wun to'oge ɛ, se'ere n soe la, ba ka tā wun yē ɛ, la ba ka mi ɛ. La yāma mi ɛ, se'ere n soe la, a boe la ya zē'am, la a wun bɔna la ya le.

¹⁸Mam kān base ya kubsi, mam wun leme wa'am ya zē'am. ¹⁹La sān ɛɲe fēe, dūnia nērba kān le yē mam. La yāma nōo wun yē mam, se'ere n soe la, mam n vɔa la, yāma mẽ wun vɔa mɛ. ²⁰La daar-ɛɲa daare, ya wun bāɲe ti mam boe la m Sɔ la le, ti yāma bɔna la mam, ti mam bɔna la yāma.

²¹Seka n bāɲe mam nōore la ti mam bɔ la, dee sakra ita bela, la de la ɛɲa n nōɲe mam. Mam Sɔ la wun nōɲe seka n nōɲe mam na mɛ. La mam wun nōɲe ɛɲa dāana, dee dɪke m mẽɲa pa'ale ɛ. > >

²²Ti Azudaasi ayēma n dagi Azudaasi Iskariyo la soke ɛ yeti: < < Zuudāana, la ɛɲe la wāne ti fōn wun dɪke fu mẽɲa pa'ale tōma, dee kān pa'ale dūnia nērba? > > ²³Ti Azezi lerge ɛ yeti: < < Nēra sān nōɲe mam, a wun sake ita mam n yeke se'em na, la mam Sɔ wun nōɲe a dāana. La tōma wun wa'am a zē'am wa bɔna la ɛ. ²⁴Seka n ka nōɲe mam, a ka sake ita mam yetɔga n yeke se'em na. La yetɔga la ti ya wōnni wā dagi mam mẽɲa yetɔga, la de la mam Sɔ la n tōm mam na yetɔga.

²⁵Mam ken bɔna la ya zē'am dee tɔge yetɔg-bāna bɔ ya. ²⁶La Sōŋra la, mam Sɔ Nawēnne Sɪa la tɪ a wun tōm na mam yu'vɔre tɪ a wa'am ya zē'am na, ēŋa n wun zāsɔm ya sɛla woo, dee tēege ya bōn-sɛba wuu tɪ mam yeke ya la.

²⁷Mam basɪ sū-mā'asɔm bɔ ya, mam mēŋa sū-mā'asɔm tɪ mam bɔ'ɔrɪ ya. Mam ka bɔ'ɔrɪ ya wu dūnia n bɔ'ɔrɪ se'em na. Da base-ya tɪ ya sūure sā'am, da zɔta-ya dabeem. ²⁸Ya wōm mam n yeke ya tɪ mam we'estɪ mɛ, la mam wun leme wa'am ya zē'am. Ya sān nōŋɛ nɪ mam, ya wun ēŋɛ nɪ sū-yēlum mam n we'estɪ m Sɔ zē'am na ūyā. Se'ere n soe la, mam Sɔ la n gānnɪ mam. ²⁹Leele wā, mam tɔge ya mɛ tɪ la nān ka paage, tɪ la sān wa paage, ya wun bɔ mam sɪra. ³⁰Mam kān le tɔge la ya le zo'oge, se'ere n soe la, dūnia naba sēm mɛ. La a ka tarɪ pāŋa la mam. ³¹La dēnɪ tɪ dūnia dōma bāŋɛ tɪ mam nōŋɛ m Sɔ la mɛ, la mam utɪ wu mam Sɔ la n bɔ mam nōore tɪ m ēŋɛ se'em na. Isge-ya, tɪ fōrge kalam. > >

15

Viinye tɪa, la a wila yelle

¹Azezi zāsɔm ba yetɪ: < < Mam de la viinye* tɪa mēŋa mēŋa. La mam Sɔ Nawēnne n de viinye tɪa la dāana. ²Wil-sɛka n puse mam zuo dee ka wɔnna biɛ, a wāartɪ ē mɛ basra. La wil-sɛka woo n wɔnntɪ biɛ, a yorsɪ ē mɛ tɪ a āna sōŋa malɪn wɔnna biɛ zɔ'ɔra. ³Yāma pōn āna sōŋa mɛ, yetɔg-sɛba tɪ mam tɔge bɔ ya la ūyā. ⁴Bɔna-ya la mam le, tɪ mam wun bɔna la ya. Wu tɪa wille n ka tā wun wɔm biɛ a to'ore tɪ a sān ka bɔna la tɪa la, belɪ, ya mē sān ka bɔna la mam, ya ka tā wun wɔm biɛ.

⁵Mam n de tɪa la, tɪ yāma dɛna wila la. Seka n boe la mam, tɪ mam

bɔna la ẽ, ẽŋa dāana tɔnni tɔon-sɔma zɔ'ɔra mɛ, se'ere n soe la, ya ka tã wun ẽŋe sela sela, ti ya sãn ka bɔna la mam. ⁶Něra sãn ka bɔna la mam le, ba wun lobe ẽ base wu tia wille la, ti a ku. La ba vaari wil-seba n ku la ita la bugum puam, ti bugum dita ba. ⁷Ya sãn bɔna la mam, ti mam yetɔga la bɔna ya puam, ya sose yan boori sela wuu, ti ya wun yẽ. ⁸Ya sãn tɔm tɔon-sɔma zo'oge pa'ale ti yãma de la mam karẽbiisi, bela ya wun nã'ase mam Sɔ.

⁹Mam nõŋe ya wu mam Sɔ n nõŋe mam se'em na. Tara-ya mam nõŋlum na ya sũure puam. ¹⁰Ya sãn sake mam nõore la, ya wun tara mam nõŋlum na ya sũure puam, wu mam sake m Sɔ nõore tara a nõŋlum se'em na. ¹¹Mam tɔge ya wãna ti ya tara la mam sũ-yẽlga, ti ya sũ-yẽlga wun zo'oge pã.

¹²Mam nõore n wãna: Nõŋe-ya taaba, wu mam n nõŋe ya se'em na. ¹³Něra ka boe n tari nõŋlum gãna něra n sake ti a ki a sirdõma iyã. ¹⁴Ya sãn ẽŋe mam n yeke ya se'em na, ya de la mam sirdõma. ¹⁵Mam ka le wi'ira ya ti m tɔntɔnɔba, se'ere n soe la, tɔntɔnna ka mi a zuudãana n uti sela. Mam wi'iri ya ti m sirdõma, se'ere n soe la, mam boti yãma bãŋe bɔn-seba ti mam Sɔ yeke mam na wuu mɛ. ¹⁶Dagi yãma n looge mam, mam n looge ya, dıke m tɔone na ẽŋe ya nu'usum ti ya sẽŋe ka tɔm tɔon-sɔma wu tia n wɔnni bie la, ti ya tɔon-sɔma la wun bɔna wakate wuu. Bela, bɔn-seka woo ti ya wun sose mam Sɔ la, la mam yu'ure, a wun bɔ ya. ¹⁷Mam n bɔ ya nõore ti ya ẽŋe se'em de la ya nõŋe taaba. > >

Dũnia něrba sise Azezi la a karẽbiisi

¹⁸Ti Azezi le yeke yeti: < < Dũnia něrba sãn sise ya, ya bãŋe ti ba dẽŋe sise la mam. ¹⁹Ya sãn de ni na dũnia n soe ya, dũnia něrba wun nõŋe ni ya, se'ere n soe la, ya de la dũnia bɔnɔ. La mam loose ya la

dūnia puam yese, la dagi dūnia n soe ya, bela ti dūnia nērba sira ya.

²⁰Tēege-ya yetɔg-seka ti mam yeke ya ti: <Tōntōnna ka gānna a zuudāana la.> Ba sān nāmse mam, ba mē wun nāmse yāma me. La ba sān sake mam yetɔga, ba wun sake yāma mē yetɔga. ²¹La ba wun ēŋe ya bōn-bāma wuu mam yu'ure ĩyā, se'ere n soe la, ba ka mi seka n tōm mam na. ²²Mam sān ka wa'am ni, la mam sān ka tɔge ni la ba le, ba tōon-be'ero taale ka boe ba zuo. La leele wā, ba ka tā wun yeti bāma taru buuro. ²³Seka n sisri mam na, a mē sisri mam So la me.

²⁴Mam sān ka tōm ni tōon-seba ti nēra baa ayila nān ka tōm ba tēŋasuka, ba tōon-be'ero taale ka boe ba zuo. La leele wā, ba yē mam tōoma me, dee sise mam na m So la. ²⁵Bela puam ti bōn-seka n gulse Nawēnne gōŋɔ puam na ēŋe. La yeti: <Ba sise mam na zāŋa.>

²⁶Sōŋra la wun wa'am ya zē'am, a de la sira Sia* ti mam wun tōm, ti a ze'ele mam So Nawēnne zē'am wa'am ya zē'am. Ēŋa wun tɔge mam yelle bo ya. ²⁷La yāma mē wun tɔge mam yelle, se'ere n soe la, halu pī'iluŋo ti ya boe la mam le.

16

¹Mam tɔge bela bo ya ti sela da wa boti ya base ka le dola mam. ²Ba wun wa dige ya ba wēndeto puam, la wakate sēna ti nērba wun ku ya, dee tē'ese ti bāma tōm na Nawēnne tōone. ³Ba wun ēŋe la bela, se'ere n soe la, ba ka mi mam So la, la mam mēŋa. ⁴La mam yeke ya bela ti wakat-ēŋa sān wa paage, ya tēege ti mam pōn yeke ya. > >

Nawēnne Sia tōoma

< <Mam ka yeke ya bela pɔspɔsi, se'ere n soe la, mam daan boe la ya le me. ⁵La nānanne wā mam we'esu la seka n tōm mam na zē'am, la ya nēra baa ayila ka sokri mam yeti, mam we'esu la be? ⁶La mam n

yele ya bõn-ẽna wã ñyã, sũ-sã'añɔ n tarɪ ya zozo'e. ⁷La mam yetɪ ya la sɪra, tɪ la ãn sõŋa bɔ ya tɪ mam sẽŋɛ. Se'ere n soe la, mam sãn ka sẽŋɛ, Sõŋra la kãn wa'am ya zẽ'am, la mam sãn sẽŋɛ, mam wun tõm ẽ bɔ ya. ⁸La a sãn wa'am, a wun botɪ dũnia nẽrba bãŋɛ tɪ ba tuuge mɛ tõon-be'ero yelle, la sela n mase yelle, la sariyadia yelle. ⁹A wun botɪ ba bãŋɛ tɪ ba tõon-be'ero la de la ban ka bɔ mam sɪra la. ¹⁰A wun botɪ ba bãŋɛ sela n mase, se'ere n soe la, mam we'estɪ la m Sɔ zẽ'am, la ya kãn le yẽ mam. ¹¹A wun botɪ ba bãŋɛ sariyadia yelle, se'ere n soe la, Nawẽnne di dũnia wã naba sariya mɛ, tɪ a koŋe buurɔ.

¹²Mam ken tara la yela zozo'e tɪ m tɔge bɔ ya, la ya kãn tã'age to'oge ba nãnanne wã. ¹³La Nawẽnne Sɪa* n de sɪra dãana la sãn wa'am, a wun pa'ale ya sɪra wuu, se'ere n soe la, a yetɔga la ka ze'eti a mẽŋa zẽ'am, a wun tɔge la sela tɪ a wõm na wuu bɔ ya, dee yele ya sela n boe nẽŋa sɛna. ¹⁴A wun nã'ase mam, se'ere n soe la, a wun dɪke la sela n boe mam zẽ'am na tɔge bɔ ya. ¹⁵Mam Sɔ la n tarɪ sela wuu la de la mam bõnɔ. Bela ñyã tɪ mam yetɪ, a wun dɪke la sela n boe mam zẽ'am na tɔge bɔ ya. > >

Sũ-sã'añɔ wun lebge sũ-yẽlga

¹⁶< < La sãn ẽŋɛ fɛe, ya kãn le yẽ mam, la, la sãn le ẽŋɛ fɛe, ya wun le yẽ mam. > > ¹⁷Tɪ karẽnbiisi baseba sɔkra taaba yetɪ: < < Eŋa n yetɪ, la sãn ẽŋɛ fɛe, tɪ kãn le yẽ ẽŋa, la, la sãn le ẽŋɛ fɛe, tɪ wun le yẽ ẽŋa, dee le yetɪ, ẽŋa we'estɪ la a Sɔ zẽ'am na, a võore de la bẽm? > > ¹⁸Bela tɪ ba daan yetɪ tɪ: < < En yetɪ la sãn ẽŋɛ fɛe la, a võore de la bẽm? Tõma ka mi bõn-seka yelle tɪ a tɔgrɪ la. > > ¹⁹La Azezi n daan mi tɪ ba boorɪ tɪ ba soke ẽ mɛ na, tɪ a yele ba yetɪ: < < Mam n yetɪ, la sãn ẽŋɛ fɛe, ya kãn le yẽ mam, la, la sãn le ẽŋɛ fɛe, ya wun le yẽ mam na yelle tɪ yãma sɔkra taaba? ²⁰Mam yetɪ ya la sɪra sɪra, tɪ ya

wun kaase fable, la dūnia dōma sūure wun āna yēlum. Ya sūure wun sāl'am, la ya sū-sāl'aṅɔ la wun wa lebge sū-yēlga. ²¹Pɔka sān bɔna mī virgra, sū-sāl'aṅɔ n tarɪ ē, a nāmsgɔ wakate n paage la īyā. La a sān dɔge bia la kɪ'ulum, a ka le tēra a nāmsgɔ la yelle, a sūure ān yēlum mɛ, ēn dɔge bia la īyā. ²²Bela nānanne wā yāma mē tarɪ la sū-sāl'aṅɔ, la mam wun le wa yē ya, la ya sūure wun ēṅe yēlum. La nēra baa ayula kān tā'age sāl'am ya sū-yēlga la. ²³La daar-ēṅa daare, ya kān le soke mam sela baa ayula yelle.

Mam yetɪ ya la sira sira, tɪ bōn-sɛka tɪ ya wun sose mam Sɔ la mam yu'vre, a wun bɔ ya. ²⁴Ya nān ka sose sela la mam yu'vre. Sose-ya tɪ ya wun to'oge tɪ ya sū-yēlga zo'oge pāi.

²⁵Mam make la makre tɔge bɔ ya. La wakate sēm mɛ tɪ mam wun tɔge m Sɔ la yelle vēelga vēelga bɔ ya, kān le make makre tɔge.

²⁶Daar-ēṅa daare ya wun sose mam Sɔ Nawēnne la mam yu'vre, mam ka yetɪ mam wun sose ē bɔ ya. ²⁷Mam Sɔ la mēṅa nōṅe yāma mɛ, se'ere n soe la, yāma nōṅe mam mɛ, dee bɔ mam sira tɪ mam ze'ele la Nawēnne zē'am wa'am. ²⁸Mam ze'ele la m Sɔ Nawēnne zē'am wa'am dūnia zuo, la mam fōgrɪ dūnia zuo wɛ'esa la m Sɔ la zē'am. > >

²⁹Tɪ a karēnbiisi la yele ē yetɪ: < < Nānanne wā, fōn yāṅa tɔgrɪ la vēelga vēelga, dee ka le makra makre. ³⁰Tōma yāṅa mi tɪ fōn mi sela woo mɛ, fōn ka le ɛera tɪ nēra soke fo. Bela tōma sake tɪ fōn ze'ele la Nawēnne zē'am wa'am. > > ³¹Tɪ Azezi lerge ba yetɪ: < < Ya yāṅa sake ya? ³²Tɔ. Wakate sēna, la a pōn paam mɛ, tɪ ya wuu wun wirge tɪ ya nēra woo bɔna a yire dee base mam m yula. La mam ka de m yula, se'ere n soe la, mam Sɔ la boe la mam mɛ. ³³Mam yele ya bela tɪ ya tara la sū-mā'asum mam yetɔga la īyā. Dūnia wā puam ya tarɪ la nāmsgɔ, la keṅe ya sūure, tɪ mam yāṅe dūnia mɛ. > >

17

Azezi pu'ose Nawēnne a nērba ñyã

¹Azezi n tɔge bela ki'ulum na, a gorge bise la saazuum yeti: < < M So, mam daare paage ya, nã'ase mam n de fu Dayva la, ti mam mē nã'ase fɔ. ²La de la fõn bɔ mam nõore ti m sɔna nērsaalba wuu, dee bɔ seba ti fõn bɔ mam na wuu vɔm n ka ba'asri. ³La vɔm n ka ba'asri la de la ba bāŋe fõn, fu yila mã'a n de Sira Dãana Nawēnne na, la ba bāŋe mam Azezi-krisi ti fu tøm na. ⁴Mam base ti fõn yē nã'asgɔ tēŋa wã zuo mɛ. Mam tøm tõon-seba ti fõn bɔ mam ti m tøm na ba'ase mɛ. ⁵Lɛɛɛ wã, m So, boti m yē nã'asgɔ fu zē'am, wu mam n daan tari na'am pãŋa fu zē'am se'em, lan dēŋe dũnia n daan nãn ka nãam na.

⁶Mam boti seba ti fõn looge dũnia nērba puam bɔ mam na bāŋe fõn mɛ. Ba daan de la fõn nērba, ti fõn dɪke ba bɔ mam, la ba sake fu yetɔga la mɛ. ⁷Lɛɛɛ wã ba bāŋe ti fõn bɔ mam sela la wuu ze'ele la fõn zē'am. ⁸Se'ere n soe la, mam tɔge ba la yetɔg-seba ti fõn bɔ mam na, ti ba to'oge, dee bāŋe sira sira ti mam ze'ele la fõn zē'am. La ba bɔ sira ti fõn tøm mam.

⁹Mam pu'usri la bãma ñyã, mam ka pu'usri dũnia nērba ñyã, la de la nēr-seba ti fu bɔ mam na ñyã, se'ere n soe la, bãma de la fõn nērba. ¹⁰La mam bõnɔ de la fõn bõnɔ, ti fõn bõnɔ dena mam bõnɔ, la mam yē nã'asgɔ mɛ ba zē'am. ¹¹Mam ka le bɔna dũnia zuo, la bãma boe la dũnia zuo dee ti mam sēna fõn zē'am. M So n de pupeelem dãana, gu'ura ba la fu yu'vre la ti fu bɔ mam na pãŋa, ti ba wun dena ayula wu mam la fõn n de ayula se'em na. ¹²Mam n daan boe la ba le la, mam daan gu'uri ba la yu'vr-seka ti fõn bɔ mam na pãŋa. Mam bise ba yelle mɛ sõŋa sõŋa, ti nēra baa ayula ka bɔi, sãn dagna seka n de a sã'am*f11*, ti fõn gõŋɔ n ye le se'em na ēŋe la.

¹³La lɛɛɛ wā mam sēm na fōn zē'am, la mam tɔgrɪ la wāna mam nān ken bɔna dūnia zuo, tɪ ba wun tara mam sū-yēlga, tɪ ba sū-yēlga zo'oge pāi. ¹⁴Mam tɔge fōn yetɔga la bɔ ba mɛ, la dūnia nērba sisri ba mɛ, se'ere n soe la, ba dagɪ dūnia bōnɔ, wu mam mē dagɪ dūnia nēra se'em na. ¹⁵Mam ka sosrɪ tɪ fu yese ba dūnia wā zuo, la de la tɪ fu gu ba la be'em dāana. ¹⁶La bāma dagɪ dūnia nērba, wu mam mē n dagɪ dūnia nēra se'em na. ¹⁷Botɪ fōn sɪra la wun base tɪ ba welge to'ore tara pupeelem dɛna fu nērba. Fōn yetɔga la n de sɪra. ¹⁸Mam mē tōm ba dūnia puam wu fōn tōm mam dūnia zuo se'em na. ¹⁹La bāma ãyā tɪ mam welge m mēŋa to'ore dɪke m mēŋa bɔ fōn, tɪ fōn sɪra la wun botɪ ba mē welge ba mēŋa to'ore tara pupeelem dɛna fu nērba.

²⁰La dagɪ bāma mā'a ãyā tɪ mam pu'usrɪ, la de la seba n wun wa bɔ mam sɪra ba yetɔga la ãyā la mē yelle. ²¹Mam pu'usrɪ fōn tɪ fu botɪ ba lagɪm dɛna buyɪla, wu fōn de mam Sɔ n boe la mam lɛ, tɪ mam mē bɔna la fōn se'em na, tɪ ba mē wun lagɪm dɛna buyɪla la tōma, tɪ dūnia nērba la wun bɔ sɪra tɪ fōn tōm mam. ²²La mam bɔ ba na'am pān-seka tɪ fōn bɔ mam na mɛ tɪ ba dɛna ayɪla, wu tōma n de ayɪla se'em na. ²³Tɪ mam wun bɔna la ba, tɪ fōn bɔna la mam, tɪ ba wun sɪra dɛna ayɪla, tɪ dūnia nērba wun bāŋɛ tɪ la de la fōn tōm mam, la fōn nōŋɛ ba wu fōn nōŋɛ mam se'em na.

²⁴M Sɔ, mam boorɪ tɪ nēr-seba tɪ fu bɔ mam na, mē bɔna la mam lɛ zē'e-seka tɪ mam wun bɔna la, tɪ ba wun yē mam na'am pāŋa, na'am pān-seka tɪ fōn bɔ mam na, se'ere n soe la, fōn nōŋɛ mam mɛ, tɪ dūnia yuvun nān ken ka bɔna. ²⁵M Sɔ, fōn de seka n mase. Dūnia nērba ka bāŋɛ fōn, la mam nōo bāŋɛ fōn mɛ, la nēr-bāma bāŋɛ mɛ tɪ la de la fōn tōm mam. ²⁶Mam botɪ ba bāŋɛ fōn mɛ, la mam wun ken botɪ ba bāŋɛ fɔ, tɪ nōŋlɪm seka tɪ fōn nōŋɛ mam na, wun bɔna la ba, tɪ mam mē bɔna la ba. > >

18

Ba yōke Azezi

(Amatie 26:47-56, Amarki 14:43-50, Aluki 22:47-53)

¹Azezi n tōge bela ba'ase la, ēṅa la a karēnbiisi la yese dooge la Sedrō kulga ke bōba, gaare n daan boe mī, tī ba sēṅe ka kē bilam. ²La Azudaasi n de sēka n wun pa'ale tī ba yōke ē na daan mi zē'a la mē, se'ere n soe la, Azezi la a karēnbiisi la daan ēn lagsra taaba bilam mē. ³Bela tī kāabgō kēma nēṅadōma, la Farisi* dōma daan tōm gu'urba tī ba doose la sudaasi, tī Azudaasi tarī ba sēṅe mī. Ba daan tarī la zebre lōgrō, la fitladōma, dee lasum bugum zēera.

⁴La Azezi mi bōn-seba wuu n wun ēṅe ē mē, bela tī a sēṅe lem ba soke ba yeti: <<Yāma eeri la āne?>> ⁵Tī ba lerge ē yeti: <<Tōma eeri la Azezi n de Nazareti nēra la.>> Tī Azezi yele ba yeti: <<La de la mam.>> La Azudaasi n daan yeti a pa'ale tī ba yōke ē na daan ze mī mē. ⁶La Azezi n yeti: <<La de la mam>> na, ba sēṅe la abilimpoore lebe lui tēṅa. ⁷Tī Azezi le soke ba yeti: <<Āne tī yāma eeri?>> Tī ba yeti: <<Azezi n de Nazareti nēra la.>> ⁸Tī Azezi lerge ba yeti: <<Mam yele ya tī la de la mam. La sān dena la mam tī ya eeri, base-ya nēr-bāna tī ba fōrge.>> ⁹A yele bela tī a yetōga tī a tōge la n ēṅe, a yeti: <<Nēr-seba tī fōn bō mam na, nēra baa ayula ka bō.>>

¹⁰La Asimō-piyēeri daan tarī la sukōbgo, fooge sukōbgo la se kāabgō kēma nēṅadāana tōntōnna zuvgō tubre fiige. Tōntōnna la yu'vre de la Amalkusi. ¹¹Tī Azezi yele Apiyēeri yeti: <<Lebe sūm fu sv'a la a fuvgo pvam. Fōn tē'ese tī mam kān sake nāmsgō sēka tī mam Sō bō mam na mē bu?>>

¹²Ti sudaasi la, la ba ke'ema, la Zifdōma gu'urba la yōke Azezi lu ē,
¹³tari ē dēnje sēnje A'anni zē'am. A'anni daan de la Akayifu n de
kāabgo kēma nējadāana yuun-ēja la dεem-buraa. ¹⁴La de la Akayifu
n daan yeke Zifdōma ti nēra ayula sān ki nērba wuu ãyã n sōi.

Apıyeeri si'ise ti ēja ka mi Azezi

(Amatie 26:69-70, Amarki 14:66-68, Aluki 22:55-57)

¹⁵La Asimō-pıyeeri la karēnbia ayula n daan doli Azezi. La kāabgo
kēma nējadāana la daan mi karēnbi-ēja me, ti a po doose la Azezi
kē kāabgo kēma nējadāana la yire. ¹⁶La Apıyeeri weege ze la yēja,
yaŋa nōorum, ti karēnbi-seka ti kāabgo kēma nējadāana mi la, yese
ka tōge la pōka la n gu'uri zanōre la, dee boti Apıyeeri kē. ¹⁷Ti
tōntōn-pōka la n gu'uri zanōre la, soke Apıyeeri yeti: <<Fōn dagi la
bura-ēna karēnbia ayula?>> Ti Apıyeeri lerge yeti: <<Mam dagi a
karēnbia.>>

¹⁸La ɔɔɔ n daan boe, ti tōntōnɔba, la gu'urba la tvure bugum kaage
ɔɔsra. Ti Apıyeeri daan po bɔna mĩ ɔɔsra bugum na.

Kāabgo kēma nējadāana soke Azezi a zāsŋɔ la yelle

(Amatie 26:59-66, Amarki 14:55-64, Aluki 22:66-71)

¹⁹Ti kāabgo kēma nējadāana la soke Azezi a karēnbiisi la, la a
zāsŋɔ la yelle. ²⁰Ti Azezi lerge ē yeti: <<Mam tōge la nēr-kvuhɔ la
puam bɔ nērba, mam zāsum nērba Zifdōma wēndeto puam, la
Wēnde-kātum na, zē'e-seba ti Zifdōma wuu ēn lagsri taaba la me,
mam ka svge tōge sela sela. ²¹Bēm ti fu sakra mam? Soke seba n wōm
mam yetɔga la, bāma mi mam n yeke se'em na me.>> ²²Azezi n tōge
bela la, ti tōntōnna n ze mĩ, wē a pēka, dee yeti: <<Fōn lerge la
kāabgo kēma nējadāana la bela?>> ²³Ti Azezi yeke ē yeti: <<Mam

sān tɔgɛ la be'em, pa'ale sela ti mam tɔgɛ be'em na, la mam sān tɔgɛ la sōŋa, bēm ti fu wē'era ma? > > ²⁴Ti A'annɪ botɪ ba tarɪ ē ban lu ē se'em na, sēŋɛ kǎabgɔ kēma nēŋadāana Akayifu zē'am.

Apɪyɛɛɪ le sɪ'ɪsɛ ti ēŋa ka mi Azezi

(Amatie 26:71-75, Amarkɪ 14:69-72, Aluki 22:58-62)

²⁵La Asimō-pɪyɛɛɪ daan ken ze ɔɔsra la bugum na. Ti ba soke ē yetɪ: < <Fōn mē dagɪ la bura-ēna karēnbɪa ayɪla? > > Ti a sɪ'ɪsɛ yetɪ: < <Mam dagɪ a karēnbɪa. > > ²⁶Ti kǎabgɔ kēma nēŋadāana tōntōnna ayɪla n de nēr-sɛka ti Apɪyɛɛɪ daan sɛ a tubrɛ fiige la sɔbɪa, soke ē yetɪ: < <Dagɪ fōn ti mam yē la bura la gaare la puam na? > > ²⁷Ti Apɪyɛɛɪ le sɪ'ɪsɛ. Wakat-ēŋa mēŋa ti nō-rɔɔgɔ kaase.

Ba tarɪ Azezi sēŋɛ gɔmna Apilatɪ zē'am

(Amatie 27:1-2, 11-31, Amarkɪ 15:1-20, Aluki 23:1-5, 13-25)

²⁸Ti ba daan tarɪ Azezi Akayifu yire sēŋɛ gɔmna yire. La daan de la bulika yu'ɔŋɔ yu'ɔŋɔ. La Zɪfdōma la mēŋa ka kē gɔmna la yire, ba ēŋɛ bela ti ba da dēgɛ la ba mēŋa, tā'age di Zɔɔg-base* kibsa la. ²⁹Ti Apilatɪ yese sēŋɛ ba zē'am ka soke ba yetɪ: < <Bēm yelle ti yāma tarɪ bura-ēna wā wa'am? > > ³⁰Ti ba lerge ē yetɪ: < <A sān ka ēŋɛ nɪ be'em, tōma kǎn yōkɛ ē wa'am wa bɔ fōn. > > ³¹Ti Apilatɪ yele ba yetɪ: < <Tara-ya ē ya mēŋa sēŋɛ ka di a sariya wu ya lɔɔ la n de se'em na. > > Ti Zɪfdōma la yele ē yetɪ: < <Tōma ka tarɪ nōore ti ti ku nēra. > > ³²La de la bela ti Azezi n daan tɔgɛ pa'ale kūm sɛka buuri ti ēŋa wun ki la ēŋɛ*f12*.

³³Ti Apilatɪ lebe kē deem ka wi Azezi soke ē yetɪ: < <Fōn de Zɪfdōma naba la? > > ³⁴Ti Azezi lerge ē yetɪ: < <Fōn mēŋa putē'ere ti fōn sɔkra bela bu, la de la nērba baseba n tɔgɛ mam yelle bela bɔ

fõn? > > ³⁵Tı Apilatı lerge ã yetı: < < Mam dagı Zifu. Fu mẽña buuri, la ba kãabgɔ kẽma nẽñadõma n yõke fu tarı wa bɔ mam. Bẽm tı fõn ãñe? > > ³⁶Tı Azezi lerge ã yetı: < < Mam so'olum dagı dũnia wã bõnɔ. Mam so'olum sãn de nı dũnia wã bõnɔ, mam tõntõnıba la wun zẽbe nı mɛ tı ba da yõke mam bɔ Zifdõma la. La lɛɛle wã, mam so'olum dagı dũnia wã bõnɔ. > > ³⁷Tı Apilatı soke ã yetı: < < Bela fõn de la naba? > > Tı Azezi lerge yetı: < < La de la fõn yele se'em na, mam de la naba. Mam dɔge wa'am dũnia wã tı m tɔge la sıra kaseto. La sɛka woo n dolı sıra selsrı la mam kõa. > > ³⁸Tı Apilatı soke ã yetı: < < Sıra de la bẽm? > >

Apilatı n yele bela la, a le yese sẽñe la Zifdõma la zẽ'am ka yele ba yetı: < < Mam ka yẽ sɛla n de be'em bura wã zẽ'am. ³⁹La yãma malum mɛ tı Zɔɔg-base kibsa wakate woo m yese yu'a deem nẽra ayıla base. Yãma boorı tı m yese la Zifdõma naba la base bu? > > ⁴⁰Tı ba tɔgra ke'enke'em yetı: < < Da kãn base ãña. Tõma boorı tı fu base la Abarabası. > > La Abarabası daan de la fãara.

19

¹Bela tı Apilatı botı ba tarı Azezi sẽñe ka wẽ ã na ka'asa. ²Tı sudaasi dıke gõ'osı wɔge mũña vuge ã, dee ye ã fuugo n de gomusga, ³sẽñe lem ã yetı tı: < < Zifdõma naba, naa > >, dee wẽ'era a pɛgsı.

⁴Tı Apilatı le yese nẽrba la zẽ'am ka yele ba yetı: < < Bıse-ya, mam wun tarı ã yesem na ya zẽ'am tı ya bãñe tı mam ka yẽ sɛla n de be'em bura-ẽna zẽ'am. > > ⁵Tı Azezi vuge gõ'osı mũña la, dee ye fuugo la n de gomusga la yese yẽña. Tı Apilatı yele ba yetı: < < Nẽra la n wãna. > >

⁶La kãabgɔ kẽma nẽñadõma la, la ba tõntõnıba la n yẽ ã na, ba kaasrı la tagurga yetı: < < Ka ã, ka ã dɔ-puurña* zuo kv. > > Tı

Apilati yeke ba yetu: <<To'oge-ya ē ka ka ya mēŋa, se'ere n soe la, mam ka yē sēla n de be'em a zē'am.>> ⁷Ti Zifdōma la yeke ē yetu: <<Tōma taru lɔɔ, la lɔɔ la puam la mase me tu a ki, se'ere n soe la, a ēŋe a mēŋa ti ēŋa de la Nawēnne Dayua.>>

⁸Apilati n wōm yetɔg-ēna la, dabeem n malun yōke ē. ⁹Ti a le kē deem ka soke Azezi yetu: <<Fōn ze'ele la be?>> Ti Azezi ka lerge ē. ¹⁰Ti Apilati soke ē yetu: <<Mam ti fōn sīm ka lerga? Fu ka mi ti mam taru nōore wun botu ba base fu, bu ba ka fu dɔ-puurŋa zuo ku?>> ¹¹Ti Azezi lerge ē yetu: <<Nōore la sān ka ze'ele ni saazuum, fu ka taru ni nōore wun ēŋe mam sēla. Bela n soe ti sēka n taru mam wa'am wa bɔ fu la, tōm tōon-be'ego gānna fōn.>>

¹²Apilati n daan wōm bela la, a eeri la sore ti a base Azezi, ti Zifdōma la daan kaasra tagurga yetu: <<Fu sān base bura-ēna, fu dagu Rom* na-keko sire. Nēr-sēka woo n uti a mēŋa naba, a de la na-keko la be.>>

¹³La Apilati n wōm yetɔg-bāma la, a taru Azezi yese la yēŋa, dee zī'ire sariyadia la zē'am ti ba wi'iri ti kug-palagɔ zē'a, ti a yu'ure la Ebre* yetɔga dena Gabata la. ¹⁴La daan de la beere n wun wiige ti Zɔɔg-base kibsa la di, la daan mase wu wonteŋa zuu-tēŋasuka. Ti Apilati yeke Zifdōma la yetu: <<Ya naba la n wāna.>> ¹⁵Ti ba kaasra tagurga yetu: <<Ku ē, ku ē, ka ē dɔ-puurŋa zuo ku.>> Ti Apilati soke ba yetu: <<M ka ya naba la dɔ-puurŋa zuo?>> Ti kāabgɔ kēma nēŋadōma la lerge ē yetu: <<Tōma ka taru naba ayēma, sān dagna Rom na-keko la.>> ¹⁶Bela ti Apilati bɔ ba Azezi ti ba taru ē ka ka dɔ-puurŋa zuo.

Ba taru Azezi sēŋe ka ka dɔ-puurŋa zuo

(Amatie 27:32-44, Amarku 15:21-32, Aluki 23:26-43)

Ti ba yōke Azezi, ¹⁷boti a mēnja tu dɔ-puurŋa la yese tēnja la puam we'esa zē'e-seka ti ba wi'iri zuwanre zē'a, ti a yu'vre la Ebre yetɔga dena Golgota. ¹⁸Bilam ti ba ka ē dɔ-puurŋa zuo. Dee mē ka nērba bayi dɔ-puursi zuto, ayila a gɔbga bɔba, ayēma a zuvgɔ bɔba, ti Azezi bɔna ba tēŋasuka. ¹⁹Ti Apilatɪ boti ba gulse dɔ-palaka zuo lablɛ dɔ-puurŋa la zuo. Ba gulse yeti:

< < Azezi n ze'ele Nazaretɪ,
Zifdōma naba la. > >

²⁰Zifdōma zozo'e daan karēŋe gulsgɔ la mɛ, se'ere n soe la, zē'e-seka ti ba daan ka Azezi dɔ-puurŋa zuo la lɛm na tēnja la. La ba daan gulse la Ebre, la Latē, la Grɛkɪ yetɔga*f13*. ²¹Ti Zifdōma kāabgɔ kēma nēŋadōma yele Apilatɪ yeti: < < Da gulse yeti < Zifdōma naba > , gulse yeti: < A yeti ēnja de la Zifdōma naba. > > > ²²Ti Apilatɪ lerge ba yeti: < < Sela ti mam gulse la, mam gulse mɛ. > >

²³La sudaasi la n ka Azezi ku'ulum na, ba dɪke la a futo puɪ zē'esi banaasi, ti sudaaga woo daan to'oge pure ayila, deege fu-woko. La fu-woko la daan ka tari pɛ'esōm, ba daan wuge a wuu la munne. ²⁴Ti ba daan yele taaba yeti, ba da āasum ē, ba pɔse bise seka n wun to'oge ē. Ti ba ēŋe bela. La de la wāna ti Nawēnne gōŋɔ n gulse yele se'em na ēŋe. La gulse yeti: < < Ba puɪ mam futo bɔ taaba, dee pɔse mam fu-woko la yelle. > >

²⁵Azezi ma, la a ma yɪbga, la Amaari n de Akleopasi pɔga, la Amaari n ze'ele Magdala daan ze mɛ lɛm dɔ-puurŋa la. ²⁶Ti Azezi yē a ma la, la a karēnbi-seka ti a nōŋe la n ze lɛm ē, ti a yele a ma la yeti: < < M ma, fu bia n wāna. > > ²⁷Dee yele a karēnbia la yeti: < < Fu ma n wāna. > > Lan sēŋe wakat-ēnja, karēnbia la tari Azezi ma la mɛ kule a yire.

Azezi kŭm

(*Amatie 27:45-56, Amarku 15:33-41, Aluki 23:44-49*)

²⁸Bela poorum, Azezi mi me ti sɛla woo ɛŋɛ ba'ase me, ti a yeti:
< < Koyũuro n taru mam. > > A yeke bela ti Nawenne gɔŋɔ n gulse
yele se'em na n ɛŋɛ. ²⁹La lɔkɔ n daan ze pure la dā-mĩ'isgo. Ti ba dɩke
sɩpɔɔm luse dā-mĩ'isgo la puam zɛke la dɔɔgɔ ɛŋɛ Azezi nɔorum. ³⁰Ti
a yũ dā-mĩ'isgo la, dee yeti: < < Sɛla woo ɛŋɛ ba'ase > >, dee suure a
zuugo ki.

³¹La daan de la beere n wun wiige Zifdōma vo'osgo* daare, daar-
ɛŋa daan de la dabs-kāte, ti Zifdōma la ka bɔɔra ti ba base ti kŭm na
weege bɔna dɔ-puursi la zuto daar-ɛŋa. Ti ba sose Apilatɩ yeti, a botɩ
ba kɔ ba nāma dee sike ba dɔ-puursi la zuto. ³²Ti sudaasi la sɛŋɛ ka
kɔ pɔspɔsi dāana la ti ba ka lem Azezi la nāma, le kɔ ayɛma la mɛ
nāma. ³³La ban paage Azezi zɛ'am na, ba yɛ ti a dare ki me, ti ba ka
kɔ a nāma. ³⁴Ti sudaaga ayula lu a lɔgre la kāne, ti zum la ko'om
yese.

³⁵Nɛr-seka n yɛ bɔn-bāna la n tɔgrɩ pa'ala ya. La a kaseto la de la
sɩra, la a mi ti ɛŋa tɔgrɩ la sɩra, ti yāma mɛ wun bɔ sɩra.

³⁶Yel-bāna ɛŋɛ ti Nawenne gɔŋɔ n gulse se'em na n ɛŋɛ. La yeti:
< < A kɔbre baa ayula kān kɔ'ɔge. > > ³⁷La ken gulse yeti: < < Ba
wun buse seka ti ba lu la. > >

Azezi laare

(*Amatie 27:57-61, Amarku 15:42-47, Aluki 23:50-56*)

³⁸Bela poorum ti Arimate buraa Azozefu n daan de Azezi karɛnbia
dee sugra, ɛn zoti Zifdōma nɛŋadōma la iya, daan sɛŋɛ ka sose
Apilatɩ sore ti a dɩke Azezi kŭm na, ti Apilatɩ sake, ti Azozefu sɛŋɛ ka
dɩke kŭm na. ³⁹Ti Anikodem, seka n daan sɛŋɛ Azezi zɛ'am yu'ɔŋɔ la

po doose Azozefu. A tarı la bõnɔ yu'ura n de miiri, la alowe n lagum taaba gãŋe wu kilo pitã ti ba yũuŋo ãna sõŋa wa'am. ⁴⁰Tı ba dıke Azezi kũm na, ãŋe bõnɔ na n tarı yũuŋo la ãŋe, vile ã na tãna wu Zifdõma n ãn ita ba kũm se'em na.

⁴¹La gaare n daan boe zẽ'e-seka ti ba daan ka Azezi dɔ-puurŋa la zuo la, la yɔ-paale n tũ tãmpĩa ãyã n daan boe mĩ ti ba nãn ka laage nãra a puam. ⁴²La beere n wun wiige vo'osgo* daare la, la yɔɔgo la n daan lem na ãyã, ba daan laage Azezi kũm na bilam.

20

Azezi vo'ore

(Amatie 28:1-8, Amarki 16:1-8, Aluki 24:1-12)

¹Lasrı daare bulika yu'uhɔ yu'uhɔ, ti Amaari n ze'ele Magdala sãŋe yɔɔm na. En paage la, a yẽ ti kugre la bilge me dee base yɔɔgo la nõore. ²Tı a zoe sãŋe Asimõ-pıyeeɾı la karẽnbi-seka ti Azezi nõŋe la zẽ'am, ka yeke ba yetı: < <Ba dıke Zuudãana la yɔɔgo la puam yese me, tõma ka mi ban bĩŋe ã zẽ'e-seka. > >

³Tı Apıyeeɾı la karẽnbia ayıla la yese we'esa yɔɔm na. ⁴Bãma bayi daan lagum zɔta me we'esa, ti karẽnbia ayẽma la zoe gãŋe Apıyeeɾı dẽŋe paage yɔɔm na, ⁵veese buse, yẽ tãna la n gã mĩ, dee ka kẽ. ⁶Tı Asimõ-pıyeeɾı daan paam poorum wa kẽ yɔɔgo la puam, yẽ tãna la n gã mĩ. ⁷La tãn-seka ti ba daan dıke vile Azezi zuugo la gã mĩ me, la a ka naage la tãna baseba la, a kilim me gã ayẽma. ⁸Tı karẽnbia ayẽma la n dẽŋe paage la, me kẽ yɔɔgo la puam, yẽ bõn-seba n boe mĩ na, la a bɔ sira me. ⁹La karẽnbiisi la daan nãn ka wõm Nawẽnne gõŋo n yetı, dẽnı ti Azezi ki dee vo'oge la võore. ¹⁰Tı karẽnbiisi bayi la daan lebe kule ba yiẽ.

Azezi dıke a mēṇa pa'ale Amaari n ze'ele Magdala

(Amatie 28:9-10, Amarkı 16:9-11)

¹¹La Amaari daan ze la yɔɔgɔ la nōorum yēṇa kella. A daan kelli me dee veese ti a bise yɔɔgɔ la puam, ¹²yē malekadōma* bayi n ye fu-pælsı zēa zē'e-sēka ti ba daan bīṇe Azezi kūm na. Ayula zı la a zuugo bɔba, ti ayula zēa a nāma bɔba. ¹³Tı malekadōma la yelee ē yetı:

< < Pɔka, bēm n ēṇe ti fōn kella? > > Tı a lerge ba yetı: < < Ba dıke la mam Zuudāana, ti mam ka mina ban bīṇe ē zē'e-sēka. > >

¹⁴En tɔge bela la, dee gelge yē Azezi n ze, la a ka bāṇe ti la de la ēṇa. ¹⁵Tı Azezi soke ē yetı: < < Pɔka, bēm ti fōn kella? Ane ti fōn eerı? > > Tı a tē'ese ti a de la gaare la dāana, yelee ē yetı: < < M kēema, la sān dena la fōn dıke ē, yelee ma fōn bīṇe ē zē'a ti m sēṇe ka dıke ē. > > ¹⁶Tı Azezi yelee ē yetı: < < Amaari. > > Tı Amaari gelge tɔge la Ebre yetı: < < Rabuni. > > A vōore de la karēnsāama. ¹⁷Tı Azezi yelee ē yetı: < < Da kalum ma, mam nān ka zom m Sɔ la zē'am. Sēṇe m sɔbiisi la zē'am ka yelee ba yetı: < Mam zonnı na mam Sɔ Nawēnne n de yāma Sɔ, la yāma Nawēnne na zē'am. > > > ¹⁸Tı Amaari n ze'ele Magdala sēṇe ka yelee karēnbiisi la yetı, ēṇa yē Zuudāana la, dee yelee ba Azezi n yelee ēṇa se'em.

Azezi dıke a mēṇa pa'ale a karēnbiisi

(Amatie 28:16-20, Amarkı 16:14-18, Aluki 24:36-49)

¹⁹La daar-ēṇa daan de la Lasrı daare wēnsobre, ti Azezi karēnbiisi la bɔna deem, la ba daan yu de-sēka ti ba boe a puam na kulınsı me, se'ere n soe la, ba daan zotı la Zıfđōma nēṇadōma. Tı Azezi wa'am wa ze'ele ba tēṇasvka yelee ba yetı: < < Sū-mā'asum wun bɔna la ya. > > ²⁰Azezi n yelee ba bela la, a pa'ale ba la a nu'usi, la a lugre la. La karēnbiisi la n daan yē Zuudāana Azezi la, ba sūure ēṇe yēlum me

zozo'e. ²¹Ti Azezi le yele ba yetu: << Sũ-mã'asum wun bɔna la ya. Mam mẽ tɔnnu ya, wu mam So la n tɔm mam se'em na. >> ²²En yele bela la, dee fuisse ɛɲɛ ba zuo, yele ba yetu: << To'oge ya Nawenne Sia*. ²³Nɛr-sɛka woo ti ya base a tɔon-be'ero taale, a tɔon-be'ero taale ka le bɔna a zuo. La nɛr-sɛka woo ti ya zagse ka base a tɔon-be'ero taale, a tɔon-be'ero taale ken bɔna la a zuo. >>

Azezi dɪke a mẽɲa pa'ale Atoma ti ɛɲa sɪrɪ vo'oge me

²⁴Atoma n de Azezi karɛnbiisi pia la ayi la nɛra ayula ti ba wi'iri ti << Luba >> la, daan ka boe ba zɛ'am Azezi n daan wa'am mĩ na. ²⁵Ti karɛnbiisi baseba la yele ɛ yetu: << Tɔma yɛ Zuudãana la. >> Ti a yele ba yetu: << Mam sãn ka yɛ kuusa la ti ba ka a nu'usi, la yisa dɪke m nu'ubiire kalum ba, la mam sãn ka kalum a lɔgre la, mam kãn malun bɔ sɪra. >>

²⁶La bela poorum dabsa anii daare, ti karɛnbiisi la daan le lagse taaba deego la puam, ti Atoma bɔna la ba le. La kulɪnsɪ la daan yu me, ti Azezi wa'am wa ze'ele ba tɛɲasuka yele ba yetu: << Sũ-mã'asum wun bɔna la ya. >> ²⁷Dee yele Atoma yetu: << Dɪke fu nu'ubiire kalum mam nu'usi la, dee tɛege fu nu'ugo kalum mam lɔgre la bise. Da kãn sɛ'ena, bɔ sɪra. >> ²⁸Ti Atoma lerge ɛ yetu: << Fu de la mam Zuudãana la mam Nawenne. >> ²⁹Ti Azezi yele ɛ yetu: << La de la fɔn yɛ mam na ãyã ti fu bɔ sɪra? Sɛba n ka yɛ dee bɔ'ɔra sɪra la tarɪ zu-yɛlum. >>

Bɔn-sɛka n soe ti gɔɲɔ wã gulse

³⁰Azezi daan tɔm tɔon-yãlma baseba me zozo'e a karɛnbiisi la zɛ'am, n ka gulse ɛɲɛ gɔn-ɛna wã puam. ³¹La bɔn-bãna wã gulse ti ya bɔ la sɪra ti Azezi n de Kɪsi*, Nawenne Dayua la, ti ya sãn bɔ ɛ sɪra, ya wun yɛ yɔvore a yu'ure ãyã.

21

Azezi dıke a mēṅa pa'ale a karēnbiisi Tiberiadi mōgre nōorum

¹La bela poorum Azezi le dıke a mēṅa me pa'ale a karēnbiisi la Tiberiadi*f14* mōgre nōorum. En pa'ale ba a mēṅa se'em n wāna:

²Asimō-pıyēeri, la Atoma ti ba wi'iri ti luba la, la Anatanayeli n ze'ele Kana n boe Galile so'olum, la Azebede kōma, la Azezi karēnbiisi baseba bayi n daan lagım bōna la taaba. ³Tı Asimō-pıyēeri yele ba yetı: < < Mam we'esı ti m ka yōge la zūma. > > Tı baseba la yele ē yetı: < < Tōma mē wun doose la fu sēṅe. > > Tı ba yese ka kē ōorṅo sēṅe. La yu'uh-ēṅa ba ka yōke sela sela.

⁴Tı beere bōna mı yılıṅra, ti Azezi ze mōgre la nōorum, ti a karēnbiisi la ka bāṅe ti la de la ēṅa. ⁵Tı Azezi soke ba yetı: < < M kōma, yāma tarı zūma? > > Tı ba lerge ē yetı: < < Ayel. > > ⁶Tı a yele ba yetı: < < Lobe-ya yuka la ōorṅo la zıvḡo bōba, ti ya wun yōge zūma. > > Tı ba lobe ba yuka la, yōge zūma zo'oge ka tāna wun ve'ege ēṅe ōorṅo la pıam. ⁷Tı karēnbi-seka ti Azezi nōṅe la yele Apıyēeri yetı: < < La de la Zuudāana la. > > La Apıyēeri n wōm ti a de la Zuudāana la, ti a dıke a fuugo ye, ēke lui ko'om pıam dōra.

⁸Tı karēnbiisi baseba n daan boe ōorṅo la pıam na ve'era yuka la n pıre la zūma la sēna, ba daan ka zāage la doone, la daan mase wı kāntısi kōbsyi. ⁹La ban dooge doone na, ba yē la bugsāana n diti, ti zūma dōga ba zuo, la borborı. ¹⁰Tı Azezi yele ba yetı: < < Looge-ya zūn-seba ti ya yōge lēle la baseba wa'am. > > ¹¹Tı Asimō-pıyēeri kē ōorṅo la pıam ve'ege yuka la n pıre la zūma la dooge. Zūn-kāra kōbga la pınuu la atā n daan boe a pıam. La baa la zūma la n daan zo'oge bela la, yuka la ka āage. ¹²Tı Azezi yele ba yetı: < < Wa'am-ya wa di. > > La karēnbiisi la nēra baa ayıla daan ka saage soke ē yetı:

< <Fõn de la ãne? > > Se'ere n soe la, ba daan bãnje tı a de la Zuudãana la. ¹³Tı Azezi paage dıke borbortı la pıvı ba, dee dıke zũma la bɔ ba, tı ba di.

¹⁴Azezi n daan vo'oge la, nõore atã n bela tı a dıke a mẽnja pa'ale a karẽbiisi la.

Azezi tɔgrı la Apıyeeri

¹⁵Ban daan di kɔ'tlum na, tı Azezi soke Asimõ-pıyeeri yetı:

< <Asimõ, Azã bia, fõn nõnje mam gãnna bãna n nõnje mam se'em na? > > Tı a lerge ã yetı: < <Ee! Zuudãana, fõn mi tı mam nõnje fõn me. > > Tı Azezi yele ã yetı: < <Gu'ura m pebilsi. > > ¹⁶Tı Azezi le soke ã nõore buyı yetı: < <Asimõ, Azã bia, fõn nõnje mam? > > Tı a lerge ã yetı: < <Ee! Zuudãana, fõn mi tı mam nõnje fõn me. > > Tı Azezi yele ã yetı: < <Bısrı m piisi. > > ¹⁷Tı Azezi le soke ã nõore atã yetı: < <Asimõ, Azã bia, fõn nõnje mam? > > Tı Apıyeeri sũure daan sã'am, ãn soke ã nõore atã yetı: < <Fõn nõnje mam me bu > > la. Tı a lerge ã yetı: < <Zuudãana, fõn mi sela wuu me, fõn mi tı mam nõnje fõn me. > > Tı Azezi yele ã yetı: < <Gu'ura m piisi la. ¹⁸Mam yetı fıvı la sıra sıra, tı fõn daan de budib-paalga la, fıvı daan lutı fıvı sagãnne me senna fõn boortı zẽ'a, la fıvı sãn wa kurgẽ, fıvı wun zẽke fıvı nu'usi tı nẽra fıvı fıvı sagãnne, dee tarı fıvı sẽnje zẽ'e-seka tı fıvı ka boortı. > >

¹⁹Azezi daan yele bela pa'ale la kũm seka buuri tı Apıyeeri wun ki tı la nã'ase Nawẽnne. La ãn yele bela la, a yele ã yetı: < <Dɔla mam! > >

Karẽbi-seka tı Azezi nõnje la yelle

²⁰La Apıyeeri gelge me yẽ karẽbi-seka tı Azezi nõnje la n dolı ba poore. La de la karẽbi-ẽnja n daan dente Azezi dia la wakate, soke ã

yeti: < < Zuudāana, la de la āne n yeti a pa'ale ti ba yōke fōn? > >

²¹Apıyeeri n yē ē na, ti a soke Azezi yeti: < < Zuudāana, dee ēna wā, bēm n wun ēñe ē? > > ²²Tı Azezi lerge ē yeti: < < Mam sãn bōra ti a vɔa, halı ti mam wa leme wa'am, bēm n pake fōn? Fōn wen dɔla mam. > > ²³Tı yetɔg-ēna wā saage sɔbiisi la zē'am ti karēnbi-ēña kãn ki. La Azezi ka yeke ti a kãn ki, a yeti: < < Mam sãn bōra ti a vɔa halı ti mam wa leme wa'am, bēm n pake fōn? > > ²⁴La de la karēnbi-ēña n bɔ bōn-bāna kaseto, la ēña n gulse ba. La tōma mi ti a kaseto la de la sira.

²⁵La Azezi daan ēñe yela baseba zozo'e mɛ. Ba sãn yeti ba gulse ni ba wuu ayula-yula, mam tē'ese ti zē'a kãn bɔna dūnia zuo n wun to'oge gōnnɔ na ti ba wun gulse ni na. \f1 1:6 La de la Azā sɛka n daan misri nērba ko'om puam na. Bıse-ya Amatie 3:1-17. \f2 1:51 Azezi sãn ēn yeti ti Nērsaala Dayua la, la de la a mēña ti a tɔgrı. \f3 2:3 Gōnnɔ baseba puam ba wi'iri dāam na yu'vre la vē*. \f4 3:14 Amoyisi yuun dıke la zūuro māale bōnsela yagle dɔɔgɔ zuo, ti bōnsela n dōn nēr-seka woo sãn gorge bıse ē, a da ki. \f5 6:7 Lag-kōbre la yu'vre de la deniye, deniye de wu daare ayula tōone yɔɔrɔ. \f6 6:27 Azezi sãn tɔgra Nērsaala* Dayua yelle, la de la a mēña ti a tɔgrı. \f7 8:24 Azezi n yeti: < < Mam de la sɛka ti mam de la > >, a pa'ale ti ēña zōn na Nawēnne. \f8 12:5 Lag-kōbre la yu'vre de la deniye, deniye de wu nēra daare ayula tōone yɔɔrɔ. \f9 12:15 Siyō de la Zerizalem yu'vre ayēma. \f10 12:31 Dūnia wā naba de la Asūtāana*. \f11 17:12 La de la Azudaastı Iskariyo yelle ti a tɔgrı. \f12 18:32 Zıfdōma daan sãn yeti ba ku nēra, ba ka ka'arı ē dɔ-puurña* zuo kuvra, la de la Rom* dōma n ka'arı nērba. \f13 19:20 Latē daan de la Rom dōma yetɔga, la Ebre de la Zıfdōma yetɔga. Grɛki de la yetɔga ti ba daan tɔgrı tēnstı zozo'e. \f14 21:1 Tiberiadı mōgre yu'vre n ken

dēna Galile mōgre, la Zenezareti mōgre. \e

ACT

Tōoma

Azezi-krisi Tōntōniba Tōoma Gōḡo

Bilgre

Tōoma gōḡo wā de la Aluki gōḡo buyi dāana ti a gulse.

Aluki yuun doli la Apoli tōnna Nawēnne tōoma (Tōoma 16:10).

A pɔspɔsɔ gōḡo n de Azezi kō-yēlga la pa'ale la Azezi n yuun boe dūnia zuo ēḡe se'em. Tōoma Gōḡo wā tɔgrɪ ti Azezi zom na Nawēnne yire, ti a karēnbiisi ka le yē ē. La Azezi tōm na Nawēnne Sia ti a wa'am wa bɔna la ba le. Azezi yāḡa boe la ba le la Nawēnne Sia. Sia la n bɔ'ɔri ba pāḡa ti ba saara dūnia zē'a woo mōola Azezi kō-yēlga la.

Tōoma gōḡo wā pa'ale ti Pāntekɔti daare ti Nawēnne Sia wa'am Azezi karēnbiisi la zuo la pāḡa, boti Azezi nērba la zɔ'ɔra Zerizalem pa'asra (sapitri 1 - 7), saage paage Zude, la Samaari tēnsɪ wuu (sapitri 8 - 12).

Gōḡo wā pa'ale ti Apoli, la Azezi karēnbiisi baseba n yāḡa mōole sēḡe ka paage tēn-sēba n kaage ko-kāte ti ba wi'iri ti Mediterane, tole ka paage Rom n de tēn-kāte, ti bu-zāḡsɪ mē bɔ Azezi sra, yē Nawēnne Sia pāḡa (sapitri 13 - 28).

Azezi nērba la yuun yē toogo, la nāmsgɔ mē zozo'e. Ti Nawēnne Sia la sōḡe ba, pa'ale ba ban wun ēḡe se'em, dee tēege ba Azezi n de nēr-sēka, ēn ēḡe se'em, la ēn yeke se'em.

Bōn-sēba wuu n gulse gōḡo wā puam na yeti Nawēnne nērba la

mase me ti ba mōole Azezi-krisi kō-yēlga la ti la paage dūnia so'olum wuu.

Azezi-krisi Tōntōniba

Tōoma Gōḡo

1

¹Ateofili, mam pōspōsi gōḡo la puam mam tōge pa'ale fōn Azezi* n daan pōse tōm se'em, dee pa'ale nērba se'em wuu halı ²ka paage daar-seka ti Nawēnne tarı ē zom a yire la me. La ēn daan nān ka zom Nawēnne yire la, a daan tarı la Nawēnne Sia* la pāḡa pa'ala Tōntōniba* ti a looge la, bāma n wun tōnna se'em. ³Azezi kūm na poorum, dabsa pinaasi puam ti a dıke a mēḡa pa'ale a Tōntōniba, tōm tōon-yālma zozo'e n pa'alı ti ēḡa vo'oge me, dee tōge Nawēnne so'olum* yela pa'ale ba. ⁴La ban lagse bōna la ē na, ti a bō ba nōore yetı: < <Da yese-ya Zerizalem* tēḡa puam, gu'ura-ya bōn-seka ti mam Sō daan bıḡe nōore ti a bō ya, ti mam yeke ya la. ⁵Se'ere n soe la, Azā daan misri ya la ko'om* puam, la, la kān yuuge dee ti Nawēnne mise ya a Sia puam. > >

Azezi zom Nawēnne yire

⁶La Tōntōniba la n lagse taaba la, soke Azezi me yetı: < <Zuudāana, la de la lēle wā ti fōn wun to'oge Israyelı* dōma na'am le bō ba bu? > > ⁷Tı Azezi lerge ba yetı: < <La ka de ya bāḡe wakate la dabs-seba ti mam Sō Nawēnne looge la a mēḡa pāḡa. ⁸La Nawēnne Sia* wun wa'am ya zuo, wa bō ya pāḡa. La ya wun dena mam kaset-dōma pa'ale mam yela Zerizalem, la Zude, la Samaari tēnsun, halı ka paage dūnia teka wuu. > > ⁹Ḙḡa n tōge bela ba'ase la,

dee zonna Nawēnne yire, ti ba bɪsra ē, ti wara lile ē.

¹⁰La ēn zonnɪ na, ba ken bɪsra la saazuum zīi, ti buraasɪ bayi ye fu-pælsɪ dare wa'am wa zɛ ba zē'am, ¹¹dee soke ba yetɪ: < < Galile nērba, bēm ti yāma zɛ bɪsra saazuum? Azezi n yese ya zē'am wɛ Nawēnne yire wā, a wun le leme wu yāma n yē ē ti a wɛ'esa se'em wā. > >

Nēr-sɛka n wun sɔɔgɛ Azudaasɪ zē'a

¹²La Azezi Tōntōntba* la daan boe la Oliivi tāŋa zuo, yāŋa ze'ele bilam lɛbra Zerizalem. Tāŋa la, la Zerizalem ka zāage gāŋe kilomētri ayɪla. ¹³La ban paage Zerizalem tēŋam na, ba zom na saazuum deego ti ba ēn bɔna mī na puam. La sɛba n daan boe mī na de la Apɪyɛɛɪ, la Azā, la Azakɪ, la A'āndre, la Afilipi, la Atoma, la Abatelemi, la Amatie, la Azakɪ n de Alfe bia, la Asimō sɛka n daan de Zelɔtɪ* nēra, la Azakɪ bia Azudaasɪ. ¹⁴Bāma wuu la pɔgsɪ, la Azezi ma Amaari, la Azezi yɪbsɪ n daan ēn lagse taaba pu'ɔsra Nawēnne la put'ere ayɪla wakate wuu.

¹⁵La daare ayɪla, sɛba n bɔ Azezi sɪra la daan lagse mɛ, ba kālɛ daan de wu kɔbga la pisyi. Tɪ Apɪyɛɛɪ isge ze'ele ba tēŋasɔka yetɪ: ¹⁶< < M sɔbiisi, la sān dɛna Azudaasɪ n pa'ale nērba sore ti ba yōkɛ Azezi la, Nawēnne Sɪa yɔun dēŋɛ botɪ naba Adavidi* tɔgɛ a yelle mɛ halɪ kurum kurum. Bōn-sɛka n ēŋɛ la mase la Nawēnne yetɔga n yɔun tɔgɛ se'em na. ¹⁷Azudaasɪ, a daan de la tōma nēra ayɪla, Nawēnne n daan looge ē ti a tōnna a tōoma. > >

¹⁸(La ēn daan tōm be'em na ti ba yɔ ē, ti a da va'am la a tōon-be'ero la yɔɔɔ, lui aliko, ti a puure pusge, ti a yōorɔ wuu yurge. ¹⁹Zerizalem tēŋa nērba wuu wōm belɪ mɛ, ti ba wi'ira va'am na yu'ɔre la ba tēŋa yetɔga yetɪ < < Akeldama > >. A vōore de la zum va'am.) ²⁰Apɪyɛɛɪ

ken tɔge yeti: < <La gulɛ Nawēnne yōoma gōŋɔ puam yeti:

< A yire wun lebge daboogo,
ti nēra nēra da le kē'era mī. >

Dee ken gulɛ yeti:

< Nēra wun sɔɔge a zē'am tōm. >

²¹⁻²²Bela, dēni ti nēra ayila pa'ase tōma Tōntōnɔba la puam pa'ale Azezi vo'ore la sira. La mase ti nēr-ēŋa dena la nēr-seka n daan pōn bɔna ti puam wakat-seka wuu ti Zuudāana Azezi daan boe la tōma la, lan pī'ilum la Azā n daan misri nērba ko'om puam na, wa paage wakat-seka ti Azezi daan yese tōma sukam zom Nawēnne yire la. > >

²³Ti ba bām yeti nērba bayi. Ayila de la Azozefu, ti ba wi'iri ti Abarsabasi, dee ti a yu'ure ken dena Azustusi. Ti ayēma la mē yu'ure dena Amatiyasi. ²⁴Ti ba yāŋa pu'use Nawēnne yeti: < <Ti Zuudāana, fōn mi nērsaalba wuu sūure. Pa'ale tɔ nērba bayi wā puam, fōn looge nēr-seka ²⁵ti a wun sɔɔge Azudaasi zē'am lagim na Tōntōnɔba la, tōm tōon-seka ti Azudaasi basee dee sēŋe lan mase ti a sēŋe zē'am na. > >

²⁶Ba pu'use bela dee pɔse me, ti la yōke Amatiyasi, ti ba boti a naage la Tōntōnɔba pia la ayila la.

2

Nawēnne Sia wa'aŋɔ yelle

¹La Zifdōma* kibsaa yu'ure n de Pāntekɔti* daare n daan paage, ti Azezi karēnbiisi* wuu daan bɔna zē'a ayila. ²Ti voole dare ze'ele saazuum wa'am wu kuseb-kāte wa pɔre de-seka ti ba zī mī na. ³Ti ba yē sela n ān wu bug-zilisi n puɔ ayila ayila zɔɔla ba nēra woo zuo. ⁴Ti Nawēnne Sia* daan wa'am ba wuu zē'am la pāŋa, ti ba tɔgra bu-zāŋsi yetɔga, wu Sia la n bɔ ba ti ba tɔge se'em na.

⁵La Zifdōma n daan doli Nawēnne sore sōṅa n yese dūnia so'olum wuu wa'am wa bōna Zerizalem. ⁶La nērba la n daan wōm voole la, ba daan lagse zo'oge me, ti la daan di'ige ba, se'ere n soe la, nēra woo daan wōm ti ba tōgru la a mēṅa buuri yetōga. ⁷Ti ba palēṅa ēke, ti ba ze yeri, sōkra taaba yeti: < < Bise-ya, nēr-bāna wā wuu n tōgru wā de la Galile dōma. ⁸La, la ēṅe la wāne ti tōma nēra woo wōm ti ba tōgra a buuri yetōga? ⁹Tōma nērba baseba yese la Partu, la Medi, la Elamu, la Mezopotami tēnsu, ti baseba mē yese Zude, la Kapadōsi, la Pō, la Azi* tēnsu, ¹⁰ti baseba mē yese Frizi, la Pānfili, la Ezipti, la Libi tēnsu n lem Sireni, ti baseba yese Rom tēṅam. ¹¹Nērba la baseba de la Zifdōma, la baseba dagu Zifdōma dee sake dola loo ti Nawēnne bo Zifdōma. Baseba mē de la Kretu dōma, la Araabu dōma. La baa bela wuu tōma wōm me ti ba tōgru tōma buuri yetōga pa'ala tōon-kāra ti Nawēnne ēṅe. > > ¹²Ti ba palēṅa ēke, ti ba ka mina ba wun tē'ese se'em, yāṅa sōkra taaba yeti: < < Yel-ēna vōore de la bēm? > > ¹³Ti baseba la'ara ba yeti: < < Nēr-bāna wā yū la dāam buge. > >

Apuyeri mōole Nawēnne yetōga

¹⁴Ti Apuyeri la a Tōntōn-taaba pia la ayila la ze'ele saazuo, ti Apuyeri tōge ke'enke'em yeke nēr-kuvuṅo la yeti: < < Yāma Zifdōma, la yāma seba n boe Zerizalem wā wuu, selse-ya mam n yeti m yeke ya se'em wā, ti ya tā'age bāṅe yel-ēna wā vōore. ¹⁵Yāma n tē'esru ti nērba wā yū la dāam buge la, la dagu bela, la nān de la bulika. ¹⁶La bōn-ēna n uti wā de la Nawēnne nōtō'osa* Azuweli n yuvu yeke se'em na n uti.

¹⁷A yuvu yeke ti Nawēnne yeti:

< Dūnia ba'asgo sān lem,

mam wun base ti m Sia* sige nērsaalba buuri wuu zuto.

A wun boti ya dayōōsi la ya poyōōsi to'oge mam yetōga tōge bo

nērba.

Dee boti ya kōmbi'usi bise yē yela wu zāasŋo la,
dee boti ya bōnkegsi zāasum.

¹⁸Asura, wakat-ēŋa mam wun base ti m Sia la sige m tōntōn-
buraasi, la m tōntōn-pōgsi zuto,
ti ba to'oge mam yetōga tōge bō nērba.

¹⁹Mam wun boti bōn-yālma ēŋe saazuum,
dee boti yel-kirsi n pa'ali mam pāŋa ēŋe tēŋa zuo:
Zum, la bugum, la bug-zū'usi zozo'e n wun bōna.

²⁰Wēntulle wun wa lebge la lika,
ti wōrga mō'oge āna wu zum na,
dee ti Zuudāana daare n de na'am kāte daare paage.

²¹La nēr-seka woo n wun wi Zuudāana yu'ure sose ti a fāage ē, a
wun yē fāare. >

²²Israyeli* dōma, selse-ya mam n yeti m yele ya se'em wā. La de la
Azezi* n de Nazareti nēra la yelle. Nawēnne n looge ē bō ya, boti a
tōm tōon-yālma la yel-kirsi ti tēŋasuka, wu yāma n pōn mina se'em
na, pa'ale ti ēŋa n tōm ē ti zē'am. ²³Nawēnne n yuun pōn tē'ese bōra
ti a ēŋe se'em na iyā, ti a dike Azezi ēŋe ya nu'usum, ti ya boti nēr-
seba n ka doli Nawēnne loo la yōke ē tari ka ka lable dō-puurŋa* zuo
ku. ²⁴Ti Nawēnne vo'oge ē, fāage ē kūm nāmsgo puam base, kūm n ka
tā'age tara ē na iyā. ²⁵Adavidi* yuun pōn tōge a yelle yeti:

< Mam yeti mam Zuudāana la mam nēŋam me daare woo.

A boe la mam zuugo bōba sōŋra mam ti sela kān boti mam bike.

²⁶Bela iyā mam tari sū-yēlga me,
dee tōgra sū-yēlga yetōga.

La baa mam wun ki,
mam tari putē'ere me,

²⁷ti fõn Nawēnne kån base mam kɪ'ɪn-tēŋam,
fõn kån base ti fu pupeelem dāana pō'oge.

²⁸Fõn boti mam bāŋe yōvore sore me.

Fõn wun wa boti mam yē sū-yēlga me zozo'e fõn nēŋam. >

²⁹M sɔbiisi, base-ya ti m tɔge ya vēelga vēelga ti yaaba naba Adavidi yelle. A yuun ki me, ti ba laage ē. Ti a yɔɔgɔ bɔna ti tēŋasɔka kalam halɪ wa paam zina. ³⁰Adavidi yuun de la Nawēnne nōtɔ'ɔsa, la a bāŋe me ti Nawēnne bīŋe la nōore pɔi yeti, a wun wa boti a yusi la nēra ayula le di na'am wu ēn yuun diti na'am se'em na. ³¹Adavidi dēŋe yē Nawēnne n yeti a tōm se'em na me. Ti a tɔge Kriŋi* kūm vo'ore yelle yeti:

< Nawēnne kån base ē kɪ'ɪn-tēŋam,
a kån boti a iyā pō'oge. >

³²Azezi ēŋa n wāna ti Nawēnne vo'oge. Ti tōma waa wuu dena kaset-dōma tɔgra a yelle bɔ'ɔra ya. ³³Nawēnne yāŋa zēke ē me ka zī'ire a zuugɔ bɔba, ti a to'oge a Sɔ Nawēnne Sia la ti a yuun bīŋe nōore ti a wun bɔ tōma wuu la. Bōn-ēŋa n wāna ti ya yēti dee wōnna lēle wā.

³⁴La dagɪ Adavidi n yuun zom Nawēnne yire. La a mēŋa yuun yeti:

< Zuudāana Nawēnne yele mam Zuudāana yeti:
< < Zī'ire m zuugɔ bɔba,

³⁵halɪ ti m boti fu be'eba bɔna fu nāma tēŋa. > > >

³⁶Bela, Israyeli buuri wuu mase me ti ba bāŋe sira sira ti Azezi ti ya daan ka lable dɔ-puurŋa zuo ku la, Nawēnne pa'ale ya ti ēŋa n de Kriŋi, dee dena ti Zuudāana. > >

³⁷Nērba la n daan wōm yetɔga wā la, la daan ba kē ba sūure me halɪ ti ba soke Apɪyēri, la Tōntōnɪba baseba la yeti: < < Ti sɔbiisi, ti wun ēŋe la wāne? > > ³⁸Ti Apɪyēri lerge ba yeti: < < Teege-ya yem base tōon-be'ero, ti ya nēra woo boti ba mise ē ko'om* puam la

Azezi-krisi yv'ure, ti Nawēnne base ya tōon-be'ero taale dee bɔ ya a Sɪa la. ³⁹Nawēnne n yuun biŋe a nōore la, de la yāma la ya kɔma, la seba wuu n boe zē'a n zāage ti ti Zuudāana Nawēnne wun wa wi ba a zē'am na ãyã. > >

⁴⁰Apɪyɛɛɪ daan tɔge la yetɔga baseba zozo'e pa'ale ba sɪra, dee sɪge ba yetu: < < Base-ya ti Nawēnne fāage ya zamāan-ēna nēr-be'esɪ la puam. > > ⁴¹Ti nērba la zozo'e daan sake Apɪyɛɛɪ yetɔga la, boti ba mise ba ko'om puam. Nēr-seba n daan pa'ase ba puam daar-ēŋa mase wu nēr-tusatã. ⁴²La ba daan ba mōrge boti Tōntōnɪba la zāsna ba me, dee naage taaba la putē'ere ayɪla, lagsra dita la taaba, fiisra borborɪ dee pu'usra Nawēnne.

Seba n bɔ Azezi sɪra la vɔm n ãn se'em

⁴³La dabeem daan kē nērba la wuu mɛ, se'ere n soe la, Azezi Tōntōnɪba la tōm na tōon-yālma la yel-kɪrsɪ zozo'e. ⁴⁴La nēr-seba n daan bɔ Azezi sɪra la wuu daan lagɪm taaba la nōore ayɪla, ti ba bōntarsōm lebge ba wuu bōnɔ, ⁴⁵dee daan kɔɔsra ba lɔgrɔ la ba bōntarsōm, putã bɔ'ɔra nēr-seba wuu n bɔɔra sōŋre se'em na. ⁴⁶La daare woo ba ēn lagsra Wēnde-kātum* na mɛ, la taaba yiɛ, dita dee fiisra borborɪ, tara sū-yēlga la yem ayɪla, ⁴⁷pēgra Nawēnne, dee yēta yel-sōnne nērba wuu zē'am. La daare woo Zuudāana boti nērba n yēta fāare pa'asra seba n bɔ ē sɪra la puam.

3

Kɔɔrŋɔ yē ãmã'asum

¹Daare ayɪla zaanōore karf-atã, ti Apɪyɛɛɪ la Azã dɔla taaba we Wēnde-kātum* na, wakat-seka ti nērba ēn sēnna pu'usra la. ²La buraa n boe ti ba dɔge ē ti a dena kɔɔrŋɔ. La daare woo ba ēn tara ē sēnna

zĩ'ita la Wēnde-kāte la nō-seka ti ba wi'iri ti nō-sōᅇᅇ la, ti a sōsra nēr-seba n kē'eri Wēnde-kāte la puam na.

³La kōᅇᅇᅇ la n yē Apıyēeri la Azā n boe mĩ ti ba kē Wēnde-kātum na, ti a sose ba yetı, ba bō ē sela. ⁴Tı ba bısra ē zĩi, ti Apıyēeri yele ē yetı: < < Bıse tōma. > > ⁵Tı a malın bısrı ba, tē'esra ti ba wun bō ē sela. ⁶Tı Apıyēeri yele ē yetı: < < Mam ka tarı ligri wun bō fō. La sela ti mam tarı la, mam wun bō fō. La Azezi-krisi n ze'ele Nazareti yu'ure ĩyā, isge sēnna. > > ⁷La Apıyēeri gure la a zuᅇᅇᅇ nu'ugo zēke ē ti a isge. Tı a nāma la zĩila keᅇe bilam mēᅇa, ⁸ti a vaage isge ze'ele saazuo, sēnna dōla ba kē'era Wēnde-kātum na, ēgra sisra, dee pēgra Nawēnne.

⁹Tı nērba la wuu yē ē ti a sēnnı dee pēgra Nawēnne. ¹⁰Tı ba bāᅇe ti la de la ēᅇa n ēn zēa Wēnde-kāte la nō-sōᅇᅇᅇ na sōsra. La ban yē sela n ēᅇe ē na, la di'ige ba me zozo'e.

Apıyēeri mōole Nawēnne yetōga Wēnde-kātum

¹¹La nērba la n yē bura-seka n daan de kōᅇᅇᅇ la n dolı Apıyēeri la Azā la, la di'ige ba wuu me, ti ba zoe ka lagse taaba ba zē'am zē'e-seka yu'ure n de < < Asalomō* vōnana > > na. ¹²La Apıyēeri n yē bela la, ti a soke nērba la yetı: < < Israyeli dōma, bēm ti bōn-ēna wā di'ige ya? La bēm ti ya bısrı tōma, wu la de la tōma mēᅇa pāᅇa, bu tōma n ba dōla Nawēnne sōᅇa la ĩyā ti tōma botı bura-ēna isge sēnna? ¹³La de la Nawēnne ti ti yaabdōma Abraham*, la A'izakı, la Azakōbı yuun pu'usrı la, n zēke a tōntōnna Azezi la yu'ure. Eᅇa ti ya daan yōke sēᅇe ka ēᅇe seba n soe pāᅇa la nu'usum, ti baa gōmna Apilatı n daan boortı ti a base ē na, ya daan zagse me a nēᅇam. ¹⁴La yan daan zagse Azezi la, ya zagse la pupeelem dāana, la sıra dāana, dee daan bōᅇra ti Apilatı base nēr-kvura la bō ya. ¹⁵Bela yāma botı ba

ku la yōvore dāana, ēṅa ti Nawēnne vo'oge. Tōma daan yē bōn-ēna me, tōgra a yelle bō'ora ya. ¹⁶La de la Azezi yu'ure n tari pāṅa la īyā, la tōma n bō ē sira la n boti bura-ēna ti yāma mi dee yē wā keṅe. La de la ēn bō Azezi sira la n boti a yē īmā'asum sōṅa ya wuu nēṅam wā.

¹⁷Tō. M sōbiisi, mam bāṅe ti yan ka mi la īyā, ti yāma la ya nēṅadōma daan ēṅe bela. ¹⁸La bela puam ti Nawēnne n yuun pōn dēṅe boti a nōtō'osriba* wuu tōge yeti, dēni ti Kriisi* wa nāmse la, ēṅe. ¹⁹Bela, teege-ya yem base tōon-be'ero, dee wa doose Nawēnne, ti a wun base ya tōon-be'ero taale, ²⁰dee bō ya sū-mā'asum, dee tōm Kriisi ti a daan pōn dēṅe looge la bō ya. Eṅa n de Azezi. ²¹Dēni ti a bōna Nawēnne yire halı ka paage wakat-seka ti sela wuu wun teege lebge paalsi, wu Nawēnne n yuun pōn boti a nōtō'osriba tōge kurum kurum se'em na.

²²Bela ti Amoyisi* yuun yeti: <Ya Zuudāana Nawēnne wun boti nēra ayila ze'ele ya buuri puam dena a nōtō'osa bō yāma, wu ēṅa n boti mam dena a nōtō'osa se'em na. Dēni ti ya selse bōn-seba wuu ti a wun tōge bō ya la, ²³la nēr-seka woo n ka selse Nawēnne nōtō'os-ēṅa, ba wun yese ē me Nawēnne nērba tēṅasuka ku. > ²⁴Nawēnne nōtō'osriba, lan pī'ilum la Asāmweli la seba n tōge ēṅa poorum na wuu, yuun pōn tōge dabs-bāna yelle me. ²⁵Yetōg-seba ti Nawēnne boti a nōtō'osriba yuun tōge la de la yāma īyā, la ēn yuun bīṅe a nōore la ti yaabdōma la ken dena la yāma īyā. A yele Abraham yeti: <Fu yusi la īyā ti mam wun ēṅe dūnia buuri wuu yel-sōnne. > ²⁶Nawēnne looge a tōntōnna la, dēṅe tōm ē na ya zē'am ti a ēṅe ya yel-sōnne boti ya nēra woo base a tōon-be'ero. > >

4

Apɪyɛɛɾɪ la Azā ze sarɪyaditba nɛŋam

¹Apɪyɛɛɾɪ la Azā ken tɔgra la nɛrba la lɛ, tɪ kǎabgɔ* kɛma, la Wɛnde-kǎtɛ gu'urba nɛŋadāana, la Saduse* dōma wa'am ba zɛ'am.
²Tɪ ba sūure yīige la Tōntōntɪba* la n zāsɪ nɛrba la, dee mōola Azezi kūm vo'ore yelle pa'ala tɪ nɛr-seba n ki la wun vo'oge mɛ na. ³Tɪ ba yōgɛ ba ka yu, gu'ura tɪ beere wiige, se'ere n soe la, wɛnne daan sobe mɛ. ⁴La nɛr-seba n daan wōm Nawɛnne kō-yɛlga la, ba zozo'e daan bɔ yetɔga la sɪra mɛ. Ba kǎlle daan de wu tusanuu.

⁵La beere n wiige, tɪ Zifdōma nɛŋadōma, la kɛma, la lɔɔ* karɛnsāandōma lagse taaba Zerizalem puam. ⁶La A'annɪ n de kǎabgɔ kɛma nɛŋadāana, la Akayifu, la Azā, la Alegsāndrɪ, la seba wuu n de kǎabgɔ kɛma nɛŋadāana yir-dōma boe mɪ mɛ. ⁷Tɪ ba botɪ ba tarɪ ba wa'am wa ze'ele ba nɛŋam, tɪ ba soke ba yetɪ: < < Ane n bɔ yāma pǎŋa la nōore tɪ yāma ita bōn-bāna? > > ⁸Tɪ Nawɛnne Sɪa* bɔ Apɪyɛɛɾɪ pǎŋa, tɪ a yeke ba yetɪ: < < Yāma Israyelɪ* nɛŋadōma, la kɛma, ⁹yāma n sokrɪ tōma zīna daare wā tōon-sōŋ-seka tɪ tōma ɛŋɛ bɔ kɔɔŋɔ la yelle, la bōn-seka n botɪ a yɛ ĩmā'asum na, ¹⁰dɛnɪ tɪ ya wuu, la Israyelɪ dōma wuu bǎŋɛ tɪ la de la Azezi-krisi n ze'ele Nazaretɪ yu'ure ĩyā tɪ nɛra wā n ze ya nɛŋam wā tarɪ ĩmā'asum. Eŋa tɪ ya daan ka lable dɔ-puurŋa* zuo kv, tɪ Nawɛnne vo'oge ɛ. ¹¹Ĕŋa ĩyā tɪ la gulse Nawɛnne gōŋɔ puam tɔgɛ yetɪ:

< Kug-seka tɪ yāma mɛtba zagse la,
lebge la kugre n botɪ deego la tara pǎŋa. >

¹²Fāare ka boe nɛra ayɛma zɛ'am, sǎn dagna Azezi-krisi mā'a n tā wun fāage nɛrba dūnia zuo base. > >

¹³Apɪyɛɛɾɪ la Azā n yɛ buraane tɔgra la, la di'ige nɛrba la mɛ, ban mi tɪ ba nini ka yo'oge, dee tɪ ba dagna gōn-mitba la, tɪ ba bǎŋɛ tɪ ba daan boe la Azezi lɛ. ¹⁴La ban yɛ bura la n yɛ ĩmā'asum ze ba zɛ'am

na, ba ka mi ban wun lerge se'em bɔ ba. ¹⁵Tɪ ba yele ba sariyadia zē'am yeti ba yese. Tɪ ba yese. Dee tɪ ba bām yele taaba yeti:

¹⁶< < Tɪ wun ɛ̃ɲɛ nēr-bāna la wāne? Nērba wuu n boe Zerizalem wā mi mɛ tɪ bāma n ɛ̃ɲɛ yel-kirga wā, tōma kǎn tā'age si'ise bōn-ēna.

¹⁷La tōma n wun ɛ̃ɲɛ se'em tɪ ba tōoma la da le saage sēɲɛ nēɲa, la de la tɪ zebe ba yeti, ba da le tɔge Azezi yelle bɔ nēra nēra. > > ¹⁸Bela tɪ ba wi ba yeti, ba da le sake tɪ ba tɔge, dee zāsūm nērba Azezi yela.

¹⁹La Apɪyɛɛɪ la Azā lerge ba mɛ yeti: < < Tē'esɛ-ya bise, la mase Nawēnne nēɲam tɪ tōma sake yāma nōore gānna Nawēnne nōore mɛ bu? ²⁰Tōma ka tā wun base ka tɔge sela tɪ tōma yē dee wōm na. > >

²¹Tɪ ba le g'ɪle ba, dee base ba tɪ ba fōrge. Ba ka yē ba wun ɛ̃ɲɛ se'em botɪ ba sɪbge ba, se'ere n soe la, nērba la wuu pēgrɪ Nawēnne bōn-sɛka tɪ ba ɛ̃ɲɛ la ɪyā mɛ. ²²Buraa la tɪ yel-kirga la ɛ̃ɲɛ tɪ a yē ɪmā'asum na, gāɲɛ yuuma pinaasi mɛ.

Seba n bɔ Azezi sɪra sose mɛ, tɪ Nawēnne bɔ ba buraane

²³La ban base ba la, Apɪyɛɛɪ la Azā sēɲɛ la ba taaba zē'am ka tɔge pa'ale ba kāabgɔ kēma nēɲadōma, la kēma la n yeke bāma se'em na wuu. ²⁴La ban wōm bela la, tɪ ba naage taaba pu'use Nawēnne la yem ayula yeti: < < Zuudāana, fōn nāam saazuum la tēɲa, la ko-kāte, la bōn-seba wuu n boe ba puam na. ²⁵Fōn yuun botɪ tōma yaaba Adavidi* n de fu tōntōnna la tɔge la fu Sia pāɲa yeti:

< Bēm n ɛ̃ɲɛ tɪ dūnia buuri wuu sūure yīige,
tɪ nērba tē'esra tē'es-yaalsɪ?

²⁶Tɪ dūnia na'adōma māasum ze,
tɪ tēɲa la nēɲadōma lagse taaba
tɪ ba zebe la Zuudāana Nawēnne,
la Krisi* tɪ a looge la? >

²⁷La de la sira ti A'erōdi*, la Apōnsi-pilatı, la bu-zānıstı*, la İsrayeli nērba lagse taaba tēn-ēna wā puam zebe la fu tōntōn-sōnɔ Azezi ti fu looge la. ²⁸Bela ba ēnɛ la bōn-seka ti fōn yuun pōn dēnɛ looge yem la fu pānɔa bōra ti la ēnɛ se'em na. ²⁹Tı Zuudāana, lēelē wā bıse ban zēbrı tōma n de fu tōntōnıba la se'em, bela ĩyā, bō ti pānɔa ti ti mōole fu kō-yēlga la buraanɛ. ³⁰La fu pānɔa, botı seba n bē'eri yē ĩmā'asum, dee ti tōon-yālma la yel-kırsı ēnɛ, Azezi n de fu tōntōn-sōnɔ la yu'vre ĩyā. > > ³¹Ban pu'vse Nawēnne ba'ase la, zē'e-seka ti ba lagse la mīim mɛ. Tı Nawēnne Sia bō ba wuu pānɔa, ti ba tōge Nawēnne yetōga la buraanɛ.

Seba n bō Azezi sira la, putı ban tarı sela wuu la taaba

³²Nēr-kuvuɔ la n daan bō Azezi sira la lagım tara la yem ayıla, la sūure ayıla. Tı ba nēra baa ayıla ka yetı, ēnɔa n tarı sela la de la ēnɔa mēnɔa mā'a bōnɔ, la de la ba wuu bōnɔ. ³³La Tōntōnıba la tōgrı Zuudāana Azezi kūm vo'ore yelle la pānɔa zozo'e, ti Nawēnne yel-sōnne bōna ba wuu zuo. ³⁴⁻³⁵La seba n daan tarı deto bu vatɔ la, koose ba me tarı ligri la wa'am wa ēnɛ Tōntōnıba la nu'usum. Tı ba yānɔa ēn puı bō nēra woo ēnɔa n boorı sōnɔre mase se'em. Tı nēra baa ayıla ka bōna ba puam ti sela pō'oge ē.

³⁶La Azozefu n de Leviti* nēra n yese Sipri so'olum ti Tōntōnıba la sı a yu'vre ti Abarnabası. A yu'vre la vōore de la: < <Nēra n bō'orı nērba buraanɛ > >. ³⁷Ĕnɔa daan koose la a va'am dıke ligri la tarı wa'am wa ēnɛ Tōntōnıba la nu'usum.

5

Ananiyası la a pōga Asafura yelle

¹Buraa n daan boe ti a yu'vre dena Ananiyası, ti a pōga yu'vre dena

Asafura. Tı ba koose ba va'am, ²tı a looge ligri la baseba svge, dee tari lig-seba n weege la tari ka bɔ Azezi Töntönıba* la. La ěn ěņe bela la, a pɔga la mi me. ³Tı Apiyɛeri soke ě yetı: << Ananiyası, běm tı Asūtāana* kě fu sūurum, tı fu parım bɔ Nawěnne Sia, looge fu va'am na tı fu koose la ligri baseba svge? ⁴Fōn nān ka koose nı ě na, a de la fu bōnɔ. Fōn koose la mě, fu tā wun ěņe fu yem n boori se'em me. Běm n ěņe tı fōn tě'ese fu sūurum ěņe yel-ěna wā? Fu ka parım bɔ něrsaala, fu parım bɔ la Nawěnne. >> ⁵Ananiyası n wōm yetɔg-ěna la, a lui la těņa ki. La seba wuu n wōm bōn-ěna la, dabeem n kě ba. ⁶Tı budib-paalsı isge dıke ě pōbe, ze sěņe ka laage.

⁷Tı la ěņe fěe mase wu karf-atā, tı a pɔga mě wa'am, la a ka bāņe bōn-seka n ěņe la. ⁸Tı Apiyɛeri soke ě yetı: << Yele ma, yāma n koose ya va'am na, ligri la wuu n wāna bu? >> Tı a lerge yetı: << Ĕe! Ba wuu n bela. >> ⁹Tı Apiyɛeri yele ě yetı: << Běm n ěņe tı ya ěņe nōore ayıla tı ya make Zuudāana Nawěnne Sia bıse? Bāņe tı seba n laage fu sira la boe la zanōrum. Ba wun ze fu mě yese. >> ¹⁰Tı pɔka la kɔ'ɔn lui těņa ki Apiyɛeri něņam. Tı budib-paalsı la kě'em wa yě tı a ki me, tı ba dıke ě sěņe ka laage yegle a sira la. ¹¹Tı dabeem daan kě Azezi něrba la wuu, la seba wuu n wōm bōn-ěna la.

Azezi Töntönıba la tōnnı la tōon-yālma

¹²Tı Azezi Töntönıba la tōm tōon-yālma, la yel-kırsı zozo'e něrba la wuu sukam. Tı seba n bɔ Azezi sira la lagse taaba la yem ayıla, zě'e-seka tı ba wi'iri tı << Asalomō vōnana >> la. ¹³Tı seba n ka bɔ ě sira la ka sake lagum na ba, la něrba pěgrı Azezi něrba la me zozo'e. ¹⁴La buraasi la pɔgsı zozo'e n daan bɔ'ɔrı Zuudāana Azezi sira pa'asra a něr-kuvɔ la pvam. ¹⁵Halı tı něrba tara bā'adōma sěnna gā'ata sorɔɔɔ zuto bōn-gā'ala pvam, tı Apiyɛeri sān wa dɔla bilam zě'a tolla,

a yinyisña lile ba ti ba yē ãmã'asum. ¹⁶Ti nērba zozo'e yese tēn-sēba n gilge Zerizalem na tarı bā'adōma, la seba ti kulkā'arsı* dolı ba wa'am. La ba wuu yē ãmã'asum mε.

Azezi Tōntōnıba nāmsgo yelle

¹⁷Ti kãabgo* kēma nēñadãana, la seba n de Saduse* dōma n boe a zē'am na, daan isge ita sūure, ¹⁸yōge Azezi Tōntōnıba la kē'esε ba yu'a deego puam. ¹⁹Ti Nawēnne maleka* sēñε yu'vñgo ka yo'oge yu'a deego la nōore, tarı ba yese yēña ka yele ba yetı: ²⁰< < Sēñε-ya Wēnde-kātum na ka tōge vōm paalga wã yelle wuu bō nērba la. > > ²¹Ban wōm bela la, ti ba sēñε ka kē Wēnde-kātum na bewiine zāsna nērba.

Ti kãabgo kēma nēñadãana la, la seba n boe a zē'am na, daan wi Zıfdōma sarıyadıtba, la ba kēma wuu ti ba lagse taaba. Ti ba tōm nērba yetı, ba sēñε yu'a deem na ka tarı Tōntōnıba la wa'am. ²²La ban tōm seba la n paage yu'a deem na, ba ka yē ba, leme wa yele ba yetı: ²³< < Tōma n paage la, tōma yē ti yu'a deego la kulınsı la page mε sōña sōña, ti seba n gu'uri la ze deego la nōam, ti tōma yo'oge ka yē nēra nēra. > > ²⁴La Wēnde-kāte gu'urba nēñadãana, la kãabgo kēma nēñadōma la n wōm yel-ēna la, ba ze la yerı, tē'esra yel-ēna n de yel-sεka. ²⁵Ti nēra wa'am wa yele ba yetı: < < Selse-ya, bura-seba ti ya kē'esε yu'a deego puam na ze la Wēnde-kātum na zāsna nērba. > > ²⁶Ti Wēnde-kāte la gu'urba nēñadãana, la a nērba sēñε ka yōge ba wa'am, dee ka le dāam ba, ba zotı mε ti nērba la wun lobe ba la kuga.

²⁷Ban tarı ba wa'am wa ze'ele ba nēñam na, kãabgo kēma nēñadãana la soke ba yetı: ²⁸< < Tōma daan ka yele ya yetı, ya da le zāsum nērba la nēr-ēna wã yu'vñε? La bıse-ya yāma n ēñε se'em na,

yāma zāsŋɔ saage Zerizalem wuu me, dee bɔɔra ti ya dɩke bura-ēna kūm taale dɔgle tōma zuto. > > ²⁹Ti Apiyeeri la a Tōntōn-taaba la lerge ba yeti: < < La mase me ti tōma sake Nawēnne nōore gānna nērsaalba nōore. ³⁰Nawēnne ti tōma yaabdōma yuun pu'usrɩ la n vo'oge Azezi ti ya daan ka lable dɔ-puurŋa* zuo ku la. ³¹Nawēnne zēke ē me zī'ire a zuvgɔ bɔba, botɩ a dena nēŋam dāana la Fāagra bɔ lsrayeli* dōma sore ti ba teege yem base tōon-be'ero ti Nawēnne base ba tōon-be'ero taale. ³²Tōma de la bōn-bāna kaset-dōma, Nawēnne Sia la ti a tarɩ bɔ'ɔra nēr-seba n sakri ē na, mē de la kaset-dāana. > >

³³Ban wōm yetɔg-ēna wā la, ba sūure yīige me halɩ ti ba bɔɔra ti ba ku ba. ³⁴Ti buraa ayɩla yu'vrɛ n de Agamalyeli, a de la Farisi* nēra, a zāsni la nērba Nawēnne lɔɔ* yela, a de la nēra ti ba wuu nanni. Ti a isge ze'ele nērba la n lagse la tēŋasuka, bɔ nōore yeti, ba yese Tōntōnɩba la yēŋa ti la ēŋe fēe. Ti ba yese ba. ³⁵Ti a yeke ba yeti: < < lsrayeli dōma, guuse ya mēŋa la yāma n yeti ya ēŋe nēr-bāna wā se'em na. ³⁶La ka yuuge ti nēra ayɩla yu'vrɛ n de Atedasi daan isge zēke a mēŋa yeti, ēŋa de la nērzuo. Ti nērba n paage wu nēr-kɔbsnaasi daan doose ē. Ti ba ku ē, ti nēr-seba n daan doli ē na wuu wurge. Ti la lebge zāŋa. ³⁷La bela poorum, Azudaasi n yese Galile mē daan isge me nērba kāalgɔ wakate, ti nērba baseba dɔla ē. Ti ba ku ē, ti nēr-seba n daan doli ē na mē wurge. ³⁸Bela iyā, lēle wā mam yeti ya me ti ya base nēr-bāna, da kān ēŋe ba sela sela. La sān dena nērsaalba putē'era, la ba tōoma, la wun wa lebge zāŋa. ³⁹La, la sān dena Nawēnne bōnɔ, ya kān tā'age sā'am ba. Guuse-ya ya mēŋa, ti ya da wa yē ti ya zebri la Nawēnne. > > Ti ba sake a yetɔga la, ⁴⁰dee wi Tōntōnɩba la, ti ba wa'am. Ti ba botɩ ba wē ba, dee yeke ba yeti: < < Da le tɔge-ya Azezi yela bɔ nērba. > > Dee yāŋa base ba yeti, ba fōrge. ⁴¹Ti Tōntōnɩba la yese sarɩyadia zē'am na sū-yēlga, ban mase ti

ba yē nāmsgō Azezi ĩyā la. ⁴²La daare woo ba boe la Wēnde-kātum na, la ba yie puam, ken zāsna nērba, dee mōola Azezi kō-yēlga yeti, ēṅa n de Krisi ti Nawēnne tōm.

6

Ba looge nērba bayopɔi tōoma ĩyā

¹La dabs-bāma wakate karēnbiisi* la daan pa'asri me zɔ'ɔra, ti Zifdōma seba n tɔgrɪ Greki* yetɔga la daan yōnna la Zifdōma nēr-seba n tɔgrɪ Ebre* yetɔga la yeti, ban sōṅri nērba la dia daare woo la, ba ka bɔ'ɔri bāma pɔkōpa la wu lan mase. ²Bela ĩyā ti Tōntōnɪba* pia la ayi la wi karēnbiisi la wuu, yele ba yeti: < < La ka mase ti tōma base Nawēnne kō-yēlga mōolgo dee puṭa dia. ³Bela ti sɔbiisi, bise ya puam looge buraasi bayopɔi n de nēr-sōma, dee dena yem dōma, ti Nawēnne Sia bɔna la ba le zozo'e, ti ti dɪke tōon-ēna wā ēṅe ba nu'usum. ⁴Dee ti tōma wisge ti mēṅa la Nawēnne pu'usgo, la a yetɔga la mōolgo. > > ⁵Ti ban yele se'em na daan ēṅe nērba la wuu sūure yēlum. Ti ba looge A'etienu n bɔ Azezi sira zozo'e ti Nawēnne Sia bɔna la ē le, la Afilipi, la Aprozɔri, la Anikanɔri, la Atimō, la Aparmenasi, la Anikolasi n yese Antɪyɔsi dee dɔla Zifdōma pu'usgo sore. ⁶Ti ba tari ba sēṅe Tōntōnɪba la zē'am, ti ba dɪke ba nu'usi pagle ba zuto pu'use Nawēnne bɔ ba.

⁷La Nawēnne yetɔga la daan saari zē'esti me pa'asra, ti karēnbiisi la kalle mē pa'asra Zerizalem puam zozo'e. Ti kāabgo* kēma zozo'e daan bɔ'ɔra Azezi sira.

A'etienu yōkre

⁸La A'etienu n tari Nawēnne yel-sōnne la a pāṅa zozo'e la, daan tōnni la tōon-yālma la yel-kursi nērba tēṅasuka. ⁹Ti Zifdōma baseba n

daan de yamsi dee yāṅa to'oge ba mēṅa, ti ba wi'ira ba wēndeego* ti soe m mēṅa dōma wēndeego, n yese Sireni, la Aļegsāndri, la Zifdōma baseba n yese Silisi, la Azi* tēnsi n wē'eri nōke'ene la A'etiēni. ¹⁰La Nawēnne Sia n bō'ori A'etiēni yem ti a tōgra, ti ba ka tā'age lerge ē. ¹¹Ti ba ε nērba boti ba dōre ē yeti: < < Tōma wōm ti a tōge la Amoyisi* la Nawēnne tōg-be'ero. > > ¹²Ban ēṅe bela la, ba boti nērba la, la ba kēma, la ba lō* karēnsāandōma la wuu sūure isge mε, ti ba yōke ē tari sēṅe sarıyaditba zē'am, ¹³dee boti nērba parum bō ē yeti: < < Bura-ēna wā tōgrı la Wēnde-kāte* la Nawēnne lō ti a bō Amoyisi la tōg-be'ero ka gō'ora. ¹⁴Tōma wōm ti a yeti, Azezi n yese Nazareti la wun sā'am Wēnde-kāte la mε, dee teege ur-seba ti Amoyisi yuun pa'ale ti yaabdōma yeti ti ita la. > > ¹⁵Ti sarıyaditba la wuu n zı la busra A'etiēni zıi, yē ti a nēṅa ān wu maleka* nēṅa la.

7

A'etiēni yetōga

¹Ti kāabgō* kēma nēṅadāana soke A'etiēni yeti: < < La de la bela bu? > > ²Ti a lerge yeti: < < M sōbiisi la m sōdōma, selse-ya. Nawēnne n de na'am kāte dāana la yuun puke a mēṅa pa'ale ti yaaba Abraham*, ēn yuun nān boe Mezopotami nān ka sēṅe ka zı'ire Haran tēṅam na, ³a yuun yele ē yeti: < Yese dee base fu tēṅa la fu yir-dōma, dee sēṅe tēn-seka ti mam wun pa'ale fu la. > ⁴Ti Abraham yese Kalde dōma tēṅam sēṅe ka zı'ire Haran. La a sō kūm poorum ti Nawēnne le boti a yese sēṅe tēn-seka ti ya boe mı zına wā puam. ⁵La Nawēnne yuun ka bō ē zē'a tēṅa la puam baa fēe, dee bıṅe nōore yeti, ēṅa wun bō ē tēn-ēṅa, la a kūm poorum ti a yusi wun wa sōna tēṅa la. La wakat-ēṅa a yuun nān ka dōge bia. ⁶Nawēnne yuun yele ē na wāna:

<Fu yusu la wun wa sēṅe tēṅa ayēma ka kē'era mī wa lebge yamsi bilam, la ba wun nāmse ba me yuuma kōbsnaasi. ⁷La mam wun wa sībge so'olum sēka n boti ba dena yamsi la me. La bela poorum ti ba wun yese bilam leme wa pu'use mam kalam. > ⁸Ti Nawēnne bīṅe nōore la Abraham yeti, ēṅa la a yusu wuu wāta* ba budimto ti la pa'ale ti ba de la ēṅa nērba. Ti Abraham yuun wa dōge A'izaki, ti dabsa anii daare ti a wā ē. Ti A'izaki mē wa dōge Azakōbi ēṅe bela. Ti Azakōbi mē wa dōge ti yaabdōma pia la ayi la mē ēṅe bela.

⁹Ti ti yaabdōma la yuun yūuna la ba yībga Azozefu, koose ē bō Ezipti* dōma. La Nawēnne yuun boe la ē le me, ¹⁰yuun yese ē a nāmsoḡ wuu puam, dee bō ē yel-sōnne, la yem Afaarō n de Ezipti naba la nēṅam. Ti naba la boti Azozefu dena ḡmna sōna Ezipti tēṅa, la a yire wuu būsra. ¹¹Ti kōm kāte wa'am Ezipti, la Kanaan* so'olum halı ti la dena toogo. Ti tōma yaabdōma yuun ka tara dia. ¹²Ti Azakōbi yuun wōm ti dia boe Ezipti, ti a tōm ti yaabdōma ti ba sēṅe ka da. ¹³La a le tōm ba me nōor-ayi puam, ti Azozefu boti a kēendōma la bāṅe ē. Ti Afaarō mē bāṅe Azozefu sō yir-dōma yelle. ¹⁴Ti Azozefu tōm ti ba wi a sō Azakōbi, la a yir-dōma wuu ti ba wa'am. Ba källe yuun paage nērba pisyopōi la anuu. ¹⁵Ti Azakōbi isge sēṅe Ezipti. Bilam ti ēṅa la ti yaabdōma yuun ki. ¹⁶Ti ba ze ba sēṅe Sisem ka laage ba yō-sēka ti Abraham yuun da la ligri A'emōori kōma zē'am na.

¹⁷La Nawēnne n yuun bīṅe a nōore la Abraham wakate n yuun lem na, nērba la yuun yirge me zo'oge Ezipti. ¹⁸Halı ti nēra ayula wa di Ezipti na'am ka mina Azozefu yelle. ¹⁹Ti naba la yuun ēṅe yem wēṅa la tōma yaabdōma nāmse ti buuri la, pēṅe ba boti ba base ba bilēesi ti ba ki. ²⁰Wakat-ēṅa ti ba yuun dōge Amoyisi* ti a dena bi-sōṅo Nawēnne nēṅam. Ti ba uge ē a sō yire wōr-sitā, ²¹dee tarti ē sēṅe ka

base, ti Afaarō bipugla yuun dīke ē uge, ti a lebge wu a mēṅa bia.

²²Ti Amoyisi zāsum Ezipti dōma yem wuu, yuun dena nēr-kāte a yetṅa la a tōoma wuu puam.

²³La ēn yuun paage yuuma pinaasi la, ti a yuun looge yem sēṅe ka kaage bise a sōbiisi n de Israyel* yusi la, ²⁴yāṅa yē ti Ezipti nēra nāmsri ba nēra ayula. Ti a po'oge ti nēra la, wē Ezipti nēra la ku lerge sānne. ²⁵A tē'esri ti a buuri la wun bāṅe me ti Nawēnne boori ti a boti ēṅa fāage ba Ezipti dōma nu'usum, la ba ka bāṅe. ²⁶Ti beere wiige, ti a le yē a buuri nērba bayi ti ba zēbrī la taaba. Ti a pāse ba, bōra ti ba sūure mā'age, soke ba yeti: < M sirdōma, ya de la sōbiisi, la bēm n ēṅe ti ya zebra la taaba? > ²⁷Ti seka n uti a tadāana be'em na yele ē yeti: < Ane n bō fu nōore ti fu sōna ti bīsra, dee dena ti sarīyadita?

²⁸Fu boori ti fu ku mam wu fōn zaam ku Ezipti nēra se'em na? >

²⁹Yetṅ-ēna īyā ti Amoyisi zoe sēṅe Madiyā ka kē'era. Bilam ti a dōge dayṅṅṅ bayi.

³⁰La yuuma pinaasi poorum, daare ayula a boe la weem lem Sinayi tāṅa, ti Nawēnne maleka* ze'ele tūntuugo ti bugum boe mī dita puam puke a mēṅa bilam, ti a yē ē. ³¹Amoyisi n yē ē na, la di'ige ē me, ti a lem ti a bise. Ti Zuudāana Nawēnne yele ē yeti: ³²< Mam de la Nawēnne ti fu yaabdōma Abraham, la A'izaki, la Azakōbi yuun pu'usri la. > Ti Amoyisi gōgra dee ka tā'age bise. ³³Ti Zuudāana la yele ē yeti: < Pirge fu tagra la, ti zē'e-seka ti fu ze la de la mam zē'e-sōṅ. ³⁴Mam yē m nērba la n boe Ezipti nāmsgō la me, dee wōm ba fablīgō la, ti mam sigum ti m fāage ba. Bela īyā mam yeti m tōm fu la Ezipti. > > >

³⁵Ti A'etient ken yeti: < < Amoyisi ēna wā ti ba yuun zagse ē yele ē yeti: < Ane n bō fu nōore ti fu sōna tō, dee dena ti sarīyadita? > Eṅa ti Nawēnne yuun boti a maleka tōge bō ē tūntuum na. Eṅa ti

Nawēnne tōm ti a sōna a nērba la dee yese ba nām̄sgo la puam. ³⁶Ēṅa n tōm tōon-yālma la yel-kursi n pa'alı Nawēnne pāṅa Ezipti tēṅam yese ba bilam, dee tōm tōon-yālma tarı ba pārgε mōg-mōlga la, dee bōna la ba weego la puam yuuma pinaasi. ³⁷Amoyisi ēṅa n yuun yelee Israyeli dōma yeti: < Nawēnne wun boti nēra ayıla ze'ele ya buuri puam dena a nōtō'ōsa bō yāma wu ēṅa n boti mam dena a nōtō'ōsa se'em na. > ³⁸La ti yaabdōma n yuun lagse weem na, la de la ēṅa n ze'ele ti yaabdōma, la maleka n tōge la ē Sinayi tāṅa zuo tēṅasuka, to'oge Nawēnne wōm yetōga tōge bō tō.

³⁹Ti ti yaabdōma yuun ka bōra ti ba sake a nōore, yuun zagse ē, dee tē'ese ba sūurum bōra ti ba lebe Ezipti. ⁴⁰Ba yuun yelee Aarō* yeti: < Eṅe бага bō tō ti ba bōna ti nēṅam. Tōma ka mi bōn-sēka n ēṅe Amoyisi n yese tōma Ezipti tēṅam wa'am na. > ⁴¹Bela ti ba yāṅa yagbe na-biire kāabra ē ti a dena ba bagre, ita sū-yēlga la ba mēṅa nu'usi n ēṅe sela la. ⁴²Bela iyā ti Nawēnne bure a poore bō ba, dee base ba ti ba pu'usra wōrbiε n boe saazuum, wu lan gulse Nawēnne nōtō'ōsrıba* gōnnō puam yeti:

< Israyeli nērba,

yāma tē'esri ti la de la mam ti ya yuun kuuri dūnsi, la kāabgo

baseba weem yuuma pinaasi bō'ōra la bu?

⁴³Ayei, ya yuun zeeri la ya bagre Amolōki fuu-deego,

la ya bagre Arefā wōrbiire,

bōn-bāma ti ya yuun ēṅe pu'usra.

Bela iyā mam wun boti ba pe'ege ya sēṅe zāage halı gāṅe

Babilōni* tēṅam. >

⁴⁴Ti sō-yaabdōma yuun tarı la fuu-deego* weem n pa'alı ti Nawēnne boe ba zē'am. Ba yuun ēṅe ē ti a āna wu Nawēnne n tōge bō Amoyisi yeti, ba ēṅe ē ti a āna wu ēn yē a wōnne se'em na. ⁴⁵Ti yaabdōma

yuun to'oge fuu-deego la ba mē sōdōma zē'am, ze ē doose la Azoze* wa'am wa zēbe to'oge so'olum sēka ti Nawēnne yuun dige nērba tēṅa la puam ti ba yese ba nēṅam na. Ti fuu-deego la weege bōna wa paage naba Adavidi* wakatōm. ⁴⁶Adavidi yuun yē yel-sōnne me Nawēnne nēṅam, dee sose ē yeti, a bō ē sore ti a mē pu'usgō deego bō ē ti a bōna la Azakōbi yusi le. ⁴⁷La, la de la a bia Asalomō* n yāṅa n mē deego la bō Nawēnne.

⁴⁸La Nawēnne n gānni sēla wuu ka kē'eri deto ti nērsaalba mē puam, wu Nawēnne nōtō'osa ayila n yuun yele se'em yeti:

⁴⁹< Zuudāana Nawēnne yeti,
saazuum de la mam na'am bīmbīnne,
dee ti dūnia dēna mam nāma dōglgō zē'a.

Bēm deego ti ya wun mē bō mam?

La bēm vo'osgo zē'a ti ya yeti ya ēṅe bō mam?

⁵⁰La dagi mam mēṅa n ēṅe sēla woo bu? > > >

⁵¹A'etiēti ken yele ba yeti: < < Ya de la si'isriiba, ya ka doli Nawēnne la ya sūure wuu, ya ka selsri Nawēnne yetōga la, dee kō'ōn zagsra Nawēnne Sia daare woo wu ya yaabdōma n mē yuun ēṅe se'em na.

⁵²Nawēnne nōtō'os-kāna ti ya yaabdōma la yuun ka nāmse ē? Bāma n yuun ku sēba n dēṅe mōole sira dāana ti Nawēnne wun tōm ti a wa'am na yelle. La yāma n yāṅa dōre ē ku ē. ⁵³Yāma yuun to'oge Nawēnne lōw me malekadōma zē'am. La ya ka sake lōw la. > >

Ba lobe A'etiēti la kuga ku

⁵⁴Ban wōm bela la, ba sūnsōa yīige me, ti ba ōbra yēna. ⁵⁵La A'etiēti daan tari la Nawēnne Sia pāṅa, gorge bisra saazuum zīi, yē Nawēnne na'am n puke yēgra, ti Azezi ze Nawēnne zuugō bōba. ⁵⁶Ti a yele ba yeti: < < Biṣe-ya, mam yē ti Nawēnne yire yo'oge me, ti Nērsaala

Dayva*f1* la ze Nawēnne zuvgɔ bɔba. > > ⁵⁷Ti ba li ba tuba kaase tagurga, dee lagim zoe paage yōke ē, ⁵⁸ve'ege ē tēŋa la puam yese ka lɔbra ē la kuga ti ba kv. Seba n lobri ē na kuga la yēese ba futo gu'ule la budib-polle yu'vre n de Asoli. ⁵⁹La ban lobri A'etiēni la kuga la, ti a pu'vse yeti: < <Zuudāana Azezi, to'oge m sia. > > ⁶⁰Dee dīke dūma ka tēŋa tīi kaase yeti: < <Zuudāana, da geele ba tōon-be'ego wā taale. > > A yeke la wāna dee ki.

8

¹La Asoli daan sake ti A'etiēni kūm na mase me.

Azezi karēnbiisi nāmsgɔ yelle

La daar-ēŋa ti ba pɔse nāmsra Azezi nēr-kvuŋɔ n boe Zerizalem na halɔ, ti ba wuu zoe wurge Zude, la Samaari so'olum puam, la Azezi Tōntōnɔba* pia la ayi la mā'a n weege. ²Ti nēr-seba n zoti Nawēnne daan dīke A'etiēni sēŋe ka laage, dee kella zozo'e a kūm na iyā.

³La Asoli daan kɔ'ɔn nāmsra Azezi nēr-kvuŋɔ la me bɔɔra ti a sā'am ba wuu, kē'era yie puam yōgra buraasi la pɔgsɔ boti ba tara ba sēnna yu'vra.

Afilipi mōole Nawēnne kō-yēlga Samaari

⁴Ti Azezi karēnbi-seba n daan wurge la daan sēnna zē'esti wuu mōola Nawēnne kō-yēlga. ⁵Afilipi daan sēŋe la Samaari tēŋa ayila puam ka mōole Kriisi* kō-yēlga la bɔ ba. ⁶La nēr-kvuŋɔ la daan selsri Afilipi n tɔgrɔ ba se'em na me sōŋa sōŋa, ban wōm dee yē ēn uti bōn-yālma la. ⁷La kulkā'arsi* daan ēn tīi kaase me, yese dee base ban tari seba la. Ti nēr-seba n de kɔɔrnɔ la wɔbsɔ zozo'e daan yē imā'asum. ⁸Ti tēŋa la nērba tara sū-yēlga zozo'e.

⁹La bura n daan boe tēŋa la puam ti a yu'vre dena Asimō. A daan

de la tum dāana, tōnna tum tōoma boti Samaari so'olum nērba palēṅa ēgra. Dee pa'ala a mēṅa ti ēṅa de la nēr-kāte, ¹⁰ti nērba wuu sakra a yetōga sōṅa, bōnbi'isi la bōnkegsi wuu yeta ti: << Bura-ēna de la seka ti ba wi'iri ti wēnne pān-kāte la n sige. >> ¹¹Ēn tōm a tum tōoma boti nērba la palēṅa ēgra yuuge la, ba sake ē me sōṅa sōṅa. ¹²La Afilipi n mōole Nawēnne so'olum* yelle, la Azezi-krisi yu'ure bō ba la, ba daan bō a yetōga la sira me, boti a mise ba ko'om* puam, buraasi la pōgsi. ¹³Ti Asimō mē sake yetōga la, boti ba mise ē ko'om puam, ti a dīke a mēṅa lable Afilipi, la ēn yeti bōn-yālma la yel-kirsi seba n iti la, la ēke la a palēṅa.

¹⁴Azezi Tōntōntba la n daan boe Zerizalem na wōm me ti Samaari dōma to'oge Nawēnne yetōga me, ti ba tōm Apityeri la Azā ba zē'am.

¹⁵La ban paage mī na, ba pu'use me bō ba ti ba to'oge Nawēnne Sia*.

¹⁶Se'ere n soe la, ba daan pōn mise ba la ko'om puam la Zuudāana Azezi yu'ure, dee ti Nawēnne Sia nān ka sige ba nēra nēra zuo. ¹⁷Ti Apityeri la Azā dīke ba nu'usi pagle ba zuto, ti ba yāṅa to'oge Nawēnne Sia la.

¹⁸Asimō n yē ti Azezi Tōntōntba la n dīke ba nu'usi pagle ba zuto, ti ba to'oge Nawēnne Sia la, a daan boori ti a bō ba la ligri, ¹⁹yāṅa yele ba yeti: << Bō-ya mam pān-ēna wā ti nēr-seka woo ti mam wun dīke m nu'usi pagle a zuo, a wun kō'on to'oge Nawēnne Sia. >>

²⁰Ti Apityeri lerge ē yeti: << Fōn na fu ligri la wun sā'am, fōn tē'ese ti Nawēnne bō'a da'ari la ligri la iyā. ²¹Fu nēṅa ka boe yel-bāna puam, la fu ka tari pure mī, se'ere n soe la, fu sūure ka mase Nawēnne nifum. ²²Teege yem base tōon-be'e-ēna wā, dee sose Zuudāana, ti tā ti a base fu tōon-be'ero ti fu tē'esri fu sūurum na taale. ²³Mam yē ti fu tari la sū-toogo, ti tōon-be'ero lu fō. >> ²⁴Ti Asimō lerge yeti: << Pu'use-ya Zuudāana bō ma ti bōn-seka ti ya

yele mam na sela sela da paage ma. > >

²⁵Apıyεeri la Azā daan tɔge Zuudāana Azezi yetɔga la pa'ale nērba me, dee daan lebra Zerizalem. La sore zuo, ba mōole kō-yēlga Samaari tēnsı zozo'e puam me.

Afilipi la Etiopi buraa yelle

²⁶Tı Nawēnne maleka* tɔge bɔ Afilipi yetı: < < Isge sēɲe wēntulle gɔbga bɔba, doose sorɔ-sɛka n ze'ele Zerizalem we Gaza la, sorɔ-ēɲa dolı la weego puam. > > ²⁷Tı a isge sēɲe. La Etiopi buraa n daan dolı sore la, a de la nēr-kāte, a gu'uri la Etiopi pɔg-naba Akāndase bōntarsōm. A daan sēɲe la Zerizalem ka pu'use Nawēnne, ²⁸dee zēa wiiri torko puam lebra kulla. A daan tarı la Nawēnne nōtɔ'ɔsa A'ezayi* gōɲɔ karēɲra.

²⁹Tı Nawēnne Sia yele Afilipi yetı: < < Sēɲe lem torko wā. > > ³⁰Tı Afilipi zoe paage, wōm tı a karēɲrı la Nawēnne nōtɔ'ɔsa A'ezayi gōɲɔ. Tı Afilipi soke ē yetı: < < Fōn wōnnı fōn karēɲe se'em wā vōore me bu? > > ³¹Tı a lerge yetı: < < Mam wun ēɲe la wāne wōm, tı nēra sān ka pa'ale mam? > > Dee sose Afilipi yetı, a zom zı'ire ēɲa zē'am. Tı a zom zı'ire. ³²Nawēnne gōɲɔ zē'e-sɛka tı a daan karēɲrı la gulse yele la wāna:

< < A ān wu pesgo
tı ba tarı we tı ba ku,
dee āna wu pebila*
tı ba sɛeri a kōbrɔ
tı a ka kaasra,
dee mē pōn ka ya'ara nōore.

³³Ba pɔ'ɔge ē me,
ka di a sarıya sōɲa.

Ti nēra ka bōna wun tōge a yusi yelle,
se'ere n soe la,

ba yese a vōm me dūnia zuo. > >

³⁴Ti Etiopi buraa la soke Afilipi yeti: < < An yelle ti Nawēnne nōtō'osa la tōgru wāna? A tōgru la a mēṅa yelle bu, nēra ayēma yelle? > > ³⁵Ti Afilipi yāṅa dīke Nawēnne gōṅṅ la zē'e-seka ti a karēṅe la pa'ale a vōore, dee doose bilam tōge Azezi kō-yēlga bō ē.

³⁶La ban sēnni we la, ba paage la zē'a ti ko'om boe mī. Ti Etiopi buraa la yele Afilipi yeti: < < Bise, ko'om n wāna n boe kalam. Bēm n wun gu mam ko'om* misga? > > ((³⁷Ti Afilipi yele ē yeti: < < Fu sān bō Azezi sira la fu sūure wuu, fu tā wun to'oge ko'om misga me. > > Ti a lerge yeti: < < Mam sake ti Azezi-krisi de la Nawēnne Dayua. > >)) ³⁸Dee boti torko la ze'ele. Ti Afilipi la ēṅa sige ko'om na puam, ti Afilipi mise ē ko'om puam. ³⁹La ban ze'ele ko'om na puam dōra la, ti Zuudāana Nawēnne Sia zēke Afilipi fōrge. Ti Etiopi buraa la ka le yē ē, dee lebe dōla a sore la we'esa la sū-yēlga.

⁴⁰Ti nērba yē Afilipi Azōti tēṅam, ti a dōla tēnsi la wuu puam mōola Nawēnne kō-yēlga halı ka paage Sezaare.

9

Asolı yem teere

(Tōoma 22:4-16, 26:9-18)

¹Ti Asolı ken nāmsra Azezi karēnbiisi* la, yeti a ku ba, sēṅe kāabgō* kēma nēṅadāana zē'am ²ka sose ē yeti, a gulse gōnnō bō Zifdōma wēndeto* n boe Damaasi tēṅam na yeti, ēṅa sān yē nērba n de buraasi, bu pōgsı n dolı Azezi sore, ēṅa wun yōge ba me, lu ba tarı sēṅe Zerizalem.

³La ĕn to'oge nōore bōna sore wε ka lem Damaasi la, ti peelem ze'ele saazuum dare wa nēege gilge ē. ⁴Ti a lui tēņa, wōm kōa n yeke ē yeti: <<Asoli, Asoli, bēm ti fu nāmsra mam?>> ⁵Ti Asoli lerge yeti: <<Zuudāana, fōn de la āne?>> Ti kōa la lerge yeti: <<Mam de la Azezi, sεka ti fu nāmsri la. ⁶La isge kē tēņa la puam, ti ba wun yeke fo fōn wun ēņε se'em.>> ⁷Ti bura-sεba n doli ē na ze yeri, ka yeke se'ere. Ba wōm kōa la mε, dee ka yē nēra. ⁸Ti Asoli isge pike nini ka le yēta. Ti ba ve'ege ē tari sēņε Damaasi. ⁹La dabsa atā ti a nini ka yēti. La a ka di, bu yū sεla.

¹⁰La Azezi karēnbia ayula n daan boe Damaasi, ti a yu'vre dena Ananiyasi. Ti Zuudāana Azezi puke a mēņa pa'ale ē wu zāasņo la, wi ē yeti: <<Ananiyasi.>> Ti a lerge yeti: <<M Zuudāana, mam n wāna.>> ¹¹Ti Zuudāana la yeke ē yeti: <<Isge doose soro-sεka ti ba wi'iri ti soro-tēntēa la, sēņε Azudaasi yire ka soke Tarsi tēņa buraa yu'vre n de Asoli la yelle. A boe mī pu'usra mε. ¹²La a yē la buraa wu zāasņo la, buraa la yu'vre de la Ananiyasi, a yē ē ti a kē'em mε wa dūke a nu'usi pagle ēņa zuo ti ēņa le yēta.>> ¹³Ti Ananiyasi lerge yeti: <<Zuudāana, mam pōn wōm buraa wā yelle zozo'e mε, ēņa n tōm fu nērba be'em se'em Zerizalem, ¹⁴la a to'oge nōore kāabgo kēma nēņadōma zē'am mε wa'am kalam ti a yōge sεba wuu n pu'usri la fōn yu'vre la.>> ¹⁵Ti Zuudāana la yeke Ananiyasi yeti: <<Sēņε, mam looge ē mε ti m boti a tari mam yu'vre sēņε ka tōge bō bu-zāņsi*, la ba na'adōma, la lsrayeli* dōma mē. ¹⁶Mam wun pa'ale ē ĕn wun nāmse se'em mam yu'vre iyā.>>

¹⁷Ti Ananiyasi sēņε ka kē yire la puam dūke a nu'usi pagle Asoli zuo yeke ē yeti: <<M sōbia Asoli, fōn daan boe sore zuo sēna ti Zuudāana Azezi puke a mēņa pa'ale fu la, ēņa n tōm mam fu zē'am ti m boti fu nini le yēta, dee ti fu to'oge Nawēne Sia* pāņa.>> ¹⁸Ti

Ananiyast n yeke bela la, sela n ãn wu pɔgrɔ n kɔ'ɔn ze'ele Asolɩ
ninum lui, ti a le yēta. Ti a isge, ti ba mise ē ko'om* puam, ¹⁹dee ti a
di dia, ti a pãña le wa'am.

Asolɩ mōole Nawēnne yetɔga Damaast tēña puam

Asolɩ daan weege Damaast Azezi karēnbiisi la zē'am na dabsa fēe,
²⁰dare kē Zifdōma wēndetum mōola Nawēnne yetɔga yeti, Azezi de la
Nawēnne Dayua. ²¹Ti la di'ige seba wuu n wōm na. Ti ba yeti:

< < Dagi bura-ēna wã n daan boe Zerizalem kɔ'ɔn nãmsra nēr-seba n
pu'usri la Azezi yu'ure la? A nōo ka wa'am kalam ti a yōge ba lu me
tari ba sēñe kãabgɔ kēma nēñadōma zē'am? > >

²²La Asolɩ daan yeti buraane me pa'asra, tɔge yãñe Zifdōma seba n
boe Damaast la, pa'ale ba ti Azezi de la Kri* ti Nawēnne tōm.

²³La dabsa faa n pa'ase ti Zifdōma lagum ēñe nōore ayila yeti ba ku
ē. ²⁴Ti Asolɩ daan bãñe ban bãm yeti ba ēñe se'em na. Ba daan gu'uri
tēña la yansi la wunteɛña la yu'ɔñɔ, bɔɔra ti ba ku ē. ²⁵Ti daare ayila
yu'ɔñɔ, ti a karēnbiisi daan boti a sige pu'igɔ puam, ti ba dɩke ē sike
lalga poorum, ti a fōrge.

Asolɩ boe Zerizalem

²⁶La Asolɩ daan sēñe la Zerizalem ka bɔɔra ti a lagum na Azezi
karēnbiisi la. La ba daan zoti ē me, ba daan ka sake ti a siri de la
Azezi karēnbia. ²⁷Ti Abarnabast daan tari ē sēñe Azezi Tōntōnɩba* la
zē'am ka pa'ale ba Asolɩ n daan yē Zuudãana Azezi Damaast sore zuo,
la Zuudãana la n tɔge ē se'em, la ēn daan kãbe sūure mōole Azezi
yelle Damaast se'em. ²⁸Ti Asolɩ yãña daan bɔna la ba Zerizalem, eera
tēña la puam wuu, kãbe sūure mōola Zuudãana Azezi yelle. ²⁹La a
daan tɔgrɩ me wē'era nōke'ene la Zifdōma seba n tɔgrɩ Greki* yetɔga
la. Ti ba bɔɔra ti ba ku ē. ³⁰La Azezi karēnbiisi la n bãñe bela la, ba

tari ē sēņe la Sezaare, ti ba boti a sēņe Tarsi.

³¹Ti Azezi nēr-kvυηη la n boe Zude, la Galile, la Samaari tēnsu na, daan ka le yē nāmsgo. Ti Nawēnne Sia sōņra ba, ti ba källe pa'asra, ti ba ze kāņkāņe nā'asra Zuudāana la ba sūure wuu.

A'ene yē ĩmā'asum

³²La Apıyεeri daan eeri gilgra la zē'esti la wuu, ti daare ayula ti a sēņe Nawēnne nērba la n boe Lida la zē'am. ³³La bilam a yē la bura a ayula yu'vre n de A'ene, a daan bē me kōrum gā yuuma anii. ³⁴Ti Apıyεeri yele ē yeti: < < A'ene, Azezi-krisi bō fu ĩmā'asum me. Isge vaage fu bōn-gā'ala la bīņe. > > Ti a isge bilam zē'am. ³⁵Ti Lida, la Saarō tēnsi nērba wuu yē ti bura la yē ĩmā'asum me, ti ba teege yem dıke ba mēņa bō Zuudāana.

Atabita vo'ore

³⁶La pōka ayula n daan boe Zope dena Azezi karēnbia ti a yu'vre dena Atabita. (Ti Grekidōma yeti, Adarkasi, a vōore de la < < mōlfo > > .) A daan tōnni la tōon-sōma sōņra nasdōma. ³⁷La wakat-ēņa bā'a n yōke ē, ti a ki. Ti ba so ē, tari ē zom deego n boe deego zuum ka gā'are ē. ³⁸Zope ka zāage la Lida. La karēnbiisi la n wōm ti Apıyεeri boe bilam na, ti ba tōm buraasi bayi yeti, ba sēņe ka wi ē yeti, a wa'am, a da yuuge.

³⁹Ti Apıyεeri isge doose ba sēņe. La ban paage la, ba tari Apıyεeri zom na deego la n boe deego zuo la. Ti pōkōpa wuu lem Apıyεeri kella, dee pa'ala fu-seba ti Adarkasi daan pe bō ba, ēn daan vōa la. ⁴⁰Ti Apıyεeri boti ba wuu yese yēņa, dee ka dūma tēņa pu'vse, dee wērgē kūm na bōba yeti: < < Atabita, isge. > > Ti a pike nini yē Apıyεeri, isge zı'ire. ⁴¹Ti Apıyεeri gure a nu'ugo, ti a isge ze'ele, ti a wi Azezi nērba la, la pōkōpa la pa'ale ba ti a le vōa me.

⁴²La Zope tēŋa dōma wuu n daan wōm yel-ēna wā la, ba nērba zozo'e n bɔ Zuudāana Azezi sira. ⁴³Apɪyɛɛɾɪ daan yuuge Zope paage la dabsa se'em. A daan boe la Asimō n de gānzapa la yire.

10

Akɔrnɛɪ wi Apɪyɛɛɾɪ

¹Bɔraa n daan boe Sezaare, tɪ a yu'vɛɛɾɛ dena Akɔrnɛɪ. A daan de la suda-ke'ema, ba wi'iri suda-sɛba tɪ a de ke'ema ba pɔam na tɪ Itali dōma sudaasi. ²A daan de la nēr-sōŋɔ, tɪ ēŋa la a yir-dōma wuu daan nanna Nawēnne. La a daan sōŋɾɪ la Zifdōma nasdōma zozo'e, dee pu'vsra Nawēnne daare woo. ³Tɪ wēnne daan gelge, tɪ a yē Nawēnne maleka* wu a zāasum mɛ na, tɪ a wa'am wa kē a zē'am yele ē yetɪ: < < Akɔrnɛɪ! > > ⁴Tɪ a daan bɪsra maleka la zii, tɪ dabeem tara ē, tɪ a yetɪ: < < M dāana, fu yetɪ bo? > > Tɪ a lerge yele ē yetɪ: < < Fu pu'vsgɔ la, la fōn sōŋɾɪ nasdōma la paage Nawēnne yem mɛ, a tēɾɪ fu yelle mɛ. ⁵La nānanne wā, tōm nērba tɪ ba sēŋɛ Zope ka yele Asimō-pɪyɛɛɾɪ tɪ a wa'am. ⁶A de la sāana bɔna Asimō n de gānzapa la yire. A yire la lɛm na ko-kāte la nōorum. > > ⁷La maleka la n tɔge la Akɔrnɛɪ dee fōrge la, tɪ Akɔrnɛɪ wi a tōntōnɪba bayi, la a suda-sōŋɔ ayula n tōnnɪ a tōoma, dee mē nanna Nawēnne, ⁸yāŋa tɔge sela n ēŋɛ la wuu pa'ale ba, dee tōm ba tɪ ba sēŋɛ Zope.

⁹La beere n wiige, tɪ ba bɔna sore wɛ ka lɛm Zope, tɪ Apɪyɛɛɾɪ zom gɔsgɔ tɪ a pu'vse, la mase wu wɔntɛɛŋa zuu-tēŋasɔka. ¹⁰Tɪ a kɔm daan dōnna, tɪ a bɔra tɪ a di. La ban nān boe mī ita dia tɪ ba bɔ ē na, tɪ a bɪse yē wu a zāasum mɛ na, ¹¹a daan yē tɪ saazuum n yo'oge, tɪ sela n ān wu fu-kāte n lɔ zē'estɪ snaasi signa tēŋa. ¹²La dūnsi buuri wuu, la tēŋa bōn-vuula, la bōn-ēgla buuri wuu n boe a pɔam. ¹³Tɪ a wōm kōa

n yele ē yeti: << Apɪyɛɛri, isge kv di. >> ¹⁴Tɪ Apɪyɛɛri lerge ē yeti: << Ayɛi, Zuudāana, mam ken ka di sɛla n de sisgo bōnɔ bu bōn-dēgrɔ baa fēe. >> ¹⁵Tɪ kōa la le yele ē yeti: << Bōn-sɛka tɪ Nawēnne yeti, a ān sōŋa, da kān yeti, a de la bōn-dēgrɔ. >> ¹⁶Bōnɔ la ēŋɛ la nōor-atā, dee yāŋa lebe saazuum.

¹⁷Tɪ Apɪyɛɛri daan zɛ yeri, tē'esra a putē'erum bōn-ēŋa tɪ a yē la vōore. La wakat-ēŋa tɪ seba tɪ Akōrnɛli daan tōm na soke Asimō yire n boe zē'a, wa'am wa zɛ yaŋa nōorum, ¹⁸yāŋa wi soke yeti, Asimō-pɪyɛɛri boe la kalam bu? ¹⁹La Apɪyɛɛri ken tē'esra la bōnɔ la tɪ a yē la yelle, tɪ Nawēnne Sia yele ē yeti: << Buraasi batā n eeri fo, ban wāna. ²⁰Isge sige doose ba, da sē'ena, tɪ mam n tōm ba. >> ²¹Tɪ Apɪyɛɛri sige buraasi la zē'a ka yele ba yeti: << Mam tɪ ya eeri la. Bēm yelle iyā tɪ yāma wa'am kalam? >> ²²Tɪ ba yele ē yeti: << Akōrnɛli, a de la suda-ke'ema, tɪ a urgɔ masɛ, tɪ a nanna Nawēnne, tɪ Zifdōma wuu tɔgra a yelle sōŋa. Tɪ Nawēnne daan tōm a malɛka tɪ a wa'am wa yele ē yeti, a botɪ fōn wa'am a yire wa yele ē fōn tarɪ yetɔg-sɛka la. >> ²³Tɪ Apɪyɛɛri botɪ ba kē yire la gā'are.

Tɪ beere wiige, tɪ a isge dɔla ba wɛ, tɪ Azezi karēnbiisi baseba n boe Zope la kɔlge ē tɪ ba sēŋɛ. ²⁴La dabsa ayi daare tɪ ba paage Sezaare. Tɪ Akōrnɛli daan wi a yir-dōma la a sɪrdōma lagse gu'ura ba. ²⁵La Apɪyɛɛri n paage kē'era la, tɪ Akōrnɛli tu'vse ē ka dūma tēŋa a nēŋam nā'ase ē. ²⁶Tɪ Apɪyɛɛri gure ē yeti: << Isge, mam mē de la nērsaala wɔ fōn na. >> ²⁷Tɪ ba sōsra la taaba kē'era, tɪ Apɪyɛɛri yē nērba n lagse zo'oge. ²⁸Tɪ a yele ba yeti: << Ya mi tɪ Zifdōma* sisri mɛ, ba ka lagnɪ la nēra n de sāana, la ba ka kē'eri a yire. La Nawēnne pa'ale mam mɛ tɪ m da yeti, nērsaala de dēgrɔ dāana, bu a ka narɪ m lagum na ē. ²⁹Bela iyā tɪ fōn wi mam, tɪ mam wa'am ka zagse. La mam boori tɪ m bāŋɛ la bēm yelle iyā tɪ yāma botɪ mam wa'am? >>

³⁰Ti Akørneli lerge ē yeti: < <La de la dabsa anaasi n wāna wēngelŋa wu wakat-ēna wā, ti mam daan boe m yire pu'usra, ti bura kō'on ye fuugo n yēgru ze mam nēŋam, ³¹dee yeti: < Akørneli, Nawēnne to'oge fu pu'usgo la, la a tēru fōn sōŋru nasdōma se'em na me. ³²Bela, tōm nērba ti ba sēŋe Zope ka wi Asimō-piyēeri ti a wa'am. A boe la Asimō n de gānzapa la yire. A yire la lem na ko-kāte la nōorum. > ³³Bela ūyā ti mam tōm nērba tōtō ti ba wa'am wa wi fu ti fu wa'am. La fōn wa'am wā, fu ēŋe sōŋa. Ti wuu yāŋa boe la Nawēnne nēŋam kalam ti ti selse bōn-seka wuu ti Zuudāana Nawēnne yele fōn yeti, fu yele tōma la. > >

Apiyēeri mōole Nawēnne yetōga bō Akørneli

³⁴Ti Apiyēeri yāŋa pōse yele yeti: < <Sira sira, mam yāŋa bāŋe me ti Nawēnne ka tū'usri nērba. ³⁵La buuri wuu puam nēr-seka n nanni Nawēnne dee ita sela woo ti la masra, ēŋa dāana n paage a yem. ³⁶Tō. Ya mi ti Nawēnne tōm a yetōga la bō la Israyeli* dōma, a de la kō-yēlga n pa'ali ti ti wun tara sū-mā'asum la Nawēnne Azezi-krisi ūyā, ēŋa n de nērsaalba wuu Zuudāana. ³⁷Yāma mi yel-seba wuu n daan ēŋe Zude la, la daan pī'ilum na Galile Azā n daan mōole Nawēnne yetōga dee mise nērba ko'om* puam na poorum. ³⁸Ya ken mina Azezi n yese Nazareti la, la Nawēnne n daan bō ē a Sia pāŋa se'em, ti a daan sēŋe zē'est wuu ēŋe ur-sōma, boti Asūtāana* n daan nāmsru seba la wuu yē ūmā'asum. Se'ere n soe la, Nawēnne daan boe la ē me. ³⁹Tōma yē bōn-seba wuu ti a daan tōm Zerizalem la Zifdōma so'olum na wuu me, dee ti ba daan ka ē dō-puurŋa* zuo ku. ⁴⁰Ti Nawēnne daan vo'oge ē dabsa atā daare, boti a dīke a mēŋa pa'ale. ⁴¹La a ka dīke a mēŋa pa'ale nērba la wuu, a dīke a mēŋa pa'ale la tōma seba n de kaset-dōma ti Nawēnne daan pōn dēŋe looge la. A vo'ore la

poorum, tōma daan lagum na ē me di dee yū. ⁴²A daan bɔ tōma nōore yeti, ti mōole ēṅa yetɔga, dee yele nērba, ti la de la ēṅa ti Nawēnne looge ti a di nēr-vɔɔsi la ki'indōma sariya. ⁴³Nawēnne nōtɔ'ɔsɪba* la wuu yuun tɔge a yelle me yeti, sɛka woo n bɔ ē sira, Nawēnne won base a dāana tōon-be'ero taale a yu'vre iyā. > >

Sɛba n dagi Zifdōma la to'oge Nawēnne Sia

⁴⁴Apɪyɛɛɪɪ n daan ken tɔgra yetɔg-bāna la, ti Nawēnne Sia* sige sɛba wuu n wōm yetɔga la zuto. ⁴⁵La Nawēnne n daan boti a Sia la mē sige bu-zāṅsi* la zuto la, la daan di'ige Zifdōma* sɛba n bɔ Azezi sira n doose Apɪyɛɛɪɪ wa'am na mɛ. ⁴⁶Se'ere n soe la, ba daan wōm ti ba tɔgrɪ la bu-zāṅsi yetɔga pēgra Nawēnne yu'vre. ⁴⁷Ti Apɪyɛɛɪɪ yeti: < < Nēr-bāna wā to'oge la Nawēnne Sia wu tōma n daan to'oge se'em na. Bɛla, āne n wun tā'age gu ba yeti, ba da to'oge ko'om* misga? > > ⁴⁸Dee bɔ nōore yeti, ba mise ba ko'om puam la Azezi-krisi yu'vre. Ti ba sose Apɪyɛɛɪɪ yeti, a weege bāma zē'am ēṅe dabsa fēe pa'ase.

11

Apɪyɛɛɪɪ tɔge pa'ale lan ēṅe se'em ti ēṅa sēṅe bu-zāṅsi zē'am

¹La Azezi Tōntōntɪba*, la a karēnbi-sɛba n boe Zude so'olum na wōm mɛ ti nēr-sɛba n dagi Zifdōma la mē sake Nawēnne yetɔga mɛ. ²La Apɪyɛɛɪɪ daan lebe la Zerizalem, ti Zifdōma baseba n bɔ Azezi sira la wē'era nōke'ene la ē, ³yele ē yeti: < < Bēm n ēṅe ti fōn kē lagum na bu-zāṅsi* n ka wātɪ* la dita? > >

⁴Ti Apɪyɛɛɪɪ yāṅa pa'ale ba yɛla la wuu n daan doose se'em na yeti: ⁵< < Mam daan boe la Zope pu'vsra, yē sɛla wu zāasṅɔ la, ti sɛla la ze'ele saazuum sigra wu fu-kāte n lu zē'esti sınaasi sige wa paam mam

boe zē'a la. ⁶Ti mam bɪsra bōnɔ na zii, yē yire dūnsi, la we-dūnsi, la bōn-vuula, la bōn-ēgla. ⁷Ti mam wōm kōa n yeti: < Apɪyɛɛri, isge ku di. > ⁸Ti mam yeti: < Ayɛi, Zuudāana, sɛla n de sisgo bōnɔ bu bōn-dēgrɔ ken ka kē mam nōorum. > ⁹Ti kōa la le ze'ele saazuum tɔge bɔ mam yeti: < Bōn-sɛka ti Nawēnne yeti, a ān sōŋa, da kǎn yeti, a de la bōn-dēgrɔ. > ¹⁰La daan ēŋɛ la nōore atā, dee viise lebe saazuum. ¹¹Ti buraasi batā kɔ'ɔn paam yi-sɛka ti mam boe mī na. Ba daan tōm ba la Sezaare tēŋam yeti, ba wa'am mam zē'am. ¹²Ti Nawēnne Sia yele mam yeti, m doose ba sēŋɛ, m da sē'ena. Ti ti sɔbiisi bāna bayoobi wā kɔlge mam, ti tōma sēŋɛ ka kē Akɔrnɛli yire. ¹³Ti a yele tōma ti ēŋa daan yē la maleka* n ze ēŋa yire, yele ēŋa yeti: < Tōm nērba ti ba sēŋɛ Zope ka wi Asimō-pɪyɛɛri ti a wa'am. ¹⁴Ēŋa n wun tɔge yetɔg-sɛba n wun boti fōn na fu yir-dōma wuu yē fāare. > ¹⁵Mam n boe mī ti m tɔge la, ti Nawēnne Sia sige ba zuto wu ēn daan sige tōma zuo se'em pɔspɔsi la. ¹⁶Bɛla ti mam tēge Zuudāana n daan yeti: < Azā daan misri nērba la ko'om* puam, la Nawēnne wun mise ya a Sia puam. > ¹⁷La sǎn dena ti Nawēnne bɔ ba a Sia, wu ēn daan bɔ tōma n bɔ Zuudāana Azezi-krisi sɪra se'em na, mam de la āne wun sɪ'sɛ Nawēnne? > > ¹⁸Ban wōm bɛla la, ba sɪm mɛ dee pēgra Nawēnne yeti: < < Bɛla, Nawēnne boti bu-zǎŋsi mē yē sore mɛ ti ba teege yem base tōon-be'ero yē yōvore. > >

Antɪyɔsi nērba bɔ Azezi sɪra

¹⁹La A'etɪɛnti kūm na poorum, nēr-seba n yē nāmsgɔ la wirge mɛ, sēŋɛ halɪ Fenisi, la Sipri, la Antɪyɔsi*f2* ka mōola Nawēnne yetɔga la bɔ'ɔra Zifdōma mā'a. ²⁰La ba buraasi baseba daan ze'ele la Sipri, la Sirenti so'olum sēŋɛ Antɪyɔsi mē ka mōole bu-zǎŋsi, tɔge Zuudāana Azezi kō-yēlga la bɔ ba. ²¹La Zuudāana pǎŋa daan boe la ba mɛ. Ti

nērba zozo'e daan bɔ Zuudāana sira dɔla ẽ.

²²La Azezi nēr-kuvuɔ la n boe Zerizalem na n wɔm bela la, ba tɔm na Abarnabasi yeti a sɛɲe Antiyɔsi. ²³La ẽn paage yẽ ti Nawɛnne ɛɲe nērba la yel-sɔnne se'em na, a sũure ɛɲe yɛlum mɛ. Ti a pa'ale ba yeti, ba keɲe ba mɛɲa dɔla Zuudāana la ba sũure wuu da base.

²⁴Se'ere n soe la, a daan de la nēr-sɔɲɔ, dee bɔ Azezi sira zo'oge, ti Nawɛnne Sia bɔna la ẽ. La nērba zozo'e n daan pa'ase dɔla Zuudāana.

²⁵La Abarnabasi babse mɛ sɛɲe Tarsu ti a ka ɛ Asoli. ²⁶La ẽn yẽ ẽ na, a tarɪ ẽ mɛ wa'am Antiyɔsi. La yuvne tɔre ti ba lagse la Azezi nēr-kuvuɔ la, dee zāsum nērba zozo'e. La de la Antiyɔsi tɛɲam ti ba daan pɔse wi karɛnbiisi la ti Kriisi* nērba.

²⁷La wakat-ɛɲa ti Nawɛnne nɔtɔ'ɔsrɪba daan ze'ele Zerizalem sɛɲe Antiyɔsi. ²⁸Ti ba nɛra ayɪla yu'vre n de Agabisi isge ze'ele tɔge la Nawɛnne Sia pāɲa yeti, kɔm kāte n wun wa'am dũnia wuu zuo. La kɔm ɛɲa sɪrɪ wa'am mɛ na-keko Akloorɪ wakatɔm. ²⁹Ti karɛnbiisi la yeti, nɛra woo looge ẽn tarɪ sela bɔ ti ba to'oge sɔɲe Azezi nēr-seba n boe Zude la. ³⁰Ti ba daan ɛɲe bela dɪke ligri la ɛɲe Abarnabasi la Asoli nu'usum, tɔm ba yeti, ba tarɪ sɛɲe ka bɔ Azezi nēr-kuvuɔ la kɛma n boe Zerizalem na.

12

Ba kv Azaki, dee yv Apɪyɛɛrɪ

¹La mase la wakat-ɛɲa ti naba A'erɔdɪ* daan nāmsra Azezi nērba baseba, ²dee botɪ ba kv Azaki n de Azā sɔbia la sukɔbgɔ. ³La ẽn yẽ ti la ɛɲe Zifdɔma sũure yɛlum mɛ na, a le botɪ ba yɔke la Apɪyɛɛrɪ, wakat-seka ti Zifdɔma diti borborɪ n ka tarɪ dābille kibsa la. ⁴La ẽn yɔke ẽ kɛ'esɛ yu'a deem na, a botɪ sudaasi pia la ayoobɪ n puɪ bana-

banaasi gu'ura ē sɔɔsna taaba. A boori ti Zɔɔg-base* kibsa n tole, dee ti a tari ē yese nērba la nēŋam ka di a sariya. ⁵Bela ti ba daan page Apiyɛeri base yu'a deego la puam. Ti Azezi nērba la daan pu'usra Nawēnne a ŋyā halɪ ka base.

Maleka yese Apiyɛeri yu'a deem base

⁶Be-seka n wɔn wiige ti A'erɔdi* yese Apiyɛeri la, daar-ēŋa yu'vɔŋo Apiyɛeri daan gā la sudaasi bayi tēŋasuka gɪsra. Ba daan ba ē mɛ la bānsɪ bayi, ti gu'urba la bɔna zanɔrum gu'ura yu'a deego la. ⁷La haya! Ti Nawēnne maleka* kɔ'ɔn wa'am. Ti peelem kɔ'ɔn nēege deego la puam. Ti maleka la wē Apiyɛeri lugre nēege ē yeti: < < Isge tɔtɔ. > > Ti bānsɪ la ba'age lui tēŋa dee base a nu'usi la. ⁸Ti maleka la yele ē yeti: < < Ga fu sagānne, dee pire fu tagra. > > Ti a ēŋe bela. Ti maleka la le yele ē yeti: < < Ye fu fuugo dee doose mam. > > ⁹Ti Apiyɛeri doose ē yese yēŋa, dee ka bāŋe ti maleka la n uti se'em na de la sira, a tē'esɛ ti la āna wu a zāasum mɛ na. ¹⁰La ban gāŋe pɔspɔsi gu'urba la, la gu'urba buyi dōma la, ba yāŋa paage la kut-yan-seka n yesri kē'era tēŋa la puam na, ti yaŋa la yo'oge a mēŋa, ti ba yese yēŋa yāŋa dɔla sore wɛ. Bilam zē'am ti maleka la fōrge dee base Apiyɛeri.

¹¹Ti Apiyɛeri yem yāŋa wa'am, ti a yeti: < < Lɛɛɛ wā mam bāŋe sira sira, ti Zuudāana n tōm a maleka ti a wa'am wa fāage mam A'erɔdi nu'usum, la bōn-seka wuu ti Zifdōma eeri ti ba ēŋe mam na. > >

¹²La ēn bāŋe bōn-ēna vōore la, a sēŋe la Azā-markɪ ma Amaari yire. La nērba n lagse bilam zo'oge bɔna mɪ pu'usra. ¹³La ēn paage mɪ na, a wē la yaŋa nōore, ti pɔsɔɔ yu'vre n de Arode wa'am ti a bɪsɛ. ¹⁴La ēn bāŋe Apiyɛeri kōa la, ti a sūure ēŋe yēlum ti a ka yo'oge yaŋa la, dee

zoe kē ka yeti: << Apɪyɛɛɾɪ ze yaŋa nōorum. >> ¹⁵Tɪ ba yeɛle pɔsɔɔ la yeti: << Fōn de la zɔlgɔ. >> Tɪ a le yeti: << La de la ɛŋa. >> Tɪ ba lerge yeti: << La de la a sia >>. ¹⁶Tɪ Apɪyɛɛɾɪ ken wē'era yaŋa la. Tɪ ba yo'oge yē tɪ la de la ɛŋa. Tɪ la di'ige ba. ¹⁷Tɪ Apɪyɛɛɾɪ yɪbse nu'usi pa'alɛ ba yeti, ba āna sīm. Dee tɔge pa'alɛ ba Zuudāana n ɛŋe se'em tarɪ ɛŋa yu'a deego la pɔam yese yēŋa. Dee yeɛle ba yeti: << Yeɛle-ya Azakɪ, la tɪ sɔbiisi la, sɛla n ɛŋe la. >> Dee yese sēŋe zē'a ayēma.

¹⁸La beere n wiige la, dāmŋɔ zozo'e n wa'am sudaasi la tēŋasuka, tɪ ba bɔɔra tɪ ba bāŋe, la ɛŋe la wāne tɪ Apɪyɛɛɾɪ ka bɔna. ¹⁹Tɪ A'erɔdɪ botɪ ba ɛ Apɪyɛɛɾɪ, ka yē ẽ. Tɪ a di gu'urba la sarɪya, bɔ nōore yeti, ba ku ba. La bɛla poorum a yese Zude sēŋe la Sezaare ka bɔna bilam.

A'erɔdɪ kūm yelle

²⁰La naba A'erɔdɪ* sūure daan yīige mɛ halɪ la Tiiri* la Sidō tēnsɪ nērba. Tɪ ba ɛŋe nōore ayɪla tɪ ba sēŋe ka yē ẽ, yāŋa lagse taaba dēŋe yōke Ablastisi n bɪsrɪ naba A'erɔdɪ yire yelle la sia. Tɪ bāma la ɛŋa yāŋa doose taaba sēŋe ka sose naba A'erɔdɪ yeti, a base tɪ sū-mā'asum wa'am bāma la ɛŋa tēŋasuka. Se'ere n soe la, ba dia daan ze'eti la naba la tēŋam sēnna.

²¹La A'erɔdɪ looge la daare yeti, ba tɔge yetɔga la. La daare la n paage la, a ye la a na'am futo zɪ'ire a na'am kuka zuo tɔgra yetɔg-kāra bɔ'ɔra nērba la. ²²Tɪ ba kaase yeti: << Kōa wā de la Nawēnne kōa, la dagɪ nērsaala kōa. >> ²³Tɪ Nawēnne maleka* botɪ bā'a yōke A'erɔdɪ bilam zē'am, tɪ zūnzūa di ẽ, tɪ a ki, ɛn ka pēge Nawēnne dee pēge a mēŋa la ãyā.

²⁴Tɪ Nawēnne yetɔga la daan saage zē'a wuu, tɪ nērba zozo'e sakra yetɔga la pa'asra.

²⁵La Abarnabası la Asolı n daan tōm ba tōoma Zerizalem ba'ase la, ba daan tarı Azā-markı me lebe Antıyosı.

13

Ba tōm Abarnabası la Asolı tı ba sēḡe ka mōole Nawēnne yetōga

¹Azezi nēr-kuvuḡ n boe Antıyosı la puam, Nawēnne nōtō'osrıba, la karēnsāandōma n daan boe mī. Ba de la Abarnabası, la Asimeyō tı ba wi'iri tı nēr-sabga, la Alusiyusi n ze'ele Sireni, la Amanayenı tı ba daan uge ē la naba A'erōdı, la Asolı. ²La daare ayıla ba daan lu la nōore pu'usra dee pēgra Nawēnne, tı Nawēnne Sıa yeke ba yetı: < <Looge-ya Abarnabası la Asolı tı ba tōm tōon-seka tı mam looge ba tı ba tōm na. > > ³Tı ba lu nōore dıke nu'usi pagle ba zuto pu'use, dee base ba tı ba sēḡe.

Asolı la Abarnabası boe Sipri so'olum mōola Nawēnne yetōga

⁴La Nawēnne Sıa n tōm ba la, ba sēḡe la Selesi tēḡam ka kē ōorḡo bilam sēḡe Sipri so'olum tı ko'om gilge la. ⁵La ban paage Salamini tēḡam na, ba daan mōolı Nawēnne yetōga me Zıfdōma wēndeto* puam. Ba daan tarı la Azā-markı tı a sōḡra ba.

⁶La ba daan doose la Sipri so'olum la puam ka paage Pafosı. Bilam ba yē la tum dāana n parım tı ēḡa de la Nawēnne nōtō'osa. A de la Zıfu, a yu'vre de la Abar-zezi. ⁷A daan boe la tēḡa la gōmna Aseryusi-polusi n de yem dāana la zē'am. Tı gōmna la daan botı ba wi Abarnabası la Asolı, a daan boortı tı a wōm na Nawēnne yetōga. ⁸La tum dāana la yu'vre la Grektı* de la A'eliması. A daan sı'ısrı Asolı la Abarnabası yetōga la me, dee daan eera tı a gu gōmna la tı a da sake Nawēnne yetōga la. ⁹Tı Nawēnne Sıa bōna la Asolı yu'vre ayēma n de Apolı la pāḡa, tı a bısrıa tum dāana la zıi, ¹⁰yeke ē yetı: < <Fu tarı la

yemkēgsıga la pã'asgɔ, fu de la Asūtãana* bia, fu de la tōon-sōma wuu be. Fōn dikri Zuudãana Nawēnne sira la me ti a lebgra pōmpɔrɔ. ¹¹Leele wã, bãɲe ti Zuudãana pãɲa wun boti fu fo me. Fu kãn le yē peelem halı ka paage wakat-seka. > > La bilam zē'am ti tum dãana la kɔ'ɔn fo, ba'abra ɛera nēra ti a ve'ege ẽ. ¹²La gɔmna la n yē lan ẽɲe se'em na, a bɔ yetɔga la sira me, se'ere n soe la, Zuudãana zãsnɔ la daan kē a sūure me.

Apolı la Abarnabasi boe Antıyɔsi n boe Pisidi so'olum

¹³Apolı la a taaba la ze'ele la Pafɔsi kē ɔɔrɔɔ sēɲe Perzi n boe Pãnfili so'olum puam na. Ti Azã-markı base ba bilam dee lebe Zerizalem. ¹⁴Tı ba daan ze'ele Perzi sēɲe Antıyɔsi n boe Pisidi so'olum puam na. Ti Zifdōma vo'osgo* daare paage, ti ba kē ba wēndeem zı'ire. ¹⁵La ban karēɲe Nawēnne lɔɔ*, la Nawēnne nōtɔ'ɔsrıba* gōnno kı'ulum na, ti wēndeego la nēɲadōma tōm nērba ti ba sēɲe ka yele ba yetı: < < Tı sɔbiisi, ya sãn tara yetɔga n wun bɔ nērba la buraane, ya tɔge. > >

¹⁶Tı Apolı isge yıbse la nu'ugo yele ba yetı: < < Israyelı* nērba, la yãma seba n po nanna Nawēnne, selse-ya. ¹⁷Nawēnne ti Israyelı dōma pu'usrı wã, ẽɲa n yuun looge ti yaabdōma, ban yuun boe Ezipti* na, ẽɲa n botı ba yırge zo'oge. La ẽɲa n yuun tōm pãɲa tōoma tartı ba yese Ezipti. ¹⁸La ban boe weem yuuma pinaasi la, a ẽɲe sū-mã'asum la ba me. ¹⁹Dee yuun sã'am buuri bayopɔi Kanaan* so'olum puam, dee bɔ ba tēɲa la ti ba sɔna. ²⁰Bela wuu yuuge mase wu yuuma kɔbsnaasi la pinuu.

La bela poorum a bɔ ba la nēɲadōma, ti ba sɔna ba wa paage Nawēnne nōtɔ'ɔsa Asãmwelı wakatı. ²¹Tı ba yãɲa sose yetı, bãma boortı la naba. Ti Nawēnne bɔ ba Akisi dayua Asayuli n de Abēnzamē

buuri nēra, tɪ a di na'am yuuma pinaasi. ²²Tɪ Nawēnne yuun to'oge Asayuli na'am na, dee botɪ Adavidi* dɛna naba. Nawēnne yuun tɔge Adavidi yelle yetɪ: < Mam yē la Azese* bia Adavidi n ān mam sūure yēlum. Eɲa n wun ēɲe mam n boort se'em na wuu. > ²³La de la ēɲa buuri nēra ayula n de Azezi tɪ Nawēnne botɪ a dɛna Fāagra bɔ lsrayeli dōma, wu ēn yuun biɲe a nōore se'em na. ²⁴Ēɲa n daan nān ka wa'am na, Azā n daan mōolɪ a wa'aɲɔ yelle bɔ lsrayeli nērba wuu yetɪ, ba teege yem base tōon-be'ero tɪ ba mise ba ko'om* puam. ²⁵La Azā n daan boe mĩ tɪ a tōm a tōoma ba'ase la, a soke ba yetɪ: < Yāma tē'esɛ tɪ mam de la āne? Yāma n tē'esɛ tɪ mam de nēr-seka la, mam dagɪ ēɲa. La selse-ya, ēɲa boe la mam poorum sēna, mam ka mase tɪ m pirge a tagra. >

²⁶M sɔbiisi, yāma n de Abraham* yusɪ, la yāma seba n po nanna Nawēnne, la de la tōma iyā tɪ Nawēnne tōm fāare kōa wā. ²⁷La Zerizalem nērba, la ba nēɲadōma daan ka bāɲe Azezi n de nēr-seka. La ba ka bāɲe Nawēnne nōtɔ'ɔsrɪba yetɔga la tɪ ba karēɲrɪ vo'osgo daare wuu la vōore. La ban di Azezi sarɪya la, nōtɔ'ɔsrɪba la n yuun yeke se'em na ēɲe mɛ. ²⁸Baa ban ka yē bōn-seka n wun botɪ ba ku ē na, ba sīm mɛ dee yeke Apilatɪ yetɪ, a base tɪ ba ku ē. ²⁹La ban daan ēɲe sɛla wuu wu lan pōn gulɛ a yelle se'em ba'ase la, ba sike ē dɔ-puurɲa* la zuo mɛ laage. ³⁰Tɪ Nawēnne daan botɪ a vo'oge. ³¹La a dɪke a mēɲa mɛ pa'ale seba n daan doose ē Galile sēɲe Zerizalem na dabsa faa, bāma n de a kaset-dōma lsrayeli nērba la tēɲasvka.

³²La tōma mōolɪ la kō-yēlga la bɔ yāma: Nawēnne n yuun biɲe a nōore la tɪ yaabdōma la, ³³a ēɲe bōn-ēɲa bɔ la tōma n de ba yusɪ la. La de la a vo'oge Azezi mɛ. La ān wu lan gulɛ yōoma gōɲɔ yōoma buyi dāana la puam yetɪ:

< Fu de la mam bia.

Zīna mam n lebge fu sɔ. >

³⁴Nawēnne yuun yeti, ēṅa wun vo'oge ē ti a kǎn pō'oge. Bela ti a yuun yeti:

< Mam wun bɔ ya bōn-sōma sira sira ti mam pōn bīṅe nōore la Adavidi la. >

³⁵Bela īyā ti la yele yōoma gōṅɔ puam zē'a ayēma yeti:

< Fu kǎn base fu pupeelem dāana ti a pō'oge. >

³⁶Wakat-seka ti Adavidi yuun vɔa la, a tōm Nawēnne yem n boori se'em mε, dee ki ti ba laage ē a yaabdōma yɔɔm, ti a īyā pō'oge. ³⁷La Nawēnne n vo'oge seka la ka pō'oge. ³⁸Bela, m sɔbiisi, yāma mase ti ya bāṅe ti la de la Azezi īyā ti tōma mōole pa'ale yāma ti Nawēnne wun base tōon-be'ero taale. Se'ere n soe la, Amoyisi lɔɔ* yuun ka tā wun base ti ya yelle mase Nawēnne zē'am, ³⁹la nēr-seka woo n bɔ Azezi sira, a yelle mase Nawēnne zē'am mε. ⁴⁰Bela, guuse-ya ti lan gulse se'em Nawēnne nōtɔ'ɔsrɪba gōnnɔ puam na da paage ya. ⁴¹La yeti:

< Bāṅe-ya ti yāma seba n de st'ɪsrɪba la,

ya palēṅa wun ēke mε ti ya ki.

Se'ere n soe la,

tōon-seka ti mam wun tōm ya zamāana wā puam na,

ya kǎn nan ti la wun sɪrɪ ēṅe,

baa nēra sǎn tɔge pa'ale ya. > > >

⁴²La Apolɪ la Abarnabastɪ n daan isge ti ba yese la, ti nērba la sose ba yeti, ba le wa'am vo'osgo daare wa tɔge yetɔg-seba ti ba tɔge la. ⁴³La ban yese ti ba fōrge la, ti Zifdōma zozo'e, la nērba baseba n dagɪ Zifdōma dee sake dɔla Nawēnne lɔɔ ti a bɔ Zifdōma, daan dɔla Apolɪ la Abarnabastɪ. Tɪ Apolɪ dōma pa'ale ba yeti, ba mōrge bɔna Nawēnne yel-sōnne na puam.

⁴⁴Ti vo'osgo daare le paage, ti nërba lagse zozo'e wu la de la tēja la nërba wuu la, ti ba selse Nawënne yetoga. ⁴⁵La Zifdōma n yē nërkuuḡ la n zo'oge la, ti ba ēḡe sūure st'ise Apoli n toge se'em na, dee tōgra tōg-be'ero. ⁴⁶Ti Apoli la Abarnabasi daan kābe sūure toge ba yeti: < < Tōma wun dēḡe ni toge Nawënne yetoga wā bɔ la yāma. La yāma n zagse la, yāma pa'ale ti ya ka mase ti ya yē vɔm n ka ba'asri. Bela iyā tōma wun base yāma, dee sēḡe la bu-zāḡsi* zē'am. ⁴⁷Se'ere n soe la, Zuudāana Nawënne bɔ tōma nōore yeti:

< Mam looge fo ti fu āna wu peelem bɔ bu-zāḡsi,
boti nërba yē fāare dūnia zē'esti wuu. > > >

⁴⁸La bu-zāḡsi la n wōm bela la, ba sūure ēḡe yēlum me halɪ, ti ba pēgra Nawënne yetoga la. La nēr-seba n mase ti ba yē vɔm n ka ba'asri la daan sake bɔ Azezi sira me.

⁴⁹Ti Zuudāana yetoga la saage tēja la wuu. ⁵⁰Ti Zifdōma daan sa'ase pɔḡsi n pu'usri Nawënne, dee dena yu'ure dōma, la tēja la nērzuto, boti ba nāmse Apoli la Abarnabasi dige ba ba tēja la pvam ti ba yese. ⁵¹Ti Apoli la Abarnabasi puse ba nāma tēntōnno base, pa'ale ti tēja la nërba ka ēḡe sōḡa, dee we'esa Ikonim. ⁵²La Azezi karēnbiisi la n boe Antiyoosi la daan tari sū-yēlga zo'oge me, dee ti Nawënne Sia bɔna la ba.

14

Apoli la Abarnabasi boe Ikonim

¹Apoli la Abarnabasi n paage Ikonim la, ba le kē la Zifdōma wēndeego* pvam toge bɔ nërba. Ti nēr-kuuḡ zozo'e, Zifdōma la nërba baseba n dagi Zifdōma, bɔ Nawënne sira. ²La Zifdōma nēr-seba n ka sake yetoga la, bāma n sa'ase bu-zāḡsi* boti ba sūure sā'am la

Azezi karēnbiisi la. ³La Apolɪ la Abarnabasɪ daan yuuge Ikonim mɛ, te'ege Zuudāana Azezi tɔge a yetɔga la buraane. Tɪ Zuudāana daan bɔ ba pāŋa tɪ ba tōm tōon-yālma la yel-kursɪ n pa'alɪ tɪ ɛŋa yel-sōnne na tɪ ba tɔgrɪ la de la sɪra. ⁴La tēŋa la nērba daan welse mɛ, tɪ baseba bɔna Zifdōma poorum, tɪ baseba bɔna Azezi Tōntōnɪba* la poorum.

⁵Tɪ bu-zāŋsɪ, la Zifdōma, la ba nēŋadōma bɔɔra tɪ ba nāmse Apolɪ la Abarnabasɪ lobe ba la kuga. ⁶Tɪ ba bāŋɛ, zoe sēŋɛ Likoni tēnsuɔm, Listri, la Derbɪ, la tēn-pɪgsɪ seba n lɛm bilam na puam. ⁷Bilam ba daan mōole kō-yēlga la mɛ.

Ba lobe Apolɪ la kuga Listri tēŋam

⁸La buraan n daan boe Listri ka tāna sēnna. A ma dɔge ɛ tɪ a dena la kɔɔrŋɔ. ⁹Tɪ a daan zēa selsra Apolɪ n tɔgrɪ la. Tɪ Apolɪ bɪsra ɛ zii, bāŋɛ tɪ a bɔ Azezi sɪra mɛ tāna wun yē ĩmā'asum. ¹⁰Tɪ Apolɪ tɔge ke'enke'em yeke ɛ yetɪ: < < Isge ze'ele saazuo. > > Tɪ kɔɔrŋɔ la vaage isge sēnna. ¹¹La nēr-kuvŋɔ la n yē Apolɪ n ɛŋɛ se'em na, tɪ ba tii tɔge la Likoni tēŋa yetɔga yetɪ: < < Wēna n lebge nērsaalba sigum tōma zē'am. > > ¹²Tɪ ba daan wi'ira Abarnabasɪ tɪ Azeyusi, dee wi'ira Apolɪ tɪ A'ermēsɪ, ɛŋa n tarɪ yetɔga la wa'am na ĩyā*f3*. ¹³Ba daan tarɪ la deego tēŋa la zanō-bɔba kāabra Azeyusi. Tɪ kāabgɔ kēema la tarɪ lɔlsɪ, la tusɪ puuro wa'am zanōrum na, tɪ ɛŋa la nēr-kuvŋɔ la bɔɔra tɪ ba kāabe Abarnabasɪ la Apolɪ.

¹⁴La Tōntōnɪba Apolɪ la Abarnabasɪ n wōm ban yetɪ ba ɛŋɛ se'em na, ba sūure sā'am mɛ, tɪ ba āasum ba futo, dee zoe kē nēr-kuvŋɔ la puam tii tɔge yetɪ: ¹⁵< < Nērba wā, bēm tɪ ya yetɪ ya ɛŋɛ wāna? Tōma mē de la nērsaalba wu yāma n ān se'em na, la tōma mōolɪ la kō-yēlga pa'ala yāma tɪ ya base bōn-bāna wā n ka tarɪ yōorɔ, dee dɔla Nawēnne n de vɔm dāana. Ɛŋa n nāam saazuum la tēŋa, la ko-kāte,

la bõn-seba wuu n boe ba puam na. ¹⁶Kurum kurum, Nawēnne yuun base buuri wuu ti ba ita la ba mēṅa yem n boori se'em. ¹⁷La baa bela wuu, Nawēnne uti sōṅa me pa'ale ēṅa n de seka. Eṅa n boti saaga niira bɔ'ora ya, ti ya bõnkɔla buta, ti dia bɔna zo'oge, ti ya sūure āna yēlum. > > ¹⁸Baa la Apoli n tɔge bela la, la ēṅe la toogo bɔ ba, dee ti ba yāṅe gu nēr-kuvṅo la ti ba ka kāabe ba.

¹⁹La Zifdōma n ze'ele Antiyɔsi n boe Pisidi so'olum, la Ikonim wa'am wa sa'ase nērba la, boti ba lobe Apoli la kuga, vuuge ē tēṅa la puam yese base, dee tē'esē ti a ki me. ²⁰Ti Azezi karēnbiisi la lagse gilge ē, ti a isge kē tēṅa la puam. Ti beere wiige, ti ēṅa la Abarnabasi sēṅe Derbi.

Apoli la Abarnabasi lebrɔ Antiyɔsi n boe Siiri so'olum

²¹La Apoli la Abarnabasi mōole kō-yēlga Derbi me, ti nērba zozo'e lebge Azezi karēnbiisi, dee ti ba yāṅa lebe Listri, la Ikonim, la Antiyɔsi n boe Pisidi so'olum. ²²La ba daan tɔge pa'ale karēnbiisi la me, bɔ ba buraane yeti, ba mōrge bɔna Azezi sira la puam da base. Dee yele ba yeti: < < Ti wun yē la nāmsgɔ zozo'e dee kē Nawēnne so'olum* puam. > > ²³La tēn-seba wuu ti ba sēṅe la, ba looge la kēma Azezi nērba la puam, lu nōore pu'vse Nawēnne, dee dɔke ba base Zuudāana ti ba bɔ sira la nu'usum. ²⁴La ban doose Pisidi la, ba paage Pānfili so'olum.

²⁵La ba mōole Nawēnne yetɔga Perzi me, dee sēṅe Atali. ²⁶La ba kē la ōorṅo bilam sēṅe Antiyɔsi, tēn-seka ti ba daan dɔke ba ēṅe Nawēnne nu'usum ti a sōṅe ba ti ba tōm tōon-seka ti ba tōm ba'ase wā. ²⁷La ban paage la, ba boti Azezi nērba la lagse me, ti ba tɔge pa'ale ba Nawēnne n tōm la bāma se'em, la a yo'oge sore me bɔ bu-zāṅsi* ti ba tāna wun bɔ ē sira. ²⁸La ba boe la karēnbiisi la le bilam

yuuge me.

15

Ba tigse Zerizalem sōse bu-zāṅsi yelle

¹Nērba baseba n ze'ele Zude wa'am Antıyosı wa zāsna Azezi karēnbiisi la yetı: < < Ya sān ka wāta* ya budimto wu Amoyisi* lɔɔ la n zāsni se'em na, ya kān tā'age yē fāare. > > ²Tı Apolı la Abarnabası daan ka sake ban yele se'em na, daan tıi wē'era nōke'ene la ba. Tı karēnbiisi la ku nō-yēnne yetı, Apolı la Abarnabası, la bāma nērba baseba sēṅe Tōntōnıba* la, la kēma n boe Zerizalem na zē'am nōke'ene ēṅa yelle.

³La Azezi nērba la n tōm ba yetı ba sēṅe la, ba doose la Fenisi la Samaari tēnsım tōge pa'ale bu-zāṅsi* n teege yem sake Nawēnne se'em. Bela botı Fenisi la Samaari tēnsı karēnbiisi la sūure ēṅe yelım me zozo'e. ⁴La ban paage Zerizalem na, Azezi Tōntōnıba la, la Azezi nērba, la ba kēma la wuu to'oge ba me sōṅa sōṅa. Tı ba tōge pa'ale Nawēnne n ēṅe se'em wuu la bāma. ⁵Tı Farisi* nērba baseba n bɔ Azezi sıra la isge yetı: < < Dēni tı ba wāta bu-zāṅsi la, dee zāsım ba tı ba sake Amoyisi lɔɔ la wuu. > >

⁶Tı Tōntōnıba la, la kēma la lagse tı ba bıse ba wun ēṅe yelle la se'em. ⁷La ban wē'ertı nōke'ene zɔ'ɔra la, tı Apıyēertı isge yele ba yetı: < < M sɔbiisi, yāma mi me tı Nawēnne looge la mam kurum kurum yāma pvam, tı m tōge a kō-yēlga la bɔ bu-zāṅsi tı ba sake. ⁸La Nawēnne n mi nērsaala putē'era la, bɔ ba a Sıa me, wu ēṅa n daan bɔ tōma se'em na, pa'ale tı ēṅa fāage ba me. ⁹La a ka welge tōma la bāma. La ban bɔ Azezi sıra la iyā tı a yese be'em ba sūure pvam base. ¹⁰Bela, bēm tı ya makra Nawēnne bɔɔra tı ya zelge karēnbiisi la zeero

ti tōma yaabdōma, la tōma ka yāñe tu? ¹¹La ka ān sōña, tōma mi ti la de la Zuudāana Azezi yel-sōnne na iyā ti tōma yē fāare, wu bāma n mē yē fāare se'em na. > >

¹²Ti nēr-kuvuḡ la wuu āna sīm selsra Abarnabası la Apolı n tḡru pa'ala tōon-yālma, la yel-kursı seba ti Nawēnne ēñe la bāma bu-zāñsı tēñasuka la.

¹³La ban tḡge kt'ulum na, ti Azakı yetı: < < M sɔbiisi, selse-ya.

¹⁴Asimō-pıyēerı tḡge pa'ale la Nawēnne n dēñe buse bu-zāñsı yelle se'em, looge ba nērba baseba ti ba dena a mēña nērba. ¹⁵La bōn-bāma mase wu Nawēnne nōtɔ'ɔsrıba* n yeke se'em na. Ba yuun gulse ti Nawēnne yetı:

¹⁶< Bela poorum, mam wun leme wa'am,
wa le mē naba Adavidi* deego la n lui la me.
Mam wun le malge ē me,
mē a daboogo la zuo.

¹⁷Bela ti nēr-seba n weege la wuu,
la bu-zāñsı wuu ti mam looge ti ba dena mam nērba la,
wun ε mam n de ba Zuudāana. >

¹⁸Zuudāana Nawēnne n yeke se'em n wāna,
ēña n ēñe bōn-bāma ti ba pōn mina halı kurum kurum. > >

¹⁹Ti Azakı ken yetı: < < Bela ti mam tē'ese ti ti da nāmse seba n dagı Zıfđōma dee teege yem dɔla Nawēnne na. ²⁰Ti gulse gōñḡ bɔ ba yetı, ba da di di-seba ti ba kāabe bɔ бага la, ti ba wun dēge ba, ba da tōnna yalsı tōoma, ba da di sela ti ba tēge ku, la ba da di zum.

²¹Se'ere n soe la, halı kurum kurum ba karēñrı Amoyisi gōnno Zıfđōma wēndeto* la pvam ba vo'osgo* dabsa wuu me, dee mōola ba tēnsı la wuu pvam. > >

Ba gulse gōṅɔ bɔ bu-zāṅsi

²²Bela ti Tōntōnɔba la, la kēma, la Azezi nērba la wuu tē'ese yeti, la ān sōṅa ti ba looge nērba bāma pɔam tōm ba ti ba doose la Apolɔ la Abarnabasi sēṅe Antiyɔsi. Ti ba looge Azudi sɛka yu'ure n ken dena Abarsabasi la, la Asɔlaasi. Bāma ti ba daan nanni. ²³La ba daan gulse la gōṅɔ bɔ ba yeti:

< <Tōma n de Azezi Tōntōnɔba, la Azezi nērba la kēma n pu'usri yāma bu-zāṅsi* n de ti sɔbiisi n boe Antiyɔsi, la Siiri, la Silisi so'olum.

²⁴Tōma wōm ti tōma nērba baseba n wa'am wa dāana yāma la yetɔga boti yāma yem yɔɔra, tōma ka bɔ ba nōore. ²⁵Bela iyā ti tōma lagse taaba ku nōore ayɔla, tē'ese ti la ān sōṅa ti tōma looge nērba baseba tōm ba ti ba doose la ti sir-nōṅrɔsi Abarnabasi la Apolɔ wa'am yāma zē'am. ²⁶Bāma n pōse ba yōore tōma Zuudāana Azezi-krisi tōoma la iyā. ²⁷Bela ti tōma tōm Azudi la Asɔlaasi ti ba wa'am wa tɔge bōn-bāma pa'ale ya. ²⁸Nawēnne Sia, la tōma tē'ese me ti la ān sōṅa ti ti da zelge ya zeero baseba pa'ase, sān dagna yel-seba n de kāṅkāṅe wā. ²⁹La de la ya da di di-seba ti ba dɔke kāabe bɔ бага, ya da di zum, la ya da di sela ti ba tēge ku, la ya da tōnna yalsi tōoma. Ya sān guuse ya mēṅa ka ēṅe bōn-bāna, ya ēṅe sōṅa. Nawēnne wɔn bɔ ya īmā'asum. > >

³⁰Ba daan keese seba ti ba tōm na me, ti ba sēṅe Antiyɔsi. La ban paage bilam na, ba lagse Azezi nēr-kuvɔṅɔ la me, dɔke gōṅɔ la bɔ ba.

³¹La ban daan karēṅe gōṅɔ la, la bɔ ba buraane me, boti ba sūure ēṅe yēlum zozo'e. ³²Ti Azudi la Asɔlaasi n daan de Nawēnne nōtɔ'ɔsrɔba la tɔge zozo'e keṅe ba sɔbiisi la sūure, pa'ase ba pāṅa. ³³La ba daan

yuuge mĩ na fēe, dee ti ba sɔbiisi la base ba ti ba lebe seba n tōm ba la zē'am la sũ-mã'asum. ((³⁴Tɪ Asɪlaasɪ daan looge yem weege bilam.))

³⁵La Apolɪ la Abarnabasɪ daan weege la Antɪyɔsɪ bilam, ti bāma la nēriba baseba zozo'e zāsna nēriba Zuudāana Nawēnne yetɔga dee mōola a kō-yēlga la.

Apolɪ la Abarnabasɪ welge taaba

³⁶La daare ayula ti Apolɪ yele Abarnabasɪ yetɪ: < < Tɪ lebe ka kaage ti sɔbiisi la n boe tēn-seba wuu ti ti daan mōole Zuudāana yetɔga bɔ ba la, bise ba ān se'em. > > ³⁷Tɪ Abarnabasɪ daan bɔɔra ti Azã seka yu'vre n ken dena Amarkɪ la po doose ba sēŋe. ³⁸La Apolɪ daan tē'ese ti la ka ān sōŋa ti a doose bāma, se'ere n soe la, a daan base ba me Pānfili, ka le doose la ba tōm*f4*. ³⁹Tɪ ba daan wē nōke'ene welge taaba. Tɪ Abarnabasɪ daan botɪ Amarkɪ doose ē, ti ba kē ōorŋɔ sēŋe Sipri. ⁴⁰La Apolɪ daan looge la Asɪlaasɪ ti a doose ē. Tɪ Azezi karēnbiisi la dɪke ba ēŋe Nawēnne nu'usum ti a ēŋe ba yel-sōnne. ⁴¹Tɪ ba yāŋa sēŋe Siiri la Silisi tēnsuɔm ka pa'ase Azezi nēr-kvuŋɔ la pāŋa.

16

Atimōtɪ doose Apolɪ la Asɪlaasɪ, ti ba tōm Nawēnne tōoma

¹La Apolɪ dōma sēŋe ka paage la Derbɪ la Listri tēnsuɔm. Tɪ Azezi karēnbɪa daan bɔna mĩ ti a yu'vre dena Atimōtɪ, a ma de la Zifu n sake bɔ Azezi sɪra. Dee ti a sɔ dena Grekɪ*. ²Tɪ Azezi karēnbiisi n boe Listri la Ikonim tēnsuɔm na daan tɔgra a yelle sōŋa. ³Tɪ Apolɪ bɔɔra ti a dɔla la ba le tōnna, daan wã* ē Zifdōma seba n boe tēn-bāma la ĩyã, se'ere n soe la, ba wuu daan mi ti a sɔ de la Grekɪ. ⁴La ba daan dolɪ la tēnstɪ puam bɪsra Azezi nēr-kvuŋɔ la, dee tɔgra pa'ala ba Azezi

Tōntōnɔba la, la kēma la n boe Zerizalem na n looge yem se'em, dee yetā ba tɪ ba sake bōn-sēba tɪ ba looge la. ⁵Bela tɪ Azezi nēr-kuvɔɔ la daan yē pāɲa Nawēnne doosgo la puam, tɪ ba källe pa'asra daare woo.

Apolɪ boe la Trvasɪ zāasum tɪ ba wi ē Masedvanɪ

⁶Tɪ Apolɪ dōma daan bōɔra tɪ ba sēɲe Azi* tēnsuɔ ka mōole Nawēnne yetɔga, tɪ Nawēnne Sia gu ba, tɪ ba doose Frizi la Galatɪ so'olum. ⁷La ban sēɲe ka lem Mizi so'olum na, ba boorɪ tɪ ba sēɲe la Bitini, tɪ Azezi Sia*f5* la ka bɔ ba sore. ⁸Tɪ ba doose Mizi tole sēɲe Trvasɪ. ⁹La yu'vɔɔ tɪ Apolɪ bise yē Masedvanɪ nēra wu zāasɔ la, tɪ buraa la ze a zē'am belna ē yetɪ: < <Wa'am Masedvanɪ wa sōɲe tɔ. > > ¹⁰La Apolɪ n daan yē bela la, tōma māasum me tɔtɔ tɪ tɪ sēɲe Masedvanɪ, bēm ãyã, tōma tē'ese bāɲe me tɪ la de la Nawēnne n wi tōma yetɪ, tɪ sēɲe ka mōole kō-yēlga la bɔ ba.

Alidi bɔ Azezi sɪra Filipi tēɲam

¹¹Tɪ tōma kē ōorɔɔ bilam kō'ɔn sēɲe Samotrasɪ. Tɪ beere wiige, tɪ tōma paage Neapolisi. ¹²La tōma yāɲa ze'ele la bilam sēɲe Filipi n de Masedvanɪ tēn-kāra la tēɲa ayula. Filipi tēɲa de la Rom dōma n soe ē. Tōma ēɲe bilam na dabsa faa. ¹³Tɪ vo'osgo* daare tɪ tōma yese tēɲa la puam sēɲe kulaa nōorum, tōma tē'ese me tɪ zē'e-ēɲa de la Zifdōma pu'usgo zē'a. Tɪ tōma zĩ'ire bilam tɔgra bō'ɔra pɔgsɪ n lagse. ¹⁴La pɔka ayula n daan boe mĩ pu'usra Nawēnne, tɪ a yu'ure dena Alidi, a ze'ele la Tiyatiiri. A daan koosrɪ la fu-sōma n de gomusga. Tɪ a selsra tōma yetɔga la, tɪ Zuudāana botɪ a bāɲe Apolɪ yetɔga la vōore dee sake. ¹⁵Tɪ tōma daan mise ēɲa la a yir-dōma ko'om* puam. Tɪ a sose tōma yetɪ: < <Ya sãn sake tɪ mam sɪrɪ bɔ Zuudāana sɪra me, ya wa'am kē'era mam yire. > > La a pērgē tōma me, tɪ tōma sake.

Apoli dōma boe la yu'a deem Filipi tēnam

¹⁶Ti daare ayula ti tōma wε pu'usgɔ zē'am, ti pugla n de yamɲa ti kulkā'arga doli ē daan tu'use tōma. Kulkā'arga la daan boti a yēta la yel-seba n boe nēnam sēna tɔgra bɔ'ɔra nērba, la seba n soe ē na daan yeti ligri zozo'e mε a zē'am. ¹⁷Ti a dɔla Apoli la tōma tii tɔgra yeti: < < Nēr-bāna wā de la Nawēnne n gānni sela wuu la tōntōnɔba, ba mōoli la fāare sore pa'ala ya. > > ¹⁸La a ēɲe bela la dabsa faa. Ti Apoli sūure sā'am la ē, ti a wērgε yele kulkā'arga la yeti: < < Mam yeti fu la Azezi-krisi yu'vre, ti fu yese dee base pugla wā. > > Ti kulkā'arga la yese bilam zē'am dee base ē.

¹⁹Ti seba n soe ē na n bāɲε ti bāma kān le yē ligri a zē'am na, ti ba yōke Apoli la Asilaasi ve'ege ba kē da'am ka sām ba tēɲa la nēɲadōma zē'am. ²⁰Ti ba tari ba paage seba n diti sariya la zē'am ka yeti: < < Nēr-bāna wā de la Zifdōma, bāma n dāmni ti tēɲa wā. ²¹Ba pa'ali la bōn-seba n sisri, ti tōma n de Rom* nērba kān sake ēɲε. > > ²²Ti nēr-kuuɲɔ la lagum zebra Apoli la Asilaasi, ti seba n diti sariya la boti ba vε ba futo la yεεε, dee bɔ nōore yeti, ba wē ba la ka'asa. ²³Ti ba wē ba zozo'e dee kē'esε ba yu'a deem, dee yele gu'ura la ti a gu'ura ba sōɲa. ²⁴Ban yele bela la, ti a kē'esε ba yu'a de-seka n boe puam puam na, lu ba nāma lablε la dɔɔgɔ.

²⁵Ti sōnsva ti Apoli la Asilaasi pu'usra dee yōona yōoma pēgra Nawēnne, ti seba n po bɔna yu'a deem na selsra. ²⁶Ti tēɲa dare mīim zozo'e, ti yu'a deego la mīim la a ēbre waa wuu, ti kulnsi la wuu yo'ose, ti bānsi la wuu ba'ase. ²⁷Ti yu'a deego gu'ura la nēege isge yē ti kulnsi la yo'ose mε, ti a tē'esε ti ba yese mε, ti a fooge su'a ti a ku a mēɲa. ²⁸Ti Apoli tɔge ke'enke'em yeti: < < Da kān ēɲε fu mēɲa sela, tōma wuu boe la kalam. > > ²⁹Ti yu'a deego gu'ura la wi yeti, ba tari bugum wa'am. Dee ēɲε tɔtɔ kē deego la puam ka lui Apoli la Asilaasi

nēŋam gōgra la dabeem, ³⁰isge tarı ba yese, soke ba yetı:

< < Buraası, mam wun ēŋe la wāne yē fāare? > > ³¹Tı ba lerge ē yetı: < < Bɔ Zuudāana Azezi sira, tı fōn na fu yir-dōma wuu wun yē fāare. > > ³²Tı ba tɔge Zuudāana yetɔga bɔ ēŋa la seba wuu n boe a yire la. ³³La wakat-ēŋa mēŋa tı a tarı ba ka pe ba nōtɔ la. La bilam zē'am tı ba mise ēŋa la a yir-dōma wuu ko'om* puam la Azezi yu'bre. ³⁴Tı a tarı Apolı la Asılaası sēŋe a yire ka bɔ ba dia. Tı ēŋa la a yir-dōma la wuu sūure daan āna yēlum zozo'e, ban bɔ Nawēnne sira la ĩyā.

³⁵La beere n wiige, tı seba n diti sarıya la tōm ba tōntōnıba yetı, ba sēŋe ka yele seka n gu'uri yu'a deego la yetı, a base buraası la. ³⁶Tı yu'a deego gu'ura la tɔge bɔ Apolı yetı: < < Sarıyaditba la bɔ nōore yetı, m base tı ya yese. Bela yese-ya fōrge la sū-mā'asum. > > ³⁷Tı Apolı yele tōntōnıba la yetı: < < Tōma n de Rom* tēŋa nu'ugo nērba, tı ba ka di tōma sarıya dee wē tōma, kē'ese tōma yu'a deem, yāŋa yetı ba li'ise base tōma? Ayei, ba mēŋa wa'am wa yese to. > > ³⁸Tı tōntōnıba la sēŋe ka yele sarıyaditba la bela. Tı dabeem kē ba, ban wōm tı Apolı la Asılaası de la Rom tēŋa nu'ugo nērba la ĩyā. ³⁹Tı ba mēŋa wa'am wa belem ba, botı ba yese, dee sose ba yetı, ba fōrge dee base ba tēŋa. ⁴⁰La ba yese yu'a deem na sēŋe la Alidi yire ka tɔge bɔ Azezi karēnbiisi la buraane dee fōrge.

17

Yel-seba n ēŋe Tesaloniki tēŋam

¹Apolı la Asılaası doose la Amfipoli, la Apoloni tēnsuŋm tole sēŋe Tesaloniki, zē'e-ēŋa Zıfdōma wēndeego* n daan boe mĩ. ²Tı Apolı daan kē mĩ wu ē ĩn ita se'em na, tɔge bōn-seba n boe Nawēnne gōŋɔ

puam na pa'ale ba vo'osgo dabsa atã. ³A tɔge pa'ala ba yeti, la mase me ti Kriſi* nãmse ki dee vo'oge. Dee yeti: << Azezi ti mam mooli a yelle bo'ora ya wã de la Kriſi la. >> ⁴Ti ba nërba baseba, la Grekidõma* nërba zozo'e n pu'usrɪ Nawënne, la pɔgsɪ zozo'e n de nërzuto daan sake po dɔla Apoli la Asilaasi.

⁵Ti Zifdõma daan ënge sũure, sënge da'am ka ε nërba n ka tari võore lagse ti ba dãm tēja la. Ti ba sënge Azasõ yire ka εera Apoli la Asilaasi ti ba tari ba sënge tēja la nërba zẽ'am. ⁶La ba sënge ka ε ka yẽ ba, yõke Azasõ la Azezi karënbiisi baseba sënge tēja la ke'endõma zẽ'am ka tii tɔge yeti: << Nër-bãna wã eeri dãmna la dũnia wuu. La ban wãna n wa'am kalam, ⁷ti Azasõ to'oge ba. Nër-bãna wã wuu sɪ'usrɪ la Rom na-keko nõore yeti, naba ayẽma n boe ti a yv'ure dena Azezi. >> ⁸La ke'endõma la, la nër-kuvɔɔ la n wõm bela la, ba sũure isge me. ⁹Ti ba boti Azasõ la seba n doli ã na bĩne ligri, dee ti ba base ba.

Apoli la Asilaasi sënge Beere

¹⁰La wënne n daan sobe, ti Azezi karënbiisi la boti Apoli la Asilaasi sënge Beere. La ban paage la, ba sënge me ka kã Zifdõma wëndeem.

¹¹La bãma tari putẽ'e-sõnne me gãnna Zifdõma seba n boe Tesaloniki la, sake to'oge Nawënne yetɔga la ba sũure wuu, dee daan karëŋra Nawënne gõɔɔ la daare woo ti ba bise Apoli n yele se'em na de la sira bu la dagi sira. ¹²La ba nërba zozo'e, la Grekidõma* pɔgsɪ n de yv'ure dõma, la buraasi zozo'e sake bo Azezi sira me.

¹³Ti Zifdõma seba n boe Tesaloniki la wõm ti Apoli mooli Nawënne yetɔga Beere, ti ba sënge mi ka dãm nërba la, sa'ase ba la Apoli la Asilaasi. ¹⁴Ti karënbiisi la ënge tɔtɔ boti nërba baseba kɔlge Apoli sënge ko-kãte la nõorum. Dee ti Asilaasi la Atimõti weege Beere. ¹⁵La seba

n kɔlɛ Apolɪ la tarɪ ẽ paagɛ la Atɛnɪ, tɪ Apolɪ soolum ba yetɪ, ba sɔn paagɛ, ba ye le Asulaasɪ la Atimɔtɪ yetɪ, ba wa'am tɔtɔ.

Apolɪ boe Atɛnɪ mɔola Nawɛnnɛ yetɔga

¹⁶La Apolɪ daan boe la Atɛnɪ gu'ura Asulaasɪ la Atimɔtɪ. La a daan yɛ la baga n boe tɛŋa la puam zozo'e, tɪ a sũure sã'am. ¹⁷Tɪ a sɛŋɛ Zifdɔma wɛndeem ka tɔgra la Zifdɔma, la seba n dagɪ Zifdɔma dee pu'usra Nawɛnnɛ, dee tɔgra daare woo la nɛrba n boe da'am. ¹⁸Tɪ bɔŋriba daan bɔna mɪ tɔgra la Apolɪ, baseba dolɪ la A'epikiri zɔsŋɔ, dee tɪ baseba dɔla Astoyisi zɔsŋɔ. Tɪ nɛrba baseba soke yetɪ:

< < Yetɔg-tɔgsa wã boorɪ tɪ a yetɪ bɛm? > > Tɪ baseba yetɪ: < < La ɔn wu a mɔolɪ la wɛn-paalsɪ yelle la. > > Se'ere n soe la, Apolɪ mɔolɪ la Azezi kɔ-yɛlga, la kũm vo'ore yelle. ¹⁹Tɪ ba tarɪ ẽ sɛŋɛ Arewopaazi *f5* zɛ'am ka yetɪ: < < Tɔma boorɪ la tɪ bɔŋɛ zɔsŋɔ paalga seka tɪ fɔn tɔgrɪ la vɔore. ²⁰Fɔn tɔgɛ yel-seba tɪ tɔma wɔm wã de la yel-sãasɪ bɔ tɔma, bela tɪ tɔma bɔɔra tɪ bɔŋɛ a vɔore. > >

²¹Wakate wuu Atɛnɪ dɔma, la nɛr-seba n kɛ'eri bilam na, tɔgrɪ la yel-paala dee selsra yel-paala.

²²Tɪ Apolɪ isge ze'ele Arewopaazi la tɛŋasuka yetɪ: < < Atɛnɪ tɛŋa nɛrba, mam yɛ tɪ ya de la nɛrba n nã'asrɪ baga zozo'e sela woo puam.

²³Mam n gilge ya tɛŋa wã puam na, mam yɛ bɔn-seba tɪ ya ɛŋɛ nã'asra mɛ, la mam yɛ la kãabgɔ bɪmbɪnne zuo tɪ la gulɛ yetɪ:

< Wɛn-seka tɪ tɔma ka mi. > Wɛn-seka tɪ yãma nã'asrɪ dee ka mina ẽ na, tɪ mam mɔolɪ bɔ'ɔra ya. ²⁴Nawɛnnɛ ɛŋa n nãam dũnia la sela wuu n boe ba puam, ɛŋa n soe saazuum la tɛŋa. A ka kɛ'eri deego tɪ nɛrsaalba mɛ puam. ²⁵Sela ka pɔ'ɔgɛ ẽ tɪ a bɔɔra tɪ nɛrsaalba tɔm bɔ ẽ. ɛŋa n bɔ'ɔrɪ sela woo yɔvɔre, la vo'osum, la sela woo. ²⁶A nãam la nɛra aylɪ botɪ nɛrba buuri wuu n boe dũnia zuo ze'ele la ɛŋa zɛ'am.

Ēŋa n make wakat-seba la zē'e-seba ti ba wun bōna. ²⁷A ēŋe bela ti ba ε ē me, ba sān εera babla, tā ti ba wun yē ē. La a ka zāage la ti nēra baa ayula. ²⁸Ēŋa n boti ti bōna, sēna dee tara vōm, wu yāma Atenı so'olum nēba baseba n daan yeti:

< Tōma mẽ de la a kōma. >

²⁹Tōma n de a kōma la, ti da tē'ese ti Nawēnne wōn na bōn-nāanıı ti nērsaalba dıke sālma bu zūuro bu kuga tē'ese māale la nu'usi.

³⁰Nawēnne ka geele wakat-seka ti tōma daan ka mi la. La leeε wā, a bō nōore zē'a woo yeti, nēba wuu teege yem base tōon-be'ero.

³¹Se'ere n soe la, a looge la daare ti a di dūnia nēba sarıya, a dēŋe looge la nēra, ēŋa n wun di nēba la wuu sarıya la sira. A vo'oge nē-ēŋa pa'ale ti la de la sira. > >

³²Ban wōm ti Apolı tōgrı kūm vo'ore yelle la, ti seba la'ara ē, dee ti baseba yeti: < < Tōma wun le selse fu yetōg-bāna la da-se'ere. > >

³³Tı Apolı ze'ele ba zē'am fōrge. ³⁴La nēba baseba daan doose ē me bō Azezi sira. Nēr-seba n daan bō sira la de la Adenisi, ēŋa de la Arewopaazı sarıyaditba nēra ayula, la pōka ayula yu'vre n de Adamarisi, la nēba baseba.

18

Apolı boe Korēntı

¹Bela poorum, Apolı isge Atenı sēŋe la Korēntı. ²Ēn paage bilam na, a yē la Zıfdōma buraa yu'vre n de Akila ti ba dōge ē Pō, ti ēŋa la a pōga Aprisili ze'ele Rom n boe Itali so'olum sēŋe paam, se'ere n soe la, na-keko Akloorı n bō nōore ti Zıfdōma wuu n boe Rom tējam fōrge. Tı Apolı sēŋe ba zē'am. ³La bāma la Apolı tōoma daan de la buyula, ba pe'eri la futo ti ba da'ara fı'ira fuu-deto, bela iyā ti Apolı

kē'era bilam, ti ba lagum tōnna. ⁴La Zifdōma vo'osgo* daare woo Apoli sēnni ba wēndem* me tōgra Nawēnne yetōga bō'ora ba, mōrgra ti a boti Zifdōma, la Grēkidōma* sake Nawēnne yetōga la.

⁵La Asilaasi la Atimōti n daan ze'ele Masedvani paage la, Apoli daan base a tōoma la me, dee mōola Nawēnne yetōga la pa'ala Zifdōma ti Azezi n de Kriisi* ti Nawēnne tōm. ⁶Ti ba si'ise dee tōgra ē tōg-be'ero. Ti a pīsūm a futo pa'ale ti ba ka ēnē sōṅa, dee yele ba yeti: < < Ya sān yē nāmsgō, ya yelle boe la ya mēṅa zuo, la dagi mam yelle. La zīna tēka mam wun sēṅe la seba n dagi Zifdōma la zē'am. > > ⁷Apoli daan yele bela, dee yese me, sēṅe ka kē'era nēra ayula yu'vre n de Atitiyusi-zustusi yire. A de la bu-zāṅka* dee pu'usra Nawēnne, ti a yire lem Zifdōma wēndeego la. ⁸La Akrispusi n de wēndeego la nēṅadāana, la a yir-dōma wuu daan bō Zuudāana Azezi sura me. La Korēnti nērba zozo'e n daan selsri kō-yēlga la, mē bō sura me, ti ba mise ba ko'om* puam.

⁹Ti daare ayula yu'vṅō, ti Apoli yē wu zāasṅō la, ti Zuudāana yele ē yeti: < < Da zoe dabeem sīna, ken tōgra, ¹⁰ti mam boe la fu me, nēra nēra kān tā'age ēṅe fu be'em. Se'ere n soe la, tēṅa wā puam nērba zozo'e de la mam nērba. > > ¹¹Apoli zī'ire bilam na yuune la wōr-siyoobi zāsna nērba Nawēnne yetōga.

¹²La wakat-seka ti Agaliyō daan de Akayi*f7* so'olum gōmna la, Zifdōma daan isge naage la taaba dōre Apoli tari ē sēṅe sarṅyadia zē'am, ¹³ka yeti: < < Ēna wā n mōrgru nērba ti ba pu'vse Nawēnne se'em na si'isri la tōma lō. > > ¹⁴Ti Apoli daan bōna mī ti a tōge, ti Agaliyō yele Zifdōma la yeti: < < La sān de ni na sela n ka mase bu tōon-be'ero ti a ēṅe, mam wun mōrge selse yāma Zifdōma. ¹⁵La, la sān dena ya wē'eri la nōke'ene la yetōga, la yu'bra, la ya mēṅa lō yela, ya mēṅa bise bōn-bāma yelle. Ti mam kān di bōn-ēṅa

sarıya. > > ¹⁶A yele bela, dee dige ba sarıya zē'am na me ti ba yese.
¹⁷Tı ba wuu yōke Asostenı n de Zıfdōma wēndeego nējadāana wē ē sarıyadia la zē'am. La Agaliyō toogo ka boe la ban ēne se'em na.

Apolı lebe Antıyosı n boe Siiri

¹⁸La Apolı ken zı'ire Korēntı la dabsa zozo'e la karēnbiisi* la le, dee keese ba ti ba sēne Siiri. Tı Aprisili la Akila doose ē. La ban daan paage Sānkre la, Apolı dēne siige la a zuugo, se'ere n soe la, a bıne la nōore la Nawēnne. Dee ti ba yāna kē ōorıo sēne ¹⁹ka paage Efēezi, ti Apolı base Aprisili la Akila bilam. A sēne ka kē la Zıfdōma wēndeem tōge la ba. ²⁰Tı ba sose ē yetı, a weege ba zē'am yuuge. Tı a zagse, ²¹dee keese ba yetı: < < Nawēnne sān sake, m wun leme ya zē'am. > >

La a daan kē la ōorıo Efēezi, ²²sēne Sezaare ka sige bilam, sēne Zerizalem ka pu'use Azezi nēr-seba n boe bilam na, dee sēne Antıyosı. ²³La a yuuge bilam me fēe, dee yese e Galatı la Frizi pa'ase karēnbiisi la wuu pāna.

Apolosı boe Efēezi la Korēntı tēnsım

²⁴La Zıfu buraa yu'vre n de Apolosı ti ba dōge ē Alegsāndri n wa'am Efēezi, a de la tōg-mita dee mina Nawēnne gōıo sōna. ²⁵Ba daan pa'ale ē Zuudāana Azezi sore yela me, ti a daan zāsna nērba so-ēna yela sōna la a sūure wuu. La a daan mi la Azā ko'om* misga la mǎ'a. ²⁶Tı a daan tōgra Zıfdōma wēndeem la buraane. La Aprisili la Akila n wōm ēn tōgrı la, ti ba tarı ē sēne ka pa'ale ē Nawēnne sore la yela sōna pa'ase.

²⁷Tı a bōra ti a sēne Akayi, ti Azezi karēnbi-seba n boe Efēezi la gulse gōıo bō Azezi karēnbiisi la n boe Akayi la yetı, ba to'oge ē sōna. La ēn paage bilam na, a sōne seba ti Nawēnne daan bō ba a yel-

sōnne ti ba bə ē sira la mε zozo'e. ²⁸La a daan dıke la Nawēnne gōŋɔ tɔge yāŋe Zifdōma nērba wuu nēŋam, pa'ale ba ti Azezi de la Krisi* ti Nawēnne tōm.

19

Apolı boe Efεezi

¹La Apolısi n daan nān boe Korēntı la, Apolı doose la tānsı zuo tēnsı la wuu puam tole, sēŋe ka paage Efεezi yē karēnbiisi* baseba bilam, ²soke ba yetı: <<Yāma n bə Azezi sira la, yāma to'oge Nawēnne Sia mε bu?>> Tı ba lerge yetı: <<Ayı, tōma nān ka wōm ti Nawēnne Sia boe.>> ³Tı Apolı soke ba yetı: <<Ko'om* misga kāna ti yāma to'oge?>> Tı ba lerge yetı: <<Tōma to'oge la Azā ko'om misga.>> ⁴Tı Apolı yele ba yetı: <<Azā daan misri nērba ko'om puam pa'ala ti ba teege la yem base tōon-be'ero. A daan yetı nērba la, ti nēra n weege ēŋa poorum sēna, ba doose ēŋa. Nēr-ēŋa de la Azezi.>> ⁵La ban wōm bela la, ba botı ba mise ba ko'om puam mε Zuudāana Azezi yu'ure iyā. ⁶Tı Apolı dıke a nu'usi pagle ba zuto, ti Nawēnne Sia wa'am ba zuo, ti ba tɔgra yetɔg-zāŋsı dee to'oge Nawēnne yetɔga tɔge bə nērba. ⁷Ba daan de wu nērba pia la ayı.

⁸Apolı daan kē Efεezi la wōr-sıtā, daan kē'era Zifdōma wēndeem mōola Nawēnne yetɔga la buraane bə'ora nērba, dee mōrge pa'ale ba Nawēnne so'olum* yela ti ba sake. ⁹Tı baseba daan ke'em ba sūure ka sake, dee tɔgra Zuudāana sore la tɔg-be'ero nērba nēŋam. Tı Apolı base ba dee welge karēnbiisi la fōrge. Tı daare woo ti a zāsna ba Atiranusi karēndeego puam. ¹⁰A ēŋe bela la yuuma ayı. La nēr-seba wuu n boe Azi* tēnsım na wōm Zuudāana yetɔga mε, Zifdōma, la bu-zāŋsı* wuu.

Aseeva dayɔɔsi yelle

¹¹La Nawēnne daan base ti Apolɪ tōm na tōon-yālm-kāra. ¹²La ba daan sãn ěn dɪke ānkɪra bu futo n kalum a ĩyã tarɪ sēŋe ka kalum bā'adōma, ba yēti ĩmā'asum mɛ, ti kulkā'arsɪ yesra dee basra ba.

¹³Tɪ Zifdōma baseba n daan gilgri digra kulkā'arsɪ nērba zē'am, daan make ti ba dige kulkā'arsɪ la Zuudāana Azezi yu'ure, yele ba yeti:

< < Mam yeti ya la Azezi sɛka ti Apolɪ mōolɪ la yu'ure ti ya yese. > >

¹⁴Ba daan de la Aseeva n de Zifdōma kāabgɔ kēma nēŋadāana dayɔɔsi bayopɔɪ n utɪ bɛla. ¹⁵Tɪ kulkā'arga lerge ba yeti: < < Mam mi Azezi mɛ, dee mina Apolɪ n de sɛka, la yāma de la āndōma? > > ¹⁶Tɪ kulkā'arga la n tarɪ sɛka la isge zebɛ ba la pãŋa yãŋe ba wuu, ti ba ze'ele yire la zoe yese bɛɛla la pɔglɔŋɔ.

¹⁷Tɪ Zifdōma, la bu-zãŋsɪ la wuu n boe Efɛɛzɪ la wōm yel-ēna wã. Tɪ dabeem kē ba wuu, ti ba pēgra Zuudāana Azezi yu'ure. ¹⁸Tɪ nērba zozo'e bɔ Azezi sɪra wa'am wa pelge ba pua tɔge ba tōon-be'ero nērba nēŋam. ¹⁹Tɪ ba zozo'e n tarɪ ba gōnnɔ tōnna tum tōoma la, lagse ba yō la bugum nērba la wuu nifum. Tɪ ba geele gōnnɔ na wuu ligri, ti ba de la lig-kōba tɔspinuu. ²⁰La Zuudāana n pa'ale a pãŋa bɛla la, ti a yetɔga la saara zē'a wuu dee yēta pãŋa.

Efɛɛzɪ dōma dāmŋɔ yelle

²¹Bela poorum ti Apolɪ tē'esɛ a sūurum yeti, ēŋa wun sēŋe la Masedvanɪ, la Akayi ka ze'ele bilam sēŋe Zerizalem, dee yeti:

< < Mam sãn paage bɔna Zerizalem, dēnɪ ti mam paage Rom. > >

²²La a tōm na Atimōti, la A'erastɪ n de a sōŋrɪba ti ba sēŋe Masedvanɪ, dee weege a mēŋa Azi* yuuge fēe.

²³La wakat-ēŋa dāmŋɔ zozo'e n isge Efɛɛzɪ Zuudāana Azezi sore la doosgo yelle. ²⁴La buraa n daan de kuta, ti a yu'ure dena Ademetrisi.

A daan tarı la zūuro kuta bōndōma tı ba wōna la ba wēnne Artemisi deego la. Tı zūuro tōntōnıba la daan yē yōoro zozo'e tōon-ēņa puam. ²⁵Tı Ademetrisi lagse ba, la seba wuu n tōnnı tōon-ēņa buuri, yele ba yetı: < < Buraastı wā, ya mi tı tōon-ēna wā puam tı tı yetı bōntarsōm. ²⁶Ya mēņa wōm dee yē Apolı n ttı se'em. A pa'alı nērba tı wēn-seba tı nērsaalba ēņe la ba mēņa nu'usi la dagı wēna sıra sıra. A ēņe bela mōrge teege nērba zozo'e putē'era me Efēezi kalam, la, la dee la fēe tı a paage Azi tēnstı wā wuu puam. ²⁷Bōn-ēna wun botı tōma tōone na sā'am me. La sela n pa'ase, wēn-kāte Artemisi deego la wun lebge la zāņa, la Artemisi mēņa tı Azi nērba, la dūnia nērba wuu nā'asrı la, pāņa wun sā'am me. > >

²⁸La ban wōm yetog-bāna la, ba sūa yīige me tı ba fıı tōge yetı: < < Efēezi dōma wēnne Artemisi n tarı pāņa. > > ²⁹Tı tēņa la wuu dāme. Tı nērba la yōke Agayusi la Aristarkı tarı ba zoe sēņe lagsgo zē'am, bāma bayi de la Masedvanı nērba n dolı Apolı. ³⁰Tı Apolı bōra tı a kē nēr-kuvuņo la zē'am, tı karēnbiisi la ka sake. ³¹Tı Azi tēņa nējadōma baseba n de a surdōma tōm nērba yetı, ba wa'am a zē'am wa belem ē yetı, a da sēņe lagsgo zē'am na. ³²Tı nēr-kuvuņo la lagım vōla zozo'e, tı nēra woo togra ēņa n tē'ese se'em, tı ba zozo'e ka mina bōn-seka n botı ba lagse. ³³Tı Zifdōma looge Alegsāndrı tı a sēņe nērba la nēņam ka tōge, tı nērba la baseba pa'ale ē yelle la vōore. Tı Alegsāndrı yıbse la nu'usi tı a tōge yelle la pa'ale nērba la. ³⁴La ban bāņe tı a de la Zifu la, tı ba wuu lagım taaba fıı kaase yetı: < < Efēezi dōma wēnne Artemisi n tarı pāņa. > > Ba kaase bela paage karf-ayi.

³⁵Tı tēņa la gōn-gulsa botı ba go'oge, tı a yele ba yetı: < < Efēezi nērba, dūnia nērba wuu mi me tı wēn-kāte Artemisi pu'usgo deego la boe la Efēezi kalam, la tōma n de a pu'usgo deego la gu'urba, la kugre

la n wōn na Artemisi ze'ele saazuum lui la gu'urba. ³⁶Nēra nēra kān yāņe sɪ'ɪsɛ yel-ēna. Bɛla ɪyā, go'oge-ya voole, da lɔgɛ-ya ēņe sɛla n ka masɛ. ³⁷Yan tarɪ nēr-bāna wa'am kalam wā, ba ka yeke tɪ wēnne na yel-be'ego, la ba ka kē a pu'vsgɔ deem na ēņe sɛla n de be'em. ³⁸La Ademetrisi la a tōntōnɪba la sān tara yelle la nēr-sɛka, sariyadia daare boe mɛ, la sariyaditba mē boe mɛ. A sān bɔɔra, a tarɪ ba sēņe bilam ka sām. ³⁹La ya sān yē la yel-sɛka tɪ ya bɔɔra tɪ ya malgɛ, tēņa la nērba lagsgɔ daare, tɪ won malgɛ. ⁴⁰Yāma n ēņe sɛla zina wā won wa'am na yelle, tɪ ba won dōre tɪ yetɪ, tɪ gire la tēņa. La tɪ kān yāņe pa'ale sɛla n botɪ tɪ lagsɛ gire girga la. La tɪ kān yāņe tɔgɛ la vōore sōņa. > > ⁴¹Ēņa n yeke bɛla kɪ'ulum na, dee yeke ba tɪ ba wurgɛ.

20

Apolɪ sēņe Masedvani

¹Lan daan gire mā'agɛ la poorum, tɪ Apolɪ botɪ Azezi karēnbiisi la lagsɛ, tɪ a tɔgɛ bɔ ba buraane, keese ba dee we'esa Masedvani. ²La ēn daan dolɪ so'olum ēņa tēn-sɛba pvam tolla la, a tɔgɛ yetɔga zozo'e mɛ bɔ karēnbiisi la buraane. Dee yāņa tole ka paage Gresi*f8*. ³La ēn paage bilam na, a zɪ'ire mɪ na wōr-sitā, māasum tɪ a kē ōorņɔ sēņe Siiri, wōm tɪ Zifdōma dolɪ la a nāma. Tɪ a tē'esɛ yetɪ, ēņa won lebe doose la Masedvani.

⁴Sɛba n daan dolɪ ē na de la: Apirusi bia Asopatɛɛrɪ n ze'ele Beere, la Aristarkɪ la Asekōndusi n ze'ele Tesaloniki, la Agayusi n ze'ele Derbɪ, la Atisiki la Atrofim n ze'ele Azi*, pa'ase la Atimōtɪ. ⁵Nēr-bāna wā daan dēņe tole la nēņa ka gu'ura tōma Trvasɪ. Dee tɪ tōma sēņe Filipi tēņam. ⁶La borborɪ n ka tarɪ dābulle kibsa la poorum, tɪ tōma kē ōorņɔ Filipi, tɪ dabsa anuu daare tɪ tōma paage sɛba n boe Trvasɪ

gu'ura tōma la zē'am, zī'ire bilam dabsa ayopɔ.

Apoli boe Trvasi

⁷La vo'osgo daare ayula yu'vɔɔ, ti tōma lagsɛ ti ti di, dee fiise borborɪ. Tɪ Apoli daan isge tɔgra Nawēnne yetɔga la nērba la halɪ ka paage sōnsua, se'ere n soe la, a boorɪ ti beere sān wiige, a fōrgɛ mɛ.

⁸La fitladōma zozo'e n daan boe saazuum deto batā dāana la ti tōma lagsɛ a puam na. ⁹Tɪ budib-polle yu'vɔɔ n de A'etikusi zēa deego la takolle zuo. La Apoli n tɔge yuuge la, ti gēem yōkɛ ē, ti a gīse. La a gīse la gē-bergo ze'ele saazuum deego la ti tōma boe mī na lui tēɲa. Tɪ ba zēkɛ ē, ti a ki mɛ.

¹⁰Tɪ Apoli sige yigle ōbge ē zāla a nu'usum, dee yetɪ: < <Da fabla-ya, a vɔa mɛ. > > ¹¹A yeke bɛla dee lebe zom ka fiise la borborɪ obe, dee tɔge la ba yuuge halɪ ka paage bewiine, dee yāɲa fōrgɛ. ¹²La budibla la vɔa mɛ, ti ba tarɪ ē kule. Tɪ la ēɲe nērba la sūure yēlum halɪ zozo'e.

Apoli sēɲe Miletɪ

¹³La tōma kē la ōorɲɔ dēɲe Apoli sēɲe Asɔsɪ, a daan yetɪ a sēɲe la nāma wa yake tōma bilam. ¹⁴La ēn yake tōma Asɔsɪ la, a kē la ōorɲɔ, ti tōma sēɲe Mitilɛnɪ. ¹⁵La tōma ze'ele la bilam doose ko'om na puam, ti beere wiige, ti tōma paage Kiyɔ zanō-bɔba. Tɪ beere le wiige, ti tōma doose Samōsɪ. Tɪ beere le wiige, ti tōma paage Miletɪ. ¹⁶La Apoli daan looge yɛm ti a ka gōlge sēɲe la Efɛɛzɪ, se'ere n soe la, a daan ka boorɪ ti a gu'um a mēɲa Azi* so'olum na puam, a daan kāblɪ mɛ ti a paage Zerizalem dee ti Pāntekɔtɪ* daare la paage.

Apoli tɔge bɔ Efɛɛzɪ kēma

¹⁷Tɪ Apoli ze'ele Miletɪ soolum Efɛɛzɪ yetɪ, ba wi Azezi nēr-kuvɔɔ la

kēma ti ba wa'am. ¹⁸La ban paage a zē'am na, a yeke ba yeti:
 < < Yāma mi mam daan ān se'em, wakat-seka wuu ti mam daan boe
 la yāma la me, lan pī'ilum na daar-seka ti mam wa'am Azi so'olum
 puam na. ¹⁹Mam sike m mēṅa me tōm Nawēnne tōoma la nintām,
 baa nāmsgo seka ti mam yē Zifdōma n doli mam nāma la puam.
²⁰Mam mōole bōn-seba n wun sōṅe ya me pa'ale ya nērba sukam la ya
 yiε puam, ka suge sela sela. ²¹Mam tōge pa'ale Zifdōma, la bu-zāṅsi
 me yeti, ba teege yem base tōon-be'ero, sake doose Nawēnne, dee bo
 ti Zuudāana Azezi sira. ²²La lēele wā, mam sake Nawēnne Sia* nōore
 me yeti m sēṅe Zerizalem, la mam ka mi bōn-seka n wun ka ēṅe mam
 mī. ²³La mam n mi se'em na, Nawēnne Sia pa'ale mam me tēn-seba
 wuu puam ti mam sēṅe la, ti ba wun nāmse mam me dee kē'ese mam
 yu'a deem. ²⁴La mam ka geele m mēṅa yōvore la ti a tarti yōoro bo
 mam, sela n tarti yōoro bo mam de la mam yāṅe tōm m tōone na ti
 Zuudāana Azezi bo mam na ba'ase. Tōon-ēṅa de la mam mōole
 Nawēnne yel-sōnne na kō-yēlga.
²⁵La lēele wā, mam mi ti ya kān le yē mam, yāma seba wuu ti mam
 mōole Nawēnne so'olum* yela ya zē'am na. ²⁶Bela iyā mam yeti ya
 me zina, ti ya nēr-seka sān koṅe vom Nawēnne zē'am, a taale ka boe
 mam zuo. ²⁷Se'ere n soe la, mam mōole Nawēnne n boori se'em na
 wuu bo ya me, ka suge sela sela. ²⁸Tara-ya ya mēṅa, la nēr-seba wuu
 ti Nawēnne Sia gu'ule ya la sōṅa. Bisra-ya Nawēnne nērba la ti a
 fāage la a Bia zum ti ba dena a mēṅa nērba la sōṅa. ²⁹Mam mi ti
 mam sān fōrge deege, nēr-be'esi n wun wa'am ya zē'am wa sā'am ya,
 wu saasaadōma n yōgru dūnsi se'em na. ³⁰La nērba baseba wun wa
 isge ya puam tōgra pōmporṅo yetoga, pā'ase karēnbiisi* la ti ba doose
 ba. ³¹Bela iyā, guuse-ya ya mēṅa, dee tēra ti yuuma atā, mam kā'an
 ya nēra woo wunteṅa la yu'ṅo me, la nintām ka base.

³²La læle wā, mam dıke ya ēŋe la Nawēnne nu'usum, la a yel-sōnne yetɔga la puam. Eŋa n tã wun sōŋe ya tı ya yē pāŋa pa'ase, dee wun botı ya po lagum to'oge bōn-sōma tı a bıŋe tı a bɔ a nērba la. ³³Mam daan ka tarı yemleego la nēra nēra ligri, la a sālma, bu a futo. ³⁴Ya mēŋa mi tı mam dıke la m nu'usi tōm bıse m mēŋa la seba n doli mam na. ³⁵Mam ēŋe bela wuu pa'ale ya tı dēnı ya tōm sōŋe tarımdōma. La ya tēra Zuudāana Azezi n yele se'em na, a daan yetı: < Seka n bɔ'ɔrı tarı sū-yēlga zozo'e gānna seka n to'orı. > > >

³⁶La Apolı n daan tɔge kılım na, ēŋa la ba wuu ka la dūma tēŋa, tı a pu'use Nawēnne. ³⁷Tı ba wuu tıi kella, dee kɔke Apolı mōbge ē. ³⁸Ba sūure n daan sã'am zozo'e, ēn yetı ba kãn le yē ē na iyã. La ba kɔlge ē me sēŋe ka paage ðorŋɔ la zē'am.

21

Apolı we'estı Zerizalem

¹Tı tōma keese ba, dee kē ðorŋɔ sēŋe tēntēa ka paage Kɔsi. Tı beere wiige, tı tōma paage Rɔdı ze'ele bilam sēŋe Patara. ²La bilam tı tōma yē ðorŋɔ ayēma n we Fenisi. Tı tōma kē sēŋe. ³La tōma daan sēŋe me ka tūule yēta Sipri, la tōma daan base Sipri tēŋa la gɔbga bɔba, dee tole ka paage Siiri so'olum sige Tiiri. Bilam tı ba yetı ba sike ðorŋɔ la lɔgrɔ.

⁴Tı tōma sige sēŋe ka yē Azezi karēnbiisi bilam, zı'ire la ba le dabsa ayopɔı. Tı ba yele Apolı la Nawēnne Sia pāŋa yetı, a da sēŋe Zerizalem. ⁵La dabsa ayopɔı la daare, tı tōma isge tı tı tole, tı bāma la ba pɔgba, la ba kɔma wuu kɔlge tōma yese tēŋa la kēnkernja. Tı tōma wuu ka dūma ko-kāte la nōorum pu'use Nawēnne, ⁶dee keese taaba. Tı tōma yāŋa kē ðorŋɔ, dee tı ba lebe kulla.

⁷La tōma ze'ele Tiiri sēŋe la Toleması ka pu'vse Azezi karēnbi-seba n boe bilam na, dee ēŋe daare ayula ba zē'am. ⁸Tı beere wiige, ti tōma ze'ele bilam sēŋe Sezaare ka sige Afilipi yire kē'era bilam. Afilipi daan de la nērba bayopɔ la ti ba daan looge Zerizalem na nēra ayula*f9*, a daan mōoli la Azezi kō-yēlga. ⁹A daan tari la pɔyɔɔsı banaası n ka mi buraası, ba daan to'osrı la Nawēnne yetɔga tɔgra bɔ'ɔra nērba.

¹⁰Tōma daan ēŋe bilam na dabsa faa, ti Nawēnne nōtɔ'ɔsa yu'vre n de Agabisi ze'ele Zude wa'am, ¹¹wa paam tōma zē'am wa fooge Apolı sagānne lu a mēŋa nāma la a nu'usi, dee yetı: < <Nawēnne Sia yele la wāna yetı: < Zifdōma wun lu sagān-ēna wā dāana la wāna Zerizalem, dıke ē ēŋe bu-zāŋsı* nu'usum. > > > ¹²La tōma n wōm bela la, ti tōma la nēr-seba n boe bilam na, daan belna Apolı yetı, a da sēŋe Zerizalem. ¹³Tı a lerge tōma yetı: < <Bēm ti ya kaasrı sā'ana m sūure? Mam sake me ti ba lu ma, la dagı bela mā'a, baa mam sān wun ki Zerizalem Zuudāana Azezi yu'vre ĩyā, mam ken sake me. > > ¹⁴La tōma n kān yāŋe botı a sake bɔ tōma la ĩyā, ti tōma koŋe yele ē yetı: < <Zuudāana n boorı se'em ēŋe. > >

¹⁵Bela poorum ti tōma daan yāŋa māasum we'esa Zerizalem. ¹⁶Tı Sezaare tēŋa karēnbiisi baseba kɔlge tōma sēŋe Aminasō yire, bilam ti tōma wun ka gā'are. Aminasō de la Sipri nēra, a de la Azezi karēnbıa halı kurum kurum.

Apolı sōse la kēma Azakı yire

¹⁷La tōma n paage Zerizalem na, ti sɔbiisi la to'oge tōma la sū-yēlga. ¹⁸Tı beere wiige, ti tōma doose Apolı sēŋe Azakı yire. Tı Azezi nēr-kuvŋɔ kēma la wuu wa'am mĩ. ¹⁹Tı Apolı pu'vse ba, dee tɔge pa'ale ba bōn-seba wuu ti Nawēnne ēŋe bu-zāŋsı* la tēŋasuka ēŋa tōone na

puam. ²⁰La ban wōm bela la, ba pēge Nawēnne me, dee yeke Apoli yeti: < < Tɪ sɔbia, fōn yē Zifdōma tusa tusa n bɔ Azezi sira se'em dee mōrge sakra Amoyisi* lɔɔ sōŋa sōŋa. ²¹Ba wōm tɪ ba yeti, fōn zāsni Zifdōma sēba wuu n boe bu-zāŋsi tēnsu na, yeti tɪ ba base Amoyisi lɔɔ*, la ba da wāta* ba kɔma, la ba da dɔla Zifdōma dɔgmike. ²²Ba wun wōm tɪ fōn wa'am me, tɪ wun ēŋe la wāne? ²³Ŋe tōma n wun yeti fu ēŋe se'em na. Nērba banaasi n boe tōma zē'am kalam bīŋe nōore la Nawēnne. ²⁴Tari ba sēŋe ka lagum na ba malge fu mēŋa Nawēnne zē'am, dee yɔ, ba wun yɔ se'em na bɔ ba tɪ ba siige ba zuto. Bela wun boti nērba wuu bāŋe tɪ fōn mēŋa doli la Amoyisi lɔɔ la, la ban tɔge fu yelle se'em na wuu dagi sira. ²⁵La sān dena bu-zāŋsi la n bɔ Azezi sira la yelle, tōma daan looge yem gulse gōŋɔ yeke ba yeti: < Ba da dita di-sēba tɪ ba kāabe bɔ бага, la ba da di zum, la ba da di sēla tɪ ba tēge ku. La ba da tōnna yalsi tōoma. > > >

²⁶Ban yeke bela la, tɪ beere wiige, tɪ Apoli tari nērba banaasi la sēŋe tɪ ba ka lagum malge ba mēŋa Nawēnne zē'am, dee tɪ a sēŋe ka kē Wēnde-kātum* na, tɔge pa'ale dabsa se'em n deege tɪ ba wun malge ba mēŋa ki'ulum, dee tɪ ba yāŋa kāabe* bɔ Nawēnne nēra woo iyā.

Ba yōke Apoli Wēnde-kātum

²⁷La dabsa ayopɔi la n dee fēe la a ba'ase la, tɪ Zifdōma ze'ele Azi* so'olum wa'am wa yē Apoli Wēnde-kātum na, boti nērba la sūnsōa yīige la Apoli, tɪ ba yōke ē, ²⁸dee tīi tɔgra yeti: < < Israyeli* dōma, sōŋe-ya tɔ! Bura-ēna wā gilgri la tēnsi wuu zāsna nērba tɪ ba sɪ'isra Israyeli dōma ka dɔla Amoyisi lɔɔ, dee tɔgra Wēnde-kāte la tɔg-be'ero. A tari la nērba n dagi Zifdōma wa'am wa kē Wēnde-kāte la puam dēge Nawēnne zē'e-sōŋɔ* la. > > ²⁹Se'ere n soe la, ba daan yē la Efēzi nēra Atrofim n doli Apoli tēŋa la puam, tɪ ba tē'esɛ tɪ a

doose ẽ kẽ la Wẽnde-kãte la pvam. ³⁰Ti tẽɲa la daan gire, ti nẽrba wuu zoe lagse taaba yõke Apoli ve'lege ẽ Wẽnde-kãtum na yese. Dee yu zanõa la tɔtɔ.

³¹Ti ba daan zıgra ti ba ku Apoli. Ti Rom sudaasi ke'endõma ke'ema wõm ti Zerizalem tẽɲa wuu gire me. ³²Ti a kɔ'ɔn doose sudaasi, la ba ke'endõma ti ba zoe sẽɲe nẽrba la zẽ'am. La ban yẽ sudaasi ke'endõma ke'ema, la sudaasi la, ti ba base ka le wẽ'era Apoli. ³³Ti sudaasi ke'endõma ke'ema la paage yõke Apoli, dee bɔ sudaasi la nõore yeti, ba ba ẽ na bãnsi bayi. Dee ti a soke bãɲe ẽn de nẽr-sẽka, la ẽɲa n ẽɲe sela. ³⁴Ti nẽr-kuvɔɲɔ la tãsra yẽma yẽma, halı tii vɔɔla ti sudaasi ke'endõma ke'ema la ka tã'age wõm sela n ẽɲe, ti a bɔ sudaasi la nõore yeti, ba tari ẽ sẽɲe bãma yi-kãte la pvam. ³⁵La ban tari ẽ paage bĩmbĩna la n zonnı kẽ'era deego la pvam na, ba buke ẽ me, nẽrba la n ba gita la ãyã. ³⁶Ti ba wuu dɔla tɔgra ke'enke'em yeti:
< <Ku-ya ẽ.> >

Apoli tɔge ti a to'oge a mẽɲa

(Tõoma 9:1-19, 26:9-18)

³⁷La ban yeti ba kẽ'ese Apoli sudaasi la yire la, ti Apoli soke suda-ke'ema la yeti: < <Mam tari nõore ti m yeke fu sela me bu?> > Ti ke'ema la soke ẽ yeti: < <Fõn wõnnı Grẽki* yetɔga me? ³⁸Bela fõn dagı Ezipti* nẽr-sẽka n daan sa'ase nẽrba la gɔmna, dee daan doose nẽr-kuvɔrba tusanaasi sẽɲe weem na?> > ³⁹Ti Apoli lerge ẽ yeti:
< <Ayɛi, mam de la Zifu, mam ze'ele la Tarsı n boe Silisi so'olum. Mam de la tẽn-ẽɲa n tari yõorɔ la nẽra. Mam sosrı fu me, bɔ mam sore ti m tɔge la nẽrba la.> > ⁴⁰Ti ke'ema la bɔ ẽ nõore. Ti Apoli ze'ele bĩmbĩna la zuo zẽke a nu'ugo. Ti nẽrba la ãna sım. Ti a tɔge Ebre n de ba mẽɲa yetɔga bɔ ba.

22

¹A yele ba yeti: < < M sɔdōma la m sɔbiisi, selse-ya mam n yeti m tɔge se'em to'oge m mēŋa ya nēŋam. > >

²Ban wōm ti a tɔgrɪ la Ebre yetɔga bɔ'ɔra ba la, ti ba go'oge malɪn selsra ē. Tɪ a yeti: ³< < Mam de la Zifu, ba dɔge mam na Tarsɪ n boe Silisi so'olum puam na, uge mam Zerizalem kalam. Tɪ Agamaliyelɪ zāsɔm mam ti yaabdōma lɔɔ la sōŋa sōŋa. Mam daan wɪsge m mēŋa mɛ la Nawēnne tōone, wu yāma n wɪsge ya mēŋa se'em zīna wā. ⁴La mam daan nāmse seba n dolɪ Azezi sore la mɛ zozo'e, yōge buraasi la pɔgsɪ botɪ ba kē'esɛ ba yu'a deem, dee ku baseba. ⁵Nawēnne kāabgɔ* kēma nēŋadāana, la kēma la wuu n tā wun yeti, mam n tɔge se'em na de la sira. Mam daan to'oge gōnnɔ mɛ ba zē'am wɛ'esa ti m ka bɔ Zifdōma seba n boe Damaasi la, dee yōge so-ēŋa karēnbiisi la n boe mī na, tari ba sēŋe Zerizalem ka nāmse ba.

⁶La mam daan boe la sore wɛ'esa ka lem Damaasi, la daan mase wu wuntɛɛŋa wēnne zuu-tēŋasɔka, ti peelem daan ze'ele saazuum dare wa nēege zozo'e gilge mam. ⁷Tɪ mam lui tēŋa, wōm kōa n yele mam yeti: < Asolɪ, Asolɪ, bēm ti fu nāmsra mam? > ⁸Tɪ mam lerge yeti: < Zuudāana, fōn de la āne? > Tɪ a lerge mam yeti: < Mam de la Azezi n de Nazareti nēra la ti fu nāmsrɪ. > ⁹Tɪ nēr-seba n daan dolɪ mam na yē peelem na, dee ka wōm kōa la n tɔgrɪ la mam na. ¹⁰Tɪ mam soke yeti: < Zuudāana, fōn yeti m ēŋe la wāne? > Tɪ Zuudāana la yele mam yeti: < Isge sēŋe Damaasi, ti ba wun ka yele fo sɛla wuu ti Nawēnne bɔ nōore yeti fu ēŋe. > ¹¹La peelem na yālge mam nini mɛ ti mam ka yēta. Tɪ seba n daan dolɪ mam na ve'ege mam ti tōma sēŋe Damaasi.

¹²La buraan daan boe mī ti a yu'ure dena Ananiyasi. A daan sakrɪ la

Nawēnne lɔɔ sōŋa sōŋa, tɪ Zifdōma seba n boe Damaasi la wuu tɔgra a yelle sōŋa. ¹³Tɪ a wa'am wa ze'ele lem mam zē'a yeke mam yeti: <M sɔbia Asoli, le yēta. > Tɪ mam nini le yēta wakat-ēŋa mēŋa, tɪ mam yē ē. ¹⁴Tɪ a yeke mam yeti: <Nawēnne tɪ tōma yaabdōma yuun pu'usrɪ la n looge fo tɪ fu bāŋɛ ēn boori se'em, la fu yē sɪra dāana la, dee tɪ a tɔge la a mēŋa nōore bɔ fo, ¹⁵tɪ fu wun dena a kaset-dāana yeke nērba wuu, fōn yē dee wōm se'em na. ¹⁶La lɛɛɛ wā, bēm tɪ fōn gu'una? Isge pu'use la Azezi yu'ure, botɪ ba mise fu ko'om puam tɪ Nawēnne base fu tōon-be'ero taale. >

¹⁷La bela poorum mam daan lebe la Zerizalem ka bɔna Wēnde-kāte la puam pu'usra, yē Zuudāana wu zāasŋɔ la, ¹⁸tɪ a yeke mam yeti: <Ēŋɛ tɔtɔ yese Zerizalem, se'ere n soe la, tēŋa la nērba kān sake fōn wun tɔge mam yelle bɔ ba la. > ¹⁹Tɪ mam lerge ē yeti: <M Zuudāana, nērba wā mi me tɪ mam n daan sēnnɪ ba wēndeto puam yōgra nēr-seba n bɔ fōn sɪra la, botɪ ba wē'era ba, dee kē'esra ba yu'a deto puam. ²⁰La wakat-sɛka tɪ ba daan ku A'etiɛnɪ n tɔge fōn yela bɔ nērba la, mam daan boe mɪ me sake tɪ a kūm na mase me, dee daan gu'ura seba n ku ē na futo. > ²¹Tɪ Zuudāana la yeke mam yeti: <Sēŋɛ, mam yeti m tōm fu la bu-zāŋsi* zē'am zāazāare. > > >

²²La nērba la daan selsrɪ Apoli yetɔga la me, la ēn wa tɔge bu-zāŋsi yelle la, tɪ ba tɔgra ke'enke'em yeti: <<Ku-ya ē, nēr-ēna ka narɪ a bɔna dūnia zuo. > > ²³Tɪ ba kaasra tagursi yeɛsra ba futo lɔbra, dee vaara tēntōnno lɔbra saazuum.

²⁴Tɪ sudaasi ke'endōma ke'ema la bɔ sudaasi la nōore yeti, ba botɪ Apoli kē bāma yi-kāte la puam tɪ ba wē ē na ka'asa, dee soke ē bāŋɛ, bēm n soe tɪ ba tɪi kaasra ēŋa iyā bela. ²⁵Tɪ ba lu ē yeti ba wē ē na ka'asa, tɪ a soke suda-ke'ema la n ze mɪ na yeti: <<Sore boe tɪ ba wē Rom tēŋa nu'ugo nēra dee nān ka di a sarɪya? > > ²⁶La suda-ke'ema

la n wōm bela la, tɪ a sēŋe sudaasi ke'endōma ke'ema la zē'am ka soke
ē yeti: < <Fu wun ēŋe la wāne? Bura wā de la Rom tēŋa nu'ugo
nēra. > >

²⁷Tɪ sudaasi la ke'endōma ke'ema la sēŋe Apolɪ zē'am ka soke ē yeti:
< <Yele ma: Fōn sɪrɪ de la Rom tēŋa nu'ugo nēra? > > Tɪ a lerge
yeti: < <Ee! > > ²⁸Tɪ sudaasi ke'endōma ke'ema la yeti: < <Mam
mēŋa yɔ la ligri zozo'e dee lebge Rom tēŋa nu'ugo nēra. > > Tɪ Apolɪ
yeti: < <Ba kɔ'ɔn dɔge mam tɪ mam dena la Rom tēŋa nu'ugo
nēra. > > ²⁹Tɪ seba n yeti ba wē ē na ka'asa la vuta lebra poorum. Tɪ
dabeem yōke sudaasi ke'endōma ke'ema la, ēŋa n bāŋe tɪ Apolɪ de la
Rom tēŋa nu'ugo nēra dee tɪ ēŋa botɪ ba ba ē na bānsɪ la iyā.

Apolɪ ze Zifdōma kēma nēŋam

³⁰La sudaasi ke'endōma ke'ema la daan boorɪ tɪ a bāŋe la sɪra sɪra
yel-sɛka n botɪ Zifdōma la dōre ē. Tɪ beere wiige, tɪ a ba'age Apolɪ
base. Dee bɔ nōore yeti, Nawēnne kāabgɔ kēma nēŋadōma, la kēma n
po dita sariya la wuu lagsɛ. Tɪ ba lagsɛ. Tɪ a tarɪ ē sēŋe ka ze'ele ba
nēŋam.

23

¹Tɪ Apolɪ bɪsra sariyaditba la zii, dee yele yeti: < <M sɔbiisi, mam
n tōm m tōoma la wuu Nawēnne nēŋam wa paam zīna, mam bāŋe m
sūure pvam mɛ tɪ la ān sōŋa. > >

²Tɪ kāabgɔ* kēma nēŋadāana Ananiyasɪ bɔ nōore yeti, seba n ze lem
Apolɪ la wē a nōore. ³Tɪ Apolɪ yele ē yeti: < <Nawēnne wun wē fɔ.
Fu ān wu dagoone tɪ ba saasɛ, tɪ a zuum mā'a āna sōŋa la, fōn zī tɪ fu
di mam sariya wu lɔɔ n yele se'em na, la fōn sā'am lɔɔ la mɛ, fōn bɔ
nōore yeti, ba wē mam na. > > ⁴Tɪ seba n ze lem Apolɪ la yele ē yeti:

< < Fōn tuuri la Nawēnne kāabgɔ kēma nējadāana? > > ⁵Ti a lerge yeti: < < M sɔbiisi, mam ka mi ti a de la Nawēnne kāabgɔ kēma nējadāana. Se'ere n soe la, Nawēnne gōŋɔ puam la gulse yeti: < Da tɔge fu buuri nējadāana be'em. > > >

⁶Ti Apoli bāŋe ti sariyaditba la baseba de la Saduse* dōma, dee ti baseba mē dena Farisi* dōma, ti a tɔge ke'enke'em yele ba wuu yeti: < < M sɔbiisi, mam de la Farisi nēra, mam sɔ de la Farisi mēŋa mēŋa. Mam n tari putē'ere ti seba n kiiri la wun le vo'oge me na, bela iyā ti ba sām mam. > > ⁷En yele bela la, ti Farisi dōma la Saduse dōma wē'era nōke'ema la taaba, ti nērba la welse. ⁸Se'ere n soe la, Saduse dōma la ka sake ti kūm wun vo'oge, la ba ka sake ti malekadōma* la susi bɔna, la Farisi dōma sake bela wuu me. ⁹Ti lɔɔ* karēnsāandōma baseba n de Farisi dōma la isge yābra ke'enke'em yeti: < < Tōma ka yē bura-ēna wā tōon-be'ego. Tā ti la dena la sia, bu maleka n tɔge bɔ ē. > >

¹⁰Ti nōke'ene na wē'a daan zo'oge gāŋe. Ti sudaasi ke'endōma ke'ema la zɔta dabeem yeti, ba na'an wun āasum Apoli. Bela ti a bɔ sudaasi la nōore yeti, ba sēŋe ka to'oge ē nērba la zē'am, tari ē wa'am wa yu sudaasi la yire.

¹¹Ti daar-ēŋa yu'vɔŋɔ, ti Zuudāana Azezi wa'am Apoli zē'am wa yele ē yeti: < < Keŋe fu sūure, ti fōn tɔge mam yela Zerizalem kalam se'em na, dēni ti fu ken tɔge mam yela Rom tēŋam bela. > >

Ba eeri sore ti ba ku Apoli

¹²Ti beere wiige, ti Zifdōma baseba lagse taaba ēŋe nōore ayila pɔi yeti, bāma kān di dia bu yū ko'om, sān dagna bāma ku la Apoli.

¹³Seba n daan lagse ēŋe nōore ayila bela la, daan gānni nērba pinaasi me. ¹⁴La ba daan sēŋe la kāabgɔ kēma nējadōma, la kēma la zē'am

ka yeti: < <Tōma lagse me pɔɪ yeti, tōma kãn di sela, sãn dagna ti tōma ku la Apoli. ¹⁵Bela iyã, yãma sarɪyaditba la wuu, tōm-ya ti ba ka ye le suda-ke'ema la ti a tari Apoli wa'am ya zẽ'am, dee ẽɲe-ya wu ya boori ti ya soke bãɲe la a yelle la pa'ase, ti tōma mãasum me ti ku ẽ ti a nãn ka paam. > >

¹⁶Ti Apoli tã dayva bãɲe ban bãm ye le se'em na, sẽɲe sudaasi la yire ka ye le Apoli. ¹⁷Ti Apoli wi suda-ke'endōma la ayula ye le ẽ yeti:

< <Tari budib-ẽna wã sẽɲe ya ke'ema la zẽ'am, ti a tari la sela ti a ye le ẽ. > > ¹⁸Ti suda-ke'ema la tari ẽ sẽɲe ba ke'ema la zẽ'am ka ye le

ẽ yeti: < <Apoli ti ba yu la n wi mam yeti, m tari budib-ẽna wã wa'am fu zẽ'am, ti a tari la sela ti a ye le fo. > > ¹⁹Ti ke'ema la gure a

nu'ugo tari ẽ yese kẽnkerɲa ka soke ẽ yeti: < <Fõn tari la bẽm yelle ti fu ye le mam? > > ²⁰Ti a lerge ẽ yeti: < <Zifdōma n bãm yeti,

bãma wun sose fõn beesã ti fu tari Apoli wa'am ba sarɪyadia zẽ'am, wu bãma boori ti ba bise la a yelle la pa'ase. ²¹La, da sake ban wun

ye le se'em na, ti ba nẽrba n gãɲe pinaasi n sũge gu'ura Apoli. Ba wuu pɔɪ me yeti, bãma kãn di dia bu yũ ko'om, sãn dagna ti bãma ku la

Apoli. Ba mãasum gu'ura la fõn wun lerge se'em. > > ²²Ti ke'ema la ye le budibla la yeti: < <Da ye le nẽra ti fõn ye le mam sela. > > Dee

boti a lebe.

Ba tari Apoli sẽɲe ka ẽɲe gɔmna Afeligi nu'usum

²³Ti sudaasi ke'endōma ke'ema la wi a suda-ke'endōma bayi ye le ba yeti: < <Base-ya ti sudaasi kɔbsyi, la wi-bã'arba pisyopɔɪ, la kãn-

lɔbrɪba kɔbsyi mãasum. Ti yu'ɔɲɔ ẽna wã karf-awɛɪ ya sẽɲe Sezaare.

²⁴Mãasum-ya wiiri bɔ Apoli ti a bã ti ya tari ẽ sẽɲe gɔmna Afeligi zẽ'am la ãmã'asum. > > ²⁵Dee gulse gõɲɔ yeti:

²⁶< <Mam Akloorɪ-lisasi n gulse gõɲɔ wã bɔ'ɔra fõn gɔmna

sõņo Afeligi. Mam pu'usrı fɔ.

²⁷Zifdõma n daan yõke bura-ēna wā bɔɔra tı ba ku ē. Tı mam wõm tı a de la Rom tēņa nu'ugo nēra, tı mam sēņe la sudaasi ka fāage ē, ²⁸dee bɔɔra tı m bāņe bõn-seka n soe tı ba dõre ē tartı ē sēņe ba sarıyadia zē'am. ²⁹La mam daan yē tı la de la Zifdõma lɔ yela iyā, dee a ka ēņe sela n narı ba ku ē, bu ba yu ē yu'a deem. ³⁰Tı ba yele mam yetı, Zifdõma bām me tı ba ku ē, bēla iyā tı mam ēņe totɔ tõm tı ba tartı ē wa'am fõn zē'am, dee bɔ nõore yetı, seba n sām ē na wa'am fõn zē'am wa tɔge ēn ēņe se'em. > >

³¹Tı sudaasi la ēņe ēn yele ba se'em na, tartı Apolı yu'uhɔ ēņa sēņe Antipatrısi. ³²Tı beere wiige, tı suda-seba n sēnnı nāma la lebe ba yire la, dee tı seba n bā wiiri la tartı Apolı sēņe. ³³La ban paage Sezaare la, ba dıke gõņo la me bɔ gɔmna la dee dıke Apolı ēņe a nu'usum. ³⁴Tı a karēņe gõņo la, dee soke yetı, ēņa yese la so'olum kāna? Tı Apolı pa'ale ē tı ēņa yese la Silısi so'olum. ³⁵Tı gɔmna la yele ē yetı: < < Seba n tartı fɔ wa'am sām na sān paam, mam wun soke bāņe lan ēņe se'em. > > A yele bēla dee bɔ nõore yetı, ba kē'ese ē naba A'erɔdı* yire tı ba gu'ura ē.

24

Zifdõma dõre Apolı Afeligi nēņam

¹La dabsa anuu daare, tı kāabgɔ* kēma nēņadāana Ananiyası doose la kēma baseba, la yetɔg-mita yu'ure n de Atertuli wa'am Sezaare. Tı ba dıke Apolı yelle la tı ba tɔge bɔ gɔmna la. ²Tı ba wi Apolı tı a wa'am. Tı Atertuli yāņa tɔgra dõta Apolı yetı: < < Gɔmna sõņo Afeligi. La de la fõn bısrı tõma sõņa la iyā tı tēņa la tara laafe, tı

yela zozo'e teege ti tēja la malge. ³Fõn ẽje sela wuu zẽ'esti wuu bɔ tōma la, tōma to'oge me pu'usra fu zozo'e. ⁴La mam ka boori ti m gu'um fo, bela mam sosri fu me ti fo ẽje sugri dee selse m yetoga wã fẽfẽ. ⁵Tōma yẽ nẽr-ẽna ti a de la tẽn-wã'ara, ẽja n sa'asri Zifdōma dũnia wuu zuo ti ba gita tẽnsi. A de la Nazareti dōma*f10* pōmpɔrɔɔ sore la nẽnadāana. ⁶A zigrɔ ti a sã'am la Wẽnde-kāte la sisgo, ti ba yōke ẽ. ((La tōma daan boori ti ti di a sariya la tōma mēja lɔɔ. ⁷Ti suda-ke'ema Alisiast wa'am wa fāage ẽ tōma zẽ'am la pãja, ⁸dee bɔ nõore yeti, seba n sãm ẽ na wa'am fõn zẽ'am.)) Fu sãn soke ẽ fu mēja, fu won wõm bõn-seba wuu n boti tōma sãm ẽ. > > ⁹Atertuli n tɔge ba'ase la, ti Zifdōma la lagum sake yeti, la de la bela.

Apoli tɔge po'oge a mēja Afeligi nẽjam

¹⁰Zifdōma la n tɔge ki'ulum na, ti gɔmna la bɔ Apoli nõore ti a tɔge. Ti Apoli yeti: < < Mam mi ti fõn de la sariyadita so'olum ẽna wã puam halɔ yuuma n zo'oge. Bela mam sũure ãn yẽlum ti m tɔge to'oge m mēja. ¹¹Fõn tã won bãje me ti la ka gãje dabsa pia la ayi ti mam sẽje Zerizalem ti m ka pu'use Nawẽnne. ¹²La Zifdōma la ka yẽ mam ti mam wẽ'eri nõke'ene la nẽra Wẽnde-kātum* na, la ba ken ka yẽ ti mam sa'asri nẽrba ba wẽndeto* la puam bu tēja la zẽ'e-seka. ¹³La ba kãn yãje yẽ sela pa'ale ti bãma n yeti mam ẽje se'em na de sira. ¹⁴La mam yeti fu ti mam siri doli la so-seka ti ba yeti pōmpɔrɔɔ sore la. La mam pu'usri la Nawẽnne ti tōma yaabdōma yuun pu'usri la, dee sakra sela wuu n gulse bɔna Amoyisi* lɔɔ puam, la Nawẽnne nõtɔ'ɔsrɔba* gõnnɔ puam na. ¹⁵Mam tari putẽ'ere la Nawẽnne wu bãma n tari putẽ'ere se'em na, ti nẽrba wuu, nẽr-sōma la nẽr-be'esti won vo'oge me. ¹⁶Bela ti mam mōrgra daare woo ti m bãje m sũure puam ti mam ka ẽje be'em Nawẽnne la nẽrba nifum.

¹⁷La de la yuuma zozo'e ti mam daan ka boe Zerizalem, dee yāṅa tarti ligri leme ti m sōṅe m tēṅa nērba, dee bɔ bɔ'a ti ba kāabe bɔ Nawēnne. ¹⁸Mam daan boe mī ita la bela, ti ba yē mam Wēnde-kātum na, ti mam daan pōn malge m mēṅa Nawēnne zē'am ki'ulum me, la nērba daan ka boe la mam mī zo'oge, la ba mē daan ka gire mī. ¹⁹La Zifdōma baseba n ze'ele Azi* so'olum n daan boe mī, ba sān tara ni na yelle la mam, ba mēṅa n wun wa'am ni wa yele fu mam n ēṅe se'em. ²⁰La nēr-bāna wā sān yē mam tōon-be'ego, wakat-seka ti mam daan boe ba sariyadia zē'am na, ba yele. ²¹La ba kān yē sela, sān dagna mam daan ze'ele ba tēṅasuka tōge ba ke'enke'em yeti: <La de la mam n tarti putē'ere ti seba n ki la wun vo'oge me na iyā, ti mam ze ya nēṅam ti ya dita mam sariya zina wā. > > >

²²La Afeligi n daan pōn mina kō-yēlga la sore yelle la, ti a viige yetoga la, dee yele ba yeti: <<Suda-ke'ema Alisiast sān paam, mam wun ku'uge yetoga la bɔ ya. > > ²³Dee bɔ suda-ke'ema la n gu'uri Apoli la nōore yeti, a bisra ē, la a bɔ ē yolsgo, la a surdōma sān tara sela bɔra ti ba bɔ ē, a base ti ba bɔ ē.

Apoli ze Afeligi la Adrisili nēṅam

²⁴La dabsa fēe n tole, ti Afeligi lagum na a pɔga Adrisili n de Zifu boti ba wi Apoli, ti a wa'am wa tōgra nēra n wun bɔ Azezi-krisi sira se'em yelle, ti ba selsra. ²⁵La Apoli n yāṅa wa tōgra urgo n mase, la yōk-m-mēṅa, la sariyadia n sēm yelle, ti dabeem yōke Afeligi, ti a yele Apoli yeti: <<Base bela, mam sān wa yē nēṅa, mam wun le wi fo. > > ²⁶A daan tē'esri ti Apoli na'an wun bɔ ē na ligri, bela iyā ti a ēn wi'ira ē sōsra la ē le. ²⁷Ti yuuma ayi tole, ti Aporsusi-festusi yāṅa sooge Afeligi zē'am. La Afeligi daan boori ti a ēṅe la sela n ān Zifdōma sūure yelum, bela iyā ti a base ti Apoli ken bɔna yu'a deem.

Apoli sose yeti, ba base ti na-keko di a sariya

¹Afestusi n paage to'oge na'am a so'olum na puam na, a eñe la dabsa atã Sezaare, dee ze'ele bilam sēñe Zerizalem. ²Ti kãabgɔ* kēma nēñadōma, la Zifdōma nēñadōma wa'am a zē'am wa dōre Apoli. Dee sose ē mōrgra ³yeti, a sōñe ba boti ba tari Apoli leme Zerizalem, se'ere n soe la, ba daan bām bɔɔra ti ba sugɛ ku ē na sore. ⁴Ti Afestusi lerge yeti: < <Apoli boe la yu'a deem Sezaare, la mam mēña wun lebe la bilam lēle wā. ⁵La base-ya ti ya nēñadōma doose mam sēñe Sezaare, ti a sãn tōm na tōon-be'ego, ya tɔge bilam. > >

⁶Afestusi daan ka eñe gāñe dabsa anii bu dabsa pia ba zē'am dee lebe Sezaare. Ti beere wiige, ti a kē zī'ire sariyadia zē'am, dee bɔ nōore yeti, ba tari Apoli wa'am. ⁷Ti Apoli kē, ti Zifdōma seba n ze'ele Zerizalem wa'am na isge gilge ē, dōta ē yeti, a tōm na tōon-be'ero zozo'e, la ba ka tã'age pa'ale ti bāma n yeke se'em na de la sira. ⁸Ti Apoli tɔge ti a to'oge a mēña yeti: < <Mam ka eñe sela n si'isri Zifdōma lɔɔ*, bu Wēnde-kātɛ* la, la mam mē ka eñe Rom na-keko la be'em. > > ⁹Ti Afestusi bɔɔra ti a eñe sela n ãn Zifdōma sūure yēlum, soke Apoli yeti: < <Fōn boori ti fu sēñe Zerizalem ti m ka di fu yelle wā sariya bilam mɛ bu? > > ¹⁰Ti Apoli lerge yeti: < <Mam pōn bɔna la nēr-seka ti Rom na-keko bɔ ē nōore la sariyadia zē'am, bela la mase ti ba di mam sariya la Rom. Fōn mēña mi ti mam ka eñe Zifdōma be'em. ¹¹Mam sãn eñe ni na be'em bu sela n mase ti ba ku mam, mam kãn zagse. La ban dōre mam se'em na dagi sira, nēra ka tã wun dike mam eñe ba nu'usum. Mam boori ti Rom na-keko la n di m sariya. > > ¹²Ti Afestusi la a poorum dōma yē taaba, dee ti a lerge Apoli yeti: < <Fōn yeti, fōn boori ti Rom na-keko la n di fu sariya.

Bela, fu wun sēņe la na-keko la zē'am. > >

Apoli boe Agripa la Abernisi nēņam

¹³La dabsa fēe n tole, ti naba Agripa* la a tā Abernisi sēņe Sezaare ti ba ka pu'vse Afestusi. ¹⁴La ba yuuge mī na fēe, ti Afestusi tōge Apoli yelle la bō naba la yeti: < <Buraa n boe kalam ti Afeligi base ti a bōna yu'a deem. ¹⁵La mam daan sēņe la Zerizalem, ti Zifdōma kēma, la kāabgō kēma nēņadōma tari a yelle wa'am wa tōge bō mam, dee sose mam yeti, m di a sariya boti ba sūbge ē. ¹⁶Ti mam lerge ba yeti, tōma Rom dōma ka dikri nēra ita nērba nu'usum ti ba sūbge ē, dee ti a nān ka ze'ele seba n sām ē na nēņam tōge a nōore. ¹⁷La ba doose mam mē wa'am kalam, la mam ka gu'vm, beere n wiige, ti mam kē zī'ire sariyadia zē'am, dee bō nōore yeti, ba tari buraa la wa'am. ¹⁸La seba n sām ē na ka pa'ale tōon-be'ero seba ti a ēņe, wu mam n tē'esē se'em na. ¹⁹La de la nōke'ene ti ba wē'eri la ē, ba pu'vsgō sore yela īyā, la buraa yu'vre n de Azezi n ki, ti Apoli yeti a vo'oge mē īyā. ²⁰Ti mam ka tā'age bāņe mam wun ēņe yel-ēna wā se'em, ti mam soke Apoli yeti, ēņa boori ti a sēņe la Zerizalem ti m sēņe ka di a sariya la bilam? ²¹Ti Apoli zagse dee yeti, ba base ti Rom na-keko la tōge a yetōga la. Ti mam bō nōore yeti, ba gu'ura ē ti m wa boti ba tari ē sēņe na-keko la zē'am. > > ²²Ti naba Agripa yele Afestusi yeti: < <Mam mē boori ti m wōm bura-ēna wā yetōga. > > Ti Afestusi lerge yeti: < <Beere sān wiige, fu wun wōm a yetōga. > >

²³Ti beere wiige, ti Agripa la Abernisi ye fōņō lōgrō wa'am wa kē sariyadia deem na, la suda-ke'endōma, la tēņa la nēņadōma. Ti Afestusi bō nōore yeti, ba tari Apoli wa'am. ²⁴Dee yeti: < <Naba Agripa, la seba wuu n lagse wā, bise-ya bura-ēna wā ti Zifdōma wuu

wa'am wa tɔge a yelle la mam, Zerizalem la kalam, tii tɔgra yeti, la ka mase ti a ken vɔa. ²⁵La mam yē ti a ka ēnje sela n mase ti a ki. La a mēṅa yeti, ēṅa boori ti ba tari a yetɔga la sēṅe la na-keko zē'am. Ti mam tɔge ku yeti, mam wun boti a sēṅe. ²⁶La mam ka tari a yelle la zuo wun gulse bɔ na-keko la. Bela ti mam boti ba tari ē wa'am ya zē'am, la fōn naba Agripa mēṅa nēṅam, ti ya sān sogse ē kɪ'ulum, mam wun yē yelle gulse. ²⁷Se'ere n soe la, mam tē'esē ti la ka ān sōṅa ti mam tari nēra ka bɔ na-keko la ti a di a sarɪya, dee ka pa'ale yel-sēka iya ti ba yōke ē. > >

26

Apoli tɔge ti a to'oge a mēṅa Agripa nēṅam

(Tōoma 9:1-19, 22:4-16)

¹Ti Agripa* yele Apoli yeti: < <Sore boe ti fu tɔge. > > Ti Apoli zēke a nu'ugo ti a tɔge to'oge a mēṅa, yeti: ²< <Naba Agripa, mam sūure ān yēlum, mam n boe fu nēṅam zīna wā ti m tɔge to'oge m mēṅa la bōn-seba wuu ti Zifdōma dōre mam na. ³Lan gānni wuu, mam tari sū-yēlga, fōn mi Zifdōma dɔgmike, la ba nōke'ema la yelle sōṅa sōṅa la iya. Bela mam sosri fu me ti fu mā'age fu mēṅa selse m yetɔga wā.

⁴Zifdōma wuu mi mam vɔm n ān se'em me halt lan pɔse mam bōnbɪ'ulum, la ba mi mam n vɔa se'em mam mēṅa tēṅam, la Zerizalem me. ⁵Ban mi mam la yuuge me, ba sān bɔɔra, ba tā wun ze'ele bɔ mam kaseto me yeti, mam de la Farisi* nēra, bāma n sakri ti pu'usgo yela sōṅa gāna. ⁶La lēle wā ti mam ze sarɪyadia zē'am kalam wā, la de la mam n tari putē'ere la Nawēnne n bīṅe a nōore la ti yaabdōma la iya. ⁷Tōma buuri pia la ayi la tōnni me bɔɔra

Nawēnne wuntæŋa la yu'ʊŋɔ, dee tara putē'ere gu'ura ti ēn bīŋe a nōore se'em na wun ēŋe mɛ. Naba Agripa, la de la putē'e-ēna wā īyā ti Zifdōma dōre mam. ⁸Bēm ti la dena toogo bɔ ya, ti ya sake ti Nawēnne vo'oru kūm?

⁹Mam mēŋa daan tē'ese mɛ, ti dēni ti mam ēŋe mam wun ēŋe se'em wuu sā'am Azezi n de Nazareti nēra la yu'ʊrɛ. ¹⁰Mam tōm na bela Zerizalem, la mam daan to'oge nōore kāabgɔ* kēma nēŋadōma zē'am mɛ, yōge Nawēnne nērba zozo'e boti ba kē'ese ba yu'a deem, di ba sariya yeti ba ku ba, ti mam daan sake. ¹¹La wakate zozo'e ti mam daan nāmse ba Zifdōma wēndeto* puam, mōrgra ti ba base ba sore la. Ti mam sūure daan yīige la ba halt ti mam doose tēnsi baseba nāmse ba. ¹²La de la bela īyā ti mam daan to'oge nōore kāabgɔ kēma nēŋadōma zē'am ti m sēŋe Damaasi.

¹³Naa, mam daan boe la sore wuntæŋa zuu-tēŋasuka we'esa, yē peelem n ze'ele saazuum yēke nēege gānna wuntæŋa gilge mam, la sɛba n doli mam na. ¹⁴Ti tōma wuu lui tēŋa, ti mam wōm kōa n yeke mam la Ebre* yetɔga yeti: <Asoli, Asoli, bēm ti fu nāmsra mam? Fu sān ka sake mam, la wun āna toogo bɔ fu, wu dūŋa n ka nanni a dāana ka'asrɛ. > ¹⁵Ti mam soke yeti: <Zuudāana, fōn de la āne? > Ti Zuudāana la yeke mam yeti: <Mam de la Azezi, sɛka ti fu nāmsri la. ¹⁶La isge ze'ele, mam dike m mēŋa pa'alɛ fɔ ti m boti fu lebge la mam tōntōnna. Fu wun dena la mam kaset-dāana yeke nērba fōn yē mam se'em, dee ken pa'alɛ ba bōn-sɛba ti mam wun boti fu yē la. ¹⁷⁻¹⁸La mam wun ken tōm fu la bu-zāŋsi* zē'am, ti fu ka pike ba nini yese ba lika puam ti ba vɔa peelem puam, dee yese ba Asūtāana* nu'usum lebse ba Nawēnne nu'usum, ti ba bɔ mam sira, ti Nawēnne base ba tōon-be'ero taale, ti ba lagim na Nawēnne nēr-sōma yē pure. La mam wun fāage fu Zifdōma, la bu-zāŋsi nu'usum base. > > >

¹⁹Ti Apoli yele bela dee yeti: < <Naba Agripa, mam n daan yē Azezi wu zāasɔ, ti a ze'ele saazuum tɔge bɔ mam na, mam ka zagse. ²⁰Bela ti mam pɔse Damaasi, la Zerizalem, la Zude so'olum wuu, la bu-zānsi zē'am mōole yeti, ba teege yem base tōon-be'ero, dee lebe sake Nawēnne, dee ēɲe sela n pa'ale ti ba teege yem. ²¹Bela ti Zifdōma daan yōke mam Wēnde-kātum* na yeti ba kv mam. ²²La Nawēnne sōɲe mam me wa paam zina, bela ti mam ze kalam tɔgra mam n yē sela bɔ'ora yāma, ke'endōma la tarumdōma wuu. Mam n yele sela wuu la, la de la Nawēnne nōtɔ'ɔsrɪba*, la Amoyisi* n yuun yeti sela wun ēɲe la. ²³Ba yuun yeti, dēni ti Krisi* nāmse ki, la ēɲa n wun dena pɔspɔsi nēra n wun vo'oge, dee wun mōole kō-yēlga n de peelem bɔ Zifdōma la bu-zānsi. > >

²⁴La Apoli n tɔgrɪ bela ti a to'oge a mēɲa la, ti Afestusi tāsē ē yeti: < <Apoli, fōn zallɪ me, fōn zāsum me zo'oge ti la botɪ fu yirsra. > > ²⁵Ti Apoli lerge ē yeti: < <Afestusi sōɲɔ, mam ka zallɪ. Mam tɔgrɪ la yel-sura, la yem yetɔga. ²⁶Naba Agripa mi yel-bāna me, mam tā wun tɔge me la buraane a nēɲam. Mam mi ti a mi bōn-bāna wuu me, se'ere n soe la, ba ka ēɲe lika pvam. > > ²⁷A yele bela dee yeti: < <Naba Agripa, fōn sake Nawēnne nōtɔ'ɔsrɪba n yele se'em na me? Mam mi ti fōn sake me. > > ²⁸Ti Agripa yele Apoli yeti: < <Fōn tē'ese ti fu botɪ mam lebge la Krisi nēra wakate fēe wāna pvam? > > ²⁹Ti Apoli yeti: < <La sān yuuge, bu la sān ka yuuge, mam pv'usri Nawēnne me ti fōn la seba wuu n selsri mam zina wā wun lebge āna wu mam ān se'em na, sān dagna bānsɪ la mā'a ti mam ka boori ti ba ba ya. > >

³⁰Ti naba la, la gɔmna Afestusi, la Abernisi, la nērba la wuu isge yese, ³¹ka yele taaba yeti: < <Bura-ēna ka ēɲe sela n mase ti a ki, bu ba kē'ese ē yv'a deem. > > ³²Ti Agripa yele Afestusi yeti: < <Bura-

ēna wā sān ka yeke ni ti ēṅa boori ti a sēṅe la na-keko la zē'am, ti tā wun base ni ē. > >

27

Ba tari Apoli we'esa Rom

¹Ti ba daan looge yem ti ba boti tōma kē ōorṅo sēṅe Itali, ti ba dike Apoli la nērba baseba ti ba yu la, ēṅe suda-ke'ema yu'ure n de Azuliyusi nu'usum, a daan de la suda-seba ti ba wi'iri ti na-keko sudaasi la ke'ema ayula. ²La ōorṅo n ze'ele Adramiti tēṅam daan bōna bilam yeti a sēṅe tēnsi baseba n boe Azi* ko-kāte la nōorum. Ti tōma kē we'esa, ti Aristarki n ze'ele Tesaloniki n boe Masedvani so'olum, wa'am wa doose tōma. ³Ti beere wiige, ti tōma paage Sidō tēṅam, ti Azuliyusi ēṅe Apoli sōṅa bō ē nōore ti a sēṅe ka bise a sirdōma, dee ti ba sōṅe ē. ⁴Ti tōma le kē ōorṅo bilam we'esa. Ti kusebgo vugra tu'usra tōma, ti tōma wērgē bēglē Sipri sēṅe. ⁵La tōma doose la ko-kāte la n lem Silisi la Pānfili la, sēṅe ka paage Miira n boe Lisi so'olum sige. ⁶Bilam ti suda-ke'ema la yē ōorṅo n ze'ele Alegsāndri ti a sēṅe Itali. Ti a boti tōma kē.

⁷La dabsa faa ti tōma nāmse la ōorṅo la sēna fēfē halı ka lem Kinidi tēṅam. La kusebgo la ka boti tōma yāṅe sēṅe bilam bōba, ti tōma lōke sēṅe lem Salmōni bēglē Kreti sēṅe. ⁸La tōma daan bēglē la ko-kāte la nōorum, daan nāmse halı, dee yāṅa paage zē'a yu'ure n de ōorṅo ze'elgo zē'e-sōṅo n lem Laze.

⁹La dabsa zozo'e daan tole me, ti Zifdōma nōore lva daare tole. La wakat-ēṅa la daan de la toogo bō nērba ti ba dike ōorṅo doose ko'om na puam. Bela ti Apoli yeke ba yeti: ¹⁰< < Buraasi wā, mam mi ti tōma sēne wā wun wa dena la toogo. La dagi lōgrō, la ōorṅo la mā'a

n wun sā'am, la de la tōma mēṅa yōore pōsga. > > ¹¹Ti suda-ke'ema la ka selse Apoli n yeke se'em na, a selse la seka n bisri ōorṅo la sēnne yelle, la ōorṅo la dāana yetoga. ¹²La ōorṅo ze'elgo zē'a na ka ān sōṅa ti ba wun gā'are ti kusebgo, la ɔɔɔ wakate la tole. Bela ti nērba la zozo'e yeti, ti base bilam dee wibe sēṅe paage Fenigsi n mē boe Kreti so'olum. Zē'e-ēṅa ōorṅo ze'elgo zē'am la togla la zanōre gōbga, la zuogo nu'ugo bōba. Bilam ti ba tā wun zī'ire ti kusebgo, la ɔɔɔ wakate la tole.

Kuseb-kāte vugri ko'om zuo

¹³Ti kusebgo ze'ele gōbga bōba wa'am wa vugra fēfē. Ti ba tē'esē ti ba tā wun ēṅe ban boori se'em, bela ti ba māasum ōorṅo la base zē'e-ēṅa, dee bēgla Kreti ko-kāte la nōorum we'esa. ¹⁴Ti la ka yuuge, ti kuseb-kāte ti ba wi'iri ti < < Erakilō > > ze'ele Kreti tēṅa bōba, wa'am wa vugra ke'enke'em wē'era ōorṅo la. ¹⁵Ti tōma ka yāṅe boti ōorṅo la sēṅe nēṅa bōba, ti tōma base ōorṅo la ti kusebgo la tari ē we'esa. ¹⁶Ti tōma sēṅe ka lem tēn-pika yu'ure n de Koda ti ko'om gilge ē, bēgla ē ti kusebgo la ka le vugra ke'enke'em tu'usra tōma. Ti tōma keṅe ti mēṅa ōbge ōorṅ-pika la zoole ōorṅ-kāte la zuo, la, la ka ēṅe nāana. ¹⁷Ti ba dike mī'isi lu ōorṅ-kāte la kāṅkāṅe ti a tara pāṅa. Ba zoti me ti, ti sān paage zē'e-seka yu'ure n de Sirti n dagi kulko'om ti tēntōnbī'isgo bōna mī na, a wun fire. Bela ti ba sike ōorṅo la fu-kāte, dee ti kusebgo la zā'ara ē sēnna fēfē. ¹⁸La kusebgo la ken vugra la ke'enke'em nāmsra tōma, ti beere wiige, ti ba yese log-seba n boe ōorṅo la puam na, lobe base ko'om na puam. ¹⁹Ti beere le wiige, ti ba mēṅa yese ōorṅo la mēṅa logro lobe base ko'om na puam. ²⁰Ti la ēṅe dabsa se'em, ti tōma ka yē wētulle la wōrbiē, ti kusebgo la ken vugra ke'enke'em nāmsra tōma. Ti tōma kō'oge vom putē'ere.

²¹Ti la daan yuuge ti nērba la ka di. Ti Apoli ze'ele ba tējasuka yeti: < < Ya daan sān sake ni mam nōore la, daan ka fōrge Kreti, ti kān yē ni nāmsgo la yel-bāna wā wuu. ²²La læele wā, mam sosri ya ti ya keje ya sūure. Ti nēra baa ayila kān ki ya puam, sān dagna ōorŋo la mā'a n wun sā'am. ²³Zaam yu'uhŋo Nawēnne n soe mam ti mam dena a tōntōnna la, tōm a maleka* ti a wa ze'ele mam zē'am ²⁴yeti: < Apoli, da zoe dabeem. Dēni ti fu ka ze'ele na-keko la nējam. La Nawēnne ēje fu yel-sōnne me boti seba n boe ōorŋo puam na wuu vɔa. > ²⁵Bela, buraasi wā, keje-ya ya sūure, ti mam bɔ Nawēnne sira me ti la wun ēje wu maleka la n yeke mam se'em na. ²⁶La kusebgo la wun pe'ege ti ka base la tēja ti ko'om gilge. > >

²⁷La daan de la dabsa pia la anaasi yu'uhŋo, ti kusebgo la vugra pe'era tōma ko-kāte la yu'ure n de Adriyatiki la zuo. Ti sōnsua ti nēr-seba n tōnni ōorŋo la tōoma la tē'ese ti ti lem na tēja. ²⁸Ti ba dīke mī'a lu bōn-tibsgo base ko'om na puam ti ba buse kulga la n ko zōna se'em, make ti la dena wu mētri pitā la ayopɔ. Ti la ēje fēe, ti ba le make buse ti la dena wu mētri pisyi la anii. ²⁹Ti ba zɔta dabeem ti ōorŋo la wun wē tāmpīisi, ti ba dīke kuto n boti ōorŋo ze'eta banaasi base ko'om puam ōorŋo la poorum, dee kā'ara Nawēnne ti beere wiige. ³⁰Ti nēr-seba n tōnni ōorŋo la tōoma la daan bɔra ti ba zoe dee base ōorŋo la, bela ti ba sike ōorŋ-pika la ko'om puam, ēje wu ba boori ti ba dīke la kuto n boti ōorŋo ze'eta baseba base ōorŋo la nējam. ³¹Ti Apoli yeke suda-ke'ema, la sudaasi la yeti: < < Nēr-bāna wā sān ka bɔna ōorŋo wā puam, yāma wuu kān yāje pōse. > > ³²Ti sudaasi la wā mī'i-seba n lu ōorŋ-pika la, dee base ē ti ko'om tari ē fōrge.

³³Ti beere bɔna mī wiira, ti Apoli belem ba wuu ti ba di dia, yeke ba yeti: < < Zina de la dabsa pia la anaasi n wāna, ti ya tē'esri kūm la

vom, dee ka di sela. ³⁴Bela mam belni ya me ti ya di dia yē pāṅa vɔa, ti ya zomto baa ayɔla kān bɔi. > > ³⁵Ēn yele bela la, dee dɪkɛ borborɪ pu'usɛ Nawēnnɛ ba wuu nēṅam, dee fiise borborɪ la obe. ³⁶Tɪ ba wuu yē buraanɛ mē di dia la. ³⁷La tōma wuu daan de la nērba kɔbsyi la pisyopɔi la ayoobi ōorŋɔ la puam. ³⁸Tɪ ba di tɪgɛ, dee dɪkɛ bōnkɔɔla n boe ōorŋɔ la puam na, lobe basɛ ko'om na puam, ba boori tɪ ōorŋɔ la n fake.

Ōorŋɔ sǎ'angɔ yelle

³⁹Tɪ beere wiige, tɪ ba ka bāṅɛ tēṅa la. La ba yē la zē'a n tā wun dooge, tɪ ba yeti, ba sǎn tāna, ba boti ōorŋɔ la tɔglɛ bilam. ⁴⁰Tɪ ba lorge kuto la n boti ōorŋɔ zɛ'eta la basɛ ko-kāte la puam, dee lorge mǐ'isi la n lu dɔ-sɛba n wun boti ōorŋɔ la sēṅɛ ban boori zē'e-sɛka la base, dee zēke fuugo la n boe ōorŋɔ la nēṅam na, tɪ kusebgo wē'era fuugo la, tɪ ōorŋɔ la wɛ'esa doone. ⁴¹Tɪ ōorŋɔ la sēṅɛ zē'a tɪ ko'om ka zo'oge mǐ ka zom tēntōnbǐ'isgo zuo, tɪ a nēṅam firɛ, tɪ a koṅɛ sɛnnɛ. Tɪ ko-mǐ'isi wē'era a poorum la pāṅa, tɪ a sǎ'am.

⁴²Tɪ sudaasi la bɔɔra tɪ ba kv nēr-sɛba tɪ ba yōgɛ la, tɪ sɛka da lui ko'om puam pām dooge zoe fōrgɛ. ⁴³Tɪ suda-ke'ɛma la bɔɔra tɪ a fāage Apoli basɛ, ka sake tɪ ba kv nērba la, dee bɔ nōorɛ yeti, sɛba n mi ko'om būṅa la ēgɛ lui ko'om puam yiɛn pām dooge doone. ⁴⁴Dee tɪ sɛba n ka mi būṅa la dɪkɛ dɔ-palagsɪ, la ōorŋɔ la bōn-sɛka n sǎ'am woo būn dooge. Bela tɪ tōma wuu daan pōsɛ dooge doone.

28

Apoli dōma boe Maltɪ

¹La tōma n daan pōsɛ paage doone na, tɪ tōma bāṅɛ tɪ tēṅa la yu'ure de la Maltɪ. ²Tɪ tēṅa la nērba to'oge tōma sōṅa sōṅa. Tɪ saaga daan

niira ti ɔɔɔ bɔna, ti ba tuure bugum bɔ tɔma, ti tɔma ɔɔsra. ³Ti Apoli vaage ɔɔɔ wa'am wa ɛɛɛ bugum puam, ti tuulgo wɔɛɛ bɔnsela, ti a yese vile Apoli nu'ugo. ⁴Ti tɛɛɛ la nɛɛɛba yɛ bɔnsela n vile a nu'ugo la, ti ba ye le taaba yeti: < < Bura-ɛna wɔ siri de la nɛɛɛ-kuvra. Baa la ɛn yɔɛɛ pɔsɛ ko'om puam na, wɛɛɛnne ka sake ti a vɔa. > > ⁵Ti Apoli mɛsɛ a nu'ugo, ti bɔnsela la lui bugum puam, dee ti sela ka ɛɛɛ ɛ. ⁶Ti nɛɛɛba la gu'ura ti ba wun yɛ ti a iya fubusum ya, bu a wun kɔɔn lui tɛɛɛ ki. Ti la yuuge, ti ba ka yɛ ti sela ɛɛɛ ɛ, ti ba teege putɛ'era yeti, a de la wɛɛɛnne.

⁷La zɛ'e-sɛka ti tɔma daan boe mɔ na lem na tɛɛɛ la nɛɛɛɛadɔana va'am. A yu'ure de la Apubulsi, a daan to'oge tɔma mɛ la sɔ-yɛlga. Ti tɔma bɔna a yire dabsa atɔ. ⁸Ti a sɔ bɛ'era gɔ yɛ'era-waafɔ, dee ti ɔɔɔ tara ɛ. Ti Apoli kɛ a deem dike nu'usi pagle a zuo, pu'use Nawɛɛnne bɔ ɛ, ti a yɛ iɔmɔ'asum. ⁹Lan ɛɛɛɛ bela la, ti tɛɛɛɛ la nɛɛɛ-sɛba n de bɔ'adɔma wuu sɛnna, ti Apoli pu'use Nawɛɛnne bɔ ba, ti ba yɛ iɔmɔ'asum. ¹⁰Ti ba daan gɔɛɛ tɔma sɔɛɛ sɔɛɛ, la tɔma n daan fɔɛɛgru la, ba bɔ tɔma la bɔ'a n seke tɔma sore la sɛnne.

Apoli dɔma tole wɛ'esa Rom

¹¹La wɔr-sutɔ n tole, ti tɔma yɛ ɔɔɔɔɔ n ze'ele Aɛɛɛsɔndri wa'am bɔna Malti tɛɛɛɛɛ, ti ɔɔɔɔ la kuseb-kɔte la wakate tole. Oɔɔɔɔ la yu'ure de la < < Diyɔskuri > >. Ti tɔma kɛ ɔɔɔɔɔ la wɛ'esa. ¹²La tɔma sɛɛɛɛ paage la Strakusi zɔ'ire bilam dabsa atɔ, ¹³le ze'ele bilam kɛ ɔɔɔɔɔ sɛɛɛɛ paage Regio. Ti beere wiige, ti kusebgo ze'ele tɔma poorum wa vugra zɔ'ara tɔma. Ti tɔma paage Puzɔlli dabsa ayi daare sige. ¹⁴Bilam ti tɔma yɛ Azezi karɛnbiisi baseba. Ti ba sose tɔma, ti tɔma zɔ'ire ba zɛ'am dabsa ayopɔ, dee yɔɛɛɛ wɛ'esa Rom. ¹⁵Ti karɛnbi-sɛba n boe Rom na wɔm tɔma yelle. Ti baseba tu'use tɔma

halı < < Apiyusi da'am > >, dee ti baseba mē tu'use tōma zē'e-seka yu'ure n de < < sāama deto batā > > la. La Apolı n yē ba la, ti a pu'use Nawēnne, le yē buraane. ¹⁶Tı tōma paage Rom, ti ba bɔ Apolı nōore ti a kē'era ēn boorı zē'e-seka, dee botı sudaaga gu'ura ē.

Apolı boe Rom mōola Nawēnne kō-yēlga

¹⁷Tı dabsa atā poorum, ti Apolı wi Zifdōma nējadōma seba n boe tēŋa la puam lagse, yele ba yetı: < < M sɔbiisi, mam daan ka ēŋe ti nērba la be'em, la mam ka sā'am lɔɔ seba ti ti to'oge ti yaabdōma zē'am na, la baa bela ba daan yōke mam me Zerizalem, tartı mam ka bɔ Rom sudaası ti ba yu mam. ¹⁸Tı ba sogse mam, dee bɔɔra ti ba base mam, ban daan ka yē ti mam ēŋe sela n mase kūm na iyā. ¹⁹Tı Zifdōma zagse ti ba da base mam, bela n pērgē mam ti mam sose nōore yetı, mam boorı ti m sēŋe la Rom na-keko la zē'am ti a di m sariya, la dagı mam n tartı yelle la m nērba la. ²⁰Bela ti mam wi ya ti ya wa'am ti sōse la taaba. Ban lu mam na bānsı wā, la de la seka ti lsrayeli* dōma tartı a putē'ere gu'ura ē na iyā. > >

²¹Tı ba yele ē yetı: < < Tōma ka to'oge gōnno Zude tēŋam n gulse fu yelle. Zifdōma seba n sēnnı kalam na, ba nēra nēra mē ka tōge fu tōon-be'ero yelle. ²²La tōma boorı ti ti wōm na fōn tē'esrı se'em, la sān dena sore la ti fu dolı la, tōma mi ti zē'a woo ba sı'ısrı ē me. > >

²³Tı ba bɔ Apolı daare. Tı daare la paage, ti nērba zozo'e lagse Apolı zē'am. Tı Apolı tōge Nawēnne so'olum* yelle, la Azezi yelle n gulse Amoyisi* lɔɔ gōnno puam, la Nawēnne nōtɔ'ɔsrıba* gōnno puam na, pa'ale ba bulıka halı ka paage zaanōore, mōrgra ti a botı ba sake. ²⁴Tı baseba sake, dee ti baseba ka sake. ²⁵Tı nērba la ka wōm taaba bɔɔra ti ba fōrge. Tı Apolı tōge ba yetɔga ayula yetı: < < Nawēnne Sia n yuun botı a nōtɔ'ɔsa A'ezayi* tōge la ya yaabdōma la de la sira. ²⁶A

yubn yetu:

< Sēŋe bu-bāna wā zē'am ka yele ba yetu:

Ya wun selse,

la ya kān wōm a vōore.

Ya wun bise,

la ya kān yē sela sela.

²⁷Se'ere n soe la,

bu-bāna wā putē'era ka like,

la ba tuba li me,

dee ti ba mūm ba nini.

Ti ba nini da yē,

ti ba tuba da wōm,

ti ba putē'era da like.

Sān dagi ni bela,

ba wun teege ni yem,

ti mam bo ba laafe. > > >

²⁸Apoli daan tōge bela dee yetu: < < Bāŋe-ya ti Nawēnne tōm fāare kō-yēlga la bo la bu-zāŋsi*. Bāma wun selse. > > ((²⁹Apoli n tōge yetog-ēŋa la, ti Zifdōma wē'era nōke'ene la taaba fōrgra.))

³⁰Apoli daan kē zē'e-seka ti a boe mī na yubma ayi, daan yōra deego la ligri, dee tō'sra seba wuu n sēnni a zē'am na, ³¹mōola Nawēnne so'olum yelle, dee zāsna ba Zuudāana Azezi-krisi yela. A daan tōgri la buraane, ti nēra ka gu'ura ē ti a da tōge. \f1 7:56 Nērsaala* Dayva la, la de la Azezi. \f2 11:19 La de la Antyoosi n boe Siiri so'olum. \f3 14:12 Azeyusi la A'ermēsi de la Grekidōma wēna yu'ura. Azeyusi de la ba wēna la naba, dee ti A'ermēsi n tari yetoga sēnna bo'ora ba. \f4 15:38 Bise-ya Tōoma Gōŋo 13:13. \f5 16:7 Azezi Sia la Nawēnne Sia de la bōn-yēnne. \f6 17:19 Arewopaazi de la zē'a

n de kũnkũnne tı Atenu nẽnadõma daan tigsri dee dita sariya mĩ. \f7
18:12 Korẽntı de la Akayi so'olum tẽn-kãtẽ. \f8 20:2 Gresı de la
Grekıdõma so'olum, a yu'ure ayẽma de la Akayi (18:12). \f9 21:8
Bıse-ya Tõoma gõnɔ 6:5. \f10 24:5 La de la Azezi karẽnbiisi la tı ba
daan wi'iri tı Nazareti dõma. \e

ROM

Rom

Gõn-seka tı Apolı gulse bɔ Rom dõma

Bilgre

Nawẽnne n looge Apolı tı a dena a Tõntõnna bu-zãnsı ãyã (Rom 1:5,
Galatı 2:9). Eña n gulse gõn-ẽna wã bɔ Nawẽnne nẽrba n boe Rom.
Nẽrba baseba n mõole ba Azezi kõ-yẽlga, tı ba bɔ sira. Tı Apolı yãña
gulse yeti eña boorı tı a sẽnje ba zẽ'am ka botı ba yẽ buraane, dee tole
sẽnje nẽña.

Gõn-ẽna wã puam a pa'ale la a zãnsɔ n de se'em.

A yeti nẽra woo tõm na tõon-be'ero koje Nawẽnne nã'asgo,
Zıfdõma, la bu-zãnsı wuu, la Nawẽnne nõje ba wuu me, bɔɔra tı ba
teege yem base tõon-be'ero dee sake Azezi-krisi. Azezi n ki ba ãyã, tı
ba sãn bɔ ẽ sira, ba wun mase Nawẽnne zẽ'am eña ãyã. Bela de la
Nawẽnne yel-sõnne. Tı nẽr-seka woo n bɔ Azezi sira wun yẽ fãare,
yese tõon-be'ero, la kũm puam. La a dãana wun vɔa la a Zuudãana
Azezi, tı Nawẽnne Sia wun sõnra ẽ (sapıtrı 1-8).

Apolı ken gulse tɔge la Zıfdõma seba n zagse Azezi yelle. A yeti ba
kãn zagse Nawẽnne wakate wuu, se'ere n soe la, Nawẽnne yel-sõnne
na tã sela woo me (sapıtrı 9-11).

A ken yeti læele wã tı Nawẽnne eñe bu-zãnsı wuu sõnra la, la mase

mε ti ba vɔa la pupelem, ti la paara Nawēnne yem (sapitri 12-15).

Gõṅɔ la ba'asgɔ, Apoli yeti ẽṅa boori ti a sēṅe la Rom, ti ba ka sōṅe ẽ bilam, ti a tole sēṅe Espayē so'olum. La a yeti ẽṅa pu'usrɪ nēr-sɛba wuu ti ẽṅa mi n boe Rom na (sapitri 15-16).

Gõn-sɛka ti Apoli gulɛ bɔ

Rom dõma

1

¹Mam Apoli n de Azezi-krisi yamṅa n gulɛ gõṅɔ wã. Nawēnne n wi mam ti m dɛna Azezi-krisi Tõntõnna*, welge mam to'ore ti m mōole a kō-yēlga.

²Nawēnne daan bĩṅe la nōore halɪ kurum kurum ti a bɔ tɔ a kō-yēlga la, boti a nõtɔ'usrɪba* gulɛ a gõṅɔ puam. ³La de la Nawēnne Dayua n de ti Zuudāana Azezi-krisi la yelle. Ẽṅa n lebge nērsaala la, a de la naba Adavidi* yuṅa. ⁴La Nawēnne Sia* la boe a zē'am mε la pãṅa, pa'alɛ ti a de la Nawēnne Dayua, ẽṅa n ki dee vo'oge la. ⁵Azezi-krisi ãyã ti Nawēnne ẽṅe ti yel-sõnne, boti tōma dɛna a Tõntõnɪba ti ti boti so'olum wuu nērba bɔ ẽ sɪra, sake a nōore a yu'vre nã'asgɔ ãyã. ⁶Yãma mē po bɔna la nēr-bãma puam, yãma ti Nawēnne wi ti ya dɛna Azezi-krisi nērba la.

⁷Mam gulɛ gõṅɔ wã bɔ'ɔra la yãma sɛba wuu n boe Rom, ti Nawēnne nōṅe ya, wi ya ti ya welge to'ore dɛna a nērba la.

Tɪ Sɔ Nawēnne, la ti Zuudāana Azezi-krisi wun ẽṅe ya yel-sõnne, dee bɔ ya sũ-mã'asum.

Apoli boori ti a sēṅe ka kaage Krisi nērba n boe Rom

⁸Pɔspɔsɪ, Azezi-krisi ãyã mam pu'usrɪ mam Zuudāana Nawēnne a

yel-sōnne yāma wuu ãyã, se'ere n soe la, ba tɔgrɪ yāma n bɔ Azezi sira se'em me dūnia wã wuu. ⁹Mam tēri ya yelle m pu'usgɔ puam me wakate wuu. Nawēnne ti mam tōnni la m sūure wuu bɔ'ɔra ě, mōola a Dayva kō-yēlga la, mi ti sɛla ti mam yeke la de la sira. ¹⁰Wakat-sɛka woo ti mam pu'usri, mam sosri Nawēnne me ti la sãn dena ěɲa yem n boori se'em, a boti m yãɲe wa'am ya zē'am wa kaage ya yãɲa.

¹¹Se'ere n soe la, mam boori la m sūure wuu ti m yē ya, ti m wun to'oge Nawēnne Sia bɔ'a bɔ ya ti ya yē pãɲa. ¹²La de la mam na yāma wun lagum yē buraane pa'ase, ti yāma n bɔ Azezi sira se'em na wun bɔ mam buraane, ti mam mē n bɔ Azezi sira se'em na wun bɔ yāma buraane.

¹³M sɔbiisi, mam boori me ti ya bãɲe ti nōore faa ti mam make ti m wa'am ya zē'am. La gu'a n gu mam halɪ wa paam leele wã. Mam boori me ti m wa'am ti m tōone na tara yōoro yāma zē'am, wu ěn tari yōoro so'olum baseba puam se'em na. ¹⁴Mam tōone de la m sēɲe nēr-sɛba yem n like, la nēr-sɛba yem n ka like, nēr-sɛba n zãsum tara bãɲre, la nēr-sɛba n ka mi sɛla zē'am ka mōole kō-yēlga la. ¹⁵Bela n soe ti mam bɔ'ɔra ti m mōole kō-yēlga la mē bɔ yāma sɛba n boe Rom la.

Nawēnne kō-yēlga pãɲa

¹⁶Yãnne ka tari mam la kō-yēlga la mōolgɔ. A de la Nawēnne pãɲa n boti nēr-sɛba wuu n bɔ ě sira la yēta fãare, pɔspɔsi de la Zifdōma*, pa'ase la sɛba n dagɪ Zifdōma. ¹⁷Kō-yēlga la n pukri pa'ala tōma Nawēnne n uti se'em boti nērba mase a zē'am. La de la bɔ sira, tari ka ba'ase la bɔ sira, wu lan gulse Nawēnne gōɲɔ puam se'em yeti:
< < Nēra n bɔ Nawēnne sira mase a zē'am wun vɔa, ěn bɔ ě sira la ãyã. > >

Nērsaalba koŋe buwɔ me

¹⁸Nawēnne n boe saazuum pa'ale ti ēŋa sūure yīige me la nērsaalba n tōnni tōon-be'ero, la sela wuu ti ba uti ti la ka dɔla ēŋa sore, ti ba tōon-be'ero la gu'ura nērba ti ba ka mina sira la, ti ēŋa wun sɪbge ba. ¹⁹Se'ere n soe la, sore ti nērsaalba wun doose bāŋe Nawēnne yelle de la vēelga bɔ ba, Nawēnne mēŋa n puke ē pa'ale ba. ²⁰Hali lan pɔse dūnia nāaŋɔ, Nawēnne yela ti nērsaalba ka yēti n de a ke'ejo n ka tari ba'asgɔ, la ēn de Nawēnne na, nērba yē ba me a tōoma la puam. Bela ti nērsaalba ka tāna wun yeti bāma ka mi Nawēnne. ²¹Ba mi Nawēnne me, la ba ka nā'asri ē, la ba ka pu'usri ē a yel-sōnne wu lan nari ba ēŋe se'em na. Ba tē'esgɔ la lebge la tē'es-yooro, ti ba putē'e-yooro la kē'esē ba lika puam. ²²Ba tē'esē yeti bāma de la yem dōma, la ba de la gɔɔɔ. ²³Lan de ba nā'asra Nawēnne n ka kiiri n tari na'am pāŋa la, ba tōn nā'asra la bōna ti nērba māale n ān wu nērsaalba n kiiri, la bōn-ēgla, la sela n tari nāma anaasi, la bōn-vuula.

²⁴Bela n soe ti Nawēnne base ba, ti ba tōnna dēgrɔ tōoma, wu ba yem n boori se'em, tōnna yānne tōoma la taaba. ²⁵Ba dɪke Nawēnne yelle n de sira la base me, dee dɔla pōmpɔrŋɔ. Ba nā'asri la bōn-seba ti Nawēnne nāam na, tōnna bɔ'ɔra ba, dee base Nawēnne mēŋa n de sɛka n nāam sela woo la. Eŋa n mase pēka wakate n ka ba'asri.

Amina.

²⁶Bela ti Nawēnne base ba, ti ba ita ba mēŋa yemleego n de yānne. Ti ba pɔgsɪ base lan de ba gā se'em na, dee gā la taaba. ²⁷Ti buraasi mē base lan de ba gā la pɔgsɪ la. Ti ba bura-taaba yemleego tara ba. Ti buraasi ita sela n de yānne gā la taaba. Bela ti ba yēta sɪbgrɛ ba mēŋa, n mase la ba tuure la.

²⁸Ban zagse ka bɔɔra ti ba bāŋe Nawēnne na, ti Nawēnne base ba ba tē'es-yooro la puam, ti ba ita sela n ka mase ti ba ita. ²⁹Sela n ka mase

wuu n boe ba sūa puam. La de la be'em, la nōŋe bōnɔ zozo'e, la pɔtɔvlgɔ, la ita sūure la tadāana bōnɔ, la nēr-kua, la zebre, la yem be'ero, la sū-toogo. Ba wā'arɪ la taaba, ³⁰tɔgra be'em zergra taaba, ba de la wēn-sɪ'ɪsrɪba, ka nanna taaba, zēk-m-mēŋa dōma, wē'er-m-yō'ogɔ dōma, nērba n mi sɔa n wun doose tōm be'em, nērba n sɪ'ɪsrɪ ba madōma, la ba sɔdōma nōore. ³¹Ba yem ka like, ba de la nōgōla dōma, ba ka tarɪ nōŋlɔm, ba ka zotɪ ninbāalga. ³²Ba mi tɪ Nawēnne yetɪ nēr-seba n itɪ bela la mase la kūm, la baa bela ba ken ita la bōn-bāma, dee yetɪ nēr-seba n itɪ bela la itɪ sōŋa mɛ.

2

Nawēnne sarɪyadia mase me

¹Fōn nēr-seka n zergɪ nērba baseba la, fu kān yē buvrɔ, se'ere n soe la, fōn zergɪ nērba baseba dee ita bāma n itɪ se'em na, fu mōŋɪ la fu mēŋa buvrɔ. ²Tɪ mi tɪ Nawēnne diti nēr-seba n tōnnɪ tōon-be'ero bāma sarɪya dɔla la sɪra. ³Fōn tē'ese tɪ fōn zergɪ fu taaba, dee ita fu mēŋa bāma n itɪ se'em na, fōn wun yāŋe pōse Nawēnne n diti tōon-be'ero sarɪya la mɛ bu? ⁴Bu fōn ka nannɪ la Nawēnne ɪr-sōŋɔ, la a sū-bugsum, la a sū-mā'are n zo'oge la? Fu mi tɪ Nawēnne ɪr-sōŋɔ la boortɪ fu teege la yem base tōon-be'ero. ⁵La fōn sūure ke'em mɛ tɪ fu ka buvra tɪ fu teege yem, bela tɪ fu lagsra sibgre bɪŋra fu mēŋa zuo gu'ura daar-seka tɪ Nawēnne wun pa'ale a sū-isgre di nērba sarɪya la sɪra la.

⁶Nawēnne wun bɔ nēra woo yɔvɔ mase wu ēn tōm se'em. ⁷Nēr-seba n mōrge ita sōŋa ɛera nā'asgɔ la pēka, la vɔm n ka ba'asɪ Nawēnne zē'am na, a wun bɔ ba la vɔm n ka ba'asɪ. ⁸La nēr-seba n ka sake bɔ, sɪ'ɪsra sɪra, dee ita sela n ka mase la, wun yē Nawēnne sū-isgre, la

sibgre. ⁹A wun boti toogo la sũ-sã'anjɔ n paage n̄er-seba wuu n t̄onni t̄on-be'ero la. Pɔspɔsi de la Zifd̄oma, pa'ase la seba n dagi Zifd̄oma.

¹⁰La n̄er-seba wuu n uti s̄oŋa wun yē la na'am p̄aŋa, la n̄a'asgɔ, la sũ-mã'asum. Pɔspɔsi de la Zifd̄oma, pa'ase la seba n dagi Zifd̄oma.

¹¹Se'ere n soe la, Nawēnne ka b̄okri n̄erba.

¹²N̄er-seba n ka b̄aŋe Amoyisi lɔɔ* la dee t̄onna t̄on-be'ero, ba wun s̄a'am ba t̄on-be'ero la iŷã ti la ka doose la lɔɔ la. La Zifd̄oma n tarɪ Amoyisi lɔɔ la dee t̄onna t̄on-be'ero la, Nawēnne wun d̄ike la lɔɔ la di ba sariya. ¹³La dagi seba n selsri lɔɔ la n mase Nawēnne zē'am, la de la seba n sake uti wu lɔɔ la n yeke se'em na n mase. ¹⁴Seba n dagi Zifd̄oma n ka tarɪ Amoyisi lɔɔ la, ba s̄an ita ba mēŋa wu lɔɔ la n yeke se'em na, la pa'ale ti ba mēŋa mi sela n mase me, baa la ban ka tarɪ lɔɔ la. ¹⁵Bela ba pa'ali ti sela ti lɔɔ la yeti ba ita la boe ba s̄uurum me, ti ba putē'ere n mi se'em na mē pa'ala ti bela de la sira. Bela ti ba putē'era ēn yeta ba ti ba ka ēŋe s̄oŋa, bu ba ēŋe s̄oŋa. ¹⁶B̄on-b̄ana wun puke la daar-seka ti Nawēnne wun boti Azezi-krisi di n̄erba yela n sugɛ sariya, mase wu k̄o-yēlga la ti mam m̄oole n yeti se'em na.

Zifd̄oma, la lɔɔ

¹⁷F̄on yeti f̄on de la Zifu* la, f̄on te'ege la Amoyisi lɔɔ* la yēsna ti f̄on de la Nawēnne n̄era, ¹⁸f̄on mi Nawēnne n boori se'em me. Lɔɔ la z̄asum f̄on me ti f̄on mina sela n ãn s̄oŋa, la sela n ka ãn s̄oŋa b̄oke. ¹⁹Fu tē'ese ti f̄on mi me t̄ana wun pa'ale f̄ɔɔsi sore. Fu tē'ese ti f̄on de la peelem bɔ n̄er-seba n boe lika puam na. ²⁰Fu tē'ese ti f̄on z̄asni na seba n ka mi, dee dena k̄oma karēs̄aama, se'ere n soe la, f̄on tē'ese ti lɔɔ la puam, f̄on tarɪ b̄aŋre z̄onz̄onnɔ, la sira me. ²¹F̄on z̄asni fu taaba la, bēm ti fu ka z̄asna fu mēŋa? F̄on m̄ooli yeta n̄erba ti ba da z̄ūura, dee ti f̄on mēŋa z̄ūura. ²²F̄on yeti n̄erba ti ba da ita yalsi, dee ita

yalsi fu mēṅa. Fōn nē'esri бага ti ba māale nā'asra la ti ba de la bōn-pō'osa, dee kē'era ba deto puam zūura ba yōoro dita. ²³Fōn yēsni me la Nawēnne lɔ la, dee si'isra lɔ la n yeke se'em na, ita Nawēnne yānne. ²⁴La gulse Nawēnne gōṅɔ puam yeti: < <Yāma Zifdōma ñyā ti buuri baseba nērba tɔgra be'em pɔ'ora Nawēnne yu'vre. > >

²⁵Fu sān sakra lɔ la, wāaga*f1* la tari yōoro me. La fu sān si'ise lɔ la, la de la zāṅa, la ān wu fu ka wā me na. ²⁶La buuri seka n ka wāti, nēra sān sake ita lɔ la n yeti ba ita se'em na, Nawēnne wun geele ē wu nēra n wā. ²⁷Nēr-seka n ka wā, dee sake ita lɔ la n yeke se'em na, wun zerge fu me fōn tari lɔ gōṅɔ la, wā dee si'isra lɔ la.

²⁸La dagi seka n iti Zifdōma urgo ti nērba yēta n de Zifu. La dagi wāaga* ti nērba yēti la n boti fu dena Nawēnne nēra. ²⁹Zifu sira sira de la seka n de Zifu a sūure puam. Wāaga sira sira de la Nawēnne Sia n iti sūure puam, la dagi wāaga wu lɔ n gulse se'em na. Nawēnne n pēgri nēr-ēṅa, la dagi nērsaalba.

3

¹La sān dena bela, Zifdōma tari zu-yēlga la bēm puam gānna seba n dagi Zifdōma, la wāaga la yōoro de la bēm? ²Yōoro la zo'oge me. Pɔspɔsi, Nawēnne dike a yetoga ēṅe la Zifdōma nu'usum. ³La ba nērba baseba sān dagna sira dōma, bela wun boti Nawēnne kān dena sira dāana me bu? ⁴Ayei, la dagi bela. Baa nērba wuu sān dena pōmpɔrndōma, Nawēnne ken dena la sira dāana wu lan gulse yeti:

< <Fu yetoga puam, nērba mi ti fōn mase me dena sira dāana.

Nērba sān zerge fo, fōn tari buuro me. > >

⁵La tōma n iti sela n ka mase la sān boti nērba bāṅe ti Nawēnne mase sela woo puam, ti wun yeti bēm? Ti wun yeti Nawēnne tōoma ka mase, ēn sibgri ti la ñyā bu? Ayei, la dagi bela. Mam tɔgri wu

nērsaalba n tē'esrɪ se'em na. ⁶Nawēnne sān dagna sira dāana, a kān yāŋe nɪ dita dūnia nērba sariya.

⁷La mam pōmpɔrŋɔ sān botɪ Nawēnne sira pukra pa'asra, tɪ la dēna nā'asgɔ bɔ'ɔra Nawēnne, bēm tɪ ba wun di mam sariya tɪ mam de la tōon-be'ero dāana? ⁸La sān dēna bēla, bēm tɪ tɪ kān yetɪ: < < Tɪ ita be'em tɪ la botɪ sēla n de sōŋa wa'am? > > Nērba baseba dōtɪ mam tɪ mam n yele bēla. Nawēnne wun di nēr-bāma sariya wɔ lan masē.

Nēra ka boe n masē Nawēnne zē'am

⁹Bēla, tōma Zifdōma gānnɪ nēr-seba n dagɪ Zifdōma la mē bu? Ayɛɪ! La dagɪ bēla. Mam dēŋe pōn yele tɪ Zifdōma, la seba n dagɪ Zifdōma, tōma wuu boe la tōon-be'ero yamne puam, ¹⁰wɔ lan gulse Nawēnne gōŋɔ puam yetɪ:

< < Nēra ka boe n masē, baa ayɪla.

¹¹Nēra ka boe n tarɪ yem ɛera tɪ a bāŋe Nawēnne, baa ayɪla.

¹²Nērba wuu bure la poore bɔ Nawēnne, ba wuu tuuge mē.

Nēra ka boe n itɪ sōŋa, baa ayɪla.

¹³Ba nōa ān wɔ yɔɔgɔ n vuke.

Ba tarɪ ba zilɪsɪ la pā'asra la nērba.

Ba nōore yetɔga ān wɔ bōnsēla zēlōm na.

¹⁴Ba nōa pɪrē la kā'a-be'ero, la yetɔg-be'ero.

¹⁵Ba ka yagsnɪ la nērba kva.

¹⁶Ban doose zē'e-sēka woo tole, la de la sā'aŋɔ, la toogo tɪ ba basrɪ mĩ.

¹⁷Ba ka mi sū-mā'asum sore.

¹⁸Ba nēnsɪ ka boe tɪ ba zoe Nawēnne. > >

¹⁹Tōma mi tɪ sēla wuu tɪ lɔɔ* la yetɪ la, a yetɪ la seba n dolɪ ē na. Bēla tɪ nērba wuu nōa wun mūm, tɪ ba wun bāŋe tɪ ba koŋe Nawēnne

zē'am. ²⁰Se'ere n soe la, nēra ka boe n tā wun sake loo la n yeke se'em na, mase Nawēnne zē'am. Loo la wen boti nēra bānra me ti a de la tōon-be'ero dāana.

Nawēnne n boti nēra mase a zē'am se'em

²¹La lēle wā Nawēnne puke pa'ale ēnā n uti se'em boti nēra mase a zē'am, ti loo la nēnā ka bōna mī. Loo gōnno, la Nawēnne nōt'osrība* dēnē pōn tōge a yelle me. ²²La de la nēra n bō Azezi-krisi sira īyā, ti Nawēnne boti a mase a zē'am. A uti bela bō'ora la nēr-seba wuu n bō Azezi-krisi sira la, bōkre ka boe. ²³Se'ere n soe la, nērsaalba wuu tōm na tōon-be'ero koje Nawēnne nā'asgo. ²⁴La Nawēnne yel-sōnne na īyā, a boti ba mase a zē'am na zānā, Azezi-krisi n fāari ba tōon-be'ero puam na īyā.

²⁵Nawēnne n looge Azezi ti a ki, ti a zum yese la īyā, a wun base nēr-seba n bō ē sira la tōon-be'ero taale. Bela Nawēnne pa'ale ti ēnā mase me dena sira dāana. Kurum, Nawēnne mā'age la a sūure ka sūbge nērsaalba ba tōon-be'ero la īyā. ²⁶A ēnē bela ti a pa'ale lēle wā ti ēnā de la sira dāana, ēnā mēnā mase me, dee boti nēr-seba n bō Azezi sira la mase ēnā zē'am.

²⁷Bela, bēm puam ti nēra tā wun wē yō'ogo? Sela ka boe. Bēm īyā? La dagi nēra n sakri loo la īyā ti a mase, la de la ēn bō Azezi-krisi sira īyā. ²⁸Tōma yē ti la de la nēra n bō Krisi* sira īyā ti a mase Nawēnne zē'am, la dagi ēn sakri loo la īyā.

²⁹Bu Nawēnne de la Zifdōma mā'a Nawēnne? A ka po dena nēr-seba n dagi Zifdōma la Nawēnne? A po dena la seba n dagi Zifdōma la Nawēnne. ³⁰Nawēnne de la ayula, a wun boti Zifdōma mase a zē'am, ban bō sira īyā, dee boti seba n dagi Zifdōma la mē mase a zē'am, ban bō sira īyā. ³¹Tōma n yeti nēra n bō sira īyā n boti a mase la, bela

boori ti la yeti bɔ sira ɪyã lɔ la ka le tara vɔore me bu? Ayɛi, la dagi bela. Tɔma pa'ale ti lɔ la tari vɔore me.

4

Abraham mām̄sgɔ

¹Ti wun yele Abraham* n de ti yaaba la yelle yeti bo? A yuun yē la bēm? ²La sãn de ni Abraham tɔoma ɪyã n boti a dena nēra n mase Nawēnne zē'am, a yuun tā wun wē yō'ogɔ me. La a ka tā wun wē yō'ogɔ Nawēnne zē'am. ³La gulse Nawēnne gōŋɔ puam yeti:

< < Abraham bɔ la Nawēnne sira, ti Nawēnne yeti a de la nēra n mase ēŋa zē'am. > > ⁴Nēra sãn tɔnna tɔoma, a to'ori la yɔɔɔ. Yɔɔɔ la dagi bɔ'a ti ba bɔ ē, la de la a bɔnɔ. ⁵La nēra sãn ka tɔm tɔone, dee bɔ Nawēnne n boti tɔon-be'ero dōma masra a zē'am na sira, Nawēnne wun boti a lebge la nēra n mase a zē'am ēn bɔ sira la ɪyã. ⁶Bela ti naba Adavidi* mē tɔge yeti, nēra ti Nawēnne yeti a mase a zē'am, ti la dagna a tɔoma ɪyã, tari sū-yēlga. ⁷A yele yeti:

< < Nēr-seba ti Nawēnne bɔ ba ba tuure sugri, seba ti a base ba tɔon-be'ero taale tari zu-yēlga.

⁸Nēr-seba ti Zuudāana Nawēnne ka geele a tɔon-be'ero la tari zu-yēlga. > >

⁹Zu-yēlga ēŋa ti ba tɔge a yelle la, de la nēr-seba n wã la mã'a bɔnɔ? Ayɛi, la po dena la nēr-seba n ka wã la bɔnɔ. Tɔma dēŋe yeti:

< < Abraham n bɔ Nawēnne sira la ɪyã, ti Nawēnne yeti a mase ēŋa zē'am. > > ¹⁰Wakat-kāna ti bɔn-ēŋa ēŋe? La de la Abraham n yuun wã la poorum bu, lan dēŋe a wāaga* la? La de la ēn yuun nãn ka wã la. ¹¹Bela poorum ti Abraham yãŋa yuun wã, ti la dena dāalgɔ pa'ale ti Nawēnne yeti a de la nēra n mase ēŋa zē'am, ēn bɔ sira la ɪyã,

wakate seka ti a nān ka wā la. Bela ti Abraham dena seba wuu n bɔ Nawēnne sira dee ka wā la sɔ-yaaba, ti Nawēnne yeti ba de la nērba n mase ēɲa zē'am. ¹²La Abraham ken dena la nēr-seba n wā la sɔ-yaaba, la dagi nēr-seba n wen wā la mā'a, la de la seba n bɔ Nawēnne sira wu Abraham n yuun bɔ sira se'em, dee yuun nān ka wā la.

Nawēnne bīɲe nōore bɔ la seba n bɔ ē sira la

¹³Nawēnne yuun bīɲe nōore bɔ la Abraham*, la a yusi yeti ba wun wa sɔna dūnia. La dagi Abraham n sakri lɔɔ la īyā ti a bīɲe nōore la, la de la ēn bɔ Nawēnne sira, ti Nawēnne yeti a mase ēɲa zē'am na īyā. ¹⁴La sān de ni nērba n sakri lɔɔ la īyā ti ba tɔ'ɔra bōn-sōma seba ti Nawēnne bīɲe nōore la, bela bɔ sira la ka tari yōorɔ, la Nawēnne nōor-bīɲre* la ka tari vōore. ¹⁵Lɔɔ la sɪ'ɪsgɔ boti Nawēnne sūure n isgra. La zē'e-seka ti lɔɔ la ka boe, sɪ'ɪsgɔ mē ka boe.

¹⁶Bela, la de la bɔ sira īyā, ti Nawēnne nōor-bīɲre la wun dena yel-sōnne bɔ'a n tari yōorɔ bɔ Abraham yusi la wuu. La, la ka de a yusi seba n doli lɔɔ la mā'a īyā, la de la nēr-seba wuu n bɔ Nawēnne sira wu Abraham n yuun bɔ sira se'em na. Abraham n de ti wuu sɔ-yaaba. ¹⁷La gulse Nawēnne gōɲɔ puam yeti: < < Mam wun boti fu lebge so'olum buuri zozo'e sɔ-yaaba. > > A de la tōma sɔ-yaaba Nawēnne ti a bɔ ē sira la zē'am. Nawēnne n boti kūm vɔ'ɔra, dee boti sela n ka boe bɔna. ¹⁸Abraham yuun bɔ la Nawēnne sira, tara putē'ere gu'ura sela ti a ka tari ni putē'ere ti la tā wun ēɲe. Bela ti a lebge so'olum buuri zozo'e sɔ-yaaba, wu Nawēnne n yuun yeti a yusi wun zo'oge se'em na.

¹⁹Abraham yuun kurgɛ mɛ, tara wu yuuma kɔbga, dee la kūm, dee ti a pɔga Asaara yuun dena kōndɔgre, dee kurgɛ, la baa bela Abraham n bɔ Nawēnne sira la ka bo'oge. ²⁰Nawēnne n yuun bīɲe nōore ti a ēɲe

sela bɔ ẽ na, a yem yuun ka yɔɔri, a bɔ sira mɛ. La ẽn yuun bɔ sira la base mɛ ti a yẽ pãña nã'asra Nawẽnne. ²¹A sũure yuun ke'em mɛ ti a mina sɔŋa sɔŋa ti Nawẽnne tã wun ẽŋe ẽn bĩŋe a nɔore ti a ẽŋe se'em na mɛ. ²²Bela ti Nawẽnne yeti a mase mɛ ẽŋa zẽ'am, ẽn bɔ sira la ãyã. ²³La dagi ẽŋa mã'a ãyã ti la gulse yeti: < < Nawẽnne yeti a mase ẽŋa zẽ'am. > > ²⁴La po dena la tɔma mẽ ãyã. Tɔma n bɔ Nawẽnne n vo'oge ti Zuudãana Azezi sira la ãyã, ti Nawẽnne yeti ti mase ẽŋa zẽ'am. ²⁵Nawẽnne daan base ti ba kv Azezi la tɔma tɔon-be'ero ãyã, dee vo'oge ẽ ti a boti tɔma dena nẽrba n mase a zẽ'am.

5

Krisi n naage tɔma la Nawẽnne

¹Bela, Nawẽnne boti tɔma dena seba n mase a zẽ'am na, tɔma n bɔ ẽ sira la ãyã. La tɔma tari sũ-mã'asum mɛ naage la Nawẽnne tɔma Zuudãana Azezi-krisi ãyã. ²Azezi-krisi n boti ti tãna wun kẽ Nawẽnne zẽ'am yẽ a yel-sɔnne, tɔma n bɔ ẽ sira la ãyã. Yel-sɔnne ẽŋa ti tɔma te'ege ze kãŋkãŋe, dee ita sũ-yẽlga tara putẽ'ere gu'ura ti ti wun yẽ na'am pãña Nawẽnne zẽ'am. ³La tɔma ken ita la sũ-yẽlga nãmsgɔ puam, tɔma mi ti nãmsgɔ boti ti mɔrgra senna la nẽŋa. ⁴Ti sãn mɔrgra senna nẽŋa, la boti ti ita la sira yãŋra. Ti sãn ita sira yãŋra, la boti ti tara putẽ'ere gu'ura la sela ti ti bɔ sira la. ⁵Putẽ'e-ẽŋa ti ti tari la kãn ẽŋe ti yãnne, se'ere n soe la, Nawẽnne Sia la ti a bɔ tɔma la ẽŋe la a nɔnlum ti sũa puam.

⁶Se'ere n soe la, tɔma n daan ka tã wun looge yelle la, Nawẽnne n looge yem wakat-seka la n paage la, Krisi ki mɛ tɔon-be'ero dɔma ãyã. ⁷La de la toogo ti nẽra ki nẽra n mase ãyã. La dase'ere, tã ti nẽr-seka wun yẽ buraane sake ki nẽr-sɔŋɔ ãyã. ⁸La Nawẽnne pa'ale ẽŋa n nɔŋe

tōma zozo'e se'em mε, ti tōma n daan ken dεna tōon-be'ero dōma la, ti Kriisi ki tōma īyā. ⁹Kriisi n ki ti a zum yese la īyā n boti tōma mase Nawēnne zē'am, bela, la de la sira ti Kriisi n wun fāage tōma, ti ti pōse Nawēnne sū-isgre. ¹⁰Tōma daan de la Nawēnne be'eba, la a Dayua la kūm īyā ti tōma naage la ē. Bela, tōma n naage la Nawēnne na, la de la sira ti Kriisi n vɔa la īyā, ti wun yē fāare. ¹¹Sela n pa'ase, tōma uti sū-yēlga mε la Nawēnne, tōma Zuudāana Azezi-kriisi īyā, ēɲa n boti tōma naage la Nawēnne na.

Adam la Azezi-kriisi yelle

¹²La de la nēra ayula n yuun tōm tōon-be'ero īyā n boti tōon-be'ero wa'am dūnia. Ti tōon-be'ero la tari kūm wa'am. Bela ti kūm kuvra nērsaalba wuu, ban tōnni tōon-be'ero la īyā. ¹³Hali lan dēɲe Nawēnne n bɔ Amoyisi* a lɔ la, tōon-be'ero yuun boe dūnia zuo mε. La lɔ la n yuun nān ka boe la, Nawēnne yuun ka geeli tōon-be'ero. ¹⁴Hali lan pɔse Adam* wakate tari ka paage Amoyisi wakate la, kūm pōn bɔna mε tāna nērba. Baa la nēr-sɛba tōon-be'ero n ka ān wu Adam n yuun s'i'se Nawēnne nōore se'em na wuu ki mε.

Adam yuun de la Azezi n yeti a wa'am na wōnne. ¹⁵La ba dagi buyula. Adam tuure la, la Nawēnne bɔ'a la ka tā wun dīke make taaba. Nēra ayula tuure īyā n boti nērba zozo'e kiira. La bāɲe-ya ti Nawēnne yel-sōnne n ān sōɲa gānna, la de la nēra ayula n de Azezi-kriisi īyā ti Nawēnne ēɲe nērba zozo'e yel-sōnne zo'oge gāɲe.

¹⁶Nawēnne bɔ'a la n uti sɛla la, de la to'ore la nēra ayula tōon-be'ero n ēɲe sɛla la. Nēra ayula tōon-be'ero la tari la sariyadia wa'am, ti la sēna la sibgre. La nērba n tōm tōon-be'ero zozo'e la poorum, Nawēnne yel-sōnne ti a ēɲe bɔ nērba la boti ba mase mε a zē'am.

¹⁷Lan de nēra ayula tuure īyā ti kūm tāna nērba wuu la, bāɲe-ya ti

nēra ayula n de Azezi-krisi mā'a ñyā, nēr-seba wuu ti Nawēnne ēṅe ba yel-sōnne zo'oge, boti ba mase a zē'am na, wun vɔa mɛ, dita na'am Azezi-krisi ñyā.

¹⁸Bela, nēra ayula tuure n boti Nawēnne dita nērba wuu sariya sɪbgra ba la, bela mē, nēra ayula mā'a tōonɛ n mase la ñyā n boti nērba wuu mase Nawēnne zē'am tara vɔm. ¹⁹Nēra ayula n si'ise Nawēnne nōore ñyā n boti nērba zozo'e dɛna tōon-be'ero dōma la, bela mē, nēra ayula mā'a n sake Nawēnne nōore ñyā, ti Nawēnne boti nērba zozo'e dɛna nērba n mase a zē'am. ²⁰La sān dɛna lɔɔ la, a wa'am mɛ ti tuure wun zo'oge pāi. La zē'e-sɛka ti tōon-be'ero zo'oru pa'asra, Nawēnne yel-sōnne zo'oru mɛ pa'asra gānna bela. ²¹Bela, tōon-be'ero n tari pāṅa boti nērba kiira la, bela mē, Nawēnne yel-sōnne n tari pāṅa boti nērba mase a zē'am tara vɔm n ka ba'asri, ti Zuudāana Azezi-krisi ñyā.

6

Azezi-krisi ñyā tōma vɔa la vɔm paalga

¹Bela, ti wun yeti bēm? Ti wun ken tōnna la tōon-be'ero ti Nawēnne yel-sōnne pa'ase zo'oge bu? ²Ayɛi, la dagi bela. La sān dɛna tōon-be'ero ɪrgɔ yelle, tōma de la kūm, tōon-be'ero ka le sɔna tōma. Ti wun ēṅe la wāne le tōnna tōon-be'ero? ³Yāma ka mi ti tōma wuu n mise ko'om lagum na Azezi-krisi dɛna ayula la, tōma lagum na ē mɛ dɛna ayula a kūm na puam? ⁴Bela, ko'om* misga la puam tōma po lagum na ē mɛ ki, ti ba laage tōma la ē lɛ. Nawēnne n de ti Sɔ na'am pāṅa n boti Krisi vo'oge la, tōma mē vɔa la vɔm paalga.

⁵La de la sira ti tōma n lagum na Krisi dɛna ayula a kūm puam na, bela, tōma mē wun lagum na ē dɛna ayula, vo'oge wu ēṅa n vo'oge

se'em na. ⁶Ti mina-ya ti tōma n de se'em kurum na lagum na Krisi me ki do-puurŋa* la zuo, ti tōma tōon-be'ero yemleego pāŋa wun sã'am ba'ase, ti tōma kãn le dēna tōon-be'ero yamsi. ⁷Se'ere n soe la, nēra sãn ki, tōon-be'ero ka le tara pāŋa la ě. ⁸La tōma sãn lagum na Krisi ki, tōma mi sra sra ti tōma mẽ wun lagum na ě vɔa. ⁹Tōma mi ti Krisi ki me, ti Nawēnne vo'oge ě, ti a kãn le ki. Kūm ka le tara pāŋa la ě. ¹⁰Krisi n ki la, a ki la nōore ayula sã'am tōon-be'ero pāŋa wakate wuu ãyã. La læle ti a vɔa wã, a vɔa bɔ'ɔra la Nawēnne nã'asgɔ. ¹¹Bela mẽ, geele-ya ya mẽŋa wu yãma ki me ti tōon-be'ero ka le sɔna ya, dee vɔa bɔ'ɔra Nawēnne nã'asgɔ, yãma n lagum na Azezi-krisi dēna ayula la ãyã.

¹²Bela, da base-ya ti tōon-be'ero le sɔna ya vɔm wã n ba'asri la, boti ya sake a yemleego n de be'em na. ¹³Da dɩke-ya ya ãyã zẽ'esɩ to'oto'ore ti ba dēna tōon-be'ero tōoma lɔgrɔ ti ya tara ba tōnna be'em. Dɩke-ya ya mẽŋa bɔ Nawēnne wu nērba n ki dee vo'oge. Dɩke-ya ya ãyã zẽ'esɩ to'oto'ore la wuu bɔ Nawēnne ti a tara ba tōnna sela n mase. ¹⁴Tōon-be'ero kãn le sɔna ya, se'ere n soe la, lɔ la ka le sɔna ya, la de la Nawēnne yel-sōnne n soe ya.

Dēna-ya sela n mase yamsi

¹⁵Bela, ti wun yeti bo? Ti wun tōnna la tōon-be'ero, lɔ la n ka soe tōma, dee ti Nawēnne yel-sōnne sɔna tōma la ãyã bu? Ayɛɩ, la dagi bela. ¹⁶Ya mi ti ya sãn dɩke ya mẽŋa bɔ nēra dēna a yamŋa sake a nōore, ya sɩɩ de la sɛka ti ya sakri la yamsi. Bela, ya sãn sake tōon-be'ero, ya de la tōon-be'ero yamsi, ti la sēna la kūm. La ya sãn sake Nawēnne nōore, ya de la a yamsi, ti a boti ya dēna nērba n mase a zẽ'am. ¹⁷Ti pu'use Nawēnne a yel-sōnne: Kurum, yãma daan de la tōon-be'ero yamsi, la yãma to'oge sra zãsnɔ la me wu ban zãsum ya

se'em na, sake ē la ya sūure wuu. ¹⁸Nawēnne yese ya tōon-be'ero yamne puam me, boti ya dena sela n mase yamsi. ¹⁹Mam dıke la nērsaalba yelle make bo ya, yāma n ka wōnnı sela vōore tɔtɔ la iyā. Yāma n daan dıke ya iyā zē'estı wuu bo tōon-dēgrɔ, la tōon-be'ero ti ba tara ba tōnna tōon-be'ero la, bela mẽ, lēele wā, dıke-ya ya mẽña wuu bo, tōnna sela n mase, welge to'ore dena pupeelem dōma.

²⁰Yāma n daan de tōon-be'ero yamsi la, sela n mase daan ka soe ya. ²¹Tōon-seba ti ya daan tōm na, ya yē la bēm yōorɔ ba puam? Lēele wā, la de la yānne bo ya, tōon-bāma ba'asgɔ de la kūm. ²²La lēele wā, Nawēnne yese ya tōon-be'ero puam me, ti ya lebge Nawēnne yamsi. Ya yōorɔ de la ya welge to'ore malgra ya mẽña dena pupeelem dōma. Bōn-ēña ba'asgɔ de la vɔm n ka ba'asrı. ²³Asıra, tōon-be'ero yɔɔrɔ de la kūm. La Nawēnne yel-sōnne bɔ'a de la vɔm n ka ba'asrı, tun lagım na ti Zuudāana Azezi-krisi dena ayula la iyā.

7

Amoyisi lɔɔ ka le sɔna tōma

¹M sɔbiisi, mam tɔgrı la yāma n mi lɔɔ la. Ya mi ti lɔɔ la soe nēra la wakat-seka ti a vɔa la. ²Tı dıke makre: Pɔka sān ele, lɔɔ la lu ē me lagım na a sira halı ka paage a sira la vɔm teka. La a sira la sān ki, pɔka la yese elle lɔɔ la n lu ē na a sira la puam me. ³Bela, a sān ele buraaga ayēma, dee ti a sira la ken vɔa, a ēņe la yalsı. La a sira la sān ki, elga lɔɔ la ka le sɔna ē. Bela, a sān ele buraaga ayēma, a ka ēņe yalsı.

⁴M sɔbiisi, yāma zē'am la mẽ de la bela. La sān dena la Amoyisi lɔɔ* la yelle, yāma de la kūm, ti lɔɔ la ka le sɔna ya, yāma n lagım na Krisi ki la iyā. Bela lēele wā, yāma yāña de la nēra ayēma n soe ya, la

de la Kriisi n ki ti Nawēnne vo'oge ē na n soe ya, ti ti wun tōnna tōon-sōma bɔ'ɔra Nawēnne. ⁵Kurum, tōma n daan vɔa wu tōma mēŋa n boori se'em na, lɔɔ la boti tōma yemleego bɔɔra la be'em, base ti tōma ãyã zē'esti wuu ita sɛla n sēm na kūm. ⁶La lɛɛɛ wã, tōma to'oge ti mēŋa lɔɔ la zē'am mɛ. Se'ere n soe la, tōma lebge la kūm lɔɔ la zē'am, a daan tari tōma wu tōma boe la yu'a deego puam na. Bela lɛɛɛ wã, tōma doli la so-paale ti Nawēnne Sia* pa'ale tɔ, tōnna bɔ'ɔra Nawēnne, la ka le dena lɔɔ kɛka n gulɛ la ti tōma doli.

Lɔɔ n pa'ale tōon-be'ero n de bōn-sɛka

⁷Bela, ti wun yeti bēm? Ti wun yeti lɔɔ la de la tōon-be'ero bu? Ayɛi, la dagi bela. La lɔɔ la daan sãn ka boe ni, mam kãn bãŋɛ tōon-be'ero n de sɛla. Lɔɔ la daan sãn ka ye le yeti: < <Da ita sũure > >, mam kãn bãŋɛ ni sũure n de sɛla. ⁸Lɔɔ la n bɔ tōon-be'ero sore ti a boti mam ita sɛla n de sũure buuri wuu. Se'ere n soe la, lɔɔ la sãn ka boe ni, tōon-be'ero de la bōn-ki'ɩŋa. ⁹Kurum, mam n daan ka bãŋɛ lɔɔ la, mam daan vɔa mɛ, ti yelle kana. La mam n yãŋa bãŋɛ lɔɔ la, ti tōon-be'ero tara pãŋa tōnna, dee ti mam ki. ¹⁰Lɔɔ la n de ni a tari nērba sēŋɛ vɔm zē'am na, a tari mam sēŋɛ la kūm zē'am. ¹¹Tōon-be'ero la n yē folle la, a dɩkɛ la lɔɔ la pã'ase mam yãŋɛ, boti mam ki.

¹²Bela, lɔɔ la de la bōn-sōŋɔ. Nōore ti Nawēnne bɔ la mē de la bōn-sōŋɔ, mase ãna sōŋa. ¹³Bela, sɛla n ãn sōŋa la n boti mam lebge kūm bu? Ayɛi, la dagi bela. La de la tōon-be'ero la n soe bela, a dɩkɛ la lɔɔ la n ãn sōŋa la boti mam ki, ti la puke pa'ale ti a siri de la tōon-be'ero. Bela ti lɔɔ la boti tōon-be'ero yãŋa lebge sɛla n de tōon-be'e-kãte halɩ ti la yōsgɛ.

¹⁴Ti mi ti lɔɔ la de la Nawēnne Sia yelle. La mam de la nērsaala ti tōon-be'ero tara mam ita ēŋa n boori se'em. ¹⁵Mam ka wōnni mam n

uti sela la vōore. Se'ere n soe la, mam ka uti mam boori ti m ēņe sela la, mam uti la sela ti mam ka boori ti m ēņe la. ¹⁶Mam sãn ita sela ti mam ka boori la, la pa'ale ti mam sake ti lɔɔ la ãn sōņa me. ¹⁷Bela, la dagi mam n uti bela, la de la tōon-be'ero n boe mam puam tōnna. ¹⁸La de se'em na, mam mi ti sela n ãn sōņa ka boe mam puam. Mam boori ti m yeti, sela n ãn sōņa ka boe mam n de nērsaala mēņa n vɔa se'em na puam. Mam boori ti m ēņe sela n ãn sōņa me, la mam ka tari pãņa wun ēņe. ¹⁹Bela, mam ka uti sōņa la ti mam boori ti m ēņe la, dee ita be'em na ti mam ka boori ti m ēņe la. ²⁰Mam sãn ita sela ti mam ka boori la, la dagi mam n uti bela, la de la tōon-be'ero la n boe mam puam tōnna.

²¹Bela, mam bãņe bōn-ēņa me: Mam n boori ti m ēņe sela n ãn sōņa la, mam tã ita la sela n de be'em mã'a. ²²Mam sũure puam, mam uti sũ-yēlga me la Nawēnne lɔɔ la. ²³La mam yē la bōnɔ ayēma n boe mam puam zebra la mam putē'e-sōņɔ la, boti mam dēna tōon-be'ero la n boe mam puam tōnna la yamņa. ²⁴La de la ninbãalga bɔ mam. ãne n wun fãage mam be'em n boe mam puam tara mam we'esa kũm zē'am wã puam? ²⁵Ti pu'use Nawēnne a yel-sōnne, ēņa n fãage tɔ, ti Zuudãana Azezi-krisi ãyã.

Bela, mam putē'ere puam mam sakri la Nawēnne lɔɔ la. La mam mēņa n boori se'em na n boti mam tōnna tōon-be'ero.

8

Vɔm ti Nawēnne Sia bɔ'ɔri

¹Bela, sɔbgre ka le bɔna nēr-seba n lagum na Azezi-krisi dēna ayɔla la zuto. ²Se'ere n soe la, Nawēnne Sia* pãņa n bɔ'ɔri vɔm Azezi-krisi ãyã la n fãage tɔ tōon-be'ero, la kũm pãņa puam. ³Lɔɔ* la ka tã wun fãage

nērsaalba base, se'ere n soe la, nērsaalba uti la ba mēṅa n boori se'em boti a ka tari pāṅa. La sela ti loo la ka tā'age ēṅe la, Nawēnne ēṅe me. A tōm na a mēṅa Dayva, ti a lebge nērsaala āna wu nērsaalba n de tōon-be'ero dōma, ti a ki yese tōon-be'ero. A kūm na puam ti Nawēnne di tōon-be'ero sariya sā'am a pāṅa nērsaalba puam.

⁴Nawēnne ēṅe bela ti ti mase ita wu loo la n yeti se'em na, tōma n vɔa wu Nawēnne Sia n boori se'em, dee ka vɔa wu nērsaalba mēṅa n boori se'em na. ⁵Nēr-seba n vɔa wu nērsaalba n boori se'em na, nērsaalba mēṅa yemleego n boori se'em na n pake ba. La nēr-seba n vɔa wu Nawēnne Sia n boori se'em na, Nawēnne Sia n boori se'em na n pake ba. ⁶Nērsaala mēṅa yemleego n boori se'em, sēm na kūm. La a sān dɔla Nawēnne Sia n boori se'em na, la bɔ'ɔri la vɔm, la sū-mā'asum. ⁷Nēra sān dɔla nērsaalba mēṅa n boori se'em na, la de la be'em la Nawēnne, se'ere n soe la, nērsaala mēṅa n boori se'em na ka sakri Nawēnne loo la, la a pōn ka tāna wun sake ē. ⁸Nēr-seba n doli nērsaalba mēṅa n boori se'em na ka tā wun paage Nawēnne yem.

⁹La yāma ka le vɔa wu nērsaalba mēṅa n boori se'em na, yāma vɔa wu Nawēnne Sia n boori se'em na, Nawēnne Sia n boe la yāma la iyā. Nēr-seka woo n ka tari Krisi Sia*f2* la, a ka de Krisi nēra. ¹⁰La Krisi sān bɔna la ya, Nawēnne Sia la bɔ'ɔri ya la vɔm, Nawēnne n boti ya mase a zē'am na iyā. La ya iyā wun ki me tōon-be'ero iyā. ¹¹La Nawēnne n vo'oge Azezi la, a Sia la sān bɔna la ya le, ēṅa n vo'oge Azezi-krisi n ki la, wun boti a Sia n boe la ya le la, mē bɔ ya iyā n kiiri la vɔm paalga.

¹²Bela, m sobiisi, la de la pēgre ti ti vɔa wu Nawēnne Sia n boori se'em na, la dagi ti vɔa wu ti mēṅa yemleego n boori se'em na. ¹³Ya sān ita nērsaalba mēṅa n boori se'em na, ya wun ki me. La ya sān boti Nawēnne Sia pāṅa ku tōon-seba ti nērsaala mēṅa boori la, ya

wun vɔa. ¹⁴Nēr-seba wuu n doli sore ti Nawēnne Sia pa'ali ba la, de la Nawēnne kɔma. ¹⁵Nawēnne Sia la ti a bɔ ya la ka boti ya dena yamsi, le zɔta dabeem. A boti ya dena la Nawēnne kɔma, ti a bɔ sore ti ya wi'ira Nawēnne yeti: < <Abba> >, n boori ti la yeti < <ti Sɔ> >. ¹⁶Nawēnne Sia la mēɲa tɔgrɪ la tōma sia pa'ala yeti tōma de la Nawēnne kɔma. ¹⁷Tōma n de a kɔma la, ti wun po to'oge bōn-sōma seba ti a bīɲe ti a bɔ a kɔma la, ti wun lagum na Krisi po to'oge bōn-seba ti a wun to'oge la. Tōma n nāmsrɪ la Krisi ɛ la, ti mē wun po lagum na ẽ yē nā'asgɔ.

Nā'asgɔ seka n boe nēɲa

¹⁸Mam mi mɛ ti nāmsgɔ seba ti tōma tarɪ zina wã de la fēe, ka tã wun duke make la nā'asgɔ seka ti tōma wun wa yē la. ¹⁹Bela n soe ti sela wuu ti Nawēnne nāam na gu'ura bɔɔra ti ba yē Nawēnne kɔma nā'asgɔ n wun puke la tɔtɔ. ²⁰Nawēnne n nāam bōn-seba la wuu lebge la sela n ka le tara vōore. La dagɪ ba mēɲa n boori bela, la de la Nawēnne n boti ba lebge bela, dee boti ba ken tara putē'ere gu'ura ²¹ti Nawēnne wun fāage ba sã'aɲɔ ti ba boe a puam na mɛ, ti ba to'oge ba mēɲa, lagum na Nawēnne kɔma po yē nā'asgɔ. ²²Ti mi ti halɪ wa paam zina, bōn-nāanisɪ la nāmsrɪ mɛ oosra la toogo, wu pɔka n virgri la. ²³La, la dagɪ bōn-nāanisɪ la mā'a, tōma mēɲa ti Nawēnne dēɲe bɔ ti a Sia pa'ale ti ti wun yē nā'asgɔ la, nāmsrɪ mɛ ti sūure puam gu'ura wakat-seka ti Nawēnne wun fāage ti ba'ase ti ti dena a kɔma. ²⁴Se'ere n soe la, tōma yē fāare mɛ, la tōma ken tara la putē'ere gu'ura. La fu sãn yē sela ti fu tarɪ putē'ere gu'ura la, fu ka le tara putē'ere gu'ura. Ane n tarɪ putē'ere gu'ura sela ti a yē? ²⁵La tōma n tarɪ putē'ere gu'ura sela ti tōma nãn ka yē la, tōma mā'age la ti mēɲa gu'ura ẽ.

²⁶Bela mē, Nawēnne Sia la sēnni sōŋra tōma me ti tɔrgɔ pɔam. Se'ere n soe la, tōma ka mi tōma n wun pu'use Nawēnne se'em ti la mase. La Nawēnne Sia mēŋa sosri Nawēnne bɔ'ɔra tōma mɛ, tɔgra yetɔga ti nēra ka tā wun tɔge. ²⁷La Nawēnne n mi nērba sūure la, mi sela ti Sia la boori mɛ. Se'ere n soe la, Sia la sosri bɔ'ɔra Nawēnne nērba, wu Nawēnne n boori se'em na.

²⁸Ti mi ti sela woo pɔam, Nawēnne uti sōŋa bɔ'ɔra la nēr-seba n nōŋe ē, seba ti a looge ba, mase wu ēn looge yem se'em na. ²⁹Nēr-seba ti Nawēnne pōn dēŋe looge la, a pōn dēŋe looge la yem ti ēŋa wun boti ba āna wu a Dayva la, ti a Dayva la wun dena kēema a sɔbiisi zozo'e zē'am. ³⁰La nēr-seba iyā ti a pōn dēŋe looge yem na, a wi ba mɛ. La seba ti a wi ba la, a boti ba mase mɛ a zē'am. Ēn boti seba mase a zē'am na, a bɔ ba la nā'asgɔ.

Sela ka boe n wun welge tōma la Nawēnne nōŋlum

³¹Bela ti wun yeti bēm? Nawēnne sān bɔna la tōma, āne n tā wun zɛbe la tōma? ³²Nawēnne ka base a mēŋa Dayva la ti a pōse kūm. A base mɛ ti ba kv ē tōma wuu iyā. A wun ēŋe la wāne kān bɔ tōma sela wuu la a Dayva la? ³³Āne n wun tā'age dōre nēr-seba ti Nawēnne looge la? La de la Nawēnne mēŋa n boti ba mase. ³⁴Āne n wun di ba sariya sibge ba? Nēra ka boe. Azezi-krisi ki mɛ, dee vo'oge, sēŋe ka zēa Nawēnne zɔvgɔ, sɔsra tōma iyā. ³⁵Āne n wun welge tōma la Krisi nōŋlum na? Toogo bu, sū-sā'anɔ bu, nāmsgɔ bu, kɔm bu, nōŋɔ bu, yel-pakre bu, bu kūm n wun yāŋe welge tōma? Sela ka boe. ³⁶La de wu lan gulse Nawēnne gōŋɔ pɔam yeti:

< < Nawēnne, fōn doosgo iyā ti tōma pōsra ti yōore daare woo.

Ba uti tōma wu piisi ti ba tarɔ sēnna kɔɔrna. > >

³⁷La yel-bāma wuu pɔam, seka n nōŋe tōma la n bɔ'ɔri tōma pāŋa ti

tōma yāŋra. ³⁸Mam mi sira sira, ti sela sela ka boe n wun yāŋe welge tōma la Nawēnne nōŋlum. La sān dena kūm, bu vɔm, bu malekadōma*, bu pānsi dōma, bu ke'eŋo dōma, bu sela n boe lælel wā, bu sela n sēm, ³⁹bu bōn-seba n tari pāŋa saazuum, bu sela n tari pāŋa tēŋa, bōn-nāaniŋa baa ayɫa ka tā wun welge tōma la Nawēnne nōŋlum ti a nōŋe tōma ti Zuudāana Azezi-krisi iŋyā la.

9

Nēr-seba ti Nawēnne looge

¹Mam yeti la sira, mam de la Krisi nēra, mam ka parni. Nawēnne Sia n boti mam mina m sūure puam ti mam n yeti m yeke se'em na, de la sira. ²Mam tari la sū-sā'aŋɔ zozo'e, la sū-dōoma daare woo m buuri la iŋyā. ³La sān tā ni ti Nawēnne kā be'em bɔ mam, ti mam welge la Krisi, ti la sōŋe mam sɔbiisi la n de mam buuri la, mam boori mɛ. ⁴Ba de la Israyeli dōma, la de la Nawēnne n looge ba, boti ba lebge a kɔma, bɔ ba nā'asgɔ, biŋe nōa la ba le, bɔ ba lɔɔ, la sore ti ba nā'asra ē, dee yeke ba ēŋa n wun ēŋe bōn-seba bɔ ba. ⁵Ba buuri la ze'ele la ti sɔ-yaaba Abraham*, la a yusi la puam. La Krisi n lebge nērsaala la, de la bāma buuri nēra. Ŕŋa n de Nawēnne n gānni sela woo la n soe pēka wakate n ka tari ba'asgɔ. Amina.

⁶Mam n yeke se'em na, la ka boori ti la yeti Nawēnne ka ēŋe ēn yeti a ēŋe se'em na. La, la dagi seba wuu n de Israyeli buuri la n de Israyeli dōma mēŋa mēŋa Nawēnne zē'am. ⁷La dagi Abraham yusi la wuu n de a kɔma mēŋa mēŋa. Se'ere n soe la, Nawēnne yeke Abraham yeti: <<La de la A'izaki kɔma buuri n wun dena fu yusi ti mam biŋe nōore ti m bɔ fu la.>> ⁸La boori ti la yeti, la dagi kɔm-seba ti Abraham dɔge la wuu n de Nawēnne kɔma. La de la kɔm-seba

n dɔge ti la doose wu Nawēnne n bīje a nōore se'em na, n de Abraham yusi mēja mēja, bāma n de Nawēnne koma. ⁹Nawēnne bīje nōore la wāna yeti: < <Wakat-ēna sān wa paage, mam wun leme wa'am, la Asaara wun tara dayva. > >

¹⁰La dagi bela mā'a, tōma yaaba A'izaki pɔga Arabeka yuun dɔge la dayɔɔsi bayi, ti ba dena luba. ¹¹⁻¹²Wakat-seka ti a yuun nān ka dɔge ba la, ba nān ka ēje sela n de sōja bu be'em, ti Nawēnne yuun yele yeti: < <Kēema la n wun lebge a yibga la tōntōnna, tōnna bɔ'ora ē. > > La a yele bela ti ēn looge yem se'em na n sēje nēja. Nawēnne n looge nēr-seka la, la dagi a tōoma ãyã, la de la Nawēnne n looge yem wi ē. ¹³La gulse Nawēnne gōɔɔ puam yeti: < <Mam nōje la Azakɔbi, dee base A'eso*. > >

¹⁴Bela, ti wun yeti bo? Ti wun yeti Nawēnne n uti se'em na ka mase bu? Ayɛi, la dagi bela. ¹⁵Nawēnne yuun yele Amoyisi* yeti:

< <Mam wun zoe la nēr-seba ti mam boori la ninbāalga.

La mam wun tara la nēr-seka ti mam boori la zīile. > >

¹⁶Bela, la dagi nērsaala n boori se'em, bu ēn mōrgri se'em, la de la Nawēnne n zoti ninbāalga. ¹⁷La Nawēnne gōɔɔ puam la gulse ti Nawēnne yele naba Afaarō yeti: < <Mam n bɔ fu na'am ti m dɔke fu pa'ale m pāja, ti m yu'ore wun yese dūnia wuu. > > ¹⁸Bela, Nawēnne zoti la nēr-seba ti a boori la ninbāalga, la ēn boori ti seka sūure ke'em na, a boti a sūure ke'em mɛ.

¹⁹Dase'ere fu wun soke mam yeti: < <La sān dena bela, bēm ti Nawēnne zergra nērba ti ba ka ēje sōja? Āne n tā wun zagse Nawēnne n boori se'em na? > > ²⁰Nērsaala, fōn de la āne wē'era nōke'ene la Nawēnne? Yɔgrɔ lɔkɔ wun soke yagba n yagbe ē na yeti: < <Bēm ti fu yagbe mam wāna? > > ²¹Yagba la tā wun ēje ēja n boori se'em la yɔgrɔ la mɛ. A tā wun dɔke yɔgrɔ buyila mɛ, dɔke ba

pusvka yagbe ləkɔ n tari yōoro dena tʉvlum bōnɔ, dee dɪke pusvka yagbe ləkɔ n dagɪ tʉvlum bōnɔ.

²²La de la bɛla tɪ Nawɛnnɛ ɛŋɛ. Nawɛnnɛ boortɪ tɪ a pa'ale la a sũ-isgre, dee botɪ nɛrba wuu bāŋɛ a pāŋa. La a yōke a mɛŋa mɛ, mā'age a sũure la sɛba n masɛ tɪ a sũ-isgre sigɛ ba zuto, dee nara tɪ a sã'am ba la. ²³La a ken bɔɔra tɪ a pa'ale la a nã'asgɔ n zo'oge se'em nɛr-sɛba tɪ a zotɪ ba ninbãalga la zɛ'am. Bãma de la sɛba tɪ a pōn mãasum tɪ ba po yɛ a nã'asgɔ. ²⁴La de la tōma sɛba tɪ a looge la, la dagɪ Zɪfdōma la mã'a, la po dena la sɛba n dagɪ Zɪfdōma la. ²⁵La de wu A'oze gōŋɔ la puam tɪ la pōn gulɛ tɪ Nawɛnnɛ yetɪ:

< < Nɛr-sɛba n yuun dagɪ mam nɛrba la,
mam wun wi ba tɪ ba dena mam nɛrba.
La buuri sɛka tɪ mam yuun ka nōŋɛ ba la,
mam wun yetɪ mam nōŋɛ ba mɛ.

²⁶La zɛ'e-sɛka tɪ ba yuun yetɪ ba tɪ ba dagɪ mam nɛrba la,
zɛ'e-ɛŋa ba wun wi'ira ba tɪ mam n de Nawɛnnɛ n vɔa la
kɔma. > >

²⁷La Nawɛnnɛ nōtɔ'ɔsa A'ezayi* yuun tɔgɛ lsrayɛlɪ dōma yelle yetɪ:

< < Baa lsrayɛlɪ dōma sōore sãn zo'oge wu tɛntōnbĩ'isgo n boe ko-
kãtɛ nōorum na,
ba nɛrba fɛfɛɛ mã'a n wun yɛ fãarɛ.

²⁸Se'ere n soe la, Zuudãana Nawɛnnɛ n yeke se'em na,
a wun ɛŋɛ a wuu mɛ tɔtɔ tɛŋa zuo. > >

²⁹La ken dena wu A'ezayi n yuun pōn yeke se'em yetɪ:

< < Zuudãana Nawɛnnɛ n de ke'eŋo wuu dãana la yuun sãn ka
dege nɪ yusɪ fɛɛ bɔ tōma,
tōma wun lebge nɪ wu Sodom* dōma,
dee ãna wu Gomōortɪ dōma. > >

Nēr-seba n bɔ Azezi sɪra n mase Nawēnne zē'am

³⁰Bela, ti wun yeti bo? Bu-zāṅsi* n daan ka eeri ti ba dena nērba n mase Nawēnne zē'am na, Nawēnne boti ba dena la nērba n mase a zē'am, ban bɔ ẽ sɪra la ɪyā. ³¹Dee ti lsrayeli dōma n daan eeri ti lɔɔ la boti ba dena nērba n mase Nawēnne zē'am na, ka yāṅɛ ɛṅɛ lɔɔ la n ye le se'em na. ³²Bēm ɪyā? Ba ka eeri ti ba mase Nawēnne zē'am bɔ sɪra ɪyā, ba tē'ese ti bāma tōoma mā'a ɪyā ti bāma wun mase Nawēnne zē'am. Ba wē ba nāma la kugre ti nērba wē'eri nāma luta, ³³wu lan gulse Nawēnne gōṅɔ puam yeti:

< < Bɪse ya!

Mam bīṅri la kugre*f3* n wē'eri nāma Siyō*,
a de la kugre n boti nērba wē'era nāma luta.

La nēr-seka n bɔ ẽ sɪra, yānne kān di ẽ. > >

10

lsrayeli dōma ka bɔ kō-yēlga la sɪra

¹M sɔbiisi, mam n boori se'em na m sūure wuu, dee sɔsra Nawēnne se'em de la mam buuri la yē fāare. ²Mam yeti me ti ba wisge ba mēṅa me la Nawēnne sore doosgo, la ba ka mi la so-seka ti ba wun doose.

³Ba ka mi Nawēnne n uti se'em boti nērba masra a zē'am, dee bɔɔra ti ba ɛṅɛ sɔa ba mēṅa mase Nawēnne zē'am. Bela, ba ka sake Nawēnne n uti se'em boti nērba masra a zē'am na. ⁴Krisi n de lɔɔ* la kɔkɪ't, ti nēr-seka woo n bɔ ẽ sɪra wun mase Nawēnne zē'am.

⁵Amoyisi* yuun gulse tɔge nēra n wun ɛṅɛ se'em ti lɔɔ la boti a mase Nawēnne zē'am yelle, yeti: < < Nēr-seka n sake lɔɔ la n yeti se'em na, wun vɔa, ɛn sake lɔɔ la ɪyā. > > ⁶La sān dena nēra n wun bɔ Nawēnne sɪra ti a boti a mase a zē'am na yelle, la gulse yeti: < < Da tē'ese fu

sūure pvam yeti, āne n wun zom Nawēnne yire? > > La boori ti la yeti, āne n wun zom Nawēnne yire boti Kisi sige. ⁷ < < Dee da yeti, āne n wun sige ki'in-tēja? > > La boori ti la yeti, āne n wun sige boti Kisi vo'oge. ⁸ Bela, la ken gulse yeti bēm? La yeti: < < Nawēnne yetoga la lem fu mε, a boe la fu nōorum, la fu sūurum. > > La de la yetog-ēja n bela ti tōma mooli yeti nērba ti ba bɔ sira. ⁹ Fu sān tōge la fu nōore nērba zē'am ti Azezi de la Zuudāana, la fu sān bɔ sira fu sūurum ti Nawēnne vo'oge ē mε, fu wun yē fāare. ¹⁰ La de la sūure pvam ti nēra bɔ'ori Azezi sira, ti Nawēnne boti a mase a zē'am, nēra tōgri la a nōore yetoga yēta fāare. ¹¹ La gulse Nawēnne gōŋɔ pvam yeti: < < Nēr-seka woo n bɔ ē sira, yānne kǎn di ē. > > ¹² Bela, welgre ka boe Zifdōma, la bu-zāŋsi* tējasuka. Ba lagum tara la Zuudāana ayula n itti bōn-sōma bɔ'ora nēr-seba wuu n sosri ē na. ¹³ Se'ere n soe la, la gulse yeti: < < Nēr-seka woo n sosri Zuudāana sōŋre, a wun yē fāare. > >

¹⁴ La ba wun ēŋe la wāne sose ē sōŋre, ba sān ka bɔ ē sira? La ba wun ēŋe la wāne bɔ ē sira, ba sān ka wōm a kō-yēlga la? La ba wun ēŋe la wāne wōm kō-yēlga la, ti nēra sān ka moolε? ¹⁵ La kō-yēlga la wun ēŋe la wāne moolε, Nawēnne sān ka tōm nērba? Wu Nawēnne gōŋɔ n yeke se'em na: < < La de la sū-yēlga, fu sān yē nēr-seba n taru kō-yēlga sēna la. > > ¹⁶ La, la dagi nērba wuu n sake kō-yēlga la. Bela ti A'ezayi* gulse Nawēnne gōŋɔ pvam yeti: < < Zuudāana, āne n bɔ kō-yēlga la ti tōma moolε la sira? > > ¹⁷ Bela, la de la kō-yēlga la selsgo n sēm na bɔ sira, la kō-yēlga la de la Azezi-kisi yelle ti ba tōgri.

¹⁸ Bela, mam sokri ya yeti, yāma tē'ese ti ba ka wōm kō-yēlga la me bu? Ba wōm mε. La de wu Nawēnne gōŋɔ n yeke se'em na:

< < Ba kōa la paage tēja wā wuu mε,

ba yetɔga la saage dūnia teka wuu mɛ. > >

¹⁹Mam wun ken soke ya yeti, yāma tē'ese ti lsrayeli dōma ka wōm a vōore mɛ bu? Ba wōm mɛ. Amoyisi n yuun de pɔspɔsi dāana n yele ti Nawēnne yeti:

< < Mam wun boti ya tara sūure la so'olum nērba n dagi mam nērba,
mam wun boti ya sūure isge la so'olum sɛka n ka mi sela vōore. > >

²⁰La A'ezayi yē buraane mɛ yele ti Nawēnne yeti:

< < Nēr-seba n daan ka eeri mam na, ba yē mam mɛ,
mam puke m mēnja mɛ pa'ale nēr-seba n daan ka sokri mam yelle la. > >

²¹Dee yele lsrayeli dōma yelle yeti:

< < Mam tēge m nu'usi mɛ daare la wuu teese nērba n si'isri, dee ka sakra. > >

11

Nawēnne ka zagse lsrayeli dōma

¹Bela mam sokri mɛ, Nawēnne zagse a nērba la mɛ bu? Ayei, la dagi bela, mam mē de la lsrayeli nēra, mam de la Abraham* yuŋa, Abēnzamē buuri. ²Nawēnne ka zagse a nērba la ti a pōn dēŋe looge la. Ya mi Nawēnne gōŋɔ la puam zē'e-sɛka ti A'eli* yuun yōnni la Nawēnne lsrayeli dōma yelle, yeti: ³< < Zuudāana, ba ku fu nōtɔ'ɔsriɔba la mɛ, ba sirge fu kāabgɔ* zē'esi la mɛ. Mam m yila mā'a n weege, ti ba bɔɔra ti ba mē ku mam. > > ⁴La Nawēnne yuun lerge ē yeti bēm? A lerge ē yeti: < < Mam boti nērba tusa ayopɔi n weege dena mam nērba, bāma ka ka dūma Baali n de bagre la nējam. > >

⁵Bela mē, lēle wā, nērba boe me fēe, ti Nawēnne looge ba a yel-sōnne īyā. ⁶La de la a yel-sōnne īyā ti a looge ba, la dagi ba tōoma īyā. Nawēnne loore la sān de ni na nērba tōoma īyā, a yel-sōnne na ka le dēna yel-sōnne.

⁷Bela, bēm ēḡe? Israyeli nērba ka yē bāma n eeri sela la. La de la seba ti Nawēnne looge fēe ba puam na mā'a n yē. La nērba baseba la lebge la nērba n ka wōnni sela vōore. ⁸La ēḡe wu Nawēnne gōḡo n yeke se'em yeti:

< < Halu wa paam zīna,
Nawēnne n burse ba yem
ti ba ka wōnna sela vōore,
boti ba nini ka yēta,
ti ba tuba ka wōnna. > >

⁹Adavidi* mē yeke Nawēnne yeti:

< < Boti ba dia la dēna bērgo bo ba, yōke ba,
ti ba wē nāma lui yē nāmsgo n de ba yōoro.

¹⁰Boti ba nini āna lim,
ti ba da yēta,
boti ba nāmsra wakate wuu
wu nēra n tu zeero gō'osra. > >

¹¹Bela mam sokri ya yeti: Israyeli dōma n wē nāma lui la, la ba'ase me bu? Ayei, la dagi bela. La ban tuuge la īyā, ti bu-zāḡsi* tā'age yē fāare. Nawēnne ēḡe bela ti la boti Israyeli dōma n ita sūure. ¹²Israyeli dōma tuure la n tari yōoro bo dūnia, boti bu-zāḡsi tara Nawēnne bōntarsōm na. Ba sān yē fāare ba zōnzōnno, la won tara yōoro zo'oge gāna.

Bu-zāḡsi, la Zifdōma fāare yelle

¹³Mam yāṅa yeti m tɔgɛ la yāma seba n de bu-zāṅsi* la: Mam n de Krisi Tōntōnna* tōnna bɔ'ɔra yāma n de bu-zāṅsi la, mam pēgrɪ m tōone na mɛ. ¹⁴Mam uti bela ti m boti m buuri la n ita sūure, ti la boti ba nērba baseba yē fāare. ¹⁵Nawēnne n daan base ba kēnkernja la, a boti dūnia nērba wuu n naagɛ la ēṅa. La Nawēnne n wun wa le to'oge ba la, la wun āna la wāne? La wun āna wu nēra n ki dee vo'oge.

¹⁶Fu sān dɪkɛ pɔspɔsi borborɪ la bɔ Nawēnne, borbor-seba n weege la wuu mē de la a bōnɔ. Tia yēga sān dena Nawēnne bōnɔ, tia la wila mē de la a bōnɔ. ¹⁷Israyeli dōma la ān wu Oliivi* tia ti ba sele, ti ba ku'use a wila base. La fōn de bu-zāṅka la ān wu Oliivi tia n boe weem wille ti ba ku'uge, dɪkɛ toṅe la tia ti ba sele la wila. Fōn ān wu wille la n to'ori sōṅre tia ti ba sele la yēga zē'am na. ¹⁸Bela, da pɔ'ɔra wila ti ba ku'use base la. Da wē'era yō'ogɔ, ti la dagi fōn tari yēga la, yēga la n tari fōn.

¹⁹Tā ti fu wun yeke yeti: < < Nawēnne ku'use wila la base, ti a dɪkɛ la mam toṅe. > > ²⁰La de la sira, la de la ban ka bɔ Nawēnne sira la iyā ti a ku'use ba base. La fōn bɔ ē sira la iyā ti fu toṅe mī. Bela, da ita tuta'alum, zɔta dabeem. ²¹Se'ere n soe la, Nawēnne n ka base tia mēṅa wila la, bāṅe ti a ken kān base fōn mē, fu sān ka bɔ ē sira. ²²Bise Nawēnne n uti sōṅa se'em, dee tɔi se'em. A tɔi mɛ la seba n ka sakri ē na, dee ita fu sōṅa, fu sān ken bɔna a sōṅa la pvam. Sān dagna bela, a mē wun ku'uge fu base mɛ. ²³La Zifdōma la sān base ba s'isgɔ la, dee bɔ Nawēnne sira, Nawēnne wun dɪkɛ ba mɛ lebe toṅe la tia la. Nawēnne tari pāṅa mɛ wun dɪkɛ ba lebe toṅe. ²⁴Fōn ān wu Oliivi tia n boe weem wille, ti Nawēnne ku'uge toṅe Oliivi tia ti ba sele n dagi fu zē'am. La bāma n de tia ti ba sele la mēṅa wila la, la de la nāana ti Nawēnne dɪkɛ ba lebe toṅe la ba mēṅa tia la lɛ.

²⁵M sɔbiisi, mam boori mɛ ti ya bāṅe yelle n sɔgɛ la, ti ya da bise ya

mēŋa ti yāma de la yem dōma: lsrayeli nērba baseba n ke'em ba
sūure ka bɔ sira la, la wun yuuge me halı tarı ka paage wakat-seka ti
bu-zāŋsi wuu ti Nawēnne looge wun yē fāare. ²⁶Bela ti lsrayeli buuri
wuu wun yē fāare, wu Nawēnne gōŋɔ puam la gulse ti Nawēnne yeti:

< < Fāagra la wun ze'ele la Siyō* wa'am.

A wun boti Azakɔbi* yusi da le si'isra.

²⁷Mam nōore n bela ti mam wun bīŋe la ba,

wakat-seka ti mam wun yese ba tōon-be'ero base la. > >

²⁸Bāma n zagse kō-yēlga la, ba lebge la Nawēnne be'eba, ti la dena
yāma sōŋre. La, la sān dena Nawēnne n looge ba la, ba de la nēr-seba
ti Nawēnne nōŋe ba, ba yaabdōma iŷā. ²⁹Nawēnne ka teeri putē'ere la
nēr-seba ti a looge, ēŋe yel-sōnne bɔ ba la. ³⁰Kurum, yāma bu-zāŋsi la
zagse Nawēnne me, la lēele wā, a zoe yāma ninbāalga me, lsrayeli
dōma n zagse ē na iŷā. ³¹Bela, bāma n zagse Nawēnne lēele wā, ti a
zoe yāma ninbāalga la, la de la ti a mē wun zoe ba ninbāalga.

³²Se'ere n soe la, Nawēnne base nērba wuu ti ba si'ise ē, ti a lagum
zoe la ba wuu ninbāalga.

³³Nawēnne yel-sōnne, la a yem,

la a bāŋre la zo'oge me.

Nēra ka tā wun bāŋe a putē'ere.

La nēra ka tā wun bāŋe a sorɔɔɔ ti a doli la vōore.

³⁴La de wu Nawēnne gōŋɔ n gulse yeti:

< < Āne n mi Zuudāana putē'ere?

Bu āne n tā wun kā'an ē?

³⁵Bu āne n bɔ ē sela,

dee ti a wa lebse ē? > >

³⁶Sela woo ze'ele la Nawēnne zē'am.

Ēŋa iŷā ti sela woo bɔna,

dee dena a bōnɔ.

Ēŋa n soe nā'asgɔ wakate wuu.

Amina.

12

Nawēnne nērba vɔm paalga

¹M sɔbiisi, Nawēnne n zoe tōma ninbāalga bela la, mam kā'anɪ ya ti ya duke ya mēŋa bɔ ē ti la āna wu kāabgɔ n vɔɪ, ti ya welge to'ore dena a nērba n paari a yem. Bela n de pu'usgɔ sore n mase bɔ Nawēnne. ²Da āna-ya wu dūnia wā dōma n ān se'em na. Base-ya ti ya yem like dena paalga, ti ya teege, tā'age bāŋe Nawēnne n boori se'em: Sela n ān sōŋa, sela n paari a yem, sela n mase sōŋa sōŋa.

³Nawēnne yel-sōnne ti a ēŋe bɔ mam na īyā, mam yetɪ ya wuu mɛ, ti ya da tē'esɛ tē'esgɔ n gānnɪ ya mēŋa. La tara ya tē'esgɔ n mase, ti la doose wu Nawēnne bɔ'a ti a bɔ ya nēra woo, yāma n bɔ ē sira la.

⁴Tōma īyā de la ayɪla, dee tara zē'esɪ zozo'e, ti zē'a woo tōoma dena to'oto'ore. ⁵Bela mē, baa la tōma n zo'oge la, tōma lebge la īyā ayɪla, tōma n lagum na Krisi dena ayɪla la. La tōma lagum na taaba āna wu īyā ayɪla zē'esɪ to'oto'ore la. ⁶Tɪ to'oge la bɔ'a to'oto'ore, mase wu Nawēnne n ēŋe ti yel-sōnne bɔ nēra woo se'em na. Bela, sɛka n tari bɔ'a n de a tɔ'ɔsra Nawēnne yetɔga tɔgra bɔ'ɔra nērba, a tɔ'ɔsra tɔgra ti la mase wu bɔ sira n de se'em na. ⁷Nēr-sɛka bɔ'a n de sōŋre tōone, a sōŋra. Nēr-sɛka bɔ'a n de a zāsna nērba, a zāsna. ⁸Nēr-sɛka bɔ'a n de a kā'ana nērba, a kā'ana. La sɛka bɔ'a n de a bɔ'ɔra, a bɔ'ɔra la a sūure wuu. La sɛka bɔ'a n de a dena nēŋadāana, a wɪsgɛ a mēŋa tōnna sōŋa. Tɪ nēr-sɛka bɔ'a n de a zɔta nērba ninbāalga, a ita la sū-yēlga.

⁹Base-ya ti ya nōŋlum dena sira nōŋlum, sise-ya be'em, la ya gure

sela n ān sōṅa. ¹⁰Nōṅe-ya taaba sōbiisi nōṅlum. La ya nanna taaba, tē'esra taaba yelle. ¹¹Wuṣge-ya ya mēṅa, da zōta-ya zēyāgre. Tōnna-ya Nawēnne tōoma la ya sūure wuu. ¹²lta-ya sū-yēlga yāma n tarı putē'ere gu'ura sela la iyā. Mā'age-ya ya sūure toogo puam, mōrge-ya sēṅe nēṅa la Nawēnne pu'usgo wakate wuu. ¹³Sōṅe-ya Nawēnne nēr-seba n boort sōṅre la, la ya ita sāama sāano.

¹⁴Pu'usra-ya Nawēnne bō'ora seba n nāmsrı ya la. Pu'usra-ya tı Nawēnne ēṅe yel-sōnne bō ba, la ya da kā'ara kā'a-be'ero bō'ora ba. ¹⁵lta-ya sū-yēlga la nēr-seba n tarı sū-yēlga la. La ya kella la seba n kelli. ¹⁶Tara-ya putē'ere ayıla la taaba. Da dena-ya pa'al-m-mēṅa dōma, sakra-ya lagna la tarımdōma*f4*. Da busra ya mēṅa tı yāma de la yem dōma.

¹⁷Da lebse nēra be'em, be'em iyā. Narge-ya pāṅa ita sela n ān sōṅa nērba wuu zē'am. ¹⁸La sān dena la yāma, ya sān tāna, ya botı sū-mā'asum bōna yāma la nērba wuu tēṅasuka. ¹⁹M sōbi-nōṅrı, da lebse-ya lerge be'em ya mēṅa. Base-ya tı Nawēnne sūure isge. Tı la gulse Nawēnne gōṅo puam tı Nawēnne yetı:

< < Mam n de m lebse be'em,
la de la mam n wun yō. > >

²⁰La ken gulse yetı:

< < Fu be kōm sān dōnna,
bō ē dia tı a di,
koyūuro sān tarı ē,
bō ē ko'om tı a yū.
Fu sān ēṅe bela,

la ān wu bugsāana tı fu dıke dōgle a zuugo la. > >

²¹Da base tı be'em yāṅe fō, ēṅe sōṅa yāṅe be'em.

13

Ti sakra tēja la s'wɔnɪba

¹Nēra woo sake tēja la s'wɔnɪba n soe ke'eɲo la. Se'ere n soe la, nēra ka tarɪ nōore ti la ka ze'ele Nawēnne zē'am. La de la Nawēnne n bɔ tēja la s'wɔnɪba ke'eɲo. ²Bela, nēr-seka sān s'i'se tēja la s'wɔnɪba nōore, a s'i'se la Nawēnne n boori ti la dena se'em na. Nēr-seba wuu n s'i'sri la, eeri la sibgre bɔ'ɔra ba mēɲa. ³Nēr-seba n uti sōɲa la ka zoti dabeem la seba n bisri tēja la, la de la nēr-seba n uti be'em na n zoti dabeem. Fōn boori ti fu da zɔta nēr-seba n soe ke'eɲo la me bu? lta sōɲa ti ba pēge fɔ. ⁴Se'ere n soe la, seka n soe ke'eɲo la tōnnɪ la Nawēnne tōoma fu sōɲre ïyā. La fu sān ēɲe be'em, zoe a dabeem, ti la dagi zāɲa ti a tara ke'eɲo wun sibge. A tōnnɪ la Nawēnne tōone sibgra nēr-seka n ēɲe be'em pa'ala Nawēnne sū-isgre. ⁵Bela ïyā ti la nara ti nērba sakra nōore, la dagi ban wun sibge ya la mā'a ïyā, la de la yan mi ya sūure puam ti la ān sōɲa la ïyā. ⁶La ken dena la bōn-ēɲa ïyā ti ya yɔɔra lampo. Seba n to'osri lampo la, la de la Nawēnne n bɔ ba tōon-ēɲa ti ba tōnna sōɲa. ⁷Bɔ-ya nēra woo sɛla n de ya bɔ ē. Yɔ-ya lampo bɔ seka n de a to'oge lampo, yɔ-ya sɛla woo n de ya yɔ bɔ seka n de a to'oge. Zɔta-ya seka n de ya zɔta, la ya nā'asra seka n de ya nā'asra.

Ti nōɲe taaba dee vɔa la puppelem

⁸Da tara-ya nēra sānne. Sānne seka ti ya wun tara de la ya nōɲe taaba. Nēr-seka woo n nōɲe a tadāana sake Nawēnne lɔɔ* la wuu me. ⁹Nawēnne yeti: < <Da ita yalsɪ, da ku nēra, da zūura, da ita sūure la nēra bōnɔ. > > Nawēnne nōa bāna, la baseba la wuu lagse taaba la yetɔg-ēna ayula puam n yeti: < <Nōɲe fu tadāana wu fu mēɲa

la. > > ¹⁰Nõnɔm base me ti n̄era ka ita a tadāana be'em. Bela, n̄era n n̄oŋe a taaba sake la loo la wuu.

¹¹Ēŋe-ya bela, yāma n mi wakat-seka ti ti boe wā la iŷā, wakate paage me dena ya n̄eege dee base ḡem. Fāare la lem tōma me l̄eɛɛ wā gānna wakat-seka ti tōma daan p̄ose bo Azezi-krisi sira la. ¹²Tēŋa sutum me ti beere deege wiire. Bela, base-ya lika tōoma, dee d̄ike Nawēnne z̄ebre loɔro tōnna peelem tōoma. ¹³Base-ya ti ti tōnna la pupeelem wu n̄erba n s̄enni wunt̄eŋa. Ti base-ya p̄uyā'an-yooro, la dāam buka, la tūulgo, la yalsi, la z̄ebre, dee da ita sūure la taaba. ¹⁴Ita-ya ti Zuudāana Azezi-krisi n ēŋe se'em na, da base-ya ti n̄ersaala n boori se'em yelle pake ya, ti ya boora ti ya ita yāma mēŋa yemleego n boori se'em.

14

Seba n tari pāŋa, la seba n ka tari pāŋa Nawēnne doosgo puam

¹To'oge-ya n̄er-seka n ka tari pāŋa Nawēnne doosgo puam na sōŋa, la ya da w̄'era n̄oke'ene la ē le a tē'esgo puam. ²N̄er-seka tē'esē me ti ēŋa tā wun di sela woo me, ti seka pāŋa n p̄'ori la dita b̄onkoolā la z̄ero mā'a. ³Bela, seka n diti sela woo la, da p̄'ora n̄er-seka n ka diti sela woo la. La seka n ka dita sela woo la, da z̄erge seka n diti sela woo la, se'ere n soe la, Nawēnne to'oge ē me. ⁴Fōn de la āne z̄egra n̄era ayēma tōntōnna? A s̄an ze saazuo, bu a s̄an lui me, bela pake la a zuudāana. La a wun ze la saazuo, se'ere n soe la, Zuudāana la tari pāŋa me wun boti a ze k̄ank̄e.

⁵N̄er-seka tē'esri me ti dabsa baseba ān sōŋa gānna dabsa baseba me. Ti ayēma yeti ba wuu de la ayila. D̄eni ti n̄era woo b̄aŋe ti ēŋa n tē'esri se'em na mase me. ⁶N̄er-seka n tē'esri dabsa n ān sōŋa yelle la,

uti bela nā'asra la Zuudāana. La nēr-seka n diti sela woo la, mē bɔ'ɔri la Zuudāana nā'asgɔ, ɛn pu'usrɪ Nawēnne a yel-sōnne dia la ïyā la. La seka n ka diti dia baseba la, uti bela mē bɔ'ɔra la Zuudāana nā'asgɔ, ɛŋa mē pu'usrɪ la Nawēnne a yel-sōnne. ⁷La de se'em na, tōma nēr-seka ka vɔa a mēŋa ïyā, la nēr-seka ka kiiri a mēŋa ïyā. ⁸Tōma sãn vɔa, ti vɔa la Zuudāana ïyā. La ti sãn ki, ti ki la Zuudāana ïyā. Bela, ti sãn vɔa mɛ, bu ti sãn ki mɛ, ti de la Zuudāana la nērba. ⁹Se'ere n soe la, Krisi ki mɛ dee vo'oge, ti a dena seba n ki, la seba n vɔa Zuudāana.

¹⁰La fõn, bēm ti fõn zergra fu sɔbia? La fõn mē, bēm ti fõn pɔ'ɔra fu sɔbia? Ti wuu wun ze'ele la Nawēnne na'am bĩmbĩnne nēŋam ti a di ti sariya. ¹¹La gulse Nawēnne gõŋɔ pvam yeti:

< < Mam n de Zuudāana la vɔa mɛ,
nērsaalba wuu wun ka dūma mam nēŋam,
ti nēra woo wun nā'ase Nawēnne. > >

¹²Bela, tōma nēra woo wun tɔge a mēŋa yelle bɔ Nawēnne.

¹³Bela, base-ya ti ti da le zergra taaba. La de la ti looge yem, da ɛŋɛ sela n wun botɪ ti sɔbia tuuge, bu n wun botɪ a base Nawēnne sore.

¹⁴Mam n lagɪm na Zuudāana Azezi dena ayɪla la, mam mi sɪra sɪra ti sela ka boe dena dēgrɔ a mēŋa. La nēra sãn tē'ese ti sela de la dēgrɔ dee di, la de la dēgrɔ bɔ ɛ. ¹⁵Bõn-seka ti fõn diti la sãn botɪ fu sɔbia sũure sã'am, fu ka le ita wu nõŋlum n de se'em na. Da sake ti dia ti fu diti la botɪ fu sɔbia ti Krisi ki a ïyā la sã'am. ¹⁶Da base ti sela n ɛn sõŋa bɔ fõn na, lebge sela n wun dena yu'vre sã'aŋɔ. ¹⁷Bēm ïyā, Nawēnne so'olum* na dagɪ dia, la bõn-yũula yelle, la de la sela n mase, la sũ-mã'asum, la sũ-yēlga ti Nawēnne Sɪa bɔ'ɔri. ¹⁸Nēr-seka woo n dolɪ Krisi wãna, ɛŋa dāana n paari Nawēnne yem, la nērba mē yeti mɛ ti ɛn uti se'em na ɛn sõŋa. ¹⁹Bela, ti ita-ya bõn-seba wuu n sēm na sũ-mã'asum, dee sõŋra nērba baseba ti ti wuu lagɪm senna

nēŋa Nawēnne doosgo puam.

²⁰Da sā'am-ya Nawēnne tōone dia ñyã. Dia wuu ãn sōŋa me ti ba di. La nēra sãn di sela n wun boti a tadãana tuuge, la ka ãn sōŋa. ²¹La ãn sōŋa ti fu da eŋe bõn-seba wuu n wun boti fu sobia tuuge Nawēnne sore la zuo, la sãn dena nēnno obga, bu dãam yūa, bu sela woo n wun boti a tuuge. ²²Fõn mi sela la bõn-ēŋa yelle la, tara ē fõn mēŋa la Nawēnne mā'a zē'am. Nēr-seka n iti sela ti a bise ti la ãn sōŋa, dee ka zerga a mēŋa, ēŋa dãana n tari zu-yēlga. ²³La nēr-seka n zergri a mēŋa la sela ti a diti yelle, a koŋe buuro me. Se'ere n soe la, a ka iti ēŋa n bo sira mina se'em na. La bõn-seka woo n ka doli la bo sira de la tōon-be'ero.

15

lta-ya sela n de ya taaba sōŋre

¹Dēni ti tōma seba n tari pãŋa Nawēnne doosgo puam na, sōŋe nēr-seba n ka tari pãŋa la, ba torgo puam. La ti da eera sela n ãn tōma yēlum. ²Dēni ti tōma nēra woo eera sela n wun eŋe a tadãana yēlum, ti la sōŋe ē ti a sēŋe nēŋa Nawēnne doosgo puam. ³Azezi-krisi ka e sela n ãn a mēŋa sūure yēlum, wu lan gulse Nawēnne gōŋo puam yeti:

< <Tuure seba ti ba tuuri Nawēnne na, sige la mam zuo.> >

⁴Sela wuu ti ba yovn gulse Nawēnne gōŋo puam na, gulse la tōma zãŋo ñyã, ti la wun boti ti mā'age sūure sēnna nēŋa, dee bō'ora ti buraane, ti ti wun tara putē'ere gu'ura sela ti Nawēnne yeti a bo ti la. ⁵Nawēnne n bō'ori sū-mã'are, la buraane la wun boti ya tara putē'ere ayula la taaba wu Azezi-krisi n boori se'em na. ⁶Ti ya wuu wun tara nõore ayula, la yem ayula nã'asra Nawēnne n de ti Zuudãana Azezi-

krisi So la.

⁷Bela, tɔ'ɔsra-ya taaba wu Krisi n to'oge yāma se'em na, ti la wun bɔ Nawēnne nā'asgɔ. ⁸Mam yeti ya me ti Krisi lebge la Zifdōma tōntōnna, ti a ɛɲe Nawēnne n yuun biɲe a nōore la ti yaabdōma se'em na, pa'ale ti Nawēnne de la sira dāana. ⁹A ken wa'am me ti bu-zāɲst* la wun nā'asra Nawēnne, ɛn zoti ba ninbāalga la iyā, wu lan gulse Nawēnne gōɲɔ puam yeti:

< < Bela ti mam wun nā'asra fōn so'olum buuri wuu tēɲasuka,
la mam wun ken yōom nā'ase fōn yu'ure. > >

¹⁰La ken gulse yeti:

< < So'olum wuu nērba,
lagim-ya la Nawēnne nērba
uta sū-yēlga. > >

¹¹La le gulse yeti:

< < So'olum wuu nērba,
nā'ase-ya Zuudāana,
buuri wuu nērba,
pēge-ya ɛ. > >

¹²A'ezayi* mē gulse yeti:

< < Azese* yuɲa n wun wa'am,
a wun sɔna la so'olum buuri wuu.

La so'olum buuri wuu wun tara putē'ere la ɛ le. > >

¹³Nawēnne n boti tōma tara putē'ere la ɛ na wun bɔ ya sū-yēlga, la sū-mā'asum zozo'e, yāma n bɔ Krisi sira la iyā, ti a Sia* pāɲa wun boti yan tara putē'ere a zē'am na zo'oge gāɲe.

Apoli tōoma, la ɛn tari putē'ere ti a ɛɲe se'em

¹⁴M sɔbiisi, mam mi me sira sira ti yāma uti sōɲa me zozo'e, la ya

tari bāņre wuu zo'oge me tāna wun kā'an taaba. ¹⁵La baa bela, mam
 gulse yāma me zē'est baseba la sū-ke'eņo ti m tēege ya yāma n pōn
 zāsum mina sela la. La de la Nawēnne n ēņe mam yel-sōnne, ¹⁶boti
 mam dēna Azezi-krisi tōntōnna ti m tōnna a tōoma bō'ora bu-zāņsi*
 la īyā. Nawēnne tōoma ti mam tōnni na de la m mōole a kō-yēlga bo
 bu-zāņsi, ti Nawēnne Sia boti ba welge to'ore dēna bō'a n paari
 Nawēnne yem. ¹⁷Mam n lagum na Azezi-krisi dēna ayila la, mam iti
 sū-yēlga me mam n tōnni bō'ora Nawēnne na īyā. ¹⁸Mam kān saage
 tōge sela yelle, sān dagna Krisi n boti mam ēņe sela boti bu-zāņsi sake
 Nawēnne na mā'a. La de la mam yetōga, la mam tōoma puam ¹⁹ti
 Nawēnne Sia pāņa boti mam ēņe bōn-yālma, la yel-kursi n tari pāņa.
 Bela ti mam ze'ele Zerizalem mōole Azezi-krisi kō-yēlga la wuu zē'est
 wuu halt ka paage Iliri so'olum. ²⁰La mam n boori se'em de la m
 mōole Krisi kō-yēlga la zē'e-seba ti ba nān ka wōm a yelle la, mam ka
 boori ti m mōole zē'e-seka ti nēra ayēma dēņe mōole la, ti m da mē
 nēra ayēma ēbre zuo. ²¹La de wu lan gulse Nawēnne gōņo puam yeti:
 < < Nēr-seba ti ba ka mōole ba a yelle la, wun bāņe.

La nēr-seba n nān ka wōm a yelle la, wun wōm a vōore. > >

²²Bela n gu mam nōore faa, ti mam ka yāņe wa'am ya zē'am. ²³La
 lēle wā, mam tōm m tōoma zē'e-bāma ba'ase me. La de la yuuma
 zozo'e ti mam boori la m sūure wuu ti m wa'am wa bise ya. ²⁴La
 mam tari putē'ere ti mam sān wa we'esa Espayē, mam wun doose yē
 ya, dee bōna ya zē'am wakate fēe ti m putē'ere kō'oge, dee ti ya yāņa
 sōņe mam ti m tole. ²⁵La lēle wā, mam we'est la Zerizalem ti m sōņe
 Nawēnne nērba n boe mī na. ²⁶Se'ere n soe la, Nawēnne nērba n boe
 Maseduan, la Akayi so'olum na looge la yem lagse ligri ti ba sōņe
 Nawēnne nērba n boe Zerizalem na tarumdōma. ²⁷La de la ba mēņa n
 looge yem, la, la de la ba ēņe bela. Zifdōma la n boti seba n dagi

Zifdōma po lagim to'oge bōn-sōma ti Nawēnne Sia bɔ ba la. Bela, dēni ti ba mē sōŋe Zifdōma, la ban tari sela. ²⁸Mam sān tari ligri la ti ba lagsɛ la sēŋe ka bɔ ba ki'ulum, mam wun wa'am wa kaage ya, dee tole Espayē. ²⁹Mam mi ti mam sān wa wa'am ya zē'am, ti wun yē Azezi-krisi yel-sōnne zo'oge.

³⁰M sɔbiisi, ti Zuudāana Azezi-krisi iyā, la Nawēnne Sia n bɔ'ori nōŋlum na iyā, mam sosri ya mɛ, ti ya lagim na mam mōrge pu'use Nawēnne mam iyā. ³¹Pu'use-ya Nawēnne ti m yāŋe pōse la seba n boe Zude* so'olum ka bɔ Azezi sira la zē'am, la ti mam n tari sōŋre la wɛ'esa Zerizalem na, Nawēnne nērba la wun to'oge ba la sū-yēlga. ³²Bela, Nawēnne sān bɔɔra, mam wun wa'am ya zē'am la sū-yēlga, la mam wun yē vo'osgo yāma zē'am. ³³Nawēnne n de sū-mā'asum dāana wun bɔna la ya wuu lɛ. Amina.

16

Pu'usgo, la kā'aŋɔ

¹Mam yeti ya ti ya to'oge ti sɔbi-pɔka Afeebe ya zē'am. A de la Sānkre Wēndeego yel-bɔsra. ²To'oge-ya ē sōŋa Zuudāana doosgo la puam, wu lan mase ti Nawēnne nērba ita se'em na. La sela sān wa bɔna ti a bɔɔra ya sōŋre, ya sōŋe ē. Ēŋa mēŋa sōŋe nērba zo'oge mɛ, la mam mēŋa mē.

³Pu'use-ya Apriska, la Akila n de mam tōntōn-taaba Azezi-krisi doosgo puam na. ⁴Ba daan pōse ba yōore mɛ mam iyā fāage mam. La dagi mam m yula mā'a n pu'usri ba ba yel-sōnne, bu-zāŋsi* Wēndeto la wuu nērba mē pu'usri ba. ⁵Mam pu'usri Azezi nērba la wuu n lagsri ba yire la. Pu'use-ya m sir-nōŋre A'epayineti bɔ mam. Ēŋa n de pɔspɔsi nēra n bɔ Azezi-krisi sira Azi* so'olum. ⁶Pu'use-ya Amaari n

daan tōm nāmse zo'oge bɔ ya la. ⁷Mam pu'usrɪ A'āndronikusi, la Azuniasɪ n de mam buuri n daan po lagum na mam bɔna yu'a deem na. Ba de la nērba tɪ ba nannɪ Krisi Tōntōnɪba* la puam, la ba pōn dēŋe mam mɛ lebge Krisi nērba. ⁸Pu'use-ya Ampiliyatusi n de mam sure tɪ mam nōŋe Zuudāana doosgo puam na. ⁹Pu'use-ya A'urbē n de tɪ tōntōn-tadāana Krisi doosgo puam na, la m sɪr-nōŋre A'estakisi. ¹⁰Pu'use-ya Apelesɪ n mōrge Krisi doosgo puam na. Pu'use-ya Aristobuli yir-dōma. ¹¹Pu'use-ya A'erodiyō n de m buuri nēra la. Pu'use-ya nēr-seba n boe Anarsisi yire dɔla Zuudāana la. ¹²Pu'use-ya Atirfenɪ, la Atirfozɪ tɪ ba de la pɔgsɪ n mōrgɪ tōnna Zuudāana doosgo puam. Pu'use-ya m sōma Apersidi n mōrge tōm zozo'e bɔ Zuudāana la. ¹³Pu'use-ya Arufusi tɪ nērba zozo'e bɪsrɪ Zuudāana doosgo puam na, la a ma n lebge wu mam ma la. ¹⁴Pu'use-ya Asēnkriti, la Afelgō, la A'ermēsɪ, la Apatrobasɪ, la A'ermasɪ, la sɔbiisi seba wuu n boe la ba le la. ¹⁵Pu'use-ya Afilologɪ, la Azuli, la Aneere la a tã, la A'olēmpasɪ, la Nawēnne nēr-seba n boe la ba le la. ¹⁶Pu'use-ya taaba la nōŋlum. Krisi Wēndeto nērba la wuu pu'usrɪ ya.

¹⁷M sɔbiisi, mam kã'anɪ ya tɪ ya guusra ya mēŋa la nēr-seba n tarɪ welgre sēnna ya zē'am, dee sɪ'usra zāsŋɔ seka tɪ ya to'oge, botɪ nērba basra Nawēnne sore la. Zāage ya mēŋa la ba le. ¹⁸Se'ere n soe la, nēr-bāma buuri ka tōnnɪ bɔ'ɔra tɪ Zuudāana Azezi-krisi, ba tōnnɪ na ba mēŋa sōŋre ïyã. Ba tɔgrɪ la nō-yēlum yetɔga, la yetɔg-yēlsɪ pã'asra nēr-seba yem n ka zo'oge la. ¹⁹Nērba wuu bāŋe yāma n sakrɪ Zuudāana se'em mɛ. Bela, mam ɪtɪ sū-yēlga mɛ yāma ïyã. La mam boorɪ mɛ tɪ ya tara yem mina sela n ān sōŋa, la ya dena pupeelem dōma, da ɪta sela n de be'em. ²⁰Nawēnne n de sū-mã'asum dāana la kãn yuuge dee sã'am Asūtāana* pãŋa botɪ a bɔna ya nāma tēŋa. Tɪ Zuudāana Azezi-krisi yel-sōnne wun bɔna la ya le.

²¹Mam tōntōn-tadāana Atimōti pu'usrī ya. Alusiyusi, la Azasō, la Asozipateeri n de mam buuri la mē pu'usrī ya. ²²Mam Atertiyusi n gulse gōṅṅ wā la, mam mē pu'usrī ya la Zuudāana yu'ure.

²³Agayusi ti mam sēnni sigra a yire la pu'usrī ya, la de la ēṅa yire ti Azezi nērba la wuu lagsri. A'erasti n de tēn-ēṅa lig-gu'ura, la ti sōbia Akartusi pu'usrī ya. ((²⁴Ti Zuudāana Azezi-krisi yel-sōnne bōna la ya wuu. Amina.))

Nawēnne nā'asgō

²⁵Pēge-ya Nawēnne, ēṅa n tā wun boti ya ze'ele kāṅkāṅe, wu kō-yēlga la ti mam mōole pa'ale ya Azezi-krisi yelle, boti ya bāṅe Nawēnne yelle n svge la. Yel-ēṅa svge me halt yuuma yuuma. ²⁶La leele wā, Nawēnne nōtō'osrība* gōnnō na yāṅa boti a puke me, wu Nawēnne n ka tarī ba'asgō n bō nōore se'em na. A boti so'olum buuri wuu nērba bāṅe ē me, ti ba wun bō ē sira, sake ē. ²⁷Nawēnne ayula n de yem dāana la sōna nā'asgō wakate n ka ba'asri, Azezi-krisi yu'ure iya. Amina. \f1 2:25 Nawēnne n yuun yeke Zifdōma ti ba wāta ba budimto ti la pa'ale ti ba de ēṅa nērba. \f2 8:9 Krisi Sia, la Nawēnne Sia de la ayula. \f3 9:33 Kugre la de la Azezi-krisi. \f4 12:16 A vōore ken dena la < < sikra ya mēṅa tōnna. > > \e

1CO

1 Korēnti

Pɔspɔsi gōṅṅ ti Apoli gulse bō Korēnti dōma

Bilgre

Apoli yuun gulse gōṅṅ wā bō la Nawēnne nērba n boe Korēnti. Apoli yuun pōse Nawēnne tōoma la bilam, la a kē bilam na yuune la pusuka (Tōoma 18:11).

Korēnti yuun de la tēn-kāte n boe ko-kāte yu'vre n de Mediterane nōorum, ti ōornɔ ze'elgo zē'est bayi bɔna mī, ti nērba sēna mī læbra, ti tēŋa la tara bōntarsōm zozo'e. Nērba zozo'e n yuun boe tēŋa la puam n tarɪ mi'ilum, la bāŋre, la sisgo buuri to'oto'ore. La ba utɪ la yalsɪ, la tōon-be'ero buuri zozo'e, ti tōon-bāma mē loŋe Azezi nērba la.

Wakat-ēŋa, Apolɪ yuun ka le bɔna ba zē'am, dee wōm ti welgre, la tōon-be'ero n kē ba tēŋasuka. Bela n botɪ a fabla ba yelle, gulse gōnno bɔ ba.

A gōnno la ti a gulse la, bayi n boe Nawēnne gōŋɔ la puam n sōŋri tōma, ti toogo sān paage tɔ, ti mē bāŋe ti wun ēŋe se'em.

Apolɪ gulse ba yetɪ: Nawēnne yem gānnɪ nērsaalba yem mɛ, dee kā'an ba yetɪ:

Ba base welgre (sapɪtrɪ 1-4),
la yalsɪ ɪrgɔ, (sapɪtrɪ 5),
la ba da le tara ba yela sēna nēr-seba n ka doli Nawēnne na zē'am māala (6:1-11).

Dee pa'alɛ ba ti la mase mɛ ti ba tara ba iyā la tōnna bɔ'ora Nawēnne (6:12-20).

A ken lerge ba la sokrɪsɪ ti ba soke ē:

La de la pɔgdire yelle (sapɪtrɪ 7),
la бага nēnno yelle (sapɪtrɪ 8-10),
la Azezi kūm tēere dia yelle (sapɪtrɪ 11),
la Nawēnne Sia bɔ'a yelle (sapɪtrɪ 12-14),
la kūm vo'ore yelle (sapɪtrɪ 15).

Gōŋɔ la ba'asgɔ zē'am, a tɔge la ligri ti ba lagsrɪ sōŋra Azezi nērba yelle, la ēŋa mēŋa sore sēnne yelle, dee pu'vse ba (sapɪtrɪ 16).

Gõn-ẽna puam, Apoli pa'ale ti Nawẽnne bɔ'a la wuu puam, nõnlum n gãnni ba wuu (sapitri 13).

Pɔspɔsi gõnɔ ti Apoli gulɛ bɔ

Korẽnti dõma

1

¹Mam Apoli ti Nawẽnne wi, boti mam dena Azezi-krisi Tõntõnna* wu ẽna n boori se'em, la ti sɔbia Asostenti n gulɛ gõnɔ wã ²bɔ'ora yãma sɛba n de Nawẽnne nẽrba n boe Korẽnti la. Nawẽnne wi yãma ti ya welge la to'ore dena a nẽrba Azezi-krisi ãyã. Gõnɔ la ken dena la sɛba wuu n boe zẽ'a woo pu'usra Azezi-krisi n de bãama la tõma Zuudãana la ãyã.

³Ti Sɔ Nawẽnne, la ti Zuudãana Azezi-krisi wun ẽnɛ ya yel-sõnne, dee bɔ ya sũ-mã'asum.

⁴Mam pu'usri Nawẽnne wakate wuu ya ãyã, ẽn bɔ ya a yel-sõnne Azezi-krisi ãyã la. ⁵Yãma n lagum na Krisi* dena ayula la ãyã, ti Nawẽnne bɔ ya bɔ'a wuu n de mi'ilum buuri wuu, la yetɔga mi'ilum wuu. ⁶Krisi kō-yẽlga la ti ba tɔge bɔ ya la, yãma gure ẽ me kãnkãnɛ. ⁷Bela, yãma ka koŋe bɔ'a baa ayula, yãma n gu'uri ti ti Zuudãana Azezi-krisi wa'am wa puke a mẽna la. ⁸Ẽna n wun base ti ya ze'ele kãnkãnɛ ka paage dũnia ba'asgo. Ti ba kãn tã'age dõre ya ti ya ẽnɛ be'em ti Zuudãana Azezi-krisi lemŋo daare. ⁹Nawẽnne n wi ya ti ya lagum na a Dayva Azezi-krisi n de ti Zuudãana la dena ayula la, de la sra dãana.

Welgre Nawẽnne nẽrba tẽnasuka

¹⁰M sɔbiisi, mam sosɔ ya la ti Zuudāana Azezi-krisi yu'ure ti ya wuu sakra taaba nōore, ti welgre da bɔna ya tējasuka. Eŋe-ya nōore ayula, tara putē'ere ayula la taaba. ¹¹M sɔbiisi, se'ere n soe ti mam yeke bela la, Akolowe yir-dōma baseba n wa'am wa tɔge pa'ale mam ti ka-wōm-taaba n boe ya tējasuka. ¹²Mam wōm ti yāma nērba baseba yeti, bāma doli la Apoli, ti baseba yeti, bāma doli la Apolɔsi, ti baseba yeti, bāma doli la Apiyɛeri, ti baseba mē yeti, bāma doli la Krisi. ¹³Yāma tē'ese ti Krisi welse me bu? Bu yāma tē'ese ti Apoli n daan ki dɔ-puurŋa* zuo yāma iyā, bu ba mise yāma ko'om puam la Apoli yu'ure?

¹⁴Mam pu'usɔ Nawēnne, mam n ka mise ya nēra baa ayula ko'om puam sān dagna Akrispusi la Agayusi la. ¹⁵Bela, nēra kān tā'age yeke yeti, ba daan mise ēŋa ko'om puam la mam yu'ure. ¹⁶Ēhēe! Mam daan ken mise la Astefanasi la a yir-dōma ko'om puam. La mam ka le mina mam sān ken mise nēr-seka. ¹⁷Krisi ka tōm mam ti m mise nērba ko'om puam, a tōm mam ti m mōole la Nawēnne kō-yēlga bɔ nērba, la, la dagi la nērsaalba yem, ti la da base ti Krisi n ki kūm dɔ-puurŋa zuo la pāŋa la lebge zāŋa.

Nawēnne yem gānni dūnia yem

¹⁸Krisi n ki kūm dɔ-puurŋa zuo yetɔga la de la yalne bɔ nēr-seba n ka yē fāare la. La tōma seba n yē fāare la mi ti la de la Nawēnne pāŋa. ¹⁹La gulse Nawēnne gōŋɔ puam ti Nawēnne yeti:

< < Mam wun sā'am yem dōma yem,
dee yese bāŋɔba bāŋre. > >

²⁰Yem dōma yem vōore de la bēm? Gōn-mitba mi'ilum vōore de la bēm? Dūnia wā nōke'en-dōma n wē'eri nōke'ema ti bāma mi yela zozo'e la vōore de la bēm? Nawēnne pa'ale ti dūnia wā yem de la

yalne.

²¹Nawēnne n ēnje sela la a yem na, nērsaalba ka tā'age bānje ē la ba mēnja yem. Bela ti Nawēnne boti kō-yēlga la mōolgo ti nērsaalba yeti la de la yalne la, fāage nēr-seba n bo ē sira la. ²²Zifdōma* boori ti ba yē la bōn-yālma n pa'ale ti la de la sira, la Grēkidōma* eeri la yem. ²³Tōma nōo mōoli la Krisi n ki kūm do-puurŋa zuo la kō-yēlga, kō-yēlga ēnja ti Zifdōma dūke ti a dena po'ore yetoga, ti seba n dagi Zifdōma la dūke ti la dena yalne. ²⁴La Nawēnne n looge seba la, seba n de Zifdōma, la seba n dagi Zifdōma la, mi ti Krisi de la pānja dāana la yem dāana n ze'ele Nawēnne zē'am. ²⁵Bōn-seka ti Nawēnne ēnje, ti nērsaalba dūke ti a dena yalne na, tari yem me gānna nērsaalba yem. La sela ti Nawēnne ēnje ti nērsaalba tē'ese ti la ka tari pānja la, tari pānja me gānna nērsaalba pānja.

²⁶M sobiisi, læele wā, tē'ese-ya buse yāma ti Nawēnne wi la n ān se'em. Nēr-seba n tari dūnia yem, la nēr-seba n tari pānja, la nērzuto ka zo'oge ya puam. ²⁷La Nawēnne looge sela ti dūnia dōma tē'ese ti la de la yalne, ti a ēnje la yem dōma yānne, la a ken looge la sela ti dūnia dōma tē'ese ti a ka tari pānja la, ti a boti pānsi dōma n yē yānne. ²⁸La a looge la sela ti dūnia dōma ka bisri, la sela ti ba nē'esri, la sela ti ba tē'ese ti a de la zānja la, ti a sā'am sela ti dūnia dōma tē'ese ti a de la ninmō'ore bōno. ²⁹A ēnje bela ti nēra n da yānje zēke a mēnja Nawēnne nēŋam. ³⁰La Nawēnne n base ti ya lagum na Azezi-krisi dena ayula la, ēnja iyā ti ti tara Nawēnne yem, dee mase Nawēnne nēŋam, welge to'ore lebge a nērba n yese tōon-be'ero puam. ³¹Bela ti la gulse Nawēnne gōŋo puam yeti: < < Sēka n boori ti a wē yō'ogo, a wē yō'ogo la sela ti Zuudāana ēnje la. > >

2

Apoli n mōole Azezi-krisi kō-yēlga se'em

¹M sobiisi, mam n daan wa'am ya zē'am wa mōole Nawēnne kō-yēlga n sūge bɔ ya la, la dagi la yetɔg-mi'ilum, bu nērsaalba yem ti mam mōole bɔ ya. ²Se'ere n soe la, mam daan looge yem ti mam kǎn mōole sela sela yelle, sǎn dagna Azezi-krisi yelle, ēŋa n ki dɔ-puurŋa* zuo la yelle. ³Mam n daan boe ya zē'am na, mam daan ka tari pǎŋa, ti dabeem daan tara mam, ti mam gōgra. ⁴Mam n daan mōole dee zǎsum kō-yēlga la, la daan dagi la nērsaalba yem yetɔga ti mam daan tɔge bɔ ya ti ya sake, mam daan tɔge mɛ, ti Nawēnne Sia pa'ale a pǎŋa, ⁵ti yāma n bɔ Azezi-krisi sira la, la dagi nērsaalba yem iyā, la de la Nawēnne pǎŋa iyā.

Nawēnne yem n ǎn se'em

⁶La baa bela, tōma tɔgrɪ la yem yetɔga bɔ'ɔra seba n bi Nawēnne sore la doosgo pvam. La dagi dūnia wǎ yem, la mē ka de seba n soe dūnia wǎ yem. Bāma wun lebge la zǎŋa. ⁷Tōma mōoli la Nawēnne yem n daan sūge ti nērba ka mina. Nawēnne daan pōn looge yel-bāma mɛ lan dēŋe dūnia pī'iluŋo ti a boti ti yē nǎ'asgo a zē'am. ⁸Seba n soe dūnia wǎ baa ayula ka mi yem ēna wǎ. Ba daan sǎn mi ni ē, ba kǎn ka ni Zuudāana n tari na'am pǎŋa wuu la dɔ-puurŋa zuo ku. ⁹La de wu lan gulse Nawēnne gōŋɔ pvam se'em yeti:

< < Bōn-seba ti Nawēnne māasum ti a bɔ nēr-seba n nōŋe ē na,
gǎnnɪ bōn-seba wuu ti nēra nǎn ka yē, bu wōm, bu tē'ese
a putē'erum. > >

¹⁰Nawēnne boti a Sia la puke bōn-bāma pa'ale la tōma. Nawēnne Sia la mi sela woo mɛ, baa la Nawēnne yel-seba n sūge. ¹¹Āne n mi nērsaala putē'ere? La de la nērsaala mēŋa sia mā'a. Bela, nēra mē ka mi Nawēnne putē'ere, sǎn dagna Nawēnne Sia la mā'a. ¹²La sǎn dena

tōma, tōma ka to'oge dūnia wā sia, tōma to'oge la Nawēnne Sia n ze'ele a zē'am, ti ti yāņe bāņe bōn-seba wuu ti a bɔ tɔ.

¹³La tōma n tɔgrɪ yel-bāna wā, la dagɪ nērsaalba yem yetɔga, tōma tɔgrɪ la yetɔg-seba ti Nawēnne Sia pa'ale tōma, tōma tɔgrɪ la yel-seba n ze'ele Nawēnne Sia zē'am bɔ'ɔra nēr-seba n tart Nawēnne Sia.

¹⁴La nēr-seka n ka tart Nawēnne Sia la kān tā'age to'oge sela n ze'ele Nawēnne Sia zē'am, la de la yalne bɔ ē, a kān tā'age bāņe a vōore. Nēr-seka ti Nawēnne Sia boe la ē le mā'a n mi Nawēnne Sia la yelle.

¹⁵Nēr-seka ti Nawēnne Sia boe la ē le n tā wun bāņe sela woo n ān se'em bɔke. La nēra ka tā wun bāņe ēņa dāana yelle bɔke. ¹⁶La de wu lan gulse Nawēnne gōņɔ puam se'em yetɪ:

< < Āne n mi Zuudāana putē'ere?

Āne n wun yāņe kā'an ē? > >

La sān dena tōma, tōma tart la Krisi putē'ere.

3

Seba n mōoli kō-yēlga la tōoma

¹M sɔbiisi, mam daan ka tā'age tɔge ya wu nērba n tart Nawēnne Sia. Mam daan tɔge ya wu nērba n vɔa wu ba mēņa n boort se'em, wu ya de la bileesi Krisi doosgo la puam. ²Yāma n daan ka tā wun to'oge zāsņɔ ke'eņo n ān wu di-ke'ene la ĩyā, mam daan tɔge ya wu bileesi n mōgrɪ bɪ'isum dee ka paage di-ke'ene dia. La baa leele wā, ya ken ka paage ya to'oge zāsņɔ ke'eņo, ³yāma n ken vɔa wu ya mēņa n boort se'em na ĩyā. Ya sān ita sūure zebra la taaba, bela ka pa'ale ti ya vɔa wu ya mēņa n boort se'em, dee ita wu dūnia nērba n utɪ se'em na sira? ⁴Ya nēra ayɪla sān yetɪ: < < Mam dolɪ la Apolɪ > >, ti ayɪla yetɪ: < < Mam dolɪ la Apolɔsɪ > >, ya ka utɪ wu dūnia nērba la?

⁵Apolɔsi de la āne? Apoli de la āne? Tōma wen dena la Nawēnne tōntōnɔba n daan boti ya bɔ Azezi-krisi sira. Tōma nēra woo tōnni la tōon-seka ti Zuudāana la bɔ tɔ ti ti tōm. ⁶Tōma ān wu kaarba la, mam sele me, ti Apolɔsi base ko'om. La Nawēnne n boti ba bita. ⁷Seka n selli, la seka n basri ko'om na de la zāŋa. Nawēnne mā'a n boti ba bita. ⁸Seka n selli, la seka n basri ko'om na de la ayɔla. Nawēnne wun yɔ nēra woo wu ēn tōm se'em na. ⁹Tōma lagum taaba tōnna la Nawēnne tōoma. La yāma ān wu Nawēnne va'am, la ya ān wu Nawēnne deego.

¹⁰Nawēnne n ēŋe mam yel-sōnne na ŋyā, mam tōm wu tōnmēta n mi mēa sōŋa n ēebe ēbre, ti nēra ayēma mē dɔgle a zuo. La nēra woo guuse a mēŋa la ēn mēti se'em na. ¹¹Nawēnne dɔke la Azezi-krisi ti a dena ēbre la. Ebre ayēma ka le bɔna ti nēra wun ēebe. ¹²Nēr-seba n mēti dɔgla ēbre la zuo la, baseba dikri la sālma, bu zūuro, bu kug-sōma ligri n zo'oge mēta dɔgla ēbre la zuo. Ti baseba dikra dɔɔɔ, bu mōɔɔ, bu kēnkā mēta dɔgla. ¹³La Azezi-krisi lemŋo daare, nēra woo n tōm se'em wun puke me peelem puam. La de la bugum n wun make tōoma la, pa'ale nēra woo tōoma n ān se'em. ¹⁴Bugum na sān ka di nēra tōoma, a dāana wun to'oge yɔɔɔ. ¹⁵La bugum na sān di nēra tōoma, a dāana wun koŋe yɔɔɔ. La nēra la mēŋa wun yē fāare, la a wun āna wu a doose la bugum puam pōse.

¹⁶Ya ka mi ti ya de la Nawēnne deego ti a Sia bɔna ya puam? ¹⁷Nēra sān sā'am Nawēnne deego la, Nawēnne wun sā'am a dāana. Nawēnne deego de la a mēŋa mā'a bōnɔ, la yāma n de a deego la.

¹⁸Nēra da pā'ase a mēŋa. Nēra sān bɔna ya puam tē'ese ti ēŋa tarɔ dūnia wā yem, la mase me ti a lebge gɔɔŋɔ dūnia wā puam, bela n wun base ti a lebge yem dāana. ¹⁹Sela ti dūnia dōma tē'ese ti la de la yem na, de la yalne Nawēnne zē'am. La de wu lan gulse Nawēnne

gõṅṅ puam se'em yeti: << Nawēnne bēti yem dōma me yōgra ba ba yemkēgsiḡa la puam. >> ²⁰La ken gulse yeti: << Zuudāana mi yem dōma tē'esḡo me, a mi ti ba de la zāṅa. >> ²¹Bela, nēr-seka da wē yō'ogṅ nērsaala iṅyā. Sela woo de la yāma bōṅṅ. ²²Mam Apolṅ, bu Apolṅsi, bu Apṅyēeri, bu dūnia wā, bu yōvore, bu kūm, bu sela n boe leele wā, bu sela n wun wa wa'am, yāma n soe ba wuu. ²³La yāma, Kriṅsi n soe ya, ti Nawēnne sōna Kriṅsi.

4

Azezi-kriṅsi tōntōnṅba

¹Bela, dēni ti ya bāṅṅ ti tōma de la Kriṅsi tōntōnṅba, ti Nawēnne dike a yela n daan sḡḡe ēṅṅe tōma nu'usum ti ti tṅḡe bṅ nērba. ²Ba sān dike tōone ēṅṅe nēra nu'usum ti a bisra, ba boori ti a dena la sira dāana.

³La sān dena mam, yāma bu dūnia wā sariyaditba sān tṅḡra mam yelle se'em, la ka uti mam se'ere. Mam mē ka diti m mēṅṅa sariya.

⁴Mam mi m sūure puam ti mam ka ēṅṅe sela n ka ān sōṅṅa, la, la dagi bela n pa'ale ti mam mase ya. La de la Zuudāana n diti mam sariya.

⁵Bela, da dēṅṅe-ya di nēra sariya dee ti Zuudāana la nān ka leme. A sān wa leme, a wun dike sela n sḡḡe lika puam yese peelem puam, dee boti bōn-seba wuu ti nērsaalba tē'esri ba sūure puam puke.

Wakat-ēṅṅa, Nawēnne wun pēḡḡe nēra woo wu lan mase ti a pēḡḡe ē se'em.

⁶M sōbiisi, mam n dike m mēṅṅa la Apolṅsi make bela wuu la, la de la yāma iṅyā, ti tōma n ēṅṅe se'em na wun dena zāsṅṅ bṅ ya. Ti ya << da ēṅṅe yōse lan gulse Nawēnne gōṅṅ puam se'em na. >> Bela, ya nēra nēra da zēke a mēṅṅa wē'era yō'ogṅ la nēra ayula dee pṅ'ora ayēma. ⁷Bēm soe ti fōn tē'esē ti fōn gānni fu taaba? Bēm ti fōn tari ti

la dagna Nawēnne n bɔ fɔ? La fu sãn to'oge, wãne ti fu pa'ala fu mēŋa wu fu ka to'oge me na?

⁸Ya tē'ese ti yãma pōn tara Nawēnne bōntarsōm na wuu ti la seke me. La yãma lebge la na'adōma dee ti tōma ka pa'ase. Mam boori ni ti ya siri dena la na'adōma, ti tōma mē po di na'am na. ⁹Mam tē'ese ti Nawēnne looge tōma seba n de a Tōntōnɪba* la, ti ti bɔna la nērba la wuu poorum, āna wu nērba ti ba di ba sariya yeti ba ku ba, ti dūnia dōma wuu bisra dee la'ara, nērsaalba, la malekadōma* wuu. ¹⁰Tōma ān wu zollɔ Kisi iyã, la yãma tē'ese ti yãma de la yem dōma Kisi doosgo puam. Ya tē'ese ti tōma ka tari pãŋa, la yãma tari pãŋa. Nērba pɔ'ori tōma me, la ba nã'siri yãma me. ¹¹Kɔm la koyūuro tari tōma me, ti tōma ka tara fu-sōma, ti ba nãmsra tōma, ti tōma eera ye'ena halɪ wa paam wakat-ēna. ¹²La tōma tōnnɪ la ti yō'ogo pãŋa nãmsra yēta ti nōore dia. Ba sãn tu tōma, tōma pu'usri la Nawēnne bɔ'ora ba. Ba sãn nãmsra tōma, tōma wībri me. ¹³Ba sãn toge tōma yetɔg-be'ero, tōma lebsri la yetɔg-sōma. Dūnia dōma bisri tōma, ti tōma āna wu soɔro la, ka tara vōore ba zē'am, halɪ wa paam zina.

¹⁴Mam ka gulse wãna bɔ ya ti m boti yãnne yōke ya, mam yeti m kã'an ya me wu m koma ti m nōŋe la. ¹⁵Baa ya sãn tara nērba tuspia ti ba bisra ya Kisi doosgo la puam, ya tari la so ayula mã'a. Mam n de ya so Azezi-kisi doosgo la puam, mam n wa'am wa mōole kō-yēlga la bɔ ya, ti ya yē vɔm na iyã. ¹⁶Bela, mam belni ya me ti ya ita mam n tti se'em na. ¹⁷Bela ti mam tōm Atimōti ya zē'am. A de la mam bi-nōŋre n de sira dāana Zuudāana doosgo la puam. Eŋa n wun tēege ya mam n vɔa se'em Kisi doosgo la puam, la de la bōn-bāma ti mam zāsni Azezi nērba n lagsri zē'a woo la.

¹⁸Ya nērba baseba tē'esri ti mam kãn leme wa'am ya zē'am, zēkra ba mēnsi. ¹⁹La Zuudāana la sãn bɔ'ora, la kãn yuuge dee ti mam wa'am

ya zē'am, la mam wun bāŋe sela ti zēk-m-mēŋa dōma la wun tā'age ēŋe, ti la sān dagna ba yetoga la mā'a. ²⁰Se'ere n soe la, Nawēnne so'olum* dagi nōore yetoga, la de la pāŋa. ²¹Yāma boori la bēm? Yāma boori ti m wa'am na kafōbga bu? Bu m wa'am na nōŋlum la sū-bugsum?

5

Krisi nēra ka mase ti a uta yalsi

¹Ba tōgru ti ya uti la yalsi, halu yalsi seka buuri ti baa seba n ka doli Nawēnne ka sake uta. Mam wōm ti ba yeti nēra ayula n boe ya puam gā la a so pōga. ²Dee ti yāma zēkra ya mēŋa. La de ni na yāma sūure sā'am, ti ya yese bura-seka n ēŋe yel-be'e-ēŋa la ya tēŋasuka.

³Baa mam n ka boe yāma zē'am, mam putē'ere boe la ya le mē. La mam pōn di bura-seka n ēŋe yel-be'e-ēŋa la sariya mē wu mam boe la yāma le, ⁴yele la Zuudāana Azezi yu'ure yeti: Yāma n lagse la taaba, ti mam putē'ere bōna la yāma, ti Zuudāana Azezi pāŋa bōna la ya le la, ⁵ya yese nēr-ēŋa ya tēŋasuka base Asūtāana* nu'usum ti a sā'am a iŷā, dee ti a sia wun yē fāare ti Zuudāana Azezi lemŋo daare*f1*.

⁶Yāma n zēkru ya mēnsi la, la ka ān sōŋa. Yāma ka mi ti dābille fēe n boti borbori zom wuu ukra? ⁷Yese-ya tōon-be'e-ēŋa n ān wu dābille la ya tēŋasuka, bela ti ya wun āna sōŋa wu zom paalga ti ba ka ēŋe dābille ba puam. Ya pōn āna sōŋa wu borbori n ka tari dābille la. Se'ere n soe la, Krisi daan sake mē ti ba ku ē tōma iŷā wu Zōog-base* kibsa pebila* la. ⁸Bela, base-ya ti ti yese putē'e-be'ero, la tōon-be'ero wuu ti vom puam, dee dēna pupeelem dōma, la sira dōma wu ba diti Zōog-base kibsa la borbori n ka tari dābille la.

⁹Mam n daan gulse gōn-seka la, mam daan yeke ya ti ya da lagum na

sɛba n uti yalsɪ. ¹⁰Mam ka tɔgrɪ nɛr-sɛba wuu n boe dũnia puam ita yalsɪ, bu nɔŋɛ bɔnɔ, bu dena nayigba, bu bag-kāabrɪba n ka dolɪ Nawɛnnɛ na yelle. Ya sãn yetɪ ya welge ya mɛŋa la bãma, dɛnɪ tɪ ya yese dũnia wã puam. ¹¹Mam daan gulɛ bɔ ya yetɪ, ya da dɔla la nɛr-sɛka n yetɪ a mɛŋa tɪ ɛŋa dolɪ la Nawɛnnɛ dee ita yalsɪ, bu nɔŋɛ bɔnɔ, bu kãabra бага, bu tuura nɛrba, bu yũura dãam bugra, bu zũura. Da pɔn lagum-ya la nɛr-ɛŋa dãana di.

¹²⁻¹³La dagɪ mam n wun di sɛba n ka dolɪ Nawɛnnɛ na sariya, Nawɛnnɛ n wun di ba sariya. La de la yãma sɛba n boe la taaba la n wun di taaba sariya, wu lan gulɛ Nawɛnnɛ gɔŋɔ puam yetɪ:

< < Dige-ya tɔon-be'ero dãana la ya puam. > >

6

Sariyadia yelle

¹Ya nɛra ayɪla sãn tara yelle la a tadãana, bɛm tɪ a tarɪ ɛ wɛ'ɛsa sɛba n ka dolɪ Nawɛnnɛ zɛ'am tɪ ba ka mãale yelle la, dee ka tarɪ ɛ wɛ'ɛsa Nawɛnnɛ nɛrba zɛ'am? ²Yãma ka mi tɪ Nawɛnnɛ nɛrba n wun wa di dũnia dɔma sariya? La yãma sãn wun wa di dũnia dɔma sariya, ya ka tã wun di yel-pɪg-bãna wã sariya? ³Yãma ka mi tɪ tɔma n wun wa di malekadɔma* sariya? Lan de belã la, bɛm tɪ yãma ka tãna wun di dũnia wã yela sariya? ⁴La yãma sãn tara yel-bãna buuri la taaba, yãma tarɪ sɛnna la sɛba n ka mi Nawɛnnɛ sore yela la zɛ'am. ⁵Mam yetɪ ya tɪ la de la yãnnɛ bɔ ya. Belã, nɛra baa ayɪla ka boe yãma puam n tarɪ yɛm, wun tã'age mãale yel-sɛba tɪ yãma tarɪ la taaba la? ⁶La ka masɛ tɪ yãma n de sɔbiisi sãn tara yelle la taaba, ya tara taaba sɛnna sariyaditba n ka dolɪ Nawɛnnɛ zɛ'am.

⁷Yãma n tarɪ taaba sɛnna sariyadia zɛ'am na, la pɔn pa'ale tɪ ya

tuuge me zozo'e. Nēra s̄an ēņe ya be'em, bu zū ya, bēm ti yāma ka ita sugri, dee tara taaba sēna sariyadia zē'am? ⁸Yāma maln ita taaba la be'em, zūura taaba, yāma n de s̄abiisi Nawēnne doosgo puam na.

⁹Yāma ka mi ti tōon-be'ero dōma k̄an yē zē'a Nawēnne so'olum* puam? Da p̄ā'se ya mēņa. Nēr-seba n iti yalsi, bu seba n k̄āabri бага, bu seba n ḡa la taaba p̄ogba la taaba sirba, bu bura-seba n ḡa la taaba, ¹⁰bu nayigba, bu seba n nōņe bōnɔ, bu seba n yūuri dāam bugra, bu seba n tūuri nērba, bu fāarba, bāma k̄an kē Nawēnne so'olum puam. ¹¹Yāma nērba baseba daan ān na bela. La Nawēnne Sia peege yāma tōon-be'ero me boti ya lebge Nawēnne nērba, mase a zē'am Zuudāana Azezi-krisi yu'vre īyā.

Dike ya īyā nā'se Nawēnne

¹²Yāma nērba baseba yeti: < < Mam tari sore wun ēņe sela woo me. > > La mam yeti ya ti dagi sela woo n tari yōorɔ. Mam mē tari sore wun ēņe sela woo me. La mam k̄an sake lebge sela baa ayila yamņa. ¹³Yāma yeti, dia boe la puure īyā, ti puure mē bōna dia īyā. La de la sira, la Nawēnne wun s̄'am bāma bayi la wuu me. La nērsaala īyā ka boe yalsi īyā, a boe la Zuudāana īyā. Ti Zuudāana mē s̄ona īyā la. ¹⁴Nawēnne n vo'oge ti Zuudāana Azezi la, ēņa n wun ken vo'oge tōma la a p̄aņa. ¹⁵Yāma ka mi ti ya īyā la de la Azezi-krisi īyā la zē'a ayila? Bela, la ān sōņa ti nēra dike Krisi īyā zē'a ayila la sēņe ka lagum na p̄og-yalsi dōma me bu? Ayei, la pōn ka mase. ¹⁶Ya ka mi ti seka n lagum a mēņa la p̄og-seka n iti yalsi, ēņa la p̄oka la lebge la īyā ayila? La gulse Nawēnne gōņɔ puam yeti, buraaga la p̄oka s̄an lagum taaba, bāma bayi lebge la ayila. ¹⁷La seka n lagum a mēņa la Zuudāana la, Nawēnne Sia boti a lebge la ayila la Zuudāana. ¹⁸Zoe-ya yalsi. Tōon-be'e-seba wuu ti nērsaala iti la ka boe a īyā puam. La

tōon-be'e-sɛka n de yalsɪ la boe la nɛrsaala ɪyā puam. ¹⁹Ya ka mi ti ya ɪyā la de la Nawɛnne Sia deego? Nawɛnne Sia la ti a bɔ ya la boe ya puam mɛ, ya ka soe ya mɛŋa. ²⁰Nawɛnne da ya la da'aga n de toogo, bɛla, dɪkɛ-ya ya ɪyā, nā'asra Nawɛnne.

7

Pɔgdire yelle

¹Mam yetɪ m lerge la yāma n daan gulɛ soke mam se'em na:
< <La ān sōŋa ti buraaga da di pɔga. > > ²La, lan wun ɛŋɛ se'em ti ya da ɛŋɛ yalsɪ, buraaga woo di a pɔga, ti pɔka woo mɛ ele a sɪra. ³La buraaga bɔ a pɔga lan mase ti a bɔ ɛ sɛla la, ti pɔka mɛ bɔ a sɪra lan mase ti a bɔ ɛ sɛla la. ⁴Se'ere n soe la, pɔka ka soe a mɛŋa ɪyā. La de la a sɪra n soe ɛ. La buraaga mɛ ka soe a mɛŋa ɪyā. La de la a pɔga n soe ɛ. ⁵Pɔka la a sɪra da zagɛ ti bāma kān gā la taaba, sān dagna ti ya ɛŋɛ la nōore ayɪla looge wakate fɛɛ ti ya pu'use Nawɛnne, bɛla poorum ya le lagum na taaba ti Asūtāana* da botɪ ya ɛŋɛ be'em, ya sān ka tā'age yōke ya mɛŋa. ⁶Mam n yeke ya se'em wā, la dagɪ pɛrgre, la de la sore ti mam pa'ale ya. ⁷La sān dena mam tɛ'esgo, nɛra woo sān dena dakōore wu mam n ān se'em wā, la ān sōŋa. La nɛrsaala woo tarɪ la a bɔ'a ti Nawɛnne bɔ ɛ. Ayɪla tarɪ la bɔ'a ayɛma, ti ayɛma mɛ tara bɔ'a ayɛma.

⁸Mam yetɪ seba n ka tara pɔgba bu n ka tara sɪrba, la pɔkōpa yetɪ, ba sān ken bɔna bāma bayɪla mā'a wu mam n ān se'em na, la ān sōŋa. ⁹La ba sān ka tāna wun yōke ba mɛŋa, ba di pɔgba, bu ba ele sɪrba. La ān sōŋa ti ya di pɔgba, bu ya ele sɪrba, sōna yāma n zɪ ti a yemleego tara ya nāmsra. ¹⁰La sān dena seba n tarɪ pɔgba bu n tarɪ sɪrba la, mam yetɪ ya la wāna: La, la dagɪ mam mɛŋa nōore, la de la

Zuudāana Azezi nōore: Pɔka da base a sira. ¹¹La a sãn base a sira, a zēa, a da le bɔta buraasi, bu ēɲa la a sira la mǎale ba yelle la le naage taaba. Buraaga mē da lebse a pɔga.

¹²La sãn dena nērba baseba la, mam yeti la wǎna: La de la mam mēɲa n yeke, la dagi Zuudāana nōore: Buraaga n doli Azezi sore sãn tara pɔga n ka doli Azezi sore, dee sake ti a bɔna la ē, a da lebse ē.

¹³La pɔka n doli Azezi sore sãn tara sira n ka doli Azezi sore, dee sake ti a bɔna la ē, a da base ē. ¹⁴Sira n ka doli Azezi sore ãn sɔɲa me, a pɔga n de Nawēnne nēra la iyǎ. La pɔka n ka doli Azezi sore ãn sɔɲa me, a sira n de Nawēnne nēra la iyǎ. Bela ba kɔma wun ãna sɔɲa me, sãn dagna bela, ba kɔma wun ãna wu nēr-seba n ka doli Nawēnne kɔma. ¹⁵La seka n ka doli Azezi sore la, sãn bɔɔra ti a base seka n doli Azezi sore la, a base ē ti a fɔrge. La sãn dena bela, la ka de pēgre ti pɔka bu buraaga n doli Azezi sore bɔna la seka n ka doli Azezi sore. Nawēnne wi to ti ti vɔa la sū-mǎ'asum la taaba. ¹⁶Pɔka, fɔn ēɲe la wǎne bǎɲe fɔn sãn wun tǎ'age boti fu sira la yē fǎare? Bu buraaga, fɔn ēɲe la wǎne bǎɲe fɔn sãn wun tǎ'age boti fu pɔga la yē fǎare?

Sela n tarti yōoro de la Nawēnne sakre

¹⁷Sela n ãn sɔɲa de la nēra woo vɔa wu ēn daan ãn se'em ti Nawēnne wi ē na, wu Zuudāana n bɔ ē ti a vɔa se'em na. La de la bela ti mam pa'ali Nawēnne nērba n boe zē'esti wuu ti ba ita. ¹⁸Nēr-seka sãn wǎ, dee ti Nawēnne wi ē, a da ɛera ti a sɔge wǎaga* la. Nēr-seka n mē ka wǎ, dee ti Nawēnne wi ē, a da wǎ. ¹⁹Seka n wǎ, bu seka n ka wǎ, ba wuu ka tarti yōoro. Sela n tarti yōoro de la Nawēnne nōore sakre. ²⁰Nēra woo ken ãna wu ēn daan ãn se'em ti Nawēnne wi ē na. ²¹Fu daan sãn dena la yamɲa ti Nawēnne wi fo, da base ti fu yem yɔɔra. La sore sãn wa bɔna ti fu wun to'oge fu mēɲa, fu doose bilam

to'oge fu mēŋa. ²²La nēr-seka n de yamŋa ti Zuudāana la wi ē, a de la nēra ti Zuudāana boti a to'oge a mēŋa. Bela mē, nēr-seka n dagi yamŋa ti Zuudāana Krisi wi ē, a de la Krisi yamŋa. ²³Nawēnne da ya la toogo, bela da lebge-ya nērba yamsi. ²⁴Bela iyā, m sobiisi, nēra woo vɔa Nawēnne nēŋam wu ēn daan ān se'em ti Nawēnne wi ē na.

Apoli le tɔge pɔgdire yelle

²⁵Mam yeti m tɔge la seba n ka tari surba bu pɔgba la yelle, mam ka to'oge nōore Zuudāana Azezi zē'am. La de la mam mēŋa putē'ere, la ya wun bɔ mam sira Zuudāana la n zoe mam ninbāalga la iyā. ²⁶Yel-seba n boe leele wā iyā, mam tē'ese ti la ān sōŋa ti nēra woo ken āna wu ēn ān se'em na. ²⁷Fu sān tara pɔga, da ɛera ti fu lebse ē. La fu sān ka tara pɔga, da ɛera ti fu di pɔga. ²⁸La fu sān di pɔga, la dagi be'em. La pug-seka n mē ele sira, la dagi be'em. Nēr-seba n tari pɔgba, bu surba la wun yē la sū-sā'aŋɔ dūnia wā puam, bela ti mam ka bɔɔra ti yel-bāma paage ya.

²⁹M sobiisi, mam n yeti ya se'em n wāna: Wakat-seka ti Nawēnne bɔ tɔ la ka le zo'oge. Lan pɔse leele wā, la ān sōŋa ti seba n tari pɔgba la, āna wu ba ka tari pɔgba, ³⁰ti seba n kelli, āna wu ba ka kelli, ti seba n iti sū-yēlga, āna wu ba ka iti sū-yēlga, ti seba n da'ari, āna wu ba ka tari sela ti ba da'ari la. ³¹Ti seba n yēti dūnia bōntarsōm, āna wu ba ka yēti bōntarsōm. Se'ere n soe la, dūnia wā n ān se'em wā tolli mɛ.

³²Mam ka boori ti ya yem yɔɔra la sela sela. Seka n ka tari pɔga dikri a putē'ere wuu tōnna la Zuudāana la tōoma, a eeri la ēŋa n wun ēŋe se'em ti la āna Zuudāana la sūure yēlum. ³³La seka n di pɔga, dūnia yela n pake ē, a eeri la ēŋa n wun ēŋe se'em ti la āna a pɔga sūure yēlum. ³⁴Bela, a putē'ere n boori se'em na pvi mɛ. La pɔka bu

pugla n mē ka tari sira dikri a putē'ere wuu tōnna la Zuudāana la tōoma, a eeri la ēṅa n wun ēṅe se'em, ti a iyā, la a sia wun wa dena Nawēnne bōnɔ. La seka n tari sira, dūnia yela n pake ē, a eeri la ēṅa n wun ēṅe se'em, ti la āna a sira sūure yēlum. ³⁵La de la yāma sōṅre iyā ti mam yeke bela. Mam ka boori ti m mōrge ya dike yelle dōgle ya zuto. Mam boori ti ya tōm na sela n ān sōṅa, la ya dike ya mēṅa wuu bɔ Zuudāana la, tōnna a tōoma.

³⁶La sān dena seba n lēgri pugunto ti ba di la, seka sān tē'ese ti ēṅa sān base a zeba la ka di ē, ēṅa ēṅe ē na be'em, dee ti a yemleego tara ē, a di ē wu ēn tē'ese se'em na, ti la dagi be'em. ³⁷La nēr-seka sān tē'ese a putē'erum sōṅa sōṅa ti ēṅa kān di ē, ti pērgre ka bōna mī, a sān wun tā'age yōke a mēṅa, a ēṅe wu ēn tē'ese se'em na, ti la ān sōṅa. ³⁸Bela, nēr-seka n di pɔga, a ēṅe sōṅa. La nēr-seka n mē ka di pɔga, a ēṅe sōṅa gānna.

³⁹Pɔg-seka n ele, dēni ti a bōna la a sira le, ēn ken vɔa wakate la. La a sira la sān ki, sore boe me ti a le ele nēr-seka ti a boori, la dēni ti a dena nēra n doli Zuudāana Azezi sore. ⁴⁰La mam tē'ese ti a sān ka le ele sira, a sūure wun āna yēlum gānna ēn ele. Mam tē'ese ti mam tari la Nawēnne Sia pa'ala ya.

8

Baga nēnno yelle

¹La sān dena bōn-seba ti ba dike kāabe bɔ бага la nēnno yelle, ti mi ti ti wuu tari bāṅre me, wu yāma n yeke se'em na. La bāṅre boti nēra zēkra la a mēṅa. La nōṅlum sōṅri nērba me. ²Nēr-seka sān tē'ese ti ēṅa mi sela, a ken ka mina wu lan mase ti a mina se'em. ³La nēra sān nōṅe Nawēnne, Nawēnne mi ē me.

⁴Bela, la sãn dɛna baga nɛnnɔ na yelle, ti mi ti baga de la sɛla n de zãŋa dũnia wã zuo, dee ken mina ti Nawɛnnɛ ayɩla mǎ'a n boe.

⁵Bõndõma n boe saazuum bu tɛŋa zuo, ti nɛrsaalba wi'iri ti wɛna.

Astra, bõndõma zozo'e n boe ti nɛrsaalba wi'iri ti wɛna, bu

zuudãandõma. ⁶La tõma mi ti Nawɛnnɛ ayɩla n boe dɛna ti So n nãam sɛla woo, la ɛŋa ãyã ti ti vɔa. La tõma ken mina ti Zuudãana ayɩla mǎ'a n boe, a de la Azezi-krisi, la doose la ɛŋa ti sɛla woo bɔna, la ken doose la ɛŋa ti ti tara vɔm.

⁷La, la dagɩ nɛra woo n mi wãna. Nɛrba baseba malum baga mɛ, ti halɩ la zina ba sãn obe baga nɛnnɔ, ba ken tɛ'esra a yelle mɛ ti la sɩrɩ de la baga dia. La ban ka mi Nawɛnnɛ sore yɛla sõŋa la, ba tɛ'esrɩ ba sũure pvam ti ba ɛŋɛ la be'em. ⁸La dagɩ dia n wun botɩ ti lɛm Nawɛnnɛ. Ti sãn ka di, sɛla ka pɔ'ɔrɩ tɔ, la ti sãn di, a ka pa'asrɩ ti sɛla.

⁹La guuse ya mɛŋa, ti yan tarɩ nõore dita sɛla woo la, da base ti nɛr-sɛba n ka tarɩ pãŋa Nawɛnnɛ sore doosgo pvam na tõm tõon-be'ero.

¹⁰Nɛr-sɛka n ka mi Nawɛnnɛ sore yɛla sõŋa la, sãn yɛ fõn tarɩ bãŋrɛ la n zĩ baga kãabgɔ zɛ'am ɔbra nɛnnɔ, la wun pã'ase ɛ ti a mɛ obe la baga nɛnnɔ. ¹¹Bela, fõn bãŋrɛ la wun base ti nɛr-ɛŋa n ka tarɩ pãŋa Nawɛnnɛ sore doosgo pvam na sã'am mɛ, a de la fu sɔbia ti Krisi ki a ãyã. ¹²Fu sãn tõm tõon-be'e-ɛna sã'am fu sɔbia n ka mi Nawɛnnɛ sore yɛla sõŋa putɛ'erɛ, fu ɛŋɛ la Krisi be'em. ¹³Bela, la sãn dɛna dia n wun base ti mam sɔbia tõm tõon-be'ero, mam kãn le malɩn di ɛ, ti m da base ti m sɔbia tõm tõon-be'ero.

9

Apolɩ base ɛn tarɩ sore wun ɛŋɛ sɛla

¹Mam ka soe m mēṅa tāna wun ēṅe mam n boori se'em me bu? Mam dagi la Krisi Tōntōnna* bu? Mam daan ka yē ti Zuudāana Azezi me bu? La dagi tōon-seba ti mam tōnni bɔ'ɔra Zuudāana la n base ti yāma bɔ ē sira? ²Baa nērba baseba sān ka sake ti mam de Krisi Tōntōnna*, yāma mase me ti ya sake. Yāma n doli Krisi sore la, n de sela n pa'ale ti mam de Krisi Tōntōnna. ³Seba n zergri mam na, mam tɔgri la wāna lɛrga ba. ⁴Tōma ka tari sore ti ba bɔ ti dia la ko'om ti tōoma la iŷā? ⁵Tōma ka tari sore wun di pɔgba n doli Nawēnne sore ti ba dɔla ti ɛera wu ti Tōntōn-taaba, la Zuudāana yɔbsi, la Apiyɛeri n uti se'em na bu? ⁶Yāma tē'ese ti mam na Abarnabasi mā'a n de ti tōnna ti mēṅa dita bu? ⁷Āne n de sudaaga dee bisra a mēṅa dia yelle? Āne n sele tusti dee ka dita ba biɛ? La āne n gu'uri dūnsi dee ka dita ba ulum?

⁸Mam ka yele bela la nērsaala putē'ere mā'a. Nawēnne lɔɔ* la mē yele la bela. ⁹La gulse lɔɔ ti Nawēnne yuun bɔ Amoyisi* gōnno la puam yeti: << Da ēṅe-ya naafɔ n kɔɔri nōore yuka. >> La de la niigi yelle mā'a ti Nawēnne yuun tɔge bu? ¹⁰Ayei, la de la tōma yelle ti la gulse bela. Bela nēr-seka n kɔɔri tari putē'ere ti a wun yē me, ti seka n wē'eri bōnkɔɔla mē tari putē'ere ti a wun yē, dēni ti ba wuu yē ba pure. ¹¹Tōma n mōole Nawēnne yetɔga la bɔ ya la, la ān wu bōnbuuri ti tōma bure. Bela, la mase me ti ya looge ya bōntarsōm na sōṅe tōma wu bōnkɔɔla pure ti ya bɔ tōma. ¹²Nērba baseba sān tara nōore ti ba to'oge yāma bōntarsōm, tōma n tari nōore ti ti to'oge yāma bōntarsōm gānna. La tōma ka to'oge ya sela wu tōma n tari nōore se'em na, tōma sake nāmsgɔ me sela woo puam, tōma ka boori ti ti gu Krisi kō-yēlga la mōolgo.

¹³Yāma ka mi ti seba n tōnni Wēnde-kāte* la puam, diti la bilam? La ti seba n kāabri bɔ'ɔra Nawēnne na, to'ori ba pure la kāabgo* zē'a

na? ¹⁴Bela, Zuudāana la bɔ nōore me ti seba n mōoli kō-yēlga la, mē tɔ'ɔra ba dia bilam.

¹⁵La mam ka to'oge ya sɛla baa ayula wu mam n tarɪ nōore se'em na. La mam ka gulse bɛla mē yetɪ ya bɔ mam sɛla. Baa mam sãn wun ki sōi, ti nēra da wa base ti mam ka tara yēsōm. ¹⁶Mam n mōoli Nawēnne kō-yēlga la, mam ka tã wun wē m yō'ogo a ïyã. La de la pēgre ti mam mōole. Mam sãn ka mōole kō-yēlga la, mam wun yē la toogo. ¹⁷La sãn de ni la mam mēŋa n looge yem mōola kō-yēlga la, mam wun to'oge ni la yɔɔɔ. La, lan de pēgre ti mam mōole la, la de la tōone ti Nawēnne dɪke dɔgle mam zuo. ¹⁸Bela, bēm n de mam yɔɔɔ? La de la mam n mōoli kō-yēlga la bɔ'ɔra nērba zãŋa, dee ka tɔ'ɔra ba sɛla wu mam tarɪ nōore se'em na.

¹⁹Mam soe m mēŋa mɛ, mam dagɪ nēra yamŋa. La baa bɛla, mam dɪke m mēŋa lebge la nērba wuu yamŋa, ti m tã'age botɪ ba nērba zozo'e dɔla Krisi. ²⁰Mam sãn bɔna Zifdōma zē'am, mam vɔa wu Zifdōma la, ti m tã'age botɪ ba doose Azezi. Amoyisi lɔɔ la ka le tara nōore la mam, la mam sãn bɔna la nēr-bãma n dolɪ lɔɔ la, mam sakru lɔɔ wu bãma la, ti m botɪ seba n dolɪ lɔɔ la doose Azezi. ²¹La mam sãn bɔna nēr-seba n ka dolɪ lɔɔ la zē'am, mam vɔa wu nēr-seba n ka dolɪ lɔɔ la, ti m botɪ ba doose Azezi. La bɛla ka pa'ale ti mam ka dolɪ Nawēnne lɔɔ la. Mam dolɪ la Krisi lɔɔ. ²²Mam sãn bɔna la nēr-seba n ka tarɪ pãŋa Nawēnne sore doosgo pvam, mam vɔa wu bãma, ti m sōŋe ba ti ba da base Nawēnne sore. Mam itɪ sɛla woo la bɛla bɔ'ɔra nērba buuri wuu, ita mam wun ēŋe se'em ti m tã'age fãage ba nērba baseba. ²³Nawēnne kō-yēlga la ïyã ti mam ita bɛla wuu ti m wa po to'oge a pure.

²⁴Yãma mi ti zua pvam, zɔtba la wuu lagɪm zɔta mɛ, la ba nēra ayula mã'a n wun zoe yãŋe to'oge bɔ'a. Bela, mōrge-ya wu zɔtba n zotɪ

se'em na, ti ya yāṅṅe to'oge bɔ'a Nawēnne zē'am. ²⁵Zɔtba wuu yōkri ba mēṅa me sela woo puam ti ba to'oge bɔ'a n kān yuuge dee sã'am. La tōma yōkri ti mēṅa ti ti wa to'oge la bɔ'a n kān malin sã'am. ²⁶Bela n soe ti mam ka zɔta yoo yoo, la mam ka zɛbri yoo yoo wu nēra n wē'eri kusebgo. ²⁷Mam mōrgri m īyã me tara m mēṅa sōṅa sōṅa. Se'ere n soe la, mam ka boori ti mam n mōoli kō-yēlga la bɔ'ora nērba la, mam mēṅa wa koṅe yɔɔɔ Nawēnne zē'am.

10

Israyeli dōma māmsgo

¹M sɔbiisi, mam boori ti ya tē'ese la ti yaabdōma n yuun doli Amoyisi* la yelle. Ba wuu yuun boe la sawate la tēṅa, la ba wuu yuun doose la ko-kāte la puam tole. ²La ān wu Nawēnne yuun mise ba me sawate la puam, la ko-kāte la puam ti ba dena ayɔla la Amoyisi. ³Ba wuu yuun di la dia ayɔla, dee yū ko'om ayɔla n ze'ele Nawēnne zē'am. ⁴Ba yuun yū la ko'om n yesri tãmpīa ti Nawēnne bɔ ba puam. Tãmpī-ēṅa yuun de la Krisi n doli ba. ⁵La baa bela, ba nērba zozo'e yuun ka uti sela n mase Nawēnne yem, ti a base ti ba ki weego la puam. ⁶Bōn-bāna wuu ēṅe ti la pa'ale la tōma, ti ti da bɔɔra ti ēṅe be'em wu bāma la. ⁷Da dɔla-ya бага wu bāma baseba n yuun ēṅe se'em na. La gulse Nawēnne gōṅɔ puam yeti: <<Nērba la zī'ire me di dee yū, dee isge de'ena*f2*.>> ⁸Ti da ita yalɔ wu bāma baseba n yuun ēṅe se'em, ti ba nērba tuspisyi la atā ki daare ayɔla la. ⁹Ti da make-ya ti Zuudāana la bise wu bāma baseba n yuun ēṅe se'em, ti bōnse'edōma ku ba la. ¹⁰Ti da yōnna-ya la Nawēnne wu bāma baseba n yuun yōm se'em, ti kūm malēka* ku ba la.

¹¹Bōn-bāma wuu yuun ēṅe ti yaabdōma ti la dena la māmsgo bɔ

nērba baseba. La ba gulse bela, ti la dena la zāsḡo bɔ tōma seba n boe wakat-ēna ti dūnia lem ba'asḡo wā. ¹²Bela, nēr-seka n tē'ese ti ēḡa itu sōḡa dee ze sōḡa, a guuse da lui. ¹³Yel-seba n paari ya la, la de la yel-bāma n mē paari nērba baseba. La Nawēnne de la sira dāana, a kān base ti yel-seka n gānni ya pāḡa paage ya. La yelle puam, a won bɔ ya pāḡa ti ya wibe, dee ēḡe sore ti ya yese.

Baga dia, la Zuudāana kūm tēere dia yelle

¹⁴Bela m sobiisi, yese-ya ya mēḡa baga kāabḡo puam. ¹⁵Mam tḡri bɔ'ɔra ya wu ya de la nēr-seba n tari yem. Ya mēḡa tē'ese mam n yeti ya sela la vōore. ¹⁶Bōn-yūula la ti tōma ēn dūke pu'use Nawēnne dee yū la, pa'ale ti tōma lagum na Krisi dena ayula, a zum n yese bɔ tōma la iyā. La borbori la ti tōma ēn fiise pu taaba obe la, pa'ale ti tōma lagum na Krisi dena iyā ayula. ¹⁷Borbori la n de ayula la, tōma mē de la iyā ayula, baa tōma n zo'oge la. Se'ere n soe la, ti wuu lagum ɔbra la borbor-ēḡa ayula.

¹⁸Tē'ese-ya Israyeli dōma yelle. Seba n diti di-seba ti ba dūke kāabe Nawēnne kāabḡo* bimbinne zuo la, ba lagum na Nawēnne. ¹⁹Bēm ti mam yeti wāna? Yāma tē'ese ti mam yeti bagre, bu di-seba ti ba kāabe bɔ bagre la, de la sela bu? Ayei. ²⁰Mam yeti ya me ti ya bāḡe ti sela ti bag-kāabri ba kāabri la, ba kāabri bɔ'ɔra la kulkā'arsi*, dagi Nawēnne. Mam ka boori ti ya lagum na kulkā'arsi. ²¹Ya ka tā wun yū Zuudāana Azezi bōn-yūula, dee le yū kulkā'arsi bōn-yūula, ya ken ka tāna wun di Zuudāana kūm tēere dia, dee le di kulkā'arsi dia. ²²Ti sān uta bela, ti wun boti Zuudāana sūure n isge. Yāma tē'ese ti tōma tari pāḡa gāna ē me bu?

Nā'asra-ya Nawēnne sela woo puam

²³Yāma nērba baseba yeti: < <Sore boe me ti ti ēḡe sela woo.> >

Astra, la, la dagi sela woo n tari yōorɔ. Ba yeti: < < Sore boe me ti ti
ēŋe sela woo. > > La, la dagi sela woo n sōŋri. ²⁴Nēra nēra da eera a
mēŋa sōŋre mā'a, eera-ya taaba sōŋre.

²⁵Ya tari sore ti ya da nēn-seba wuu ti ba koosri da'asi pvam obe
me. Da base-ya ti la nāmsra ya putē'era ti ya soke nēnnɔ na n ze'ele
zē'a. ²⁶La gulse Nawēnne gōŋɔ pvam yeti: < < Dūnia, la bōn-seba
wuu n boe a pvam de la Zuudāana Nawēnne bōnɔ. > >

²⁷Nēra n ka bɔ Azezi sira sãn wi ya ti ya wa'am a yire wa di, ti ya
sake sēŋe, di-ya di-seba wuu ti a tari wa bɔ ya la, da base-ya ti la
nāmsra ya putē'era, ti ya soke nēnnɔ na n ze'ele zē'a. ²⁸La nēra sãn
yele ya yeti: < < Di-bāna wã de la bagre dia > >, da di-ya, seka n
yele ya bela la ïyã, ti la da nāmse a putē'ere. ²⁹La dagi yāma mēŋa
putē'era yelle ti mam yele, la de la nēr-seka n yele ya la putē'ere.

La yāma mē tã soke mam yeti: < < Bēm soe ti nēra ayēma putē'ere
wun gu mam, ti mam kãn di sela ti mam tari nōore ti m di? ³⁰Mam
sãn pu'use Nawēnne dia ïyã dee di, bēm ti nēra wun zerge mam la
bōn-seka ti mam pu'use Nawēnne a ïyã? > >

³¹Lan de se'em na, ya sãn dita me, bu ya yūuri me, bu sela woo ti
ya iti, ita-ya ba wuu nã'asra Nawēnne. ³²Da ēŋe-ya sela Zifdōma, bu
seba n dagi Zifdōma, bu Nawēnne nērba zē'am ti la gu ba Nawēnne
sore doosgo. ³³Ita-ya wu mam n iti se'em na. Mam mōrgri me ti m
ēŋe sela n ãn nēra woo sūure yēlum sela woo pvam, mam ka eeri m
mēŋa sōŋre, mam eeri la nērba zozo'e sōŋre, ti ba tã'age yē fāare.

11

¹Ita-ya mam n iti se'em na, wu mam mē n iti wu Kisi n iti se'em
na.

Buraaga la pɔka n wɔn āna se'em Wēndeto puam

²Mam pēgrɪ ya, yāma n tērtɪ mam yelle sela woo puam, dee dɔla bōn-seba wuu ti mam pa'ale ya la. ³La mam boortɪ ti ya bāŋɛ ti Krisi de la nēra woo zuudāana, ti sira mē dena a pɔga zuudāana, ti Nawēnne dena Krisi zuudāana. ⁴Bela, bura-seka n pu'usrɪ Nawēnne, bu n to'oge Nawēnne yetɔga tɔgra bɔ'ɔra nērba, dee vuge a zuugo, a pɔ'ɔrtɪ la a zuudāana. ⁵La pɔg-seka n pu'usrɪ Nawēnne, bu n to'oge Nawēnne yetɔga tɔgra bɔ'ɔra nērba, dee ka vuge a zuugo, a pɔ'ɔrtɪ la a zuudāana. La ān wɔ ēn pōn a zuugo la. ⁶Pɔka sān ka bɔ'ɔra ti a vuge a zuugo, a yi se a zomto. La ti mi ti la de la yānne bɔ pɔka ti a pōn a zuugo, bu a se a zomto. Bela, dēntɪ ti a vuge a zuugo. ⁷Buraaga ka de a vuge a zuugo, se'ere n soe la, Nawēnne nāam ē ti a wōna la a mēŋa, dena nā'asgɔ bɔ ē. La pɔka de la nā'asgɔ bɔ buraaga. ⁸Nawēnne ka dɪke pɔka kōbre nāam buraaga, a daan dɪke la buraaga kōbre nāam pɔka. ⁹La Nawēnne ka nāam buraaga pɔka īyā, la a nāam pɔka la buraaga īyā. ¹⁰Bela īyā, la malekadōma* īyā, la mase ti pɔka vugra a zuugo ti la pa'ale ti a tartɪ nōore. ¹¹La Zuudāana doosgo la puam, pɔka boe la buraaga nu'usum, ti buraaga mē bɔna pɔka nu'usum. ¹²Nawēnne daan dɪke la buraaga nāam pɔka. Ti pɔgsɪ mē dɔgra buraastɪ. Bela wuu ze'ele la Nawēnne zē'am.

¹³Tē'esɛ-ya ya mēŋa bise. La mase ti pɔka pu'usrɪ Nawēnne nēr-kuvɔɔ puam dee ka vuge a zuugo? ¹⁴Nērba wuu mi me ti buraaga sān base a zomto ti ba wɔge, la de la yānne. ¹⁵La pɔka sān base a zomto ti ba wɔge, la de la pēka bɔ ē. A zomto la n wɔge la, de la sela bɔ ē ti a dɪke vuge a zuugo. ¹⁶La nēr-seka sān bɔ'ɔra ti a wē nōke'ene bōn-ēna wā yelle, dēntɪ ti a bāŋɛ ti tōma, la Nawēnne nērba n boe zē'esɪ wuu la, ka tartɪ urgɔ ayēma.

Zuudāana kūm tēere dia

(Amatie 26:26-29, Amarki 14:22-25, Aluki 22:14-20)

¹⁷Mam n yeti m yelee ya se'em wā, mam ka yeti m pēge ya, bēm iyā, ya ēn lagse taaba la, ya ka iti sōṅa, ya iti la be'em. ¹⁸Pɔspɔsi, mam wōm ti ya sān ēn lagse taaba ti ya pu'vse Nawēnne, welgre n boe ya tēṅasuka. La mam sake ti yel-seba ti ba yelee la, baseba de la sira.

¹⁹Dēni ti welgre bōna ya tēṅasuka, ti ba bāṅe seba n siri doli Nawēnne bōke. ²⁰Yāma ēn lagse taaba la, ya tē'ese ti ya diti la Zuudāana dia, la daga bela. ²¹Se'ere n soe la, ya sān lagse, nēra woo dēṅe ka dita la a mēṅa dia. Ti seba kōm dōnna, dee ti baseba yū buge. ²²La sān dena bela, yāma ka tari yie wun di dee yū bilam? Bu yāma ka nanni la Nawēnne nērba la, dee ita nasdōma yānne? Mam wun yelee ya ti bo? M pēge ya bela iyā bu? Ayei, mam kān pēge ya.

²³Zāsṅɔ seka ti mam daan zāsūm ya la, mam to'oge ē na Zuudāana la zē'am. La de la wāna: Yu'vṅ-seka ti ba wun yōke ti Zuudāana Azezi la, a dīke la borbori, ²⁴pu'vse Nawēnne a yel-sōnne dee fiise bō ba yeti: < <Ena de la mam iyā, ti mam bō'ori ya. Ita-ya wāna tēra mam yelle. > > ²⁵Ban daan di dia ki'ulum na, a dīke la bōn-yūula yeti:

< <Bōn-yūul-bāna pa'alɪ ti Nawēnne bīṅe la nōor-paalga la nērsaalba mam zum n wun yese la iyā. Wakat-seka ti ya ēn yeti ya yū ba, ita-ya wāna tēra mam yelle. > > ²⁶Wakat-seka woo ti ya obrɪ borbori wā, dee yūura bōn-yūula wā, ya pa'alɪ la Zuudāana la kūm yelle, halɪ ti a wun wa leme wa'am.

²⁷Bela, nēr-seka woo n obrɪ borbori wā, dee yūura bōn-yūula wā, dee ka mase ti a obe dee yū, a tōnni la tōon-be'ero pō'ora Zuudāana iyā, la a zum na. ²⁸Bela, nēra woo tē'ese bise a sān mase, deege obe borbori la, dee yū bōn-yūula la. ²⁹Nēr-seka n ka nanni Zuudāana la

īyā, dee obe borbori la, dee yū bōn-yūula la, a eeri la sibgre bɔ'ora a mēŋa. ³⁰Bela n soe ti ya puam, nērba zozo'e dena bā'adōma, ti seba ka tara pāŋa, ti baseba ki. ³¹Ti sān tē'ese ti mēŋa bise ti sān mase, Nawēnne kān sibge tɔ. ³²La Zuudāana la sān sibgra tɔ, a pa'ali ti me ti ti uta sōŋa, ti a da wa lagum ti la dūnia nērba di ti sariya sibge tɔ.

³³Bela, m sobiisi, ya sān lagse taaba ti ya di Zuudāana kūm tēere dia la, ya gu'ura taaba. ³⁴Nēra kōm sān dōnna, a di a yire dee wa'am, ti ya da kān lagse taaba ε sibgre bɔ ya mēŋa. La yel-seba n weege la, mam sān wa wa'am, mam wun māale.

12

Nawēnne Sia bɔ'a yelle

¹Leele wā, mam yeti m tɔge ya la Nawēnne Sia* bɔ'a yelle. M sobiisi, mam boori ti ya bāŋe la bōn-ēŋa yelle sōŋa. ²Ya mi ti yan daan nān ka bɔ Azezi sira la, ya daan taage la baga n de mugro la poore dɔla, ka tāna wun base. ³Bela ti mam bɔ'ora ti ya bāŋe ti Nawēnne Sia la sān bɔna la nēra, a ka tā wun tɔge Azezi yelle be'em. La nēra mē ka tā wun yeti, Azezi de la Zuudāana, ti la sān dagna Nawēnne Sia n boti a yele.

⁴Nawēnne Sia bɔ'a la de la to'oto'ore, la, la de la Sia ayula mēŋa n bɔ'ori. ⁵Tōoma la de la to'oto'ore, la, la de la Zuudāana ayula ti ti tōnni bɔ'ora. ⁶Tōoma la n tōnni se'em na de la to'oto'ore, la, la de la Nawēnne ayula n tōnni ba wuu nērba wuu puam. ⁷Nawēnne Sia la bɔ'ori nēra woo la bɔ'a nērba la wuu sōŋre īyā. ⁸Sia la bɔ'ori nēra ayula la bɔ'a ti a tɔgra yem yetɔga, la Sia ēŋa ayula n bɔ'ori nēra ayēma bɔ'a ti a tɔgra bāŋre yetɔga. ⁹La Sia ēŋa mēŋa n bɔ'ori nēra ayula bɔ'a ti a bɔ'ora Nawēnne sira zozo'e, dee bɔ'ora ayēma pāŋa ti a

boti bā'adōma yēta ĩmā'asum. ¹⁰Sia la n bɔ'ɔri nēra ayula pāᅇa ti a tāna tōnna tōon-yālma, dee bɔ'ɔra ayēma bɔ'a ti a tɔ'ɔsra Nawēnne yetɔga tɔgra bɔ'ɔra nēriba, ēᅇa n bɔ'ɔri nēra ayula yem ti a tāna wun bāᅇe sela n ze'ele Nawēnne Sia zē'a, la sela n ka ze'ele Nawēnne Sia zē'a bɔke. Sia ēᅇa n bɔ'ɔri nēra ayula bɔ'a ti a tāna tɔgra yetɔg-zāᅇsi, dee bɔ'ɔra ayēma bɔ'a ti a tāna pa'ala yetɔg-zāᅇsi la vōore. ¹¹La de la Sia ēᅇa ayula n iti bela wuu. Sia la bɔ'ɔri nēra woo la bɔ'a to'oto'ore wu ēᅇa n boori se'em.

Azezi-krisi nēriba ān wu nēra ayula ĩyā la

¹²Azezi-krisi nēriba ān wu ĩyā ayula n tari zē'esti to'oto'ore. La baa la zē'esti la n de to'oto'ore la, ba wuu de la ĩyā ayula. ¹³Tōma Zifdōma, la seba n dagi Zifdōma, la seba n de yamsi, la seba n dagi yamsi, tōma wuu n daan mise ko'om puam na, Nawēnne Sia boti ti lebge la ĩyā ayula. Nawēnne tōm na Sia ayula bɔ ti wuu.

¹⁴Nēra ĩyā ka tari zē'a ayula mā'a. A tari la zē'esti to'oto'ore. ¹⁵Nā'are sān yeti, ēᅇa n dagi nu'ugo la, ēᅇa ka po dena ĩyā la zē'a ayula, bela kān tā'age base ti a kān dena ĩyā la zē'a ayula. ¹⁶La tubre mē sān yeti, ēᅇa n ka de nifo la, ēᅇa ka po dena ĩyā la zē'a ayula, bela kān tā'age base ti a kān dena ĩyā la zē'a ayula. ¹⁷Ti ĩyā la wuu sān de ni nifo, a yeti a ēᅇe la wāne wōm yetɔga? La a wuu sān de ni tubre, a yeti a ēᅇe la wāne wōm yūuᅇo? ¹⁸Bela ti Nawēnne ēᅇe ĩyā zē'a woo wu ēn boori se'em, lagum ba taaba. ¹⁹Ba wuu sān de ni la zē'a ayula mā'a, ĩyā kān boe ni. ²⁰Bela ti zē'esti to'oto'ore bɔna, la ba de la ĩyā ayula.

²¹Bela nifo ka tā wun yeke nu'ugo yeti, ēᅇa ka boori a sōᅇre. La zuugo mē ka tā wun yeke nāma yeti, ēᅇa ka boori ba sōᅇre. ²²Lan pa'ase, ĩyā la zē'e-seba n ān wu ba ka tari pāᅇa la, tari yōoro me.

²³Zē'e-seba ti tōma bise ti ba ka tari yōoro zo'oge la, ti bisri la bāma

yelle sōŋa sōŋa. La zē'e-seba ti ti tē'ese ti ba ka mase ti nērba yē ba la, bāma ti ti malgrī sōŋa gānna. ²⁴La ka de ti dīke sela pī zē'e-sōma la. Nawēnne mēŋa n ēŋe ti īyā la, base ti ti bīsra zē'e-seba ti ti tē'ese ti ba ka tarī yōoro zo'oge la yelle sōŋa sōŋa, ²⁵ti welgre da bōna īyā la puam. La ti īyā la zē'esi to'oto'ore la wun sōŋra taaba. ²⁶Bela, zē'a ayula sān nāmsra, zē'esi la wuu mē nāmsri me. Zē'a ayula sān yē nā'asgo, zē'esi la wuu tarī la sū-yēlga.

²⁷Ya wuu de la Krisi īyā la. La nēra woo de la īyā la zē'a ayula.

²⁸Bela ti Nawēnne ēŋe nēra woo a zē'am a nēr-kuvŋo la puam. Pɔspɔsi de la seba ti Azezi mēŋa daan looge tōm ba la. Buyi dāana de la Nawēnne nōtɔ'ɔsrība. Butā de la karēnsāandōma, la seba n tōnni tōon-yālma, la seba ti a bɔ ba pāŋa ti ba boti bā'adōma yēta īmā'asum, la seba ti a looge ti ba sōŋra nērba, la seba n wun bōna nērba nēŋa, la seba n tɔgrī yetɔg-zāŋsi. ²⁹La dagi ti wuu n de seba ti Azezi mēŋa daan looge tōm na, dagi ti wuu n de nōtɔ'ɔsrība, dagi ti wuu n de karēnsāandōma. La dagi ti wuu n tarī pāŋa tōnna tōon-yālma, ³⁰la dagi ti wuu n boti bā'adōma yēta īmā'asum, dagi ti wuu n tɔgrī yetɔg-zāŋsi, dagi ti wuu n tā wun pa'ale yetɔg-zāŋsi la vōore.

³¹Ǝera-ya bɔ'a seba n gānni wuu.

La mam wun pa'ale ya so-seka n gānni ba wuu.

13

Nōŋlum yelle

¹Mam sān tɔgra nērsaalba buuri wuu yetɔga, la malekadōma* yetɔga, dee ka tara nōŋlum, mam ān wu dēnlɔŋɔ bu purga n wē'eri zāŋa. ²La mam sān tara bɔ'a tɔ'ɔsra Nawēnne yetɔga tɔgra bɔ'ora nērba, dee tāna wun bāŋe yela n sugē wuu vōore, dee tara mi'ilum

wuu, la mam sãn bɔ Nawēnne sira tãna wun boti tãna vurge, dee ka tara nõnɔlum, mam de la zãŋa. ³La mam sãn dɩke mam n tari sela wuu puɩ nasdõma, la baa mam sãn sake ti ba yõ mam ãyã bugum, dee ka tara nõnɔlum, bela ka tari yõoro bɔ mam.

⁴Nēr-seka n tari nõnɔlum mã'ari la a mēŋa, dee sõnra nērba, a ka iti sũure, a ka wē'eri yõ'ogo, la a ka zēkri a mēŋa. ⁵Seka n tari nõnɔlum ka iti sela n ka mase, a ka eeri a mēŋa sõnre mã'a, a sũure ka isgri, nēra sãn ēŋe ē be'em, a ka tēri ē a sũure puam. ⁶Seka n tari nõnɔlum ka iti sũ-yēlga la tōon-be'ero, a iti sũ-yēlga la sira. ⁷Seka n tari nõnɔlum iti sugri me sela woo puam. A bɔ sira me sela woo puam, a tari putē'ere me gu'ura sela woo ti a bɔ sira la, a tã wĩbra me sela woo puam.

⁸Nõnɔlum ka malɩn ba'asra. Nawēnne yetɔga ti ti to'osri tɔgra bɔ'ora nērba, la yetɔg-zãŋsi, la mi'ilum wun tole. ⁹Tõma n mi se'em, la tõma n to'osri Nawēnne yetɔga tɔgra bɔ'ora nērba la, de la fēe. ¹⁰La wakate sãn wa paage ti Nawēnne malge sela woo ti la mase sõŋa sõŋa, sela fēe ti tõma mi la wun tole.

¹¹Mam n daan de bia la, mam daan tɔgri wu bia la, mam daan tē'esra wu bia la, la mam daan wõnni yela võore wu bia la. La mam yãŋa n bi la, mam base biyã'ate me. ¹²Tõma n mi sela læele wã, ãn wu tõma bisri la bisga n ka yēti sõŋa puam. La wakat-ēŋa ti wun yē sela woo sõŋa. Mam n mi sela la, nãn de la fēe. La mam wun wa bãŋe ē sõŋa sõŋa wu Nawēnne n mi mam sõŋa se'em na. ¹³Bela, bõn-bãna batã n boe wakate wuu: La de la bɔ sira, la ti tara putē'ere gu'ura sela ti ti bɔ sira la, la nõnɔlum. La bõn-bãna batã puam, nõnɔlum n gãnni ba wuu.

14

Ti wun ɛ̃ɲe se'em ti Nawɛ̃nne Sia bɔ'a la sɔ̃ɲe nɛ̃rba

¹Ɛ-ya nɔ̃ɲlum, la ya ken ɛ̃ra Nawɛ̃nne Sia bɔ'a la, lan g̃annu, bɔ'a sɛka ti ya wun to'oge Nawɛ̃nne yetɔga tɔge bɔ nɛ̃rba. ²Sɛka n tɔgru yetɔg-z̃ãɲsi ka tɔgru bɔ'ɔra nɛ̃rba, a tɔgru bɔ'ɔra la Nawɛ̃nne. Se'ere n soe la, nɛ̃ra ka wɔ̃nnu a yetɔga la vɔore, Nawɛ̃nne Sia boti a tɔgra la yela n sɔge. ³La sɛka n to'osru Nawɛ̃nne yetɔga tɔgra bɔ'ɔra nɛ̃rba, ɛ̃ɲa tɔgru sɔ̃ɲra la nɛ̃rba, boti ba sɛ̃nna nɛ̃ɲa Nawɛ̃nne sore doosgo la puam, dee k̃a'ana ba, bɔ'ɔra ba buraane. ⁴Sɛka n tɔgru yetɔg-z̃ãɲsi sɔ̃ɲru la a mɛ̃ɲa. La sɛka n to'osru Nawɛ̃nne yetɔga tɔgra bɔ'ɔra nɛ̃rba sɔ̃ɲru la Nawɛ̃nne nɛ̃rba. ⁵Mam boori ni ti ya wuu tɔgra la yetɔg-z̃ãɲsi, la mam boori ti ya tɔ'ɔsra la Nawɛ̃nne yetɔga tɔgra bɔ'ɔra nɛ̃rba g̃anna. Nɛ̃ra s̃ãn tɔge yetɔg-z̃ãɲsi ti nɛ̃ra ka bɔna wun to'oge yetɔga la tɔge a vɔore pa'ale nɛ̃rba la ti la sɔ̃ɲe ba, sɛka n to'osru Nawɛ̃nne yetɔga tɔgra bɔ'ɔra nɛ̃rba la n g̃annu.

⁶M sɔbiisi, mam s̃ãn wa'am ya z̃e'am wa tɔgra yetɔg-z̃ãɲsi, mam wun ɛ̃ɲe la w̃ane sɔ̃ɲe ya? A ka tari vɔore bɔ ya. Sela n wun sɔ̃ɲe ya, de la mam s̃ãn pa'ale ya sela ti Nawɛ̃nne Sia puke pa'ale mam, bu m boti ya b̃ãɲe sela, bu m to'oge Nawɛ̃nne yetɔga tɔge bɔ ya, bu m z̃ãsum ya. ⁷La ̃ãn wu de'ɛ̃ɲo lɔgrɔ la: Wia s̃ãn pɛebra bura bura, bu kɔ̃lɲɔ s̃ãn w̃e'era bura bura, fu wun ɛ̃ɲe la w̃ane b̃ãɲe wia la pɛebgo vɔore, bu kɔ̃lɲɔ la w̃e'a vɔore? ⁸Benkonne s̃ãn pɛebe bura bura, ka pɛebe zɛbre pɛebgo, ̃ane n wun m̃ãasum yese zɛbre? ⁹Bela m̃e, ya s̃ãn tɔgra yetɔg-z̃ãɲka ti nɛ̃ra ka wɔ̃nnu a vɔore, nɛ̃ra wun ɛ̃ɲe la w̃ane b̃ãɲe ỹama n boori ti ya ye se'em? Ya yetɔga la de la z̃ãɲa. ¹⁰Yetɔga buuri zozo'e n boe d̃unia zuo, la ayila ka boe ka tara vɔore. ¹¹La mam s̃ãn ka wɔ̃nna yetɔga, mam na sɛka n tɔgru la de la s̃ama la taaba. ¹²Bela, ỹama n mɔ̃rgɛ ɛ̃ra Nawɛ̃nne Sia bɔ'a la, ɛ̃ra-ya bɔ'a sɛba n wun sɔ̃ɲe Nawɛ̃nne nɛ̃rba ti ba s̃ɛ̃ɲe nɛ̃ɲa Nawɛ̃nne doosgo puam.

¹³Bela ïyã, seka n tɔgrɪ yetɔg-zãŋka, a sose Nawēnne ti a boti a yãŋe tɔge a vōore. ¹⁴Mam sãn pu'usra Nawēnne la yetɔg-zãŋka, mam sia n pu'usrɪ, la mam ka wōnnɪ a vōore la m mēŋa yem. ¹⁵Bela, mam wun ēŋe la wãne? Mam wun pu'usra la m sia, dee ken pu'usra la m yem, la m yōona la m sia, dee ken yōona la m yem. ¹⁶Fu sãn pu'usra Nawēnne a yel-sōnne la yetɔg-zãŋka, nēra wun ēŋe la wãne ze'ele nērba la n lagse la puam yeti: < < Amina* > >, dee ka wōm fōn ye se'em na vōore? ¹⁷Baa fōn pu'usrɪ Nawēnne se'em na sãn āna sōŋa, la ka tari sōŋre bɔ nēr-ēŋa. ¹⁸Mam pu'usrɪ Nawēnne a yel-sōnne, mam n tɔgrɪ yetɔg-zãŋsɪ gãnna yãma wuu la. ¹⁹La Nawēnne nērba lagsgo zē'am, mam boori ti m tɔge la yetɔga banuu la m yem ti nērba wōm ba vōore ti la zãsum ba, sōna mam wun tɔge yetɔg-zãŋsɪ tuspia.

²⁰M sobiisi, da āna-ya wu kɔma n tē'esrɪ se'em na. La, la sãn dēna be'em urgo yelle, āna-ya wu kɔm-pɪgsɪ n ka uti be'em na. La ya tē'esgo puam, āna-ya wu bōnkegsɪ la. ²¹La gulse Nawēnne gōŋo puam ti Zuudāana Nawēnne yeti: < < Mam wun base ti sãama n tɔgrɪ yetɔg-zãŋsɪ mōole m kō-yēlga bɔ m nērba. Baa la wãna wuu, ba kãn selse mam. > > ²²Bela ïyã, yetɔg-zãŋsɪ de la sela n pa'alɪ seba n ka bɔ sɪra Nawēnne pãŋa, la dagɪ seba n bɔ sɪra la ïyã. La nēra n to'oge Nawēnne yetɔga tɔge bɔ nērba la, n de sela n pa'alɪ seba n bɔ sɪra Nawēnne pãŋa, la dagɪ seba n ka bɔ sɪra la ïyã.

²³Seba n bɔ sɪra la sãn lagse taaba zē'a ayɪla, ti nēra woo tɔgra la yetɔg-zãŋsɪ, ti seba n ka mi, dee ka bɔ Nawēnne sɪra kē, ba kãn yeti ya zallɪ mē? ²⁴La seba n bɔ sɪra la sãn lagse taaba, ti nēra woo tɔ'ɔsɪra Nawēnne yetɔga tɔgra bɔ'ɔra nērba, ti nēra n ka mi, dee ka bɔ Nawēnne sɪra kē, ēn wōm sela woo la, wun base ti a bãŋe a tōon-be'ero, dee pa'ale ē a tuure. ²⁵Yel-seba n svge a sūure puam wun puke mē peelem puam, ti a wun ka dūma dɪke a nēŋa vōgle tēŋa nã'ase

Nawēnne, dee yeti: < <Nawēnne siri boe la ya lɛ. > >

lta-ya sela woo ti ba dɔla sore

²⁶Bela, m sɔbiisi, ti won ɛŋɛ la wāne? Ya sān lagse taaba ti ya pu'use Nawēnne, ya nēra ayila tā won pure yōone, ti ayēma zāsum, ti ayēma pa'ale bōn-sɛka ti Nawēnne puke pa'ale ɛ, ti ayēma tɔge yetɔg-zāŋka, ti ayēma tɔge yetɔg-zāŋka la vōore pa'ale nērba. lta-ya bela wuu ti la sōŋɛ Nawēnne nērba ti ba sēŋɛ nēŋa Nawēnne doosgo puam. ²⁷La sān dɛna yetɔg-zāŋsi ti ya yeti ya tɔge, nērba bayi bu nērba batā mā'a tɔge ayila ayila, ti nēra ayila tɔge ba vōore pa'ale. ²⁸La nēra sān ka bɔna won tā'age tɔge yetɔg-zāŋsi la vōore pa'ale, sɛba n yeti ba tɔge yetɔg-zāŋsi la sīna da tɔge. Ba tɔge ba sūure puam bɔ ba mēŋa, la Nawēnne. ²⁹Sɛba n de Nawēnne nōtɔ'ɔsriɓa la, bayi bu batā tɔge. Ti sɛba n weege la bise ba yetɔga la sān mase bu ka mase. ³⁰La nēra ayila sān tɔgra, ti Nawēnne Sia puke sela pa'ale nērba lagsgɔ la zē'am, nēr-sɛka n dēŋɛ tɔgra la go'oge. ³¹Ya wuu tā won to'oge Nawēnne yetɔga tɔge bɔ nērba mɛ, la ya tɔgra ayila ayila, ti la won zāsum nērba wuu, dee bɔ ba buraane. ³²Nēr-sɛba n tari Nawēnne Sia tɔ'ɔsra yetɔga bɔ'ɔra nērba la tā won yōke ba mēŋa mɛ. ³³Se'ere n soe la, Nawēnne boori ti sela woo dɔla la sore la sū-mā'asum, a ka boori ti ti tōnna yooro yooro.

³⁴Pɔgsi sīna Nawēnne nērba lagsgɔ zē'am, wu ba uti se'em zē'esti wuu la. Sore ka boe ti ba dare tɔgra Nawēnne nērba lagsgɔ zē'am. La ba sakra nōore wu Zifdōma lɔɔ* n yeke se'em na. ³⁵Sela sān bɔna ti ba bɔɔra ti ba bāŋɛ, ba soke ba sɔrba ba yiɛ. La ka nari ti pɔgsi tɔgra Nawēnne nērba lagsgɔ zē'am.

³⁶Yāma tē'esɛ ti la de la yāma zē'am ti Nawēnne kō-yēlga la pɔse bu? Bu yāma mā'a n to'oge yetɔga la? ³⁷Sɛka n tē'esɛ ti ɛŋa de la

Nawēnne nōtɔ'ɔsa, bu ēŋa de la sɛka ti Nawēnne Sia boe la ē lɛ, a sake ti sela ti mam gulɛ bɔ'ɔra ya wā de la Zuudāana la nōore ti a bɔ.

³⁸La nēra sān ka selse yel-ēna, yāma mē da selse ē.

³⁹Bela, m sɔbiisi, mōrge-ya tɔ'ɔsra Nawēnne yetɔga tɔgra bɔ'ɔra nērba, dee da gu-ya nērba ti ba da tɔge yetɔg-zāŋsi. ⁴⁰La ita-ya sela woo ti la āna sōŋa, dee dɔla sore.

15

Azezi-krisi vo'ore

¹M sɔbiisi, lɛɛɛ wā mam boori ti m tēege ya la kō-yēlga la ti mam daan mōole bɔ ya ti ya bɔ sira ze kāŋkāŋe la yelle. ²Ya sān gure ē kāŋkāŋe wu mam n mōole ya se'em na, ya wun yē fāare. La sān dagna bela, yan bɔ sira la de la zāŋa.

³Zāsŋɔ sɛka n gānni ti mam daan to'oge n bela ti mam dēŋe zāsum ya:

Krisi ki la tōma tōon-be'ero ãyā,
wu lan gulɛ Nawēnne gōŋɔ puam se'em na.

⁴Ti ba daan laage ē,
ti Nawēnne boti a vo'oge dabsa atā daare,
wu lan gulɛ Nawēnne gōŋɔ puam se'em na.

⁵La a daan dēŋe dɛke a mēŋa pa'ale la Apɪyɛeri, dee yāŋa dɛke a mēŋa pa'ale karēnbiisi pia la ayi la. ⁶Bela poorum ti a dɛke a mēŋa pa'ale a karēnbiisi n gānni kɔbsnuu wakate ayɪla. Ba nērba baseba zozo'e ken vɔa mɛ, la baseba ki mɛ. ⁷Bela poorum ti a dɛke a mēŋa pa'ale Azaki, dee yāŋa dɛke a mēŋa pa'ale Tōntōnɪba* la wuu.

⁸Bela wuu poorum, a dɛke a mēŋa pa'ale la mam n ān wu bia ti ba dɔge ti a wakate ka paage la. ⁹Mam de la pɪka Tōntōnɪba la wuu

zē'am, dee ka nara ti ba wi'ira mam ti Tōntōnna, mam n daan nāmse Nawēnne nērba la ñyā. ¹⁰La Nawēnne yel-sōnne ñyā ti mam dena mam n de se'em læele wā. Yel-sōnne na ti Nawēnne bɔ mam na dagi zāŋa. Mam tōm gānna Tōntōnɪba baseba la wuu mɛ. La, la dagi mam mēŋa n tōnni bela, Nawēnne yel-sōnne na ñyā ti mam yāŋe tōnna bela. ¹¹Bela, la sān dena la mam n mōole kō-yēlga la, bu bāma, ti wuu mōole la kō-yēlga seka ti mam tēege ya a yelle la, seka ti ya daan sake la.

Kūm vo'ore

¹²Tōma n mōoli ti Krisi ki mɛ dee vo'oge la, wāne ti ya nērba baseba yeti, seba n ki la kǎn vo'oge? ¹³La sān dena sira ti nēr-seba n ki la kǎn vo'oge, bela Krisi yi ka vo'oge. ¹⁴La Krisi sān ka vo'oge, kō-yēlga la ti tōma mōoli la de la zāŋa, ti yāma bɔ sira la mē dena zāŋa. ¹⁵La sān dena bela, tōma yi parni mɛ bɔ'ɔra Nawēnne, tōma n yeti, Nawēnne boti Krisi vo'oge mɛ, dee ti kūm kǎn vo'oge la ñyā. ¹⁶Seba n ki la sān kǎn vo'oge, bela, Krisi yi ka vo'oge. ¹⁷La Krisi sān ka vo'oge, yan bɔ sira la de la zāŋa, la ya tōon-be'ero taale ken bɔna la ya zuto. ¹⁸La seba n bɔ Krisi sira dee ki la mē yi bɔi mɛ. ¹⁹Tōma n tarɪ put'ere la Krisi la sān dena la tōma n vɔa dūnia wā zuo mā'a ñyā, tōma n yi de ninbāal-dōma gānna nērsaalba wuu.

²⁰La, la dagi bela, Krisi ki dee vo'oge mɛ, ēŋa n de pɔspɔsi dāana n vo'oge, pa'ale ti nērba baseba n ki la mē wun vo'oge. ²¹La de la nēra ayila ñyā ti nērba kiira, bela, la mē de la nēra ayila ñyā ti kūm wun vo'oge. ²²Nērsaalba wuu de la Adam* yusi, bela ti ba kiira. Bela ti nēr-seba wuu n mē de Krisi nērba wun vo'oge. ²³La nēra woo tarɪ la a wakate, pɔspɔsi de la Krisi n vo'oge, la a lemŋo daare, seba n de a nērba la wun vo'oge mɛ. ²⁴Bela poorum, Krisi wun sǎ'am seba wuu n

soe ke'ejɔ, la na'am, la pãŋa wuu, dee yãŋa dɪke so'olum na lebse bɔ a Sɔ Nawɛnnɛ, dee ti sɛla woo ba'asɛ. ²⁵Bɛla, dɛnɪ ti Krisi di na'am halɪ ka paagɛ wakat-sɛka ti Nawɛnnɛ wun botɪ a bɛ'ɛba wuu bɔna a nãma tɛŋa. ²⁶Kũm n de bɛ-sɛka ti a wun wa sã'am poorum. ²⁷La gulɛ Nawɛnnɛ gɔŋɔ puam yetɪ: < < Nawɛnnɛ dɪke sɛla woo ɛŋɛ la a nãma tɛŋa. > > Lan yetɪ Krisi n soe sɛla woo la, la ka tã ti a sɔna Nawɛnnɛ mɛŋa n botɪ a sɔna sɛla woo la. ²⁸La Nawɛnnɛ sãn dɪke sɛla woo ɛŋɛ Krisi nu'usum, ɛŋa n de Nawɛnnɛ Dayua la mɛ wun dɪke a mɛŋa ɛŋɛ Nawɛnnɛ nu'usum. Tɪ Nawɛnnɛ dena nɛŋadãana sɔna sɛla woo.

²⁹Seba n ki la sãn kãn malɪn vo'oge, nɛr-sɛba n botɪ ba misra ba ko'om puam sɛba n ki ïyã la, wun ɛŋɛ la wãne? Kũm sãn kãn malɪn vo'oge, bɛm ti ba ita bɛla? ³⁰La bɛm ti tɔma pɔsra ti yɔore wakate wuu? ³¹M sɔbiisi, mam pɔsrɪ m yɔore mɛ daare woo, mam n yetɪ ya se'em na de la sɪra. La de la sɪra wu mam n utɪ sũ-yɛlga ya yelle yãma n dolɪ Zuudãana Azezi-krisi ïyã se'em na. ³²La sãn dena la dũnia zuo wɔm mã'a ïyã, mam n daan yɛ yɛla Efɛɛzi tɛŋa wu mam zɛbrɪ la we-dũnsi la, a yɔoro de la bɛm? La sãn dena ti kũm kãn vo'oge, ti wun yeke nɪ wu nɛrba baseba n yetɪ se'em na: < < Base-ya ti ti dita dee yũura, ti beere ti wun ki mɛ. > >

³³Da pã'asɛ-ya ya mɛŋa. Fu sãn dɔla nɛr-be'ego, fu wun lebge la nɛr-be'ego. ³⁴Base-ya tɛ'esɛ yooro, dee da le tɔnna tɔon-be'ero. Mam yetɪ ya ti la de la yãnnɛ bɔ ya: Ya nɛrba baseba ka mi Nawɛnnɛ.

Sɛba n wun vo'oge la ïyã n wun ãna se'em

³⁵La nɛr-sɛka wun soke yetɪ: < < Sɛba n ki la wun vo'oge la wãne wãne? Ba wun wa tara la ïyã bɛm buuri? > > ³⁶Sokre ɛna de la gɔɔn-sokre! Fɔn ka mi ti fu sãn bure sɛla biire, a yɛm n wun bule yese wɔa, dee ti a pɔkɔ pɔ'oge? ³⁷La sãn dena la ke-biire bu sɛla ayɛma biire ti

fu dıke bure, a de la biire mǎ'a. La a sǎn yese, a ka le ǎna wu sɛka tı fu bure la. ³⁸Nawēnne botı bōnbuuri la yesra ǎna wu ɛɲa n boori tı ba ǎna se'em na. Bōnbuuri woo n yesrı ǎna se'em de la to'oto'ore.

³⁹Bōn-vɔɔsı mē ka tari ıyǎ ayıla. Nērsaalba ıyǎ de la to'ore, dūnsı ıyǎ de la to'ore, niinto ıyǎ de la to'ore, tı zūma ıyǎ mē dena to'ore.

⁴⁰Bōn-sɛba n boe saazuum tari la ba ıyǎ, tı sɛba n boe tɛɲa zuo mē tara ba ıyǎ, la ba sōɲa dagı ayıla. ⁴¹Wēntulle peelem boe la a to'ore, tı wōrga peelem bɔna a to'ore, tı wōrbıɛ peelem mē bɔna ba to'ore. La wōrbıɛ la peelem mē le bɔna la to'oto'ore.

⁴²Kūm vo'ore la mē wun wa ǎna la belá. Nēra sǎn ki tı ba laage ɛ, a ıyǎ pō'ori mɛ. La Nawēnne sǎn wa vo'oge ɛ, a kǎn le pō'oge. ⁴³Ba sǎn laage kūm, a lɔre mɛ dee dena gille. La a sǎn vo'oge, a ǎn na sōɲa, dee tara pǎɲa. ⁴⁴Ban laage ɛ na, a tari la dūnia zuo ıyǎ. La Nawēnne sǎn wa vo'oge ɛ, a tari la ıyǎ tı Nawēnne Sıa bɔ ɛ. Dūnia zuo ıyǎ boe mɛ, la ıyǎ tı Nawēnne Sıa bɔ'ori mē boe mɛ. ⁴⁵La gulse Nawēnne gōɲɔ puam yetı: < <Adam n de pɔspɔsı nēra la, Nawēnne n bɔ ɛ vɔm. > > La Krisi tı ba wi'iri tı poorum Adam* na, tari la Sıa n bɔ'ori vɔm. ⁴⁶La dagı ıyǎ tı Nawēnne Sıa bɔ'ori la tı tı to'ori yien. Tı to'ori la dūnia wǎ ıyǎ yien, dee yǎɲa wun to'oge ıyǎ tı Nawēnne Sıa bɔ'ori. ⁴⁷Nawēnne yuun dıke la tɛɲa tɛntōnnɔ nǎam pɔspɔsı nēra la. La poorum nēra la ze'ele la Nawēnne yire wa'am. ⁴⁸Dūnia nērba wuu ǎn wu nēr-sɛka tı Nawēnne yuun dıke tɛɲa tɛntōnnɔ nǎam na. Tı Nawēnne yire nērba mē ǎna wu nēr-sɛka n ze'ele Nawēnne yire wa'am na. ⁴⁹Bela, tōma n ǎn wu nēr-sɛka tı Nawēnne dıke tɛntōnnɔ nǎam na, tı mē wun wa ǎna wu nēr-sɛka n ze'ele Nawēnne yire wa'am na.

⁵⁰M sɔbiisi, belá tı mam gulse yele ya tı, nērsaala ıyǎ wǎ kǎn tǎ'age kē Nawēnne so'olum puam. ıyǎ wǎ n pō'ori la kǎn tǎ'age yē vɔm n ka ba'asrı.

⁵¹Selse-ya ti m yele ya yelle n svge. Tōma nērsaalba wuu kãn ki dee ti dūnia ba'ase, la ti wuu īisi wun teege me. ⁵²Dūnia ba'asgo daare, benkonne n wun peebe, ti ti wuu teege toto nini kãbsıgo puam. Benkonne na sãn peebe, seba n ki la wun vo'oge la īyã n kãn malın ki, la Nawēnne wun teege tōma īyã me. ⁵³Dēnti ti nērsaala īyã wã n pō'orı la, lebge īyã n ka pō'orı, ti īyã n kiiri la, lebge īyã n ka kiiri. ⁵⁴La īyã n pō'orı la sãn lebge īyã n ka pō'orı, ti īyã n kiiri la lebge īyã n ka kiiri, wakat-ēña ti Nawēnne gōņo n gulse se'em na wun ēņe. La gulse yeti:

< < Nawēnne yãņe kũm,
ti kũm ka le bōna.

⁵⁵Kũm, fu pãña boe la be?

Fu toogo boe la be? > >

⁵⁶La de la tōon-be'ero n boti kũm tara pãña kuvra nērba. Ti loo boti tōon-be'ero yēta pãña. ⁵⁷Ti pu'use Nawēnne a yel-sōnne, ēña n boti tōma yãņe tōon-be'ero, la kũm, Zuudãana Azezi-krisi īyã la.

⁵⁸Bela, m sobi-nōņrısı, mōrgē-ya ze'ele kãņkãņe. Tōnna-ya Zuudãana tōoma la wakate wuu da base, yãma n mi ti nãmsgo seka ti ya nãmsrı Zuudãana la īyã dagı zãña la.

16

Ba lagse ligri ti ba sōņe Nawēnne nērba n boe Zerizalem

¹Leele wã, mam boorı ti m tōge la ligri la ti ya lagsrı ti ya sōņe Nawēnne nērba la yelle. Doose-ya pa'alg-seka ti mam pa'ale Nawēnne nērba la n boe Galatı so'olum na. ²Lasrı daare woo, nēra woo looge lig-seba ti a yeti a bō la bıņe, da ze-ya gu'ura ti mam sãn wa paam, ti ya yãña lagse. ³Ti mam sãn wa paam, mam wun gulse la gōņo tōm

nēr-seba ti ya mēṅa wun looge la, ti ba tarı bɔ'a la sēṅe Zerizalem.

⁴La, la sãn le nara ti mam mēṅa sēṅe, bāma wun doose la mam ti ti sēṅe.

Apolı tɔgrı a sore sēnne yelle

⁵Mam wun wa'am ya zē'am, la mam wun doose la Maseduanı so'olum wa'am. ⁶La mam sãn wa'am, mam wun yuuge ya zē'am fēe, bu tã ti mam wun bɔna la ya ti ɔɔɔ wakate wa tole, ti ya sōṅe ma ti m sēṅe zē'e-seka ti mam wun sēṅe la. ⁷Mam ka boortı ti m wen doose bıse ya dee tole, mam tarı putē'ere ti mam wun bɔna ya zē'am yuuge, Zuudāana la sãn bɔ mam sore. ⁸La mam wun weege bɔna la Efēezi tēṅa wã halı ka paage Pãntekɔtı* kibsa daare. ⁹Se'ere n soe la, Nawēnne yo'oge la sore bɔ mam ti m tōm a tōoma zozo'e, baa be'eba n zo'oge la.

¹⁰Atimōtı sãn wa'am ya zē'am, ya to'oge ē sōṅa, dee ēṅe-ya yan wun ēṅe se'em ti a buraane da bo'oge. Se'ere n soe la, a tōnnı Zuudāana tōoma la wu mam n tōnnı se'em na. ¹¹Nēra nēra da pɔ'oge ē, sōṅe-ya ē ti a leme wa'am mam zē'am la sũ-mã'asum. Mam, la sɔbiisi la gu'uri ē me.

¹²La sãn dena ti sɔbia Apolısi, mam yele ē me nōore faa ti a doose la sɔbiisi baseba la wa'am wa bıse ya. La a ka boortı ti a wa'am leele wã. A sãn wa yē nēṅa, a wun wa'am.

Ba'asgɔ yetɔga, la pu'usgɔ

¹³Guuse-ya ya mēṅa ze kãṅkãṅe Nawēnne sore doosgo la puam. Keṅe ya mēṅa, tara-ya buraane. ¹⁴Uta-ya sela woo la nōṅlum.

¹⁵M sɔbiisi, ya mi Astefanasi la a yir-dōma yelle, bāma n dēṅe bɔ Nawēnne sira Akayi so'olum puam. Ba tōm me bɔ Nawēnne nērba. Mam belni ya me ¹⁶ti ya nanna nēr-bāma, la nēr-seba wuu n tōnnı

Nawēnne tōoma wu bāma la.

¹⁷Mam tari sū-yēlga me Astefanasi la Afɔrtunatusi la Akayikusi n wa'am na. Se'ere n soe la, ba sōŋe mam wu yāma boe ni la mam zē'am na. ¹⁸Ba keŋe mam, la yāma sūure me. Pēgra-ya nēr-bāma buuri.

¹⁹Nawēnne nērba n boe Azi* so'olum pu'usrɪ ya. Akila, la Aprisili, la Nawēnne nēr-seba n lagsrɪ ba yire la pu'usrɪ ya sōŋa Zuudāana Azezi doosgo puam. ²⁰Sɔbiisi la wuu pu'usrɪ ya. Pu'use-ya taaba la nōŋlum.

²¹Mam Apoli n gulse pu'usgɔ wā la m mēŋa nu'ugo, mam pu'usrɪ ya.

²²Nēr-seka n ka nōŋe Zuudāana la, kǎ'a-be'ego won bɔna a dāana zuo. Maranata*f3*.

²³Tɪ Zuudāana Azezi yel-sōnne won bɔna la ya.

²⁴Mam nōŋe ya wuu me Azezi-krisi doosgo puam. \f1 5:5 Bɪse-ya 2 Korēntɪ 2:6-11. \f2 10:7 La yuun de la baga de'eŋo tɪ ba de'eni, dee ita yalsɪ. \f3 16:22 Maranata de la Aramēyē yetɔga n boorɪ tɪ a yetɪ, tōma Zuudāana sēm me. \e

2CO

2 Korēntɪ

Gōŋɔ buyi dāana tɪ Apoli gulse bɔ Korēntɪ dōma

Bilgre

Korēntɪ nērba baseba n yuun sā'am Apoli sūure, tɪ baseba yetɪ a dagɪ Azezi-krisi Tōntōnna sɪra sɪra.

Bela tɪ Apoli gulse gōŋɔ wā yele ba tɪ ba ka tari buurɔ, dee pa'ale ba tɪ ba bāŋe tɪ ēŋa nōŋe ba me, la ēŋa boorɪ me tɪ ba naage taaba.

Pɔspɔsɪ, a pa'ale tɪ ēŋa nāmse me, la Nawēnne sōŋe ēŋa me, bela tɪ ēŋa tāna belsra nērba baseba (1:1-11).

A tēege ba la sū-sā'ajo sɛka n boe ɛɲa la bāma tēɲasuka, dee pa'ale ba ti Azezi n bɔ ɛɲa nōore ti a dɛna Tōntōnna. Bɛla n soe ti ɛɲa daan zɛbɛ ba gōɲɔ ayēma puam yeti ba ka ɛɲɛ sōɲa. La ban teege yem base tōon-be'ero la, ɛɲa sūure n ɛn yɛlum se'em (1:12-7:16).

La Apoli tɔge la ligri ti ba lagɛ ti ba sōɲɛ Azezi nɛrba n boe Zude yelle, a sose ba ti ba bɔ la yemleego (sapitri 8-9).

Ba'asgɔ, Apoli zɛbɛ nɛr-seba n ka sake ti ɛɲa de la Azezi-krisi Tōntōnna la mɛ, dee pa'ale ba yeti nɛr-bāma de la pōmpɔrndōma (sapitri 10-13).

Gōɲɔ buyi dāana ti Apoli gulɛ bɔ

Korēnti dōma

1

¹Mam Apoli n de Azezi-krisi Tōntōnna* wu Nawēnne n boori se'em, la ti sɔbia Atimōti n gulɛ gōɲɔ wā bɔ'ɔra yāma Nawēnne nɛrba wuu n boe Korēnti, la Akayi so'olum wuu puam na. ²Ti Sɔ Nawēnne, la ti Zuudāana Azezi-krisi wun ɛɲɛ ya yel-sōnne, dee bɔ ya sū-mā'asum.

Apoli pu'usrɛ Nawēnne a yel-sōnne

³Ti pēge-ya Nawēnne n de ti Zuudāana Azezi-krisi Sɔ la. Eɲa n de Sɔ n zoti ninbāalga, la ɛɲa n de Nawēnne n sōɲri nɛrba bɔ'ɔra ba buraane sela woo puam. ⁴ɛɲa n bɔ'ɔri tōma buraane ti tooro wuu puam, ti tōma n yɛti buraane na, tōma mɛ wun yāɲɛ sōɲra nɛr-seba wuu n boe tooro buuri wuu puam bɔ ba buraane. ⁵Tōma n yɛti nāmsgɔ zo'oge wu Krisi* la, bɛla, tōma mɛ wun yɛ buraane zo'oge Krisi iyā. ⁶Tōma sān bɔna toogo puam, la de la ti yāma wun yɛ buraane, la fāare. La tōma sān yɛta buraane, la de la ti yāma wun yɛ

buraane ti la sɔŋe ya ti yāma mē wun yāŋe wībra nāmsgɔ puam wu tōma n mē wībri nāmsgɔ puam na. ⁷Tōma tari putē'ere la yāma me, mina sōŋa sōŋa ti yāma n po nāmsra la tōma la, yāma mē wun po yē buraane la tōma.

⁸Ti sɔbiisi, tōma boori ti ya bāŋe la tooro seba n paage tōma Azi* so'olum puam na. Tooro la daan nāmsɛ tōma me zo'oge gāŋe tōma pāŋa, ti tōma daan pōn ka le tara putē'ere ti tōma wun vɔa. ⁹Tōma daan kɔ'oge ti putē'ere yeti tōma vɔm teka n bela. La bela paage tōma ti ti da te'ege la ti mēŋa, la ti te'ege Nawēnne n vo'ori kūm na. ¹⁰La de la ēŋa n fāage tōma kūm ēŋa puam, la a wun ken fāage tōma me. Asra, tōma tari putē'ere la ē le me ti a wun le fāage tōma me. ¹¹Yāma n sōŋri tōma pu'usra Nawēnne bɔ'ɔra tōma la, Nawēnne wun lerge nērba pāi pu'usɔ sōŋe tōma, ti nērba zozo'e wun pu'use Nawēnne a yel-sōnne tōma iyā.

Sela n gu Apoli ti a viige a sore sēnne

¹²Sela n bɔ'ɔri tōma sū-yēlga de la tōma mi ti sūa puam ti tōma yel-ure n ān se'em dūnia wā puam, la, lan gānni wuu yāma zē'am, de la pupeelem, la sira n ze'ele Nawēnne zē'am. La dagi la nērsaala yem ti tōma uti bela, la de la Nawēnne yel-sōnne iyā. ¹³Tōma n gulsri yāma sela wā, la dagi sela ayēma, la de la yāma n karēŋri sela wōnna a vōore la. La mam tari putē'ere ti ya wun wōm a wuu vōore me, ¹⁴wu yāma n dēŋe bāŋe a vōore fēe, ti Zuudāana lemŋo daare tōma n de yāma zu-zēkre, ti yāma mē dena tōma zu-zēkre la.

¹⁵Mam n tari putē'e-ēŋa la, mam daan boori me ti m dēŋe wa'am yāma zē'am, ti ya wun to'oge yel-sōnne nōore buyi. ¹⁶Mam daan boori la m dēŋe wa'am yāma zē'am, yāŋa ze'ele yāma zē'am tole Masedvanu so'olum, le ze'ele bilam leme wa'am yāma zē'am, ti ya

sõņe mam ti m sēņe Zude* so'olum. ¹⁷Mam n looge yem ti m ēņe se'em na, yāma tē'esē ti mam de la nōgōla dāana bu? Bu yāma tē'esē ti mam n looge yem se'em na de la nērsaala yem loore ti mam tāna wun yeti <<ēe>>, le yeti <<ayei>>? ¹⁸Nawēnne n de mam sira dāana, ti mam n tōge se'em bō yāma la dagi <<ēe>>, la <<ayei>>. ¹⁹Se'ere n soe la, Azezi-krisi n de Nawēnne Dayva ti mam, la Atimōti, la Asilvē daan mōole a kōa yāma zē'am na, dagi <<ēe>>, la <<ayei>>, ēņa zē'am la de la <<ēe>> wakate wuu. ²⁰Nawēnne n biņe nōore ti a ēņe sela wuu la, Azezi-krisi n yeti <<ēe>>, ēņa wun ēņe. Bela, la de la Azezi-krisi iŷā ti tōma yeta ti: <<Amina*!>> ti la dena Nawēnne nā'asgō. ²¹La de la Nawēnne mēņa n boti tōma la yāma lagum ze kāņkāņe Krisi doosgo puam, la ēņa n looge to, welge ti to'ore. ²²Ēņa n dāale tōma pa'alı ti ēņa n soe to, bō tōma a Sia n de sela n pa'alı ti ti wun yē sela wuu ti a biņe ti a bō ti la.

²³Nawēnne n de mam kaset-dāana, mam sān parna, a boti m ki. La de la, la wun sōņe ya ti ya sūure da sā'am iŷā n base ti mam ka le wa'am Korēnti. ²⁴La dagi ti tōma boori ti mōrge ya me ya bō sira la puam. Tōma boori ti ti lagum na ya le me tōm ti ya yē sū-yēlga. Se'ere n soe la, yāma ze me kāņkāņe ya bō sira la puam.

2

¹Bela, mam looge la yem yeti mam kān le wa'am ya zē'am, ti m da boti ya sūure le sā'am. ²Mam sān boti yāma sūure sā'am, āne n wun bō mam sū-yēlga, sān dagna yāma seba ti mam wun boti ni ya sūure sā'am na? ³Bela ti mam daan gulse bō ya, mam ka boori ti m sān wa wa'am ya zē'am, m tara sū-sā'aņo la yāma n de seba n wun bō mam sū-yēlga la. Mam mi sira sira ti mam sān tara sū-yēlga, yāma mē tari

sū-yēlga mε. ⁴La daan de la toogo, la sū-sā'aṅɔ, la nintām puam, ti mam daan gulse gōṅɔ la bɔ ya. La dagɪ ti mam daan boortɪ ti m botɪ ya sūure n sā'am, la de la ti ya bāṅe mam n nōṅe ya zo'oge paage se'em.

Bɔ-ya nēr-seka n koṅe la sugri

⁵Nēra sān botɪ sū-sā'aṅɔ wa'am, la dagɪ mam mā'a sūure ti a sā'am, la de la yāma wuu sūure ti a sā'am. La ti m da tɔge tole, m yetɪ a sā'am na ya nērba zozo'e sūure. ⁶Sɪbgre seka ti yāma nērba zozo'e bɔ nēr-ēṅa dāana la, la seke mε. ⁷Lεεle wā, sela n ān sōṅa de la ya bɔ ē sugri, keṅe a sūure, ti la da kē'ese ē sū-sā'aṅɔ zozo'e puam ti a sā'am. ⁸Bela, mam kā'anɪ ya mε ti ya ēṅe sela n wun botɪ a bāṅe ti yāma nōṅe ē mε. ⁹Mam n daan gulse gōṅɔ la bɔ yāma la, mam daan boortɪ ti m bɪse la ya sān sakra mam sela woo puam. ¹⁰Ya sān bɔ nēra sugri, mam mē bɔ'ortɪ a dāana sugri mε. La sān dena mam, mam bɔ sugri mε, la bōn-seka sān bɔna dena mam bɔ sugri, mam ɪti bela la yāma īyā Krisi nifum, ¹¹ti la da botɪ Asūtāana* yāṅe tɔ. Se'ere n soe la, tōma mi ēn boortɪ ti a ēṅe se'em mε.

Apolɪ sū-sā'aṅɔ Trvasɪ

¹²Mam n daan paage Trvasɪ ti m mōole Krisi kō-yēlga la, mam daan yē ti Zuudāana la yo'oge sore bɔ mam mε, ¹³la mam putē'ere daan ka gā zē'a ayɪla, mam n ka yē m sɔbia Atiti bilam na īyā. Bela ti mam daan keese ba, dee tole Masedvanɪ.

Krisi tā'are

¹⁴Mam pu'usɪ Nawēne n botɪ tōma dɔla Krisi poore daare woo a tā'are la puam, dee botɪ tōma īyā nērba bāṅra Krisi zē'a woo, wu yūuṅ-yēlga n taage zē'a wuu la. ¹⁵Asura, tōma ān wu yūuṅ-yēlga bɔ

Nawēnne, tōma n mōoli Krisi kōa bɔ'ora nēr-seba n yēti fāare, la nēr-seba n sã'anɪ la. ¹⁶La sãn dena la nērba baseba, la de la kūm yūuŋo n sēm na kūm, la nērba baseba zē'am, la de la vɔm yūuŋo n bɔ'ori vɔm. ãne n wun tã'age tōm tōon-ēŋa? ¹⁷Tōma ka ãn wu nērba baseba zozo'e n duke Nawēnne kō-yēlga la læbra era yōoro la. Ayei, la de la Nawēnne n tōm tōma, ti tōma pelge ti puvre tɔgra a nēŋam Krisi doosgo pvam.

3

Nōor-bīŋre paalga tōntōnɪba

¹Yāma tē'esε ti tōma boori ti ti pēge la ti mēŋa bu? Bu tōma boori ti ti bɔ ya la gōnno n pa'alɪ tōma n ãn sōŋa se'em, bu tōma boori la ya gulse gōnno n pa'alɪ tōma n ãn se'em bɔ tɔ, wu nērba baseba n uti se'em na? ²Yāma mēŋa n de tōma gōŋo n gulse tōma sūure pvam, ti nērba wuu mina dee karēŋra ē. ³La de la vēelga ti yāma de la Krisi gōŋo ti a doose tōma tōoma pvam gulse. La dagɪ gulsgɔ ko'om n gulse, la de la Nawēnne n vɔa la Sia* n gulse. La ka gulse kug-palagsɪ zuto, la gulse la nērsaalba sūa pvam.

⁴Tōma n tɔgrɪ bela la, tōma mi sōŋa sōŋa ti bōn-ēŋa de la sɪra Nawēnne zē'am, Azezi-krisi iyã. ⁵La ka boori ti la yeti tōma tã wun tōm tōon-ēŋa la tōma mēŋa pãŋa, tōma pãŋa ze'ele la Nawēnne zē'am. ⁶La de la ēŋa n boti tōma tã'age dena a nōor-bīŋre* paalga la tōntōnɪba. La dagɪ lɔɔ* n gulse, la de la Nawēnne Sia. Lan de se'em na, lɔɔ n gulse la sēm na kūm, la Nawēnne Sia la bɔ'ori la vɔm.

⁷Lɔɔ la yuun gulse la kug-palagsɪ zuto, ti Nawēnne na'am pãŋa peelem nēege wakate ēŋa, ti Amoyisi* nēŋa nēege yēgra, ti lsrayelɪ dōma ka tãna wun bise ē. La na'am pãŋa la yuun tollɪ mε. Lɔɔ la n

sēm na kūm na n yvun puke la na'am pāṅa bela la, ⁸Nawēnne Sia n tōnni tōon-seka la, wun tara na'am pāṅa gānna bela me zozo'e.

⁹Tōon-seka n sēm na sibgre la n yvun tarı na'am pāṅa la, bela, tōon-seka n boti nērba masra Nawēnne zē'am na tarı na'am pāṅa gānna bela me zozo'e. ¹⁰Tōma tã wun pōn yetı na'am pān-seka n yvun boe la lebge la zāṅa, se'ere n soe la, seka n boe leele wã gānni ē me zozo'e.

¹¹Bela, sela n yvun tollı la n tarı na'am pāṅa la, sela n boe wakate wuu la n tarı na'am pāṅa zo'oge gānna bela.

¹²Tōma n tarı putē'e-ēṅa gu'ura la iyã, tōma tarı buraane zo'oge me.

¹³Tōma ka itı wu Amoyisi n yvun duke tãnne pı a nēṅa tı Israyeli dōma da yē na'am pāṅa n nēege a nēṅa n tollı la. ¹⁴La Israyeli dōma la yem yvun ka like. Halı wakat-ēṅa wa paam leele wã, ba sãn karēṅra nōor-biṅre keka gōṅṅ la, tãnne na ken pı ba nēnsı me, tı ba ka bokra a vōore. Tãn-ēṅa ka pilgri, sãn dagna Krisi peelem puam mã'a. ¹⁵Asura, wakat-ēṅa tarı wa paam zına, ba sãn karēṅra Amoyisi gōnnṅ la, tãnne na ken pı ba yem me. ¹⁶La nēra sãn teege yem lebe Zuudāana la zē'am, tãnne na pilgri me. ¹⁷Ban yetı Zuudāana la, la de la Sia* la. La Zuudāana Sia la n boe zē'a la, to'og-m-mēṅa boe la bilam. ¹⁸Tōma wuu n dolı Zuudāana Azezi la, tãnne na pilge me, tı tōma nēnsı yēgra la Zuudāana na'am pāṅa. Tı Zuudāana Sia tēera tōma, tı tōma āna wu ēṅa n ān se'em na, tı na'am pāṅa la pa'asra zo'ora.

4

Tōma pāṅa ze'ele la Nawēnne zē'am

¹Nawēnne n zoe tōma ninbāalga bɔ tōma tōon-ēṅa la iyã n soe tı tōma buraane ka bɔ'ora. ²Tōma zagse me ka tōnna tōon-seba wuu n

suge n de yānne tōoma la, tōma ka uti yem pā'asra nērba. La tōma ka teeri Nawēnne yetoga. Tōma tōgru pa'ala la sira vēelga vēelga, ti nērba sūure n mi se'em na wun bānje ti tōma uti sela n ān sōja Nawēnne nifum. ³La kō-yēlga la ti tōma mōoli la sān ken suge me, a suge la nēr-seba n wun sā'am na. ⁴La de la seba n ka bō Nawēnne sira la. Asūtāana* n de dūnia wā naba la n pī ba yem ti ba da bānje Krisi n de Nawēnne wōnne na kō-yēlga na'am pānja. ⁵La dagu tōma mēja yelle ti tōma mōoli, la de la Azezi-krisi n de Zuudāana la kōa ti tōma mōoli. La sān dena tōma, tōma de la yāma tōntōniba Azezi iyā. ⁶Nawēnne n yuun yeti: < < Peelem nēege lika puam > > na, la de la ēja n boti peelem nēege tōma sūa puam, boti tōma bānje Nawēnne na'am pānja n nēege Krisi nēja zuo.

⁷La tōma n taru bōntarsōm ēja la, tōma ān wu yōgrō lōgrō ti ba duke tuulum bōnō ēje mī. Ti la pa'ale ti pān-kāte ēja ka ze'ele tōma zē'am, a ze'ele la Nawēnne zē'am. ⁸Tōma yēti nāmsgō buuri to'oto'ore me sela woo puam, la a ka yānje tōma. Tōma fabli me ka mina tōma n wun ēje se'em, la tōma buraane ka bo'oge. ⁹Nērba nāmsri tōma me, la Nawēnne ka base tōma, ba wē'eri tōma lubra me, la tōma ka ki. ¹⁰Tōma taru nāmsgō me ti iyā puam wu Azezi kūm nāmsgō la daare woo ka gō'ora, ti nērba wun yē Azezi vōm tōma puam. ¹¹Tōma n vōa wā, tōma pōsri ti yōore me wakate wuu Azezi iyā, ti nērba wun yē a vōm tōma iyā n kiiri la puam. ¹²Bela, kūm zigrū la a ku tōma, ti yāma yēta vōm.

¹³La gulse Nawēnne gōņō puam yeti: < < Mam bō sira me n soe ti mam tōge. > > Tōma mē bō Nawēnne sira me, bela n soe ti tōma tōgra. ¹⁴Tōma mi me ti Nawēnne n vo'oge ti Zuudāana Azezi la, a mē wun po vo'oge tōma me la Azezi, la a wun lagum taru tōma la yāma sēje a zē'am. ¹⁵Bōn-bāma wuu n uti la de la yāma iyā. Bela ti

Nawēnne yel-sōnne wun paara nērba zozo'e, ti nērba wun pu'usra
Nawēnne a yel-sōnne zɔ'ora pa'asra, ti la dena a nā'asgɔ.

¹⁶Bela ti tōma buraane ka bɔ'ora. La baa tōma ãyã n sã'anɩ na, tōma
sia lebgɩ la paalga daare woo. ¹⁷Nãmsgɔ seka ti tōma yēti wakate
fēfēe wã de la pɩka ka tãna wun dɩke make la nã'asgɔ zozo'e n ka tarɩ
ba'asgɔ ti a wun botɩ tōma yē la. ¹⁸Tōma putē'ere n boe la sela la,
dagɩ sela ti nini yēti. A de la sela ti nini ka yēti. Bōn-seka ti nini yēti
tollɩ mɛ. La sela ti nini ka yēti la boe la wakate n ka ba'asɩ.

5

¹Tōma ãyã ti ti tarɩ dũnia wã zuo ãn wu fuu-deego. Tōma mi ti fuu-
deego ãna sãn wa sã'am, Nawēnne wun ēɲe kē'a zē'a saazuum bɔ tɔ.
A de la kē'a zē'a n boe wakate wuu, a dagɩ nērba n ēɲe ē. ²La tōma
nãmsɩ mɛ bɔ'ora zozo'e ti ti kē saazuum kē'a zē'a na. ³Se'ere n soe la,
ti sãn kē kē'a zē'e-ēɲa, la ãn wu ti ye la fuugo la, ti kãn dena beela.
⁴Tōma n ken bɔna dũnia zuo ãyã wã puam na, tōma nãmsɩ mɛ tara
toogo. La dagɩ ti tōma boorɩ ti ti base la dũnia wã zuo ãyã la, tōma
boorɩ ti Nawēnne n dɩke saazuum ãyã la ye tɔ, ti sela n de vɔm wun pɩ
sela n kiiri la. ⁵La de la Nawēnne mēɲa n ēɲe tōma ti tōma ãna bela,
dee bɔ tōma a Sia n de sela n pa'alɩ ti tōma wun yē sela wuu ti a bɩɲe
ti a bɔ ti la.

⁶Bela ti tōma tara buraane zozo'e daare woo, dee mina ti tōma n
ken bɔna dũnia ãyã wã puam na, tōma zãage la Zuudãana kē'a zē'a na
mɛ. ⁷La tōma doli la sela ti tōma bɔ sɩra dee nãn ka yē. ⁸Tōma tarɩ
buraane mɛ zo'oge, dee boorɩ nɩ ti ti base dũnia ãyã wã, dee sēɲe ka
bɔna Zuudãana la zē'am. ⁹Bela ti tōma mōrgra bɔ'ora ti ti ēɲe ti la
paage a yem, tōma sãn bɔna dũnia ãyã wã puam, bu ti sãn sēɲe a
zē'am. ¹⁰Se'ere n soe la, tōma wuu wun ze'ele la Krisi nēɲam ti a di

tōma sariya, dee bɔ nēra woo yɔɔɔ tɪ la mase wu ɛn tōm se'em dūnia wā, a sān tōm sōŋa, bu a sān tōm be'em.

Krisi n naage tōma la Nawēnne

¹¹Bela tōma n mi tɪ zɔta Zuudāana n de se'em na, tɪ tōma mōrgra tɪ tɪ tɔge yāŋe nērba tɪ ba sake ɛ. Wēnnaam mi tōma sōŋa mɛ. La mam tari putē'ere tɪ yāma sūure puam ya mē mi mam mɛ. ¹²Tōma ken ka bɔɔra tɪ tɪ pa'ale ya tōma n ān sōŋa se'em, tōma boortɪ tɪ tɪ bɔ ya la folle tɪ ya tara yēsōm tōma ïyā. Bela tɪ ya wun tā'age tɔge lerge nēr-seba n wē'eri yō'ogo la sela n yetɪ la nini, dee ka bɪsra ba sūure puam na. ¹³Tōma sān dena zollɔ, la de la Nawēnne ïyā. La tōma sān ka zalla, la de la yāma sōŋre ïyā. ¹⁴La de la Krisi nōŋlum n soe tōma la ïyā. Tōma bāŋe mɛ tɪ nēra ayula n ki nērba wuu ïyā, tɪ la pa'ale tɪ nērba wuu po lagum na ɛ ki mɛ. ¹⁵A ki nērba wuu ïyā tɪ nēr-seba n vɔa la, da le vɔa ba mēŋa n boortɪ se'em, ba vɔa wu sɛka n ki ba ïyā dee vo'oge la n boortɪ se'em.

¹⁶Bela ïyā tɪ læle wā, tōma ka le bɪsra nēra wu nērsaala n tē'esru se'em na. La baa tōma daan sān bɪsra Krisi wu nērsaalba n tē'esru se'em na, læle wā tōma ka le bɪsra ɛ bela. ¹⁷Nēra sān lagum na Krisi dena ayula, a lebge la nēr-paalga, yel-kegsɪ la tole mɛ, tɪ sela woo lebge paalsɪ. ¹⁸La de la Nawēnne n ɛŋe bela wuu, ɛŋa n botɪ Krisi naage tōma la ɛŋa, dee bɔ tōma tōon-ɛna tɪ tɪ botɪ nērba naage la ɛŋa. ¹⁹Tōma n yetɪ se'em na, la de la Nawēnne n botɪ Krisi botɪ dūnia dōma la ɛŋa naage taaba, dee ka geele ba tōon-be'ero. Dee bɔ tōma yetɔga tɪ tɪ tɔge naare yelle bɔ nērba.

²⁰Bela, Krisi n tōm tōma tɪ tōma sɔɔge a zē'am tɔgra la yāma wu Nawēnne mēŋa n tɔgrɪ kā'ana ya tōma yetɔga la puam. Krisi ïyā tōma sosrɪ ya mɛ tɪ ya naage la Nawēnne. ²¹Krisi ka tōm tōon-be'ero. La

Nawēnne base me ti a lebge wu tōon-be'ero dāana tōma īyā, ti tōma wun lebge nērba n mase Nawēnne zē'am ēṅa īyā.

6

¹Tōma n lagum na Nawēnne tōnna la īyā, tōma sosru ya me ti ya da base ti yel-sōnne na ti ya to'oge Nawēnne zē'am na dena zāṅa. ²Se'ere n soe la, Nawēnne yeke a gōṅṅ puam yeti:

< < Mam lerge ya pu'usgo la wakat-seka ti mam boori ti m ēṅe ya yel-sōnne na.

Fāare la daare, mam sōṅe ya me. > >

La selse-ya, læle wā de la wakate ti Nawēnne uti yel-sōnne, læle wā de la fāare daare la.

³Tōma ka boori ti ti ēṅe sela n wun boti nēra tuuge, ti nēra da zerge to ti tōoma la puam. ⁴La sela woo puam tōma pa'ali me ti tōma de la nērba n tōnni Nawēnne tōoma. Tōma mā'ari ti sūure me, wībra nāmsgo puam, la toogo, la sū-sā'aṅṅ puam. ⁵Ba wē tōma me, dee yu tōma yu'a deto puam. Ba boti nērba zozo'e gire me zebe la tōma, tōma tōnni tōon-ke'eno me targe ka gīsra, ka dita. ⁶La tōma tōnni na pupelem, la bāṅre, la sū-mā'are, la ur-sōṅṅ, la Nawēnne Sia, la nōṅlum sira sira. ⁷Tōma tōgru la sira yetoga la Nawēnne pāṅa. Tōma n uti sela n mase la n de tōma zebre logro ti tōma tari zebra dee gu'ura ti mēṅa. ⁸Nērba baseba nā'asru tōma me, ti baseba pō'ora tōma, baseba sā'ani tōma yu'ure me, ti baseba pēgra tōma. Ba bisru tōma wu tōma de la pōmpōrndōma, baa la tōma n tōgru sira la. ⁹Ba bisru tōma wu tōma de la sāama, baa la ban mi tōma sōṅa la, ba bisru tōma wu nērba n kiiri, dee ti tōma vōa. Ba sibgru tōma me, dee ti tōma ka kiira. ¹⁰Ba bisru tōma wu tōma tari la sū-sā'aṅṅ, la tōma tari la sū-yēlga daare woo. Ba bisru tōma wu nasdōma, dee ti tōma boti nērba

zozo'e tara bōntarsōm. Ba b̄sr̄t̄ tōma wu nērba n ka tar̄t̄ sela, dee ti tōma tara sela woo.

¹¹Korēnt̄i dōma, tōma tōge ya la vēelga, tōma pelge la ti puure tōge la ya. ¹²La daḡt̄ tōma n ka nōṅe yāma, la de la yāma n ka pa'ale ya nōṅlum. ¹³Mam tōgr̄t̄ la ya wu m kōma la, ya mē nōṅe tōma, pelge-ya ya puure la tōma.

Lika la peelem ka tã wun lagum taaba

¹⁴Da d̄ike ya mēṅa lagum na nēr-seba n ka b̄ Nawēnne s̄ra la. Se'ere n soe la, sōṅa la be'em k̄an yāṅe lagum taaba. Bēm laḡṅ̄ n boe peelem, la lika tēṅasuka? ¹⁵Bēm naa-nōore n boe K̄risi, la Asūtāana* tēṅasuka? Bu seka n b̄ K̄risi s̄ra, la seka n ka b̄ ē s̄ra tar̄t̄ la bēm puure la taaba? ¹⁶Bēm laḡṅ̄ n boe Wēnnaam deego, la baga ti ba māale tēṅasuka? La s̄an dena tōma, tōma de la Nawēnne n w̄a la deego wu Nawēnne n yeke yeti:

< < Mam wun b̄ona la ba,

kē'era la ba.

Mam wun dena ba Nawēnne,

ti ba dena mam nērba. > >

¹⁷B̄ela n soe ti Zuudāana Nawēnne yeti:

< < Yese-ya ba puam,

welge-ya ya mēṅa

dee base ba.

La ya da kalum sela n de dēgr̄,

ti mam wun to'oge ya.

¹⁸Mam wun dena ya S̄,

ti ya dena mam daȳ̄si,

la m p̄ȳ̄si. > >

Zuudāana Nawēnne n de ke'ejo wuu dāana la n yele.

7

¹Bela m sur-nōņrısı, nōor-biņre* bāma wuu n de tōma bōnɔ na, base-ya ti ti malge ti mēņa la dēgrɔ wuu n dēgrı iŷā, la sia, dee āna sōņa, vɔa pupeelem puam mase sela woo puam, zɔta Nawēnne.

Apolı tarı sū-yēlga la Korēntı dōma

²Base-ya ti tōma nōņlum bɔna ya sūure puam. Tōma ka ēņe nēra baa ayula be'em, tōma ka sā'am nēra yelle, la tōma ka zām nēra to'oge a sela. ³Mam n tɔgrı bela la, dagı ti mam boortı ti m mōņe ya la buvrɔ. Mam daan pōn dēņe yele ya tōma n nōņe ya zo'oge se'em me, tōma sān ki, bu tōma sān vɔa me. ⁴Mam bɔ ya sira me, la mam yēsni me yāma iŷā. Baa tōma toogo la wuu puam, mam tarı buraane, la sū-yēlga zo'oge me.

⁵Asira, tōma n daan paage Masedvanı na, tōma daan ka yē vo'osgo baa fēfēe. Tōma yē toogo buuri wuu me, nērba n zebe la tōma, dee ti dabeem tara tōma. ⁶La Nawēnne n bɔ'ɔrı sū-sā'aņɔ dōma buraane na, daan botı Atiti n wa'am ti tōma yē buraane. ⁷La dagı a wa'aņɔ la mā'a iŷā, la de la ēn wa'am wa yele tōma yāma n bɔ ēņa buraane se'em na iŷā. A yele tōma la yāma n boortı ti ya le yē mam zo'oge se'em, dee yele mam yāma sū-sā'aņɔ, la yāma n wısgɛ ya mēņa mam iŷā se'em. Bela n soe ti mam sū-yēlga le zo'oge pa'ase.

⁸Mam gōņɔ la ti mam daan gulse la sān sā'am ya sūure, mam ka iti m sān bāņe ni. Mam sān wun yeti m sān bāņe ni, la de la mam n daan bāņe ti gōņɔ la sā'am yāma sūure la. La bela de la wakate fēfēe puam. ⁹La mam iti sū-yēlga me læle wā, la dagı mam n botı ya sūure sā'am na iŷā, la de la ya sū-sā'aņɔ la n botı ya teege yem base tōon-

be'ero la ïyã. Yãma sũ-sã'añɔ ẽɲa de la Nawẽnne n boort se'em. Bela tãma ka ẽɲe ya sela n de be'em. ¹⁰Asira, sũ-sã'añɔ seka n de Nawẽnne n boort se'em na boti nãra teera la yem basra tãon-be'ero, yẽta fãare. Nãra nãra ka iti a sãn bãɲe ni bela puam. La dũnia sũ-sã'añɔ sãm na kũm. ¹¹Sũ-sã'añɔ seka n de Nawẽnne n boort se'em na n boti ya ita se'em n wãna: A boti ya mõ'ora la nini, a boti ya pa'ala ti ya ka tari taale yel-ẽɲa puam, a boti ya sũure n ka ãna yẽlum, a boti ya zota la dabeem, a boti ya bõra me la ya sũure wuu ti ya yẽ mam, a boti ya tara la yemleego ti ya ẽɲe sela n ãn sõɲa, dee wisge ya mẽɲa ti ya sibge seka n tãm be'em na. Yãma pa'ale me sela woo puam ti yãma ka tari taale yel-ẽɲa puam.

¹²Bela, mam n daan gulse ya la, la dagi seka n tãm tãon-be'ero la ïyã, la dagi nãr-seka ti a ẽɲe ẽ be'em na mẽ ïyã. La de la, la boti ya bãɲe sõɲa Nawẽnne nẽɲam yãma n nõɲe tãma zo'oge se'em. ¹³La de la bela n soe ti tãma yẽ buraane, la dagi buraane na mã'a ti tãma yẽ, tãma ken yẽ sũ-yẽlga zo'oge me, tãma n yẽ ti Atiti tari sũ-yẽlga, yãma n keɲe a sũure se'em na. ¹⁴La sãn dena mam n pẽge yãma Atiti zẽ'am na, yãma ka ẽɲe mam yãnne. Tãma n ẽn togra sira bõra ya daare woo la, bela tãma n pẽge yãma Atiti zẽ'am na mẽ de la sira. ¹⁵Atiti sãn tẽege yãma sakre, la yãma n to'oge ẽ na dabeem na, a nõɲe yãma zo'oge pa'ase me. ¹⁶Mam iti sũ-yẽlga me, mam n tã won bõ yãma sira sela woo puam na ïyã.

8

Krisi nãrba n sõɲri taaba se'em

¹M sobiisi, tãma boort ti ya bãɲe la Nawẽnne n ẽɲe Masedvanu Wẽndeto la nãrba yel-sõnne se'em. ²Ba yẽ toogo me nãmse zozo'e, la

ba tari sū-yēlga zo'oge me, ti baa la ba nōḡo la n zo'oge la, ba bɔ sōḡre zo'oge me la ba sūure wuu. ³Mam yeti ya ti ba bɔ mase wu ban tā se'em, la ba bɔ halɔ gāḡe la ba pāḡa. ⁴Ba mēḡa n sose tōma ti ti bɔ ba sore ti ba po sōḡe Nawēnne nērba n boe Zerizalem na. ⁵Ba ēḡe gāḡe tōma n daan tari putē'ere se'em na me. Ba dēḡe dɔke la ba mēḡa bɔ Zuudāana la, dee dɔke ba mēḡa bɔ tōma doose wu Nawēnne n boori se'em. ⁶Bela ti tōma sose Atiti n pɔse sōḡre tōon-ēḡa yāma zē'am na, yeti a tōm ē ba'ase. ⁷Yāma mōrge sela woo puam me: Yāma bɔ Krisi sira zo'oge me, tāna tɔgra Nawēnne yelle sōḡa, tara Nawēnne mi'ilum zo'oge, wɔsge ya mēḡa sela woo puam, la yāma tari tōma nōḡlum zo'oge me. Bela, mōrge-ya la sōḡre tōon-ēḡa mē tōone.

⁸Mam n yeti bela la, la dagɔ pāḡa ti mam itɔ ya. Mam dɔke la nērba baseba n ēḡe se'em make bɔ ya, ti ya pa'ale yāma nōḡlum n de nōḡlum sira sira se'em. ⁹Yāma mi tōma Zuudāana Azezi-krisi yel-sōnne na me: Baa la ēḡa n daan de bōntarsōm dāana la, a daan ēḡe a mēḡa la nasa yāma iyā. Tɔ ēn ēḡe a mēḡa nasa la, wun botɔ yāma lebge bōntatba Nawēnne zē'am.

¹⁰La de la mam putē'ere ti mam yeti m bɔ ya yel-ēna wā puam: La ān sōḡa bɔ ya ti ya sēḡe nēḡa la tōon-ēna wā. Yāma n de pɔspɔ dōma n looge yem yuune n tole ti ya tōm tōon-ēna. La dagɔ bela mā'a, yāma n ken dena pɔspɔ dōma n pɔse lig-lobre la. ¹¹Bela, leelee wā, tōm-ya ē la yemleego ba'ase, wu yāma n yeti yāma boori ti ya ēḡe se'em na. La ya bɔ mase wu yāma n tari se'em. ¹²Se'ere n soe la, nēra sān bɔ la yemleego mase wu ēn tari se'em, Nawēnne to'ori a bɔ'a la me, a ka bɔsɔ sela ti fu ka tari la. ¹³Mam ka boori ti yāma n sōḡri nērba baseba la kē'ese ya nōḡo puam. La de la ti ya zōna taaba. ¹⁴La de la yāma seba n tari zo'oge leelee wā la, sōḡe seba n de nasdōma la. Tɔ bāma mē sān wa tara zo'oge, ti ya mē sān bɔɔra sōḡre, ti ba sōḡe

ya, bela ti ya wuu wun zōna taaba, ¹⁵ti la doose wu Nawēnne gōᅇᅇ
puam ti la yeti:

< < Nēr-seka n vaage zo'oge la,
ka tari sela ti la zo'oge gāᅇᅇ.
La sela ka pɔ'oge
seka n vaage fēe la. > >

¹⁶Ti pu'usri Nawēnne a yel-sōnne, ēᅇa n ēᅇᅇ yemloore ēᅇa Atiti sūure
puam ti a bɔra ti a sōᅇᅇ ya wu tōma n boori ti sōᅇᅇ yāma se'em na.

¹⁷Atiti sake tōma sosgo me, ken pa'ase, a looge la yem a mēᅇa bɔra ti
a wa'am yāma zē'am wa sōᅇᅇ ya. ¹⁸Tōma tōm na ti sobia ayula ti
Wēndeto nērba la wuu pēgri ē, ēn tōnni kō-yēlga la tōoma iyā, ti ēᅇa
la Atiti wa'am. ¹⁹Sela n pa'ase, Wēndeto nērba la n looge ē ti a lagum
la tōma eera tōnna sōᅇᅇ tōon-ēna wā. Tōma tōnni tōon-ēna nā'asra
la Zuudāana Nawēnne mēᅇa, dee pa'ala ti tōma boori ti ti sōᅇᅇ
nērba.

²⁰Tōma guusri la ti mēᅇa ti nēr-seka da wa tā'age zerge tōma, tōma
n bisri ligri la n zo'oge yelle se'em na. ²¹Tōma boori ti ti ēᅇᅇ la sela n
ān sōᅇᅇ Nawēnne zē'am, la nērsaalba mē zē'am.

²²Tōma tōm na ti sobia ayēma la bāma. Tōma make ē me nōore faa
bise, la a wusge a mēᅇa me tōnna. Leele wā a wusge a mēᅇa gānna
kurum me. Se'ere n soe la, a bɔ yāma sira zo'oge me. ²³La sān dena ti
sobia Atiti yelle, a de la mam tōntōn-tadāana n lagum na mam tōnna
yāma iyā. La sān dena ti sobi-seba n doli ē na, ba de la nērba ti
Wēndeto nērba la tōm, ti la dena Krisi nā'asgɔ. ²⁴Bela, ēᅇᅇ-ya sela n
pa'ali ba, la Wēndeto nērba la ti ya nōᅇᅇ ba, ti ba wun bāᅇᅇ ti tōma n
pēᅇᅇ yāma ba zē'am na, la de la sira.

9

¹La ka le dena ti mam gulse yeke ya sōŋre ti ya yeti ya bɔ Nawēnne nērba n boe Zerizalem na yelle. ²Mam mi ti ya boori ti ya sōŋe me, bela ti mam pēge ya Maseduani dōma zē'am, yeke ba yeti:

< < Nawēnne nērba n boe Akayi la pōn māasum na yuune n tole ti ba sōŋe. > > La yāma n wusge ya mēŋa la keŋe nērba zozo'e me, ti ba mē bɔra ti ba ēŋe. ³La mam tōm na ti sɔbiisi la ti ba wa'am ya zē'am, ti tōma n pēgrɪ yāma se'em bōn-ēŋa puam na, da kān dena zāŋa. Mam boori la ya māasum ba'ase wu mam n yeke se'em na. ⁴La sān dagna bela, Maseduani dōma la sān doose mam wa'am wa yē ti ya ka māasum, tōma n daan bɔ yāma sira zo'oge se'em na, la wun dena la yānne zozo'e bɔ tōma, la, la mē wun dena la yānne bɔ yāma. ⁵Bela ti mam bise ti la ān sōŋa ti mam sose ti sɔbiisi la ti ba dēŋe nēŋa wa'am yāma zē'am wa bise yemleego bɔ'a la ti ya yeti ya bɔ la yelle. Ti mam sān wa paam, ti ya pōn māasum bɔ'a la ba'ase me, ti la wun pa'ale ti ya bɔ la ya yemleego, la dagɪ mōgrɛ.

⁶Bāŋe-ya ti nēr-seka n bure fēe, wun lagse la fēe. La nēr-seka n bure zo'oge, wun lagse zo'oge. ⁷Bela, nēra woo bɔ wu ēn looge yem se'em na, ti la da dena nēnzūŋre, bu mōgrɛ. La de la nēr-seka n bɔ'ori la sū-yēlga ti Nawēnne nōŋe. ⁸La Nawēnne tari ke'engo me tāna wun bɔ ya bōn-sōma buuri wuu, ti ya wun tara yāma n boori sela la wuu daare woo ti la seke, dee tara sela wun tōm tōon-sōma wuu. ⁹La de wu lan gulse Nawēnne gōŋɔ puam nēra n mase la yelle yeti:

< < A putɪ a bōntarsōm me bɔ'ora nasdōma,
a tōoma n mase boe la wakate n ka ba'asri. > >

¹⁰Nawēnne n bɔ'ori ka-kɔra bōnbuuri, dee bɔ'ora ē dia ti a dita la, wun bɔ ya sela ti ya tāna wun tōm tōon-sōma zozo'e wu bōnbuuri n wɔm zo'oge se'em, ti ya tōoma n mase wun zɔ'ora pa'asra. ¹¹A wun bɔ ya bōntarsōm ti la seke sela woo puam, ti ya wun bɔ'ora la ya sūure

wuu, ti nērba zozo'e wun pu'usra Nawēnne a yel-sōnne, yāma bɔ'a la ti tōma dıke bɔ ba la ĩyā. ¹²Se'ere n soe la, sōnre tōone na ti ya tōnni na, la dagı Nawēnne nērba la sōnre mā'a ĩyā, la ken botı nērba zozo'e n pu'usra Nawēnne a yel-sōnne. ¹³Ba sān to'oge sōnre ēŋa, ba wun pēge Nawēnne me yāma n pa'ale ti yāma sakrı Krisi kō-yēlga la, la yāma n tarı yemleego, tara ya bōntarsōm putı la bāma, la Nawēnne nērba wuu la ĩyā. ¹⁴Ba wun nōŋe ya me pu'usra Nawēnne ya ĩyā, ēŋa n ēŋe ya yel-sōnne zozo'e la ĩyā. ¹⁵Tı pu'use-ya Nawēnne a yel-sōnne, a bɔ'a n ka tarı makre la ĩyā.

10

Apolı tıgrı a tōoma yelle

¹Mam Apolı ti ya yetı, mam sān bɔna yāma zē'am, mam de la nērbugsgɔ, la mam sān ka bɔna yāma zē'am, mam tarı la buraane tıgra la, mam belnı ya me la Krisi sū-bugsum, la a sōŋa. ²Mam sosrı ya me ti ya da ita, ti mam sān wa'am wa bɔna ya zē'am, la dena pērgre ti mam tara buraane tıgra, se'ere n soe la, mam mi ti mam wun tıge la buraane la nēr-seba n yetı tōma ıtı la tōma nērsaalba mēŋa n boorı se'em na. ³Tōma de la nērsaalba, la tōma ka zebri wu nērsaalba n ıtı se'em na. ⁴Zebre log-seba ti tōma tarı zebra la dagı nērsaala zebre logrɔ, ba de la pāŋa n ze'ele Nawēnne zē'am, n tã sã'ana sela wuu n tarı ke'eŋo. Tōma tarı ba sã'ana la tē'esgɔ seba wuu n de pōmpɔrŋɔ, ⁵la bōn-seba wuu n zēkri ba mēŋa botı nērba ka bāŋra Nawēnne pāŋa. Dee yāŋra tē'esgɔ buuri wuu botı ba sakra Krisi. ⁶Yāma sān wa ēŋe sela n pa'ale ti ya sakrı Nawēnne nōore sōŋa, tōma māasum me ti ti sıbge seba n sı'ısrı la wuu.

⁷Yāma bısrı la sela ti yāma nini yēti la. Nēra sān tē'ese ti ēŋa de la

Krisi nēra, a dāana mē tē'esē wāna wā: Ēṅa n de Krisi nēra la, tōma mē de la Krisi nērba. ⁸La mam sān wē m yō'ogɔ zo'oge fēe la ke'eṅo sēka ti Zuudāana bɔ tōma la, yānne ka tarɪ mam, la de la Zuudāana n bɔ tōma ke'eṅo ti ti sōṅe ya ti ya sēṅe nēṅa Nawēnne doosgo puam, la dagɪ ti sā'am ya. ⁹Mam ka boori ti la āna wu mam yeti m kē'esē ya la dabeem la m gōnnɔ na. ¹⁰Se'ere n soe la, nērba n yeti se'em n wāna: < < Apoli gōnnɔ na yetɔga ke'em me, dee dena toogo. La a mēṅa sān bɔna tōma zē'am, a ka tarɪ pāṅa, ti a yetɔga la dena ninbāalga. > > ¹¹Nēr-sēka dāana n tɔgrɪ bela la, a bāṅe sōṅa ti tōma n ka boe yāma zē'am dee tɔgra se'em gōnnɔ na puam na, tōma sān wa'am wa bɔna ya zē'am, tōma ken āna la bela.

¹²Tōma kān saage zōsōm ti mēṅa, bu dike ti mēṅa make la seba n pa'ale ba mēṅa tē'esē ti bāma ān sōṅa la. Ba dikri la ba mēṅa māmsra, makra ba mēṅa la taaba. Ban uti se'em na, ba ka tarɪ yem.

¹³La sān dena tōma, tōma kān wē yō'ogɔ ti la yōsge, tōma wun wē yō'ogɔ mase la tōon-sēka ti Nawēnne bɔ tōma la beene. Ēṅa n bɔ tōma sore ti tōma paage yāma zē'am. ¹⁴Tōma ka yōsge ti beene wu tōma ka wa'am na yāma zē'am na, tōma n de pɔspɔsi nērba n wa'am yāma zē'am wa mōole Krisi kō-yēlga la. ¹⁵Tōma ka wē'eri yō'ogɔ la tōon-sēba ti nērba baseba tōm, bela tōma ka yōsge. La tōma tarɪ putē'ere ti yāma n bɔ Nawēnne sira la wun pa'asra me, ti tōma tōone na zɔ'ɔra pa'asra yāma zē'am, ti la ken mase Nawēnne n bɔ tōma se'em na beene. ¹⁶Ti tōma yāṅa wun mōole kō-yēlga la so'olum seba n boe ya nēṅa la puam, ti la kān dena ti tōma wē'era yō'ogɔ la tōon-sēba ti nērba baseba dēṅe tōm ba tōoma zē'am.

¹⁷La gulse Nawēnne gōṅɔ puam yeti: < < Nēr-sēka n boori ti a wē yō'ogɔ, a wē yō'ogɔ la sela ti Zuudāana ēṅe la. > > ¹⁸Se'ere n soe la, la dagɪ nēr-sēka n pa'ali a mēṅa ti ēṅa ān sōṅa la n mase, la de la nēr-

seka ti Zuudāana Nawēnne yeti a ān sōṅa la.

11

Guuse ya mēṅa la pōmpōrṅo Tōntōniba

¹Mam sosri ya me ti ya sake m yalne wā fēe, asira, sake-ya m yetoga wā. ²Mam iti la sūure yāma iyā, la sūure ēṅa ze'ele la Nawēnne zē'am. Se'ere n soe la, mam yeti m dūke ya bō la Krisi mā'a, mam boori ti ya tara la ya mēṅa sōṅa ti m dūke ya bō ē wu pugla n nān ka mi buraaga ti ba dūke bō sira. ³La mam zoti la dabeem ti nēr-seka wun pā'ase ya, ti ya wērgē ka le dola Krisi la sūure ayūla, la pupeelem, wu Awa ti bōnsela la yvun dūke yemkēgsiga pā'ase ē ti a tuuge la. ⁴Se'ere n soe la, nēra woo sān wa'am ya zē'am wa mōola Azezi ayēma yelle, ti la ka dēna Azezi seka ti tōma mōole bō ya la, yāma to'ori me tōtō, la yāma to'ori la sia ayēma n dagi seka ti ya pōn to'oge la, la yāma to'ori la kō-yēlga ayēma n dagi seka ti yāma pōn to'oge la, sakra ba sōṅa sōṅa. ⁵Mam ka tē'ese ti nēr-bāma n pa'ali ti bāma de la Tōntōniba n gānni na, mam de poorum dāana ba zē'am. ⁶Baa la mam sān ka mina yetoga wu yetog-mita, la dagi ti mam ka tari bāṅre. La tōma pa'ale ya bōn-ēṅa me vēelga vēelga sela woo puam, wakate wuu.

⁷Mam n daan mōole Nawēnne kō-yēlga la bō yāma la, mam ka boti ya bō sela. Mam daan sike m mēṅa me, dee zēke yāma. Yāma tē'ese ti mam n daan ēṅe se'em na de la be'em bu? ⁸Mam n daan tōnni bō'ora yāma la, mam sake me ti Wēndeto baseba nērba yō mam. La ān wu mam fā la bāma, dūke sōṅe yāma. ⁹La mam n daan boe ya zē'am bō'ora sōṅre seba wuu la, mam ka te'ege ya nēra nēra ti a sōṅe mam. La daan de la ti sobi-seba n ze'ele Masedvanu wa'am na n daan bō

mam sela wuu n pɔ'oge mam na. Mam daan guusri m mēŋa me ti m da dena zeero bɔ ya, la mam wun ken āna la bela. ¹⁰Krisi sira n boe mam sūure puam na, mam yeti ya me ti nēra ka tā wun boti mam ka wē yō'ogo la bōn-ēŋa yelle Akayi so'olum puam. ¹¹Bēm iyā ti mam yeke wāna? La de la mam ka nōŋe ya me bu? Ayei, Nawēnne mēŋa mi ti mam nōŋe ya me.

¹²Mam n iti se'em na, mam wun ken ita la bela, ti nēr-seba n boori ti ba wē'era yō'ogo yeti bāma n tōnni se'em, la tōma n tōnni se'em na de la buyila la, da yē folle. ¹³Nēr-bāma de la pōmpɔrŋɔ Tōntōnɔba, ba pā'asri la nērba, ita ba mēŋa āna wu ba de la Krisi Tōntōnɔba. ¹⁴La ēna wā dagi bōn-di'ŋa. Se'ere n soe la, Asūtāana* mēŋa teeri me āna wu peelem maleka*. ¹⁵Bela, la dagi di'ire ti a tōntōnɔba ita ba mēŋa āna wu sela n mase tōntōnɔba. La ba ba'asgo wun āna wu ba tōoma la n de se'em na.

Apoli pa'ale ēŋa n nāmse a tōoma puam se'em

¹⁶Mam le yeta me ti nēra da bise mam wu mam de la yalma la. La ya sān bisra mam wu yalma, ya yi sake ti m wē m yō'ogo fēe, wu mam de la yalma la. ¹⁷Mam n tɔgrɔ wē'era m yō'ogo wā, la dagi Zuudāana n yeti mam yeke se'em na. Mam keŋe la m sūure tɔgra wu yalma la, wē'era yō'ogo. ¹⁸Nērba zozo'e n wē'eri yō'ogo la dūnia yela la, mam mē wun wē m yō'ogo me. ¹⁹Yāma de la yem dōma, dee sake tɔ'ora yalmdōma la yemleego! ²⁰Yāma sakri me ti ba kē'esra ya yamne puam, sake ti ba dita ya, fāara ya, ka nanna ya, sake ti ba wē'era ya pegsi. ²¹Tōma n daan ēŋe ti mēŋa tarumdōma ka ēŋe ya wu bāma n ēŋe ya se'em na, la de la yānne bɔ mam bu? Nēra sān tāna wun wē yō'ogo sela yelle, mam mē tā wun wē yō'ogo me a yelle. Wāna de la yalne ti mam tɔgrɔ. ²²Ba de la Ebre* dōma, mam mē de la Ebre nēra.

Ba de la Israyeli* dōma, mam mē de la Israyeli nēra. Ba de la Abraham* yusi, mam mē de la Abraham yuŋa. ²³Ba yeti bāma de la Krisi tōntōniba, mam wun tɔge wu mam yem n boi la, mam n de Krisi tōntōnna gānna ba. Mam tōm nāmse gānna bāma mε. Ba kē'esε mam yu'a deem gānna bāma mε, ba wē mam zo'oge gānna bāma mε, nōore zozo'e mam deege la m ki. ²⁴Nōore bunuu ti Zifdōma* wē mam la ka'asa, ka'asre ayula kai pinaasi. ²⁵Rom* dōma wē mam me nōore atā. Daare ayula nēriba lobe mam mε la kuga deege la ba kv. Nōore butā ti mam boe ōorŋɔ puam, ti a sã'am ko-kāte puam mise. Mam εŋε daare ayula mε ko'om puam, wunteεŋa la yu'ɔŋɔ. ²⁶Mam soa la sēnne puam, mam yē yel-pakrisi mε zozo'e la kulsi ko'om n pɔre, la fāarba. Mam yē yela mε la Zifdōma n de mam buuri la, la bu-zāŋsi*. Mam yē yel-pakrisi mε tēnsi puam, la weto puam, la ko-kāte puam. Mam daan yē yela mε la seba n parim ti bāma de la ti sɔbiisi la. ²⁷Mam daan tōm tōon-ke'eno nāmse mε. La nōore faa mam ka gīse. Kɔm, la koyūuro yōke mam mε. Mam gā'are kɔm mε wakate baseba. Wakate baseba ɔɔɔ yōke mam mε, ti mam ka tara fuugo wun pile. ²⁸Ti mam ka tɔgra yel-seba n weege la. La sɛla n de pakre bɔ mam daare woo, de la Azezi nēriba n boe zē'esɪ wuu la yelle. ²⁹Nēra sãn bɔna tɔrgɔ puam, la ãn wu mam mē boe la tɔrgɔ puam na. La nēra sãn base Nawēnne doosgo, mam sūure n sã'anɪ zozo'e.

³⁰La sãn dena yō'ogɔ wē'a, mam wun wē yō'ogɔ la m tɔrgɔ la.

³¹Nawēnne n de ti Zuudāana Azezi Sɔ n soe pēka wakate n ka ba'asɪ la, mi mε ti mam ka parni. ³²Mam n daan boe Damaasi la, gɔmna ti naba Aretasi boti a sɔna Damaasi busra la, daan boti ba gu'ura la tēŋa la nōa ti ba yōke mam. ³³Ti ba daan boti mam sige pu'igɔ puam, ti ba dūke mam doose sawure sike lalga poorum, la de la bela ti mam yāŋε pōse.

12

Apoli tɔgrɪ yel-sɛba ti Nawɛnnɛ puke pa'ale ẽ, la a tɔrgɔ yelle

¹Dɛni ti mam wɛ yõ'ogɔ, la yõ'ogɔ wɛ'a la ka tari yõorɔ. La mam wun ba'asõm tɔgɛ la bõn-sɛba ti Zuudãana la puke pa'ale mam, ti mam yɛ wu zãasɔ la. ²Mam mi la Krisi nɛra ayɪla*f1* yuuma pia la anaasi n wãna n tole, ti Nawɛnnɛ zɛkɛ ẽ zom saazuum a yire. Mam ka mi a dãana sãn sɪri zɛkɛ mɛ zom sɪra sɪra, bu la sãn ãna wu zãasɔ la, Nawɛnnɛ mã'a n mi. ³Mam mi ti bura-ɛɲa zɛkɛ mɛ zom Nawɛnnɛ yire, la mam n yeke se'em na, mam ka mi a sãn sɪri zɛkɛ zom, bu la sãn ãna wu zãasɔ la, ⁴la mam n mi sela de la a wõm na yetɔga mĩ ti nɛra ka tã wun tɔgɛ, la sela ti ba ka bɔ nɛrsaala nõorɛ ti a yeke. ⁵Mam wun wɛ yõ'ogɔ la bura-ɛɲa n yɛ sela la yelle, la mam kãn wɛ yõ'ogɔ m yela baseba yelle, ti la sãn dagna mam tɔrgɔ la yelle mã'a. ⁶Mam sãn bɔɔra ti m wɛ yõ'ogɔ, mam kãn dena yalma, se'ere n soe la, mam wun tɔgɛ la sɪra. La mam kãn ɛɲɛ bela, mam ka boori ti ba tɛ'ese mam yelle gãɲɛ ban yɛ mam n uti se'em, bu ban wõnni mam n yeke se'em na.

⁷La, lan wun ɛɲɛ se'em ti mam da tã'age zɛkɛ m mɛɲa la bõn-yãlma ti Nawɛnnɛ puke pa'ale mam na, a base ti Asũtãana* ɛɲɛ sela n ãn wu gõ'a mam ãyã puam nãmsra mam ti mam ka tãna wun zɛkɛ m mɛɲa.

⁸Mam sose Zuudãana la nõorɛ butã yeti a boti bõn-ɛɲa fõrgɛ dee base mam. ⁹La a lerge mam yeti: < < Mam yel-sõnnɛ seke fu mɛ. Se'ere n soe la, la de la tɔrgɔ puam ti mam pãɲa tõnni zozo'e. > > Bela, mam wun wɛ yõ'ogɔ m tɔrgɔ la puam, ti Krisi pãɲa la wun bɔna la mam le.

¹⁰Bela n soe ti mam ita sũ-yɛlga m tɔrgɔ la puam, la tuure puam, la tooro puam, la nãmsgɔ puam, la sũ-sã'aɲɔ puam, mam n sake Krisi la ãyã. Se'ere n soe la, mam tɔrgɔ la puam ti mam tari pãɲa.

Apoli fabli Korēnti Wēndeego nērba yelle

¹¹Yāma n mōrge mam ti mam tōgra wu yalma la. La de la yāma n de ni ya tōge po'oge mam, pa'ale mam n ān se'em. Baa mam sān ka dena sela, nēr-seba n pa'ali ti bāma n de Tōntōniba n gānni la, mam ka de poorum dāana ba zē'am. ¹²Yel-seba wuu ti mam daan wībri tōnna ya zē'am na pa'ali me ti mam de la Krisi Tōntōnna*. Bōn-yālma, la yel-kirsi n pa'ali Nawēnne pāṅa daan ēṅe me. ¹³Bēm yel-sōnne ti mam ēṅe bō Azezi nērba zē'esu baseba, ti la pō'oge yāma? Sān dagna mam n ka to'oge sōṅre ya zē'am na mā'a. Bō-ya mam sugri yel-ēṅa pvam.

¹⁴Nōore atā dāana n wāna ti mam māasum ti m wa'am ya zē'am wa bise ya. La, la dagi yāma n wun bise mam yelle. Se'ere n soe la, mam ka eeri ya sela, la de la yāma mēṅa ti mam eeri. Yāma ān wu mam kōma la. Asira, la dagi kōma n wun lagse sela bīṅe ba sōdōma, la de la sōdōma n wun lagse sela bīṅe ba kōma. ¹⁵La sān dena mam, mam wun duke sela wuu ti mam tari, la m mēṅa wuu bō la yemleego yāma sōṅre iyā. Mam n nōṅe yāma zo'oge la iyā n base ti yāma ka nōṅe mam bu?

¹⁶Ya mi me ti mam ka to'oge sōṅre ya zē'am, la ya nērba baseba yeti mam ēṅe la yemkēgsiga pā'ase ya. ¹⁷Mam n daan tōm nēr-seba ti ba wa'am yāma zē'am na, ba nēr-kāna ti mam boti a to'oge sela ya zē'am bō mam? ¹⁸Mam daan sose la Atiti ti a wa'am ya zē'am, dee tōm ti sobia la, ti a doose ē. Bela, Atiti pā'ase yāma to'oge sela me bu? Mam la Atiti tari la putē'ere ayula, la tōma doose la sore ayula.

¹⁹Yāma tē'ese ti tōma n tōgru bela wuu la, tōma eeri la buuro yāma zē'am bu? Ayei. Tōma tōgru la Nawēnne nēṅam, Krisi doosgo pvam. Ti sobi-nōṅrisi, tōma tōgru bela wuu ti la sōṅe la yāma, ti ya sēṅe nēṅa Nawēnne doosgo pvam. ²⁰Mam zoti me ti m wun wa paam ya

zē'am yē ti ya ka ān wu mam n boori se'em na, ti yāma mē yē ti mam ka ān wu yāma n boori se'em na. Mam zoti me ti zebre, la uta sūure la taaba, la sū-isgre, la gēelgo, la pɔ'ɔg-taaba, la ya'anzūm, la zēk-m-mēŋa, la ur-yooro wun bɔna ya tēŋasuka. ²¹Mam zoti me ti mam sān wa wa'am yāma zē'am, mam dāana Nawēnne wun boti yānne yōke mam yāma īyā, ti m sūure sā'am la ya nēr-seba n daan tōm tōon-be'ero, dee ka teege yem base tōon-dēgrɔ, la yalsɪ, la tōon-yooro seba ti ba ēŋe la.

13

Ba'asgo kā'aŋɔ, la pu'usgo

¹Nōore butā dāana n wāna ti mam sēm ya zē'am. La mam wun ēŋe wu Nawēnne gōŋɔ n yeke se'em na yeti: < <Yela wuu malgre, dēni ti nērba bayi bu batā dena kaset-dōma. > > ²Mam n daan wa'am ya zē'am nōore buyi dāana la, mam daan kā'an seba n tōm tōon-be'ero, la nērba baseba la wuu me. La leele wā ti mam ka boe ya zē'am na, mam le yeta ya me ti mam sān wa'am, mam kān zoe nēra ninbāalga. ³Yāma boori ti ya yē la sela n pa'ale ti Kriisi n boti mam tɔgra, ya wun yē. Kriisi sān uta sela ya zē'am, tɔrgɔ ka tarɪ ē, a tarɪ pāŋa zo'oge me ya zē'am. ⁴Asira, a ēŋe a mēŋa la tarma, ti ba ka ē dɔ-puurŋa* zuo. La a vɔa me la Nawēnne pāŋa. Tōma n de ayula la Kriisi la, tōma mē de la tarumdōma, la tōma vɔa la Kriisi le, wun tōnna yāma zē'am la Nawēnne pāŋa.

⁵Vēese-ya ya mēŋa bise ya sān bɔna Kriisi sore la zuo. Ya mēŋa geele bise, yāma ka mi ti Kriisi boe la yāma me? Sān dagɪ ni bela, ya koŋe me. ⁶La mam tarɪ putē'ere ti yāma mi me ti tōma mōrgē me ka koŋe. ⁷Tōma pu'usri Nawēnne me ya īyā ti ya da ēŋe sela n de be'em. La

dagı ti tōma boorı ti ti pa'ale ti tōma yāñe me, la de la ti yāma wun
ēñe sela n ān sōña, baa la tōma sān āna wu tōma koñe me. ⁸Se'ere n
soe la, tōma ka tā wun ēñe sela n si'ısrı sıra, tōma dolı la sıra. ⁹Tōma
sān bōna tırgo puam dee ti yāma tara pāña, tōma tarı sū-yēlga me.
La tōma n sosrı Nawēñne sela ti pu'usgo puam, de la ya vōm wuu
wun mase āna sōña. ¹⁰Bela n soe ti mam gulsra ya bōn-bāma, mam n
ka boe ya zē'am na, ti m sān wa wa'am ya zē'am, m da dıke
Zuudāana n bō mam nōor-seka la sıbge ya. A bō mam nōore la ti m
sōñe ya me ti ya sēñe nēña Nawēñne doosgo puam, la dagı ti m sā'am
ya.

¹¹Sela n deege, m sōbiisi, tara-ya sū-yēlga, mōrge-ya tōm mase sela
woo puam, bō'ora-ya taaba buraane, tara-ya nōore aylı la taaba, vōa-
ya la sū-mā'asum la taaba, ti Nawēñne n de nōñlum, la sū-mā'asum
dāana la wun bōna la ya le. ¹²Pu'use-ya taaba la nōñlum. Nawēñne
nērba wuu pu'usrı ya.

¹³Tı Zuudāana Azezi-krisi yel-sōñne, la Nawēñne nōñlum, la
Nawēñne Sia lagımtaare wun bōna la ya wuu. ¶ 12:2 Nēr-ēña de la
Apolı mēña. ¶

GAL

Galatı

Gōn-seka ti Apolı gulse bō Galatı dōma

Bilgre

Galatı dōma yuun ze'ele la Gōlı, tēn-seka yu'ure n de Frānsı zına wā,
sēñe ka zı'ire Azi-minēerı. Azi-minēerı la yu'ure yāña de la Tirki.
Apolı sore sēñne buyı, la butā dāana ti a mōole Azezi kō-yēlga mı, ti
nērba bō Azezi sıra. Bela poorum, nērba baseba n mē sēñe ka pā'ase
nēr-seba n dagı Zıfdōma dee bō Azezi sıra la, yetı dēnı ti ba sake

Zifdōma lɔɔ, la ba wāta ba buraasi wu lɔɔ la n bɔ nōore se'em na.

Apoli wōm na kō-ēŋa, ti a gulse yele ba ti la dagi pēgre ti ba doose
Zifdōma lɔɔ la, ti la de la ban bɔ Azezi sira la ti ba wun mase
Nawēnne zē'am, la dagi ban sakri lɔɔ la ŋyā.

Apoli dēŋe pa'ale la Azezi n wi ēŋa boti ēŋa dena a Tōntōnna, la
Azezi mēŋa n puke a kō-yēlga la pa'ale ēŋa se'em. Dee yeti ēŋa la
Azezi Tōntōnba baseba la yē taaba me, la ba sake ti ēŋa zāsŋɔ la de
la sira (sapitri 1-2).

A dīke la Nawēnne gōn-seba n yuun pōn gulse bɔna kurum kurum
na, zāsum ba yeti, fu sān bɔ Azezi sira, ti fu wun yē fāare. Azezi n ki
dɔ-puurŋa zuo la ŋyā ti tōma sɔna ti mēŋa, tōma ka le dena lɔɔ yamst
(sapitri 3-4).

Gōŋɔ la ba'asgɔ, a yeti dēni ti tōma vɔa vɔm seka n pa'ali ti tōma
vɔa la nēr-seba n soe ba mēŋa vɔm. La dēni ti Nawēnne Sia la pa'ala
ti sore, wun bɔ tɔ vɔm paalga n ān sōŋa, ti ti nōŋe taaba (sapitri 5-6).

Gōn-seka ti Apoli gulse bɔ

Galati dōma

1

¹Mam Apoli n de Krisi* Tōntōnna n gulse gōŋɔ wā. La dagi
nērsaalba n tōm mam, la mē dagi nērsaalba n looge mam ti mam
dena Krisi Tōntōnna*. La de la Azezi-krisi, la ti Sɔ Nawēnne n vo'oge
Azezi la n looge mam. ²Ti sɔbi-seba wuu n boe kalam na, n lagim na
mam gulse bɔ'ɔra yāma Azezi-krisi nērba n lagsri Galati tēnsi puam
na.

³Ti So Nawēnne, la ti Zuudāana Azezi-krisi wun ēnje ya yel-sōnne, dee bo ya sū-mā'asum. ⁴Azezi-krisi n duke a mēnja bo ti ba ku ē tōma tōon-be'ero iyā, ti a fāage to dūnia wā be'em puam base, wu ti So Nawēnne n boori se'em na. ⁵Ēnja n soe nā'asgo wakate n ka ba'asri. Amina.

Azezi kō-yēlga la de la ayula mā'a

⁶Mam ze la yeri la yāma n dare base Nawēnne n wi ya Krisi yel-sōnne iyā, dee to'oge kōa ayēma wu kō-yēlga la. ⁷Kō-yēlga ayēma ka boe. La de la nērba n bursri ya putē'era boora ti ba teege Krisi kō-yēlga la. ⁸Nēra sān mōole kō-yēlga ayēma bo ya, ti la dagna sēka ti tōma mōole bo ya la, baa la sān dena tōma mēnja, bu maleka* n ze'ele Nawēnne yire, Nawēnne kā'a-be'ego bona a dāana zuo. ⁹Tōma pōn yeke ya me, la mam le yeta ya me, ti nēra sān mōole kō-yēlga ayēma n de to'ore la sēka ti ya to'oge la, Nawēnne kā'a-be'ego bona a dāana zuo.

¹⁰Bela, yāma tē'ese ti mam boori ti nērba n pēge mam bu, bu Nawēnne n pēge ma? Yāma tē'ese ti mam boori ti m ēnje ti la paage la nērsaalba yem bu? Ayei, mam sān boori ni ti m ēnje ti la paage nērsaalba yem, mam ka de ni Krisi tōntōnna.

Apoli n lebge Azezi tōntōnna se'em

¹¹M sobiisi, mam boori ti ya bānje me ti kō-yēlga la ti mam mōoli la ka ze'ele nērsaalba zē'am. ¹²La mam mē ka to'oge ē nēra zē'am, la mē dagi nēra n zāsum mam. La de la Azezi-krisi mēnja n puke ē pa'ale mam.

¹³Ya wōm mam daan ān se'em Zifdōma* sore la puam, daan nāmsra Azezi nērba la zozo'e, mōora ti m sā'am ba sore la. ¹⁴Tōma Zifdōma sore la puam, mam daan sēnje nēnja me wisge m mēnja la ti yaabdōma

dɔgmike la yelle, ita lan yele se'em na gānna m zuutaaba zozo'e. ¹⁵La Nawēnne daan welge mam na to'ore lan dēŋe mam dɔka, ēŋe mam yel-sōnne, looge mam ti m dena a tōntōnna. ¹⁶Ēŋa n daan wa bise ti la ān sōŋa, ti a puke a Dayva la pa'ale mam ti m mōole a Dayva la kō-yēlga bɔ bu-zāŋsi* la, mam daan ka sēŋe nēr-seka zē'am ti a zāsum mam. ¹⁷La mam mē daan ka sēŋe Zerizalem* seba n dēŋe mam dena Azezi Tōntōnɪba* la zē'am. Mam daan sēŋe la Araabi so'olum, bela poorum ti mam lebe Damaasi. ¹⁸Bela poorum yuuma atā n tole, ti mam yāŋa sēŋe Zerizalem ti m ka bāŋe Apɪyɛeri, daan ēŋe dabsa pia la anuu a zē'am. ¹⁹La mam ka yē Azezi Tōntōnna ayēma pa'ase, sān dagna Azaki n de Zuudāana yɪbga la mā'a.

²⁰Mam n gulse ya sela wā, mam yeti ya Nawēnne nēŋam ti la dagi pōmpɔrŋɔ.

²¹Bela poorum mam ze'ele Zerizalem sēŋe la Siiri, la Silisi so'olum.

²²La Azezi-krisi nēr-seba n boe Zude* tēnsi la daan nān ka yē mam.

²³Ba daan wen wōm me ti ba tɔgrɪ mam yelle yeti: < < Seka n daan nāmsɪ tōma mōora ti a sā'am kō-yēlga ti ti bɔ sɪra la, yāŋa mōoli la kō-yēlga la. > > ²⁴Ti ba nā'asra Nawēnne mam iyā.

2

Apoli, la Azezi Tōntōnɪba baseba la tari la nō-yēnne

¹Bela poorum yuuma pia la anaasi n tole, ti mam la Abarnabasi lebe Zerizalem, la mam tari la Atiti lagum mī. ²Nawēnne n daan puke pa'ale mam, ti mam sēŋe. Mam daan pa'ale ba la kō-yēlga ti mam mōole bɔ bu-zāŋsi* la. La de la Azezi nērba nēŋadōma la mā'a ti mam tɔge bɔ ba. Mam daan ka boori ti tōon-seka ti mam daan tōm, dee ken tōnna wā, wa dena zāŋa. ³La Atiti n de Greki* n doli la mam

na, ba pōn ka pērgē yeti ba wā* ē. ⁴Nērba baseba n daan pā'ase ti bāma de la Azezi karēnbiisi, li'ise kē tōma tēņasuka bōra ti ba bāņe tōma n lagum na Azezi-krisi dena ayūla la, tōma n to'oge ti mēņa se'em, bāma daan boori ti ba base ti tōma le dena la Zifdōma lōw* yamsi. ⁵Tōma daan ka sake ban boori se'em na baa fēfēe, ti kō-yēlga n de sira la wun ken bōna yāma īyā.

⁶Nēr-seba ti ba bīrsi wu nēņadōma la, ba sān dena nēņadōma bu ba dagi nēņadōma, la ka pake mam, Nawēnne ka tū'usri nērba. Nēņadōma bāma ka mōrgē mam ti m ēņe sela sela pa'ase mam zāsņo la puam. ⁷Ba tōn yē ti Nawēnne dīke kō-yēlga la ēņe la mam nu'usum ti m mōole bō bu-zāņsi, wu ēn dīke ēņe Apīyēeri nu'usum ti a mōole bō Zifdōma la. ⁸Nawēnne n bō Apīyēeri pāņa, tōm ē Zifdōma zē'am na, ēņa n ken bō mam pāņa ti mam tōnna bu-zāņsi zē'am. ⁹La Azaki, la Apīyēeri, la Azā ti ba bīrsi wu ba wuu ke'endōma la, n bāņe ti Nawēnne n ēņe mam yel-sōnne dīke tōone na ēņe mam nu'usum na, ba yōge mam, la Abarnabasi nu'usi me, pa'ale ti ti de la ayūla lagum tōnna Nawēnne tōoma, ti tōma tōnna bu-zāņsi zē'am, ti bāma mē tōnna Zifdōma zē'am. ¹⁰Sela ti ba daan sose tōma de la ti sōņra ba Wēndeege la nasdōma mā'a. La de la bela ti mam daan iti zozo'e.

Apoli pa'ale Apīyēeri a tuure

¹¹Apīyēeri n daan wa'am Antīyōsi la, mam daan tōge ē me vēelga vēelga ka sake ē, se'ere n soe la, a daan ēņe la sela n ka mase. ¹²Ēn daan boe Antīyōsi la, a daan lagnu na bu-zāņsi* la dita me. La nērba n daan ze'ele Azaki zē'am wa'am, ti a welge ka le dita la bu-zāņsi la, se'ere n soe la, a daan zoti la seba n yeti dēni ti nēr-seba wuu n doli Nawēnne sore wāta* la. ¹³Ti ti sōbiisi baseba n de Zifdōma* daan po ita wu Apīyēeri n iti se'em na, halu ti Abarnabasi mē po kē ba

pulibsum ɪrgɔ la pɔam. ¹⁴La mam n daan yē ti ban uti se'em na ka mase wu kō-yēlga la sira n de se'em na ïyã, mam daan yeke Apɪyeeri ba wuu nēŋam yeti: < < Fõn de Zifu dee daan vɔa wu bu-zãŋsɪ n vɔa se'em na, fõn wun ēŋe la wãne mōrgra bu-zãŋsɪ la ti ba vɔa wu Zifdõma? > >

¹⁵La sãn dena tõma, tõma dɔge dena la Zifdõma, tõma dagɪ bu-zãŋsɪ n ka doli Nawēnne lɔɔ* la. ¹⁶La tõma mi me ti la dagɪ nēra n doli lɔɔ la n yeti se'em na ïyã, n wun base ti a mase Nawēnne zē'am, la de la nēra n bɔ Azezi-krisi sira mã'a ti Nawēnne wun base ti a mase a zē'am. Tõma mẽ bɔ la Azezi-krisi sira, ti Nawēnne base ti ti mase a zē'am, tõma n bɔ Azezi-krisi sira la ïyã, dee dagɪ tõma n doli lɔɔ la n yeke se'em na ïyã. Nēra nēra ka tã wun mase Nawēnne zē'am, ēn doli lɔɔ la n yeke se'em na ïyã. ¹⁷Tõma n te'ege Nawēnne, ti a base ti ti mase a zē'am tõma n bɔ Krisi sira ïyã la, bõn-ēŋa sãn base ti tõma mẽ dena tõon-be'ero dõma wu bu-zãŋsɪ la, yãma tē'esε ti Krisi boti ti tõnna la tõon-be'ero bu? Ayεi. ¹⁸Nēra sãn base Zifdõma lɔɔ ti a daan doli la, dee le yeti ba dɔla ē, la de la a mẽŋa n sã'anɪ lɔɔ la. ¹⁹La sãn dena lɔɔ la, a boti mam lebege la kũm a ïyã, mam ka le dɔla ē. Mam lagum na Krisi ki dɔ-puurŋa* zuo, ti m vɔa Nawēnne ïyã, ²⁰ti mam n vɔa wã, la ka le dena mam mẽŋa n vɔi, la de la Krisi n boti mam vɔa. La vɔm sεka ti mam vɔa lεεε wã, de la mam n bɔ ēŋa n de Nawēnne Dayua n nõŋe mam ki mam yelle sira la, n base ti mam vɔa. ²¹Mam ka sake ti Nawēnne yel-sõnne na de la zãŋa. La sãn dena la nēra n doli lɔɔ ïyã n base ti a mase Nawēnne nēŋam, Krisi kũm na de ni na zãŋa.

3

Tɪn bɔ Nawɛnnɛ sɪra la ɪyǎ, tɪ tɪ masɛ a zɛ'am

¹Yǎma Galatɪ dɔma, ǎne n botɪ yǎma zuto lebge tɪ ya ka tara yem? Mam daan pa'ale ya Krisi n ki dɔ-puurŋa* zuo la yelle me sɔŋa sɔŋa, tɪ la dena vɛelga bɔ ya. ²Mam boorɪ tɪ m soke ya la sokre ayɪla mǎ'a tɪ ya lerge mam: Yǎma n to'oge Nawɛnnɛ Sɪa la, la de la yǎma n sakrɪ utɪ lɔɔ* la n yele se'em na ɪyǎ bu? Ayɛɪ, la de la yǎma n wɔm kɔ-yɛlga la, bɔ Azezi-krisi sɪra la ɪyǎ. ³Yǎma yem na pɔ'ɔge paage la wǎna? Yǎma n pɔse lebge Nawɛnnɛ nɛrba la a Sɪa pǎŋa la, yǎma yǎŋa boorɪ tɪ ya ba'ase la ya mɛŋa pǎŋa? ⁴Yǎma n yɛ se'em wuu la lebge la zǎŋa bu? Dɛnɪ tɪ la da kǎn lebge zǎŋa. ⁵Nawɛnnɛ n bɔ ya a Sɪa, dee ita bɔn-yǎlma ya tɛŋasuka la, la dagɪ yǎma n utɪ lɔɔ n yele se'em na ɪyǎ, la de la yǎma n wɔm kɔ-yɛlga la, bɔ Azezi-krisi sɪra la ɪyǎ.

⁶Abraham* zɛ'am la mɛ yuun de la belɪ: La gulse Nawɛnnɛ gɔŋɔ puam yetɪ: < < Abraham bɔ la Nawɛnnɛ sɪra, tɪ Nawɛnnɛ bɪsɛ ɛ yetɪ a masɛ ɛŋa zɛ'am. > > ⁷Bǎŋɛ-ya tɪ nɛr-seba n bɔ Nawɛnnɛ sɪra la n surɪ de Abraham yusɪ. ⁸Nawɛnnɛ gɔŋɔ la pɔn yele me tɪ Nawɛnnɛ wun base tɪ bu-zǎŋsɪ* masɛ a zɛ'am, ban bɔ ɛ sɪra la ɪyǎ. Nawɛnnɛ yuun pɔn tɔge kɔ-yɛlga ɛŋa bɔ Abraham me yetɪ: < < Fɔn ɪyǎ tɪ dɔnɪa buuri wuu wun yɛ yel-sɔnnɛ. > > ⁹La de la belɪ, Abraham n yuun bɔ Nawɛnnɛ sɪra yɛ yel-sɔnnɛ na, nɛr-seba n mɛ bɔ Nawɛnnɛ sɪra wun lagɪm na Abraham yɛ yel-sɔnnɛ.

¹⁰Nɛr-seba n te'ege lɔɔ la, kǎ'a-be'ero boe ba zuto, se'ere n soe la, la gulse yetɪ: < < Kǎ'a-be'ego boe nɛr-seka woo n ka utɪ wu lan gulse se'em wuu Nawɛnnɛ lɔɔ gɔŋɔ puam na zuugo. > > ¹¹La de la vɛelga tɪ nɛra baa ayɪla ka tǎ wun yɛ buurɔ Nawɛnnɛ zɛ'am ɛn dolɪ lɔɔ la ɪyǎ, se'ere n soe la, la gulse yetɪ: < < Nɛra n bɔ Nawɛnnɛ sɪra masɛ a zɛ'am wun vɔa, ɛn bɔ ɛ sɪra la ɪyǎ. > > ¹²Nɛra n dolɪ lɔɔ la, la dagɪ tɪ

a bɔ la Nawēnne sira, bēm ĩyā, la gulse yeti: << Nēr-seka n uti lɔɔ la n ye le se'em na, a wun vɔa bela ĩyā. >> ¹³La tōma n ka ēŋe lɔɔ la n ye le se'em na wuu ĩyā, Nawēnne kā'a-be'ego n boe tōma zuto. La Kri si n ki dɔ-puurŋa zuo la, a dɔke kā'a-be'ego la tōma zuto mɛ, ti ēŋa mēŋa sɔɔge tōma zē'am, ti kā'a-be'ego la bɔna a zuugo, se'ere n soe la, la gulse yeti: << Kā'a-be'ego boe nēr-seka ti ba yulse ē dɔɔgɔ zuo la zuugo. >> ¹⁴Kri si ēŋe bela ti yel-sōnne na ti Nawēnne bīŋe nōore ti a bɔ Abraham na, mē wun dena bu-zāŋsi bōnɔ, bāma n lagim na Azezi-kri si dena ayula la ĩyā, dee ti tōma mē to'oge Nawēnne Sia la ti a bīŋe nōore ti a bɔ tɔ, tōma n bɔ ē sira la ĩyā.

Lɔɔ la ka sā'am nōor-bīŋre

¹⁵M sɔbiisi, mam yeti m dɔke la nērsaala yelle make pa'alɛ ya. Nēra sān looge yem dee gulse bīŋe, ti la doose la tēŋa la lɔɔ, nēra nēra ka tā wun sā'am ē, bu pa'ase sela mī. ¹⁶Nawēnne yuun bīŋe nōore bɔ la Abraham*, la a yuŋa. La ka gulse yeti, a bīŋe a nōore bɔ la a yusi, wu la de la nērba zozo'e. La yeti, a yuŋa, la de la nēra ayula mā'a. Nēr-ēŋa de la Kri si*. ¹⁷Mam n ye le se'em na vōore n wāna: La de ti Nawēnne n bīŋe a nōore la, yuuma kɔbsnaasi la pitā n tole dee ti a yāŋa bɔ a lɔɔ* la. Bela lɔɔ la kān yāŋe sā'am nōor-bīŋre* la ti a le bge zāŋa. ¹⁸Se'ere n soe la, la sān de ni na lɔɔ la dɔlga ĩyā ti nēra wun to'oge sela sɔna, la ka le dena nōor-bīŋre ĩyā. La, la de la Nawēnne n bīŋe a nōore la ĩyā, ti a ēŋe Abraham yel-sōnne.

¹⁹La sān dena bela, bēm ĩyā ti Nawēnne yuun bɔ lɔɔ la? A yuun bɔ ē ti a boti nērba n bāŋe ba tōon-be'ero, halɔ ka paage wakat-seka ti Abraham yuŋa la wun wa wa'am, seka ĩyā ti a yuun bīŋe nōore la. Malekadōma* n yuun to'oge lɔɔ la Nawēnne zē'am bɔ la, la doose la nēra ayula n boe Nawēnne, la nērba tēŋasuka wē'era nu'ugo*fl*.

²⁰Nēra ka wē'eri nu'ugo la nēra ayıla mā'a. La Nawēnne de la a ayıla mā'a, dee yvun bīje nōore, ti nu'u-wē'era ka bōna.

²¹Bela, lɔ la s'isri Nawēnne nōor-bīje la me bu? Ayei, la dagi bela baa fēfēe. Se'ere n soe la, lɔ sān boe ni n tā wun boti nērba tara vɔm n ka ba'asri, bela a ken tā ni wun base ti nērba mase Nawēnne zē'am me, ban sakri lɔ la iyā. ²²La Nawēnne gōɔ la yeti, dūnia dōma wuu boe la tōon-be'ero nu'usum. La de la bela ti sēba n bɔ Azezi-krisi sira la wun to'oge sela ti Nawēnne bīje nōore ti a bɔ ba, ban bɔ Azezi-krisi sira la iyā.

²³Wakat-seka ti Azezi-krisi daan nān ka wa'am ti nērba bɔ ē sira la, lɔ la lv tōma me wu tōma boe la yu'a deem na, gu'ura halɔ ti Nawēnne wun wa puke Azezi-krisi ti ti wun bɔ sira la peelem. ²⁴Bela lɔ la n yvun de tōma gu'ura pa'ala tōma sore halɔ wa paam wakat-seka ti Krisi wa'am na, ti tōma wun dena nērba n mase Nawēnne nējam, tōma n bɔ ē sira la iyā. ²⁵La lēle wā ti Azezi-krisi wa'am ti ti bɔ ē sira la, lɔ la ka le dena tōma gu'ura.

²⁶Yāma n bɔ Azezi-krisi sira la, ya wuu de la Nawēnne kōma.

²⁷Yāma wuu ti ba mise ya ko'om pvam na, ya lagum na Krisi dena ayıla, āna wu ēja n ān se'em na. ²⁸Yāma n lagum na Krisi la, bɔkre ka le bōna ti fu de la Zifu, bu bu-zāŋka*, yamja bu nēra n soe a mēja, pɔka bu buraaga, ya wuu de la ayıla. ²⁹Yāma n lagum na Krisi la, ya de la Abraham yusi, wun to'oge sela ti Nawēnne bīje nōore ti a bɔ la.

4

¹Mam n yeti m ye le se'em n wāna: Bia n yeti a wa sɔge sɔna a sɔ bōnɔ dee ken dena bōn-pika, a ān wu a de la yamja la, baa la ēja n wun wa sɔna sela woo la. ²En nān de bia la, a boe la nērba nu'usum ti ba gu'ura ē, dee bisra a sela woo yelle bɔ'ɔra ē halɔ ka paage wakat-

sɛka ti a sɔ looge la, ti a yāŋa sɔna sela woo. ³Tōma n mē daan ka bāŋe Nawēnne sira, āna wu kɔma la, tōma daan de la dūnia wā yela yamsi. ⁴La wakat-sɛka ti Nawēnne looge la n paage la, a tōm na a mēŋa Dayva, ti pɔka dɔge ē, ti a dɔla Zifdōma lɔɔ la, ⁵ti a fāage seba n doli lɔɔ la, ti ti wun lebge Nawēnne kɔma.

⁶La yāma n de Nawēnne kɔma la, a tōm na a Dayva Sia*f2* ti a bɔna ti sūure pvam, ti Sia la wi'ira Nawēnne yeti: < <Abba, m Sɔ.> > ⁷Bela ti ka le dena yamsi, ti de la Nawēnne kɔma. Tōma n de a kɔma la iŋyā, a wun bɔ tɔ sela wuu ti a bīŋe ti a bɔ a kɔma la.

Apoli yem yɔɔri Galati dōma yelle

⁸Kurum, yan daan ka mi Nawēnne na, ya daan doli la dūnia wā bōn-yooro n dagi Nawēnne poore, dena ba yamsi. ⁹La nānanne wā ti ya mi Nawēnne na, la, lan gānni, Nawēnne n mi ya la, la ēŋe la wāne ti yāma le dɔla bōn-yooro n ka tarɔ pāŋa dee ka tara vōore poore, le bɔɔra ti ya dena ba yamsi? ¹⁰Yāma looge la dabsa, la wōrsi, la wakate baseba yvune pvam, la yvuma dɔla ti la dena sisgo. ¹¹Yāma n iti se'em na boti dabeem n tara mam, ti mam n tōm se'em yāma iŋyā la, tā wun dena zāŋa.

¹²M sɔbiisi, mam belni ya me ti ya āna wu mam na, ti mam lebge āna wu yāma la. Yāma daan ka ēŋe mam tuuge. ¹³Ya mi ti la daan de la mam bā'aga la iŋyā ti mam yē folle mōole kō-yēlga la bɔ ya pɔspɔsi. ¹⁴Mam bā'aga la daan de la nāmsgɔ bɔ ya, la yāma daan ka nē'ese mam, la ya mē daan ka zagse mam, ya daan to'oge mam wu mam de la Nawēnne maleka*, bu Azezi-krisi la. ¹⁵Yāma sūure daan ān yēlum me, ti mam tāna wun yeti, yāma daan sān tā ni, ya wun dike ya nini bɔ mam. Bēm ēŋe ti yāma ka le tara sū-yēlga? ¹⁶Mam n tɔge ya sira la iŋyā, ti mam yāŋa lebge ya be bu?

¹⁷Nēr-seba ti mam yeti la, ban mōrgri se'em yāma ñyā la, la dagi ya sōñre ñyā. Ba boori ti ba welge ya la mam, ti ya lagum na bāma.

¹⁸Nēra sān mōrgra ti la sān dēna sōña ñyā, la ān sōña. La ān sōña ti ya ita bela wakate wuu, la, la da dēna mam n boe ya zē'am wakate sēka la mā'a. ¹⁹M kōm-nōñrɪsɪ, mam le tara la toogo ya ñyā wu pōka n virgri la, halɪ ti ya wun wa āna wu Kriɪ n ān se'em na. ²⁰Mam boori nɪ na m bōna ya zē'am lēɛɛ wā bāñe mam wun tōge se'em pa'ale ya. La mam n boe zē'e-sēka wā, mam ka mi mam wun yeɛle ya se'em.

Asaara la Agaari makre

²¹Yeɛle-ya ma, yāma seba n boori ti lōɔ la sōna ya la, yāma ka wōnnɪ lōɔ* la n yeti se'em na? ²²La gulse Nawēnne gōñɔ puam yeti,

Abraham* tarɪ la dayɔɔsɪ bayi. Ayɪla de la yam-pōka bia, ti ayēma dēna a pōga bia. ²³Yam-pōka bia la dōge wu nērsaala n boori se'em na. La a pōga bia la dōge wu Nawēnne n bñje a nōore se'em na.

²⁴Bōn-ēna de la makre bō tōma. Pōgsɪ bayi la makrɪ la yela bayi. La de la Nawēnne n bō nērba a lōɔ, dee bñje a nōore la. Pōspōsɪ pōka la yu'bre n de Agaari la māmsrɪ la lōɔ ti Nawēnne bō Sinayi tāña zuo la. Nēr-seba n dolɪ lōɔ la de la yamsɪ, wu Agaari la a kōma n de yamsɪ se'em na. ²⁵Agaari ān wu Sinayi tāña n boe Araabi tēña la, dee ken āna wu Zerizalem sēka n boe lēɛɛ wā la, se'ere n soe la, Zerizalem la a nērba la boe la lōɔ yamne puam. ²⁶La Zerizalem sēka n boe saazuum na ka boe yamne puam, tōma de la tēn-ēña nērba, wu Asaara kōma n dagɪ yamsɪ la. ²⁷La gulse Nawēnne gōñɔ puam yeti:

< < Ëñe sū-yēlga, kōndōgre, fōn ka dōge la.

Ëñe sū-yēlga wa'ara kīnkīma surna, fōn ka virge la.

Se'ere n soe la, pōg-sēka ti a sira base la kōma n wun zo'oge gānna

pōg-sēka n tarɪ sira la. > >

²⁸La sãn dena yãma, m sɔbiisi, yãma de la Nawënne kɔma, ɛn bĩje a nɔore la ãyã, wu A'izaki* ti ba dɔge Nawënne n bĩje a nɔore ãyã la.

²⁹La, la mẽ ãn wu bi-seka ti ba daan dɔge ẽ wu nãrsaala n boori se'em na n nãmse bi-seka ti ba dɔge wu Nawënne Sia n boori se'em na, la ken dena la bela mẽ læele wã. ³⁰Nawënne gɔŋɔ la yeti bẽm? A yeti: < < Dige yam-pɔka, la a bia la, se'ere n soe la, yam-pɔka la bia kãn lagum na pɔg-seka n dagi yamɲa la bia po to'oge ba sɔ bɔnɔ. > >

³¹Bela, m sɔbiisi, tɔma dagi yam-pɔka kɔma, tɔma de la pɔg-seka n dagi yamɲa la kɔma.

5

Ze'ele-ya kãŋkãŋe yan to'oge ya mẽɲa la puam

¹Krisi fãage ti base ti ti sɔna la ti mẽɲa. Bela, ze-ya kãŋkãŋe, da sake-ya le kẽ'ese ya mẽɲa yamne puam. ²Selse-ya, mam Apoli yeti ya me ti ya sãn base ti ba wã* ya, Krisi ka le tara yɔoro bɔ ya. ³La mam le yeti ya me ti nãr-seka woo n base ti ba wã ẽ, dẽni ti a ɛŋe lɔɔ* la n yele se'em na wuu. ⁴Yãma seba n te'ege lɔɔ la ɛera ti ya mase Nawënne nẽɲam na, ya welge ya mẽɲa me la Krisi, ya koŋe Nawënne yel-sɔnne me. ⁵La sãn dena tɔma, la de la tɔma n bɔ Krisi sira la, ti Nawënne Sia base ti tɔma tara putẽ'ere gu'ura ti a wa base ti ti mase a zẽ'am. ⁶Azezi-krisi doosgo la puam, fu sãn wã, bu fu sãn ka wã, la ka tarti vɔore, sela n tarti yɔoro de la fu bɔ Azezi sira tɔnna la nɔŋlum.

⁷Yãma daan doli Nawënne sore me sɔŋa sɔŋa, ãne n gu ya ti ya base da le sake sira la? ⁸Tẽ'esgo bãma n boti ya base sira la ka ze'ele Nawënne n wi ya la zẽ'am. ⁹Ba make yeti: < < Dãbille fẽe n boti borbori wuu ukra. > > ¹⁰La sãn dena mam, Zuudãana la ãyã mam bɔ ya sira me ti yãma tẽ'esgo kãn bɔna ayẽma la mam n pa'ale ya se'em

na. Nēr-seka n tari ya putē'era yuulna la, baa ēn de nēr-seka,
Nawēnne wun sɪbge ē.

¹¹M sɔbiisi, la sān dena sira ti mam mēŋa ken mōola me yeta ti ba
wāta, bēm ti Zifdōma nāmsra mam? La sān de ni na bela, mam n
mōoli Kriisi n ki dɔ-puurŋa* zuo ti ba nāmsra mam na kān le bɔna.

¹²Mam boori ni me ti nēr-seba n tari ya putē'era yuulna ti ya wāta la,
sān pōn bɔɔra, ba fɔ ba mēŋa pa'ase.

¹³La sān dena yāma, m sɔbiisi, Nawēnne wi ya ti ya sɔna la ya
mēŋa. La da base-ya ti yan soe ya mēŋa la base ti ya ita ya mēŋa yem
n boori se'em. Vɔa-ya la taaba la nōŋlum tōnna sōŋra taaba. ¹⁴Se'ere
n soe la, lɔɔ la wuu boe la yetɔg-ēna ayɪla puam n yeti:

< < Nōŋe fu tadāana wu fu mēŋa. > >

¹⁵La ya sān zebra la taaba, yī'ira dee dōnna taaba wu dūnsi la, guuse-
ya, ti ya wun sā'am taaba me ba'ase.

Vɔa-ya wu Nawēnne Sia n boori se'em

¹⁶Selse-ya, mam yeti ya me ti ya dɔla Nawēnne Sia n boori se'em, ti
ya kān ita nērsaalba yemleego n boori se'em. ¹⁷Se'ere n soe la,
nērsaalba mēŋa yemleego n boori se'em na de la to'ore la Nawēnne
Sia n boori sela la. Ti Nawēnne Sia n boori sela la, mē dena to'ore la
sela ti nērsaala mēŋa boori la. Bōn-bāma bayi si'isri la taaba. La bela
base me ti ya ka tāna wun ēŋe yāma n boori se'em na. ¹⁸La Nawēnne
Sia la sān sɔna ya, ya ka le bɔna lɔɔ* la nu'usum.

¹⁹Nērsaala mēŋa yemleego n boori se'em na de la vēelga vēelga. La
de la yalsi, la tōon-dēgrɔ, la tōon-yooro, ²⁰la бага kāabgɔ, la tum
tōoma, la taaba sisga, la zebre, la ita sūure la tadāana bōnɔ, la sū-
isgre, la gāŋe taaba, la ka-wōm-taaba, la welge taaba. ²¹La nōŋe
bōnɔ, la dāam buka, la puyā'an-yooro, la bōnɔ baseba n wōn na bōn-

bāma. Mam dēŋe kǎ'ana ya me, wu mam n daan pōn yeŋe ya se'em na, ti nēr-seka woo n uti bōn-bāma kǎn yē zē'am Nawēnne so'olum* puam.

²²La Nawēnne Sia tōoma de la nōŋlum, la sū-yēlga, la sū-mā'asum, la sū-mā'are, la sōŋa, la ur-sōŋo, la ēŋe sira, ²³la sū-bugsum, la yōk-m-mēŋa. Loo ka boe n s'isri bōn-bāma. ²⁴Nēr-seba n de Azezi-krisi nērba la ka ba mēŋa n boori se'em n de be'em, la ba yemleego la me do-puurŋa zuo, ti ba ka le sōna ba. ²⁵Nawēnne Sia n bō'ori ti wom na, base-ya ti ti dola ēŋa n boori se'em na. ²⁶Ti da dena-ya uk-m-mēŋa dōma, ti da eera-ya taaba nōore, bu ita sūure la taaba.

6

lta-ya taaba sōŋa

¹M sobiisi, ya sǎn yē nēra ti a tōnni tōon-be'ero, yāma seba ti Nawēnne Sia boe la ya le la, pa'ale-ya ē la sū-bugsum tari ē leme so-sōŋo la zuo. La guuse fu mēŋa, ti fu mē da po tōm a tōon-be'ero la. ²Sōŋra-ya taaba malgra taaba yela, ti bela ti ya wun ēŋe Krisi nōore n yeŋe se'em na. ³Nēra sǎn tē'ese ti ēŋa de la sela dee ka dena sela sela, a pǎ'asri la a mēŋa. ⁴Nēra woo geele buse a mēŋa tōoma n ān se'em, a sǎn yē a tōoma la puam sela n de a ēŋe sū-yēlga, ti a ēŋe a mēŋa iyā. La a da magra a mēŋa la nērba baseba. ⁵Nēra woo n wun tara a mēŋa zuugo yelle.

⁶Nēr-seka ti nēra zāsni ē Krisi yetoga la, a base ti seka n zāsni ē na yēta pure ēn tari sela woo la puam.

⁷Da pǎ'ase-ya ya mēŋa, ba ka pō'ori Nawēnne. Nēra n bure bōn-seba la, bōn-bāma ti a wun lagse. ⁸Nēr-seka n uti sela ti a mēŋa yemleego boori, a wun yē a yemleego yōoro n de kūm. La seka n uti sela ti

Nawēnne Sia boori la, a wun yē Nawēnne Sia n bɔ'ɔri sela n de vɔm n ka ba'asri. ⁹Bela, ti da targɛ-ya la tōon-sōma tōoma. Ti sān ita dee ka base, wakate la sān wa paage, ti wun yē a yōorɔ. ¹⁰Bela, tun yē folle sɛka woo, ti tōm ɛɲɛ nērba wuu sōɲa, lan gānni wuu, ti ita seba n lagum na tōma bɔ Krisi sira la sōɲa.

Ba'asgɔ yetɔga

¹¹Bise-ya gulsgɔ bie kār-bāna wā de la mam Apoli n gulse la m mēɲa nu'ugo. ¹²Sɛba n mōrgri ya bɔɔra ti ya wā* la, de la nērba n boori yu'ure nērsaalba zē'am. Ban ka boori ti ba yē nāmsgɔ Krisi kūm dɔ-puurɲa la ïyā mā'a yelle ti ba ita bela. ¹³Bāma seba n wātɪ la mēɲa ka uti lɔɔ la n ye le se'em na, ba boori la ya wā ti ba tā'age wē yō'ogɔ, bāma n boti ya wā la. ¹⁴La sān dena mam, mam ka wē'eri m yō'ogɔ la sela yelle, sān dagna ti Zuudāana Azezi-krisi n ki dɔ-puurɲa zuo la mā'a yelle. Krisi kūm na ïyā dūnia yela wuu ān wu ba ki me ka le sɔna mam, ti mam mē āna wu mam ki mɛ, ka le bɔna dūnia yela puam. ¹⁵La dagɪ nēra n wā, bu nēra n ka wā n tari yōorɔ, sela n tari yōorɔ de la ti tari la vɔm paalga. ¹⁶Sɛba wuu n doli nōor-ēna wā, Nawēnne wun bɔ ba sū-mā'asum, dee zoe ba ninbāalga, bāma la Nawēnne nērba la wuu.

¹⁷Nēra nēra da le base ti toogo paage mam, se'ere n soe la, yisa seba ti mam tari m ïyā la pa'ali mɛ ti mam de la Azezi nēra.

¹⁸M sɔbiisi, ti Zuudāana Azezi-krisi yel-sōnne wun bɔna la ya. Amina. \f1 3:19 Nēr-ēna yuvn de la Amoyisi*. \f2 4:6 Nawēnne Dayua Azezi Sia, la Nawēnne Sia de la buyɪla. \e

EPH

Efɛɛzi

Gōn-sɛka ti Apoli gulse bɔ Efɛɛzi dōma

Bilgre

Efɛɛzi de la Azi-minɛeri so'olum tɛŋa. Apoli sore sɛnne butã dãana ti a zĩire mĩ yuuma atã mōole, dee zãsum Azezi kō-yēlga (Tōoma 19:1-20:1). Wakat-sɛka ti a gulɛ gōŋɔ wã la, a boe la yu'a deem.

Zãŋɔ sɛba n boe gōŋɔ wã puam na dagi Efɛɛzi dōma mã'a ãyã, la de la nɛrba wuu ãyã.

A gulɛ tɔge yeti, lan dɛŋe Nawɛnne n wun nãam dũnia, a pōn looge yem me ti a boti Azezi-krisi dena bōn-sɛba wuu n boe saazuum, la tɛŋa Zuudãana (Efɛɛzi 1:10).

Apoli pɔse pa'ale la Nawɛnne n looge a nɛrba, base ba tōon-be'ero taale, boti ba lebge a kōma Azezi kũm na ãyã. Ti nɛr-sɛba wuu n bɔ Azezi sira la lebge buuri ayɩla, Zifdōma, la bu-zãŋsi wuu (sapitri 1-3).

A sose nɛr-sɛba wuu n wun karɛŋe gōŋɔ la me yeti ba vɔa ti la mase wu vɔm paalga ti Nawɛnne bɔ ba la, dee lagum taaba tara nō-yɛnne, vɔa la taaba Azezi doosgo la puam (sapitri 4-6).

A dɩke la bōnɔ batã make pa'ale Azezi nɛrba n lebge ayɩla se'em.

A make pa'ale ti Azezi nɛrba la ãn wu nɛra ãyã, ti Azezi ãna wu zuugo la (1:22-23, 4:16).

Buyi, a make pa'ale ti Azezi nɛrba la ãn wu deego, ti Azezi ãna wu kugre n boti deego la ze kãŋkãŋe (2:20-22).

Butã, a make pa'ale ti Azezi nɛrba la ãn wu pɔka, ti Azezi ãna wu sira (5:21-33).

Gōn-sɛka ti Apoli gulɛ bɔ

Efɛɛzi dōma

1

¹Mam Apoli n de Azezi-krisi Tōntōnna* wu Nawēnne n boori se'em na, n gulɛ gōn-ēna wã bɔ'ɔra yāma Nawēnne nērba n boe Efɛɛzi dena sira dōma Azezi-krisi doosgo pvam na. ²Ti So Nawēnne, la ti Zuudāana Azezi-krisi wun ēɲe ya yel-sōnne, dee bɔ ya sū-mā'asum.

Nawēnne n ēɲe tōma yel-sōnne se'em Krisi iyā

³Ti pēge Nawēnne n de ti Zuudāana Azezi-krisi So la, ēɲa n bɔ tɔ a Sia* yel-sōnne wuu n ze'ele saazuum, tōma n lagum na Krisi* dena ayula la iyā. ⁴Nawēnne looge tōma la ēɲa iyā, lan dēɲe dūnia nāaɲɔ, ti ti welge to'ore dena a nērba, ka tara yelle a nēɲam. ⁵A nōɲlum na iyā ti a dēɲe looge tōma ti ti lebge a kɔma Azezi-krisi iyā, wu a mēɲa yem n boori se'em na. ⁶A ēɲe bela ti ti pēge ē mɛ, a yel-sōnne n zo'oge gāɲe ti a ēɲe bɔ tɔ zāɲa, tōma n de ayula la a Dayɔ-nōɲre la iyā. ⁷La de la Krisi n ki ti a zum yese la iyā ti Nawēnne base tōma tōon-be'ero taale, ti tōma yē fāare, ti la mase wu Nawēnne yel-sōnne n zo'oge pāi se'em na. ⁸Yel-sōnne ēɲa n zo'oge la bɔ tōma la yem wuu, la bāɲre wuu. ⁹Nawēnne base ti tōma bāɲe ēn boori ti a ēɲe se'em n daan suge ti a looge yem ti a ēɲe Krisi iyā la mɛ. ¹⁰Wakate la sãn wa paage, Nawēnne wun ēɲe ēɲa n looge yem ti a ēɲe se'em na mɛ, a wun lagse sela wuu n boe saazuum, la dūnia zuo, ti ba sake Zuudāana ayula n de Krisi.

¹¹Nawēnne n base ti sela woo ita wu ēn boori se'em na, n dēɲe looge tōma ti ti dena a nērba Krisi iyā. ¹²Ti tōma n dēɲe tara putē'ere la Krisi la, wun base ti nērba pēge ē a na'am pāɲa la iyā.

¹³Yāma n mē wōm sira kō-yēlga la, n base ti ya bɔ Kriſi sira yē fāare, ēŋa iŷā ti Nawēnne bɔ ya a Sia wu ēn bīŋe nōore se'em na, Sia ēŋa de la dāalɔ pa'ale ti ya de la a nērba. ¹⁴A Sia la n de sela n pa'ale ti ti wun yē sela woo ti a bīŋe nōore ti a bɔ tɔ la, halɪ ka paage wakat-seka ti a wun fāage tōma wuu n de a nērba la ba'ase la, bōn-ēŋa n wun base ti ti pēge ē, a na'am pāŋa la iŷā.

Apolɪ pu'usrɪ Nawēnne Efēezi dōma iŷā

¹⁵Bela n soe ti mam n wōm yāma n bɔ ti Zuudāana Azezi sira, la yāma n tari nōŋlum la Nawēnne nērba wuu se'em na, ¹⁶ti mam tēra ya yelle m pu'usɔ puam, pu'usra Nawēnne a yel-sōnne ya iŷā ka gɔ'ɔra. ¹⁷Mam sosrɪ la ti Zuudāana Azezi-kriſi Sɔ n de Nawēnne n tari na'am pāŋa la, ti a bɔ ya a yem Sia ti a vėlge ya yem, ti ya bāŋe ēn ān se'em. ¹⁸Mam ken sɔsra Nawēnne ti a botɪ ya putē'era like ti ya bāŋe ēn wi ya ti ya tara putē'ere gu'ura sela, dee bāŋe bōn-sōma seba ti a bīŋe nōore ti a bɔ a nērba la n ba āna sōŋa, dee zo'oge se'em. ¹⁹Mam ken sɔsra ē ti a botɪ ya bāŋe a pāŋa la n ān kāte gāŋe se'em ti a tari tōnna la tōma n bɔ ē sira la le, wu a na'am pān-kāte n tōnnɪ tōn-kāra se'em na. ²⁰Pān-kāte ēŋa n bela ti a dɪke vo'oge Kriſi botɪ a zī'ire a zɔɔɔ bɔba saazuum Nawēnne yire. ²¹A botɪ Kriſi n gānna na'adōma wuu, la pānsɪ dōma wuu, la ke'endōma wuu, la ke'eŋo buuri wuu, ēŋa yu'vre n gānnɪ yu'vra wuu, la dagɪ dūnia ēna puam mā'a, la ken dena la dūnia seka n wun wa'am na puam. ²²Nawēnne base mē ti Kriſi sɔna sela woo, dee botɪ a dena a nērba wuu Zuudāana sela woo puam. ²³Kriſi nērba la ān wu a mēŋa iŷā la, ēŋa n vɔa ba puam, la ēŋa n boe zē'a woo, botɪ sela woo bɔna.

2

Nawēnne yel-sōnne īyā tī tī yē fāare

¹Ya daan ān wu ya ki me Nawēnne zē'am, ya tōon-be'ero, la ya tuure la īyā. ²Yāma n daan uti se'em na ān wu dūnia nērba n ka mi Nawēnne n uti se'em na, dola Asūtāana* n de pānsi dōma n boe saazuum naba la, ēṅa n tōnni na seba n si'isri Nawēnne nōore la. ³Tōma wuu daan lagum āna wu bāma n ān se'em na, tōma daan vɔa wu nērsaala yemleego n boori se'em, ita tī īyā, la tī yem n boori se'em n de be'em na. La tōma n daan ān se'em na base tī tī daan mase la Nawēnne sibgre wu nērba baseba la.

⁴La Nawēnne nōṅe tōma zo'oge me, tī a zoe tōma ninbāalga zozo'e. ⁵Tī baa tōma n daan ān wu tī ki me tī tōon-be'ero īyā la, a base tī tī lagum na Kisi yē vɔm. La de la Nawēnne yel-sōnne īyā tī a fāage ya. ⁶La de la tōma n lagum na Azezi-kisi dena ayula la īyā, tī Nawēnne lagum tōma la Kisi vo'oge, base tī tī lagum na ēṅa zī'ire Nawēnne yire. ⁷A ēṅe tōma sōṅa Kisi īyā, tī a pa'ale la nērba wakate n sēm a yel-sōnne n zo'oge gāṅe se'em. ⁸La de la Nawēnne yel-sōnne la īyā tī ya yē fāare, yan bɔ Kisi sira la īyā, la dagi ya mēṅa pāṅa, la de la Nawēnne bɔ'a. ⁹La dagi ya tōoma īyā, tī ya nēr-seka da pēge a mēṅa. ¹⁰La de la Nawēnne n nāam tɔ, boti tī lagum na Azezi-kisi dena ayula, tōnna tōon-sōma tī a pōn dēṅe māasum tī tī wa tōm na.

Kisi īyā tī lebge la buuri ayula

¹¹Tēege-ya yan daan ān se'em na, ba ka dōge ya tī ya dena Zifdōma* buuri, Zifdōma n wātī* la wi'iri ya tī a ka wātī dōma. Ba yeti bāma de la Nawēnne nērba, bāma n wātī la īyā, la bōn-ēṅa de la sela tī nērba uti ba īyā pvam mā'a. ¹²Tēege-ya tī wakat-seka tī ya ka boe la Kisi la, ya daan de la sāama la Israyeli* dōma, ka tara nōore la bōn-seba tī Nawēnne yvun biṅe nōore la Israyeli dōma la. Ya daan vɔa la

dūnia wā zuo ka mina Nawēnne, dee ka tara putē'ere gu'ura sela. ¹³Ya daan zāage la Nawēnne me, la leele wā, yāma n lagum na Azezi-krisi dena ayula la, a zum na n yese la base ti ya yāna lem ē me. ¹⁴La de la Krisi n boti ti tara sū-mā'asum, ēṅa n base ti Zifdōma, la seba n dagi Zifdōma lebge buuri ayula. Eṅa n ki yese be'em n ān wu lalga ¹⁵bōna ti tēṅasvka welge to ti ti sisra taaba la, dee base ti Amoyisi* lɔɔ, la yel-seba ti a yeti ba ita la ka le tōnna, boti Zifdōma, la seba n dagi Zifdōma naage taaba lagum na ēṅa lebge buur-paalga ayula tara sū-mā'asum la taaba. ¹⁶Krisi n ki kūm dɔ-puurṅa* zuo la, a lagum ba ti ba lebge la buuri ayula naage ba la Nawēnne boti ba ka le sisra taaba. ¹⁷Krisi wa'am wa mōole la sū-mā'asum kō-yēlga bɔ yāma seba n daan zāage, la tōma seba n lem na. ¹⁸Krisi iyā ti tōma wuu tara sore wun lem ti So Nawēnne zē'am, Nawēnne Sia ayula n boe la ti wuu le la iyā. ¹⁹Bela, ya ka le dena sāama, bu nērba n ze'ele zē'a ayēma, ya de la buuri ayula la Nawēnne nērba, ya de la a yire nērba. ²⁰Yāma po bōna la Nawēnne nēr-kuvṅɔ la n ān wu deego la mēeṅa pɔam. Azezi Tōntōnɔba*, la Nawēnne nōtɔ'ɔsriba* n de deego la ēbre. Ti Azezi-krisi mēṅa dena kugre n boti deego la tara pāṅa. ²¹Ḕṅa n base ti deego la wuu ze kāṅkāṅe lebgra Wēnde-kāte āna sōṅa bɔ Zuudāana. ²²Yāma n lagum na ē dena ayula la, ya mē po bōna la Nawēnne deego la ti a boe mī mēta la mēeṅa pɔam, ti Nawēnne mēṅa Sia kē'era mī.

3

Apoli tōm bɔ seba n dagi Zifdōma

¹Bela ti mam Apoli pu'ɔsra Nawēnne. Mam boe la yu'a deem Azezi-krisi yelle, mam n mōole a kō-yēlga bɔ yāma bu-zāṅsi* la iyā. ²Mam tē'ese ti ya wōm ti Nawēnne dɔke a yel-sōnne kō-yēlga la ēṅe la mam

nu'usum ti m tɔge bɔ yāma. ³Nawēnne puke a yelle n sugē la pa'ale mam mɛ, wu mam gulɛ se'em fēe bɔ ya la. ⁴Ya sān karēɛ mam n gulɛ se'em na, ya wun yē mam n bāɛ Kriɛ yelle n daan sugē la vōore n ān se'em. ⁵Nawēnne yuun ka puke ē pa'ale kurum dōma, la lɛɛɛ wā a boti a Sia la puke ē pa'ale la seba ti a tōm, la a nōtɔ'ɔsrɪba. ⁶Yel-ēɛa n sugē la de la kō-yēlga mōolgo n boti bu-zāɛsɪ wuu lagum na Zifdōma tara pɔre, lagum taaba dena ayula, dee lagum tɔ'ɔra sela ti Nawēnne bīɛ nōore Azezi-kriɛ iŷā.

⁷La de la Nawēnne yel-sōnne bɔ'a ti a boti mam dena a tōntōnna mōola a kō-yēlga la, la a pāɛa. ⁸Mam n de nēra n pɔ'ɔge Nawēnne nērba la wuu pɔam, la bela wuu Nawēnne ēɛ la mam yel-sōn-ēɛa ti m mōole Kriɛ kō-yēlga la bɔ bu-zāɛsɪ ti ba bāɛ bōn-sōma n zo'oge gāɛ ti nērba ka tāna wun bāɛ ba'ase la, ⁹dee boti nērba bāɛ Nawēnne n yeti a ēɛ se'em n daan sugē la. Eɛa n nāam sela woo la, sugē bōn-ēɛa mɛ halɪ yuuma yuuma wa paam zina. ¹⁰La lɛɛɛ wā, Azezi nērba la wun base ti ke'endōma, la pānsɪ dōma n boe saazuum bāɛ Nawēnne yem n de to'oto'ore se'em wuu. ¹¹La doose la Zuudāana Azezi-kriɛ ti Nawēnne ēɛ bela mase wu ēn looge a yem se'em halɪ lan dēɛ dūnia pī'iluɔ la. ¹²Tōma n bɔ Kriɛ sɪra lagum na ē dena ayula la, sore boe mɛ ti tōma tāna wun paage Nawēnne zē'am ti dabeem ka tara tōma. ¹³Bela ti mam sɔsra ya ti ya da base ti ya buraane bo'oge mam nāmsɪ ya yelle la iŷā, mam nāmsgɔ la de la yāma zu-zēkre.

Kriɛ nōɛlum

¹⁴La de la bela iŷā ti mam ka dūma tēɛa ti Sɔ Nawēnne nēɛam, ¹⁵ēɛa n boti sela wuu n boe saazuum la tēɛa zuo vɔa wun dena sɔdōma la ba yir-dōma wu Nawēnne n de Sɔ se'em na. ¹⁶Mam sosɪ ē

ti a Sia bɔ ya pãŋa ya sũure puam zozo'e wu a na'am pãn-kãte la n zo'oge se'em na, ¹⁷ti Kriŋi wun bɔna ya sũure puam, yan bɔ sira la ãyã, ti ya wun ze'ele kãŋkãŋe tara nõŋlum zozo'e. ¹⁸Ti yãma wun naage la Nawẽnne nẽrba wuu tã'age bãŋe Kriŋi nõŋlum n zo'oge se'em, ãn yalge, la ãn wɔge, la ãn ãn ko'ogo se'em, ¹⁹la ya bãŋe a nõŋlum na n gãŋe ti nẽrba ka tãna wun bãŋe ba'ase la. Ti bõn-seba wuu n ze'eti Nawẽnne zẽ'am wun pure ya.

²⁰Nawẽnne n tã ita sela woo zo'oge gãnna tõma n sosri se'em, bu tõma n tẽ'esri se'em, ãŋa pãŋa n tõnni la tõma le la, ²¹ãŋa n mase ti a yẽta nã'asgo Kriŋi nẽrba la zẽ'am Azezi-kriŋi ãyã zamãana woo zamãana wakate n ka ba'asri. Amina.

4

Kriŋi nẽrba la ãn wu ãyã la

¹Mam n boe yu'a deem Zuudãana doosgo yelle la, mam sosri ya ti ya dɔla sorwɔgo la sõŋa, wu lan mase Nawẽnne n wi ya ti ya ãna se'em na. ²La mase me ti ya sikra ya mẽŋa sela woo puam, tara sũ-bugsum, la sũ-mã'are, la ya tara nõŋlum da isgra sũure la taaba. ³Mõrge-ya tara nõ-yẽnne n ze'eti Nawẽnne Sia zẽ'am, naage-ya taaba ti sũ-mã'asum bɔna ya tẽŋasuka. ⁴Azezi nẽrba de la ãyã ayila, ti Nawẽnne Sia ayila mã'a bɔna, la Nawẽnne n wi ya ti ya tara putẽ'ere gu'ura bõn-seba la de la bõn-yẽnne. ⁵La Zuudãana ayila n boe, la tõma n bɔ sira se'em na de la ayila, la ko'om* misga de la ayila, ⁶la Nawẽnne ayila n de ti wuu So n soe sela woo, ti a pãŋa tara sela woo tõnna, dee bɔna sela woo puam.

⁷La tõma nẽra woo to'oge yel-sõnne bɔ'a mase wu Kriŋi n bɔ ti se'em. ⁸Bela ti la gulse Nawẽnne gõŋɔ puam yeti: < < En daan zom

saazuum na, a daan yāŋe a be'eba me yōge ba, dee bɔ nērba bɔ'a. > >
⁹Lan gulse yeti: < <A zom saazuum na > >, a vōore de la bēm? La
vōore de ti a daan dēŋe sige me halı ka paage tēŋa wã puam puam.
¹⁰Seka n daan sige la, la de la ēŋa n ken zom saazuum-zuum ti a sɔna
sela woo. ¹¹La de la ēŋa n bɔ ti bɔ'a, boti seba dena a Tōntōnıba*, ti
baseba dena a nōtɔ'ɔsrıba, ti baseba mōola a kō-yēlga la bɔ'ɔra nērba,
ti baseba sɔna Nawēnne nērba bısrı, bu dena karēnsāandōma. ¹²A
ēŋe bela ti ba māasum na Nawēnne nērba ti ba tōnna Nawēnne
tōoma, ti Krisi nērba n de a ĩyã la bita dee pa'asra, ¹³halı ti ti wun wa
lagum taaba bɔ sira dena ayıla, bāŋe Nawēnne Dayua la, lebge nērba
n bı ba'ase paage wu Krisi n mase sela woo puam se'em na. ¹⁴Bela ti
kãn le āna wu kɔma ti nērba zāsni zāsŋɔ buuri to'oto'ore pã'asra ba,
ıta yem ti ba boti ba tuuge, wu kusebgo, la ko-mĩ'isi n wē'eri ðorŋɔ ti
a yegna se'em na. ¹⁵La de la tun tɔgrı sira, la nōŋlum na ĩyã, ti ti bita
sela woo puam wu ka paage Krisi n de Zuudãana la. ¹⁶La de la ēŋa n
de zuugo la n boti a nērba n ān wu ĩyã la lagum taaba tōnna, wu kōb-
suglsi n boti ĩyã zē'esı to'oto'ore toŋe taaba, ti zē'a woo tōnna wu lan
mase se'em, ti ĩyã la wuu bita sōŋa sōŋa la nōŋlum.

Vɔm paalga Krisi ĩyã

¹⁷Bela ti mam yeta ya la ninmō'ore la Zuudãana nōore, ti ya da le
ıta wu seba n ka doli Nawēnne n ıtı se'em na, bāma n ıtı se'em na, ān
wu ban tē'esrı se'em n ka tarı vōore la. ¹⁸Ba yem na boe la lika puam,
la ba ka vɔa wu Nawēnne n boori se'em, ban ke'em ba sūure ka bɔɔra
ti ba bāŋe la ĩyã. ¹⁹Ba zuugo ka zεeri la tōon-be'ero ırgɔ, ba tōnnı la
yalsı, la be'em buuri wuu, ba boori la tōon-dēgrɔ mā'a.

²⁰La sãn dena yāma, ba ka zāsım ya Krisi yelle bela. ²¹Yāma n wōm
Azezi-krisi yelle, dee ti ba zāsım yāma n de a nērba sira n ze'ele a

zē'am na, ²²dēni ti ya base yāma n daan vɔa se'em kɔrum na. Base-ya vɔm kɛka, la a yemleego la n boori sela n de be'em n wun pā'ase ya boti ya sā'am na. ²³Base-ya ti Nawēnne Sia teege ya putē'era ti ya lebge paalsi. ²⁴Vɔa-ya vɔm paalga wu Nawēnne n nāam ya ti ya āna wu a mēɲa n ān se'em na. Vɔm ēɲa de la sela n mase, la pupeelem n ze'ele sira puam.

²⁵Bela iyā, base-ya pōmpɔrɲɔ, ti ya nēra woo tɔgra sira bɔ'ɔra a tadāana, ti ti wuu lagum dɛna la iyā ayula la taaba. ²⁶Ya sūure sān isge, da tōm-ya tōon-be'ero, la ya da base ti wēnne lui dee ti ya sūure la ka sige. ²⁷Da bɔ-ya Asūtāana* folle. ²⁸Nēr-seka n daan zūuri, a da le zūura, a mōrge a mēɲa tōnna sela n mase, ti a wun tara sela sōɲe seba n boori sōɲɛ. ²⁹Da base-ya ti yetɔg-be'ero yese ya nōorum, tɔgra-ya yetɔg-sōma n bɔ'ɔri nērba buraane, ti la sōɲra nēr-seba n selsri la, dee ita ba sōɲa. ³⁰Da ēɲe-ya sela sā'am Nawēnne Sia sūure, ti la de la ēɲa ti Nawēnne dɪke bɔ ya ti la dɛna dāalgɔ pa'ale ti daare n sēm ti ēɲa wun fāage ya fast fast. ³¹Base-ya sū-toogo, la sū-yīire, la sū-isgre, la nōke'ene, la taaba tvure, la putvɔlgɔ wuu. ³²Ita-ya taaba sōɲa, la ya tara taaba zīile, basra-ya taaba tōon-be'ero taale, wu Nawēnne n base ya tōon-be'ero taale Krisi iyā la.

5

Nawēnne kɔma yel-urɛ

¹Yāma n de Nawēnne kɔma ti a nōɲe la, āna-ya wu ēɲa n ān se'em na. ²Ita-ya sela woo la nōɲlum wu Krisi n nōɲe ti se'em dɪke a vɔm bɔ tōma iyā, ti la āna wu kāabgɔ* n tarɪ yūuɲ-sōɲɔ paara Nawēnne yem na.

³Yāma n de Nawēnne nērba la, la ka mase ti yalsi, la tōon-dēgrɔ

buuri wuu, la bōnɔ zozo'e yemleego yelle pure ya tēnasuka. ⁴La ken ka mase ti ya tɔgra yetɔg-yooro, la yetɔg-be'ero, la yetɔg-gālsɪ, la de la ya pu'ɔsra Nawēnne a yel-sōnne. ⁵Bāŋe-ya sōŋa, ti nēra n iti yalsɪ, bu tōon-dēgrɔ dāana, bu nēr-seka n nōŋe bōnɔ zozo'e kǎn yē sela sela Krisi, la Nawēnne so'olum* na puam. La seka n nōŋe bōnɔ zozo'e ān wu nēra n kǎabri бага dee base Nawēnne pu'ɔsgɔ la.

⁶Da base-ya ti nēra pǎ'ase ya la yetɔg-yooro, ti la de la bōn-bāma n isgri Nawēnne sūure ti a sibgra seba n zagse a nōore la. ⁷Da lagum-ya la nēr-bāma. ⁸Kurum, ya daan boe la lika puam, la læle wā, yan lagum na Krisi dena ayɪla la ïyǎ, ya boe la peelem puam. Bela, ita-ya wu nērba n boe peelem puam n iti se'em na. ⁹Peelem tōoma de la sela woo n ān sōŋa, la sela n mase, la sira. ¹⁰Bāŋe-ya sela n paari Zuudāana yem bɔke. ¹¹Da po tōnna-ya tōon-seba ti nērba tōnnɪ lika puam n ka tari yōoro la, tōn pa'ale-ya ti ba ka ān sōŋa. ¹²Nēr-bāma n sugɛ ita sela la de la yǎnne halɪ, ti nēra kǎn saage tɔge a yelle. ¹³Ya sǎn pa'ale ti ba ka ān sōŋa, nērba wun yē ti sela woo de la vēelga. ¹⁴Se'ere n soe la, bōn-seka woo n de vēelga boe la peelem puam. Bela ti la gulse yetɪ: < < Fōn seka n gīsri la, nēege, isge kūm na tēnasuka ti Krisi peelem nēege fɔ, bɔ fu vɔm. > >

¹⁵Guuse ya mēŋa sōŋa la yan vɔa se'em na. Da ita-ya wu nēr-seba n ka tari yem, ita-ya wu yem dōma la. ¹⁶Dike-ya folle ti ya tari la wuu tōm tōon-sōma, ti wakate la de la tōon-be'ero wakate. ¹⁷Bela ïyǎ, da dena-ya geto, bāŋe-ya Zuudāana la n boori se'em.

¹⁸Da yūura-ya dāam bugra, ti a sǎ'antɪ la nēra. Base-ya ti Nawēnne Sia sɔna ya, tōnna la ya le sela woo puam. ¹⁹Naage-ya taaba yōona Nawēnne yōoma, yōona-ya yōom-sōma buuri wuu ti Nawēnne Sia bɔ ya, nǎ'asra Zuudāana la ya sūure wuu. ²⁰Pu'ɔsra-ya ti Sɔ Nawēnne a yel-sōnne sela woo puam wakate wuu, la ti Zuudāana Azezi-krisi

yu'bre.

Pɔgsɪ la ba sɪrba sakra taaba

²¹Sakra-ya taaba, yāma n nā'asrɪ Krisi la ĩyā.

²²Pɔgsɪ, sakra-ya ya sɪrba wu yāma n sakrɪ Zuudāana se'em na.

²³Se'ere n soe la, sɪra n de pɔka la zuudāana, wu Krisi n de a nērba la Zuudāana la. Krisi nērba la de la a ĩyā, tɪ Krisi dena ba Fāagra. ²⁴Krisi nērba n sakrɪ ẽ se'em na, pɔgsɪ mē sakra ba sɪrba bela sela woo puam.

²⁵Sɪrba, nōŋɛ-ya ya pɔgba wu Krisi n nōŋɛ a nērba dɪkɛ a mēŋa vɔm bɔ ba ĩyā la. ²⁶A ẽŋɛ bela tɪ a malge ba la a yetɔga, tɪ ba āna sōŋa wu ban sɔɔrɪ ĩyā la ko'om se'em na, botɪ ba welge to'ore dena Nawēnne nērba. ²⁷Tɪ ba da tara dēgrɔ, la be'em, la sela n ka ān sōŋa, ba tara pupelem ka tara dōrga, tɪ a wɔn tarɪ ba sēŋɛ a zē'am la nā'asgɔ.

²⁸Bela mē, dēnɪ tɪ sɪrba nōŋɛ ba pɔgba wu ba mēŋa ĩyā la. Seka n nōŋɛ a pɔga, nōŋɛ la a mēŋa. ²⁹Nēra ka boe n sisri a mēŋa ĩyā, a diisri ẽ mɛ, busra a yelle sōŋa wu Krisi n utɪ se'em bɔ'ɔra a nērba la, ³⁰tōma n de a ĩyā zē'esɪ to'oto'ore la ĩyā. ³¹La gulɛ Nawēnne gōŋɔ puam yetɪ: < < Bɪraaga wɔn base a sɔ, la a ma, dee lagum na a pɔga, tɪ bāma bayi lebge ĩyā ayɪla. > > ³²Ēna de la yel-kāte n sugɛ yetɔg-bāna puam, mam n tɔgrɪ la de la Krisi, la a nērba la yelle. ³³La, la sān dena yāma, nēra woo nōŋɛ a pɔga wu a mēŋa. Tɪ pɔka woo mē nanna a sɪra.

6

Kɔma, la ba dɔgrɪba yelle

¹Kɔma, sakra-ya ya dɔgrɪba nōore Zuudāana la ĩyā, tɪ bela n masɛ.

²< < Nanna fɔ sɔ la fɔ ma. > > Nawēnne n bɔ a nōore tɪ ba ita bōn-sɛba la wuu puam, ẽna n de pɔspɔsɪ bōnɔ n lagum na nōore bɪŋre, ³a

yeti: < < Fu s̄an ita bela, fu wun yē yel-sōnne, la yō-woko dūnia
zuo. > >

⁴La yāma n de s̄odōma la, da ita ya kōma sela n wun boti ba sūure
yīige, uge-ya ba, kā'an ba, dee zāsum ba wu Zuudāana n boori se'em.

Yamsi, la ba zuudāandōma yelle

⁵Yamsi, sakra-ya s̄eba n soe ya dūnia zuo wā la ya sūure wuu,
nanna-ya ba dee z̄ota ba, wu yan sakri Kisi la. ⁶Da ita-ya bela ba
nifum mā'a ti ba p̄ege ya. Yāma n de Kisi yamsi la, ita-ya Nawēnne n
boori se'em la ya sūure wuu. ⁷Tōnna-ya ba tōoma la b̄'ora ba la
yemleego, wu ya tōnni b̄'ora la Zuudāana la, la dagi n̄ersaalba īyā.
⁸La ya mina ti n̄era woo wun yē a tōone yōoro Zuudāana Kisi zē'am
mase wu tōon-sōn̄o s̄eka ti a tōm na, a s̄an dena la n̄era yam̄a bu a
s̄an dagna n̄era yam̄a.

⁹La s̄an dena yāma n de zuudāandōma la, yāma mē de la ya ita sōn̄a
b̄'ora ya yamsi la, da gi'ira-ya ba, mina-ya ti yāma, la bāma wuu
lagim tari la Zuudāana ayila n boe saazuum n ka b̄kri n̄erba.

Zebre log-s̄eba ti Nawēnne b̄'ori

¹⁰Sela n deege, keje ya mēn̄a yē Zuudāana p̄n̄a ze'ele kāṅkāṅe a
doosgo la puam, a p̄an-kāte la īyā. ¹¹Ye-ya Nawēnne zebre logro wuu,
ti ya wun tā'age ze'ele kāṅkāṅe, ti Asūtāana* da yāṅe p̄'ase ya.
¹²Tōma zebre ka boe la n̄ersaalba, tōma zebri la Asūtāana ke'endōma,
la a p̄ans̄i dōma, la dūnia lika tōon-be'ero na'adōma, la kulkā'ars̄i*
wuu n boe saazuum. ¹³Bela īyā, duke-ya Nawēnne zebre logro la wuu
ye, ti ya wun tā'age ze'ele zeb̄e be'em wakate. La zebre la s̄an wa
ba'ase, ya wun ken ze kāṅkāṅe.

¹⁴Bela, māasum-ya ze, tara-ya sira ti a āna wu sagānne ti ya lu ya
sia la, la ya ita sela n mase ti la āna wu kuto fuugo ti ya ye p̄i ya

yō'ogɔ, ¹⁵tara-ya yemleego mōola sū-mā'asum kō-yēlga la wu tagra ti ya piti sēna la. ¹⁶La ya bɔ Nawēnne sira sela woo puam ti la gu'ura ya la Asūtāana pɛema n ān wu bugum na, ti ya tā'age kīne ba. ¹⁷Base-ya ti fāare ti ya tarɪ la āna wu kuto zuu-wanne gu'ura ya, dee dīke Nawēnne yetɔga n ān wu sukɔbgɔ ti Nawēnne Sia bɔ ya la zɛɛ. ¹⁸Pu'usra-ya Nawēnne sela woo puam, pu'usra-ya dee sɔsra ẽ wakate wuu la a Sia pāɲa. Narge-ya pāɲa pu'usra Nawēnne nērba wuu īyā da base. ¹⁹La ya mē pu'usra mam īyā ti m sān yetɪ m tɔge, a wun ɛɲe yetɔga m nōorum ti m tā'age mōole a kō-yēlga n soge la, la buraane ti nērba bāɲe a vōore. ²⁰La de la kō-yēlga ɛɲa ti Nawēnne tōm mam ti m mōole, bela īyā ti mam bɔna yu'a deem. Pu'usra-ya Nawēnne ti m wun tā'age mōole la buraane wu lan mase se'em.

Ba'asgo yetɔga

²¹Mam boort ti ya bāɲe la mam n ān se'em, la mam n itɪ se'em. Tɪ sɔbi-nōɲre Atisiki n de Zuudāana tōntōnna n de sira dāana la, wun pa'ale ya mam yelle wuu. ²²Mam tōm ẽ ya zē'am na bela īyā, ti ya bāɲe tōma yela n ān se'em, dee ti a wun keɲe ya sūure.

²³Nawēnne n de ti Sɔ, la ti Zuudāana Azezi-krisi wun bɔ ti sɔbiisi la wuu sū-mā'asum, la nōɲlum, dee botɪ ya bɔ ẽ sira. ²⁴Nawēnne wun ɛɲe nēr-seba wuu n nōɲe ti Zuudāana Azezi-krisi la nōɲlum n ka ba'asɪ la yel-sōnne. \e

PHP

Filipi

Gōn-seka ti Apolɪ gvlɛ bɔ Filipi dōma

Bilgre

Filipi de la Masedvanɪ tēɲa ayɪla, Rom dōma n yvun soe ba. Filipi n

de pɔspɔsi tɛŋa Erɔpi ti Apoli mɔole Azezi kɔ-yɛlga, ti nɛrba bɔ sira (Tɔoma 16:11-40).

Wakat-sɛka ti Apoli gulɛ gɔŋɔ wã la, a boe la yu'a deem.

Nawɛnne nɛrba n boe Filipi n yuun sɔŋɛ ɛ, ti a pu'usra Nawɛnne ba ïyã. Dee yele ba ti ba yɛ sũ-ke'ɛŋɔ, la buraane, wu ɛŋa n yɛ toogo dee ze'ele kãŋkãŋɛ se'em na. Ba tara sik-m-mɛŋa tɛ'esgɔ, wu Azezi n sike a mɛŋa se'em na, ba da ɛera ba mɛŋa mã'a sɔŋɛ (sapitri 1-2).

La Apoli tɛegɛ ba yeti ban mase Nawɛnne zɛ'am na, la de la yel-sɔnne ti Nawɛnne ɛŋɛ bɔ ba, ban bɔ Azezi sira la ïyã, la dagi ban sake Zifdɔma lɔɔ la ïyã. Dee kã'an ba yeti ba da sake pɔmpɔŋɔ karɛnsãandɔma, ba ita ɛŋa n uti se'em na, la ba ken mɔrgɛ vɔa wu Azezi mɛŋa n yuun vɔa se'em na (sapitri 3).

La a pa'ale ba yeti nɛr-sɛba wuu n vɔa la Azezi la, Nawɛnne bɔ'ɔri ba la sũ-yɛlga, la sũ-mã'asum (sapitri 4).

Gɔŋɔ wã pa'ale me ti Apoli nɔŋɛ Filipi dɔma me zozo'e.

Gɔn-sɛka ti Apoli gulɛ bɔ

Filipi dɔma

1

¹Mam Apoli la Atimɔti n de Azezi-krisi tɔntɔnɩba n gulɛ gɔŋɔ wã bɔ'ɔra yãma sɛba wuu n bɔ Azezi-krisi sira dena Nawɛnne nɛrba, la ya nɛŋadɔma, la ya yel-bɩsrɩba n boe Filipi. ²Ti Sɔ Nawɛnne la ti Zuudãana Azezi-krisi won ɛŋɛ ya yel-sɔnne, dee bɔ ya sũ-mã'asum.

Apoli pu'usrɩ Nawɛnne Krisi nɛrba n boe Filipi ïyã

³Mam pu'usrɪ Nawēnne me a yel-sōnne ya ñyā wakate seka woo tu mam tēege ya yelle. ⁴Wakate wuu tu mam pu'usrɪ Nawēnne ya wuu ñyā la, mam pu'usrɪ la sū-yēlga, ⁵yāma n sōŋe mam la kō-yēlga la tōone halɪ pɔspɔsɪ daare wa paam zina la ñyā. ⁶Mam mi sira sira tu Nawēnne n pɔse tōon-sōŋɔ ēŋa ya sūure puam na, wun ken tōm ē bela halɪ ka ba'ase Azezi-krisi lemŋo daare. ⁷La mase me tu mam tē'ese bela ya wuu ñyā, se'ere n soe la, mam yem boe la ya le me. Bēm ñyā, la sān dena mam n boe yu'a deem wā, bu mam n tɔgrɪ pa'ala nērba tu kō-yēlga la de la sira la, ya wuu lagum na mam me yē Nawēnne yel-sōnne. ⁸Nawēnne n de mam kaset-dāana tu mam yem boe la ya wuu me, mam nōŋe ya la Azezi-krisi nōŋlum. ⁹La mam n sosrɪ Nawēnne bōn-seka de la ya nōŋlum wun pa'asra daare woo, la bāŋre, la yem vēlgrɛ, ¹⁰tu ya wun bāŋe sela n ān sōŋa, tu Krisi* lemŋo daare ya wun dena pupeelem dōma ka tara dōrga, ¹¹tu ya tōoma wun dena tōon-sōma n mase n ze'ele Azezi-krisi zē'am, tu la wun botɪ Nawēnne yē pēka la nā'asgɔ.

Krisi ñyā tu mam vɔa

¹²M sɔbiisi, mam boort me tu ya bāŋe tu sela n ēŋe mam na base me tu kō-yēlga la mōolgɔ sēŋe nēŋa. ¹³La base tu nayire sudaasi, la nērba baseba la wuu bāŋe tu mam n boe yu'a deem na de la Krisi tōoma ñyā. ¹⁴La tu sɔbiisi zozo'e yē buraane me Zuudāana doosgo la puam, mam n boe yu'a deem na ñyā, tu ba sūure keŋra pa'asra, tu ba mōola Nawēnne kō-yēlga la ka zɔta dabeem.

¹⁵La de la sira tu nērba baseba mōolɪ Krisi kō-yēlga la sūure ñyā, la gēelgɔ, la baseba mōolɪ la putē'e-sōŋɔ. ¹⁶Putē'e-sōŋɔ dōma la mōolɪ ē na nōŋlum, ba mi tu Nawēnne n looge mam tu m tɔge pa'ale tu kō-yēlga la de la sira. ¹⁷La baseba la mōolɪ Krisi kō-yēlga la gēelgɔ, la

dagı la pupeelem. Ba tē'esrı tı bōn-ēña wun pa'ase mam na nāmsgo, mam n boe yu'a deem na. ¹⁸La bela dagı yelle, la sãn dena la putē'e-sōñɔ bu putē'e-be'ego, lan de se'em wuu, Krisi kō-yēlga la mōole me, bela mam ıtı sū-yēlga me.

La mam wun ken ıtı sū-yēlga me, ¹⁹se'ere n soe la, mam mi tı yāma pu'usgo ñyā, la Azezi-krisi Sıa*f1* sōñre ñyā, bōn-ēña wun ba'asōm bɔ mam na fāare. ²⁰Mam n boori sela, dee tara putē'ere gu'ura sela la, de la mam kãn ēñe sela baa ayıla tı yāñne yōke mam. La de la mam tara buraane leele wā la wakate wuu, base tı Krisi yē nā'asgo mam ñyā, la sãn dena mam vɔa me, bu mam sãn ki me. ²¹La sãn dena la mam, mam sãn vɔa, la de la Krisi ñyā, la kũm de la yōoro bɔ mam. ²²La mam sãn ken vɔa, mam wun tōm na tōon-sōma sōñe nērba. Bela, mam ka mi mam n wun looge seka. ²³Mam boe la yela bayi tēñasuka, mam boori tı m base vɔm ēna me dee sēñe ka bɔna Krisi zē'am, bela n ãn sōña gāñna. ²⁴La yāma ñyā, mam sãn ken vɔa n ãn sōña gāñna. ²⁵Mam mi tı bōn-ēña de la sıra. Bela, mam mi tı mam wun ken vɔa me bɔna la ya wuu, sōñe ya tı ya sēñe nēña Azezi-krisi doosgo puam, tara sū-yēlga. ²⁶La mam sãn leme wa bɔna la ya le, ya zuugo wun zēke pa'ase mam ñyā Azezi-krisi doosgo la puam.

Mōrgra-ya Krisi kō-yēlga la ñyā

²⁷La bōn-seka n gāñni wuu, de la ya base tı ya yel-ıre ãna wu Krisi kō-yēlga la n pa'alı se'em na. Tı mam sãn wa'am ya zē'am bu m sãn ka wa'am, m wun wōm tı ya ze la kãñkãñe, tara yem ayıla, lagum taaba la putē'ere ayıla mōrgra tōnna tı nērba bɔ'ora kō-yēlga la sıra. ²⁸Da base-ya tı dabeem tara ya la be'eba baa fēfēe, tı bela n wun pa'ale ba tı ba wun sã'am me, la yāma wun yē la fāare, bela ze'ele la Nawēñne zē'am. ²⁹Se'ere n soe la, Nawēñne n ēñe ya yel-sōñne na, la

dagı ya bɔ Krisi sira mǎ'a, la de la ya ken nǎmse a ıyǎ. ³⁰Ya nǎmse wu yǎma n yē mam n nǎmse se'em, dee wōnna tı mam ken nǎmsra leele wǎ.

2

Krisi sik-m-mēŋa, la a na'am

¹Yǎma n lagım na Krisi dena ayıla la base tı ya tara buraane me, tı a nōŋlum na belsra ya. La yǎma lagım na taaba la Nawēnne Sia*, dee tara nōŋlum, la taaba zıile. ²Lan de bela la, lagım-ya taaba la nōore ayıla tara nōŋlum, la yem ayıla, la putē'ere ayıla, bela tı mam sū-yēlga wun zo'oge gǎŋe. ³Da ita-ya sela sela gēela taaba la pa'al-m-mēŋa, sikra ya mēŋa tē'esra tı nērba baseba la gǎnnı ya. ⁴Nēra nēra da tē'esra a mēŋa mǎ'a sōŋre yelle. Eera-ya ya taaba sōŋre. ⁵Tara-ya putē'e-seka tı Azezi-krisi daan tarı la.

⁶Azezi-krisi la Nawēnne n de ayıla la,
a ka tē'ese tı ēŋa n zōn na Nawēnne na,
de la sela tı ēŋa wun gure kǎŋkǎŋe.

⁷A sike a mēŋa me,
base ēŋa n ǎn se'em na,
dee lebge nērsaala,
ēŋe a mēŋa tōntōnna,
wa bɔna la nērsaalba le.

⁸Ēŋa n daan de nērsaala la,
a sike a mēŋa me,
sake Nawēnne halı ki dɔ-puurŋa* zuo.

⁹Bela ıyǎ tı Nawēnne zēke ē halı,
bɔ ē yu'ure n gǎnnı yu'ura wuu.

¹⁰Ti Azezi ñyã,
bõn-seba wuu n boe saazuum,
la tēja zuo, la tēja puam,
wun ka dūma tēja a nējam pēge ē, a yu'ure la ñyã.

¹¹Ti nēra woo wun yeti,
Azezi-krisi n de Zuudāana,
ti la wun dena nā'asgo bɔ ti So Nawēnne.

Āna-ya wu peelem dūnia wã puam

¹²Bela, m sir-nõjristi, mam n daan boe la ya le la, ya daan sakri me wakate wuu, la mam n ka boe ya zē'am wã, ken ita-ya gānna bela. Tõnna-ya fāare la tōoma sōja sōja la Nawēnne zva. ¹³Se'ere n soe la, Nawēnne n boe la ya le tōnna, boti ya bɔra ēja n boori se'em, dee tãna ita ēja n boori se'em.

¹⁴Ita-ya sēla woo ti yōja, la nõke'ema wē'a da bɔna. ¹⁵Ti ya wun dena nērba n ka tari yelle, āna sōja ka tara dēgrɔ. Ti ya wun dena Nawēnne kɔma n ka tari dōrga n boe nēr-be'esti la nēr-yaalsi tējasuka, yēgra wu peelem dūnia wã zuo, ¹⁶wun pa'ale nērba yetoga n bɔ'ɔri vom. Ya sãn ēje bela, ya wun boti mam zuugo zēke Krisi lemjo daare, pa'ale ti mam tōoma, la mam n mōrgri la wuu dagi zãja. ¹⁷Ba sãn ku mam, la wun āna wu kãabgo* pa'ase yāma n bɔ Nawēnne sira ti la āna wu kãabgo bɔ ē na puam. Baa la sãn dena bela, mam sūure ān yēlum me, la mam wun ēje sū-yēlga la yāma wuu. ¹⁸Bela, ya mē tara sū-yēlga lagum na mam sirum.

Apoli yeti a tōm Atimōti la A'epafroditi

¹⁹Mam tari putē'ere ti Zuudāana Azezi sãn sōje, la kãn yuuge dee ti mam tōm Atimōti ya zē'am, ti m wun tã'age bāje yāma n ān se'em ti m sūure mǎ'age. ²⁰Nēra ka boe mam zē'am n tari putē'ere ayila la

mam n fabli ya yelle, sãn dagna ãña mã'a. ²¹Nãra woo zıgrı la a mẽña yelle, la dagı Azezi-krisi yelle. ²²Ya mi Atimõtu n pa'ale ãña n mase se'em, lagum na mam wu bia n lagum na a so la, tãm kã-yẽlga la tãoma se'em. ²³Bela, mam tarı putẽ'ere ti mam wun tãm na ãña ya zẽ'am tãtã, mam sãn wa bãñe m yela la n wun ãñe se'em. ²⁴La mam tarı putẽ'ere sira sira la Zuudãana ti la sãn ãñe fẽe, mam mẽña wun wa'am ya zẽ'am.

²⁵Mam tẽ'ese ti la ãn sõña ti mam tãm ti sohia A'epafroditi n de mam tãntãn-tadãana n lagum na mam nãmse la, ti a leme wa'am ya zẽ'am, ãña ti ya daan tãm, ti a tarı sõñre wa'am wa bõ mam m nãmsgõ la puam. ²⁶A boortı me halı la a sũure wuu ti a yẽ ya wuu, a sũure sã'am me halı, yãma n wõm a bã'ası la ãyã. ²⁷Asıra, a daan bẽ'ertı me deege la a ki. Ti Nawẽnne zoe a ninbãalga, la, la dagı ãña mã'a ninbãalga, la po dena la mam mẽ ãyã, ti mam da le yẽ sũ-sã'añõ pa'ase. ²⁸Bela ti mam tãm ã ya zẽ'am tãtã, ti ya sãn yẽ ã, ya sũure wun le ãñe yẽlum, ti mam mẽ sũ-sã'añõ wun bo'oge. ²⁹To'oge-ya ã la sũ-yẽlga wu lan mase, ãn de ti sohia Zuudãana sore puam na. Nanna-ya nãr-bãna taaba. ³⁰Se'ere n soe la, a daan deege la a ki Krisi tãoma ãyã, a pãse a yõore me sõñe mam la sõñre seka ti yãma ka tã'age sõñe mam na.

3

Dıke ya sira wuu bõ Azezi

¹Sela n deege, m sohiisi, ita-ya sũ-yẽlga Zuudãana doosgo la puam. La ka nãmsrı mam ti m le gulse bõn-bãna bõ ya, se'ere n soe la, ba wun sõñe ya me ti sela da ãñe ya.

²Guuse-ya ya mẽña la nãr-seba n ãn wu baası la, nãr-bãma n tãnnı

tōon-be'ero, dee mōrgra nērba boti ba wāta iyā mā'a la. ³Tōma n pu'usrī Nawēnne la a Sia pāṅa, dee ita sū-yēlga Azezi-krisi doosgo puam, ka te'ege nērsaalba n uti sela la, tōma n de nērba n wā wāaga* mēṅa mēṅa.

⁴Nērsaalba sisgo sān tari ni yōorɔ, mam mē tari nōore me ti m dīke m mēṅa te'ege ba. Nēra sān tē'ese ti ēṅa tari nōore ti a te'ege nērsaalba sisgo, mam n tara nōore gānna. ⁵Ba dōge mam me, dabsa anii daare ti ba wā mam. Mam de la Israyeli* nēra, Abēnzamē buuri, mam de la Ebre*f2* nēra mēṅa mēṅa. La sān dena Nawēnne lɔɔ* la doosgo, mam de la Farisi* nēra. ⁶Mam daan mō'oge nifo me lɔɔ la yelle halɔ daan nāmse Azezi nērba. La sān dena lɔɔ la sakre, mam daan ka tari dōrga.

⁷La bōn-seba wuu ti mam daan dīke ti la dena yōorɔ bɔ mam na, mam dīke ba wuu ti ba dena la zāṅa Krisi iyā. ⁸Mam n bāṅe Azezi-krisi n de m Zuudāana n ān sōṅa gānna wuu la, mam bise bōn-bāma wuu wu sela n ka tari yōorɔ. Krisi iyā mam base bōn-bāma me, bise ba wu sōgrɔ ti m tā'age yē Krisi, ⁹lagum na ē dena ayula. Mam ka le yeti la de la lɔɔ la sakre iyā ti mam mase Nawēnne zē'am, la de la mam n bɔ Krisi sura la iyā. Nawēnne n boti mam mase, mam n bɔ sura la iyā. ¹⁰Mam n boori se'em wuu de la m bāṅe Krisi, la pān-seka n base ti a vo'oge la, la m lagum na ē nāmse, āna wu ēn ān se'em a kūm na puam, ¹¹ti m tara putē'ere ti mam mē wun vo'oge.

¹²Mam ka yeti mam dare paage bōn-seka ti mam boori la me, bu mam dare mase me sela woo puam, mam ken mōrgra me ti m paage gure ē, se'ere n soe la, Krisi dēṅe gure mam me. ¹³M sōbiisi, mam ka tē'ese ti mam dare yāṅe gure ē. Mam uti la sela ayula, mam yinni bōn-seba n boe mam poorum na me, dee mōrgra ti m yē sela n boe nēṅa na. ¹⁴Mam zoti we'esa la nēṅa ti m paage a teka to'oge bɔ'a la ti

Nawēnne wi mam ti m to'oge a yire Azezi-krisi ñyā la.

¹⁵Tōma seba wuu n bi Nawēnne sore doosgo puam na, ti tara-ya putē'e-ēna. La sela ayula yelle, ya sān tara putē'ere ayēma, Nawēnne wun vēlge ya ti ya bānje ēn de bōn-sēka. ¹⁶La, lan de se'em wuu, tōma n sēnje paage zē'e-sēka wā, ti ken sēnna wē'esa zē'e-sēka ti ti we'esti la.

¹⁷M sōbiisi, lagim ita-ya mam n uti se'em na, bɪsra-ya seba yel-ure n ān wu tōma n uti se'em na, ti la dēna māmsgo bo ya. ¹⁸Mam daan dēnje yele ya me nōore faa, la mam le yeta ya me la nintām, ti nērba zozo'e n boe ti ba yel-ure pa'ala ti ba de la Azezi-krisi kūm dɔ-puurŋa* la be'eba. ¹⁹Nēr-bāma n boori se'em na n de ba wēnne, ba ba'asgo de la sā'aŋɔ. Ba dɪkri la sela n de ba yānne wē'era ba yō'oro, ba tē'esri la sela n de dūnia bōnɔ mā'a yelle. ²⁰La sān dēna tōma, tōma de la Nawēnne yire nērba, tōma gu'uri la Zuudāana Azezi-krisi n de ti Fāagra ti a ze'ele bilam wa'am. ²¹A sān wa'am, a wun teege tōma ñyā wā n pō'ori la me, ti a āna wu a mēŋa ñyā n tari nā'asgo la. A wun dɪke la a pān-kāte sēka ti a tari boti sela woo sakra a nōore la, ēnje bela.

4

Kā'aŋɔ

¹Bela, m sōbiisi, mam nōnje ya me bɔɔra ti m le yē ya, yāma n boti mam tara sū-yēlga, dee wun boti mam yē nā'asgo la. M sōbi-nōŋrɪsɪ, ze-ya kāŋkānje bela Zuudāana doosgo puam.

²Mam belni A'evodi, la Asēntiisi ti ba tara nōore ayula Zuudāana doosgo la puam. ³La fōn mē, m tōntōn-tadāan-sōŋɔ, mam sosri fu me ti fu sōnje pɔg-bāma. Ba daan lagim na mam me, la Akelma, la mam tōntōn-taaba baseba la, mōrge tōm Krisi kō-yēlga la tōoma, ti ba wuu

yu'bra gulse vɔm gɔŋɔ puam.

⁴Ita-ya sū-yēlga daare woo Zuudāana doosgo la puam. Mam le yeta ya me ita-ya sū-yēlga. ⁵Base-ya ti nērba wuu bāŋe ya sū-bugsum yelle. Zuudāana la lemŋo lem me. ⁶Da fabla-ya sela sela yelle, la sela woo puam pu'usra-ya sɔsra Nawēnne, la ya pu'usra ẽ a yel-sōnne, pa'ale-ya ẽ yāma n boori sela. ⁷Ti Nawēnne wun bɔ ya sū-mā'asum n gānni nērsaalba bāŋre wuu, ti a gu'ura ya sūure, la ya tē'esgo Azezi-krisi doosgo puam.

⁸M sobiisi, sela n deege, base-ya ti ya putē'era tē'esra sela woo n de sira, la sela woo n nari nā'asgo, la sela woo n mase, la sela woo n tari pupeelem, la sela woo n iti sūure yelum, la sela woo ti nērba yeti la ān sōŋa, tē'esra-ya bōn-seba wuu n ān sōŋa mase pēka yelle. ⁹Ita-ya bōn-seba ti mam zāsum ya, ti ya to'oge, sela ti ya wōm dee yē mam zē'am na, ti Nawēnne n bɔ'ori sū-mā'asum na wun bɔna la ya le.

Apoli pu'usri Filipi dōma ba sōŋre iyā

¹⁰Mam ẽŋe sū-yēlga zozo'e me Zuudāana doosgo puam, mam n yē ti yāma yāŋa le tēege mam yelle sōŋe mam na. Asira, mam mi ti yāma daan tē'esri mam yelle me, la ya daan ka yē la sore sōŋe mam. ¹¹La dagi ti mam boori la sela iyā ti mam yele bela. Mam zāsum me ita sū-yēlga sela woo puam la bōn-seka ti mam tari la. ¹²Mam tā nōŋɔ puam vɔa me, la mam ken tāna bōntarsōm puam vɔa me. Sela woo puam, la zē'a woo mam zāsum me, ti la sān dena mam di tige me, bu kɔm, bu mam tari me ti la seke, bu mam ka tari, mam mi mam wun ẽŋe se'em me. ¹³Mam tā ita sela woo me, Krisi n bɔ'ori mam pāŋa la iyā.

¹⁴La baa bela, ya ẽŋe sōŋa, yāma n sōŋe mam m toogo la puam na.

¹⁵Yāma Filipi dōma, yāma mēŋa mi ti mam n daan pɔse mōole kō-

yēlga la bɔ ya, dee daan ze'ele Masedvanı fōrge la, mam ka to'oge sɛla Nawēnne nērba zē'am baa zē'a ayıla, sān dagna yāma mā'a zē'am. ¹⁶Se'ere n soe la, mam n daan boe Tesaloniki tēŋa la, yāma daan tōm sōŋre bɔ mam me nōore faa. ¹⁷La dagı tı mam eerı la bɔ'a, mam n boori sɛla de la ya yē yɔɔɔ zo'oge. ¹⁸Mam to'oge sɛla woo tı yāma bɔ mam na me, la seke gāŋe me. Mam n to'oge ya bɔ'a la tı A'epafroditi tari wa'am na, mam tari me tı sɛla ka le pɔ'oge mam. Bɔ'a bāma ān wu sɛla yūuŋo n ān yēlum tı ya kāabe bɔ Nawēnne, tı a to'oge la sū-yēlga. ¹⁹Mam dāana Nawēnne n tari bōn-sōma wuu tı la zo'oge gāŋe la, wun bɔ ya sɛla woo n wun sōŋe ya Azezi-krisi ãyã. ²⁰Nawēnne n de tı Sɔ wun yē nã'asgɔ daare woo wakate n ka ba'asrı. Amina.

Pu'usgɔ

²¹Pu'use-ya Nawēnne nērba la wuu n dolı Azezi-krisi la. Tı sobi-sɛba n boe la mam na pu'usrı ya. ²²Nawēnne nērba la wuu pu'usrı ya, lan gānnı wuu nēr-sɛba n boe na-keko yire la pu'usrı ya.

²³Tı Zuudāana Azezi-krisi yel-sōnne wun bɔna la ya. \f1 1:19 Azezi-krisi Sta, la Nawēnne Sta de la ayıla. \f2 3:5 Israyelı la Ebre de la Zifdōma yu'ura baseba. \e

COL

Kolɔsı

Gōn-sɛka tı Apolı gvlɛ bɔ Kolɔsı dōma

Bilgre

Kolɔsı de la Azi-minɛerı so'olum tēŋa. Kolɔsı la Efɛzi zāage la taaba mase wu kilomētri kɔbsyi. La dagı Apolı mēŋa n mōole Azezi kō-yēlga bɔ ba, la de la A'epafrası n de Kolɔsı nēra n mōole, tı ba bɔ

Azezi-krisi sira (Kolosi 1:7 la 4:12).

Apoli yuun boe la yu'a deem (Kolosi 4:3), ti A'epafraſi sēŋe a zē'am ka yeŋe ē ti nērba baseba n tari pōmpōrŋo zāsŋo sēŋe Azezi nērba n boe Kolosi la zē'am. Pōmpōrŋo karēnsāandōma bāma yeti, nēra sān bōora ti a yē fāare yese tōon-be'ero puam, dēni ti a nā'asra bōno zozo'e, dee sakra ba nōore. La nēr-bāma ken yeti la de la pērgre ti ba sake malŋo baseba n de wāaga, la dia yela, la bōn-yūula yela, la sisgo baseba.

Bela ūyā ti Apoli gulŋe gōŋo wā bō ba ti a vēlge ba ti ba bāŋe sira, ti ba da sake pōmpōrŋo karēnsāandōma la.

Apoli vēlge ba yeti ban bō Azezi sira la, a fāage ba me, la dagi lōo dōlga n wun tā'age fāage ba. Dee yeŋe ba ti la doose la Azezi ti Nawēnne nāam dūnia, Azezi n de sēla woo nēŋadāana, la de la ēŋa ūyā ti Nawēnne wun fāage nērsaalba base (sapitri 1-2).

Bela poorum, Apoli pa'ale ba la ban wun vōa se'em vōm paalga ti Nawēnne bō ba Azezi-krisi ūyā la puam, dee yeŋe ba ti sēla wuu ti ba iti la, ba ita Zuudāana Azezi yu'ure ūyā (sapitri 3-4).

Apoli dūke gōŋo la tōm na Atisiki, la A'onezim, ti ba tari sēŋe ka bō Kolosi dōma (4:7-9).

Gōn-seka ti Apoli gulŋe bō

Kolosi dōma

1

¹Mam Apoli n de Azezi-krisi Tōntōnna* wu Nawēnne n boori se'em,

la ti sɔbia Atimōti ²n gulse gōŋɔ wā bɔ'ɔra yāma Nawēnne nērba n boe Kolɔsi, dena ti sɔbiisi n de sira dōma Kriŋi* sore doosgo puam na. Tɪ Sɔ Nawēnne wun ēŋe ya yel-sōnne, dee bɔ ya sū-mā'asum.

Apoli pu'usrɪ Nawēnne a yel-sōnne

³Tōma pu'usrɪ Nawēnne n de ti Zuudāana Azezi-kriŋi Sɔ a yel-sōnne me, tōma pu'usrɪ ē me yāma īyā wakate wuu. ⁴Tōma wōm ban tɔgrɪ yāma n bɔ Azezi-kriŋi sira, dee nōŋe Nawēnne nērba wuu se'em, ⁵yāma n tarɪ putē'ere gu'ura sela ti Nawēnne bīŋe a yire gu'ura ti a bɔ ya la īyā. La de la yāma n dēŋe wōm sira yetɔga n de Nawēnne kō-yēlga la, n botɪ yāma tara putē'ere ēŋa. ⁶Kō-yēlga ēŋa paage yāma zē'am me, wu ēn paage dūnia zē'est wuu se'em na, la a ttɪ nērba sōŋa me, ti ba sakra zozo'e, ti ba källe pa'asra. A mē ttɪ la bela yāma zē'am lan sēŋe la daar-seka ti yāma wōm, dee bāŋe Nawēnne yel-sōnne sira sira la. ⁷Yāma zāsum bōn-ēŋa la A'epafrasɪ n de tōma tōntōn-tadāana ti tōma nōŋe la zē'am. A de la Azezi-kriŋi tōntōnna n de sira dāana tōnna bɔ'ɔra yāma. ⁸Ēŋa n yeŋe tōma Nawēnne Sia* n base ti yāma tara nōŋlum se'em.

⁹Bela ti lan sēŋe la daar-seka ti tōma wōm yāma yelle la, ti tōma pu'usrɪ Nawēnne yāma īyā wa paam lēlele wā. Tōma sosrɪ ē ti a botɪ ya bāŋe ēŋa n boorɪ se'em sōŋa sōŋa, la ya tara yem, la bāŋre wuu ti Nawēnne Sia bɔ'ɔri. ¹⁰Tɪ ya yel-urɪ wun mase wu Zuudāana la n boorɪ se'em, ti la paage a yem sela woo puam. Tɪ ya wun tōm tōon-sōma buuri wuu, dee bāŋe Nawēnne pa'ase. ¹¹Nawēnne wun bɔ ya pāŋa sela woo puam a na'am pān-kāte la īyā, ti ya wun wībe sela woo puam la sū-mā'asum. ¹²Pu'usrɪ-ya ti Sɔ Nawēnne a yel-sōnne la sū-yēlga, ēŋa n base ti ya tāna wun po to'oge bōn-sōma ti a bīŋe ti a bɔ a nērba a so'olum n de peelem puam na. ¹³Nawēnne fāage ti me lika

pāṅa puam, tari ti sēṅe a Bi-nōṅre so'olum puam. ¹⁴Ẽṅa ãyã tōma yē fāare me, ti Nawēnne base ti tōon-be'ero taale.

Krisi n de sēka

¹⁵Azezi-krisi de la Nawēnne ti ba ka yēti la wōnne. Ẽṅa n de bōn-sēba n nāam na wuu yiēn dāana. ¹⁶La doose la ẽṅa ti Nawēnne nāam sela woo, bōn-sēba n boe dūnia zuo la saazuum, bōn-sēba ti ba yēti, la bōn-sēba ti ba ka yēti, bōn-sēba n tari na'am, la zuudāandōma, la pānsi dōma, la ke'endōma wuu. La doose la ẽṅa ti Nawēnne nāam sela woo, ti la dena a bōn. ¹⁷Ẽṅa n dēṅe sela woo bōna, la de la ẽṅa ãyã ti sela woo ken bōna a zē'am. ¹⁸Ẽṅa n de a nērba n de a ãyã la zuudāana. Ẽṅa n de sela woo pɔspɔsi dāana, ẽṅa n de pɔspɔsi dāana n vo'oge dee base kūm ti a dena sela woo nēṅadāana. ¹⁹La paage la Nawēnne yem ti a base ti ẽṅa n ãn se'em na wuu, Azezi mē ãna bela. ²⁰Dee boti la doose la Azezi ti sela woo, la ẽṅa naage taaba, la de la Azezi n ki kūm dɔ-puurṅa* zuo ti a zum yese la ãyã, n boti sū-mã'asum bōna sela n boe tēṅa, la saazuum wuu, la Nawēnne tēṅasuka.

²¹La yāma mē daan zāage me la Nawēnne, ya daan de la be'eba ya putē'e-be'ero, la ya tōon-be'ero la ãyã. ²²La lēele wā, Nawēnne naage ya me la ẽṅa, a Dayua n lebge nērsaala ki la ãyã, ti a tari ya sēṅe ka ze'ele Nawēnne nēṅam la pupeelem, ti ya ka tara yelle, ti dōrga kana. ²³Bela, dēni ti ya ken bɔ sira ze kãṅkãṅe, da base ti sela zāage ya la kō-yēlga la ti ya wōm tara putē'ere gu'ura sela la. La de la kō-yēlga ẽṅa ti ba mōole bɔ nērsaalba wuu n boe dūnia zuo la. Mam Apoli de Nawēnne tōntōnna ti m mōole la kō-yēl-ẽṅa.

Apoli n tōm se'em bɔ Nawēnne nērba

²⁴Lēele wā, mam sūure ãn yēlum me, mam n nāmsri bɔ'ɔra yāma la

ĩyã. Mam n nãmsrı wã de la Krisi nãmsgo n deege dena mam nãmse bɔ a nërba n de a ĩyã la. ²⁵Nawënne n looge mam ti m dena Azezi nërba tōntōnna mōole a yetɔga la wuu bɔ yãma. ²⁶Yetɔg-ẽɲa sugɛ mɛ yuuma yuuma, zamãana wuu wa paam zĩna, la læle wã a yãɲa puke mɛ bɔ Nawënne nërba. ²⁷Nawënne n boort ti a base ti a nërba la bãɲɛ yel-ẽɲa n daan sugɛ la na'am pãɲa n ãn sōɲa zo'oge se'em bu-zãɲsi* tẽɲasuka. Yel-ẽɲa n sugɛ la de la Krisi boe la ya lɛ, boti ya wun yẽ na'am pãɲa ti ya tari putẽ'erɛ gu'ura la a zẽ'am. ²⁸La de la ẽɲa yelle ti tōma mōoli, kã'ana nẽra woo, dee zãsna nẽra woo la yem ti ti boti nẽra woo mase sela woo puam Krisi doosgo puam ka ze'ele Nawënne nẽɲam. ²⁹La de la bela ĩyã ti mam tōnna dee mōrgra. La de la Krisi pãn-kãte ti a bɔ mam zozo'e la n boti mam tōnna bela.

2

¹Mam boort ti ya bãɲɛ la mam n mōrge tōnna se'em yãma ĩyã, la nër-seba n boe Laodise, la nër-seba wuu n nãn ka yẽ mam na nifo la ĩyã. ²Mam mōrgri ti ya sũure n keɲɛ ti ya lagum taaba tara nōɲlum, dee tara yem zozo'e, ti ya bãɲɛ sira sōɲa sōɲa Nawënne yelle n sugɛ n de Krisi la. ³La de la ẽɲa n tari yem la bãɲre wuu n sugɛ n tari yōoro zozo'e.

⁴Mam yeke ya wãna ti nẽra n da wa tɔge nō-yẽlum yetɔga pã'ase ya. ⁵Baa mam n zãage la yãma la, mam yem boe la ya mɛ, mam sũure ãn yẽlum mɛ, mam yẽ ti ya yel-urɛ dolɔ sore sōɲa sōɲa, la yan bɔ Krisi sira ze kãɲkãɲɛ la.

Tōma tari vɔm mɛ Krisi zẽ'am

⁶Bela, yãma n sake ti Azezi-krisi de la ya Zuudãana la, bɔna-ya la ẽ lɛ, ⁷ze kãɲkãɲɛ wu tia yẽga n kẽ tẽɲa ze kãɲkãɲɛ se'em na, ken bɔ-ya

sura la ya sūure wuu wu ban zāsum ya se'em na, la ya pu'usra
Nawēnne a yel-sōnne zozo'e.

⁸Guuse-ya ti nēra da dīke bāṅre zāsṅo la yem yooro n de nērsaalba
sisgo, la dūnia wā yela pā'ase ya, ba ka ze'ele Krisi zē'am. ⁹Se'ere n
soe la, Nawēnne n ān se'em wuu la, Krisi mē ān na bela mēṅa. ¹⁰La
yāma n lagum na ē na, ya tari sela woo me ti la seke. Eṅa n de
ke'endōma, la pānsi dōma wuu Zuudāana. ¹¹Yāma n lagum na ē na,
ya wā* me, la dāḡi wā-seka ti nērsaalba wāti ti la pa'ale ti ba de
Nawēnne nērba la. La de la Krisi n teege ya sūure ti ya lebge
Nawēnne nērba, yese ya putē'e-be'ero wuu. ¹²Ban daan mise ya ko'om
puam na, la ān wu ba lagum ya me la Krisi laage. La yāma mē lagum
na ē me vo'oge, yāma n bō Nawēnne pāṅa n boti Krisi vo'oge sura la
īyā. ¹³Yāma daan ān wu ya ki me Nawēnne zē'am ya tōon-be'ero īyā,
la ban ka dōge ya ti ya wāta dēna Nawēnne nērba la īyā. La Nawēnne
boti ya lagum na Krisi me voa, base ya tōon-be'ero wuu taale. ¹⁴Tōma
daan si'ise la Nawēnne loo*, tōm tōon-be'ero n pa'ale ti tōma mase la
sūgre. La ban ka Krisi kūm do-puurṅa* zuo la, Nawēnne base yel-ēṅa
taale me, ti a ka le bōna tōma zuo. ¹⁵A boti pānsi dōma wuu, la
ke'endōma wuu pāṅa sā'am me, ēṅe ba yānne nērba wuu nēṅam
pa'ale ti Krisi tā'age ba me kūm do-puurṅa zuo.

¹⁶Bela, da base-ya ti nēra le bō ya sisgo la sela ti ya diti, bu sela ti
ya yūuri, bu yvune yvune kibsa, bu wōr-paalsi de'eṅo, bu vo'osgo*
dabsa yelle. ¹⁷Bōn-bāma de la sela n sēm na māmsgo mā'a, la sela la
mēṅa de la Krisi. ¹⁸Da base-ya ti nēra n iti a mēṅa wu a de la sik-m-
mēṅa dāana dee pu'usra malekadōma*, pā'ase ya yeti yāma n iti sela
de la zāṅa. Nēr-ēṅa dāana yeti Nawēnne n puke sela pa'ale ēṅa, la a
pa'alī la a mēṅa zāṅa, se'ere n soe la, la de la nērsaalba putē'ere ti a
tari. ¹⁹A ka lagum na Krisi n de Zuudāana la. Krisi n de zuugo sōṅra

īyā la wuu sela woo puam, ti kōb-suglsi, la zīila boti īyā la zē'esi to'oto'ore tonje taaba bita wu Nawēnne n boori se'em.

Vom keka, la vom paalga yelle

²⁰Yāma lagum na Krisi ki me, ti a boti dūnia yela ka le tara pāṅa la ya le. Bēm ti ya ita wu dūnia wā n ken sōna ya, base ti ba le mōrgra ya ti ya sakra sisgo bāna wā n yetu: ²¹ < < Da dūke, da leme, da kalum > >? ²²Sisgo bāma de la bōn-sēba n sā'anī la īyā. Ba de la nērsaalba sisgo la ba zāsṅo. ²³Sisgo la zāsṅo bāna ān wu yem tōoma la, ba pa'alī la pu'usṅo sore n uti la yemleego, la sik-m-mēṅa n dagi sira, la īyā nāmsgo yelle. La ba ka tā wun sōṅe nēra ti a yōke a mēṅa la nērsaala yem n boori se'em n de be'em na.

3

¹Yāma lagum na Krisi vo'oge me, bela eera-ya bōn-sēba n boe Nawēnne yire, zē'e-sēka ti Krisi zī Nawēnne zūṅo la. ²Base-ya ti Nawēnne yire yelle pake ya, da base-ya ti dūnia yela pake ya. ³Se'ere n soe la, ya ki me, la ya vom boe la Krisi le Nawēnne zē'am. ⁴La Krisi n de ti vom na sān wa puke, ya wun po naage la ē puke la a na'am pāṅa.

⁵Bela, base-ya dūnia wā putē'e-be'ero n de yalsi tōoma, la tōon-dēgrō, la yalsi ırṅo yemleego, la be'em yemleego, la nōṅe bōnō zozo'e. Nēra n nōṅe bōnō zozo'e ān wu nēr-sēba n kāabrī бага dee base Nawēnne pu'usṅo la. ⁶La de la tōon-bāma n isgri Nawēnne sūure, ti a sūbgra nēr-sēba n zagsri a nōore la. ⁷Yāma n daan vōa tōon-be'ero puam na, ya mē daan uti la bela. ⁸La leele wā, base-ya bōn-bāma wuu. Base-ya sū-isgre, la sū-yīire, la putuulṅo, la taaba tuure, la yetōṅ-yaalsi mē ka le mase ti ba yese ya nōorum. ⁹Da parna-ya bō'ora

taaba. Yāma base yāma n daan ān se'em na me la a yel-ure, ¹⁰dee teege tara āsum paalga. La de la Nawēnne n boti ya teege tara āsum ēṅa, dee malgra ē ti a āna wu a mēṅa la, ti ya wun tā'age bāṅra ēṅa sōṅa sōṅa pa'asra.

¹¹Nēr-seba n tari āsum paalga wā, la sān dena Zifdōma*, bu bu-zāṅst*, bu seba n wā*, la seba n ka wā, bu seba nini n ka pike, la weem nērba, bu yamsi, la seba n dagi yamsi, welgre ka le bōna ba tēṅasuka. La de la Kriṣi mā'a n gānni sela woo, dee sōna a nērba wuu.

¹²Yāma de la nēr-seba ti Nawēnne looge, a nōṅe ya me, welge ya to'ore ti ya dena a nērba. Bela, zota-ya taaba ninbāalga, ita taaba sōṅa, sikra ya mēṅa, dee tara sū-bugsum, la sū-mā'are. ¹³Da isgra ya sūure la taaba, nēra sān ēṅe ya tuuge, base-ya ē taale wu Zuudāana n base ya tōon-be'ero taale se'em na. ¹⁴Lan gānni wuu, tara-ya nōṅlum, ti ēṅa n wun boti ya lagim taaba tara nō-yēnne sōṅa sōṅa. ¹⁵Base-ya ti Kriṣi sū-mā'asum la sōna ya sūure, Nawēnne wi ya ti ya tara la sū-mā'asum ēṅa, lagim taaba dena ayila. Mina-ya yel-sōnne pu'usgo. ¹⁶Base-ya ti Kriṣi yetoga la bōna la ya le sōṅa sōṅa. Ti ya tara yem zozo'e zāsna taaba, dee kā'ana taaba. Yōona-ya Nawēnne yōoma, yōona-ya yōom-sōma buuri wuu ti Nawēnne Sia bō ya la ya sūure wuu, pu'usra Nawēnne a yel-sōnne. ¹⁷Bōn-seba wuu ti ya iti, la sān dena la tōoma bu yetoga, ita-ya la Zuudāana Azezi-kriṣi yu'ure, dee pu'usra ti Sō Nawēnne a yel-sōnne Azezi-kriṣi yu'ure iyā.

Kriṣi nērba n wun wa se'em ba yie puam

¹⁸Pōgsi, sakra-ya ya sirba wu lan mase ti la āna se'em Zuudāana doosgo puam.

¹⁹Sirba, nōṅe-ya ya pōgba, da to-ya la ba.

²⁰Kōma, sakra ya dōgriba nōore sela woo puam, ti la de la bela n ān

Zuudāana sūure yēlum.

²¹Sōdōma, da ita-ya sela n wun base ti ya kōma sūure yīige, ti ba buraane da bo'oge.

²²Yamsi, sakra-ya seba n soe ya dūnia wā zuo sela woo puam, da ita-ya bela ba nifum mā'a ti ba pēge ya. Tōnna-ya la ya sūure wuu yāma n nanni Zuudāana la īyā. ²³Sela woo ti ya iti, ita-ya la ya sūure wuu, wu ya iti bō'ora la Zuudāana la, la dagi nērsaalba īyā, ²⁴yāma n mi ti ya wun to'oge la yōwō ti Zuudāana la bīje ti a bō a nēba la īyā. La de la Kriisi n de Zuudāana la ti ya tōnni bō'ora. ²⁵Nēr-seka n iti sela n ka mase, a wun to'oge yel-ire n ka mase yōwō, se'ere n soe la, Nawēnne ka bōkri nēba.

4

¹La sān dena yāma n de zuudāandōma la, ita-ya sela n ān sōja, la sela n mase bō'ora ya yamsi la. Mina-ya ti yāma mē tari la Zuudāana n boe saazuum.

Kā'aṅṅ, la ba'asgṅ yetṅga

²Pu'usra-ya Nawēnne da base, mōrgē-ya la pu'usgṅ, pu'usra-ya ē a yel-sōnne. ³Pu'usra-ya tōma mē īyā, ti Nawēnne bō tō sore ti ti mōole a kō-yēlga la pa'ale nēba Kriisi yelle n daan sūge la. La de la yel-ēja īyā ti mam bōna yu'a deem. ⁴Pu'usra-ya Nawēnne ti m tā'age tōge yel-ēja vēelga vēelga wu lan mase ti m tōge se'em na.

⁵Base-ya ti ya yel-ire āna sōja nēr-seba n ka doli Azezi la tējasuka, dike-ya fol-seka ti ya tari la wuu tōm sōja. ⁶Base-ya ti ya yetṅga āna sōja wakate wuu tara yēlum wu yaarum na, dee bāje yan wun lerge nēra woo se'em ti la mase.

⁷La sān dena mam yelle, ti sōbi-nōṅre Atisiki n de Zuudāana

tōntōnna n de sira dāana, n lagum na mam tōnna Zuudāana tōoma la, wun yele ya mam yelle wuu. ⁸Mam tōm ē ya zē'am na bela iyā, ti ya bāņe tōma yela n ān se'em, dee ti a wun keņe ya sūure. ⁹Mam tōm na ēņa, la A'onezim n ze'ele yāma zē'am, a de la ti sōbi-nōņre n de sira dāana. Ba wun yele ya bōn-seba wuu n uti kalam.

¹⁰Aristarkı n lagum na mam bōna yu'a deem na pu'usrı ya. Amarkı n de Abarnabası sōogo la mē pu'usrı ya. Mam pōn dēņe pa'ale yāma, yan wun ēņe se'em a iyā me, a sān wa'am ya zē'am, ya to'oge ē sōņa.

¹¹Azezi seka ti ba wi'iri ti Azustusi la mē pu'usrı ya. Nēr-bāna mā'a n de Zifdōma n lagum na mam tōnna Nawēnne so'olum* tōoma. Bāma n de nērba n bō mam buraane.

¹²A'epafrası n de ya nēra la pu'usra ya. Eņa n de Azezi-krisi tōntōnna la mōrgrı me pu'usra Nawēnne ya yelle ka basra ti ya ze'ele kāņkāņe, dena nērba n bı sela woo puam sake Nawēnne n boorı se'em wuu. ¹³Mam bō'urı ya a kaseto ti a mōrgrı me zozo'e yāma yelle, la Laodise dōma, la Hiyerapolisi dōma yelle. ¹⁴Ti sōbi-nōņre Aluki n de logtore, la Ademası pu'usrı ya.

¹⁵Pu'use-ya ti sōbiisi la n boe Laodise la, la Animfa, la Azezi nērba n lagsrı a yire la. ¹⁶Ya sān karēņe gōņo wā ba'ase, ya base ti ba ken karēņe ē bō Azezi nērba n boe Laodise la. La yāma mē karēņe Laodise dōma n wun bō ya gōn-seka la. ¹⁷Yele-ya Arsipi ti a bise tōon-seka ti Zuudāana bō ē na yelle sōņa, a tōm ē sōņa sōņa ba'ase.

¹⁸Mam Apolı n gulse pu'usgo wā la m mēņa nu'ugo, mam pu'usrı ya. Tēra-ya mam n boe yu'a deem na yelle.

Nawēnne yel-sōnne wun bōna la ya. \e

1TH

1 Tesaloniki

Pɔspɔsi gɔŋɔ ti Apoli gulɛ bɔ Tesaloniki dɔma

Bilgre

Tesaloniki yvun de la Masedvanɩ so'olum na-tɛŋa. Apoli ze'ele la Filipi sɛŋɛ Tesaloniki ka pɔsɛ Nawɛnnɛ tɔoma. Apoli ka yuuge Tesaloniki dee fɔrgɛ, se'ere n soe la, Zifdɔma baseba n yvun uti sũure la ɛ, ti a fɔrgɛ (Tɔoma 17:1-10).

Bɛla poorum, Apoli sɛŋɛ ka bɔna la Korɛnti, ti Atimɔti n doli la ɛ tɔnna Nawɛnnɛ tɔoma la, sɛŋɛ a zɛ'am ka yeke ɛ Nawɛnnɛ nɛrba n boe Tesaloniki la yelle n ɛn se'em. Ti Apoli gulɛ gɔŋɔ wɔ ba.

Apoli dɛŋɛ pu'ɔsɛ la Nawɛnnɛ a yel-sɔnne ba ɩyɔ, ɛn wɔm ti ba bɔ Azezi sira, dee nɔŋɛ taaba la ɩyɔ (sapitri 1).

A tɛegɛ ba la ɛŋa n tɔm ba zɛ'am se'em, dee yeti ɛŋa boori mɛ ti a lebe ba zɛ'am ka kaage ba bise (sapitri 2-3).

A bɔ ba la buraane yeti ba sɛŋɛ nɛŋa Nawɛnnɛ doosgo la puam la pupeelem (4:1-12).

Bɛla poorum, a lerge ba la sokrisi ti ba soke ɛ kũm vo'ore yelle, la Azezi n wun leme la na'am pɔŋa la yelle (4:13-5:11).

Gɔŋɔ la ba'asgɔ, a kɔ'an ba mɛ, dee pu'ɔsɛ ba (5:12-28).

Gɔŋɔ wɔ sɔŋri nɛr-sɛba wuu n fabli dũnia ba'asgɔ yelle mɛ. A pa'ali ti la mase mɛ ti Azezi nɛrba bɔ Nawɛnnɛ sira sɛŋɛ nɛŋa, tɔnna la sũ-mɔ'are gu'ura Azezi lemŋo.

Pɔspɔsi gɔŋɔ ti Apoli gulɛ bɔ

Tesaloniki dɔma

1

¹Mam Apoli, la Asilvē, la Atimōti n gulse gōṅṅ wā bɔ'ɔra yāma seba n de ti So Nawēnne, la ti Zuudāana Azezi-krisi nērba n boe Tesaloniki. Nawēnne wun ēṅe ya yel-sōnne, dee bɔ ya sū-mā'asum.

Tesaloniki dōma n bɔ Nawēnne sira se'em

²Tōma pu'usri Nawēnne me wakate wuu a yel-sōnne ya wuu iyā, dee tēra ya yelle ti pu'usgo puam ka gɔ'ɔra. ³Tōma tēri ya yelle ti So Nawēnne nēṅam, yāma n bɔ sira tōnna se'em, la yāma n tari nōṅlum tōnna zozo'e se'em, dee ken tēra yāma n tari putē'ere gu'ura sela ti ya bɔ sira, ze kāṅkāṅe ti Zuudāana Azezi-krisi doosgo puam ka bigsra la yelle. ⁴Ti sobiisi, tōma mi ti Nawēnne nōṅe ya me looge ya ti ya dena a nērba.

⁵Tōma n daan tari kō-yēlga la wa'am wa mōole bɔ ya la, la ka de yetɔga mā'a, la de la Nawēnne Sia pāṅa. La tōma daan mi ti tōma n tɔge se'em na de la sira. Yāma mi tōma n daan boe ya zē'am na, tōma n vɔa se'em yāma sōṅre iyā. ⁶La yāma uti la tōma, la ti Zuudāana n uti se'em na, la baa yāma n to'oge kō-yēlga la yē nāmsgɔ zozo'e la, ya tari ē me la sū-yēlga n ze'ele Nawēnne Sia zē'am. ⁷Bela, yāma de la seba ti Masedvanɩ, la Akayi so'olum nēr-seba n bɔ Azezi sira la wun busra, ita yāma n ēṅe se'em na. ⁸Zuudāana Azezi kō-yēlga la ze'ele la yāma zē'am saage Masedvanɩ, la Akayi, la, la dagɩ bilam mā'a, zē'esti wuu nērba wōm yāma n bɔ Nawēnne sira se'em me, ti la pōn ka le dena ti tɔge. ⁹Nērba la wuu tɔgrɩ pa'ala yāma n daan to'oge tōma sōṅa se'em, base бага, dee dɔla Nawēnne tōnna bɔ'ɔra ēṅa n de vɔm, la sira dāana, ¹⁰dee gu'ura a Dayva Azezi n wun ze'ele Nawēnne yire wa'am. La de la ēṅa n daan ki, ti Nawēnne botɩ a vo'oge, ēṅa n yetɩ a fāage tɔ Nawēnne sū-isgre n sēm na puam.

2

Apoli n daan tōm se'em Tesaloniki

¹M sɔbiisi, yāma mēŋa mi ti tōma n daan wa'am ya zē'am na, la dagi zāŋa. ²La ya ken mina ti ba daan nāmse tōma me dee tu tōma Filipi tēŋa, dee ti tōma yāŋa wa'am yāma zē'am Tesaloniki. La Nawēnne daan bɔ tōma buraane me, ti tōma mōole a kō-yēlga la bɔ ya, baa nāmsgɔ la n daan zo'oge la.

³Tōma n pa'ali pa'alg-seba la dagi tuure, bu putē'e-be'ero pa'algɔ. La tōma ka iti yemkēgsɔga pā'asra nērba. ⁴La de la Nawēnne n bise ti tōma mase ti a dike a kō-yēlga la ēŋe tōma nu'usum. Bela, tōma ka mooli ti la ēŋe nērsaalba sūure yelum, tōma mooli ti la ēŋe la Nawēnne n vēesri mina ti putē'ere n ān se'em na sūure yelum. ⁵Yāma mi sōŋa ti tōma ka dike nō-yelum pā'ase nērba, la tōma ka dike kōnkoma'asum tɔge ti ti to'oge sela, Nawēnne n de tōma kaset-dāana. ⁶Tōma ka ε pēka nērsaalba zē'am, tōma ka ε yāma zē'am, bu nērba baseba zē'am. ⁷La tōma daan tari nōore me, tōma n de Krisi Tōntōnɔba* la iyā, la tōma daan ka ēŋe bela. Tōma daan tari la sū-bugsum ya zē'am, wu pɔka n bisri a koma yelle sōŋa se'em na. ⁸Tōma n nōŋe ya la iyā, ti tōma daan mōole kō-yēlga la n ze'ele Nawēnne zē'am na bɔ ya. La, la dagi bela mā'a, tōma daan sake me ti dike ti vɔm bɔ ya, tōma nōŋe ya me halt zozo'e.

⁹M sɔbiisi, yāma tēri tōma n daan tōm nāmse se'em, tōma n daan mooli Nawēnne kō-yēlga la bɔ ya la. Tōma daan tōm na wunteŋa la yu'ɔŋɔ, tōma daan ka boori ti tōma dia yelle dena nāmsgɔ bɔ ya nēra baa ayɔla. ¹⁰Yāma mi tōma n daan boe yāma seba n bɔ sura zē'am na, tōma yel-ure n ān se'em, la Nawēnne mē mi me. Tōma yel-ure daan ān na sōŋa sōŋa, mase ti dōrga kana. ¹¹Yāma mi ti tōma daan ān wu sɔ n

ān se'em la a kōma la, yāma nēra woo īyā. ¹²Tōma keŋe ya sūure me, bɔ ya buraane, pa'ale ya yeti ya dɔla so-seka n mase Nawēnne yem, ēŋa n wi ya ti ya kē a so'olum puam po dita na'am.

¹³Tōma n daan mōole Nawēnne kō-yēlga la bɔ ya la, ya daan to'oge ē, sake ti la de la kō-yēlga n ze'ele Nawēnne zē'am, a ka ze'ele nērsaalba zē'am. Asira, la de la Nawēnne yetɔga n boe yāma seba n bɔ sira la sūure puam tōnna. Bela ti tōma pu'usra Nawēnne wakate wuu bōn-ēŋa īyā. ¹⁴M sɔbiisi, Nawēnne nēr-kuvɔŋ n dolɔ Azezi-krisi n boe Zude* tēnsɔ puam n yē nāmsgɔ seba la, yāma mē yē la nāmsgɔ bāma. Yāma buuri la n nāmsɔ yāma se'em na, Zifdōma* mē nāmse ba nēr-seba n dolɔ Azezi-krisi la bela. ¹⁵Bāma n daan ku Zuudāana Azezi, la Nawēnne nōtɔ'ɔsrɔba*, dee mē nāmse tōma. Ba uti la sela n ka ān Nawēnne sūure yēlum, ba de la nērba wuu be'eba. ¹⁶Ba gu'uri tōma me ti ti da mōole kō-yēlga la bɔ bu-zāŋsɔ* ti ba yē fāare. Bela ti ba tōnna tōon-be'ero pa'asra wakate wuu. La ba'asgɔ, Nawēnne sū-isgre boe ba zuo.

Apolɔ boori ti a sēŋe ka kaage Tesaloniki dōma

¹⁷M sɔbiisi, lan daan pērgɔ ti tōma ze'ele ya zē'am fōrgɔ wakate fēe la, ti ka le yēta taaba la nini, la tōma putē'era ken bɔna la ya le me, ti yāma sia tara tōma, ti tōma mōrgra bɔra ti ti le yē ya. ¹⁸Bela ti tōma daan bɔra ti ti leme ya zē'am. La mam mēŋa Apolɔ mōrgɔ me nōore faa ti m leme ya zē'am, ti Asūtāana* gu tōma. ¹⁹La de la yāma ti tōma tari putē'ere gu'ura, yāma n wun bɔ tōma sū-yēlga, la de la yāma n wun boti tōma yē nā'asgɔ tōma Zuudāana Azezi nēŋam a lemɔ daare. ²⁰La de la bela, yāma īyā ti tōma wun yē nā'asgɔ la sū-yēlga.

3

¹Bela ti tōma ka le tāna wun zī'ire, ti tōma tē'ese ti la ān sōṅa ti tōma mā'a bōna Atenti tēṅa, ²dee tōm ti sobia Atimōti n de Nawēnne tōntōnna n lagum na tōma mōola Krisi kō-yēlga la, ti a wa'am wa bō ya buraane, ti ya ze'ele kāṅkāṅe Azezi doosgo la puam. ³Ti nāmsgo seka n nāmsri ya la da base ti ya nēra baa ayila buraane bo'oge Nawēnne sore la doosgo puam. Yāma mēṅa mi ti la de la pēgrē ti ti nāmse. ⁴Tōma n daan boe la yāma la, tōma daan dēṅe yele ya yeti, ti wuu wun yē nāmsgo me. La ya mi ti la de la bōn-ēṅa n bela n wa'am. ⁵Bela ti mam ka tāna wun zī'ire, ti mam tōm Atimōti ti a wa'am wa bāṅe yāma n ān se'em Azezi sore doosgo la puam, mam zoti me ti Asūtāana wun pā'ase ya ti ti tōoma la lebge zāṅa.

⁶La lēele wā ti Atimōti ze'ele ya zē'am leme wa'am, a taru la kō-yēlga wa bō tōma, a pa'ale tōma la yāma n bō sira se'em, la yāma n taru nōṅlum se'em, dee yeti ya ken tē'esra tōma yelle me sōṅa sōṅa bōra ti ya yē tōma, wu tōma n boori ti ti yē yāma se'em na. ⁷Bela m sobiisi, yāma n bō sira se'em na keṅe tōma sūure me tōma toogo, la tōma nāmsgo la puam. ⁸Lēele wā, tōma le vōa la sū-yēlga, yāma n ze kāṅkāṅe Zuudāana doosgo la puam na. ⁹Tōma ka mi pu'usgo seka ti tōma wun pu'use Nawēnne ya iyā, sū-yēlga seka ti yāma bō tōma a nēṅam na iyā. ¹⁰Tōma sosri Nawēnne me la ti sūure wuu, yu'ḥṅo la wuntēṅa, ti ti tā'age le yē ya, sōṅe ya la sela n pō'oge ya Azezi doosgo la puam pa'ase.

¹¹Tōma So Nawēnne mēṅa, la ti Zuudāana Azezi-krisi wun bō to sore ti ti wa'am ya zē'am. ¹²Ti Zuudāana wun base ti ya nōṅlum taaba iyā, la ya nōṅlum nērba wuu iyā pa'asra zozo'e wu tōma n nōṅe ya se'em na. ¹³A wun bō ya buraane ti ya ze'ele kāṅkāṅe a sore la zuo

la pupeelem, ka tara dōrga ti Sɔ Nawēnne nējam, wakat-sɛka ti ti Zuudāana Azezi wun leme wa'am la a nērba wuu la.

4

Tɪn wun ita se'em ti la paage Nawēnne yem

¹Sela n pa'ase, m sɔbiisi, yāma zāsɔm tōma zē'am me yāma n wun ita se'em paage Nawēnne yem. Yāma pōn ita la bela. La tōma kā'anɪ ya mɛ, dee belna ya la ti Zuudāana Azezi yu'ure ti ya malɪn ēŋe gāŋe bela. ²Yāma mi bōn-sɛba ti tōma daan to'oge ti Zuudāana Azezi zē'am pa'ale ya ti ya ita la. ³Nawēnne n boorɪ ti ya āna se'em n wāna: Welge-ya to'ore dena pupeelem dōma, dee yōke ya mēŋa da tōnna yalsɪ tōoma. ⁴La ya nēra woo bāŋe ēŋa n wun tara a ŋyā se'em la pupeelem ti la āna sōŋa*f1*. ⁵Da base-ya ti yalsɪ tōoma yemleego tara ya, wu sɛba n ka dolɪ Nawēnne n itɪ se'em na. ⁶Yel-ēna puam, nēra da kān tōm a tadāana sela n ka ān sōŋa, bu fā sela n de a bōnɔ. Tɪ daan pōn dēŋe yele ya, dee kā'an ya mɛ, ti Zuudāana wun sɪbge sɛba n tōnnɪ tōon-be'ero bāma mɛ. ⁷Nawēnne ka looge to ti ti tōnna tōon-dēgrɔ, a looge to ti ti welge la to'ore tara pupeelem. ⁸Bela, nēr-sɛka n zagse pa'algɔ ēna, a ka zagse nērsaala, a zagse la Nawēnne n bɔ tɔ a Sɪa la.

⁹La sān dena yāma n wun nōŋe sɔbiisi se'em yelle, la ka le dena ti gulse bɔ ya. Nawēnne pōn zāsɔm yāma ya wun nōŋe taaba se'em mɛ. ¹⁰La yāma sɪrɪ nōŋe ya sɔbiisi wuu n boe Masedvanɪ so'olum wuu la bela. La tōma kā'anɪ ya mɛ ti ya malɪn ēŋe gāŋe bela pa'ase. ¹¹Mōrge ya mēŋa vɔa la sū-mā'asɔm, la ya bɪsra ya mēŋa tōoma yelle, tōnna-ya la ya mēŋa nu'usi dita, wu tōma n daan yele ya se'em na. ¹²Ita-ya bela, ti ya yel-ure la base ti ya yē nā'asgɔ nēr-sɛba n ka dolɪ Nawēnne

na zē'am. La ya da ze gu'ura ti nēra bɔ ya sɛla.

Zuudāana Azezi lemɲo

¹³M sɔbiisi, tōma boori ti ya bāɲe la sira nēr-seba n ki la yelle, ti ya sūure da sã'am wu nēr-seba n ka tari putē'ere gu'ura sɛla la. ¹⁴Tōma n bɔ sira ti Azezi ki me, dee vo'oge la, belɛ tōma ken bɔ sira me ti seba n doli Azezi dee ki la, Nawēnne wun boti ba bɔna la Azezi.

¹⁵Zuudāana zāsɲo n wāna ti tōma yeti ti pa'ali ya: Wakat-seka ti Zuudāana la lemni la, tōma seba n ken vɔa Zuudāana lemɲo daare la kãn dēɲe seba n ki la Zuudāana zē'am. ¹⁶Se'ere n soe la, nōore n wun bɔ, ti malekadōma* naba tɔge ke'enke'em, ti Nawēnne benkonne peebe, ti Zuudāana mēɲa ze'ele Nawēnne yire sige, ti seba n doli Azezi dee ki la dēɲe vo'oge. ¹⁷Ti Nawēnne lagum bāma, la tōma seba n ken vɔa la zēke sawara puam ti ti tu'vse Zuudāana la saazuum, ti ti bɔna la Zuudāana la le wakate wuu. ¹⁸Bela, keɲra-ya taaba sūure la yetɔg-bāna.

5

¹M sɔbiisi, la ka le dena ti gulse ya pa'ale wakate, la dabs-seba ti bōn-bāma wun ēɲe. ²Yāma mēɲa pōn mina sōɲa me ti Zuudāana lemɲo la daare wun āna wu nayiga n ēn wa'am yu'ɲo la. ³Nērba sãn wa yetɛ ti: < <Laafe la sū-mã'asum boe > >, wakat-ēɲa ti toogo wun wa'am di'ige ba wu pɔka virgre toogo la, la ba kãn yāɲe pōse.

⁴La yāma, m sɔbiisi, yāma dagi nērba n boe lika puam ti Zuudāana la daare wun wa di'ige ya wu nayiga la. ⁵Yāma wuu de la peelem nērba, yāma tōoma tōnni la wonteɲa. Tōma tōoma ka tōnni yu'ɲo, tōma dagi lika nērba. ⁶Bela, ti da gīsra-ya wu nērba baseba la, ti nēege-ya māasum tara ti mēɲa sōɲa. ⁷Seba n gīsri, gīsri la yu'ɲo, ti

seba n yūuri dāam bugra, bugra yu'ʊŋɔ. ⁸La tōma n de wunteɛŋa nērba la, ti tara ti mēŋa sōŋa. La ti bɔ Azezi sira, dee tara nōŋlum wu kuto fuugo ti sudaaga dɪke pī a yō'ogɔ ti la gu'ura ẽ zebre puam na. Dee base ti fāare la ti ya tari putē'ere gu'ura la, āna wu kuto zuu-wanne gu'ura ya.

⁹Nawēnne ka looge to ti a sū-isgre sā'am tɔ, a looge to ti ti yē la fāare ti Zuudāana Azezi-krisi iyā. ¹⁰Ēŋa n ki ti iyā, ti a lemŋo daare, ti sān vɔa me bu ti sān ki me, ti wun bɔna la ẽ le.

¹¹Bela, bɔ'ɔra-ya taaba buraane, sōŋra taaba ze'ele kāŋkāŋe Azezi doosgo la puam, wu yāma n pōn ita se'em na.

Kā'aŋɔ, la ba'asgo yetɔga

¹²M sɔbiisi, tōma sosri ya me ti ya nanna seba n tōnni ya tēŋasuka la, seba ti Zuudāana looge ti ba bɔna ya nēŋa pa'ala ya Azezi sore la puam, dee kā'ana ya la. ¹³Ēŋe-ya sela n pa'ali ti yāma nanni ba me, nōŋe ba zozo'e ba tōoma la iyā. Tara-ya sū-mā'asum la taaba.

¹⁴M sɔbiisi, tōma sosri ya me ti ya kā'ana seba n ka boori ti ba tōm na, dee bɔ'ɔra seba n ka tari buraane la buraane, dee sōŋra seba n ka tari pāŋa la, la ya mā'ara ya sūure la nēra woo. ¹⁵Guuse-ya ti nēra da lebse a tadāana be'em, be'em iyā, mōrgɛ-ya ita taaba sōŋa, la nērba wuu sōŋa wakate wuu.

¹⁶Tara-ya sū-yēlga daare woo. ¹⁷Pu'ʊsra-ya Nawēnne wakate wuu da base. ¹⁸Sela woo puam pu'ʊsra-ya Nawēnne a yel-sōnne. Nawēnne boori ti ya ita la bela Azezi-krisi doosgo puam. ¹⁹Da gu'ura-ya Nawēnne Sia tōoma. ²⁰Da pɔ'ɔra-ya yetɔg-seba ti nēra to'oge Nawēnne zē'am tɔgra bɔ'ɔra ya. ²¹Magra-ya sela woo bisra la ān se'em, to'oge sela n ān sōŋa. ²²Dee lɔkra-ya yel-seba wuu n de be'em.

²³Nawēnne n de sū-mā'asum dāana la mēŋa wun base ti ya dena ɛŋa

mã'a nërba tara pupeelem. A wun gu ya ñyã, la ya sia, la ya yem wuu ti ya kãn tara dõrga ti Zuudãana Azezi-krisi lemño daare. ²⁴Nawënnë n looge ya la de la sira dãana, a wun ëñe bela.

²⁵M sɔbiisi, pu'usra-ya Nawënnë bɔ'ɔra tɔ. ²⁶Pu'use-ya ti sɔbiisi la wuu la nõɲlum. ²⁷Mam sosri ya la Zuudãana yu'bre ti ya karëñe gõñɔ ãna wã ti sɔbiisi la wuu wõm.

²⁸Ti Zuudãana Azezi-krisi yel-sõnnë wun bɔna la ya. \f1 4:4 Ba ken tãna wun yeti: < <Nëra woo bãñe ãña n wun tara a pɔga se'em la pupeelem ti la ãna sõña. > > \e

2TH

2 Tesaloniki

Gõñɔ buyi dãana ti Apolɩ gulɛ bɔ Tesaloniki dõma

Bilgre

Gõn-ãna wã puam Apolɩ ken tɔgra la Azezi lemño yelle. Se'ere n soe la, Azezi lemño la yelle, Tesaloniki dõma ken ka mina bãma n wun ëñe se'em ti la doose sore. Nërba baseba daan tẽ'esë ti Azezi põn leme mɛ (2 Tesaloniki 2:2). Ti baseba mẽ daan zagse ti bãma kãn le tõm, ti Azezi lemño paage ba'ase mɛ, dee ze gu'ura ti nërba baseba bɔ ba sɛla. Bela n soe ti Apolɩ gulɛ kã'an ba.

A dẽñe yeti ãña pu'usri la Nawënnë a yel-sõnnë ban bɔ Nawënnë sira, la ban nõñe taaba la ñyã. Dee yeti ãña sosri Nawënnë mɛ ba ñyã ti a boti ba ze'ele kãñkãñe a tõoma la puam (sapitri 1).

Bela poorum, a tɔge ba la Azezi-krisi lemño la yelle, pa'alɛ ba yeti dẽni ti sɛka n de tõon-be'ero dãana n wun sã'am na wa'am, dee ti Krisi yãña leme wa'am (2:1-12).

A ken kã'an Nawënnë nërba la yeti, baa tõon-be'ero sãn põn pa'asra

zɔ'ɔra, ba mōrge ze'ele kãŋkãŋe Nawēnne sore doosgo la puam, la ba da base Nawēnne pu'usgo (2:13-3:5).

Dee kã'an zēyãgsɪ yetɪ ba tōnna bɪsra ba mēŋa yelle, wu ēŋa la nēr-seba n doose taaba tōm Nawēnne tōoma la n ēŋe se'em na (3:6-15).

Gōŋɔ la ba'asgɔ, a kã me bɔ ba, dee pu'use ba (3:16-18).

Gōŋɔ buyi dāana ti Apoli gulse bɔ

Tesaloniki dōma

1

¹Mam Apoli, la Asilvė, la Atimōti n gulse gōŋɔ wã bɔ'ɔra yãma seba n de ti Sɔ Nawēnne, la Zuudāana Azezi-krisi nērba n boe Tesaloniki.

²Tɪ Sɔ Nawēnne, la ti Zuudāana Azezi-krisi wun ēŋe ya yel-sōnne, dee bɔ ya sū-mã'asum.

Tesaloniki dōma ze la kãŋkãŋe nãmsgɔ puam

³M sobiisi, tōma mase me ti ti pu'usra Nawēnne daare woo a yel-sōnne yãma ãyã. La ãn sōŋa me ti tōma ita bela, se'ere n soe la, yãma n bɔ Azezi sira la sēnnɪ nēŋa me zozo'e, ti yãma nēra woo nōŋlum taaba ãyã pa'asra. ⁴Bela ti tōma tɔgra yãma yelle Nawēnne nērba lagsgɔ zē'a woo la sū-yēlga. Se'ere n soe la, yãma mōrge me ze kãŋkãŋe Azezi doosgo la puam ka basra, baa nērba n nãmsɪ ya, la toogo n paartɪ ya la.

⁵Bela pa'alɛ ti Nawēnne diti sariya la sira. Se'ere n soe la, yãma n nãmsɪ Nawēnne so'olum* yelle se'em wã, Nawēnne wun yetɪ ya mase ti ya kē a so'olum na puam. ⁶Nawēnne wun ēŋe sela n mase, a wun botɪ seba n nãmsɪ yãma la yē nãmsgɔ, ⁷dee base ti yãma seba n nãmsɪ la, lagum na tōma vo'ose wakat-seka ti Zuudāana Azezi wun

ze'ele Nawēnne yire wa'am, la a malekadōma* n tarı pān-kāte, ⁸la bug-zılıtı wa sıbge seba n zagse Nawēnne dee ka sake ti Zuudāana Azezi kō-yēlga la. ⁹Ba wun yē la sıbgre n de sā'anjō n ka ba'asrı. La ba wun zāage me la Zuudāana kān yē a na'am pān-kāte la, ¹⁰wakat-seka ti a wun wa'am na. Daar-ēņa, a wun wa'am me wa to'oge pēka la nā'asgō a mēņa nērba n bō ē sira la zē'am, la yāma po bōna ba puam me, yāma n sake a kō-yēlga la ti tōma tōge bō ya la iyā.

¹¹Bela iyā ti tōma pu'usra Nawēnne wakate wuu ya iyā, ti a base ti ya āna sōņa mase wu ēņa n wi ya ti ya āna se'em na. La a wun bō ya pāņa ti ya ita bōn-sōma seba wuu ti ya boori ti ya ēņe, dee base ti yāma n bō sira tōnna tōon-seba la tōm ba'ase. ¹²Bela ti ti Zuudāana Azezi yu'ure wun yē nā'asgō ya zē'am, ti yāma mē yē nā'asgō a zē'am. Bela wuu de la Nawēnne, la ti Zuudāana Azezi-krisi yel-sōnne.

2

Sela n wun ēņe dee ti Azezi wa'am

¹La sān dena ti Zuudāana Azezi-krisi lemņo, la tōma n wun wa lagse taaba a zē'am na yelle, m sōbiisi, tōma sosrı ya me ²ti ya da base ti ya yem yōra ti dabeem tara ya, ya sān wōm ti nērba yeti Zuudāana la lemņo daare paage me. Baa nēra sān yeke ya yeti la de la Nawēnne Sia n pa'ale ēņa, bu a sān yeti tōma n tōge, bu a sān yeti tōma n gulse gōņo, da kān sake-ya. ³Da base-ya ti nēra pā'ase ya, baa lan de se'em wuu. Lan dēņe daar-ēņa n wun wa'am, dēni ti nērba zozo'e isge tulge zebra la Nawēnne, ti nēr-seka n de tōon-be'ero dāana la wun wa'am wa puke a mēņa, ēņa n de nēr-seka n wun sā'am. ⁴A wun sise bōn-seba wuu ti nērba nā'asrı, dee yeti ba de la wēnne, a wun zēke a mēņa me gānna bōn-bāma wuu. Halı, a wun pōn sēņe ka kē la

Nawēnne deego la puam zĩ'ire yeti ēŋa de la Nawēnne.

⁵Mam n daan ken bɔna yāma zē'am na, mam daan yeŋe ya bela wuu mɛ. Yāma ka tēri? ⁶La yāma mi ti sɛla n boe gu'ura ti tōon-be'ero dāana la nān ka puke, halɪ ti wakate la wun wa paage. ⁷Tōon-be'ero pāŋa n sʊge pōn tōnna mɛ. La sɛka n nān gu'uri ē na, wun wa fōrge mɛ dee base folle. ⁸Bela ti tōon-be'ero dāana la yāŋa wun puke. La tōma Zuudāana Azezi n wun leme wa'am ti a nōore sapebsum ku ē. La a lemŋo la na'am pāŋa wun sā'am a pāŋa fasi. ⁹La sān dena tōon-be'ero dāana la n wun wa'am na, a wun tara la Asūtāana* pāŋa ita bōn-yālma la yel-kursɪ, la yɛla buuri zozo'e n de pā'asgɔ. ¹⁰A wun tōm na be'em buuri to'oto'ore pā'ase nēr-sɛba n wun yē sā'aŋɔ la, ban zagse ka nōŋe sira to'oge ē wun yē fāare la iyā. ¹¹Ban ka sake sira la, ti Nawēnne base ti ba putē'era botɪ ba tuuge sake pōmpɔrŋɔ. ¹²Bela ti nēr-sɛba wuu n ka sake sira, dee bɔɔra tōon-be'ero la wun yē sariyadia n de sā'aŋɔ.

Nawēnne looge ya ti ya yē la fāare

¹³La ān sōŋa ti tōma pu'usra Nawēnne a yel-sōnne wakate wuu yāma n de ti sɔbiisi ti ti Zuudāana nōŋe la iyā. Se'ere n soe la, Nawēnne looge ya la halɪ pɔspɔsɪ, ti a Sia botɪ ya dena a nērba tara pupeelem, dee sake sira yē fāare. ¹⁴La de la bela iyā ti Nawēnne doose la tōma kō-yēlga la wi ya ti ya po yē ti Zuudāana Azezi-krisi na'am pāŋa la. ¹⁵Bela, m sɔbiisi, mōrge-ya ze kāŋkāŋe, tara yel-sɛba ti tōma zāsum ya, bu gulse gōŋɔ bɔ ya la. ¹⁶Tōma pu'usrɪ ti Zuudāana Azezi-krisi, la ti Sɔ Nawēnne n nōŋe tɔ dee ēŋe ti yel-sōnne bɔ tɔ buraane n ka ba'asrɪ, dee botɪ ti tara putē'ere gu'ura bōn-sōma seba ti ti sake la. ¹⁷A wun keŋe ya sūure, dee bɔ ya pāŋa ti ya ēŋe sɛla wuu n ān sōŋa, la ya tɔge sɛla n ān sōŋa.

3

Pu'use-ya Nawēnne bɔ tɔ

¹Sela n deege, m sɔbiisi, sose-ya Nawēnne bɔ tɔ, ti ti Zuudāana kō-yēlga la ken saage pa'ase dee ti nērba pēgra ē, wu la ān se'em yāma zē'am na. ²Ken sose-ya ē ti a fāage tɔ la nēr-wēensi, la nēr-be'esi, se'ere n soe la, la dagi nērba wuu n sake Nawēnne kō-yēlga la.

³La Zuudāana la de la sira dāana, a won boti ya ze'ele kǎŋkǎŋe, dee gu'ura ya ti be'em dāana la da yǎŋe ya. ⁴Zuudāana la iyā tōma bɔ yāma sira me, tōma mi ti ya uti la tōma n ye'le ya se'em na, la ya won ken ita la bela.

⁵Zuudāana la won base ti ya tara Nawēnne nōŋlum, dee mōrge ze kǎŋkǎŋe wu Kriisi la.

Kǎ'aŋɔ zēyǎgsi iyā

⁶M sɔbiisi, tōma yeti ya la Zuudāana Azezi-kriisi yu'ure ti ya zāage ya mēŋa la sɔbiisi seba wuu n de zēyǎgsi vɔa yooryooro ka dɔla pa'algo seba ti tōma pa'ale ya la. ⁷Yāma mēŋa mi sōŋa ti la mase me ti ya ita tōma n daan uti se'em na. Tōma n daan boe ya zē'am na, tōma daan ka tari zēyǎgre, ⁸la tōma ka diti nēra dia zǎŋa, tōma daan tōnni na wunteŋa la yu'ɔŋɔ nāmsra zozo'e ka bɔra ti tōma dia yelle dena nāmsgɔ bɔ ya nēra baa ayula. ⁹Tōma n daan uti bela la, la dagi ti tōma ka tari la sore ti ti sose sōŋre ya zē'am, tōma daan tōnni ti pa'ale ya, ti ya mē ita la bela. ¹⁰Tōma n daan boe ya zē'am na, tōma daan ye'le ya yeti: < <Seka n ka boori ti a tōm, a da di.> > ¹¹La tōma wōm ti nērba baseba n boe ya zē'am dena zēyǎgsi vɔa yooryooro, dee kē'era nērba yela pvam. ¹²Tōma yeti nēr-bāma me, dee kǎ'ana ba la Zuudāana Azezi-kriisi yu'ure ti ba yōke ba mēŋa

mōrge tōm bise ba mēṅa yelle.

¹³La sãn dena yãma, m sɔbiisi, da kãn targɛ-ya la tōon-sōma urgɔ.

¹⁴Nēra sãn ka sake bōn-seba ti tōma yele ya gōṅɔ wã puam na, ya bãṅe a dãana lɔkra ẽ, ti yãnne yōke ẽ. ¹⁵La ya da dɔke ẽ ti a lebge ya be, kã'an ya ẽ wu ya sɔbia.

Ba'asgɔ yetɔga

¹⁶Zuudãana mēṅa n de sũ-mã'asum dãana la wun bɔ ya sũ-mã'asum wakate woo la sela woo puam. Zuudãana wun bɔna la ya wuu.

¹⁷Mam Apoli n gulse pu'usgɔ wã la m mēṅa nu'ugo, mam pu'usri ya. Mam gulsri la wãna m gōnno wuu puam, pa'ala ti la de la mam n gulse.

¹⁸Ti Zuudãana Azezi-krisi yel-sōnne wun bɔna la ya wuu. [\e](#)

1TI

1 Timōti

Pɔspɔsi gōṅɔ ti Apoli gulse bɔ Atimōti

Bilgre

Atimōti ma de la Zifu n bɔ Azezi sira, dee ti a sɔ dena Grɛki. La de la Apoli sore sēnne buyi dãana ti a tu'use Atimōti Listri (Tōoma gōṅɔ 16:1-3). La daan pɔse la bilam ti Atimōti dɔla Apoli tōnna Nawēnne tōoma (Tōoma gōṅɔ 17:14, 18:5, 19:22).

Apoli gulse la gōnno bayi bɔ Atimōti. Gōn-bãma bayi, la Atiti gōṅɔ puam, a kã'anɩ la Azezi nērba nēṅadōma.

Pɔspɔsi gōṅɔ ti a gulse bɔ Atimōti wã puam, a tɔge la bōna batã yelle:

A kã'an na Azezi nērba yeti ba guuse ba mēṅa la pōmpɔrṅɔ

zāsŋɔ. Pōmpɔrŋɔ zāsŋɔ la pa'ale ti dūnia zuo bōna de la bōn-be'ero, nēra ka tā wun yē fāare ti la sān dagna ti a dāana tarɪ la yela n sугe bāŋre ti nērba baseba ka mi. Ba ken yetā nērba ti ba guuse ba mēŋa da dita dia baseba, la ba da dita pɔgsɪ. Bēla de la pōmpɔrŋɔ.

Buyi, a pa'ale la Azezi nērba la pu'usgɔ sɔa n wun dɔla se'em, la Azezi nērba, la ba nēŋadōma, la ba yel-bɪsrɪba n masɛ ti ba āna se'em.

Butā, a pa'ale la Atimōti mēŋa, ēŋa n wun ēŋe se'em tara nērba buuri to'oto'ore n boe Wēndeego la puam, ti a wun tāna tōnna Nawēnne tōoma sōŋa.

Pɔspɔsɪ gōŋɔ ti Apoli gulɛ bɔ

Atimōti

1

¹Mam Apoli n de Azezi-krisi Tōntōnna* n gulɛ gōŋɔ wā. La de la Nawēnne n de ti Fāagra, la Azezi-krisi ti ti tarɪ putē'ere gu'ura la, n bɔ mam nōore ti mam dena a Tōntōnna. ²Mam gulɛ gōŋɔ wā bɔ'ɔra la Atimōti n lebge mam mēŋa bia Azezi-krisi doosgo la puam. Ti Sɔ Nawēnne, la ti Zuudāana Azezi-krisi wun ēŋe fu yel-sōnne, dee zoe fu ninbāalga, dee bɔ fɔ sū-mā'asum.

Seba n zāsni pōmpɔrŋɔ zāsŋɔ

³Mam n daan we'esɪ Masedvanɪ dee yeke fu se'em na, ken weege Efɛɛzi tēŋa yeke nēr-seba n zāsni pōmpɔrŋɔ zāsŋɔ la ti ba da zāsum.

⁴Yeke ba ti ba base kurum kurum dōma solma, la yaabdōma deto kāalgɔ n ka tarɪ ba'asgɔ. Bōn-bāma tarɪ la nōke'ene sēna, dee ka

sõnra ti Nawēnne tōoma sēnna nēŋa. Nērba n bɔ Nawēnne sira n boti a tōoma la sēnna nēŋa. ⁵Mam yeti fu yele ba bela, ti ba tara la putē'ere n ān sõŋa, dee bāŋe ba sūure puam ti ba ka tari dōrga, dee bɔ Nawēnne sira la ba sūure wuu ti ba nōŋlum zo'oge. ⁶La nērba baseba base bōn-bāma me, dee tɔgra yetɔg-yaalsi, ⁷bɔɔra ti ba dena Nawēnne lɔɔ* karēnsāandōma, dee ka wōnna ba mēŋa n yeti se'em, bu yel-seba ti ba zāsni na vōore.

⁸Ti mi ti Amoyisi lɔɔ ān sõŋa, ba sān dīke ē tōm wu lan mase se'em. ⁹Tōma mi ti lɔɔ la ka ēŋe seba n mase la īyā, a ēŋe la nēr-seba n ka sakri lɔɔ, la seba n ka sakri nōore la īyā, la seba toogo n ka boe la Nawēnne, la tōon-be'ero dōma, la nēr-seba n pɔ'ɔri Nawēnne dee ka nanna bōn-seba wuu n de Nawēnne bōnɔ, la seba n kuvri ba sɔdōma, la ba madōma, la seba n de nēr-kuvriba īyā, ¹⁰la seba n uti yalsi, la bura-seba n gā la taaba, la pɔg-seba n gā la taaba, la seba n yōgru nērba kɔɔsra, la pōmpɔrndōma, la seba n pɔti dee ka ita ban yele se'em na, la nēr-seba n uti sɛla woo n s'isri sira kō-yēlga la īyā. ¹¹Kō-yēlga ēŋa ze'ele la sū-yēlga dāana Nawēnne n tari na'am pāŋa la zē'am, ēŋa n dīke ē ēŋe mam nu'usum ti m mōole.

Apoli pu'usri Nawēnne a yel-sōnne

¹²Mam pu'usri ti Zuudāana Azezi-krisi n bɔ mam pāŋa, la ēn bāŋe ti mam de sira dāana looge mam ti m tōm a tōone wā. ¹³Baa mam n daan pɔ'ɔri a yu'vre, nāmsra a nērba, dee tvura ē na, a zoe mam ninbāalga me. Se'ere n soe la, mam daan ka bāŋe mam uti sɛla, mam n daan ka bɔ Azezi sira la īyā ti mam ita bela. ¹⁴Ti Zuudāana Azezi-krisi la ēŋe mam a yel-sōnne me zozo'e, boti mam bɔ ē sira, dee tara a nōŋlum. ¹⁵Yetɔg-sɛka ti mam yeti m tɔge wā de la sira, la a mase me ti nēra woo to'oge ē sõŋa:

< < Azezi-krisi wa'am dūnia zuo
wa fāage la tōon-be'ero dōma. > >

La mam n de tōon-be'ero dāana gāna ba wuu. ¹⁶La ěn zoe mam ninbāalga la, la de la Azezi-krisi n pa'ale a sū-mā'are zozo'e la mam n de tōon-be'ero dāana gāna la, ti la wun dena makre pa'ale nēr-seba n wun wa bɔ ě sira la, ti a wun ěŋe a sū-mā'asum la ba, dee bɔ ba vom n ka ba'asri.

¹⁷Nawēnne n de naba wakate wuu, n ka kiiri, ti nini ka yēta ě, ěŋa ayula mā'a sɔna pēka la nā'asgɔ wakate n ka ba'asri. Amina.

¹⁸M bia Atimōti, mam zāsŋɔ n wāna ti mam dīke ita fu nu'usum, wu ban daan to'oge Nawēnne yetɔga tɔge fu yelle se'em na: Base ti yetɔg-bāma bɔ fu pāŋa, ti fu zebe zebre sōŋa, ¹⁹ken bɔ Nawēnne sira, dee ita sela ti fu mi fu sūure puam ti la ān sōŋa. Nērba baseba zagse bela me, ti bōn-ěŋa base ti ba ka le dɔla Azezi sore. ²⁰Nēr-bāma puam, Ahimēni, la Aleksāndri n daan boe mī, ti mam daan base ba la Asūtāana* ti ba yōge yem, da le pɔ'ɔra Nawēnne.

2

Pu'usgɔ nērba wuu ĩyā

¹Mam yeti ya me lan gānni wuu, ti ya sɔsra dee kā'ara Nawēnne, dee pu'usra ě a yel-sōnne nērba wuu ĩyā. ²Sɔsra-ya Nawēnne bɔ'ɔra na'adōma, la seba wuu n tari ke'eŋo, ti ti tā'age vɔa la laafe, ti dāaŋɔ da bɔna, ti ti tā'age dɔla Nawēnne sore sōŋa, ti ti yel-ire āna sōŋa.

³Bōn-ěna n ān sōŋa bɔ Nawēnne n de ti Fāagra dee āna a sūure yēlum. ⁴ěŋa n boori ti nērba wuu yē fāare, dee bāŋe sela n de sira.

⁵Nawēnne ayula mā'a n boe, la nēra ayula mā'a n mē boe nērba la Nawēnne tēŋasvka naara ba taaba, ěŋa de la Azezi-krisi n lebge

nērsaala la. ⁶La de la ēṅa n dīke a wɔm yɔ to'oge nērba wuu base, bela de la kaseto n pa'ale ti Nawēnne n boori ti a fāage nērba wuu, a pa'ale bela la wakat-seka ti a looge la. ⁷Bela ti Nawēnne daan looge mam ti m dena Azezi Tōntōnna* dīke yel-ēna wā mōole, dee zāsum bu-zāṅsi* Nawēnne sira ti ba bɔ ē sira. Mam tɔgrɪ la sira, mam ka parni.

⁸Bela mam boori ti zē'a woo buraasi pu'usra Nawēnne, ba zēke ba nu'usi la pupeelem pu'usra Nawēnne, ba da tara sū-isgre bu nōke'ene. ⁹Pɔgsɪ mē yeera futo wu lan mase, ti la da dena pa'al-m-mēṅa bu yānne. Ba da eera ti ba nēnnōm dena zuto lva, bu sālma lɔgrɔ, bu kug-sōma* lɔgrɔ, la futo ligri n zo'oge yea. ¹⁰Ba base ti ba yel-ire āna sōṅa wu pɔgsɪ n nanni Nawēnne n mase ti ba ita se'em. ¹¹La mase ti zāsṅɔ wakate pɔgsɪ āna sīm, dee sakra nōore. ¹²Mam ka bɔ pɔgsɪ nōore ti ba zāsna, bu ba sɔna buraasi, ba āna sīm. ¹³La de la Adam* ti Nawēnne daan dēṅe nāam, dee yāṅa nāam Awa. ¹⁴La, la dagɪ Adam ti Asūtāana* daan pā'ase, a daan pā'ase la Awa yāṅe, ti a si'ise Nawēnne nōore. ¹⁵La baa pɔgsɪ n nāmsɪrɪ dee dɔgra la, ba tā wun yē fāare, ba sān mōrgē ze'ele kāṅkāṅe Nawēnne doosgo puam, tara nōṅlum la pupeelem, dee guusra ba mēṅa.

3

Sēba n boe Nawēnne nērba nēṅa n wun āna se'em

¹Yetɔg-ēna ti mam yetɪ m tɔge wā de la sira, nēra sān bɔɔra ti a dena Nawēnne nērba nēṅadāana, la de la tōon-sōṅɔ ti a boori ti a tōm. ²La dēni ti nēṅadāana dena nēra n ka tari dōrga, la a dena pɔg-yēṅa dāana, la a dena nēra n tari a mēṅa sōṅa, dee tara putē'e-sōṅɔ, a dena nēra ti ba nanni, la a dena nēra n uti nērba sāanɔ, dee tāna wun

zāsum nērba. ³A da dena nēra n dīke a mēṅa bɔ dāam, a da dena zēbzebra, a dena sū-bugsum dāana, da nōṅe girigiri, la a da nōṅe bōnɔ. ⁴A dena nēra n bīsrɪ a yir-dōma yelle sōṅa, tɪ a kɔma sakra a yetɔga, nā'asra ẽ sela woo puam. ⁵Nēra sān ka tāna bīsra a mēṅa yir-dōma yelle, a wun ẽṅe la wāne bīse Nawēnne nērba yelle? ⁶A da dena nēr-paalga Azezi sore la puam, tɪ a da zēke a mēṅa tɪ ba wa di a sariya wu Asūtāana* la. ⁷La dēnɪ tɪ nēr-seba n ka dolɪ Nawēnne mē tɔgra a yelle yetɪ a de la nēr-sōṅɔ. Tɪ ba da wa pɔ'ɔge ẽ, tɪ yānne yōke ẽ tɪ a lui Asūtāana bērgɔ puam.

⁸Yel-bīsrɪba mē mase mɛ tɪ ba dena nērba tɪ ba nannɪ, ba da dena nērba n tarɪ nōgōla, ba da yūura dāam bugra, ba da dena nērba n utɪ sela n ka mase yēta bōntarsōm. ⁹Ba dena nērba n tarɪ Nawēnne sira n daan sɔge, tɪ a puke pa'ale tɪ la, utɪ sela woo tɪ ba mi ba sūure puam tɪ la mase mɛ. ¹⁰Dēnɪ tɪ ba dēṅe make ba bīse, ba sān ka tara dōrga, tɪ ba yāṅa tōm yel-bīsrɪba tōoma la.

¹¹La ba pɔgba*f1* mē mase tɪ ba dena la nērba tɪ ba nannɪ, ba da dena nērba n tɔgrɪ nērba be'em, ba tara ba mēṅa sōṅa, dee dena sira dōma sela woo puam.

¹²Dēnɪ tɪ yel-bīsra dena pɔg-yēṅa dāana, dee tāna bīsra a kɔma, la a yir-dōma yelle sōṅa. ¹³Yel-bīsrɪba seba n tōnnɪ ba tōoma sōṅa yēti nā'asgɔ mɛ, la ba wun yē buraane zozo'e Azezi-krisi doosgo puam.

Bōn-kāte seka tɪ Nawēnne pa'ale tōma

¹⁴Mam tarɪ pɔtē'ere tɪ la kān yuuge dee tɪ mam wa'am fu zē'am, la mam gulse wāna bɔ'ɔra fɔ, ¹⁵tɪ mam sān yuuge, fu tā'age bāṅe nēra n wun āna se'em Nawēnne nērba tēṅasuka, nēr-seba n de vɔm dāana Nawēnne mēṅa nērba n tarɪ Nawēnne sira wu zēere n sōṅrɪ deego se'em na. ¹⁶Tɪ wuu mi tɪ Nawēnne sira n daan sɔge tɪ a dīke pa'ale tɔ

a doosgo puam na, de la bõn-kãte. Bõn-kãte ãña de la:

Krisi n daan lebge nãrsaala.

Ti Nawẽnne Sia pa'ale ti a de la sira dãana.

Ti malekadõma* bise ã.

Ti ba mõole a yelle buuri wuu tẽñasuka.

Ti nãrba bõ ã sira.

Ti Nawẽnne zẽke ã la na'am pãña sẽnje a yire.

4

Põmpõrõjo zãsjõ yelle

¹Nawẽnne Sia tõge me vëelga vëelga yeti, dũnia ba'asgõ wakate, nãrba baseba wun base Nawẽnne sore doosgo, dee dõla sela n de pã'asgõ, la kulã'arsi* põmpõrõjo zãsjõ. ²Ba de la põmpõrndõma, la pulibsum dõma, ti ba zãsna põmpõrõjo dee ti ba zuto ka zẽera. ³Nãrbãma zãsni nãrba yeti, põgsi da ulla sãrba, ti buraasi mẽ da dita põgba, la ba sira dia baseba da dita. La de la põmpõrõjo, Nawẽnne nãam bõn-bãma ti nãr-seba n sake ãña mina sira la pu'usra ã a yel-sõnne dee dita ba. ⁴Se'ere n soe la, sela woo ti Nawẽnne nãam ãn sõña me. Sela sela ka boe n de fu zagse, fu sãn pu'use Nawẽnne a yel-sõnne. ⁵Nawẽnne yetõga, la pu'usgõ n basri ti sela woo ãna sõña Nawẽnne zẽ'am.

Azezi tõntõn-sõnjõ

⁶Pa'ale sõbiisi la bela, ti fu wun dena Azezi-krisi tõntõn-sõnjõ, n to'oge Nawẽnne yetõga ti fu bõ sira la, ti a pa'asra fu pãña, dee dõla zãsjõ n de sira la sõña. ⁷Zãage fu mẽña la solma n ka tari võore, dee keje fu mẽña dõla Nawẽnne sõña. ⁸Nãra n uti se'em wisgra a ãyã la tari yõorõ la fẽe, la a sãn dõla Nawẽnne sõña, la tari yõorõ me sela

woo puam, ẽja n sõjri tõma vòm seka ti ti tari læele wã puam, dee wun bɔ tɔ vòm n ka ba'asri. ⁹Yetɔg-ẽna de la sira, la a mase me ti nẽra woo to'oge ẽ. ¹⁰Bela, tõma n tõnni nãmsra mõrga la, la de la tõma n tari putẽ'ere gu'ura vòm dãana Nawẽnne n de nẽrsaalba wuu Fãagra la ãyã, la a de la seba n bɔ ẽ sira la Fãagra gãna.

¹¹Pa'ale ba, dee zãsum ba bõn-bãna. ¹²Da base ti nẽra zeen fɔ, fõn de bõnbu'a la ãyã, base ti fu yetɔga, la fu yel-urɛ, la fu nõnjum, la fõn bɔ Nawẽnne sira se'em, la fu pupelem ãna sõja, ti la pa'ale Nawẽnne nẽrba, bãma n wun vɔa se'em. ¹³Mõrgɛ karẽjra Nawẽnne gõjɔ pa'ala nẽrba, bɔ'ɔra ba buraane, dee zãsna ba halɩ ti m wa wa'am. ¹⁴Da base bɔ'a la ti Nawẽnne bɔ fɔ, ti ba daan to'oge Nawẽnne yetɔga tɔge a yelle, ti kẽma la daan dɩke nu'usi pagɛ fu zuo pu'use bɔ fu la. ¹⁵Tõm tõon-bãna sõja, dɩke fu mẽja bɔ tõoma la, ti nẽrba wuu wun yẽ fõn senni mẽja se'em.

¹⁶Guuse fu mẽja la fu vòm, la fu zãjɔ la. Mõrgɛ ze'ele kãnkãje ita bela wuu. Fu sãn ita bela, ti fu wun fãage fu mẽja, la seba n selsri fu la.

5

Fõn wun kã'an Nawẽnne nẽrba se'em

¹Bura-yã'aja sãn ẽje sela, da tãse ẽ, kã'an ẽ wu fu sɔ la. Kã'an kɔmbɩ'ɩstɩ wu fu sɔbiisi la, ²la fu kã'an pɔg-yã'asɩ wu fu madõma la, dee kã'an pug-sarsɩ wu fu tãpa la, la pupelem.

Pɔkõpa yelle

³Nanna pɔkõpa seba n boe ba yla mã'a la, dee sõjra ba. ⁴Pɔkõore sãn tara kɔma bu yusɩ, bãma n mase ti ba bɩsra ba mẽja yir-dõma yelle, ba bɩsra ba dɔgrɩba la yelle wu ba dɔgrɩba la n daan bɩsri ba

yelle se'em na, bela n ãn Nawēnne sūure yēlum. ⁵Pɔkō-seka n boe ayula mā'a ka tara nēra nēra la, a te'lege la Nawēnne pu'usra sɔsra wuntɛɛŋa la yu'ɔŋɔ. ⁶La pɔkōore seka n eeri tōnna a yem n boori se'em, ɛŋa pōn ki me baa la ɛn ken vɔa la. ⁷Kā'an ba bela, ti nēra da zerge ba. ⁸Nēra sãn ka bɪsra a yir-dōma yelle, lan gãnni a dee-dōma yelle, ɛŋa dāana zagse sela ti ti bɔ sira la me, la a de la tōon-be'ero dāana gãnna seka n ka doli Nawēnne na.

⁹Pɔkō-seka ti ba tā wun gulse a yu'ure pa'ase pɔkōpa gōŋɔ puam de la pɔkō-seka n paage yuuma pisyoobi, dee ele sira ayula mā'a. ¹⁰La dēni ti nērba mina ti a de la tōon-sōma dāana, la a uge kɔma sōŋa, la a de la nēra n ɛŋe nērba sãanɔ, la a peege Nawēnne nērba nãma, la a sōŋe nēr-seba n nãmse, dee dena nēra n tōm tōon-sōma buuri wuu.

¹¹La sãn dena pɔkō-seba n ka kurge la, da gulse ba yu'ura pɔkōpa la puam, se'ere n soe la, ba yem sãn wa bɔna buraasi puam, ba wun base Krisi tōoma me, dee bɔra ti ba ele. ¹²La bela wun dena la tuure bɔ ba, ban sã'am ba nōore la ti ba dēŋe bĩŋe la ãyã. ¹³Sela n pa'ase, ba sãn gulse ba, ba wun lebge la zēyãgsi ɛera kaara yiɛ, la, la dagi bela mā'a, ba wun lebge la yetɔg-tɔgsrɪba kē'era nērba yela puam, dee tɔgra yetɔg-seba n ka nari ba tɔge. ¹⁴Bela, mam boori ti pɔkō-seba n ka kurge la le ele dɔge kɔma, bɪsra ba yir-dōma yelle, da base ti be'eba yē folle tɔge ti be'em. ¹⁵Se'ere n soe la, pɔkōpa baseba pōn wērgɛ me base Nawēnne sore dee dɔla Asūtãana*.

¹⁶Nēra n bɔ Azezi sira sãn tara pɔkōpa a yire, a bɪsra ba yelle, a da dɪke ba yelle base Nawēnne nērba zuo, ti Nawēnne nērba la tā'age sōŋe pɔkō-seba n ka tari nēra nēra la.

Nawēnne nērba kēma yelle

¹⁷Wēndeego nērba kēma sãn bɪsri nērba la yelle sōŋa, lan gãnni

wuu, seba n mōrgri mōola dee zāsna Nawēnne yetɔga la, ba wun yē la nā'asgɔ buyi. ¹⁸La gulse Nawēnne gōŋɔ puam yeti: <<Da ēŋe lolga n tōnni si puam nōore yuka >>, dee ken yeti: <<La mase ti tōntōnna to'oge a yɔɔɔ. >>

¹⁹Nēra sãn dōre kēma yeti a tōm na tōon-be'ero, da selse ē, sãn dagna nērba bayi bu batã n de kaset-dōma. ²⁰La kēma sãn tōm tōon-be'ero, fu kã'an ē Wēndeego la puam nērba wuu nēŋam, ti nērba baseba la zoe dabeem. ²¹Mam yeti fu la Nawēnne, la Azezi-krisi, la malekadōma* nēŋam yeti, fu doose pa'algo bāna wã la sira, da bokra nērba.

²²Da kãble dıke fu nu'usi pagle nēra zuo ti a tōm Nawēnne tōoma, da naage la nēra a tōon-be'ero puam, dena pupeelem dāana.

²³Da le yūura ko'om mǎ'a, yūura vē* fēe fu puur-dōoma, la fu iyã n ka tarti pãŋa la iyã.

²⁴Nērba baseba tōon-be'ero puke me lan dēŋe ba wun di ba sarıya. La nērba baseba tōon-be'ero nãn ka puke, dee wun wa puke me.

²⁵Bela mẽ, tōon-sōma baseba puke me, la seba n sugɛ la ka tã wun sugɛ ka puke.

6

La mase me ti sake zuudãandōma

¹Nēr-seba n de yamsi la, dēnti ti ba nanna ba zuudãandōma sōŋa, ti nēra da pɔ'oge Nawēnne yv'ure, la ti zāsŋɔ la. ²La yam-seba zuudãandōma n bɔ Azezi sira la, la ka mase ti ba ka nanna ba yeti bāma de la sɔbiisi. La de la ba tōn malun tōnna bɔ'ora ba gãnna bela, se'ere n soe la, seba ti ya tōnni bɔ'ora la, de la nērba n bɔ Azezi sira dee ti Nawēnne nōŋe ba.

Põmpõrõjõ zãsnõ, la ligri nõjõlum

La de la bõn-bãna ti fu won zãsum ba, dee kã'an ba ti ba ita. ³Nëra sãn zãsum zãsnõ ayëma ka dõla tõma Zuudãana Azezi-krisi sira yetõga, bu ka dõla zãsnõ seka n pa'alı ti won ãna se'em Nawënnë sore doosgo puam na, ⁴a tarı la pa'al-m-mëña zo'oge dee ka mina sela sela, la a nõñe la yetõg-yaalsı la nõke'ene wë'a. Bõn-bãma n sëm na ita sũure la tadãana bõnõ, la a ka wõm taaba, la yu'ur-sã'añõ, la tẽ'esë be'em bõ'õra nërba, ⁵ti ba wë'era nõke'ene n ka ba'asrı la taaba, ban tarı yem be'ero dee ka tara yel-sıra, dee tẽ'esra ti Nawënnë sore doosgo la de la sela n won base ti ba yë bõntarsõm na ãyã.

⁶La de la sira ti nëra n doli Nawënnë sore sãn tara sũ-yëlum la sela ti a tarı la, a yetı yõorõ zozo'e me. ⁷Tı ka tarı sela sela wa'am dũnia zuo, la ti mē kãn tã'age tarı sela sela dũnia wã zuo fõrge. ⁸Bela, ti sãn tara dia la futo, la seke me. ⁹La seba n boori ti ba yë bõntarsõm na kē'erı la yela puam, luta Asütãana* bērgõ puam. Ba boori la bõnõ zozo'e n de yalne la be'em, bõn-bãma n kē'esrı nërsaalba wõñre la sã'añõ puam. ¹⁰Se'ere n soe la, ligri nõjõlum de la tõon-be'ero wuu yëgre. Nërba baseba nõñe la ligri burge dee base Nawënnë sore, nãmse ba mëña la toogo buuri zozo'e.

¹¹La fõn de Nawënnë nëra la, zãage fu mëña la bõn-bãma, dee ε sela n mase, la Nawënnë sakre, ken bõ ã sira, ε nõjõlum, la sũ-mã'are, la sũ-bugsum. ¹²Mõrge mē mëere sõña Nawënnë sore doosgo la puam yë võm n ka ba'asrı, ti la de la bela ãyã ti Nawënnë looge fo, ti fu daan tõge yetõg-sõñõ yetı fõn bõ Azezi sira nërba zozo'e nëñam na.

¹³Mam yetı fo Nawënnë n bõ'õrı sela woo võm nëñam, la Azezi-krisi n daan tõge sira kaseto Apõnsı-pilatı nëñam na, ¹⁴yetı fu sake pa'algo ti fu to'oge la, gure ba sõña la pupeelem, ti dõrga kana, halı ka paage ti Zuudãana Azezi-krisi lemño.

¹⁵Nawēnne wun boti a leme wa'am na wakat-seka ti a looge la. Sū-yēlga dāana Nawēnne ayila mā'a n de na-kāte, a de la na'adōma Naba, la zuudāandōma Zuudāana. ¹⁶Ēṅa mā'a n vɔa wakate wuu, a boe la peelem n nēege gāṅe puam ti nēra ka tāna wun paage mī, nēra baa ayila ken ka yē ē, la nēra nān ka yēti ē. Ēṅa n soe nā'asgɔ, la pāṅa n ka ba'asri. Amina.

¹⁷Kā'an nēr-seba n tari dūnia wā bōntarsōm na yeti, ba da zēkra ba mēṅa, la ba da dīke ba te'ere te'ege bōntarsōm ti ba ka mī ban wun āna se'em, ba te'ege Nawēnne, ti ēṅa n bɔ'ɔri tɔ sela woo ti la sekra sōṅa sōṅa ti ti ita sū-yēlga. ¹⁸Kā'an ba yeti, ba ita sōṅa, ba dena nērba n tōnni tōon-sōma zozo'e, la ba dena nērba n bɔ'ɔri, dee puta sela ti ba tari bɔ'ɔra nērba la sū-yēlga. ¹⁹Bela ti ba wun lagse bōntarsōm n ān sōṅa kān sā'am wakate n sēm na iyā, ti ba wun yē vɔm mēṅa mēṅa.

²⁰Fōn Atimōti, bɔsra sela ti Nawēnne dīke gu'ule fo la, mōrge zāage fu mēṅa la yetɔg-yooro n ka doli Nawēnne sore, zāage fu mēṅa la nōke'ene wē'a ti nērba tē'esri ti la de la bāṅre dee ti la dagna bela la.

²¹La nērba baseba tari la bōn-bāma tē'ese ti bāma tari la bāṅre, burge dee base Nawēnne sore.

Nawēnne wun ēṅe ya a yel-sōnne. \f1 3:11 Ba tā dena pɔgsi n de yel-bɔsriɔba. \e

2TI

2 Timōti

Gõṅɔ buyi dāana ti Apoli gulse bɔ Atimōti

Bilgre

Wakat-seka ti Apoli gulse gōn-ēna wā bɔ Atimōti la, a boe la yu'a deem Rom. La daan tɔ me zozo'e bɔ ē (2 Timōti 2:9), la nēra nēra ka

boe n wun sōŋe ē (2 Timōti 4:16).

Apoli daan tē'ese ti ēŋa vɔm lem na ba'asgɔ, bela ti a gulse bɔ Atimōti n de a tōntōn-tadāana ti a nōŋe wu a mēŋa bia la, tɔge a ba'asgɔ yetɔga bɔ ē.

Apoli dēŋe pu'use la Nawēnne a yel-sōnne Atimōti īyā, dee kā'an ē yeti, baa nērba sān nāmsra ē Nawēnne tōoma la īyā, a mōrge ze kāŋkāŋe wu Azezi suda-sōŋɔ (1:1-2:13).

Apoli kā'an ē me yeti a guuse a mēŋa la nēr-seba n wē'eri nōke'en-yooro la, ti la ka sōŋri nērba Nawēnne doosgo puam. A ken yeke Atimōti ti a ita ēŋa n uti se'em na: A dɔla sira, la a bɔ sira, la a tara nōŋlum, la sū-mā'are, la a da yīm zāsŋɔ sōŋɔ seka ti a to'oge la (2:14-4:5).

Gōŋɔ la ba'asgɔ, a pa'ale la ēŋa n nāmse se'em, la Nawēnne n sōŋe ēŋa se'em (4:6-18).

Gōŋɔ buyi dāana ti Apoli gulse bɔ

Atimōti

1

¹Mam Apoli n de Azezi-krisi Tōntōnna* wu Nawēnne n boori se'em, ti m mōole vɔm seka ti Nawēnne bīŋe nōore ti a bɔ tɔ Azezi-krisi īyā la yelle. ²Mam gulsri bɔ'ɔra la Atimōti n lebge mam bi-nōŋre la. Ti So Nawēnne, la ti Zuudāana Azezi-krisi wun ēŋe fɔ yel-sōnne, dee zoe fu ninbāalga, dee bɔ fɔ sū-mā'asum.

Apoli pu'usri Nawēnne a yel-sōnne, dee bɔ Atimōti buraane

³Mam pu'usri Nawēnne a yel-sōnne, mam tōnni bɔ'ɔra ē mina m

sūure pɔam tɪ la ʌn sōŋa, wu mam yaabdōma n yuun tōnnɪ bɔ'ɔra ẽ se'em na. Mam tērtɪ fɔ yelle m pɔ'ɔsgɔ pɔam yu'ɔŋɔ la wuntɛɛŋa ka basra. ⁴Mam tērtɪ fōn daan kellɪ la mɛ, tɪ mam bɔ'ɔra tɪ m le yē fɔ, tɪ m wun tara sū-yēlga zozo'e. ⁵Mam tērtɪ fōn bɔ Azezi sɪra la fɔ sūure wuu, wu fɔ ma-keko Aloyiizi, la fɔ ma A'enisi n daan dēŋɛ bɔ Azezi sɪra se'em na. Mam mi tɪ fɔ ken bɔ sɪra la bela. ⁶La de la bela tɪ mam tēera fɔ tɪ fɔ dɪke bɔ'a la tɪ mam daan dɪke m nu'usi pagɛ fɔ zuo tɪ Nawēnne bɔ fɔ la, malɪn tōm gāŋɛ bela. ⁷Se'ere n soe la, Nawēnne n bɔ tɔ a Sɪa la ka botɪ tɪ tara dabeem, a botɪ tɪ tara la pāŋa, la nōŋlum, la yōk-m-mēŋa.

⁸Bela, da zoe yānne ka tɔge tɪ Zuudāana Azezi yelle. La fɔ ken da zoe yānne mam n boe yu'a deem Azezi-krisi kō-yēlga ãyā la, lagum na mam sake nāmsgɔ kō-yēlga la ãyā, tɪ Nawēnne wun bɔ fɔ pāŋa. ⁹Ĕŋa n fāage tɔ, wi to tɪ tɪ dɛna a nērba, la dagɪ tun tōm tōon-sōma ãyā, la de la a mēŋa n boortɪ se'em, la a yel-sōnne tɪ a ẽŋɛ bɔ tɔ Azezi-krisi ãyā, halɪ lan dēŋɛ dūnia pĩ'iluŋo. ¹⁰Yel-sōnne ẽŋa yāŋa puke la Azezi-krisi wa'aŋɔ la ãyā. Ĕŋa n fāage tɔ, sã'am kūm pāŋa dee botɪ tɪ yē vɔm n ka ba'asrɪ a kō-yēlga la ãyā.

¹¹Nawēnne n looge mam tɪ m dɛna Krisi Tōntōnna mōola a kō-yēlga, dee zāsna nērba. ¹²La de la kō-yēlga la ãyā tɪ mam yēta nāmsgɔ, la mam ka zotɪ yānne, se'ere n soe la, mam mi seka tɪ mam bɔ sɪra la mɛ, la mam mi m sūure pɔam tɪ a tarɪ pāŋa mɛ wun gu'ura sɛla tɪ a dɪke ẽŋɛ mam nu'usum na sōŋa, halɪ ka paage Nawēnne sarɪyadia daare. ¹³Base tɪ zāsŋɔ seka tɪ mam pa'ale fɔ la bɔna fɔ sūure pɔam tɪ fɔ bɪsra dɔla, ken bɔ Azezi-krisi sɪra tara nōŋlum a doosgo pɔam. ¹⁴Tara zāsŋɔ sōma seba tɪ Nawēnne dɪke ẽŋɛ fɔ nu'usum na la Nawēnne Sɪa n boe la tɪ le la pāŋa.

¹⁵Fōn pōn mina tɪ Nawēnne nēr-seba n boe Azi* so'olum la wuu

base mam me, Afizeli la Ahermozenti boe la ner-bama puam. ¹⁶Ti Zuudana wun zoe A'oneziforti la a yir-doma ninbaalga, se'ere n soe la, a en bo'ora mam buraane me, dee ka zoe yanne la ban ba mam la bansi la. ¹⁷La en wa'am Rom na, a mo'oge la nifo e mam, halu wa ye mam. ¹⁸Saryadia daare, ti Zuudana wun zoe a ninbaalga. La fon ken mina soga songre seka wuu ti a soge mam Efezi.

2

Azezi-krisi tonton-sogwa n uti se'em

¹M bia, keje fu mena yel-sonne seka ti Azezi-krisi enje bo to la puam. ²Mam n zasum fu bon-seba nerba zozo'e nenjam na, dika ba zasum nerba n de sira doma n me ta wun dika ba zasum nerba baseba. ³Fon de Azezi-krisi tonton-sogwa la, fu me sake namsgo wu suda-sogwa n sakri namsgo se'em na. ⁴Sudaaga san bo'ora ti a tom ti a ke'ema sure enje yelum, a ka ke'esri a mena yel-seba n dagi sudaasi yela puam. ⁵La de'engo me puam, nera ka ta wun zoe di to'oge bo'a ti a san ka doose zua la sa wuu. ⁶La de la kaara seka n tom namse n wun denje to'oge a bonkoola la yoro. ⁷Wom mam n yele se'em na vore, ti Zuudana wun base ti fu banje sela woo vore.

⁸Tera Azezi-krisi n de naba Adavidi* yuja la yelle, a ki dee vo'oge, wu ko-yelga la ti mam moli la n yeti se'em na. ⁹La de la ko-yelga enja iya ti mam namsra, halu ti ba ba mam na bansi, wu mam de la ton-be'ero dana la. La ba ka ba Nawenne yetoga la. ¹⁰Bela iya ti mam morga wibra sela woo puam Nawenne nerba la ti a looge la iya, ti ba me ye faare Azezi-krisi iya, dee po ye na'asgo n ka ba'asri.

¹¹Yetog-ena wa de la sira:

Ti san ki la e,

ti wun lagum na ē vɔa.

¹²La ti sãn mōrge ze'ele kãŋkãŋe,

ti wun lagum na ē di na'am.

Ti sãn zagse yeti tōma ka mi ē,

a mẽ wun zagse yeti ēŋa ka mi to.

¹³Ti sãn ka bɔna ti sira puam,

ēŋa ken dɛna la sira dāana,

se'ere n soe la, a ka malun viira a yetɔga.

Tōnna ti la paage Nawēnne yem

¹⁴Tēege nērba la bōn-bāma, dee kã'an ba Nawēnne nēŋam ti ba da wē'era nōke'ema yetɔg-bie yela, ti ba ka tarɪ yōorɔ baa fēfēe, dee sã'ana seba n selsri la. ¹⁵Narge pãŋa dena nēra n paage Nawēnne yem, la fu dena tōntōnna n ka zotɪ yãnne la a tōoma, dee mōola sira kō-yēlga la lan mase se'em. ¹⁶Zāage fu mẽŋa la yetɔg-yooro n ka sōŋri Nawēnne doosgo puam, nēr-seba n tɔgrɪ yetɔg-bāma la zāari me la Nawēnne wɛ'esa be'em puam. ¹⁷Ba yetɔga la ãn wu nōr-keka n diti iyã yāara se'em na. Ahimēntɪ la Afiletɪ boe la nēr-bāma puam. ¹⁸Bāma burge me base sira sore la, yeti kūm vo'ore la pōn tole me, ba ēŋe bela base ti nēr-seba n bɔ sira la baseba n lebra poorum. ¹⁹La baa bela, Nawēnne n looge seba la ken ze la kãŋkãŋe wu ēbre n tarɪ pãŋa la. Yetɔg-bāna n de dāalgɔ n pa'ale bela: < < Zuudāana la mi seba n de a nērba me > >, la < < seba wuu n yeti bāma de la Nawēnne nērba la, dēntɪ ti ba base tōon-be'ero > > .

²⁰Yi-kāte puam, dagɪ sālma bu zūuro laasɪ mǎ'a n boe mĩ, dɔɔrɔ la yɔgrɔ laasɪ mẽ boe mĩ me, ti ba dɪke sālma la zūuro laasɪ la ti ba dena tɔulum lɔgrɔ, dee dɪke baseba la ti ba dena daare woo tōoma lɔgrɔ. ²¹Bela mẽ, nēra sãn zāage a mẽŋa la tōon-be'ero seba ti mam

pa'ale wā, a wun āna wu tvulum lɔkɔ n welge to'ore tara yōoro bɔ Zuudāana, dee tāna wun tōm tōon-sōma buuri wuu.

²²Zāage fu mēṅa la yel-yooro seba ti kɔmbi'isi boori ti ba ita n de be'em na, dee ε sela n mase, ken bɔ Nawēnne sira, ε nōḡlum, la sū-mā'asum, dee lagim na nēr-seba n pu'usrɪ ti Zuudāana la pupeelem na. ²³Zāage fu mēṅa la nōke'en-yaalsɪ n ka tarɪ vōore la. Fōn mi ti ba tarɪ la zebra sēnna. ²⁴La Zuudāana tōntōnna ka mase ti a zebra. La mase me ti a dena nēra n nōḡe nērba, tāna wun zāsum nērba la sū-mā'asum. ²⁵La mase ti a pa'ala nēr-seba n ka sakri la, la sū-bugsum, ti Nawēnne tā wun base ti ba teege yem me bāḡe sira, ²⁶le yē yem sōḡo yese Asūtāana* bērgɔ la pvam, ti a daan tarɪ ba ti ba ita ēṅa n boori se'em na.

3

Guuse fu mēṅa la dūnia ba'asgɔ wakate yela

¹Bāḡe ti dūnia ba'asgɔ wakate, la wun dena la toogo. ²Nērba wun dena la nōḡ-m-mēṅa dōma, la lig-nōḡrɪba, ba wun dena la nērba n wē'erɪ ba yō'oro, la pa'al-m-mēṅa dōma, la nērba n tɔgrɪ sela n ka ān sōḡa, la nērba n ka sakri ba sɔdōma la ba madōma nōore, la nērba n ka mi yel-sōnne ti ba ēḡe ba, la nērba toogo n ka boe la bōn-seba n de Nawēnne bōnɔ, ³la nērba n ka nōḡe taaba, la nērba n ka tarɪ nēra zīile, la gōḡgō'osrɪba, la nērba n ka tarɪ ba mēṅa sōḡa, la nēr-tɔɔsɪ, la nērba n sisri sela n ān sōḡa, ⁴la zām dōma, la nērba n ka yōkri ba mēṅa ita sela n ka mase tɔtɔ, la uk-m-mēṅa dōma, la nērba n nōḡe sela n iti bāma mēṅa sūure yēlum gānna Nawēnne. ⁵Ba iti ti la āna wu ba sakri la Nawēnne, la ba ka sakri a pāṅa la. Zāage fu mēṅa la nēr-bāma buuri.

⁶Ba nērba baseba kē'eri la yie puam pā'asra pɔg-seba yem n ka boe zē'a ayula la. Pɔg-bāma tōm na tōon-be'ero ti la dena zeero bɔ ba, ban boori se'em na n tari ba ye'ena, ⁷ti ba zāsna wakate wuu dee ka tāna wun bāŋe sela n de sira la. ⁸Nēr-bāma ka sakri sira, wu Azanesi la Azāmbresi n yuun ka sake bɔ Amoyisi* se'em na. Ba de la nērba yem n burum, ti ba Nawēnne doosgo la lebge zāŋa. ⁹La ba kǎn sēŋe nēŋa, se'ere n soe la, nērba wuu wun yē ba yalne na me, wu ban yuun yē Azanesi la Azāmbresi yelle se'em na.

¹⁰La fōn mi bōn-seba ti mam zāsūm nērba me, fu mi mam yel-ure, la mam yem loore n ān se'em me, la fu mi mam n bɔ Nawēnne sira se'em, la mam sū-mā'are, la mam nōŋlum, la mam n ze'ele kǎŋkǎŋe se'em, ¹¹fu mi nērba n nāmse mam se'em, la toog-seba wuu n paage mam Antiyosi, la Ikonim, la Listri tēnsi puam Azezi iyā. Bēm nāmso ti mam ka yē? La Zuudāana la fāage mam bela wuu puam me. ¹²La de la bela, nēr-seba wuu n boori ti ba vɔa wu Nawēnne n boori se'em Azezi-krisi doosgo puam, ba wun nāmse ba me. ¹³La tōon-be'ero dōma, la seba n pā'asri nērba wun ken kē'era la tōon-be'ero puam pa'asra we'esa, ba pā'asri la nērba, dee pā'asra ba mēŋa.

¹⁴La sǎn dena fōn, tara bōn-seba ti fu zāsūm dee sake ti la de la sira la kǎŋkǎŋe, fu mi nēr-seba zē'am ti fōn zāsūm bōn-bāma. ¹⁵Fōn pōn mina Nawēnne gōŋɔ la me halɪ fu bōnbɪ'ulum, ēŋa n tā wun bɔ fo yem, ti fu yē fāare fōn bɔ Azezi-krisi sira la iyā. ¹⁶Nawēnne gōŋɔ la wuu de la Nawēnne n boti ba gulse, a yōoro de la a zāsūm nērba sira, la a boti nērba bāŋe ba koŋre, la a kǎ'an nērba, la a pa'ale nērba ti ba uta sela n mase āna sōŋa, ¹⁷bela ti Nawēnne nēra wun mase, māasūm tā'age tōm tōon-sōma buuri wuu.

4

Apoli tɔge a ba'asgɔ yetɔga bɔ Atimõti

¹Mam bɔ'ɔri fu nõore Nawēnne, la Azezi-krisi n wun wa'am wa di nēr-vɔɔsi, la nēr-seba n ki sariya la nēŋam, la ēn wun wa di a na'am na iyā, ²ti fu mōole Nawēnne yetɔga la. Nērba sān selsra, bu ba sān ka selsra, mōole le malun mōole wakate wuu. Tɔge pa'ale ba ti ba bāŋe ba koŋre, gi ba, dee bɔ ba buraane ti ba ita sōŋa, ita bela wuu la sū-mā'asum dee tara zāsŋɔ putē'ere. ³Se'ere n soe la, wakate n sēm ti nērba kān le bɔɔra ti ba selse sira zāsŋɔ la, ba wun dɔla la ba mēŋa yem n boori se'em, bela ba wun era la karēnsāandōma zozo'e n wun zāsum ba sela ti ba nõŋe ti ba selse mā'a. ⁴Ba wun li ba tuba me kān selsra sira la, dee wērgē selsra sela n de solma. ⁵La fōn, tara fu mēŋa sōŋa sela woo puam, sake nāmsgɔ, mōole Nawēnne kō-yēlga la, la fu tōm tōone na ti Nawēnne dīke ēŋe fu nu'usum na sōŋa.

⁶La sān dena mam, mam vɔm ān wu ko'om ti ba ka'age bɔ Nawēnne, mam daare paage me, ti mam wun fōrgē. ⁷Mam mē mēere sōŋa me yāŋe, mam zoe paage zua la tēka me, la mam bɔ Nawēnne sira me ka base. ⁸Lēele wā, tā'are yɔɔrɔ gā me gu'ura mam, ti Zuudāana n diti sariya wu lan mase la, wun dīke bɔ mam daare ēŋa daare. La, la dagi mam mā'a, la de la nēr-seba wuu n nõŋe ē bɔɔra ti a leme wa'am na.

Apoli soolum Atimõti ti a wa'am

⁹Mōrgē wa'am mam zē'am tɔtɔ. ¹⁰Se'ere n soe la, Ademasɪ base mam me dee sēŋe Tesaloniki, ēn nõŋe dūnia wā bōn-yooro la iyā. La Akresānsɪ sēŋe la Galati, ti Atiti mē sēŋe Dalmati, ¹¹Aluki mā'a n weege mam zē'am. Fu sān sēna, fu tari Amarkɪ wa'am, ti a tari sōŋre me bɔ mam tōone na iyā. ¹²Mam tōm Atisiki la Efēzi. ¹³Fu sān sēna, fu dīke m ɔɔrɔ fuugo la ti mam daan base Trvasɪ Akarpusi zē'am na tari wa'am, la fu dīke gōnnɔ na pa'ase, lan gānnɪ wuu gōn-seba ti ba

gulſe la dũnsi gãna kilim na.

¹⁴Aleġsãndri n de kuta la eņe mam na be'em halı zozo'e, Nawẽnne wun Ƴo e eņe se'em na. ¹⁵Fu mē guuse fu mēņa la e, ti a si'ise tōma yetoġa la me zozo'e.

¹⁶Mam n daan ze'ele sarıyadia zē'am pɔspɔsı la, nēra nēra ka ze'ele mam poorum sōņe mam, ba wuu base mam me. Nawẽnne da geele ban eņe se'em na. ¹⁷La Zuudãana la daan ze'ele mam poorum me sōņe mam, bɔ mam pãņa halı ti mam mōole kō-yēlga la sōņa sōņa, ti bu-zãņsi* zozo'e wōm. La mam daan yē fãare me ġigne nōorum.

¹⁸Zuudãana la n wun ken fãage mam yese mam be'em wuu puam, kē'ese mam a so'olum na puam. Eņa n soe nã'asġo wakate n ka ba'asrı. Amina.

Pu'usġo

¹⁹Pu'use Aprisili, la Akila, la A'onezifɔrı yir-dōma. ²⁰A'erastı weege la Korēntı. La Atrofim bē'erı me, ti mam base e Miletı. ²¹Mōrġe wa'am dee ti ɔɔɔ wakate paage. A'ebulusı la Apudēnsı, la Alinusi, la Aklodia, la ti sɔbiisi la wuu pu'usrı fɔ.

²²Tı Zuudãana wun bɔna la fɔ. Nawẽnne wun eņe ya a yel-sōnne. \e

TIT

Atiti

Gõn-seka ti Apoli gulſe bɔ Atiti

Bilgre

Atiti de la Azezi karēnbia, a dagı Zifu. A daan dolı la Apoli tōnna Nawẽnne tōoma. Wakat-seka ti Apoli gulſe ġoņo wã bɔ e na, Atiti boe la Kretı bısra Azezi nēba yelle ti sela woo ãna sōņa.

Apoli dēņe pa'ale la Azezi nērba nējadōma n mase ti ba āna se'em (sapitri 1).

A ken pa'ale Atiti la ēn wun zāsum nērba buuri to'oto'ore n boe Wēndeego la puam se'em, la sān dēna bōnkegsi, la pɔg-yā'asi (ti bāma mē zāsum pɔg-paalsi), la a zāsum bōnbi'isi, la yamsi wuu (sapitri 2).

Dee pa'ale Azezi nērba n mase ti ba ita se'em, wun tā'age kē'era la taaba la sū-yēlum, ti nōke'ene, la welgre da bōna ba tēņasuka (3:1-11).

Gōņo la ba'asgɔ, a pa'ale Atiti la ēņa n boori ti a ēņe se'em, dee pu'use ē (3:12-15).

Gōn-seka ti Apoli gulse bɔ

Atiti

1

¹Mam Apoli n gulse gōņo wā, mam de la Nawēnne yamņa, la Azezi-krisi Tōntōnna* ti a tōm ti m mōole a kō-yēlga ti seba ti Nawēnne looge la bɔ sura, dee bāņe Nawēnne sura n pa'ali ban wun dola Nawēnne sore se'em. ²Ti tari putē'ere ti ti wun yē la vɔm n ka ba'asri, ti Nawēnne n dagi pōmpɔrma la daan bīņe nōore halt ti dūnia nān ka nāam. ³La wakate n paage la, a puke bōn-ēņa me pa'ale a yetɔga puam, a dūke a yetɔga la ēņe la mam nu'usum ti m mōole bɔ nērba, wu Nawēnne n de ti Fāagra n bɔ nōore se'em na. ⁴Mam n gulse gōņo wā bɔ'ɔra Atiti n lebge mam mēņa bia, tōma n lagum dola Azezi-krisi la iŷā. Ti Sɔ Nawēnne, la ti Fāagra Azezi-krisi wun ēņe fɔ a yel-sōnne, dee bɔ fɔ a sū-mā'asum.

Atiti n wun tōm se'em Kretu

⁵Mam n daan botu fu weege Kretu la, la de la fu malge bōn-seba n deege dena ba malge ba'ase la, la fu looge kēma tēŋa woo Nawēnne nērba puam wu mam n yele fu se'em na. ⁶Kēema mase ti a dena la nēra n ka taru dōrga, la a dena pɔg-yēŋa dāana, ti a koma bo Azezi-krisi sira, ka ita yooryooro, dee nanna nērba. ⁷Dēni ti nējadāana n busru Nawēnne nērba yelle dena nēra n ka taru dōrga, la a da dena pa'al-m-mēŋa dāana, bu sū-isgre dāana, a da dena dā-yūura, bu zebzebra, bu nēra n uti sela n ka mase yēta bōntarsōm. ⁸La mase me ti a ita sāama sāano, la a dena nēra n nōŋe sela n ān sōŋa urgo, la a tara putē'e-sōŋo, la a dena nēra n mase sela woo puam, la a dena pupeelem dāana, la a tāna a mēŋa yōkra. ⁹La mase ti a tara sira zāsŋo la kāŋkāŋe, wu ban zāsum ē se'em na, ti a wun tā'age bo nērba buraane ti ba dola sira zāsŋo la, dee tā'age pa'ale s'isruba ti ba bāŋe ba koŋre.

¹⁰Se'ere n soe la, nērba zozo'e n boe dena s'isruba, la yetog-yooro dōma, dee pā'asra nērba. Lan gānni wuu, nēr-bāma boe la Zifdōma n wātī* la puam. ¹¹La mase ti fu gu ba ti ba da togra bela, ti ba zāsni nērba la sela n ka mase, wā'ara nērba baseba yie, ba zāsni sela n ka mase eera la bōntarsōm. ¹²Kretu dōma mēŋa bāŋra ayta yuun yetu: < < Kretu dōma de la pōmporndōma wakate wuu, la putvul-dōma āna wu we-dūnsi la, ba de la zēyāgsi dee tara puyā'ane. > > ¹³Yel-ēŋa de la sira, bela iyā, kā'an ba sōŋa sōŋa ti ba dola Nawēnne sira la sōŋa. ¹⁴Yele ba ti ba base Zifdōma solma, la bōn-seba ti nērba zagse sira dee bo nōore ti ba ita la. ¹⁵Sela woo ān sōŋa me bo nēr-seka n de pupeelem dāana, la seka n de tōon-dēgrɔ dāana ka sakra Nawēnne, sela sela ka boe n ān sōŋa bo ē. Ōŋa putē'ere, la a yem wuu ki me. ¹⁶Ba yetu bāma mi Nawēnne me, la ba tōoma la pa'ali ti ba s'isru

Nawēnne mε. Ba de la nēr-be'εsı gāņε, la ba ka sakrı Nawēnne nōore, dee ka tāna wun tōm tōon-sōņɔ.

2

Zāsım nērba sıra

¹La fōn, zāsım nērba la bōn-seba n mase la sıra zāsıņɔ la. ²Zāsım bura-yā'ası ti ba tara ba mēņa sōņa, ba dena nērba ti ba nannı, ba tara putē'e-sōņɔ, la ba dena nērba n dolı Nawēnne sıra la sōņa, ba tara nōņlum, dee dena nērba n mā'age ba sūıure sēnna nēņa.

³Yele pɔg-yā'ası ti ba yel-ıre puam ba dena pupeelem dōma, la ba da dena gōngō'osrıba, ba da dena nērba n dıke ba mēņa bɔ dāam. Ba pa'ala sela n ān sōņa, ⁴ba pa'ala pɔg-bı'ısrı ti ba nōņε ba sırba, la ba kɔma, ⁵ti ba tara putē'e-sōņɔ, ti ba da ita dēgrɔ, ti ba dena pɔg-mēnsı, la pɔg-sōma, ti ba sakra ba sırba, ti nērba da pɔ'ɔge Nawēnne kō-yēlga la.

⁶Kā'an kɔmbı'ısrı la mē ti ba tara ba mēņa sōņa sela woo puam. ⁷Fōn mēņa botı fu yel-ıre wuu āna sōņa, pa'ale ba ban wun āna se'em, la fu zāsım nērba Nawēnne yetɔga la sıra, la ninmō'ore. ⁸La fu tɔgra sıra ti ba da tā'age zerge fɔ, ti yānne wun yōke seba n sı'ısrı la, ban kān yē sela n de be'em ti zē'am tɔge la ĩyā.

⁹Yele yamsı ti ba sakra ba zuudāandōma sela woo puam, ita ba sūıure yēlum, ba da zagse ba nōore, ¹⁰la ba da zūıura ba lɔgrɔ. Ba tōnna tōon-sōma pa'ale ti bāma de la sıra dōma, bela ti Nawēnne n de ti Fāagra zāsıņɔ la wun yēta pēka sela woo puam.

¹¹Bēm ĩyā, Nawēnne botı ti bāņε a yel-sōnne la n de fāare bɔ nērsaalba wuu la mε. ¹²A zāsı tōma ti ti base la sela n ka dolı Nawēnne sore, la dūıııa nērba n boortı sela la, dee vɔa dūıııa wā zuo

la putē'e-sōḡo, la sira, dee dola Nawēnne sore sōḡa. ¹³Bela ti ti wun tara putē'ere gu'ura sū-yēlga daare la, daar-ēḡa Azezi-krisi n wun leme wa'am la a na'am pāḡa. Ēḡa n de tōma Nawēnne, la ti Fāagra. ¹⁴Ēḡa n dīke a vōm bō tōma īyā, ti a fāage tō tōon-be'ero wuu puam, dee base ti ti malge āna sōḡa dena a mēḡa nērba, mōrge tōnna tōon-sōma.

¹⁵La de la bela ti fu wun zāsum ba, bō ba buraane, dee kā'an ba. Ēḡe bela la nōore seka ti fu tari la. Da base ti nēra pō'oge fō.

3

Nawēnne nērba yel-ire n wun āna se'em

¹Tēege ba wuu yeti la mase me ti ba nanna tēḡa la nēḡadōma, la ke'endōma dee sakra ba nōore, dee tōnna tōon-sōma buuri wuu. ²Ba da tōgra nērba be'em, ba da dena zebzebrība, la ba dena nērba n tari sū-mā'asum, dee ita sū-bugsum la nērba wuu.

³Tōma mē daan de la nērba n ka mi sela, la si'isrība, la nērba n burge ka dola sira sore, ti tōma yemleego, la bōn-yooro ti tōma boori la sōna tōma. Tōma daan vōa la putvulḡo puam, ita sūure la ti taaba bōnō, dee dena nērba ti ba ka nōḡe, dee sira taaba.

⁴La Nawēnne n de ti Fāagra la n wa pa'ale nērsaalba a yel-sōnne, la a nōḡlum na, ⁵a fāage ti me, la, la dagi tun tōm tōon-sōma īyā, la de la a mēḡa ninbāal-zua īyā ti a fāage tō. A boti a Sia la n peege tōma sūure dēgrō boti ti lebge nēr-paalsi tara vōm paalga. ⁶La de la Azezi-krisi n de ti Fāagra la īyā, ti Nawēnne bō tō a Sia la sōḡa sōḡa, ⁷ti a yel-sōnne na boti tōma mase a nēḡam, lebge a kōma wun yē vōm n ka ba'asri ti tōma tari putē'ere gu'ura la.

⁸Yetōg-ēna de la sira. Bela ti mam bōora ti fu mōrge pa'ale ba yel-

bāma, ti nēr-seba n bɔ Nawēnne sira la mōrge tōnna tōon-sōma. Yel-
bāma n ān sōŋa dee tara yōoro bɔ'ora nērba. ⁹La sān dena nōke'en-
yooro, la yaabdōma deto kāalgɔ, la nōke'ema wē'a Zifdōma lɔɔ* la
yela, zāage fu mēŋa la bōn-bāma, se'ere n soe la, ba ka tarti yōoro, ba
de la zāŋa. ¹⁰Nēra sān tara welgre sēnna, fu kā'an ē nōore ayi, ti a sān
ken zagse, fu base ē, la ya da le tara yetɔga la ē. ¹¹Ti fu mi ti nēr-ēŋa
buuri burge me base sira sore, dee tōnna tōon-be'ero n pa'alt ti a kām
yē buuro.

Ba'asgo yetɔga, la pu'usgo

¹²Mam wun tōm na Artemasi bu Atisiki fu zē'am, a sān wa'am, fu
narge pāŋa wa'am mam zē'am Nikopoli, ti mam looge yem ti m bōna
la bilam ti ɔɔɔ wakate tole. ¹³Mōrge buse Azenaasi n de yetɔg-mita,
la Apolosi sore sēnne na yelle, ti sela da pɔ'oge ba. ¹⁴Tōma nērba la
mase me ti ba zāsum tōnna tōon-sōma ti la sōŋe seba n boori sōŋre
la, dee da vɔa vɔm n ka tarti yōoro.

¹⁵Nēr-seba n boe la mam na wuu pu'usri fɔ. Pu'use nēr-seba n bɔ
Azezi sira nōŋe tōma la.

Nawēnne yel-sōnne wun bōna la ya wuu. \e

PHM

Afilmō

Gōn-seka ti Apoli gulse bɔ Afilmō

Bilgre

Afilmō yuun de la nēr-kāte n bɔ Azezi sira bōna Kolosi Wēndeego la
puam, a de la Apoli sire. La de la Apoli n pa'ale ē Nawēnne sira, ti a
sake.

Afilmō yuun tarti la yamŋa yu'ure n de A'onezim, ti a zoe fōrge dee

base ē.

Apoli n boe yu'a deem wakat-seka la, ti A'onezim sēṅe a zē'am. Tɪ Apoli tɔge Nawēnne yetɔga bɔ ē, ti a bɔ Azezi sira. Bela poorum ti Apoli yeke ē ti a lebe a zuudāana la zē'am.

Bela ti a gulse gōṅɔ wā bɔ a sire Afilmō sose ē ti a base sela wuu ti A'onezim ēṅe la taale. Se'ere n soe la, wakat-ēṅa, yamṅa sān zoe fōrge, ti a zuudāana la le yē ē, a wun boti a yē la nāmsgɔ zozo'e. Bela ti Apoli sose Afilmō ti a da le to'oge ē wu a yamṅa mā'a, a bise ē wu a de la a sɔbia Azezi-krisi iṅyā.

Gōn-seka ti Apoli gulse bɔ

Afilmō

1

¹Mam Apoli n boe yu'a deem Azezi-krisi yelle, la ti sɔbia Atimōti n gulse gōṅɔ wā bɔ'bra ti sir-sōṅɔ Afilmō n de ti tōntōn-tadāana, ²la ti tã Apta, la Arsipi n lagum na tōma yē nāmsgɔ Azezi tōoma puam na, la Nawēnne nērba la n lagsri fu yire puam na. ³Tɪ Sɔ Nawēnne, la ti Zuudāana Azezi-krisi wun ēṅe ya yel-sōnne, dee bɔ ya sū-mā'asum.

⁴Mam pu'usrɪ Nawēnne daare woo a yel-sōnne me, dee tēra fu yelle m pu'usgɔ puam ka basra. ⁵Se'ere n soe la, mam wōm ban tɔgrɪ fōn bɔ ti Zuudāana Azezi sira se'em, la fōn tarɪ nōṅlum Nawēnne nērba la wuu iṅyā se'em. ⁶Mam sosri Nawēnne ti fōn lagum na tōma bɔ Azezi-krisi sira la wun sēnna nēṅa, a wun base ti fu bāṅe bōn-sōma seba wuu ti ti tarɪ Krisi doosgo puam. ⁷M sɔbia, fu nōṅlum na bɔ mam sū-yēlga zozo'e me, dee bɔ mam buraane, fōn boti Nawēnne nērba la

wuu sūure mā'age la ïyā.

⁸Bela ti baa mam n tarı nı nōore wun yeke fo ti fu ēñe se'em Krisi ïyā la, mam ka ēñe bela, ⁹mam sosrı fu la nōñlum. La de la mam Apoli n de bura-yā'aña, mam boe la yu'a deem læele wā Azezi-krisi yelle. ¹⁰Mam sosrı fu la A'onezim*f1* ti mam boe yu'a deem ti a sake Azezi lebge mam bia la ïyā. ¹¹Kurum, a daan ka tarı yōorɔ bɔ fɔ, la læele wā a yāña tarı yōorɔ me bɔ fɔn na mam.

¹²Mam lebe tōnna ē na fɔn zē'am, mam nōñe ē na m sūure wuu.

¹³Mam boorı nı ti a bɔna la mam zē'am to'oge fɔn zē'a sōñra mam, mam n ken bɔna yu'a deem Nawēnne kō-yēlga la ïyā la. ¹⁴La mam ka boorı ti m ēñe sela ti fɔn sãn ka sake, ti la da kãn dena mam mōrge fu me ti fu ēñe mam yel-sōnne, la dena fu mēña n boorı se'em.

¹⁵Tā ti A'onezim n daan base fɔn dee fōrge wakate fēe la, la de la ti fu le to'oge ē ti a bɔna la fu wakate wuu. ¹⁶La a ka le dena fu to'oge ē ti a dena fu yamña mā'a, a gānnı yamña me, a yāña de la sɔbi-nōñre. Mam nōñe ē me halı zozo'e, la fɔn wun nōñe ē gānna, se'ere n soe la, a de la fu yamña dee ken dena fu sɔbia Zuudāana doosgo pɔam.

¹⁷Bela, fu sãn dena mam sure, fu to'oge ē wu fɔn wun to'oge mam mēña se'em na.

¹⁸La a sãn ēñe fu tuuge, bu a sãn tara fu sānne, base ti la dena mam sānne. ¹⁹Mam Apoli n gulse wāna la mam mēña nu'ugo yetı: Mam wun yɔ fɔ. Mam kãn tēege fɔ ti fu mēña tarı mam sānne, la de la mam n sōñe fɔ ti fu yē vɔm. ²⁰Ēe, m sɔbia, ēñe yel-ēna bɔ mam, Zuudāana la ïyā. Botı m sūure mā'age Krisi ïyā. ²¹Mam n mi ti fu wun ēñe mam n boorı se'em na ïyā ti mam gulse bɔ fɔ, la mam mi ti fu wun pɔn ēñe gāñe mam n yeke fu se'em na me.

²²La mam sosrı ti fu ken māasum gā'argɔ zē'a bɔ ma, ti mam tarı putē'ere ti yāma n pu'usrı Nawēnne na ïyā, ba wun base mam ti m

leme wa'am ya zē'am.

²³A'epafrasi n lagum na mam bɔna yu'a deem Azezi-krisi yelle la pu'usrɪ fɔ. ²⁴La mam tɔntɔn-taaba, Aluki la Amarki, la Aristarki, la Ademasɪ mē pu'usrɪ fɔ. ²⁵Tɪ Zuudāana Azezi-krisi yel-sɔnne wun bɔna la ya. \f1 10 A'onezim vɔore de la a tarti yoorɔ. \e

HEB

Ebre

Gɔn-sɛka ti ba gulɛ bɔ Ebre dɔma

Bilgre

Ebre de la Zifdɔma yu'vre ayēma. Nēr-sɛka n gulɛ gɔn-ēna wā la, gulɛ bɔ la nērba n nāmsɪ zozo'e, ban bɔ Azezi sɪra ïyā. A daan gulɛ bɔ ba yetɪ ba da base Nawēnne sore doosgo, ba yē buraane ze'ele kǎnkǎŋe, la ba bǎŋe ti Zuudāana Azezi n gǎnnɪ sɛla woo.

Gɔŋɔ la pa'ale ba me ti ba bǎŋe ti Nawēnne doose la a Dayva Azezi-krisi puke a mēŋa pa'ale nērsaalba. Azezi n gǎnnɪ wuu, ēŋa n gǎnnɪ Nawēnne nɔtɔ'usrɪba sɛba n yuun boe la, la Nawēnne malegsɪ, la Amoyisi, la Azoze (sapɪtrɪ 1-4).

Azezi n gǎnnɪ kǎabgɔ kēma n yuun boe la wuu, a de la Nawēnne kǎabgɔ kēma nēŋadāana n boe wakate wuu. Eŋa n gǎnnɪ Nawēnne kǎabgɔ kēma wuu la, ēŋa n yesɪ nērba ba tɔon-be'ero, la kūm puam, botɪ ba yēta fāare sɪra sɪra. Dūnsɪ ti Israyelɪ dɔma yuun ēn yōge kǎabe bɔ Nawēnne na, la de la Azezi-krisi kūm mǎmsgɔ (sapɪtrɪ 4-10).

Gɔŋɔ la ba'asgɔ a bɔ nērba la buraane yetɪ ba ken sēŋe nēŋa Nawēnne sore doosgo puam. Dee pa'ale kurum kurum Nawēnne nērba baseba n bɔ Nawēnne sɪra se'em, dee kǎ'an nēr-sɛba n wun

karēŋe gōŋɔ wā la, yeti ba te'ege Azezi mā'a, ba bɪsra ɛŋa ti ba doli la, la ba sūure wuu. La ba sake toogo, la nāmsgɔ, ze'ele kāŋkāŋe tari ka paage ba'asgɔ (sapitri 10-13).

Gōn-seka ti ba gvlse bɔ

Ebre dōma

1

Nawēnne doose la a Dayua tɔge la tōma

¹Kurum, Nawēnne yuun boti a nōtɔ'ɔsrɪba* n tɔge nōore zozo'e bɔ ti yaabdōma, la yetɔga buuri to'oto'ore. ²La lɛɛɛ wā n de ba'asgɔ wakate la, Nawēnne boti a Dayua la n tɔge bɔ tɔ. La doose la ɛŋa ti a nāam dūnia la saazuum wuu, la a boti ɛŋa n sɔna sela woo. ³Ɛŋa n tari Nawēnne na'am pāŋa wa pa'ale tɔ, a ān wɔ Nawēnne mēŋa n ān se'em na. La a yetɔga la tari pāŋa me boti sela woo bɔna a zē'a. Ɛŋa n yese nērsaalba tōon-be'ero ti ba lebge sōŋa la poorum, a sēŋe ka zēa la Naba Wēnne zɔvɔ saazuum-zuum. ⁴Ti Nawēnne zēke ɛ ti a gānna malekadōma* halɪ zozo'e dee bɔ ɛ yu'vre n gānnɪ malekadōma yu'vra.

Nawēnne Dayua Azezi-krisi n gānnɪ malekadōma

⁵Nawēnne ka yele maleka baa ayɪla yeti:

< < Fōn de mam Dayua,
zīna mam lebge la fu Sɔ. > >

La a ken ka yele maleka yeti:

< < Mam n won dena fu Sɔ,
ti fu dena mam Dayua. > >

⁶La ɛn daan tōm a bi-kēŋa la dūnia puam na, a yele yeti:

< < Dēni ti malekadōma wuu nā'asra ē. > >

⁷La sãn dena malekadōma la yelle, a tɔge yeti,
ba de la ẽᅇa tōntōnɪba,
ẽᅇa base ti ba ẽna wu kusebgo la,
dee base ti ba ẽna wu bug-zɪlɪsɪ la.

⁸La a yele a Dayva la yelle yeti:

< < Fõn de la Nawēnne,
fu na'am na wun bɔna la wakate n ka ba'asri.
Fu wun sɔna fu so'olum na la sira.
⁹Fõn nõᅇe la sela n mase,
dee sisra be'em.
Bela n soe ti fu Nawēnne welge fu to'ore,
bɔ fu pēka, la sũ-yēlga gãna baseba wuu. > >

¹⁰Dee ken yeti:

< < Zuudãana, fõn nãam tēᅇa halɪ pĩ'iluᅇo wakate,
la saazuum wuu de la fõn nu'usi tōoma.

¹¹Ba wuu wun sã'am me,
la fõn wun weege bɔna.

Ba wun kurgɛ
wu fuugo n kurgri se'em na.

¹²Fu wun lobe ba base
wu fuugo ti ba kilim lobe base la.

Bõnɔ wuu wun teege
wu ban teeri fu-keka la.

La fõn, fõn de la fõn de se'em na ka tɛera,
fõn yuuma ka tari teka. > >

¹³Nawēnne ka yele maleka baa ayɪla yeti:

< < Zĩ'ire m zɔvgɔ, halɪ ti m wa base

ti fu be'eba bɔna fu nāma tēja. > >

¹⁴Malekadōma de la bēm? Ba de la susi n tōnni bɔ'ora Nawēnne, ti Nawēnne tōnna ba, ti ba sōŋra nēr-seba n de ba yē fāare la.

2

Da zagse-ya Nawēnne fāare

¹Bela n soe ti la mase ti tōma gure yetɔga la ti ti wōm na sōŋa sōŋa, ti ti da burge. ²Malekadōma* n yvun tɔge yetɔg-seba kurum na ēŋe ba tōone me, nēr-seba n si'ise ka sake ba la, yē sibgre seka n mase ti ba yē la me. ³La sān dena bela, tōma sān pɔ'oge Nawēnne fāare kāte ēna, tōma wun ēŋe la wāne pōse sibgre? Zuudāana mēŋa n daan pōn dēŋe mōole fāare ēŋa yelle, ti nēr-seba n wōm na pa'ale tōma ti la de la sura. ⁴Ti Nawēnne mēŋa mē tōm tōon-yālma, la yel-kirsi, la bōn-yālma buuri wuu to'oto'ore, dee bɔ nērba a Sia* pāŋa wu ēn boori se'em, pa'ale ti la de la sura.

Azezi n tarɪ fāare wa'am

⁵La dagɪ malekadōma ti Nawēnne yetɪ ba sɔna dūnia seka n sēm ti tōma tɔgra a yelle la. ⁶La nēra n tɔge Nawēnne gōŋɔ la puam zē'a ayēma yetɪ:

< < Nērsaala de la bēm

ti fōn tēra a yelle?

Nērsaala bia de la bēm

ti fōn bisra a yelle?

⁷Fōn base me ti a ka paage

malekadōma wakate fēe mā'a,

dee yāŋa nā'ase ē,

bɔ ē na'am pāŋa la pēka.

⁸Fõn base me ti a sɔna sela woo. > >

Lan yeti Nawēnne base ti sela woo sakra nērsaala la, a ka base ti sela weege ka sakra ē. La, lan de se'em na, tōma nān ka yēti ti sela woo sakri ē. ⁹La tōma yē ti la de la Azezi ti Nawēnne sike ti a ka paage malekadōma wakate fēfēe, dee yāṅa nā'ase ē, bɔ ē na'am pāṅa la pēka ēn nāmse ki la ïyā. La de la Nawēnne yel-sōnne ïyā, ti a ki nērsaalba wuu ïyā. ¹⁰Nawēnne n de seka n base ti sela woo bɔna, dena a bōnɔ na, la mase la ēṅa yem n boort se'em ti a boti Azezi nāmse, ēṅe sela woo ba'ase, fāage nērba, tari a kɔma zozo'e sēṅe a na'am pāṅa zē'am.

¹¹Azezi n malgru nērba ti ba dena pupeelem dōma, la seba ti a malge ti ba dena pupeelem dōma la lagum tara la Sɔ ayta. Bela n soe ti a ka zɔta yānne ti a wi ba ti a sɔbiisi. ¹²Bela ti a yele Nawēnne yeti:

< < Mam wun tɔge fu yelle m sɔbiisi zē'am,
mam wun nā'ase fɔ ba lagsgɔ zē'am. > >

¹³Dee le yeti:

< < Mam wun dɩke m sɩra wuu bɔ la Nawēnne. > >

Dee ken yeti:

< < Mam n wāna,
mam na kɔm-seba ti Nawēnne bɔ mam na. > >

¹⁴Kɔma la ti a tɔgru la n de nērsaalba tara ïyā la zum na, bela ti Azezi mē lebge nērsaala wu bāma la ki, ti a kūm na sã'am Asūtāana* n de seka n base ti nērba kiira la pāṅa. ¹⁵La de la bela ti a ēṅe fāage seba ti kūm dabeem tari ba boti ba āna wu yamsi ba vɔm na wuu puam na base. ¹⁶La dagu malekadōma ti a wa'am ti a sōṅe, la de la Abraham* yusi la ti a wa'am ti a sōṅe. ¹⁷Bela n soe ti la daan mase ti a lebge nērsaala āna wu a sɔbiisi la sela woo puam, tā'age dena ba kāabgɔ* kēma nēṅadāana n de ninbāal-zɔta, dee dena sɩra dāana Nawēnne tōoma puam. A ēṅe la bela yese nērba tōon-be'ero, naage ba la

Nawēnne. ¹⁸Azezi mēṅa n daan yē nāmsgo wakate seba ti Asūtāana make ē bise la, a tā wun sōṅe nēr-seba n yēti nāmsgo la me, bo ba pāṅa.

3

Azezi-krisi n gānni Amoyisi

¹Bela m sobiisi, yāma ti Nawēnne wi ti ya welge to'ore dena a nērba la, busra-ya Azezi, ēṅa n de seka ti Nawēnne tōm, la ēṅa n de tōma kāabgo* kēma nēṅadāana Nawēnne sore doosgo la puam. ²A de la sira dāana seka n looge ē na zē'am, wu Amoyisi n yuun de sira dāana se'em Nawēnne nērba la puam na. ³La mase me ti Azezi yē nā'asgo gānna Amoyisi halt zozo'e, wu de-mēta n yēti pēka gānna deego la mēṅa se'em na. ⁴Asira, deego woo de la nēra n mē ē, la sela woo mēta de la Nawēnne. ⁵La sān dena Amoyisi, a yuun de la tōntōnna n de sira dāana Nawēnne nērba n ān wu deego la puam, dēṅe tōge sela n wun wa tōge la yelle. ⁶La Krisi* de la Nawēnne Dayua n de sira dāana sōna deego la. A deego la de la tōma, tōma sān ze'ele kāṅkāṅe la buraane, dee tara putē'ere gu'ura sela ti ti bo sira la, la sū-yēlga, ka paage ba'asgo.

Nawēnne wun bo a nērba vo'osgo

⁷Bela, sake-ya Nawēnne Sia n yeke se'em yeti:

< < Zīna, ya sān wōm Nawēnne kōa,

⁸ya da ke'em ya sūure,

wu ya yaabdōma n yuun ke'em ba sūure si'ise Nawēnne nōore

se'em, make ē bise weem na. > >

⁹Nawēnne yeti:

< < Bilam, ya yaabdōma yuun make mam me bise,

baa ban yuun yē mam tōoma yuuma pinaasi la.

¹⁰Bela ti mam sūure yuun yīige la zamāan-ēṅa nērba.

Ti mam yeti: < Ba putē'era la boti ba tuura me wakate wuu,
ti ba ka dola mam sore. >

¹¹Mam sū-yīire la puam, mam poi me yeti:

< Ba kãn malun kē zē'e-sēka ti mam yeti m bɔ ba ti ba yē vo'osgo
la. > > >

¹²M sɔbiisi, guuse-ya ya mēṅa ti ya nēr-sēka da tara putē'e-be'ero n
wun base ti a ka bɔ Nawēnne sira, ti bōn-ēṅa base ti a welge la
Nawēnne n de vɔm dāana la. ¹³La bɔ'ɔra-ya taaba buraane daare woo,
wu Nawēnne n tɔgrɪ la tōma zīna se'em na, ti ya nēr-sēka da kē'em a
sūure ti tōon-be'ero base ti a tuuge. ¹⁴Tōma sãn ze'ele kãnjkāṅe wu
tōma n bɔ sira se'em pɔspɔsi la ka paage ba'asgo, ti wun lagum na
Krisi to'oge pure.

¹⁵Bela ti la yele Nawēnne gōṅɔ puam yeti:

< < Zīna, ya sãn wōm Nawēnne kōa,
ya da kē'em ya sūure,

wu ya yaabdōma n yuun kē'em ba sūure si'ise Nawēnne nōore
se'em na. > >

¹⁶Seba n yuun wōm Nawēnne kōa dee si'ise a nōore la de la bāna? Ba
de la nēr-seba wuu ti Amoyisi* yuun tarɪ Ezipti* tēṅa yese la. ¹⁷Seba
ti Nawēnne sūure yuun yīige la ba yuuma pinaasi la de la bāna? Ba
de la seba n yuun tōm tōon-be'ero ki weego puam na. ¹⁸Seba ti a
yuun poi yeti ba kãn kē zē'e-sēka ti a yeti a bɔ ba ti ba yē vo'osgo la
de la bāna? Ba de la seba n si'ise la. ¹⁹La tōma yē ti ba yuun ka yāṅe
kē, ban ka bɔ Nawēnne sira la íyã.

4

¹Nawēnne n bīje a nōore ti ti kē a vo'osgo zē'am na ken bōna me, bela ti guuse, ti ba'asgo ya nēr-seka da wa yē ti a koje ka kē. ²Se'ere n soe la, tōma mē wōm Nawēnne kō-yēlga la wu nēr-bāma n wōm se'em na. La bāma zē'am, yetoga la ti ba yuun wōm na ka tari yōoro bō ba, bēm īyā, seba n wōm na ka bō sira. ³La tōma seba n bō ē sira la, tōma wun kē vo'osgo la zē'am ti a yuun yeti:

< < Mam sū-yīire la puam, mam pɔi me yeti,
ba kǎn maln kē zē'e-seka ti mam yeti m bō ba ti ba yē vo'osgo
la. > >

Nawēnne n yeke bela la, ti a dēje pōn tōm a tōoma wuu ba'ase me halɩ lan pɔse dūnia nāanɔ wakate. ⁴La gulse Nawēnne gōnɔ puam zē'a ayila tɔge dabsa ayopɔi daare la yelle yeti:

< < Nawēnne nāam sela woo ba'ase,
dee vo'ose la dabsa ayopɔi daare. > >

⁵La zē'e-ēna wā la ken tɔge yeti:

< < Ba kǎn maln kē zē'e-seka ti mam yeti m bō ba ti ba yē
vo'osgo la. > >

⁶Nēr-seba n yuun wōm Nawēnne kō-yēlga la pɔspɔi la ka kē, ban ka sake la īyā. La dēni ti nērba kē. ⁷Bela ti Nawēnne le looge daare ayēma ti ba wi'iri ti zina. Ti yaabdōma n si'ise Nawēnne na, yuuma zozo'e n tole ti a boti Adavidi* tɔge wu lan pōn gulse se'em na yeti:

< < Zina, ya sǎn wōm Nawēnne kōa,
ya da ke'em ya sūure. > >

⁸Azoze* yuun sǎn tari ni ba paage la vo'osgo asira sira zē'am, Nawēnne kǎn le tɔgra vo'osgo daare ayēma yelle. ⁹Bela, vo'osgo n ken bōna Nawēnne nērba la īyā, wu Nawēnne n vo'ose dabsa ayopɔi daare la. ¹⁰Se'ere n soe la, nēr-seka n kē Nawēnne vo'osgo la zē'am, mē basri a tōoma me dee vɔ'ɔsra, wu Nawēnne n ba'ase a tōoma dee

vo'ose se'em na.

¹¹Bela, ti wısgɛ ti mɛŋa yɛ vo'osgo ɛna, ti guuse ti nɛra baa ayıla da doose st'ısgɔ la sore koŋe ka kɛ.

¹²Nawɛnnɛ yetɔga la vɔa mɛ, tara pãŋa, dee tara nɔore gãnna sukɔbgɔ n saase tara nɔa bayi. A kɛ'ertı la nɛra puam mina a sia, la a sũure yɛla wuu bɔkra, dee mina a putɛ'erɛ, la a yɛm wuu n ɛn se'em, wu sv'a n welgrı kɔb-suglsi paara kɔb-soom na. ¹³Sɛla baa ayıla ka boe n sugɛ ti Nawɛnnɛ ka yɛta. Bɔn-seba ti a nãam na wuu de la vɛelsı a zɛ'am. La de la ɛŋa n de sɛka ti ti wun ze'ele a nɛŋam tɔge ti yɛla wuu bɔ ɛ.

Azezi-krisi n gãnnı kãabgɔ kɛma wuu

¹⁴Tɔma tartı la kãabgɔ* kɛma nɛŋadãana n de Nawɛnnɛ Dayva Azezi n zom saazuum Nawɛnnɛ yire. Bela, ti ze'ele-ya kãŋkãŋɛ Nawɛnnɛ sore la doosgo puam. ¹⁵Tı tartı la kãabgɔ kɛma nɛŋadãana n tartı ti zĩile ti tɔrgɔ puam, se'ere n soe la, a yɛ nãmsgɔ mɛ sɛla woo puam wu tɔma la, la a ka tɔm tɔon-be'ero. ¹⁶Bela, base-ya ti ti lem Nawɛnnɛ n de yel-sɔnnɛ dãana la na'am bĩmbĩnne na zɛ'am la buraane, ti a zoe ti ninbãalga ɛŋɛ ti yel-sɔnnɛ, dee sɔŋɛ tɔ wakat-sɛka ti ti boori.

5

¹Nawɛnnɛ kãabgɔ* kɛma nɛŋadãana woo, ba loori ɛ na nɛrsaalba puam ti a tɔnna bɔ'ɔra Nawɛnnɛ, nɛrba ıyã. ɛŋa n bɔ'ɔrı Nawɛnnɛ bɔ'a, dee kãabra bɔ'ɔra ɛ ba tɔon-be'ero ıyã. ²A tã wun wɔm sɛba n ka mi, la sɛba n tuuri la vɔore mɛ zoe ba ninbãalga, ɛŋa mɛŋa n boe tɔrgɔ puam na ıyã. ³La de la belã ıyã, ti la dɛna a kãabe bɔ Nawɛnnɛ a mɛŋa tɔon-be'ero, la nɛrba la tɔon-be'ero ıyã. ⁴Nɛra ka tã wun nã'ase a mɛŋa dıke tɔon-ɛna bɔ a mɛŋa dɛna kãabgɔ kɛma

nējadāana, la de la Nawēnne n loori, wu ēn yuvn looge Aarō* se'em na.

⁵Bela mē, la dagi Krisi* mēᅇa n ε nā'asgɔ lebgɛ kāabgɔ kēma nējadāana, la de la Nawēnne n looge ē yele yeti:

< < Fōn de mam Dayua,
zīna mam lebgɛ la fu Sɔ. > >

⁶Dee le yele zē'a ayēma yeti:

< < Fu de la kāabgɔ kēma wakate wuu iyā,
wu Amelkisedeki n ān se'em na. > >

⁷Azezi-krisi n daan boe dūnia wā wakat-seka la, a pu'vse me sose Nawēnne n de seka n tā wun fāage ē kūm pvam base la, belem ē na nintām. Tɪ Nawēnne lerge a sosgo, a sik-m-mēᅇa la pvam. ⁸Baa la ēn de Nawēnne Dayua la, nāmsgɔ la pvam a bāᅇe sakre n de sela me. ⁹La ēn daan tōm Nawēnne n boori se'em wuu ba'ase la, a lebgɛ la seka ti nēr-seba wuu n sakri a nōore la yēti fāare n ka tarɪ ba'asgɔ a zē'am.

¹⁰Bela ti Nawēnne yele yeti, a de la kāabgɔ kēma nējadāana wu Amelkisedeki n ān se'em na.

Sēᅇe-ya nēᅇa Nawēnne doosgo la pvam da base

¹¹Yela zozo'e ti tōma tarɪ wun tɔge yel-ēᅇa yelle, la, la tɔ me ti mam pa'ale ya a vōore ti ya wōm, se'ere n soe la, yāma lebgɛ la mā'asga ka wōnna sela vōore tɔtɔ. ¹²Lan yuuge paage se'em wā, la seke ni me ti yāma lebgɛ karēnsāandōma pa'ala nērba baseba. La baa bela, yāma ken bɔɔra ti ba zāsna ya la Nawēnne pɔspɔsi yela n de nāana, wu kɔma n boori bɪ'isum dee ka bɔɔra di-ke'ene na. ¹³Nēr-seka n ken āna wu bia n mōgrɪ bɪ'isum na, a nān ka tā wun bāᅇe sela n mase, la sela n ka mase yelle bɔke. ¹⁴La seba n de bōnkegsɪ la diti la di-ke'ene, bāma n de seba n zāsum mina sela n ān sōᅇa, la be'em bɔkra.

6

¹Bela, ti sēņe-ya nēņa zāsūm bōnkegsi zāsņo, dee base Krisi* pōspōsi yela la zāsņo ti ti dēņe mina la. Tī kān le zāsna pī'iluņo yela la n de ti teege yem base tōon-be'ero n sēm na kūm, la ti bō Nawēnne sira, ²la ko'om* misga zāsņo, la ban pagli nu'usi nērba zuto pu'usra yelle, la kūm vo'ore, la dūnia ba'asgō sarıyadia yelle. ³Tī wun ēņe se'em n bela, ti sēņe nēņa, Nawēnne sān sake.

⁴Nēr-seba n bāņe Nawēnne sira bōna peelem puam, yē Nawēnne yel-sōnne, to'oge Nawēnne Sia pāņa, ⁵bāņe Nawēnne yetōga n ān sōņa se'em, dee mina dūnia seka n sēm na pāņa n ān se'em, ⁶bāma sān lebe poorum dee base Nawēnne sore, la ka tā ti ba le tarti ba leme ti ba teege yem base tōon-be'ero. Se'ere n soe la, nēr-bāma ān wu ba le ka'ara Nawēnne Dayua la kūm dō-puurņa* zuo, dee yaala ē nērba tēņasoka. ⁷Tī duke makre: Saaga sān niira zozo'e ti va'am yūura ko'om sōņa, a bōnkōla wun māale me bō seba n kōori ē na, bela a yeti Nawēnne yel-sōnne me. ⁸La va'am na sān yesra gō'osi, la mō-yooro mā'a, a ka tarti yōoro, ba wun kā la be'em bō ē, la ba'asgō ba wun yō ē na bugum.

⁹M sir-nōņrisi, baa tōma n tōgrı wāna la, tōma mi ti sūure puam sira sira ti yāma boe la so-sōņo n wun boti ya yē fāare la zuo.

¹⁰Nawēnne de la sira dāana, a kān yīm ya tōoma, la yāma n pa'ale ti yāma nōņe ē me, tōm bō a nērba, dee ken tōnna bō'ora ba leele wā.

¹¹Bela tōma n boori se'em de la ya nēra woo keņe a mēņa bela, sēnna nēņa ka paage ba'asgō, yē bōn-seba ti a tarti putē'ere gu'ura la. ¹²Tōma ka boori ti ya tara zēyāgre, ita-ya wu nēr-seba n bō Nawēnne sira, mōрге sēņe nēņa yē sela ti Nawēnne bīņe nōore ti a bō a nērba la.

Nawēnne nōore ti a bīņe la ka viiri

¹³Nawēnne n yvun bīje nōore la Abraham* na, a pɔi me, la nēra n ka boe gānna a mēṅa la īyā, a pɔi la a mēṅa ¹⁴yeti: <<Asura, mam wun ēṅe fu yel-sōnne zozo'e, dee boti fu yusti yirge zozo'e.>> ¹⁵Ti Abraham mōrge sēṅe nēṅa, yē sela ti Nawēnne bīje nōore ti a ēṅe la. ¹⁶Nērsaala sān yeti a pɔi, a pɔti la sela n gānni a mēṅa, ti pɔte la dena sela n pa'ali ti ēn yele se'em na de la sira, ti nōke'ene ba'ase. ¹⁷Bela, Nawēnne yvun boori ti a pa'ale la seba ti a bīje nōore la ba la, ti ēṅa n bīje a nōore se'em na ka viiri, bela ti a bīje a nōore dee pɔi pa'ase. ¹⁸Nawēnne n ka parni na, n ēṅe bōn-bāma bayi n ka viiri. Bela n bɔ'ori tōma buraane zozo'e, tōma seba n base sela woo, dee tara putē'ere gu'ura sela ti a yeti a ēṅe bɔ tɔ la. ¹⁹Tōma n tari putē'ere gu'ura sela la boti tōma ze la kāṅkāṅe Nawēnne nēṅam, wu ka'aga n ka tēṅa kē paage puam puam yōke kāṅkāṅe la. Bela ti tōma wun kē gāṅe fu-seka n beṅe Nawēnne zē'e-sōṅɔ* la, paage Nawēnne zē'am. ²⁰La de la zē'e-ēṅa ti Azezi dēṅe tōma kē, bɔna mī tōma īyā, dena kāabgɔ* kēma nēṅadāana wakate wuu īyā, wu Amelkisedeki n ān se'em na.

7

Amelkisedeki n de kāabgɔ kēema gānna Leviti dōma

¹Amelkisedeki ēṅa yvun de la Salem naba, la Nawēnne n gānni wuu kāabgɔ kēema. Abraham* n yvun sēṅe ka zebe yāṅe na'adōma dee lebe kulla la, Amelkisedeki n tu'vse ē kā kā'a-sōma bɔ ē*f1*. ²Ti Abraham looge lɔg-seba wuu ti a to'oge la pia puam ayila bɔ ē. Amelkisedeki yv'vɔre la vōore de la: <<Naba n uti sela n mase>>, sela n pa'ase, a de la Salem naba, n boori ti la yeti: <<Sū-mā'asum naba>>. ³Ba ka mi a sɔ, la a ma, la a yaabdōma. Sela ka boe n

pa'ali a vom pĩ'iluŋo, la a vom ba'asgɔ, a ɔn wu Nawēnne Dayua la, a de la kãabgɔ* kēema wakate n ka ba'asru.

⁴Bise-ya Amelkisedeki n taru ke'eŋo se'em. Eŋa ti ti yaaba Abraham yuun looge loŋ-seba ti a zebe to'oge la pia puam ayula bo ē. ⁵Alevi* yusi seba n de kãabgɔ kēma la, Amoyisi loɔ* la bo ba nõore ti ba to'osra pia puam ayula la Abraham yusi n de ba mēŋa nēba la zē'am. ⁶La Amelkisedeki n dagu ba buuri la to'oge pia puam wuu ayula me Abraham zē'am, dee kã kã'a-sōma bo Abraham n de seka ti Nawēnne bĩŋe nõore bo ē na. ⁷La de la sira, sē'eŋo ka boe, seka n kã kã'a-sōma bo nēra n gānnu seka ti a kã bo ē na. ⁸La sãn dena Alevi yusi la n to'osru pia puam ayula la, ba de la nērsaalba n kiiri, la Amelkisedeki de la seka ti Nawēnne gōŋo la yeti, a vɔa me. ⁹Ti tã wun yeti, Abraham n yuun looge sela ti a to'oge la pia puam ayula bo Amelkisedeki la, Alevi n de seka ti a buuri to'osru pia pure la mē bo ē me. ¹⁰Se'ere n soe la, Amelkisedeki n yuun tu'use Abraham wakat-seka la, ti Alevi nãn boe la Abraham zum puam.

Azezi n de kãabgɔ kēema wu Amelkisedeki la wakate wuu iyã

¹¹Loɔ* la ti Nawēnne yuun bo a nēba la ēebe la Leviti* dōma kãabgɔ tōoma la zuo. Leviti dōma kãabgɔ tōoma la yuun ka tã wun base ti sela woo mase ɔna wu Nawēnne n boori se'em na. A sãn tã ni, la ka le de ni ti kãabgɔ kēema buuri ayēma wa'am wu Amelkisedeki la dagna Aarō* buuri. ¹²Bela, kãabgɔ kēma tōoma la sãn teege, dēni ti loɔ la mē teege. ¹³Ti Zuudãana Azezi yelle ti ba togru la, de la buuri ayēma nēra, la buur-ēŋa nēra nēra nãn ka tōm kãabgɔ kēema tōoma. ¹⁴La de la vēelga ti ti Zuudãana la de la Azuda* buuri nēra, la Amoyisi* n yuun toge kãabgɔ kēma tōoma yelle la, a ka po toge buur-ēŋa yelle.

¹⁵Kāabgɔ kēema ayēma n ān wu Amelkisedeki n wa'am na n base ti yetɔga la ti tōma tɔgrɪ la dena vēelga. ¹⁶A ka lebge kāabgɔ kēema wu nērsaala dɔgum lɔɔ n doli se'em na, la de la vɔm n ka sā'anɪ pāŋa n botɪ a lebge kāabgɔ kēema. ¹⁷Nawēnne gōŋɔ la ye le yetɪ: < < Fu de la kāabgɔ kēema wakate n ka ba'asrɪ ɪyā, wu Amelkisedeki n ān se'em na. > > ¹⁸Bela ti kurum nōore la n ye le se'em na ka le tōnna, ēn ka tarɪ pāŋa, dee ka tara yōorɔ la ɪyā. ¹⁹Se'ere n soe la, Amoyisi lɔɔ la ka tā'age base ti sela sela mase wu Nawēnne n boorɪ se'em na. La lēle wā, Nawēnne ēŋe la so-paale, ti tōma n tarɪ putē'ere gu'ura sela n ān sōŋɔ gānna la base ti tōma lenna Nawēnne.

²⁰La sela n pa'ase, Nawēnne yvun pɔɪ mɛ. Leviti dōma n yvun lebge kāabgɔ kēma la, Nawēnne ka pɔɪ. ²¹La Azezi n lebge kāabgɔ kēema la, Nawēnne pɔɪ mɛ yetɪ:

< < Mam n de Zuudāana la pɔɪ mɛ,
mam kān viige m nōore.
Fu de la kāabgɔ kēema
wakate n ka ba'asrɪ ɪyā. > >

²²La de la bela ti Azezi base ti ti mina sōŋa sōŋa, ti Nawēnne n bɪŋe a nōore se'em la tōma la, n ān sōŋa gānna kurum nōore la. ²³Sela n le pa'ase, kurum kāabgɔ kēma la yvun zo'oge mɛ sɔɔsna taaba, se'ere n soe la, kūm n yvun gu'uri ba ti ba ka tāna tōnna wakate wuu. ²⁴La Azezi vɔa la wakate wuu, nēra ka sɔɔrɪ a kāabgɔ kēema tōoma la tōnna. ²⁵La de la bela ti a tāna wvun fāage sɛba wuu n doose la ēŋa lenna Nawēnne zē'am na, wakate wuu ɪyā. Se'ere n soe la, a vɔa mɛ wakate wuu yōkra Nawēnne sia bɔ'ɔra ba.

²⁶La de la kāabgɔ kēma nēŋadāana n ān wāna n mase ti ti tara: A de la pɔpeelem dāana, ka tara yelle, ka tara dōrga, a welge a mēŋa mɛ la tōon-be'ero dōma, ti Nawēnne zēke ē sēŋe saazuum-zuum. ²⁷Ēŋa ka

ān wu kāabgɔ kēma nēṅadōma baseba la, ti daare woo la dena ba dēṅe kāabe ba mēṅa tōon-be'ero īyā, dee yāṅa kāabe nērba tōon-be'ero īyā la. Ēṅa dīke la a mēṅa kāabe nōore ayula mā'a bɔ nērba tōon-be'ero īyā. ²⁸Amoyisi lɔɔ la yuun loori la nērsaalba pāṅa n pɔ'ɔge ti ba dena kāabgɔ kēma nēṅadōma. La Nawēnne n bīṅe a nōore dee pɔi bela poorum na, a looge la a Dayva n mase sela woo puam wakate n ka ba'asri īyā.

8

Azezi n de nōor-bīṅre paalga kāabgɔ kēma

¹Tōma yetɔga la ti tōma tɔgrɪ la zuo n wāna: Tōma tari la kāabgɔ* kēma nēṅadāana, ēṅa n zī saazuum Nawēnne n de ke'eṅo dāana la na'am bīmbīnne zuvgɔ. ²Ēṅa n boe zē'e-sōṅɔ mēṅa mēṅa la puam tōnna bɔ'ɔra Nawēnne, zē'e-ēṅa de la Zuudāana Nawēnne mēṅa yire, la dagɪ zē'e-seka ti nērsaalba tī pu'usra Nawēnne na. ³Ba loori kāabgɔ kēma nēṅadāana woo ti a bɔ'ɔra la Nawēnne bɔ'a, la a kāabra bɔ'ɔra ě. Bela ti la mē mase ti ēṅa tara sela bɔ Nawēnne. ⁴Azezi sān boe ni na tēṅa wā zuo, a ka de ni kāabgɔ kēma. Se'ere n soe la, kāabgɔ kēma pōn bɔna me bɔ'ɔra bɔ'a wu Amoyisi lɔɔ* la n de se'em na. ⁵Bāma n tōnnɪ tōon-seka la de la sela n uti Nawēnne yire la wōnne, la a māmɔgɔ. La ān wu Amoyisi n yuun yeti a tī zē'e-seka ti ba pu'usra Nawēnne na, Nawēnne yuun yele ě yeti: < < Bise sōṅa sōṅa ti fu wun tī ě ti a āna wu mam n pa'ale fu tāṅa zuo se'em na. > > ⁶La lɛɛɛ wā, Azezi tari la tōon-keko gānna bāma. Nōore ti Nawēnne bīṅe la tōma Azezi īyā la n ān sōṅa gānna, se'ere n soe la, sela ti a yeti a ēṅe bɔ tɔ nōor-bīṅre* ēna puam na n ān sōṅa gānna.

⁷Pɔspɔsi nōor-bīṅre la yuun sān ka gelge ni, la ka de ni ti Nawēnne

bĩje nõore buyi dāana. ⁸La Nawēnne zerge ba me, bela ti a yelet yeti:
< < Dabsa n sēm ti mam wun bĩje nõor-paalga la Israyeli dōma,
la Zuda dōma le.

⁹La kãn āna wu nõor-bĩjre sēka ti mam yuun bĩje la ba yaabdōma
wakat-sēka ti mam gure ba nu'usi tarı ba Ezipti* yese la.
Ba yuun ka doose mam nõore la ti mam bĩje yeti ba ēnje se'em na,
bela n soe ti mam base ba.

Mam n de Zuudāana la n yelet.

¹⁰Mam n yeti m bĩje m nõore se'em la Israyeli dōma dabsa bāma
poorum n wāna:

Mam wun duke m loo la ēnje la ba putē'era puam,
mam wun gulse ba la ba sūure puam.

Mam wun dena ba Nawēnne,
ti ba dena mam nērba.

¹¹Nēra nēra kãn le zāsum a tadāana bu a sobia yelet ē ti a bānje
Zuudāana la,
se'ere n soe la, ba nērba wuu wun bānje mam me,
halı lan pōse la kōm-pıgsı ka paage bōnkegsı.

¹²Lan de se'em na, mam wun base ba koņre la taale me,
mam kãn le tēra ba tōon-be'ero la yela. > >

¹³Nawēnne n togrı nõor-bĩjre paalga yelle la, a botı pōspōsi dāana la
dena la kēka. La sela n lebge kēka kurge deege la a boı.

9

Nērba n yuun pu'usrı Nawēnne se'em fuu-deego la puam

¹Pōspōsi nõor-bĩjre la yuun tarı la zē'e-sōņo tēņa zuo, la soa ti ba
dōla pu'usra Nawēnne. ²Ba yuun tı la fuu-deego* beņe zē'estı bayi,

wi'ira pɔspɔsi zē'a la ti Nawēnne zē'e-sōŋɔ*. Bilam, fitladōma dɔglɔ zē'a, la taabli ti ba dɔgli borbori bɔ'ɔra Nawēnne n boe mĩ. ³La fuugo la n beŋe deego buyi dāana la, ba wi'iri bilam ti Nawēnne zē'e-sōŋɔ mēŋa mēŋa. ⁴Kāabgɔ* bĩmbĩnne n de sālma ti ba yō'ori tudare a zuo n boe mĩ, pa'ase la nōor-bĩŋre daka ti ba dɪke sālma yūlge a wuu. Sālma lɔkɔ ti manni* boe a puam, la Aarō* dasaare n puse vōorɔ la, la kug-palagsi seba ti Nawēnne n bɔ nōore se'em na gulse ba zuto la n boe daka la puam. ⁵Daka la zuo, ba ēŋe la malekadōma* ti ba wi'iri ti seribē n pa'ali Nawēnne na'am pāŋa ēŋe mĩ, ti ba kempagsi yerge ti ba mā'asum pĩ zē'e-seka ti ba uti zum mĩ ti Nawēnne basra nērba tōon-be'ero taale la. La lēele wā, mam kān wegse bōn-bāma yelle pa'ale ya.

⁶Sela woo māasum na bela bɔna a zē'a, ti kāabgɔ kēma la kē'era pɔspɔsi deego la puam daare woo tōnna ba tōoma. ⁷La deego buyi dāana la puam, kāabgɔ kēma nēŋadāana la mā'a n kē'eri mĩ nōore ayula yuune puam. A sān kē'era mĩ, dēni ti a tara dūnsi zum ka bɔ Nawēnne, a mēŋa tuure, la nērba tuure iyā.

⁸Bela, Nawēnne Sia* pa'ali ti pɔspɔsi deego la n daan ken bɔna la, sore ka pake ti nēra tāna wun kē Nawēnne zē'e-sōŋɔ mēŋa mēŋa la puam. ⁹Bela de la māmsgɔ pa'ala tōma bōn-seba n boe lēele wā vōore. Bɔ'a, la dūnsi ti ba kāabri bɔ'ɔra Nawēnne na, ka tā wun base ti seba n uti bela pu'usra Nawēnne na sūure mase a zē'am. ¹⁰Ba de la dia, la bōn-yūula, la ko'om peere buuri to'oto'ore yelle mā'a. lrgɔ bāma de la iyā yela n de dūnia wā bōnɔ n yuun boe ti nērba dɔla, halt wa paage wakat-seka ti Nawēnne malun malge sela woo sōŋa.

Azezi-krisi iyā ti Nawēnne bĩŋe nōor-paalga

¹¹La Krisi n wa'am na, a de la kāabgɔ kēma nēŋadāana, ēŋa n bɔ

tōma bōn-sōma ti ti tari wā, ēṅa n kē zē'e-sōṅɔ n mase sela woo puam n gānni na, la dagi fuugo deego ti nērsaalba tī, a dagi dūnia wā bōnɔ. ¹²A daan kē Nawēnne zē'e-sōṅɔ la puam na nōore ayula mā'a wakate wuu īyā. La dagi buusi zum, la lol-pɔla zum ti a dīke kāabe bɔ Nawēnne, a dīke la a mēṅa zum kāabe bɔ Nawēnne fāage tōma wakate n ka ba'asri īyā. ¹³Ba yuun tari la buusi, la lolɔ zum, la na-sa'are ti ba yō tāmpeglum mīisra nēr-seba n sā'am lɔɔ* la, ti ba le malge ba ti ba āna sōṅa mase la lɔɔ la. ¹⁴Krisi zum na tari pāṅa me gānna bela zozo'e. Eṅa ka tari tuure, la doose la Nawēnne Sia n boe wakate wuu ti a dīke a mēṅa bɔ Nawēnne, peege ti tōon-be'ero n sēm na kūm na, ti ti sūure āna sōṅa, ti ti tōnna bɔ'ɔra vɔm dāana Nawēnne. ¹⁵La de la bela īyā ti Nawēnne bīṅe nōor-paalga ēṅa īyā. Ēn ki la īyā, a yɔ fāage nēr-seba n tuuge pɔspɔɔ nōore bīṅre la puam me, ti Nawēnne n wi ba la, ba wun to'oge bōn-sōma ti a bīṅe nōore ti a bɔ a nērba la wakate n ka ba'asri īyā.

¹⁶Nēra sān pa'ale ba wun puɪ ēṅa bōntarsōm se'em ēṅa kūm poorum, dēni ti a ki dee ti ba yāṅa puɪ ba. ¹⁷Nēra la sān ken vɔa, a nōore la ti a bɔ la de la yoogo. La de la a kūm poorum ti a tari yōorɔ. ¹⁸La mē de la bela baa la Nawēnne pɔspɔɔ nōor-bīṅre la, la de la dūnsi zum n yese ti a pɔse tōnna. ¹⁹Amoyisi* n yuun tɔge Nawēnne lɔɔ wuu pa'ale nērba wuu wu Nawēnne n yeke se'em ki'ulum na, a yāṅa dīke la lol-pɔla, la buusi zum, la ko'om, dīke pesgo kōbrɔ n ān mōlga, vile izɔpi* vōorɔ luse ba puam, mīise nōor-bīṅre gōṅɔ la, la nērba la wuu, ²⁰dee yeke yeti: < < Zu-bāna wā n pa'ali ti Nawēnne bīṅe nōore la ya le ti ya sake ē. > > ²¹Amoyisi yuun ken dīke zum na mīise fuu-deego la, la pu'usgɔ logrɔ la wuu me. ²²La sān dēna lɔɔ la sore, la ān wu la de la sela woo ti zum malgrɔ ti ba le āna sōṅa Nawēnne zē'am. Ti zum sān ka yese, Nawēnne ka basri nērba tōon-

be'ero taale.

Krisi kũm n yese nērba tōon-be'ero base

²³Lan yuun mase ti ba dıke dũnsi zum malge bōn-seba n mām̄srı sɛla n boe Nawēnne yire la, ti ba le āna sōŋa bela la, la sān dena bōnɔ la mēŋa n boe Nawēnne yire la, dēnı ti la dena kāabgɔ n ān sōŋa gānna bela. ²⁴Krisi n kē zē'e-sɛka la, dagı deego ti nērsaala ēŋe bɔ Nawēnne n mām̄srı Nawēnne zē'e-sōŋɔ mēŋa mēŋa la, a kē la Nawēnne yire mēŋa, bɔna Nawēnne nēŋam tōma sōŋre īyā. ²⁵Krisi ka kē nōore faa wu kāabgɔ* kēma nēŋadāana la n kē'eri zē'e-sōŋɔ la yuune woo la zum n dagı a mēŋa zum na, a kē la nōore ayıla mā'a dıke a mēŋa kāabe bɔ Nawēnne. ²⁶La sān dagı nı bela, a daan wun nāmse nı me nōore faa, halı lan pɔse dũnia pī'iluŋo wa paam zīna. La sɛla n de sira, a wa'am na nōore ayıla mā'a dũnia ba'asgɔ wakate wā, ti a yese tōon-be'ero, ēn dıke a mēŋa kāabe la īyā. ²⁷Nēra woo kiiri la buyıla, dee ti Nawēnne dita a sarıya. ²⁸Bela mē, Krisi dıke a mēŋa bɔ la nōore ayıla yese nērba zozo'e tōon-be'ero base. A wun le leme wa'am me nōore buyı puam, la, la kān dena tōon-be'ero yesga īyā, la de la nēr-seba n gu'uri ē ti ba yē fāare la īyā.

10

¹Amoyisi lɔɔ* la yela yuun mām̄srı la bōn-sōma n sēm na mā'a, ba ka de sɛla n de sira la mēŋa mēŋa. A botı nērba kāabra la kāabgɔ bāma mēŋa yuune woo bɔ'ɔra Nawēnne ka ba'asra. La a ka tā wun botı nēr-seba n kāabrı bela la lem Nawēnne mase sɛla woo puam.

²Sɛba n utı bela pu'usra Nawēnne na, sān malge nı me āna sōŋa wakate wuu īyā, ba kān le tē'esra ti tōon-be'ero boe bāma zuto, la ba wun base me kān le kāabra. ³La dagı bela, kāabgɔ bāma ti ba kāabrı

la, tēerı ba la ba tōon-be'ero yelle yvune woo. ⁴Se'ere n soe la, lɔlsı, la buusı zum ka tā wun yese tōon-be'ero base.

⁵Bela n soe ti Krisi n daan sēm dūnia zuo la, a daan yele Nawēnne yetı:

< < Fōn ka boorı kãabgɔ, la bɔ'a,
la fōn ēŋɛ la ıyã bɔ mam.

⁶Kãabgɔ sɛka ti ba yō'orı bĩmbĩnne zuo,
la kãabgɔ sɛka ti ba kãabrı tōon-be'ero taale basga ıyã la,
ka utı fōn sūure yēlum.

⁷Bela ti mam yetı:

< Zuudãana Nawēnne,
mam n wãna n yetı m ēŋɛ fōn boorı ti m ēŋɛ se'em na,
wu lan gulse mam yelle fu gōŋɔ pvam se'em na. > > >

⁸A dēŋɛ yetı: < < Fōn ka boorı kãabgɔ, la bɔ'a, la kãabgɔ sɛka ti ba yō'orı bĩmbĩnne zuo, la kãabgɔ sɛka ti ba kãabrı tōon-be'ero taale basga ıyã, la ka utı fōn sūure yēlum. > > La kãabgɔ bãma, ba kãabrı ba wu lɔɔ la n yele se'em na. ⁹Dee le yetı: < < Mam n wãna n yetı m ēŋɛ fōn boorı ti m ēŋɛ se'em na. > > A saam pɔspɔsı kãabgɔ la mɛ dee vıgıle buyı dãana. ¹⁰Azezi-krisi ēŋɛ la Nawēnne n boorı se'em, a dıke la a mēŋa kãabe bɔ ẽ nōore ayıla wakate wuu ıyã, ti tōma welge to'ore dena Nawēnne nērba.

¹¹Kãabgɔ kēema woo ze la a tōoma zē'am daare woo tōnna, la a kãabrı la kãabgɔ bãma mēŋa nōore faa, dee ti la ka tãna tōon-be'ero yesra. ¹²La Krisi dıke a mēŋa kãabe la nōore ayıla bɔ yese nērba tōon-be'ero wakate wuu ıyã, dee sēŋɛ ka zēa Nawēnne zuvgɔ, ¹³gu'ura ti Nawēnne wa ēŋɛ a be'eba ti ba bɔna a nãma tēŋa. ¹⁴Bela, kãabgɔ buyıla la mã'a ti a welge nērba to'ore ti ba dena Nawēnne nērba mase sela woo pvam wakate n ka ba'asrı.

¹⁵Nawēnne Sia mē pa'ale tōma ti bōn-ēja de la sira, se'ere n soe la, a yeke yeti:

¹⁶< < Mam n yeti m bīje m nōore se'em la ba dabsa bāma poorum n wāna:

Mam wun dūke m lɔɔ la ēje la ba sūure puam,
mam wun gulse ba ba putē'era puam.

Mam n de Zuudāana n yeke. > >

¹⁷Dee ken yeti:

< < Mam kān le tēra ba tōon-be'ero, la ba tuure la yelle. > >

¹⁸Bela, Nawēnne n base tōon-be'ero taale la, la ka le nara ti ba kāabra tōon-be'ero taale basga iyā.

Ti ze-ya kāṅkāṅe Nawēnne doosgo puam

¹⁹M sobiisi, tōma mi ti Azezi zum na iyā, tōma tari nōore me ti ti kē Nawēnne zē'e-sōṅɔ mēja mēja la puam. ²⁰Azezi n dūke a mēja iyā kāabe bɔ la, a āage fuugo la n beje tōma la Nawēnne na me, yo'oge so-paale n bɔ'ɔri vɔm bɔ tōma. ²¹Tōma tari la kāabgɔ kēma nējadāana n bisri Nawēnne nērba yelle. ²²Bela iyā, base-ya ti ti lem Nawēnne zē'am la puppelem, la sūure n bɔ sira zōnzōnnɔ, la sūure n peege ti ti mina ti tōon-be'ero ka le bɔna, la iyā n peege la ko-sōma. ²³Ti pa'ale-ya tin tari putē'ere gu'ura sela la da base, se'ere n soe la, Nawēnne de la sira dāana, a wun ēje ēja n bīje a nōore se'em na.

²⁴Ti bisra taaba yelle wun keṅra taaba, ti ti tara nōṅlum, dee tōnna tōon-sōma. ²⁵Ti da base taaba lagsgɔ wu nērba baseba n uti se'em na, ti bɔ'ɔra-ya taaba buraane, yāma n yē ti Azezi lemṅo daare la lem me na.

²⁶Nēr-seka n bāje Nawēnne sira la, a sān mina dee ken tōnna tōon-be'ero la yemleego, kāabgɔ ka le bɔna tōon-be'ero yesga iyā. ²⁷Sela n

yāŋa deege de la nēr-ēŋa gu'ura Nawēnne sariya, la bugum n wun di seba n si'tse Nawēnne na, la dabeem. ²⁸La sān dena la Amoyisi loo la, nēra sān sā'am loo la, ti nērba bayi, bu batā bōna mī dena kaset-dōma, ninbāalga ka boe, dēnti ti a dāana ki. ²⁹La sān dena bela, nēr-seka n kesē Nawēnne Dayua la, kān yē sibgre n de be'em halı gānna bela bu? Nēr-ēŋa bise Azezi zum na ti Nawēnne biŋe a nōore a iyā la zāŋa. La, la de la zum ēŋa ti Nawēnne dike boti nēra la welge to'ore dena Nawēnne nēra. Ēŋa dāana ken pō'oge Nawēnne Sia n de yel-sōnne dāana la me. ³⁰Tōma mi Nawēnne n yeti: < < Mam n de m lebse be'em, la de la mam n wun yo. > > La ken yeti: < < Zuudāana la n wun di a nērba sariya. > > ³¹La de la yelle mēŋa mēŋa bō seka n lui Nawēnne n de vōm dāana la nu'usum.

³²Tēege-ya yāma n daan pōse yē Nawēnne peelem n pa'ale ya sira la, lan daan ān se'em bō ya, ya daan yē nāmsgō zo'oge me, la ya wibe me ze'ele kāŋkāŋe. ³³Ba daan tūrti dee nāmsra ya nērba baseba me nērba zē'am, la yāma naage la seba ti ba nāmsri la me sōŋe ba. ³⁴La yāma zoe seba n boe yu'a deem na ninbāalga me. La ban fā yāma loŋro la, yāma sake me koŋe ba la sū-yēlga, yāma n mi ti yāma tari la bōntarsōm sōma n gānni bela n kān sā'am na iyā. ³⁵Bela, da base-ya sū-ke'eŋo seka ti ya tari la, ti ya wun yē yōro zozo'e. ³⁶Yāma de la ya narge pāŋa sēŋe nēŋa ēŋe Nawēnne n boort se'em, ti ya wun to'oge sela ti a biŋe nōore ti a bō ya la. ³⁷La gulse ti Nawēnne yeti:

< < La deege la fēe, fēfēe mā'a,
ti seka n sēm na wun wa'am,
a kān yuuge.

³⁸Nēr-seka n bō mam sira
mase mam zē'am wun vōa,
ēn bō mam sira la iyā.

La sɛka n lebe poorum,

mam sũure kãn ãna yẽlum la a dãana. > >

³⁹La sãn dena tõma, tõma dagi sɛba n lebru poorum wun sã'am na, tõma de la sɛba n bɔ sira wun yẽ fãare.

11

Bɔ sira yelle

¹Bɔ sira de la fõn mi sira sira ti fõn tari putẽ'ere gu'ura sela la, fu wun yẽ, a boti fu mina la sela n ka yẽti la nini. ²La de la kurum kurum dõma n yuun bɔ Nawẽnne sira la ãyã, ti a tɔge ba yelle sõja. ³La de la tõma n bɔ Nawẽnne sira la ãyã, ti tõma bãje ti Nawẽnne duke la a yetɔga nãam tẽja la saazuum, bela ti tõma mina ti sela n yẽti wã ze'ele la sela n ka yẽti puam.

⁴Abeli* n bɔ Nawẽnne sira la ãyã, ti a yuun kãabe kãabgo n tari yõoro gãnna Akãi kãabgo bɔ Nawẽnne. La de la bɔ sira la ãyã ti Nawẽnne to'oge a bɔ'a la, dee yeti a mase ẽja zẽ'am. Abeli n bɔ sira la ãyã, baa ẽn ki la, a yelle ken tɔgra me.

⁵La de la A'enõki n bɔ sira la ãyã, ti Nawẽnne yuun zẽke ẽ sẽje a yire, ti a ka ki, ti ba yuun ka le yẽ ẽ, Nawẽnne n zẽke ẽ na ãyã. Lan dẽje a zẽkre la, la gulse a yelle yeti, a paage Nawẽnne yem me. ⁶Nẽra sãn ka bɔ Nawẽnne sira, a ka tã wun paage a yem. Nẽra sãn lenna Nawẽnne zẽ'am, dẽti ti a bɔ sira ti a boe me, la a yɔɔri sɛba n eeri ẽ me.

⁷Anoe* n bɔ Nawẽnne sira la ãyã, ti a zoe Nawẽnne sake a nõore. Nawẽnne yuun pa'ale ẽ na bõn-sɛba n wun ẽje ti nẽrba nãn ka yẽti, ti a sake mãale õorɔ kãte, ti ẽja la a yir-dõma kẽ mĩ yẽ fãare. Bela a pa'ale ti dũnia dõma n ka sake la koje buuro me, dee ti ẽja mase

Nawēnne zē'am, ēn bɔ ē sira la ĩyā.

⁸Abraham* n bɔ Nawēnne sira la ĩyā, ti a yvun sake a wi'a, yese we'esa tēn-sēka ti Nawēnne bīje nōore ti a bɔ ē na bɔbrɛ, dee ka mina ēn we'esti zē'e-sēka la. ⁹Abraham n bɔ sira la ĩyā, a yvun sēje ka kē'era tēn-sēka ti Nawēnne bīje nōore ti a bɔ ē na pvam wu sāana la, yvun fi fuu-deego bɔna mī. A'izaki, la Azakɔbi mē yvun kē'eri la fuu-deto pvam. Nawēnne yvun bīje nōore bɔ la bāma wuu. ¹⁰Se'ere n soe la, Abraham yvun tari la putē'ere gu'ura tēn-sēka ēbre n ēebe sōja, ti Nawēnne mēja dēna sēka n make dee mē.

¹¹La de la Asaara n bɔ Nawēnne sira la ĩyā, ti baa ēn yvun de kōndɔgre dee kurgɛ zo'oge la, Nawēnne base mɛ ti a dɔge bia, se'ere n soe la, a bɔ la sira ti sēka n bīje a nōore la, wun ēje ēn yeke se'em na mɛ. ¹²Bela n soe, ti buraaga ayula n yvun kurgɛ ka zāage la kūm, dɔge yusi ti ba zo'oge āna wu wōrbiɛ n boe saazuum, bu tēntōnbī'isgo n boe ko-kāte nōorum ti nērba ka tā wun kāale ba.

¹³Nēr-bāma wuu ki la ba bɔ sira la pvam. Ba yvun ka to'oge bōn-sēba ti Nawēnne bīje nōore ti a bɔ ba la, la ba yvun tūule yē ba la halɪ zāazāare, ti ba sūure āna yēlum. La ba bāje mɛ yeke ti bāma de la sāama ka tara zē'a dūnia zuo. ¹⁴Seba n tɔgrɪ wāna la pa'alɪ ti ba eeri la tēn-sēka ti ba wun wi'ira ba mēja tēja. ¹⁵Ba yvun sān tē'esra tēn-sēka ti ba yese dee base la yelle ti a sia tara ba, ba tari nɪ sore wun lebe bilam mɛ. ¹⁶Lan de se'em na, ba yvun eeri la tēn-sēka n ān sōja gānna. Tēn-ēja de la Nawēnne yire. Bela n soe ti Nawēnne ka zoe yānne ti ba wi'ira ē ti ba Nawēnne, la de la ēja n māasum tēja bɔ ba.

¹⁷La de la Abraham n bɔ Nawēnne sira la ĩyā, ti a yvun dɪke A'izaki ti a kāabe bɔ Nawēnne, wakat-sēka ti Nawēnne make ē bise yetɪ a dɪke a dayva la bɔ ē na. A'izaki n de a dayɔ-yēja la ti a yvun dɪke ti a

kāabe bɔ, dee ti la dena la ɛ̃ɲa yelle ti Nawēnne yuun biɲe nōore la ɛ̃ le. ¹⁸Nawēnne yuun yeti: <<La wun doose la A'izakɪ ti fu yē yusi ti mam biɲe nōore la.>> ¹⁹Abraham yuun tari la putē'ere ti Nawēnne tã wun vo'oge A'izakɪ mɛ. Bela n soe ti Nawēnne lebse bɔ ɛ̃ a dayua. La ãn wu a vo'oge ɛ̃ mɛ na, yel-ɛ̃na puam mām̃sgɔ n boe mĩ.

²⁰La de la A'izakɪ n bɔ Nawēnne sira la ɪyã, ti a kã kã'a-sōma n de sela n sēm bɔ Azakɔbi, la A'eso.

²¹Azakɔbi n bɔ Nawēnne sira la ɪyã, ti ɛ̃n yuun wa yɔna kũm na, ti a kã kã'a-sōma bɔ Azozefu dayɔɔsi bayi, tike a dasaare ka dũma nã'ase Nawēnne.

²²Azozefu n bɔ Nawēnne sira la ɪyã, ti ɛ̃n yuun wa dee kũm na, ti a ye le Israyeli dōma yeti, ba wun wa yese Ezipti* tɛ̃ɲa mɛ, dee pa'ale ba wun wa ɛ̃ɲe ɛ̃ɲa kōba se'em.

²³Amoyisi* dɔgrɪba n bɔ Nawēnne sira la ɪyã, ti ba yuun dɔge ɛ̃, dɪke ɛ̃ sugɛ wōr-sitã. Ba yē mɛ ti a de la bia n ãn sōɲa, ti ba ka zoe dabeem la naba la n bɔ nōore se'em na.

²⁴Amoyisi n yuun bɔ Nawēnne sira la ɪyã, ti ɛ̃n wa lebge bōnkɛka la, ti a zagse ti ba da wi'ira ɛ̃ɲa ti naba Afaarō pɔyua la dayua. ²⁵A yuun boori mɛ ti a lagum na Nawēnne nērba la po nãmsra, gãna ɛ̃ɲa n uti sũ-yɛ̃lga la sela n de be'em wakate fɛ̃fɛ̃e. ²⁶A bɪse mɛ ti ba sãn pɔ'oge ɛ̃ɲa wu ba wun pɔ'oge Kriisi* la, n tari yōorɔ zo'oge gãna Ezipti tɛ̃ɲa bōntarsōm wuu. Se'ere n soe la, a yuun tari la putē'ere gu'ura yɔɔrɔ n boe nɛ̃ɲa.

²⁷ɛ̃n bɔ Nawēnne sira la ɪyã, ti a ze'ele Ezipti fōrge dee ka zoe naba la sũ-isgre, a yuun mōrge mɛ ze'ele kãɲkãɲɛ, se'ere n soe la, a yē la Nawēnne ti ba ka yɛ̃ti la nini. ²⁸La ɛ̃n bɔ sira la ɪyã, ti a boti Israyeli dōma ku Zɔɔg-base* pebila ɛ̃ɲɛ zum mĩise deto nōa, ti maleka* seka n wun ku kɔm-kēendōma la, da ku Israyeli dōma kɔm-kēendōma.

²⁹Israyeli dōma n bɔ Nawēnne sira la ñyã, ti mōg-mōlga la ko'om yuun welge dee base tēn-ke'ēŋa ti ba doose tole, ti Ezipti dōma mē paage doose ti ba tole, ti ko'om di ba.

³⁰Israyeli dōma n bɔ Nawēnne sira la ñyã, ti ba yuun sēŋe kaage Zeriko tēŋa dabsa ayopɔɪ, ti a lalsɪ lui.

³¹Arahabi n de pɔg-seka n yuun utɪ yalsɪ la n bɔ Nawēnne sira la ñyã, ti a yuun to'oge nēr-seba n sēŋe ti ba lalse bise Zeriko tēŋa n ãn se'em na a yire sōŋa, bela ti a ka po naage la sɪ'ɪsrɪba la ki.

³²Yela zozo'e boe mē ti mam wun tɔge ni, la nēŋa ka boe ti mam wun tɔge Azedeyō, la Abaraki, la Asāmsō, la Azefte, la Adavidi*, la Asāmweɪ, la Nawēnne nōtɔ'ɔsrɪba* la yelle. ³³La de la ban bɔ Nawēnne sira la ñyã, ti ba yāŋe na'adōma to'ose ba so'olum, ba tōm sela n mase mē, ba yē ti Nawēnne n bīŋe nōore se'em na ēŋe mē, ba mūm gɪgma nōa mē. ³⁴La ba kīŋe bugum n diti la pāŋa mē, ba pōse sukɔbgɔ kūm mē, ba yē pāŋa mē ba tɔrgɔ puam, dena gāndɔɔrɔ zebre zē'a, zebe yāŋe satēma zebzebrɪba dige ba. ³⁵Pɔgstɪ yē ba nērba n ki mē dee vo'oge. Seba yē nāmsgɔ mē zozo'e dee zagse yolsgo, se'ere n soe la, ba boortɪ ti ba wa vo'oge mē yē vɔm n ãn sōŋa gānna. ³⁶Ba la'arɪ seba mē, wē ba la kafōbsɪ, ba ba seba mē la bānsɪ kē'esē yu'a deem. ³⁷Ba lobe seba la kuga kv, wā seba la sɔya kv, se baseba la sukɔbrɔ kv. Ti seba eera ye'ena, ye piisi gāna bu buvstɪ gāna, sake ka tara sela sela, ti ba f'ɔna ba, nāmsra ba. ³⁸Ba yuun eertɪ la weem, la tānsɪ zuto, gā tānsɪ yogro, la tēŋa yogro puam. Dūnia ka narɪ ti a tara nēr-bāma.

³⁹Nēr-bāma wuu, Nawēnne tɔge ba yelle sōŋa mē ban bɔ ē sira la ñyã, la baa bela ba ka to'oge Nawēnne n bīŋe nōore ti a bɔ ba sela la.

⁴⁰Nawēnne yuun pōn dēŋe looge yem ti a ēŋe la sela n ãn sōŋa gānna bɔ tōma, bela ti a ka botɪ ba mase sela woo puam, ti tōma ka naage la

ba.

12

Ti sake ti So Nawēnne demsgo

¹Bela, tōma n tari nērba zozo'e n gilge tōma pa'ala ti sore la, ti mē base bōn-seba n gu'uri ti sēnne, la tōon-be'ero ti ti uti nāana nāana la, dee mōrge zota zua n boe ti nēja na. ²Ti busra-ya Azezi, ēja n boti ti bə sira, dee wun tari ti paage a ba'asgo zē'am. A wībe me ki dɔ-puurja* zuo ka zoe yānne, se'ere n soe la, a yē sū-yēlga sēka n gu'uri ē na me, la a yāja zī la Nawēnne na'am bimbīnne zuugo.

³Tē'esε-ya bise, tōon-be'ero dōma n si'ise ē, nāmse ē se'em, ti a wībe, ti ya da base ti ya iyā ki ti ya buraane bo'oge. ⁴Yāma n zεbrɪ la tōon-be'ero la, ya ken ka zεbe ki. ⁵Da yīm-ya kā'anjo sēka ti Nawēnne kā'an ya wu nēra n kā'anɪ a kɔma se'em yeti:

< < M bia, Zuudāana sān sɪbge fɔ,

da dɪke ti la dena zāja,

a sān pa'ale fɔ fu tuure,

da base ti fu buraane bo'oge.

⁶Se'ere n soe la,

Zuudāana demsɪ la sēba ti a nōje,

dee sɪbgra sēka woo ti a dɪke ti a dena a bia. > >

⁷Wībra-ya, ti la de la ya demsgo, Nawēnne uti ya la a kɔma urgɔ. Bia ka boe ti a sɔ ka sɪbgra ē. ⁸Nawēnne sān ka demse ya wu ēn uti a kɔma wuu se'em na, bela ya yi de la tāmpīiba, ya dagɪ a kɔma. ⁹La sān dena ti sɔdōma n dɔge ti la, ba daan sɪbgrɪ ti me, dee ti ti nanna ba. Bela, ti sake ti So Nawēnne n boe saazuum nōore gānna, ti ti wun yē vɔm a zē'am. ¹⁰Ti sɔdōma la daan sɪbgrɪ ti la wakate fēfēe iyā wu

bāma mēṅa n tē'esε se'em na. La Nawēnne sɪbgrɪ tɪ la tōma mēṅa sōṅre īyā, tɪ a botɪ tɪ welge to'ore dɛna pupeelem dōma wu ēṅa la.

¹¹Wakate sɛka tɪ ba sɪbgrɪ tōma la, la de la sū-sā'aṅɔ, la ka de sū-yēlga. La bela poorum nēr-seba n yē sɪbgrɛ ēṅa la yēti a yōoro mɛ, n de sū-mā'asum, la wɔm n masε āna sōṅa.

Tɪ mōrge da zagε Nawēnne yel-sōnne

¹²Bela, keṅe-ya ya nu'usi n targe, la ya dūma n ki la. ¹³Base-ya tɪ ya nāma la sēnna sorɔɔɔ n de tēntēesɪ zuto, tɪ nēr-seka n dū'usri la da lui, a wun yē īmā'asum.

¹⁴Mōrge-ya ε tɪ sū-mā'asum bɔna yāma la nērba wuu tēṅasuka, la ya ε pupeelem. Tɪ pupeelem sān ka bɔna, nēra ka tā wun yē Zuudāana la. ¹⁵Guuse-ya tɪ ya nēra nēra da wa mōṅε a mēṅa Nawēnne yel-sōnne, ken guuse-ya tɪ nēr-seka da āna wu yēg-toogo n puse ya tēṅasuka, wun base tɪ toogo la loṅe nērba zozo'e sā'am ba. ¹⁶Da base-ya tɪ ya nēra nēra ita yalsɪ, bu nēra n pɔ'ɔri sela n de Nawēnne bōnɔ, wu A'eso* n yuun dɪke a kēnnɔ bōnɔ teege dia laaga ayɪla la. ¹⁷La yāma mi tɪ bela poorum, ēn wa bɔɔra tɪ a sɔ kā kā'a-sōma bɔ ē, ēṅa n de kēema īyā la, a ka tā'age. A ka yē sore yāṅε teege yelle la tɪ a ēṅe la, baa ēn kellɪ la.

¹⁸Yāma n lem Nawēnne zē'am se'em na, de la to'ore la Israyelɪ dōma n yuun lem sela tɪ ba tā wun kalum dee yē zē'am na. Bāma yuun lem na tāṅa yē bugum n diti, la lika n ān lim, la kusebgo kāte. ¹⁹La ba wōm na benkonne peebgo, la kōa n tɔge, tɪ nērba la n yuun wōm na belem yetɪ, la da le tɔge pa'ase. ²⁰Se'ere n soe la, ba ka tā wun to'oge ēn ye le se'em yetɪ: < < Sɛka sān kalum tāṅa la, baa a sān dɛna dūṅa, ba lobe ē na kuga ku > > la. ²¹Bōn-seba n yuun ēṅe la bɔ'ɔri la dabeem, halɪ tɪ Amoyisi* ye le yetɪ, ēṅa zotɪ la dabeem, halɪ tɪ ēṅa

gōgra.

²²La yāma lem na tāṅa ti ba wi'iri ti Siyō* tāṅa n de wɔm dāana Nawēnne tēṅa, ēṅa n de Zerizalem* mēṅa mēṅa n boe Nawēnne yire, ti malēkadōma* tusa tusa bɔna mī. ²³La ya ken lem na Nawēnne nērba lagsgo n de a kɔm-kēendōma ti ba yu'ura gulse Nawēnne yire la. La ya lem Nawēnne n de nērba wuu sariyadita. Ya lem na nēr-seba n mase Nawēnne zē'am, dee mase sela woo puam na susi zē'am.

²⁴Yāma lem na Azezi n de seka n boe Nawēnne la tōma tēṅasuka boti Nawēnne biṅe nōor-paalga la tōma le. A zum na n yese bɔ tōma la pa'ale la sela n ān sōṅa gānna Abeli* zum na.

²⁵Ita-ya guusgo, da zagse ka selse seka n togru la ya le la. Seba n yuun zagse ka selse nēr-seka n kā'anɪ ba tēṅa zuo la ka pōse nāmsgo. Bela, tōma sān zagse ka selse seka n boe Nawēnne yire la yetoga, tōma kān yāṅe pōse. ²⁶A kōa la yuun boti tēṅa la mīim me, la leele wā, a biṅe la nōore yeti: < < Mam wun le mīim dūnia me nōore ayila, la dagi dūnia mā'a, saazuum mē wun mīim me. > > ²⁷Ēn yeti a wun le mīim nōor-ayila la, pa'ale me ti sela ti a nāam na wun mīim me sāl'am bɔi, dee ti sela n kān tā'age mīim sāl'am na mā'a n wun weege. ²⁸Bela, tōma n wun to'oge so'olum n kān sāl'am na iyā, base-ya ti ti pu'usra Nawēnne a yel-sōnne, tōnna se'em n wun āna a sūure yēlum bɔ'ora ē, la ti nā'asra ē, dee zota ē. ²⁹Lan de se'em na, tōma Nawēnne ān wu bugum n diti.

13

Ti wun ita se'em paage Nawēnne yem

¹Ken nōṅe-ya taaba wu sobiisi la. ²Da base-ya sāama sāano ɪrgo, ti nērba baseba ēṅe la bela, ēṅe malēkadōma* sāane dee ka bāṅe.

³Tēra-ya sēba n boe yu'a deem na yelle, wu yāma mē po bōna la yu'a deem na. Tēra-ya sēba ti ba nāmsrɪ ba la yelle, wu yāma mēŋa n nāmsrɪ la.

⁴Base-ya ti pɔgdire tara nā'asgɔ, dee da base ti dēgrɔ tōoma bōna mī, se'ere n soe la, Nawēnne wun di nēr-sēba n uti yalsɪ, la nēr-sēba n tūuli la sarɪya mɛ.

⁵Da base-ya ti ligri nōŋlum sɔna ya. Base-ya ti ya sūure āna yēlum la yāma n tarɪ sɛla la, ti Nawēnne yetɪ: < < Mam kān base fɔ, mam kān malɪn base fɔ. > > ⁶Bela n soe ti tōma nēra woo tāna wun ye le la buraane yetɪ:

< < Zuudāana de la mam sōŋra,
mam kān zoe dabeem.

Nērsaala tā wun ēŋe mam na bēm? > >

⁷Tēra-ya ya nēŋadōma n mōole Nawēnne yetɔga bɔ ya la yelle. Bise-ya ba vɔm n daan ān se'em ka paage ba kūm, ti ya mē ita bāma n bɔ sura ēŋe se'em na. ⁸Azezi-krisi de la ēn ān se'em zaam, la zīna, la wakate wuu. ⁹Da base-ya ti zāsŋɔ sāasɪ buuri to'oto'ore botɪ ya tuuge. Sɛla n ān sōŋa de la ti base ti Nawēnne yel-sōnne bɔ'a la keŋe ti sūure, la, la da dɛna ɪrgɔ sɔa n de dia yelle, sēba n dolɪ ɪrgɔ bāma la ka yē yōorɔ.

¹⁰Tōma tarɪ la kāabgɔ*, ti Zifdōma n tōnnɪ ba kāabgɔ tōoma la ka tara sore ti ba naage tōma kāabgɔ la pɔam. ¹¹Zifdōma kāabgɔ kēma nēŋadāana tarɪ la dūnsɪ zum kē'era Nawēnne zē'e-sōŋɔ la kāabra tōon-be'ero taale basga ūyā, dee tara ba nēnnɔ na yesra tēŋa la kēnkɛrŋa yō'ora. ¹²La de la bela ti Azezi mē yese tēŋa la kēnkɛrŋa ka ki, ti a mēŋa zum malge nērba ti ba āna sōŋa Nawēnne zē'am. ¹³Bela, ti yese-ya sēŋe a zē'am tēŋa la kēnkɛrŋa ka po sake pɔ'ɔrɛ la. ¹⁴Tōma ka tarɪ tēŋa dūnia wā zuo n boe wakate wuu ūyā, tōma eerɪ la tēn-

sɛka n sɛm na.

¹⁵Azezi ïyã, ti nã'asra Nawɛnne wakate wuu ti la ãna wu kãabgɔ la, la boori ti la yeti ti nɔore yetɔga zɛke a yu'bre pa'ale ɛn de sɛka. ¹⁶Da base-ya ur-sɔma ɪrgɔ, la taaba sɔŋre, ti tɔon-bãma n ãn wu kãabgɔ n uti Nawɛnne sũure yɛlum.

¹⁷Sakra-ya ya nɛŋadɔma nɔore, dee nanna ba yetɔga. La de la bãma n bisri yãma n doli Nawɛnne sore la yelle, ba wun ka tɔge pa'ale Nawɛnne bãma n bise ya yelle se'em mɛ. Eŋe-ya ya wun ɛŋe se'em ti ba tã'age tɔm ba tɔoma la sũ-yɛlga da yɔnna, ti bela ka tari yɔoro bo ya.

¹⁸Pu'usra-ya Nawɛnne bɔ'ora tɔ. Tɔma mi ti sũure puam mɛ ti tɔma ka ɛŋe be'em, tɔma boori mɛ ti ti yel-ɪre ãna sɔŋa sɛla woo puam.

¹⁹Mam sosri ya mɛ zozo'e ti ya pu'usra m ïyã ti m yɛ sore leme wa'am ya zɛ'am tɔtɔ.

Pu'usgɔ, la ba'asgɔ yetɔga

²⁰La de la Nawɛnne n de sũ-mã'asum dãana n vo'oge ti Zuudãana Azezi, ti a bisra tɔma yelle wu dũnsiin-ke'ema, a zum na ti Nawɛnne dɪke biŋe nɔore la tɔma wakate n ka ba'asri la ïyã. ²¹Nawɛnne wun base ti ya tã'age ita sɛla woo n ãn sɔŋa, dɔla a yem n boori se'em. A wun base ti sɛla n ãn a sũure yɛlum ɛŋe ti puam, Azezi-krisi ïyã, ɛŋa n de sɛka n mase nã'asgɔ wakate n ka ba'asri. Amina.

²²M sɔbiisi, mam sosri ya ti ya sake to'oge kã'aŋɔ yetɔg-bãna wã, ti mam n gulɛ ya gɔn-sɛka wã ka zo'oge. ²³Bãŋe-ya ti ba yo'oge ti sɔbia Atimɔti base mɛ, a sãn wa'am tɔtɔ, mam na ɛŋa wun doose taaba wa'am wa kaage ya.

²⁴Pu'use-ya ya nɛŋadɔma, la nɛr-sɛba wuu n de Nawɛnne nɛrba. Itali dɔma pu'usri ya.

²⁵Nawēnne yel-sōnne wun bōna la ya wuu. \f1 7:1 Bise-ya Pīilunjo
Gōṅṅ 14:17-20. \e

JAS

Azaki

Gōn-seka ti Azaki gulse

Bilgre

Nērba zozo'e tē'esē ti la de la Azaki n de Azezi yibga la n gulse gōṅṅ wā. A gulse bō la Nawēnne nērba wuu n wirge bōna dūnia zuo. A gulse pa'ale ba la sela ti ba uti ti la ka āna sōṅa, pa'ale ba ban mase ti ba vōa se'em wakate wuu.

Azaki tōge la yela buuri to'oto'ore yelle:

A tōge la yem yelle, la bōntarsōm, la nōṅṅ yelle, la yelle sān paage tōma, la tōon-be'ero ɔrgo yelle. A yeti tōma sān yeti tōma doli la Nawēnne, la mase me ti ti ita Nawēnne n yeke se'em na (sapitri 1).

A yeti la ka mase ti ti tū'usra nērba, dee pa'ale ti bō sira, la tōon-sōma doli la taaba (sapitri 2).

A yeti ti guuse ti mēṅa la ti nōore yetōga, dee pa'ale yem sira sira n de seka (sapitri 3).

La a kā'an na seba n wē'eri nōke'ene, la nēr-seba n nōṅṅ bōnō, la nēr-seba n zergri taaba, la seba n de pa'al-m-mēṅa dōma, la seba n de bōntatba (4:1-5:6).

Gōṅṅ la ba'asgō, a kā'an na Azezi nērba yeti ba tara sū-mā'asum. Yelle sān paage ba, bu la sān dena sū-yēlga, bu bā'asi, ba pu'ose Nawēnne (5:7-20).

Azaku gōṅɔ wā pa'ale ti fu sãn bɔ Nawēnne sira, fu tōoma n wun pa'ale ti fu bɔ sira. Bela, nēra sãn yeti ēṅa bɔ Nawēnne sira, dee ka tōnna tōon-sōma, la de la zāṅa (2:26).

Gōn-seka ti

Azaku

gulse

1

¹Mam Azaku n de Nawēnne, la ti Zuudāana Azezi-krisi tōntōnna n gulse gōṅɔ wā pu'usra Nawēnne nēba wuu n wurge bɔna zē'a woo la.

Yelle sãn paage nēra

²M sɔbiisi, nāmsgɔ to'oto'ore sãn paage ya Azezi sore la puam, ya dıke ba ti ba dena ya sū-yēlga zōnzōnnɔ, ³se'ere n soe la, ya mi ti nāmsgɔ sãn paage ya, ya bɔ sira la puam, ti ya yāṅe wibe, la wun botu ya mōrge ze'ele la kãṅkãṅe. ⁴La mōrge-ya ze'ele kãṅkãṅe ka paage a teka, ti ya wun mase sela woo puam, dena nēba n bi, ti sela ka pɔ'oge ya.

⁵Yem sãn pɔ'oge ya nēr-seka, a sose Nawēnne n bɔ'ori nēba wuu la yemleego dee ka mōṅra ba la, ti a wun bɔ ē. ⁶La a sãn sose ē, dēni ti a bɔ ē sira, da sē'ena baa fēfēe. Se'ere n soe la, nēr-seka woo n sē'eni, a ān wu ko-kāte ko-mī'isi ti kusebgo vugri wē'era ba ti ba yegna se'em na. ⁷Nēr-ēṅa buuri da tara putē'ere ti a wun to'oge sela Zuudāana la zē'am. ⁸A de la nēra n de putē'era bayi dāana, ti a yem yɔɔra ēn uti bōn-seba la wuu puam.

⁹La mase ti sɔbi-seka n de nasa ēṅe sū-yēlga, ti Nawēnne zēkri ē me.

¹⁰La bōntarsa mē ēņe sū-yēlga Nawēnne n sikri ē na, se'ere n soe la, a bōntarsōm na wun tole wu mō-puuro la. ¹¹Wunteeņa sān wōņe mōogō, a puuro la zēkri me suura kuta, ti ba dasānne na bōta.

Bōntarsa mē ān na bela, a wun ki me a bōntarsōm na tōoma puam.

¹²Nēr-seka n wībri nāmsgō puam tari zu-yēlga. Se'ere n soe la, ēn ze'ele kāņkāņe la, Nawēnne wun bō ē bō'a n de vōm n ka ba'asri ti a bīņe nōore ti a bō seba n nōņe ē na.

¹³Yelle sān paage nēra boti a bōra ti a ēņe be'em, a da yeti Nawēnne n base ti ēņa bōra ti a ēņe be'em. Sela ka tā wun boti Nawēnne ēņe be'em. La Nawēnne mē ka boti nēra bōra ti a ēņe be'em. ¹⁴La de la nēra woo yemleego n de be'em n pā'asri ē, boti a kē'era yela puam. ¹⁵La be'em yemleego sān yōke puore, a dōgrī la tōon-be'ero. La tōon-be'ero la sān wa bī, a sēm na kūm.

¹⁶M sōbi-nōņrīsi, da pā'ase-ya ya mēņa. ¹⁷Bō'a wuu n ān sōņa, la bō'a n mase wuu ze'eti la saazuum, Nawēnne n de peelem dāana la zē'am. Ēņa n nāam bōn-seba wuu n boe saazuum nēera peelem, ti ba tēera, la ēņa ka teerī, a ka tari lika. ¹⁸Ēņa mēņa n boorī ti a base ti a sira yetōga la bō tōma vōm. A ēņe bela ti tōma dena la pōspōsi dōma bōn-seba wuu ti a nāam na puam.

Selsra-ya, dee ita Nawēnne n yele se'em na

¹⁹M sōbi-nōņrīsi, bāņe-ya bōn-ēna wā sōņa, nēra woo mōrge selsra sōņa, la a mā'age a mēņa tōgra, la a da isgra sūure tōtō. ²⁰Nērsaala sūure sān isge, a ka iti sela n mase Nawēnne zē'am. ²¹Bela, base-ya sela n de tōon-dēgrō buuri wuu, la sela n de putvulgō wuu, dee sike ya mēņa to'oge Nawēnne yetōga la ti a dīke ēņe ya sūure puam, n tā wun fāage ya la.

²²Da pā'ase ya mēņa, dena-ya nērba n sakri Nawēnne yetōga, da

dɛna-ya nĕrba n selsrɪ mǎ'a. ²³Nĕr-seka woo n selsrɪ yetɔga la, dee ka sakra ita lan yeke se'em na, a dǎana ǎn wu nĕra n bise busga puam yĕ a mĕɲa n ǎn se'em, ²⁴la ĕn bise a mĕɲa ku'ulum dee fōrge la, a dare yĭm ĕɲa n ǎn se'em na mɛ. ²⁵La nĕr-seka n tarɪ Nawĕnne lɔɔ n mase sōɲa n yolsrɪ nĕrba la, dee sake ĕ sōɲa ita lan yeke se'em na, ĕɲa dagɪ nĕra n selsrɪ dee yĭnna, ĕɲa dǎana tarɪ la sū-yĕlga ĕɲa n utɪ sela la puam.

²⁶Nĕr-seka woo n tĕ'esrɪ tɪ ĕɲa de la nĕra n dolɪ Nawĕnne, dee ka tǎna a nōore yōkra, a pǎ'asrɪ la a mĕɲa, nĕr-ĕɲa Nawĕnne doosgo la de la zǎɲa. ²⁷Tɪ Sɔ Nawĕnne n boorɪ tɪ tɪ dɔla ĕ se'em tɪ la ǎna sōɲa ka tara dĕgrɔ n wǎna: La de la fu bise kubsɪ la pɔkōpa yelle ba nǎmsgɔ puam, la fu guuse fu mĕɲa la dūnia wǎ tōon-dĕgrɔ.

2

Da tū'usra-ya nĕrba

¹M sɔbiisi, yǎma n sake tɪ Zuudǎana Azezi-krisi n tarɪ na'am pǎɲa la, da tū'usra-ya nĕrba. ²Tɪ duke makre, wu yǎma sǎn lagse taaba tɪ nĕra n pire sǎlma nutua dee ye fu-sōma wa'am wa kĕ ya lagsgɔ la zĕ'a, tɪ nasa n mĕ ye fu-zōra kĕ, ³tɪ yǎma sǎn bise nĕr-seka n ye fu-sōma la yeke ĕ yetɪ: <<Wa'am wa zĭ'ire kalam n de zĕ'e-sōɲɔ>>, dee yeke nasa la yetɪ: <<Ze saazuo, bu zĭ'ire tĕɲa mam nǎma zĕ'am wǎ.>> ⁴Yǎma sǎn ĕɲe wǎna, yǎma ka tū'usri nĕrba sra? Bela, ya tarɪ la putĕ'e-be'ero bɔkra nĕrba, yetɪ ayĕma n gǎnnɪ ayĕma.

⁵M sɔbi-nōɲrɪsɪ, selse-ya. Nawĕnne looge la nĕr-seba tɪ dūnia dōma bɪsrɪ tɪ ba de la nasdōma la, botɪ ba bɔ ĕ sra dɛna bōntatba, tɪ ba wun wa bɔna a so'olum tɪ a bĭɲe nōore tɪ a bɔ seba n nōɲe ĕ na puam. ⁶La yǎma pɔ'orɪ la nasdōma. La dagɪ bōntatba n nǎmsrɪ ya, dee yōgra

ya sēna sariyaditba zē'am? ⁷La de la bāma n pɔ'ɔri Kriisi yu'ur-sōŋɔ sēka ti ba bɔ ya la.

⁸Ya sān sake ita Nawēnne so'olum* lɔɔ la n gulse Nawēnne gōŋɔ puam yeti: <<Nōŋɛ fu tadāana wu fu mēŋa la >>, ya ēŋɛ sōŋa. ⁹La ya sān tū'usra nērba, ya tōm na tōon-be'ego, la lɔɔ la pa'ale ya ti ya tōm na tōon-be'ego. ¹⁰Nēr-sēka sān sake lɔɔ la wuu, dee si'ise ayila tōm tōon-be'ego, a si'ise la ba wuu. ¹¹Nawēnne n yeti: <<Da ēŋɛ yalsi >> la, ēŋa n ken yeti: <<Da ku nēra >>. La fu sān ka ēŋɛ yalsi, dee ku nēra, fu de la nēra n si'ise lɔɔ la. ¹²Tɔgra-ya dee tōnna ti la mase la lɔɔ n yolsri nērba la, mina ti Nawēnne wun dɩke la ēŋa di ya sariya. ¹³Nawēnne sān wa dita sariya, a kān zoe ninbāalga la nēr-sēka n ka zoti a taaba ninbāalga. Fu sān zoe nērba ninbāalga, Nawēnne mē wun zoe fu ninbāalga.

Bɔ sira, la tōoma

¹⁴M sɔbiisi, nēra sān yeti, ēŋa bɔ Nawēnne sira, dee ka tōnna tōoma n pa'ali bela, a yōorɔ de la bēm? Bɔ sira ēŋa tā wun fāage ē mɛ bu? ¹⁵Ti dɩke makre, wu sɔbia n ka tari fuugo yɛɛra, dee ka tara dita, ¹⁶ti yāma nēra ayila sān yele ē yeti: <<Sēŋɛ la sū-mā'asum ka di tige, dee ye fuugo ti ɔɔɔ da tara fɔ >> dee ka bɔ ē sōŋre sēka ti a boori la, a yōorɔ de la bēm? ¹⁷La mē de la bela la bɔ sira, ya sān bɔ sira ti la ka lagum na tōoma, a de la zāŋa.

¹⁸La nēr-sēka tā mɛ yeti, ayēma bɔ la sira, la ayēma tōnni la tōon-sōma. Mam wun yele ē yeti, pa'ale mam fu bɔ sira la n ka lagum na tōoma la, ti mam wun dɩke m tōon-sōma la pa'ale ti mam bɔ sira.

¹⁹Fōn sake mɛ ti Nawēnne ayila mā'a n boe. La ān sōŋa. Kulkā'arsi* mē sake la bela, dee gōgra la dabeem. ²⁰A ka tari yem dāana, fōn boori mɛ ti m pa'ale fɔ ti fu sān bɔ sira ti la ka lagum na tōoma, a ka

tari yōorɔ? ²¹Ti yaaba Abraham* ti Nawēnne yuun yeti a mase ya la, la de la a tōoma ñyã, ěn yuun dıke a dayua A'izaki ti a kãabe bɔ Nawēnne na ñyã. ²²Fu yē me ti a bɔ sira, la a tōoma la lagim na taaba. A tōoma la ñyã n boti a bɔ sira la mase sōŋa sōŋa. ²³Bela ti Nawēnne gōŋɔ n gulse se'em na ěŋe. La yeti: < < Abraham bɔ la Nawēnne sira, ti Nawēnne bise a bɔ sira la, yeti a mase me ěŋa zē'am. > > Ti Nawēnne wi ě yeti a sɛ. ²⁴Ya yē ti la de la nēra tōoma n boti Nawēnne yeti a mase ya, la dagi a bɔ sira mā'a ñyã.

²⁵La yuun mē de la bela la Arahabi n de pɔka n uti yalsi la. Zifdōma n yuun tōm nēra la, ti a to'oge ba sugē a yire, boti ba doose sore ayēma kule la, tōon-ēŋa ñyã ti a mase Nawēnne zē'am.

²⁶Nēra sia sãn fōrge deege ě, a ñyã de la kũm. La mē de la bela, nēra sãn bɔ sira ti la ka lagim na tōoma, la de la zãŋa.

3

Tara ya zuluŋa sōŋa

¹M sɔbiisi, da kãn bɔɔra-ya ti ya wuu dena karēnsãandōma. Se'ere n soe la, ya mi ti tōma seba n de karēnsãandōma la sariyadia n wun dena toogo gãna. ²Tōma wuu tuuri me zozo'e. Nēra sãn ka tuura a yetɔga puam, a de la nēra n mase sela woo puam, tãna wun yōkra a mēŋa sōŋa sōŋa. ³Tōma sãn ěŋe wiiri nōore salba ti ba sake ita tin boori se'em, ba ñyã la wuu uti la tōma n boori se'em. ⁴Ken bise-ya ōornɔ n ãn se'em na, baa ban kãrge se'em, dee ti kuseb-kãra vugra zã'ara ba la, ba tari la dɔ-pıka wēgrā ba, ti ba sēnna we'esa zē'e-seka ti seka n tari ba la boori. ⁵Nērsaala zuluŋa mē ãn na bela, a de la ñyã zē'a ayula n ãn pıka pıka, dee tɔgra yel-kãra.

La de la bug-pıka n tã wun di we-kãte wuu. ⁶Zuluŋa mē ãn wu

bugum na. A boe la ti ñyã la puam tōnna tōon-be'ero ti la taara ti ñyã la wuu. A bugum na ze'eti la bug-tēŋa* sã'ana ti wɔm wuu. ⁷Nērsaala tã dūnsi buuri wuu, la bōn-ēgla buuri wuu, la bōn-vuula buuri wuu, la seba n boe ko'om puam wuu mɛ, boti ba sakra ẽ. ⁸La nēra ka boe n tã wun yãŋɛ a zuluŋa. A puɛ la yetɔg-be'ero tɔgra ka gɔ'ɔra, a tari la yabga n kuuri. ⁹Ti tari la ēŋa pu'vsra Zuudãana n de ti So la a yel-sōnne, dee ken tara ẽ kã'ara be'em bɔ'ɔra nērba ti Nawēnne nāam ti ba āna wu a mēŋa la. ¹⁰Kã'a-be'ero, la kã'a-sōma ze'eti la nō-ēŋa ayula puam yesra. M sɔbiisi, la ka mase ti la dɛna bela. ¹¹Ko-sōma, la ko-be'ero tã wun bulla bulnifo ayula puam? M sɔbiisi, kēnkāŋa tã wun wɔnna tã'ama? ¹²Bu sēnsāabga tã wun wɔnna kēnkāma? Bela, bulga n bulli ko-be'ero ka tã wun bulla ko-sōma.

Yem n ze'ele Nawēnne zē'am

¹³Āne n boe ya puam tē'esɛ ti ēŋa tari yem, la bāŋrɛ? A ēŋɛ yel-ir-sōŋɔ, dee sike a mēŋa pa'ale ti a tari yem. ¹⁴La, la sãn dɛna ti ya uti la sūure, dee gēela taaba, da wē-ya yō'ogɔ ti ya de la yem dōma parum s'tise sira la. ¹⁵Yem ēŋa dagi yem sɛka n ze'ele Nawēnne zē'am. A de la tēŋa wã zuo bōnɔ, a de la nērsaala bōnɔ, a ze'ele la Asūtãana* zē'am. ¹⁶Sūure la gēelgɔ n boe zē'e-sɛka la, tōon-yooro, la tōon-be'ero buuri wuu boe la bilam. ¹⁷La yem n ze'ele Nawēnne zē'am ān na sōŋa ka tara dēgrɔ, dee boti nēra tara sū-mã'asum la a taaba, la sū-bugsum, uta sugri, zɔta nērba ninbāalga zozo'e, tōnna tōon-sōma zozo'e, ka bɔkra nērba, dee ka dɛna pulibsum dāana. ¹⁸Sū-mã'asum dōma n boti sū-mã'asum bɔna nērba tēŋasuka la tōoma de la tōon-sōma n mase Nawēnne zē'am.

4

Da base-ya ti dūnia yemleego sōna ya

¹Zebre la nōkē'ema n boe ya tēṅasuka la ze'ele la be? La de la yan boori se'em n de be'em n boe ya puam boti ya ita bela. ²Ya boori la sela dee ka yēta, bōra ti ya kuvra nērba. Ya uti la sūure la ya taaba bōnō dee ken ka yēta, bela ti ya zebra dee wē'era nōkē'ema la taaba. Yan ka tari la, la de la yāma n ka sose Nawēnne na iyā. ³La ya sān sōsra me dee ka yēta, yāma n sosri se'em na ka ān sōṅa. Ya sosri ti ya ēṅe la ya yem n boori se'em. ⁴Yāma ka doli Nawēnne la sira. Yāma ka mi ti seka n nōṅe dūnia wā loḡrō, la de la be'em la Nawēnne? Bela, nēr-seka woo n boori ti a yōḡe sitō la dūnia wā loḡrō, a wun dena la Nawēnne be. ⁵Bu yāma tē'ese ti lan gulse se'em Nawēnne gōṅō puam na de la zāṅa? La yeti: << Nawēnne Sia* la ti a ēṅe ti puam na, boori ti ēṅa mā'a n sōna tō. >> ⁶La a uti la yel-sōnne n ān sōṅa gānna bō'ora tō, wu lan gulse yeti: << Nawēnne zagsri zēk-m-mēṅa dōma me, dee ita sik-m-mēṅa dōma yel-sōnne. >>

⁷Bela, dike ya mēṅa bō Nawēnne, dee si'ise Asūtāana*, ti a wun zoe dee base ya. ⁸Lem-ya Nawēnne, ti a mē wun lem ya. Tōon-be'ero dōma, peege ya nu'usi, putē'era ayi dōma, peege ya sūure. ⁹Bāṅe-ya ya ninbāalga, kaase-ya fable la sū-sā'aṅō. Base-ya ti ya lo'oro lebge kuvnō, ti ya sū-yēlga lebge sū-sā'aṅō. ¹⁰Sike-ya ya mēṅa Nawēnne nēṅam, ti a wun zēke ya.

¹¹M sobiisi, da tōgra-ya taaba yelle be'em. Nēr-seka n tōḡe a tadāana yelle be'em, bu zerga ē, a tōgru la Nawēnne loḡ la be'em dee zerga ē. La fu sān zerga loḡ la, fu ka sakri loḡ la, fu lebge la loḡ la sariyadita.

¹²Nawēnne mā'a n bō'ori loḡ, la ēṅa mā'a n diti sariya, la ēṅa mā'a n tā wun fāage, bu sā'am. La fōn tē'ese ti fōn de la āne, dita fu tadāana sariya?

Da wē'era-ya yō'ogo

¹³Selse-ya! Yāma seba n yeti: < < Zīna bu beere, tōma wun sēŋe la tēn-ēna ka ēŋe yvune, leebe yē yōoro > > la, ¹⁴ya ka mi ya vom n wun āna se'em beere. Ya ān wu pika n yu, ti la ēŋe fēe ti a pilge. ¹⁵La de ni na ya ēn yeti: < < Nawēnne sān bōora, ti tōma vōa, tōma wun ēŋe la wāna la wāna. > > ¹⁶La yāma pa'alı la ya mēŋa dee wē'era yō'ogo yāma n boori ti ya ēŋe sela la puam. Pa'al-m-mēŋa wāna buuri wuu de la be'em.

¹⁷Nēr-seka woo n mi sela n ān sōŋa, dee ka ita, a tōm na tōon-be'ero.

5

Bōntatba yelle

¹Bōntatba, selse-ya! Kaasra-ya dee fabla, se'ere n soe la, toogo n sēm ya zuto. ²Ya bōntarsōm na wun pō'oge me. Bōn-mōgla n wun mōge ya futo la. ³Tēŋanzēem n wun kē ya sālma, la ya zūuro la. Tēŋanzēem na n wun pa'ale ti ya ka ēŋe sōŋa, la a wun di ya wu bugum na. Yāma lagsrı la bōntarsōm bīŋra dūnia ba'asgo wakate. ⁴Tōntōnıba n tōnnı ya vato puam ti ya mōŋe ba yōoro la kelli me. Nēr-seba n lagse ya bōnkōola la kelli me, ti Zuudāana Nawēnne n de ke'eŋo wuu dāana la wōm. ⁵Dūnia zuo ya vōa la na'am puam, ita ya yem n boori se'em, dita tıgra nōbra, āna wu dūnsi la gu'ura kua daare. ⁶Ya tōge la sira dāana yelle ku, yeti ya ku ē, ti a ka tāna wun s'ıse ya ti ya ku ē.

Kā'aŋo

⁷M sōbiisi, mā'ara ya sūure gu'ura Zuudāana la lemŋo. Bıse-ya kaara n mā'arı a sūure se'em gu'ura ti a va'am bōnkōola bie wun wa bı sōŋa.

A ěn gu'ura me ti sig-saaga wa ni, ti poorum saasi ni, ti bōnkōla la bie bi sōŋa. ⁸Bela, yāma mē mōrge mā'ara ya sūure, tara buraane, ti Zuudāana la lemŋo lem me.

⁹M sōbiisi, da yōnna-ya taaba, ti Nawēnne da wa di ya sariya. Biŋe-ya, sariyadita la ze la zanōrum. ¹⁰M sōbiisi, Nawēnne nōtō'ōsrība* la n yuun tōge a yetōga, ti ba nāmsē ba, ti ba mā'age ba sūure la, ya mē ēŋe wu bāma n ēŋe se'em na. ¹¹Tōma yeti me ti seba n mōrge ze'ele kāŋkāŋe Nawēnne sore puam na, de la zu-yēlga dōma. Ya wōm ban tōge Azōobi n ze'ele kāŋkāŋe se'em yelle, la ya yē ba'asgō Nawēnne n ēŋe se'em bō ē. Se'ere n soe la, Nawēnne de la ninbāal-zōta, dee tara nērba zīile.

¹²M sōbiisi, sela n gānni wuu de la ya da pōi. Da pōi saazuum, bu tēŋa, bu sela ayēma. Base-ya ti ya <<ēe>> dena <<ēe>>, ti ya <<ayei>> dena <<ayei>>, ti Nawēnne da di ya sariya.

¹³Nēra sān bōna ya puam nāmsra, a pu'use Nawēnne. Nēr-seka sūure n ān yēlum, a yōom yōom-sōma pēge Nawēnne. ¹⁴Nēra sān bōna ya puam bē'era, a wi Nawēnne nērba kēma, ti ba ēŋe kaam ēŋe a zuugo la Zuudāana Azezi yu'ure, pu'use Nawēnne bō ē. ¹⁵Ban bō Nawēnne sra pu'use la, la wun fāage bā'ara la me, Zuudāana la wun bō ē ĩmā'asum me ti a isge. La a sān tōm tōon-be'ero, a wun base ē taale. ¹⁶Bela, pelge ya pva tōge ya tōon-be'ero pa'ale taaba, pu'use bō taaba, ti ya wun yē ĩmā'asum. Nēra n mase Nawēnne zē'am pu'usgō tōnni me la pāŋa zozo'e. ¹⁷A'eli* yuun de la nērsaala wu tōma la, la a pu'use me sose Nawēnne la a sūure wuu ti saaga da ni, ti saaga ka tōke tēŋa yuuma atā la wōr-siyooobi. ¹⁸Ti a le pu'use, ti saaga ni, ti bōnkōla wōm bie.

¹⁹M sōbiisi, ya nēra ayula sān burge dee base sra sore, ti nēra tari ē leme wa'am, ²⁰ya bāŋe ti nēr-seka woo n tari tōon-be'ero dāana a

tōon-be'ero sorɔɔɔ zuo leme wa'am, a fāage la tōon-be'ero dāana kūm puam, ti Nawēnne wun base a tōon-be'ero zozo'e taale. \e

1PE

1 Pɪyɛɛɪ

Pɔspɔsi gōŋɔ ti Apɪyɛɛɪ gulɛ

Bilgre

Apɪyɛɛɪ gulɛ gōn-ēna wā bɔ la Azezi nērba n wurge bɔna Azi-minɛɛɪ so'olum tēnsɪ puam. La de la Apolɪ, bu nēr-sɛba n doose la ē tōm na n mōole ba Nawēnne kō-yēlga. Ba daan yē la nāmsgɔ, ban bɔ Azezi sɪra la īyā.

Apɪyɛɛɪ gulɛ ti a bɔ ba la buraane Azezi sore doosgo puam, ti ba wun ze'ele kāŋkāŋe nāmsgɔ wakate, wu Azezi mēŋa n nāmse ti tōma yē fāare la.

Apɪyɛɛɪ tēege ba la ban tarɪ putē'ere gu'ura sɛla Nawēnne zē'am, Azezi n ki dee vo'oge īyā la.

A kā'an ba yetɪ ba vɔa la pupeelem wu Azezi nērba n mase ti ba vɔa se'em. A yetɪ ba mase ti ba ita wu Azezi n ēŋe se'em a nāmsgɔ puam na. A kā'an ba la kā'aŋɔ buuri to'oto'ore ti ba bāŋe ban wun ēŋe se'em sɛla woo puam, ti sɛba n ka bɔ Azezi sɪra la wun yē ba tōon-sōma la, nā'ase Nawēnne.

Pɔspɔsi gōŋɔ ti

Apɪyɛɛɪ

gulɛ

1

¹Mam Apiyεeri n de Azezi-krisi Tōntōnna* n gulse gōŋo wā bō'ora yāma seba ti Nawēnne looge ti ya dena a nērba wirge bōna Pō, la Galati, la Kapadōsi, la Azi*, la Bitini so'olum puam dena sāama la.

²La de la ti So Nawēnne n looge ya wu ēŋa n dēŋe looge a yem se'em na, ti a Sia* welge ya to'ore, ti Azezi-krisi zum peege ya ti ya āna sōŋa, sakra a nōore.

Nawēnne wun ēŋe ya yel-sōnne, dee bō ya sū-mā'asum zozo'e.

Tun tari putē'ere gu'ura sela

³Ti pu'use-ya Nawēnne n de ti Zuudāana Azezi-krisi So la a yel-sōnne. A ninbāal-zua n zo'oge la iyā ti a boti ti yē vom paalga, Azezi-krisi n ki dee vo'oge la iyā. Bela ti ti tara putē'ere wakate wuu gu'ura sela ti ti bō sira la, ⁴dee mina ti ti wun yē sela ti Nawēnne biŋe ti a bō a nērba. Bōn-bāma de la sela n ka sā'anı, n ka pō'ori, ti ba sōŋa ka bōti, ti Nawēnne biŋe a yire ti a bō ya. ⁵Yāma n bō sira la, Nawēnne gu'uri ya me la a pāŋa halı wun ka paage ba'asgo wakate fāage ya ba'ase.

⁶Bela iyā ti ya tara sū-yēlga, baa la de ya sān yēta yela to'oto'ore n nāmsrı ya wakate fēe læele wā. ⁷Nāmsgo la de la sela n makrı bıstra ya bō sira la n ān se'em. Sālma de la sela n sā'anı, la ba ēn dıke ē make la bugum bıse ēn ān se'em. La yāma bō sira la tari yōoro me zozo'e gānna sālma. Bela ti la makra ya bō sira la bıstra, ti ya sān ze'ele kāŋkāŋe, ya wun yē pēka, la nā'asgo Azezi-krisi lemŋo daare. ⁸Yāma nān ka yē ē, dee nōŋe ē, ya nān ka yēti ē, dee bō ē sira, bela ti ya uta sū-yēlga zozo'e n ka tā wun pa'ale. ⁹Se'ere n soe la, ya yē fāare me n de ya bō sira la yōoro.

¹⁰Nawēnne nōto'osrıba* la n yuun toge yel-sōnne na ti Nawēnne wun

wa ɛ̃ŋɛ bɔ ya la, yuun ɛ me vɛese ti ba bɔ̃ŋɛ fɛ̃are wɛ yelle. ¹¹Azezi-krisi Sia*fl* yuun boe la ba me, dɛ̃ŋɛ pa'ale ba yeti Krisi wun wa yɛ la nɔ̃msgɔ dee yɔ̃ŋa yɛ na'am pɔ̃ŋa. Ti ba yuun ɛera ti ba bɔ̃ŋɛ wakate sɛka ti bɔ̃n-bɔ̃ma wun ɛ̃ŋɛ, la lan wun wa doose se'em ti la ɛ̃ŋɛ. ¹²Ti Nawɛ̃nne yuun pa'ale ba ti yel-seba ti ba mɔ̃olɔ la dagɔ bɔ̃ma mɛ̃ŋa ɪyɔ̃, la de la yɔ̃ma ɪyɔ̃. Yel-bɔ̃ma n bela ti seba n mɔ̃ole kɔ-yɛlga la tɔ̃ge bɔ ya. La de la Nawɛ̃nne n tɔ̃m a Sia ti a wa'am wa bɔ ba pɔ̃ŋa ti ba tɔ̃ge. Ti baa malekadɔ̃ma* la mɛ̃ŋa bɔ̃ra ti ba wɔ̃m a vɔ̃ore.

Ti dena pupeelem dɔ̃ma

¹³Bela ɪyɔ̃, yɔ̃ke ya tagsgɔ tara ya mɛ̃ŋa sɔ̃ŋa, dee gu'ura la ya sũure wuu yel-sɔ̃nne na ti ya tari putɛ'ere gu'ura ti Nawɛ̃nne yeti a ɛ̃ŋɛ bɔ ya Azezi-krisi lemɔ̃ wakate la. ¹⁴Sakra-ya Nawɛ̃nne nɔ̃ore, da le vɔ̃a-ya wu yɔ̃ma n daan nɔ̃n ka bɔ̃ŋɛ Nawɛ̃nne sɪra, ti ya yemleego boti ya bɔ̃ra sɛla n de be'em na. ¹⁵Dena-ya pupeelem dɔ̃ma ya yel-ɪre wuu puam, wu Nawɛ̃nne n wi ya la n de pupeelem dɔ̃ana se'em na. ¹⁶La gulse Nawɛ̃nne gɔ̃ŋɔ puam ti Nawɛ̃nne yeti: < <Dena-ya pupeelem dɔ̃ma, ti mam de la pupeelem dɔ̃ana. > >

¹⁷Yɔ̃ma n pu'usri Nawɛ̃nne na, ya wi'iri ɛ̃ ti ya Sɔ. Nawɛ̃nne ka tũ'usri nɛ̃rba. A diti nɛ̃rsaalba sariya la sɪra, wu nɛ̃ra woo tɔ̃oma n de se'em na. Bela, pa'ale-ya ti yɔ̃ma nannɪ ɛ̃ ya yel-ɪre wuu puam, yɔ̃ma n ken bɔ̃na dũnia zuo wɔ̃.

¹⁸Nawɛ̃nne fɛ̃age ya me vɔ̃m sɛka n ka tari yɔ̃oro ti ya daan zɔ̃sum ya yaabdɔ̃ma zɛ̃'am na puam. Ya mi ti la dagɔ bɔ̃n-seba n sɔ̃'anɪ wu sɔ̃lma, bu zũuro ti a dɪke yɔ̃ fɛ̃age ya. ¹⁹La de la Krisi zum n tari pɔ̃ŋa la. Ba ku Krisi la tɔ̃ma ɪyɔ̃ wu pebila* n ɔ̃n sɔ̃ŋa dee ka tara zɔ̃nne. ²⁰Nawɛ̃nne yuun pɔ̃n looge ɛ̃ me halɔ̃ lan dɛ̃ŋɛ dũnia nɔ̃aŋɔ, yɔ̃ŋa boti a wa'am dũnia ba'asgɔ wakate wɔ̃ yɔ̃ma ɪyɔ̃. ²¹Krisi ɪyɔ̃ ti ya bɔ

Nawēnne sira, Nawēnne n vo'oge Krisi, bɔ ē na'am pāŋa, bela ti ya dɪke ya bɔ sira, la yan tara putē'ere gu'ura sela la te'ege Nawēnne.

²²Yāma n sake sira la, ya lebge la pupeelem dōma, ti ya nōŋe ya sɔbiisi la nōŋlum sira sira. Bela, nōŋe-ya taaba zozo'e la ya sūure wuu. ²³Ba dɔge yāma la dɔg-paalga, la dagɪ nērsaala dɔka n bɔ'ɔri vɔm seka n sã'anɪ la, la de la Nawēnne yetɔga n vɔa dee bɔna wakate wuu la, n botɪ ya yē dɔg-paalga tara vɔm n ka ba'asri. ²⁴La gulse Nawēnne gōŋɔ puam yetɪ: < < Nērsaala woo ān wu mōorɔ, la a sōŋa la wuu ān wu mō-puuro la. Mōorɔ zēkri mɛ, ti ba puuro la suura. ²⁵La Nawēnne yetɔga boe la wakate n ka ba'asri. > > Yetɔg-ēŋa n de kō-yēlga la ti ba mōole bɔ ya la.

2

¹Bela, base-ya putvulgo wuu, la pōmpɔrŋɔ, la pulibsum, la sūure, la taaba pɔ'ɔre. ²Nōŋe-ya Nawēnne yetɔga wu bileesi n nōŋe ba ma bĩ'isum mǎ'a la. Tɪ a wun base ti ya bɪ Azezi-krisi sore doosgo la puam, yē fāare. ³Tɪ yāma bāŋe Zuudāana la n ān sōŋa se'em mɛ.

Nawēnne mēŋa nērba

⁴Lem-ya Zuudāana n de vɔm dāana la zē'am, ēŋa ān wu kug-seka ti nērba zagse, ti Nawēnne looge ē ti a tara yōorɔ zozo'e. ⁵Yāma mē vɔa mɛ. Base-ya ti Nawēnne dɪke ya ti ya āna wu kuga mē deego ti a Sia bɔna mĩ, ti ya āna wu kāabgɔ* kēma bɔna mĩ tōnna wu Nawēnne Sia n boori se'em, ti la paara a yem, Azezi-krisi ñyā. ⁶La gulse Nawēnne gōŋɔ puam yetɪ:

< < Bɪse, mam looge la kugre*f2* n tarɪ yōorɔ zozo'e ēebe m
deego Siyō*,
ēŋa n de kugre n botɪ deego la tara pāŋa.

Nēr-seka n bɔ ē sira, yānne kān yōke ē. > >

⁷Yāma seba n bɔ ē sira la, a tari la yōoro zozo'e bɔ ya. La seba n ka bɔ ē sira la, la gulse ba yelle yetu:

< < Kug-seka ti tōnmētba zagse la n lebge kugre n boti deego la tara pāṅa. > >

⁸La ken gulse yetu:

< < La de la kug-ēṅa n wun base ti nērba wē'era nāma, dee dena tāmpī-seka n wun base ti ba lui. > >

Ban wē'eri nāma la, la de la ban ka bɔ Nawēnne yetoga sira la iyā, wu lan mase ti la ēṅe ba se'em na.

⁹La sān dena yāma, yāma de la buuri ti Nawēnne looge, ya de la ēṅa n de naba la kāabgo kēma, dee ken dena a nērba n welge to'ore tara pupelem. A wi ya la lika puam, tari yese a peelem n ān sōṅa zozo'e puam, ti ya boti nērba bāṅe a tōon-kāra la. ¹⁰Kurum, ya daan dagi Nawēnne nērba, la læle wā ya de la a nērba. A daan ka zoti ya ninbāalga, la a yāṅa zoti ya ninbāalga me.

Krisi nērba yel-ire

¹¹M sur-nōṅrisi, yāma de la sāama la kōos-weto dūnia zuo, bela mam kā'anı ya me ti ya base nērsaalba n boori se'em n de be'em n sā'anı ya la. ¹²Base-ya ti ya yel-ire āna sōṅa nēr-seba n ka doli Nawēnne na tēṅasuka, ti baa ba sān dōta ya yetu ya de la tōon-be'ero dōma, ba wun yē ya tōon-sōma la, nā'ase Nawēnne a wa'aṅo daare.

¹³Sakra-ya dūnia pānsı dōma wuu Zuudāana Azezi iyā. Sakra-ya nakeko n soe ke'eṅo wuu, ¹⁴la ya sakra gōmnadōma ti a tōm ti ba sibgrı seba n tōnnı tōon-be'ero, dee nā'asra nēr-seba n tōnnı tōon-sōma la.

¹⁵Se'ere n soe la, Nawēnne n boori se'em de la ya ita sōṅa, base ti nēr-seba n ka mi sela dee tōgra gōon-yetoga la go'oge. ¹⁶Ita-ya wu

nērba n soe ba mēṅa, la da dīke-ya yan soe ya mēṅa la ti la dena sela n boti ya tōnna be'em, tōnna-ya wu Nawēnne tōntōnba n mase ti ba tōnna se'em na. ¹⁷Nanna-ya nērba wuu, nōṅe ya sōbiisi, zōta-ya Nawēnne, nanna-ya na-keko.

¹⁸Tōntōnba, sakra-ya ya zuudāandōma dee zōta ba. La, la dagi seba n de nēr-sōma, la sū-bugsum dōma la mā'a, sakra-ya baa seba n de nēr-tōosi la. ¹⁹Nēra sān sakra nām̄sgo n ka mase ni ti a nām̄se, ēn sakri Nawēnne na iyā, la de la yel-sōnne. ²⁰Fu sān tōm na tōon-be'ero ti ba nāmsra fō ti fu sake wībra, a ka taru yōoro. La fu sān tōm na tōon-sōma ti ba nāmsra fō, ti fu sake wībra, la de la yel-sōnne Nawēnne zē'am. ²¹La de la bela iyā ti Nawēnne wi ya. Krisi mē daan nām̄se yāma iyā mē, base mām̄sgo ti ya dōla a nabara ita wu ēṅa n ēṅe se'em na. ²²A daan ka tōm tōon-be'ego, la pōmporoṅo ka yese a nōorum. ²³Ban daan tu ē na, a ka lebse tu, la ban daan nām̄se ē na, a daan ka zēbe la ba, a dīke a mēṅa base la seka n diti saruya la sira la nu'usum. ²⁴Ḕṅa n to'oge tōma zē'am ki dō-puurṅa* zuo tōma tōon-be'ero iyā, ti la sān dena la tōon-be'ero tōoma, tōma ān wu ti ki mē, dee vōa ita sela n mase. A pōgluṅo la iyā ti ya yē laafe. ²⁵Ya daan ān wu piisi n bōi, la leele wā, ya leme na ya dūnsīina la zē'am, ēṅa n būsri ya.

3

Pōgsi, la ba sūrba yelle

¹Bela mē, pōgsi, sakra-ya ya sūrba, ti baa seba n ka bō Nawēnne yetōga sira la sān yē ya yel-ire, ba wun sake ti la ka doose la yetōga, ²ban yēti ya yel-ire n ān sōṅa dena nā'asgo la. ³Da base-ya ti ya nēnnōm dena yēṅa sōṅa, n de zuto pā'aṅo, la sālma loṅro, la fu-sōma

yea. ⁴Base-ya ti ya sōṅa la dena sūure puam sōṅa n de sū-bugsum la sū-mā'asum. Sōṅa ēna n ka sā'anı dee tara yōoro zozo'e Nawēnne nifum. ⁵Kurum kurum, pɔg-seba n yuun de Nawēnne nērba tara putē'ere gu'ura sela Nawēnne zē'am na, sōṅa mē yuun ān na bela, sakra ba sırba. ⁶Asaara yuun ān na bela sakra a sira Abraham* nōore, wi'ira ē ti a zuudāana. Ya sān tōnna tōon-sōma, dee ka base ti ba kē'ese ya dabeem, ya de la a pɔyɔɔsi.

⁷Bela mē, yāma seba n de sırba la, bōna-ya la ya pɔgba la le, la wōm taaba, la ya bāṅe ti ba ka tari pāṅa wu yāma la, la ya nanna ba, ti bāma la yāma n wun lagum to'oge Nawēnne yel-sōnne n de vɔm. Ita-ya bela ti sela da gu ya pu'usgo.

Ita-ya sōṅa baa ya sān nāmsra

⁸Ba'asgo puam, mam yeti ya wuu ti ya tara putē'ere ayıla, la taaba zīile, la sɔbiisi nōṅre, la ninbāal-zva, la sik-m-mēṅa. ⁹Nēra sān ēṅe ya be'em, ya da lebse ē be'em. Nēra sān tu ya, ya da tu lebse, tōn kā-ya kā'a-sōma bɔ ē. Se'ere n soe la, Nawēnne n wi ya la, la de la kā'a-sōma ti a bīṅe nōore ti a bɔ ya.

¹⁰La gulse Nawēnne gōṅɔ puam yeti:

< < Nēr-seka n boori ti a vɔm āna yēlum, dee ti a yē sū-yēlga, dēni ti a yōke a nōore la yetɔg-be'ero, dee base pōmpɔrṅɔ.

¹¹A zāage a mēṅa la tōon-be'ero,

dee ita sela n ān sōṅa,

la a mōrge ε ti sū-mā'asum bōna nērba tēṅasvka da base.

¹²Se'ere n soe la,

Zuudāana bısri la seba n de sira dōma,

dee selsra ba pu'usgo,

la a wēgrı a nēṅa me,

dee basra nēr-seba n de tōon-be'ero dōma. > >

¹³Yāma sān mōrge tōnna tōon-sōma, āne n wun ēṅe ya be'em? ¹⁴La baa nērba sān nāmsra ya yan uti sela n mase iyā, ya wun yē yel-sōnne. Bela, da zōta-ya ba dabeem, la ya da base ti la dāana ya.

¹⁵Nā'asra-ya Krisi ya sūure puam, base-ya ti a dena ya Zuudāana. Māasum-ya wakate wuu lergra nēr-seka woo n sokri ya, bōra ti a bāṅe yāma n tari putē'ere gu'ura sela la yelle n ān se'em na. ¹⁶La ya uta bela la sū-bugsum, la wōre. lta-ya sela ti ya mi ya sūure puam ti la ān sōṅa, ti yānne yōke seba n tōgru ya be'em, yāma n tōnni sōṅa Krisi iyā la. ¹⁷Se'ere n soe la, ya sān uta sela n ān sōṅa nāmsra ti la sān dena la Nawēnne n boori bela, bela n ān sōṅa gānna yāma n wun ēṅe be'em nāmsra. ¹⁸Krisi nāmse me ki buyila ti a yese tōon-be'ero, ēṅa n de seka n mase la, ki la seba n ka mase iyā, ti a tari ya sēṅe Nawēnne zē'am. Ba ku ē me, ti Nawēnne Sia base ti a vo'oge ¹⁹sēṅe ka mōole kō-yēlga bō susi seba ti ba yu la. ²⁰Susi bāma de la nēr-seba n yuun ka sake Nawēnne nōore Anoe* wakate la. Nawēnne yuun mā'age la a sūure gu'ura, wakat-seka ti Anoe yuun māali ōorṅo la, ōorṅo ēṅa puam ti nērba fēe, banii mā'a kē mī pōse ko'om na puam yē fāare. ²¹Bela de la makre pa'ala ko'om* misga n fāari ya lēele wā. Ko'om misga dagi iyā dēgru yesga yelle, la de la sela n pa'ali ti nēra looge yem ti a doose Nawēnne la pupeelem. Ko'om misga fāari ya me Azezi-krisi n ki dee vo'oge la iyā. ²²Ḕṅa n zēke sēṅe Nawēnne yire ka zī'ire Nawēnne zūugo bōba, ti malekadōma*, la ke'endōma, la pānsi dōma wuu sakra ē.

4

Base-ya vōm kēka, dee vōa wu Nawēnne n boori se'em

¹Bela, Kriisi n nāmse a ñyā puam na, ya mē keŋe ya mēŋa tara putē'ere ēŋa mēŋa. Nēr-seka woo n nāmse a ñyā puam base tōon-be'ero mē. ²Ti ēn ken vɔa dūnia zuo wakat-seka la, a kān le vɔa wu nērsaala yemleego n boori se'em, a wun vɔa wu Nawēnne n boori se'em. ³Kurum, yāma n daan lagum na seba n ka doli Nawēnne ita bāma n boori se'em na, da le ita-ya bela. Yāma daan lagum na ba me, ba yalsi, la ba be'em yemleego, la ba dā-yūure, la ba puyā'an-yooro, la ba dā-buka, la ba бага kāabgɔ n de be'em na puam. ⁴La læle wā, yāma n ka le lagum na ba le tōnna tōon-dēgrɔ bāma la, ba ka bāŋe a vōore, ti ba toua ya. ⁵La ba wun wa tɔge bāma n ēŋe se'em bɔ Nawēnne n māasum gu'ura ti a di seba n vɔa, la seba n ki sariya la. ⁶Bela ñyā ti ba daan mōole kō-yēlga la mē bɔ seba n ki la, ti ban ki wu Nawēnne n di nērsaalba wuu sariya ti ba kiira la, ba tā'age yē vɔm ti Nawēnne Sia bɔ'ori.

⁷Sela woo ba'asgɔ lem mē. Bela ñyā, tara-ya ya mēŋa sōŋa, dee mōrge la Nawēnne pu'usgɔ. ⁸Sela n gānni wuu de la ya nōŋe taaba zozo'e, se'ere n soe la, nōŋlum n boti ti basra taaba tōon-be'ero zozo'e taale. ⁹Ita-ya taaba sāanɔ, da yōnna. ¹⁰Yāma nēra woo to'oge la Nawēnne yel-sōnne bɔ'a, dika-ya ba sōŋe nērba baseba. Bela ti ya wun dena nērba n bɔsri Nawēnne bɔ'a to'oto'ore la yelle sōŋa. ¹¹Nēr-seka n tɔgri, a tɔge wu Nawēnne n yeke se'em, nēr-seka n tōnni sōŋre tōoma, a sōŋe wu Nawēnne n bɔ ē pāŋa se'em. Ti tōon-bāma wuu wun nā'ase Nawēnne yu'ure Azezi-kriisi ñyā. Œŋa n soe nā'asgɔ, la pāŋa wakate n ka ba'asri. Amina.

Seka n nāmsri Kriisi doosgo ñyā tari zu-yēlga

¹²M sir-nōŋrɔsi, da base-ya ti nāmsgɔ kāte seka n paari ya la āna wu yel-di'ina bɔ ya. ¹³Tōn tara-ya sū-yēlga, ti yāma po nāmsra la Kriisi

nāmsgo, ti ya wun tā'age ēje sū-yēlga sirum wakate seka ti a na'am pāṅa wun puke la. ¹⁴Ba sān tūra ya yāma n de Krisi nērba la īyā, ya tarti zu-yēlga, se'ere n soe la, Nawēnne Sia la n tarti nā'asgo zozo'e la boe la ya le me. ¹⁵La da base-ya ti ya nēr-seka nāmsra ēṅa n de nēr-kūra, bu nayiga, bu tōon-be'ero dāana, bu nēra n kē'eri nērba yela n ka pake ē puam. ¹⁶La nēra sān nāmsra ēṅa n de Krisi nēra īyā, a da zota yānne. A nā'asra Nawēnne, ban wi'iri ē Krisi nēra la īyā.

¹⁷Wakate paage me ti Nawēnne wun di sariya, la a wun pose la a mēṅa nērba. La sān dena ti a wun dēṅe di la tōma sariya pōspōsi, seba n ka sake Nawēnne kō-yēlga la ba'asgo wun āna la wāne? ¹⁸La gulse Nawēnne gōṅo puam yeti:

< <La sān dena toogo bō tōon-sōma dāana dee ti a yē fāare,
tōon-be'ero dāana n ka doli Nawēnne sore yelle wun āna la
wāne? > >

¹⁹Bela, nēr-seba n nāmsri wu Nawēnne n boori se'em na, ba ita sela n ān sōṅa, dee dīke ba mēṅa ēje Nawēnne n nāam ba dee dena sira dāana la nu'usum.

5

Kā'aṅo

¹Mam yeti m kā'an na seba n de Nawēnne nērba kēma bōna ya puam na. Mam mē de la kēema, dee dena Krisi nāmsgo la kaset-dāana, la mam wun po yē a na'am pāṅa n wun wa puke la me. ²Mam yeti ya me ti ya bisra Nawēnne nērba la ti a gu'ule ya wu dūnsīima la. La, la da kān dena dōk-m-zuugo yelle, la dena la yemleego wu Nawēnne n boori se'em na. Da ita-ya yan boori bōntarsōm īyā, ita-ya ya yem n boe a puam īyā. ³Da eera-ya ti ya sōna seba ti ba dīke gu'ule

ya la, la pāṅa. Dena-ya nērba ti ya yel-ure wun pa'ale ba sela n ān sōṅa, ti ba āna wu yāma n ān se'em na. ⁴Ti dūnsiin-ke'ema la sān wa puke, ya wun to'oge yɔɔɔ n ka sā'anɪ n tari pēka.

⁵Bela mē, kɔmbu'isi, sakra-ya kēma la. La ya wuu tara sik-m-mēṅa la taaba, ti la gulse yetu:

< < Nawēnne sisri zēk-m-mēṅa dōma mε,

dee ita sik-m-mēsɪ dōma yel-sōnne. > >

⁶Bela, sike ya mēṅa Nawēnne n de ke'eṅo dāana la nēṅam, ti wakate sān paage, a wun zēke ya. ⁷Base-ya ya fablɔɔ la wuu bɔ ē, ti a bisri ya yelle mε. ⁸Dena-ya nērba n yōkri ya mēṅa, dee guusra ya mēṅa sōṅa, ti ya be Asūtāana* eeri ya mε, wu gignε n kaari εera sela ti a yōke obe. ⁹Bɔ-ya Azezi-krisi sira ze'ele kāṅkāṅε, dee si'ise Asūtāana, la ya bāṅε ti ya sɔbiisi n boe dūnia zē'a woo mē nāmsri la nāmsgɔ bāma mēṅa buuri. ¹⁰Ya wun ken nāmse mε wakate fēe. La Nawēnne n soe yel-sōnne wuu la wi ya mε ti ya po yē a na'am pāṅa n ka tari ba'asgɔ, yāma n lagum na Krisi dena ayula la iyā. Ēṅa wun le malge ya ti ya āna sōṅa, bɔ ya pāṅa ti ya ze'ele kāṅkāṅε, ti sela kān tā'age boti ya bike. ¹¹Ēṅa n soe pāṅa wakate n ka ba'asri. Amina.

Pu'usgɔ

¹²Mam boti Asilvē*f3* n gulse gōn-pɪka wā, ēṅa n de sɔbia ti mam bise ti a de sira dāana. Mam gulse gōṅɔ wā ti m bɔ ya la buraane, dee boti ya bāṅε ti yel-sōnne na ti ya tari la, de la Nawēnne yel-sōnne mēṅa mēṅa puam ti ya boe. ¹³Nawēnne nērba n boe Babilɔni* ti a tū'use ba wu yāma la pu'usri ya, Amarki n lebge mam dayva la mē pu'usri ya. ¹⁴Pu'use-ya taaba la nōṅlum.

Sū-mā'asum wun bɔna la yāma seba wuu n lagum na Krisi dena ayula la. \f1 1:11 Azezi-krisi Sia, la Nawēnne Sia* de la ayula. \f2 2:6 Kug-

ēņa de la Azezi-krisi. \f3 5:12 Asilvē la Asilaast de la nēra ayula
yu'ure (Tōoma Gōņo 15:22). \e

2PE

2 Pɩyeeri

Gōņo buyi dāana ti Aɩyeeri gulse

Bilgre

Aɩyeeri daan gulse gōn-ēna wā bɔ la nēr-seba wuu n dolɩ Azezi.
Pōmpɔrņo karēnsāandōma zozo'e n yuun kē Azezi nērba la puam, ti
ba zāsņo la botɩ nērba tōnna tōon-dēgrɔ buuri wuu.

Aɩyeeri pa'ale ba ti Nawēnne yetɔga n de sɩra, la a utɩ ēņa n ye
se'em na me.

Aɩyeeri pa'ale la Nawēnne n wi ba la, bāma n mase ti ba vɔa se'em,
ze kāņkāņe sɩra seka ti Azezi Tōntōnɩba pa'ale ba la puam (sapɩtri 1).

A pa'ale ti pōmpɔrņo karēnsāandōma la de la tōon-dēgrɔ dōma, ba
yel-ure ka ān sōņa (sapɩtri 2).

Dee pa'ale ti nēr-seba n yetɩ Azezi kān leme wa'am na, la de la
pōmpɔrņo. A yetɩ Azezi n yuuri ka sēna la, a mā'ari la a sūure ti
nērba zozo'e teege yem base tōon-be'ero, yē fāare (sapɩtri 3).

Gōņo buyi dāana ti

Aɩyeeri

gulse

1

¹Mam Asimō-pɩyeeri n de Azezi-krisi yamņa la a Tōntōnna*, n gulse

gõṅṅ wā bɔ'ra yāma seba ti Azezi-krisi n de Nawēnne la ti Fāagra n mase sela woo puam, boti ya bɔ ē sira sōṅa wu tōma n bɔ ē sira se'em na.

²Yāma n bāṅe Nawēnne, la ti Zuudāana Azezi la, Nawēnne wun ēṅe ya yel-sōnne, dee bɔ ya sū-mā'asum zozo'e.

Nawēnne n looge ti la, ti yel-ire n mase ti la āna se'em

³Azezi n tari Nawēnne pāṅa la n boti ti bāṅe Nawēnne n wi tōma ti ti po yē a na'am pāṅa, la a sōṅa. Bela ti a bɔ tɔ bōn-seba wuu n wun base ti ti vɔa vɔm seka n doli a sore. ⁴La de la bela ti a bɔ tɔ bɔ'a seba n ān sōṅa gānna wuu ti a bīṅe nōore ti a bɔ tɔ la. Ti bōn-bāma iyā ya wun tā'age lɔke be'em yemleego n boe dūnia zuo sā'ana nērba la, dee lebge āna wu Nawēnne n ān se'em na. ⁵Bela, nargε-ya pāṅa, ti ya bɔ sira la puam, ir-sōṅṅ pa'ase, ti ir-sōṅṅ la puam, bāṅre pa'ase, ⁶ti bāṅre la puam, yōk-m-mēṅa pa'ase, ti yōk-m-mēṅa la puam, wībga pa'ase, ti wībga la puam, Nawēnne doosgo sira sira pa'ase, ⁷ti Nawēnne doosgo sira sira la puam, ya ita taaba sōṅa pa'ase, ti ya ita taaba sōṅa la puam, nōṅlum pa'ase. ⁸Se'ere n soe la, ya sān ita bōn-bāna wā zozo'e, ba wun base ti ya tōm Nawēnne tōoma, dee bāṅe ti Zuudāana Azezi-krisi pa'ase. ⁹La seka n ka uti bōn-bāna wā ān wu fva la, a ka yēti, la a yīm me ti Nawēnne base a tōon-be'ero ti a ēṅe kurum na taale me. ¹⁰Bela m sɔbiisi, mōrge ya mēṅa ze'ele kāṅkāṅe Nawēnne n wi ya, la ēn looge ya la puam. Ya sān ēṅe bela, ya kān burge dee base Nawēnne sore. ¹¹La de la bela ti ya wun yē sore sōṅa kē Azezi-krisi n de ti Zuudāana, la ti Fāagra la so'olum n boe wakate n ka ba'asri la puam.

¹²La de la bela iyā ti mam tēera ya bōn-bāna wakate wuu, baa la yāma n pōn mina ba, la yāma n ze kāṅkāṅe sira la ti ya to'oge la

puam na. ¹³Mam n nān vɔa wā, mam tē'ese ti la mase me ti mam tēege ya, ti ya da gīse. ¹⁴Ti Zuudāana Azezi-krisi n puke pa'ale mam, ti mam mina ti la deege la fēe ti mam base vɔm ēna wā dee fōrge. ¹⁵Bela mam won mōrge me, la mam fōrge poorum, ya won tēra bōn-bāna yelle sela woo puam.

Nawēnne nōtɔ'ɔsrɪba n tɔge Azezi-krisi yelle se'em na de la sɪra

¹⁶Tōma n tɔge ti Zuudāana Azezi-krisi pāŋa, la a wa'aŋɔ la yelle la, la dagɪ solma ti nērsaalba tē'ese nāam la ba mēŋa yem. Tōma sɪrɪ yē a na'am pāŋa n zo'oge se'em me la ti nini. ¹⁷La de la Nawēnne n de So la, n bɔ ē nā'asgɔ, la na'am pāŋa. Ēŋa n de na'am pāŋa wuu dāana la yeti: < <Ena de la mam Dayva ti mam nōŋe la m sūure wuu, a paage la mam yem. > > ¹⁸Tōma n daan boe la ē le tāŋa la zuo la, ti tōma wōm kōa la n ze'ele Nawēnne yire tɔge*f1*. ¹⁹Bela n base ti tōma malɪn bāŋe sōŋa sōŋa ti Nawēnne nōtɔ'ɔsrɪba* yetɔga la de la sɪra. La ān sōŋa ti ya tara yetɔg-bāma sōŋa, ba ān wu fitla n nēege lika puam. Tara-ya ba halɪ ka paage beere yɪlɪŋɛ, ti Krisi nēege ya sūure puam wu bewā'are la. ²⁰Sela n gānnɪ de la ya bāŋe ti Nawēnne nōtɔ'ɔsrɪba yetɔga la n gulse Nawēnne gōŋɔ puam na, nēra ka tā won pa'ale ba vōore la a mēŋa putē'ere. ²¹Se'ere n soe la, ba ka de nērsaalba yem n boorɪ se'em, la de la Nawēnne Sɪa* n botɪ nērsaalba tɔge yetɔga n ze'ele Nawēnne mēŋa zē'am.

2

Pōmpɔrŋɔ karēnsāandōma

(Azudi 4-13)

¹Kurum kurum, nērba n yvun boe Nawēnne nērba la puam parna ti bāma de la Nawēnne nōtɔ'ɔsrɪba. Bela, pōmpɔrŋɔ karēnsāandōma n

mē wun bɔna ya puam. Ba wun ɛ̃ɲe la yem tari zāsɲɔ n sēm na sã'aɲɔ wa'am, dee wun sɪ'ise Zuudãana n fãage ba la, bela n wun base ti sã'aɲɔ wa'am ba zuto tɔtɔ. ²La nērba zozo'e n wun doose ba, ba tōon-yooro la poorum, ti la wun base ti nērba tɔge sira sore la yetɔg-be'ero. ³Ban boori bōntarsōm zo'oge la ãyã ti ba wun tɔge nō-yēlum yetɔga pã'ase ya, yē yōoro ya zē'am. La halɪ kurum kurum ti ba sɪbgre pōn māasum gu'ura ba, ba sã'aɲɔ kãn viige.

⁴Se'ere n soe la, Nawēnne yuun ka base malekadōma* seba n tōm tōon-be'ero la ti ba pōse, a lobe ba base la bug-tēɲa* bog-ko'ogo n de lika puam, ba ba la bānsɪ gu'ura sariyadia daare. ⁵La a yuun ka base kurum kurum dōma la ti ba pōse, sãn dagna nērba banii mā'a. La de la Anoe* n mōole sela n mase yelle, la a yir-dōma mā'a ti a yuun fãage, dee base ti sa-kāte ni, ti ko'om libe tēɲa sã'am dūnia nērba wuu n ka doli Nawēnne. ⁶La a ken di Sodom* la Gomōori tēnsɪ sariya me sɪbge ba, base ti bugum di ba, ti ba lebge tãmpɛglum, ti la dena makre bɔ seba n ka doli Nawēnne sore la. ⁷La a yuun fãage la Aloti* n de tōon-sōma dãana. Ĕɲa sūure n yuun sã'am halɪ zozo'e la tōon-be'ero dōma tōon-yooro n zo'oge la. ⁸Aloti n yuun de tōon-sōma dãana vɔa la ba le, wōnna dee yēta ba tōon-be'ero la, a sūure n sã'ani daare woo, ti la nāmsra ě. ⁹Bela pa'alɪ ti Zuudãana Nawēnne mi ěɲa n uti se'em fãara nēr-seba n doli a sore la nāmsgɔ puam me, dee mina ěɲa n uti tōon-be'ero dōma se'em gu'ura sariyadia daare ti ba wun yē sɪbgre. ¹⁰Nēr-seba n doli ba yemleego n boori se'em n de tōon-dēgrɔ, dee pɔ'ɔra Nawēnne n tari nōore la ba le la, a wun sɪbge la bāma gānna.

Pōmpɔrɲɔ karēnsãandōma la de la zēk-m-mēɲa dōma, la tita'alum dōma, ba ka zoti dabeem ti ba tu saazuum pānsɪ dōma. ¹¹La baa malekadōma n tari pāɲa, la ke'eɲo gānna ba la, ka tɔgrɪ ba yelle

pɔ'ɔra ba Zuudāana la nējam. ¹²Nēr-bāma iti la yooryooro, ba ān wu dūnsi n ka tari yem ti ba yōgrɪ kɔvra la. Ba tɔgrɪ la sela ti ba ka mi be'em, ba mē wun sā'am wu dūnsi la. ¹³Ba wun yē tōon-be'ero yɔɔrɔ ba tōon-be'ero la ĩyā. Ba tōnnɪ na ba yem n boorɪ se'em n de tōon-dēgrɔ peelem pɔvam, ti ba sūure āna yēlvum. Ba sān lagum na ya dita, ita sū-yēlga la ba pōmpā'asum na, la de la dēgrɔ, la yānne. ¹⁴Ba yem boorɪ la yalsɪ tōoma mā'a, ba ka tōnnɪ tōon-be'ero tɪgra. Ba pā'asrɪ la nēr-seba putē'era n ka zo'oge Nawēnne sore doosgo pɔvam na ti ba tōonna be'em. Ba nōŋe la bōnɔ zozo'e. Nawēnne kā'a-be'ero boe ba zuto. ¹⁵Ba base so-sōŋɔ la mɛ dee burge dɔla Abalaam* n de Abozɔɔrɪ dayva la sore, ēŋa nōŋe la ligri bɔɔra ti a tōm tōon-be'ero to'oge yɔɔrɔ. ¹⁶La Nawēnne yuvn gi Abalaam n de a nōtɔ'ɔsa la mɛ a tōon-be'ero la ĩyā. A yuvn botɪ Abalaam mēŋa bōŋa n tɔge la ē wu nērsaala la, gu ē ti a da tōm a yalne tōoma la.

¹⁷Nēr-bāma ān wu bulsi n ka tari ko'om, dee āna wu sawara ti kusebgo pe'ege la. Nawēnne māasum na zē'a n de lika tam gu'ura ba. ¹⁸Ba pa'alɪ la ba mēŋa tɔgra yetɔg-kāra n ka tari vōore, dee tara ba yem n boorɪ se'em n de tōon-dēgrɔ la pā'asra nēr-seba n nān welge ba mēŋa la nēr-seba n vɔa tuure pɔvam na. ¹⁹Ba yetɪ nērba la ti ba wun yē yolsgo, dee ti ba mēŋa dena tōon-dēgrɔ n wun sā'am ba la yamsɪ. Se'ere n soe la, nēra woo de la sela n soe ē na yamŋa. ²⁰Nēr-seba n bāŋe Azezi-krisi n de ti Zuudāana, la ti Fāagra la, ba base dūnia tōon-dēgrɔ mɛ. Ba sān le kē ba pɔvam base ti ba sɔna ba, ba poorum toogo la wun gānna pɔspɔsɪ la. ²¹Bela, ba sān ka bāŋe nɪ sela n mase sore la sōi ban bāŋe ē dee wērgɛ base Nawēnne nōore ti ba to'oge tɔge bɔ ba la. ²²La ēŋe ba bela pa'alɛ ti magsa wā de la sra, ba yetɪ: <<Baaga lebe ka di la sela ti a tɪ la>>, dee le yetɪ: <<Kurkuri ti ba peege ē sōŋa sōŋa la, lebe ka bilim na beglum pɔvam.>>

3

Ti Zuudāana Azezi-krisi wun siri leme wa'am me

¹M siri-nōnri, la de la gōnɔ buyi dāana n wāna ti mam gulse bō'bra ya. Gōnɔ bayi la puam, mam tēge ya la sela ti ya dēɛ bāɛ la, ti m puke ya putē'era sōɲa. ²Mam boori ti ya tēra la yetɔg-seba ti Nawēnne nōtɔ'ɔsriɓa* dēɛ tɔge halɔ yuuma yuuma, la ti Zuudāana Azezi n de ti Fāagra la nōre ti Tōntōnɓa* la ti a tōm ya zē'am na tɔge bɔ ya la. ³Sela n gānnɔ de la ya bāɛ ti dūnia ba'asgɔ wakate, nērba n la'ari nērba n wun wa wa'am, wa vɔa vɔm sɛka n de be'em ti ba mēɲa boori. Ba wun la'ara ya, ⁴dee yeti: < < Azezi n daan bīɛ nōre yeti a wun leme wa'am na, a bɛɛ? Halɔ kurum kurum ti ti yaabdōma ki wa paam wakat-ēna wā, sela woo ken āna la bela wu dūnia pī'iluɲo n yuun ān se'em na. > > ⁵Ban tɔgrɔ bela la, ba boori ti ba yeti bāma yīm me ti kurum kurum Nawēnne tɔge la yetɔga ti saazuum la tēɲa nāam, ti zē'a woo daan dena ko'om, ti Nawēnne boti tēɲa ze'ele ko'om puam bɔna. ⁶La ken dena la ko'om, ti Nawēnne yuun boti ba libe dūnia ēɲa sā'am ē. ⁷Nawēnne yetɔga mēɲa n ken boti dūni-ēna wā, la saazuum bɔna gu'ura ti bugum wa sā'am ba. A base ti ba bɔna gu'ura la daar-sɛka ti a wun di nērsaalba sariya, sā'am tōon-be'ero dōma la.

⁸M siri-nōnri, sela ayila n boe ti yāma ka mase ti ya yīm, la sān dena la Zuudāana Nawēnne, daare ayila ān wu yuuma tusre, ti yuuma tusre mē āna wu daare ayila. ⁹Zuudāana la n bīɛ a nōre ti a ēɛ sela la, la ka yuuri ti a kān ēɛ wu nērba baseba n tē'esri se'em na. A mā'age la a sūure la ya, a ka boori ti nēra nēra sā'am, a boori ti nēra woo n teege yem base tōon-be'ero. ¹⁰Zuudāana la lemɲo daare wun āna wu nayiga n liɲri se'em na. Daar-ēɲa, vool-kāte n wun ēɛ, ti

bugum di bõn-seba n boe saazuum, ti saazuum bɔɪ. Tɪ tēŋa, la bõn-seba n boe a puam na wuu mē ka le bɔna.

¹¹Bõn-bāma wuu n wun sā'am bela la, dēni ti ya base ti ya yel-ire, la ya Nawēnne sore doosgo āna sōŋa, ti ya sakra ē sela woo puam.

¹²Dēni ti ya gu'ura Nawēnne daare, ti Azezi wun wa'am na, la ya narge pāŋa ti a wa'am tɔtɔ. Daar-ēŋa, bugum n wun di saazuum, ti bõn-seba n boe saazuum wun yēlgε sā'am. ¹³Tōma gu'uri la saazuum paalga, la dūnia paalga ti sela woo mase āna sōŋa, wu ēn bīŋe a nōore se'em na.

¹⁴Bela, m sir-nōŋrɪsɪ, yāma n gu'uri bela la, narge-ya pāŋa āna sōŋa, ti ya da tara dōrga Nawēnne nifum, ti ya wun bɔna la ē la sū-mā'asum. ¹⁵Bāŋe-ya ti Zuudāana la n mā'age a sūure gu'ura la, a boori ti ya yē la fāare. La de la bela mē ti ti sɔbi-nōŋrε Apoli daan dɪke yem sɛka ti Nawēnne bɔ ē na gulse bɔ ya. ¹⁶A gõn-seba wuu puam ti a tɔgrɪ bela yelle la, a gulse la bela. A gõnnɔ na puam, zē'esɪ baseba n boe mĩ ti ba wõŋa tɔ, ti nēr-seba n ka mi, dee ka vigle ban bɔ sɪra la puam na, tɛera ba vōore n de se'em, wu ban ɪtɪ Nawēnne gõnnɔ baseba se'em na. Ban ɪtɪ bela la sēm na ba mēŋa sā'aŋɔ.

¹⁷La sãn dena yāma, m sir-nōŋrɪsɪ, yāma n dēŋe tara tiire la, guuse-ya, da base ti tōon-be'ero dōma n tuuge la, tuuge ya. Da base-ya ti ba botɪ ya base yāma n bɔ sɪra zε kãŋkãŋe wã. ¹⁸Sēŋe-ya nēŋa vɔa Azezi-krisi n de ti Zuudāana la ti Fāagra la yel-sõnne puam, bãŋra ē pa'asra.

Ēŋa n soe na'am pāŋa lɛɛɛ wã, la wakate n ka ba'asrɪ. Amina. \f1
1:18 Karēŋe-ya Amatie 17:1-8. \e

1JN

1 Zã

Pɔspɔsi gɔŋɔ ti Azã gulɛ

Bilgre

Azã gulɛ gɔŋɔ wã bɔ la Azezi nërba. Põmpɔrŋɔ karënsãandõma n daan kã Azezi nërba la puam tara zãŋɔ n zãari ba la Azezi.

Bela ti Azã daan gulɛ kã'an ba yeti ba ken tara lagumtaare la Azezi, la Nawënnɛ, da tõnna tõon-be'ero. Nawënnɛ de la peelem, la nõŋlum dãana, tõma de la a kɔma, bela la mase me ti ti vɔa peelem puam, dee nõŋɛ taaba.

A kã'an ba yeti, põmpɔrŋɔ karënsãandõma la n zãsnɩ ti Azezi-krisi n de Nawënnɛ Dayɔa la ka lebge nërsaala la, ba da to'oge ba zãŋɔ. Ti bõn-ëŋa tã wun sã'am ba lagumtaare la Nawënnɛ me.

Pɔspɔsi gɔŋɔ ti

Azã

gulɛ

1

Azezi n de yetɔga n bɔ'ɔri vɔm

¹Tõma gulɛ la sɛka n boe halɩ pĩ'iluŋɔ wakate yelle bɔ'ɔra ya. A de la sɛka ti tõma wõm a yetɔga, yẽ ã la ti nini, bise ã sõŋa sõŋa, kalum ã na ti nu'usi. Eŋa n de yetɔga n bɔ'ɔri vɔm. ²Sɛka n de vɔm na puke a mẽŋa me, ti tõma yẽ ã. Ti tõma tɔgra a yelle, mõola vɔm n ka ba'asri la yelle bɔ'ɔra ya. A daan boe la ti Sɔ Nawënnɛ zẽ'am, ti a puke ã pa'ale tõma. ³Sela ti tõma yẽ dee wõm na, tõma tɔgrɩ la ãŋa bɔ'ɔra

yāma, ti yāma wun lagim na tōma, mē naage la tōma tara lagimtaare la ti So Nawēnne, la a Dayva Azezi-krisi. ⁴Tōma gulse ya la wāna ti ti wun tara sū-yēlga zozo'e.

Ti vɔa pupeelem puam wu Nawēnne n ān se'em na

⁵Kōa n wāna ti tōma wōm Azezi-krisi zē'am, tɔgra ě bɔ'ɔra ya: Nawēnne de la peelem, lika ka boe a zē'am baa fēfēe. ⁶Ti sān yeti tōma tari lagimtaare la Nawēnne, dee ken vɔa lika puam tōnna be'em, ti parni me, ti ka iti sira. ⁷La ti sān vɔa peelem puam wu Nawēnne mēɲa n boe peelem puam na, ti tari lagimtaare la taaba me, la a Dayva Azezi zum peerti ti me yesra ti tōon-be'ero wuu.

⁸La ti sān yeti, tōma ka tari tōon-be'ero, ti pā'ase la ti mēɲa, la sira ka boe ti zē'am. ⁹Ti sān pelge ti puvre tɔge ti tōon-be'ero, Nawēnne wun base ti tōon-be'ero taale me, dee peege to, yese sela wuu n ka mase, se'ere n soe la, a de la sira dāana dee ita sela n mase. ¹⁰Ti sān yeti, tōma ka tōm tōon-be'ero, ti yeti a de la pōmpɔrma, la a yetɔga la ka boe la ti le.

2

Krisi n de tōma sōɲra

¹M kɔma, mam gulsri ya wāna ti ya da tōm na tōon-be'ero. La nēra sān tōm be'em, tōma tari la sōɲra n boe ti So Nawēnne zē'am, la de la Azezi-krisi n de pupeelem dāana. ²La de la ēɲa n dɩke a mēɲa bɔ ti la dena kāabgɔ*, ti Nawēnne base tōma tōon-be'ero taale. La, la dagi tōma mā'a tōon-be'ero taale, la de la dūnia nērba wuu tōon-be'ero taale.

³Ti sān sakra Nawēnne nōore, bela n pa'ali ti ti siri mi ě. ⁴Nēr-seka n yeti ēɲa mi ě, dee ka sakra a nōore, a de la pōmpɔrma, la a ka tari

sura. ⁵Nēr-seka n sakri Nawēnne yetoga la, nēr-ēṅa n taru Nawēnne nōṅlum sura sura. Bela n pa'alı tu tu lagum na ē dena ayula. ⁶Seka n yetu ēṅa lagum na Nawēnne, dēni tu a dāana vɔa wu Azezi-krisi n daan vɔa se'em na.

Nawēnne nōore de la tu nōṅe taaba

⁷M sur-nōṅrusı, la dagı nōor-paalga tu mam gulse bɔ'ɔra ya, a de la nōor-keka tu ya taru halı pɔspɔsı la. Nōor-keka ēṅa de la kō-seka tu ya daan wōm na. ⁸La a yerı dena la nōor-paalga tu mam gulse bɔ'ɔra ya. La de la Azezi-krisi zē'am, la yāma zē'am tu yel-ēṅa de sura, se'ere n soe la, lika la tollı me, dee tu peelem sura sura dare nēera.

⁹Nēr-seka n yetu ēṅa boe la peelem puam, dee sisra a sɔbia, ken bɔna la lika puam. ¹⁰Nēr-seka n nōṅe a sɔbia, vɔa la peelem puam, bela iyā sela ka boe a zē'am n wun base tu a tuuge. ¹¹La seka n sisri a sɔbia, boe la lika puam, la a sēnnı na lika puam, ka mina ēn we'esı zē'a, se'ere n soe la, lika la fɔ a nini me.

¹²Mam gulse bɔ'ɔra la yāma, m kɔma, se'ere n soe la, Nawēnne base ya tōon-be'ero taale me Azezi-krisi yu'ure iyā.

¹³Mam gulse bɔ'ɔra la yāma, m sɔdōma, se'ere n soe la, yāma mi seka n boe halı lan dēṅe dūnia pī'iluṅo la me.

Mam gulse bɔ'ɔra la yāma, m kɔmbı'ısi, se'ere n soe la, yāma yāṅe be'em dāana Asūtāana* la me.

¹⁴Mam gulse bɔ'ɔra la yāma, m kɔma, se'ere n soe la, yāma mi tu Sɔ Nawēnne me.

Mam gulse bɔ'ɔra la yāma, m sɔdōma, se'ere n soe la, yāma mi seka n boe halı lan dēṅe dūnia pī'iluṅo la me.

Mam gulse bɔ'ɔra la yāma, m kɔmbı'ısi, se'ere n soe la, yāma taru pāṅa me, Nawēnne yetoga la boe ya puam me, la yāma yāṅe be'em

dāana Asūtāana la me.

Da nōŋe-ya dūnia

¹⁵Da nōŋe-ya dūnia, la bōn-sēba n boe a puam na. Nēra sān nōŋe dūnia wā, Nawēnne n de ti So la nōŋlum ka boe la a dāana le.

¹⁶Se'ere n soe la, bōn-sēba n de dūnia wā bōnɔ de la nērsaala mēŋa n boori se'em, la nini n yē sela bōora n de be'em, la nēra n pa'ali a mēŋa a bōntarsōm iŋyā. Bāma wuu ka ze'ele ti So Nawēnne zē'am, ba de la dūnia bōnɔ. ¹⁷Dūnia, la bōn-sēba wuu ti nērba yemleego boori la tolli me. La nēr-sēka n uti Nawēnne n boori se'em n wun bōna wakate n ka ba'asri.

Krisi st'isriɓa yelle

¹⁸M kōma, lēele wā la de la dūnia ba'asgɔ wakate. Yāma wōm ti ba yeti Krisi st'isra n sēm. La lēele wā, Krisi st'isriɓa zo'oge me bōna, bela tōma mi me ti la de la dūnia ba'asgɔ wakate. ¹⁹Nēr-bāma ze'ele la tōma zē'am yese, la ba daan dagi tōma nērba sira sira. Ba daan sān de ni tōma nērba, ba wun weege ni bōna la tōma zē'am. La ban base tōma la, dēni ti la ēŋe bela ti la pa'ale vēelga ti ba nēra baa ayula dagi tōma nēra.

²⁰La sān dena yāma, Krisi bɔ ya Nawēnne Sia* me, bela yāma wuu mi sira me. ²¹Mam n gulse bɔ ya la, mam ka yeti ya ka mi sira la, la tōn dena la yan mi ē na iŋyā, la yāma mi ti sela n de pōmpɔrŋɔ ka ze'eti sira puam.

²²Āne n de pōmpɔrma la? La de la sēka n st'isri yeti Azezi dagi Krisi* la. Ēŋa n de Krisi st'isra la. A st'isri la So Nawēnne, la a Dayua la. ²³Nēr-sēka n st'isri Dayua la, mē ka boe la So la. La nēr-sēka n yeti ēŋa mi Dayua la, mē boe la So la me.

²⁴La sān dena yāma, mōrgē-ya tara yetɔg-sēba ti ya daan wōm halɔ

pɔspɔsɪ la ya sũure puam. Ba sãn ken bɔna ya sũure puam, yãma mẽ wun ken bɔna la So, la Dayva la ɛ. ²⁵Krisi n bĩŋe nɔore ti a bɔ ti sela n wãna: La de la vɔm n ka ba'asrɪ.

²⁶La de la nẽr-sɛba n zɪgrɪ ti ba pã'asɛ ya ti ya tuuge la yelle ti mam gulɛ wãna bɔ'ɔra ya. ²⁷La sãn dena yãma, Nawẽnne Sia la ti ya to'oge Krisi zẽ'am na, boe la ya le mɛ, yãma ka le ɛɛra ti ba zãsum ya.

Nawẽnne Sia la n boe la ya le la, zãsnɪ ya sela woo mɛ, la de la sɪra, a ka parɪ. Bɔna-ya la Krisi wu ẽn zãsnɪ ya se'em na.

²⁸Ɛe, m kɔma, bɔna-ya la ẽ ɛ, ti a sãn wa puke daare ti ti tara sũ-ke'ɛŋo, ti yãnne da yɔke tɔ a nẽŋam a lemŋo la daare. ²⁹Yãma mi ti Krisi de la sɛka n mase, bela, bãŋɛ-ya ti nẽr-sɛka n mẽ uti sela n mase de la Nawẽnne bia.

3

Nawẽnne kɔma

¹Bɪsɛ-ya Nawẽnne n de So la n nɔŋɛ ti se'em. A nɔŋlum na zo'oge gãŋɛ mɛ, ti a wi'ira tɔma ti a kɔma. La tɔma sɪrɪ de la a kɔma. Wãna n soe ti dũnia dɔma ka mina tɔma: La de la ban ka mi Nawẽnne na ãyã. ²M sɪr-nɔŋrɪsɪ, leelee wã ti de la Nawẽnne kɔma. La tun wun wa ãna se'em na nãn ka puke. La ti mi ti Krisi sãn wa puke, ti wun ãna wu ẽŋa n ãn se'em na, tun wun wa yẽ ẽŋa n ãn se'em na ãyã. ³Nẽr-sɛka woo n tarɪ putẽ'ere gu'ura bɔn-ẽŋa Krisi ãyã, malgrɪ a mẽŋa me dena pupeelem dãana, wu Azezi-krisi mẽŋa n de pupeelem dãana se'em na.

⁴Nẽr-sɛka woo n tɔnnɪ tɔon-be'ero, a sɪ'ɪsrɪ la Nawẽnne nɔore. Se'ere n soe la, tɔon-be'ero de la Nawẽnne nɔore sɪ'ɪsgɔ. ⁵La yãma mi ti Azezi-krisi wa'am ti a yese la nẽrba tɔon-be'ero base, la a mẽŋa ka

tari tōon-be'ero. ⁶Nēr-seka n lagum na Krisi bōna ka tōnni tōon-be'ero. La seka n tōnni tōon-be'ero ka yē ē, la a ka bāņe ē.

⁷M kōma, da base-ya ti nēra pā'ase ya. Seka n iti sela n mase, de la nēra n mase, wu Azezi mēņa n mase se'em na. ⁸Seka n tōnni tōon-be'ero de la Asūtāana* nēra, se'ere n soe la, Asūtāana tōnni tōon-be'ero la halı pī'iluņo. Ti Nawēnne Dayva la wa'am ti a sā'am Asūtāana tōoma.

⁹Seka n de Nawēnne bia ka le tōnna tōon-be'ero, se'ere n soe la, Nawēnne pāņa n bō'oru vōm n boe a puam, a ka le tāna wun tōnna tōon-be'ero, Nawēnne n de a So la ĩyā. ¹⁰Bela n pa'ali ti ba bāņra Nawēnne kōma, la seba n de Asūtāana kōma bōkra. Seka n ka iti sela n mase, bu seka n ka nōņe a sōbia dagı Nawēnne bia.

Tı nōņe taaba

¹¹Kō-yēlga ti ya wōm halı pōspōsi la de la ti nōņe-ya taaba. ¹²La ka de ti āna wu Akā* la, ēņa de la Asūtāana nēra, yuun ku a yıbga. La bēm n soe ti a yuun ku ē? La de la a tōoma n yuun de tōon-be'ero, dee ti a yıbga tōoma mase la ĩyā.

¹³Bela m sōbiisi, dūnia nērba sān sisra ya, da kān base-ya ti la dena sela n di'ige ya. ¹⁴Tōma mi me ti tōma ze'ele la kūm puam yese bōna vōm puam, tōma n nōņe ti sōbiisi la ĩyā. Nēr-seka n ka nōņe a sōbia ken bōna la kūm puam. ¹⁵Nēr-seka woo n sisri a sōbia de la nēr-kuvra. La ya mi ti nēr-kuvra ka tari vōm n ka ba'asrı. ¹⁶La de la bōn-ēna wā n botı tōma bāņe nōņlum n ān se'em: Azezi ki me bō tōma, bela, tōma mē de la ti dıke ti vōm bō ti sōbiisi ĩyā. ¹⁷Nēra sān tara dūnia wā bōntarsōm, dee yē a sōbia n boortı sōņre, ka zoe a ninbāalga sōņe ē, ēņa dāana ka tari Nawēnne nōņlum. ¹⁸M kōma, da base-ya ti ti nōņlum dena yetōga, la nō-yēlum mā'a, ti base ti la dena nōņlum

sura sura n lagim na tōoma.

¹⁹Bela n wun base ti ti bānje ti tōma de la sura dōma, la ti sūure wun āna ke'ejo Nawēnne nējam. ²⁰Baa ti sūure sān ka bɔ ti buurɔ, ti bānje ti Nawēnne gānni ti sūure me, la a mi sela woo bɔke me. ²¹M kɔm-nōjɔri, ti sūure sān bɔ ti buurɔ, ti tari sū-ke'ejo Nawēnne nējam me, ²²la bōn-seka wuu ti ti sosri ē, a bɔ'ori ti me, tōma n sakri a nōore, dee ita sela n paari a yem na iyā. ²³Ēja n bɔ a nōore se'em n wāna: La de la ti bɔ a Dayua Azezi-krisi sura, dee nōje taaba wu ēja n bɔ ti a nōore se'em na. ²⁴Nēr-seka n sakri Nawēnne nōore la, a boe la Nawēnne le, ti Nawēnne mē bɔna la ē. Bōn-seka n base ti tōma mina ti Nawēnne boe la tōma le n wāna: La de la a Sia* ti a bɔ tōma la.

4

Ti bānje-ya Nawēnne Sia, la be'em dāana sia bɔke

¹M sir-nōjɔri, da bɔ-ya nēr-seba wuu n yeti bāma tari la Nawēnne Sia la sura, mage-ya ba buse la sān dena Nawēnne Sia. Se'ere n soe la, pōmpɔrɔjɔ nōtɔ'ɔsɔriba zozo'e n boe dūnia wā zuo. ²Bōn-seka n wun base ti ya bānje Sia seka n de Nawēnne Sia n wāna: Nēr-seka woo n yeti Azezi-krisi n wa'am dūnia zuo, la a tari la nērsaala iyā, ēja n tari Nawēnne Sia. ³La seka n ka tɔgrɔ Azezi yelle bela, ka tari Nawēnne Sia, a tari la Krisi s'isra la sia. S'isra ēja ti ya daan wōm ti a sēm na, la lele wā, a dare bɔna dūnia zuo me.

⁴La yāma, m kɔma, yāma de la Nawēnne nērba, la yāma yānje pōmpɔrɔjɔ nōtɔ'ɔsɔriba la me. Se'ere n soe la, Nawēnne Sia n boe la yāma le la, tari pāja gāna s'isra la sia n boe la dūnia dōma la me.

⁵Pōmpɔrɔjɔ nōtɔ'ɔsɔriba la de la dūnia wā bōnɔ, bela n soe ti ba tɔgra

dūnia yela, ti dūnia dōma selsra ba. ⁶La sān dena tōma, tōma de la Nawēnne nērba. Bela, nēr-seka n mi Nawēnne selsri tōma me. La seka n dagi Nawēnne nēra ka selsri tōma. La de la bela ti tōma wun bāṅe sira Sia, la pōmpɔrɔɔ sia la bɔke.

Nawēnne de la nōḡlum dāana

⁷M sir-nōḡrisi, ti nōḡe-ya taaba, se'ere n soe la, nōḡlum ze'ele la Nawēnne zē'am. Nēr-seka n tari nōḡlum de la Nawēnne bia, la a mi Nawēnne me. ⁸La nēr-seka n ka tari nōḡlum ka mi Nawēnne, se'ere n soe la, Nawēnne de la nōḡlum dāana. ⁹Nawēnne n pa'ale ēṅa n nōḡe tōma se'em n wāna: A tōm na a Dayɔ-yēṅa dūnia zuo, ti ti tara vom ēṅa iyā. ¹⁰Nōḡlum na n doose se'em n wāna: La dagi tōma n dēṅe nōḡe Nawēnne. La de la Nawēnne n nōḡe tōma, tōm a Dayua, ti a dena kāabɔ* tōma tōon-be'ero taale basga iyā.

¹¹M sir-nōḡrisi, Nawēnne n nōḡe ti bela la, dēni ti tōma mē nōḡe taaba. ¹²Nēra nēra nān ka yē Nawēnne. Ti sān nōḡe taaba, Nawēnne boe la ti le me, la a nōḡlum n boe la ti le la, de la nōḡlum zōnzōnno.

¹³Bōn-seka n base ti tōma bāṅe ti tōma boe la Nawēnne le, ti Nawēnne mē bɔna la tōma le n wāna: La de la a Sia ti a bɔ tōma la.

¹⁴La tōma yē me, ti tōma tɔgra yeti, Nawēnne n de So la tōm na a Dayua, ti a dena dūnia Fāagra. ¹⁵Nēr-seka n sake yeti Azezi de la Nawēnne Dayua, Nawēnne boe la ē le me, ti a mē bɔna la Nawēnne.

¹⁶La tōma mi me, dee bɔ sira ti Nawēnne nōḡe tōma me. Nawēnne de la nōḡlum dāana. Nēr-seka n tari Nawēnne nōḡlum boe la Nawēnne le, ti Nawēnne mē bɔna la ē. ¹⁷Tōma sān tara Nawēnne nōḡlum zōnzōnno, ti wun āna wu Azezi n ān se'em na dūnia wā zuo. Bela ti wun tara sū-ke'eṅo sariyadia daare. ¹⁸Seka n tari nōḡlum ka zoti dabeem, nōḡlum zōnzōnno yesri la dabeem, se'ere n soe la, dabeem

zua pa'alı me ti subgre n boe. Seka n zoti dabeem na ka tarı nõjlım zõnzõnnõ.

¹⁹La sãn dena tõma, tõma tarı nõjlım me, se'ere n soe la, Nawẽnne dẽje nõje tõma me. ²⁰Něr-seka sãn yetı, ẽja nõje Nawẽnne, dee sise a sobia, a de la põmporma. Se'ere n soe la, a sãn ka nõje a sobia ti a yetı la, a ka tã wun nõje Nawẽnne ti a ka yetı la. ²¹Nõore seka ti Krişi bõ tõma la n wãna: Něr-seka n nõje Nawẽnne, dẽni ti a mẽ nõje a sobia.

5

Tı bõ Nawẽnne Dayva la sıra

¹Něr-seka woo n bõ sıra ti Azezi de la Krişi ti Nawẽnne tõm na, de la Nawẽnne bia. Něr-seka n nõje sõ, mẽ nõje a kõma me. ²Sela n base ti tõma mina ti tõma nõje Nawẽnne kõma n wãna: La de la tõma n nõje Nawẽnne, dee sakra a nõore wuu la. ³Se'ere n soe la, Nawẽnne nõjlım de la ti sakra a nõore. A nõore la ti a bõ ti la ka tı. ⁴Něr-seka woo n de Nawẽnne bia n yãnrı dũnia be'em. Tõma n yãje dũnia be'em na, de la tõma n bõ Azezi-krişi sıra la. ⁵Ãne n tã wun yãje dũnia? La de la něr-seka n bõ sıra ti Azezi de la Nawẽnne Dayva la mã'a.

⁶Azezi-krişi n wa'am dũnia zuo la, la doose la ko'om, la zum. La dagı ko'om* misga la mã'a, la ken dena la ẽn ki ti a zum yese la. La de la Nawẽnne Sıra n bõ'õrı a kaseto, Nawẽnne Sıra n de sıra dãana la iyã. ⁷La de la bõn-bãna batã n bõ'õrı kaseto. ⁸La de la Nawẽnne Sıra, la ko'om, la zum. La bãma batã kaseto de la buyula. ⁹Tõma n sakrı nẽrsaalba kaseto ti ba bõ'õrı la, Nawẽnne kaseto tarı pãja gãna bela me. La de la Nawẽnne mẽja n bõ a Dayva la kaseto. ¹⁰Bela, něr-seka

n bɔ Nawēnne Dayua la sira, tari kaseto ɛ̃ɲa mɛ a sũure puam. La nēr-seka n ka bɔ Nawēnne sira, base ti a āna wu pōmpɔrma la, ɛ̃ɲa n ka sake Nawēnne n bɔ a Dayua la kaseto la ɪyā. ¹¹Nawēnne n bɔ kaseto la se'em n wāna: A bɔ ti la vɔm n ka ba'asrɪ, la vɔm ɛ̃ɲa de la a Dayua la ɪyā. ¹²Nēr-seka ti a Dayua boe la ɛ̃ na, tari vɔm na mɛ. La nēr-seka ti a Dayua ka boe la ɛ̃ na, ka tari vɔm.

Vɔm n ka ba'asrɪ

¹³Mam gulɛ wāna bɔ'ɔra ya ti ya bāɲɛ ti yāma seba n bɔ Nawēnne Dayua sira la, tari la vɔm n ka ba'asrɪ. ¹⁴Tōma sũure ān ke'eɲo mɛ la Nawēnne, ti tōma mina ti tōma sān sose sela ti la mase wu ɛ̃n boori se'em, a selsrɪ tōma mɛ. ¹⁵La tōma n mi ti a selsrɪ tōma n sosrɪ ɛ̃ sela la, tōma mi ti a bɔ'ɔrɪ ti sela ti ti sosrɪ la mɛ.

¹⁶Nēr-seka sān yɛ a sɔbia n tōnnɪ tōon-be'ego n ka sēm na kūm, a pu'ɔsɛ Nawēnne bɔ ɛ̃, ti Nawēnne wun bɔ ɛ̃ vɔm. La de la tōon-be'ego seka n ka sēm na kūm ti mam yetɪ. Tōon-be'ego n boe n sēm na nēra kūm*f1*, la dagɪ tōon-be'ego ɛ̃ɲa yelle ti mam yetɪ ya pu'ɔsɛ a ɪyā.

¹⁷Sela n ka mase wuu de la tōon-be'ero. La, la dagɪ tōon-be'ego woo n sēm na kūm.

¹⁸Tōma mi ti nēr-seka woo n de Nawēnne bia ka le tōnna tōon-be'ero. La Nawēnne Dayua la gu'uri ɛ̃ mɛ, ti be'em dāana Asūtāana ka tāna wun ɛ̃ɲɛ ɛ̃ sela.

¹⁹Tōma mi ti tōma de la Nawēnne nērba. La dūnia dōma wuu boe la be'em dāana Asūtāana nu'usum. ²⁰Tōma mi ti Nawēnne Dayua n wa'am wa bɔ ti yem, ti ti bāɲɛ Nawēnne n de sira dāana la. Tōma lagum na seka n de sira dāana la dɛna ayula, a Dayua Azezi-krisi ɪyā. ɛ̃ɲa n de Nawēnne sira sira, n bɔ'ɔrɪ vɔm n ka ba'asrɪ.

²¹M kɔma, guuse-ya ya mēɲa la бага. \f1 5:16 Bɪsɛ-ya Amatie

zuudāan-pōka*f1*, mam n gulse fu wā dagi nōor-paalga, la de la nōor-seka ti ti wōm halı pōspōsi la, mam sosrı fu me ti ti nōņe taaba. ⁶Nōņlum n de sela n wāna: La de la ti ita wu Nawēnne nōore n ye le se'em na. Nōor-seka ti ya wōm halı pōspōsi la de la bela, la de la ya nōņe taaba.

⁷Nērba zozo'e n saage dūnia pā'asrı nērba ti ba tuura. Nēr-bāma ka sake ti Azezi lebge la nērsaala wa'am dūnia zuo. Nēr-ēņa dāana n de pōmpā'asum dāana, la Krisi* sı'ısrı. ⁸Guuse-ya ya mēņa, da kān base-ya ti tōma n tōm sela bō ya la bō, ti ya wun to'oge yōwō wuu.

⁹Nēr-seka n yōsge tole nēņa ka bōna Krisi zāsņo la puam, Nawēnne ka boe la ē. La seka woo n boe a zāsņo la puam, So Nawēnne, la a Dayua boe la ē me. ¹⁰Nēra sān tarı zāsņo ayēma wa'am ya zē'am, ya da to'oge ē ya yire, la ya da pu'use ē. ¹¹Nēr-seka n pu'use ē, lagım na ē me a tōon-be'ero puam.

Ba'asgō yetōga

¹²Mam tarı yela zozo'e me ti m tōge bō ya, la mam ka boorı ti m gulse ba gōņo puam bō ya. La mam tarı putē'ere me ti mam wun wa'am ya zē'am, dee tōge m mēņa bō ya, ti ti sū-yēlga wun dena sū-yēlga zōnzōnnō. ¹³Fu sōbi-pōka ti Nawēnne looge la kōma*f2* pu'usrı fō. \f1 1, 5 Zuudāan-pōka la a kōma la de la Azezi nērba n lagsrı zē'a ayıla. \f2 1:13 Sōbi-pōka la kōma la de la Azezi nērba n lagsrı zē'a ayēma. \e

3JN

3 Zā

Gōņo butā dāana ti Azā gulse

Bilgre

Azã n de kēema la n gulse gōṅɔ wã bɔ nēra ayila yu'ure n de Agayusi.

Agayusi de la nēra n doli Nawēnne sira, dee sōṅra Azezi nērba, tɪ a pēge ē.

Azã ken tɔge la nēra ayēma yu'ure n de Adiyotrēfi yelle, yetɪ nēr-ēṅa ka ēṅe sōṅa, a ka to'oge ēṅa yetɔga, la a ka to'ose Azezi nērba.

Dee pēge nēra ayēma yu'ure n de Ademetrisi, yetɪ a de la nēr-sōṅɔ nērba wuu nifum.

Gōn-ēna wã pa'ale tōma tɪ tɪ da pagsra sela n de be'em, tɪ dɔla Nawēnne sira, la tɪ tara nōṅlum, tɔ'ɔsra taaba sāane.

Gōṅɔ butã dāana tɪ

Azã

gulse

1

¹Mam n de kēema la, n gulse bɔ'ɔra m sɪre Agayusi tɪ mam nōṅe sira sira. ²M sɪr-nōṅre, mam kã'arɪ Nawēnne tɪ sela woo āna sōṅa bɔ fɔ, tɪ fu wun tara ĩmã'asum wu fōn doli Nawēnne sōṅa se'em na.

³Tɪ sɔbiisi n wa'am kalam wa yele fōn doli sira sore se'em, la fōn vɔa la sira se'em. Tɪ mam ēṅe sũ-yēlga zozo'e. ⁴Sela ka bɔ'ɔrɪ mam sũ-yēlga gānna mam n wōm tɪ ba yetɪ mam kɔma doli sira la.

⁵M sɪr-nōṅre, fōn utɪ sela bɔ'ɔra sɔbiisi la, baa la seba n de sāama la, fu utɪ la sira. ⁶Ba tɔge fu nōṅlum na yelle mɛ Azezi nērba zē'am. Fu sãn sōṅe ba tɪ ba sēṅe ba sore la wu Nawēnne n boort se'em, fu ēṅe sōṅa. ⁷Se'ere n soe la, Azezi-krisi tōoma yelle tɪ ba wɛ'esa sore la, dee

ka to'oge sɛla n̄r-sɛba n ka dolɪ Azezi la z̄e'am. ⁸Tōma de la ti sōŋɛ n̄r-bāma buuri pa'ale ti tōma naage la ba mɛ dena sira kō-yēlga la tōntōnɪba.

⁹Mam daan gulɛ gōŋɔ mɛ bɔ Azezi n̄rba, la Adiyotrɛfi n boori ti a dena n̄ŋadāana la ka to'oge mam n yeke se'em na. ¹⁰Bela, mam s̄an wa wa'am, mam wun pa'ale sɛla ti a ɛŋɛ, la ɛn parni tɔgra tōma yetɔg-be'ero la. La, la dagɪ bela mā'a, a ken zagsra mɛ ka tɔ'sra sɔbiisi, dee m̄ɛ gu'ura n̄r-sɛba n boori ti ba tɔ'sra ba la, digra ba Azezi n̄rba la puam.

¹¹M sɪr-nōŋrɛ, da pagɛ sɛla n de be'em, pagsra sɛla n ɛn sōŋa. N̄r-sɛka woo n uti sɛla n ɛn sōŋa de la Nawēnne n̄ra. La n̄r-sɛka woo n uti sɛla n de be'em ka mi Nawēnne.

¹²La s̄an dena Ademetrisi, n̄rba wuu tɔgrɪ a yelle sōŋa mɛ, ti ɛn dolɪ sira se'em na m̄ɛ pa'ala a yelle sōŋa. Tōma m̄ɛ tɔgrɪ a yelle sōŋa mɛ. La fu mi ti tōma kaseto de la sira.

¹³Mam tarɪ yela zozo'e mɛ ti m tɔgɛ bɔ fɔ, la mam ka boori ti m gulɛ ba gōŋɔ puam. ¹⁴Mam tarɪ put̄e'ere mɛ ti mam wun wa yē fɔ ti ti sōse la taaba.

¹⁵Sū-mā'asum wun bɔna la fɔ.

Fu sɪrdōma pu'usri fɔ. Pu'use ti sɪrdōma la wuu ayɪla ayɪla bɔ tɔ. \e

JUD

Azudi

Gōn-sɛka ti Azudi gulɛ

Bilgre

Azudi gulɛ gōŋɔ wā bɔ la Azezi n̄rba. Gōŋɔ wā yetɔga wōn na gōŋɔ buyi dāana ti Apɪyɛɛri gulɛ la yetɔga.

A kā'an ba me ti ba guuse ba mēṅa la pōmpɔrṅɔ karēnsāandōma zāsṅɔ, la ba yel-irɛ la, ti Nawēnne wun sɪbɛ ba me.

Dee kā'an Nawēnne nērba la ti ba ken bɔ Azezi sira, ze kāṅkāṅɛ Nawēnne sore doosgo puam la Nawēnne Sia pāṅa.

Gōn-sɛka ti

Azudi

gulɛ

1

¹Mam Azudi n de Azezi-krisi tōntōnna, la Azakɪ yɪbga la n gulɛ gōṅɔ wā bɔ'ɔra yāma sɛba ti ti Sɔ Nawēnne wi ti ya dena a nērba, nōṅɛ ya, ti Azezi-krisi gu'ura ya la.

²Nawēnne wun zoe ya ninbāalga zozo'e, bɔ ya sū-mā'asum, la nōṅlum zozo'e.

Pōmpɔrṅɔ karēnsāandōma

(2 Pɪyɛɛɪ 2:1-17)

³M sɪr-nōṅrɪsɪ, mam daan boorɪ me ti m gulɛ ya la m sūure wuu tɔɔɛ fāare la ti ti wuu lagɪm yē la yelle. Mam bɪɛ me ti la de la pērgre ti mam gulɛ kā'an ya, ti ya mōrge zɛbɛ ze'ele kāṅkāṅɛ yetɔga la ti ya bɔ sira la puam. Nawēnne dɪke yetɔg-bāma bɔ a nērba la nōore ayɪla mā'a wakate wuu iyā. ⁴Se'ere n soe la, nērba baseba n li'ise kē ya puam. Nēr-bāma de la sɛba n sɪ'ɪsrɪ Nawēnne, tɛera a yel-sōnne yetɔga la, dɪke tōnna tōon-dēgrɔ, dee sɪ'ɪsra Azezi-krisi n de ti ke'ema la ti Zuudāana ayɪla mā'a la. Halɪ kurum kurum ti la pōn gulɛ sɪbɛ sɛka ti ba wun yē.

⁵Baa la yāma n mi bōn-bāma wuu sōṅa sōṅa la, mam boori ti m tēege ya me ti Nawēnne n yuun fāage a nērba Ezipti* tēṅa la, a yuun yāṅa base me ti nēr-seba n ka bɔ ē sira la ki. ⁶La malekadōma* seba n yuun ka sake Nawēnne n bɔ ba ke'eṅo se'em base zē'e-seka ti Nawēnne bɔ ba la, Nawēnne ba ba me la bānsi, base ti ba bɔna lika puam wakate wuu gu'ura dabs-kāte la n de sariyadia daare la. ⁷La sān dena Sodom* la Gomōori dōma, la tēnsi seba n lem ba la, n mē yuun ēṅe wu bela, tōm yalsi tōoma, la, la dagi la nērsaalba mā'a. Ba yuun yē sibgre me n de bugum n ka kiṅri, ti la dena kā'aṅo bɔ nērba baseba.

⁸La de la bōn-bāma buuri n bela ti nēr-bāma mē uti. Ban tē'esri se'em na boti ba dēgra la ba mēṅa, ba pɔ'ori Nawēnne n tari nōore la ba le la me, dee tuura saazuum pānsi dōma. ⁹La baa malekadōma ke'ema Amiselu n yuun toṅri la Asūtāana* wē'era nōke'ene Amoyisi* kūm iyā la, a ka saage toṅe zerge ē tu ē, a yuun yeti: < <Zuudāana la wun sibge fɔ. > >

¹⁰Nēr-bāma toṅri la sela ti ba ka mi be'em, ba uti la yooryooro, ba ān wu dūnsi n ka tari yem n uti se'em na, bōn-ēṅa n sā'anu ba. ¹¹Ba wun yē toogo, se'ere n soe la, ba doli la so-seka ti Akāi* yuun doose la, la ba kē'ese ba mēṅa me tuure puam yɔɔɔ iyā, wu Abalaam* n ēṅe se'em ligri iyā la. Ban si'ise Nawēnne nōore wu Akoore n yuun si'ise Nawēnne nōore se'em na, ba ki me. ¹²Ba sān lagum na ya dita nōṅlum dia, la de la yānne bɔ ya. Ba ka zoti yānne, ba kɔ'on dita me uta sū-yēlga ba mēṅa iyā. Ba ān wu sawara n ka tari ko'om ti kusebgo pe'eri, ba ān wu tusi n ka tari bie ba wɔṅa wakate, ti ba vō, base ti ba vōoro, la ba yēga wuu ku. ¹³Ba ken āna wu ko-kāte ko-mī'isi n wē'eri la pāṅa, ba yānne tōoma la ān wu ko-kāte fulfuka la, ba ān wu wōrbie seba n eeri. Nawēnne māasum na zē'a n de lika tam biṅe

wakate n ka ba'asri gu'ura ba.

¹⁴La po dena la nēr-bāma yelle ti A'enōki n de ti yaaba buyopɔi dāana lan pɔse la Adam* na, yɔvɔn to'oge Nawēnne yetɔga tɔge yeti: < < Bise-ya, Zuudāana Nawēnne sēm me la a malēkadōma tusa tusa ¹⁵ti a di nērsaalba wuu sariya, sibge tōon-be'ero dōma wuu, ban si'ise ē tōnna tōon-be'ero la wuu iya, la yetɔg-be'ero wuu ti ba tɔge pɔ'oge ē na iya. > > ¹⁶Nēr-bāma de la nērba n yōnni wakate wuu, ba sūure ka ān yēlum la ban ān se'em na. Ba uti la ba mēɲa yem n boori se'em, tɔgra pa'al-m-mēɲa yetɔga, dee tɔgra nērba nō-yēlum yetɔga ti ba yē yōoro.

Kā'aɲɔ

¹⁷La sān dena yāma, m sir-nōɲrisi, tēra-ya yetɔg-seba ti ti Zuudāana Azezi-krisi Tōntōntba* la daan dēɲe tɔge bɔ ya la. ¹⁸Ba daan yeke ya yeti: < < Dūnia ba'asgɔ wakate, nērba n la'ari nērba n wun wa bɔna dɔla ba mēɲa yem n boori se'em, si'usra Nawēnne. > > ¹⁹La de la bāma n tari welgre sēna. Ba doli la nērsaalba putē'era n boori se'em, Nawēnne Sia* ka boe la ba le. ²⁰La yāma, m sir-nōɲrisi, sōɲra-ya taaba sēna nēɲa yan bɔ Nawēnne sira la pɔam, pɔ'usra-ya Nawēnne la a Sia pāɲa. ²¹Bɔna-ya Nawēnne nōɲlum na pɔam gu'ura ti ti Zuudāana Azezi-krisi n de ninbāal-zɔta la wun bɔ ya vɔm n ka ba'asri. ²²Zɔta-ya seba yem n yɔvɔri la ninbāalga. ²³Fāage-ya seba n boe bugum pɔam na. La, la sān dena baseba la, zɔta-ya ba ninbāalga, la ya guuse ya mēɲa da lagum na ba tōnna tōon-dēgrɔ ti ba mēɲa boori la baa fēfēe.

²⁴Pēge-ya Nawēnne, ēɲa n tari pāɲa wun gu ya ti ya kān base a sore, dee wun tari ya sēɲe ka ze'ele a nēɲam ti ya ka tara dōrga, ti ya yē a na'am pāɲa, la sū-yēlga zozo'e. ²⁵Nawēnne ayila mā'a n de ti

Fāagra ti Zuudāana Azezi-krisi ĩyā, n soe pēka, la nā'asgɔ, la pāŋa, la ke'eŋo, lan dēŋe pī'iluŋo, la lēele wā, la wakate n ka ba'asri. Amina.

\e

REV

Pukre

Pukre Gōŋɔ

Bilgre

Azā yuun gulse gōn-ēna wā la wakat-seka ti Rom na-keko nāmsri Azezi nērba zozo'e, ban yeti Azezi mā'a n de bāma Zuudāana, dee ka nā'asra na-keko la wu Nawēnne na ĩyā.

Wakat-seka ti Azā gulse gōŋɔ wā la, ti a yuun boe la Patmōsi, tēŋa ti ko'om gilge. Ba yuun yōke ē me sēŋe ka base bilam, ēn mōole Azezi kō-yēlga la ĩyā.

Azā gulse ti a boti Azezi nērba n yē buraane, la ba ken tara putē'ere gu'ura sela ti Nawēnne wun bɔ ba, Azezi n yāŋe sela woo la ĩyā.

Gōn-ēna puam, mām̄sgɔ zozo'e n boe mī n ze'ele Nawēnne gōn-keka la puam. Nimōrɔdōma zozo'e n boe mī n de yela mām̄sgɔ.

Azā yeti Azezi n dēŋe puke a mēŋa pa'ale ēŋa, yeti ēŋa gulse gōnno bɔ Wēnde-seba n boe Azi-minēeri tēnsi bayopɔi puam (sapitri 1-3).

Bela poorum, Nawēnne Sia tari ēŋa sēŋe la Nawēnne yire ka pa'ale ēŋa yela zozo'e:

- Ban nā'asri Nawēnne, la Azezi se'em (sapitri 4-5).
- Azezi n lake gōŋɔ n tabe zē'esti buyopɔi (sapitri 6-8).
- Malēgsti n peebe benkɔma bayopɔi (sapitri 8-11).
- Bōna bayopɔi n de dāalgɔ (sapitri 12-15).
- Nawēnne sū-isgre n pure laasi bayopɔi (sapitri 16).

- Babiloni n de tēn-kāte n sã'am, la ban sã'am Asūtãana la a poorum dōma (sapitri 17-20).

- Nawēnne tēn-paalga, la Azezi lemjo (sapitri 21-22).

Bōn-sēba ti Azã yē la, de la bōna buuri to'oto'ore mām̄sgo n kē'eri taaba puam. Nērba n wōnni gōṅṅo wã bōndōma baseba vōore se'em na, de la to'oto'ore.

Baa la bela, a yetog-zuugo la de la ayula. Azezi-krisi yāṅṅe sela woo mē. Asūtãana, la bōn-be'ero sēba n ken bōna lēlele wã, Nawēnne wun sã'am ba ba'ase mē. La sēba n bō Nawēnne sira yāṅṅe, wun yē sū-yēlga n ka ba'asri.

Pukre Gōṅṅo

1

Bōn-sēba ti Azezi-krisi puke pa'ale Azã

¹Gōṅṅo wã tarti la sela ti Azezi-krisi puke pa'ale. Nawēnne n daan bō ē bōn-bāma ti a pa'ale a tōntōniba sela n wun ēṅṅe wakate fēfēe puam. Azezi-krisi daan tōm na a maleka* a tōntōnna Azã zē'am ti a pa'ale ē bōn-bāma. ²Azã n gulse sela wuu ti a yē la pa'ale ti la de la Nawēnne yetoga ti Azezi-krisi puke pa'ale ēṅṅa. ³Nēr-seka n karēṅṅri Nawēnne yetoga ti a to'oge tōge wã, la sēba n selsri bōn-sēba n gulse gōn-ēna wã puam dee sakra ba tarti zu-yēlga. Wakate la lem mē, ti bela wuu wun ēṅṅe.

Azã pu'usr̄i Nawēnne nērba n lagsri tēnsi bayop̄u

⁴⁻⁵Mam Azã n gulse gōṅṅo wã bō'ora tēnsi bayop̄u n boe Azi* so'olum puam na Wēndeto nērba. Zuudāana Nawēnne n daan boe, n ken

bɔna, dee wun bɔna wakate wuu la, la sust bayopɔi n boe a na'am
bĩmbĩnne nẽnam, la Azezi-krisi n tɔgrɪ Nawẽnne yelle sɪra, ẽɲa n ki
dee dena pɔspɔsi dāana n vo'oge, dena dũnia na'adõma naba la, wun
ẽɲe ya yel-sõnne, dee bɔ ya sũ-mã'asum.

Azezi-krisi nõɲe tõma me, ki tɪ a zum fãage tõma tõon-be'ero puam,
⁶botɪ tõma dena a so'olum kãabgɔ kẽma tõnna bɔ'ɔra Nawẽnne n de a
Sɔ la. Eɲa n soe nã'asgɔ, la pãɲa wakate n ka ba'asrɪ. Amina.

⁷Bɪse-ya, a boe la sawara puam sẽna. Nẽrsaalba wuu wun yẽ ẽ, baa
la nẽr-seba n daan lu ẽ na. Buuri wuu nẽrba n boe dũnia wun kella
me fabla a yelle. Ee, la de la bela. Amina.

⁸Zuudāana Nawẽnne n de ke'eɲo wuu dāana la yetɪ: < < Mam de la
pĩ'iluɲo la ba'asgɔ, mam n daan boe, n ken bɔna, dee wun bɔna
wakate wuu. > >

Azã yẽ Azezi-krisi wu zãasɲɔ la

⁹Mam de la Azã n de ya sobia n po nãmsra, lagum na yãma po tara
pure Nawẽnne so'olum* na puam, ken po lagum na yãma mõrgra
sẽnna nẽɲa Azezi doosgo la puam. Mam daan tɔge la Nawẽnne
yetɔga, la Azezi-krisi yelle, tɪ ba tarɪ mam sẽɲe tẽɲa tɪ ko'om gilge
yu'ure n de Patmõsi. ¹⁰Tɪ Zuudāana daare n de Lasrɪ daare la, tɪ
Nawẽnne Sia* bɔna la mam, botɪ mam wõm kõa n tɔge ke'enke'em
mam poorum wu benkonne n peebe la, ¹¹yetɪ: < < Gulse sela tɪ fu
wun yẽ la ẽɲe gõɲɔ puam, soolum bɔ tẽnsɪ bayopɔi la Wẽndeto
nẽrba: Efɛɛzi, la Simirni, la Pɛrgamɪ, la Tiyatiiri, la Sardɪ, la Filadelfi,
la Laodise. > >

¹²Tɪ mam wẽrge tɪ m bɪse sɛka n tɔgrɪ la mam na, la mam n wẽrge
la, mam yẽ la sãlma fitladõma bayopɔi. ¹³La nẽra n boe fitladõma la
tẽɲasuka ãna wu nẽrsaala* dayua la. A ye la fuugo n wɔge sige paage

a nāma, dee dīke sālma sēbrīga bobē a yō'ogō. ¹⁴A zomto daan pelge me āna yulī yulī wu lōnnō na, tī a nini āna wu bugwītum na.

¹⁵A nāma daan yēgrī wu zūuro tī ba zuge ba bugum puam na, dee tī a kōa la āna wu ko-kāte dāmḡō la. ¹⁶A daan zālī la wōrbīe bayopōi la a zuugō nu'ugo. Tī sukōbgō n saase tara nōa ayi ze'ele a nōorum yēsra. A nēḡa daan yēgrī wu wuntēḡa n ān se'em na.

¹⁷Mam n daan yē ē na, mam lui la tēḡa a nēḡam āna wu kūm na. Tī a dīke a zuugō nu'ugo paglē mam zuo yeti: < < Da zoe dabeem, tī mam n de pī'iluḡo, la ba'asgō. ¹⁸Mam de la seka n vōi. Mam daan ki me, la mam n wāna, mam vōa me wakate wuu. Mam n tarti ke'eḡo sōna kūm, la kt'in-tēḡa. ¹⁹Bela, gulse bōn-seba tī fu yē, sela n boe lēele wā, la sela n wun wa ēḡe poorum na. ²⁰Wōrbīe bayopōi tī fu yē mam zuugō nu'ugo puam, la sālma fitladōma bayopōi la vōore n wāna: Wōrbīe bayopōi la de la tēnsi bayopōi la Wēndeto la nērba gu'urba, la fitladōma bayopōi la de la tēnsi bayopōi la Wēndeto nērba. > >

2

Krisi kōa tī a bō Efēezi Wēndeego nērba

¹Seka tī mam yē la, a ken yele mam yeti: < < Gulse bō Efēezi Wēndeego nērba la gu'ura yeti: Seka n zālī wōrbīe bayopōi a zuugō nu'ugo puam, dee sēnna sālma fitladōma bayopōi tēḡasuka la n yele se'em n wāna:

²< Mam mi yāma n tōnni se'em, yāma n nāmsri dee mōrgra sēnna nēḡa se'em me. Mam mi tī ya ka sake base tī nēr-wēensi tōnna la ya. Yāma make nēr-seba n yeti bāma de la Krisi Tōntōniba* dee dagna bela la bise me, la yāma bāḡe me tī ba de la pōmpōrndōma. ³Yāma mōrge sēnna nēḡa me, ya nāmsri mam yu'ure la īyā me, dee ka base

ti ya buraane bo'oge. ⁴La yel-seka ti mam tarı la yāma n wāna: Ya ka le nōŋe mam wu yāma n daan nōŋe mam se'em pɔspɔsi la. ⁵Tēege-ya yāma n daan uti se'em dee base la. Teege-ya yem base tōon-be'ero, dee ita yāma n daan uti se'em pɔspɔsi la. Sān dagna bela, mam wun wa'am ya zē'am wa dıke ya fitla la a dɔglɔ zē'am me, ya sān ka teege yem base tōon-be'ero. ⁶La baa bela, ya uti bōn-sōŋɔ me. Yāma sise sela ti Nikolayiti nērba uti la me, wu mam n mē sise ba tōoma se'em na.

⁷Seka n wōm yetɔga wā, a selse Nawēnne Sıa n yeti a nērba se'em na sōŋa sōŋa. Seka n yāŋe, mam wun bɔ ē nōore ti a di vɔm tia n boe Nawēnne yire la bie. > > >

Krisi kōa ti a bɔ Simirni Wēdeego nērba

⁸< < Gulse bɔ Simirni Wēdeego nērba la gu'ura yeti: Seka n de pī'iluŋo la ba'asɔ, seka n daan ki dee vo'oge la n yeke se'em n wāna:

⁹< Mam mi ya nāmsgɔ la ya nōŋɔ la yelle me, la baa bela, ya de la bōntatba. Mam mi be'em yetɔg-seba ti nēr-seba n yeti bāma de la Zıfđōma* dee ka dena la tɔge ya. Ba de la Asūtāana* nērba. ¹⁰Da zoe-ya dabeem yāma n wun nāmse la. Bıse-ya, Asūtāana wun make ya bıse me, boti ba kē'esε ya nērba baseba yu'a deem, la ya wun yē nāmsgɔ me dabsa pia. Bɔ-ya mam sira halı ka paage ya kūm, ti mam wun bɔ ya bɔ'a n de vɔm.

¹¹Seka n wōm yetɔga wā, a selse Nawēnne Sıa n yeti a nērba se'em na sōŋa sōŋa. Seka n yāŋe, kūm buyi dāana kān ēŋe ē sela. > > >

Krisi kōa ti a bɔ Pergamı Wēdeego nērba

¹²< < Gulse bɔ Pergamı Wēdeego nērba la gu'ura yeti: Seka n tarı sukɔbɔ n saase tara nōa ayi la n yeke se'em n wāna:

¹³< Mam mi zē'e-seka ti yāma boe la me, zē'e-ēŋa ti Asūtāana na'am bīmbīnne boe. La ya dıke ya mēŋa lable la mam me, ze'ele kāŋkāŋe

bɔ mam sira ka base, baa la wakate seka ti ba daan kv A'antipasɪ n de sira dāana n tɔge mam yelle ya zē'am, zē'e-seka ti Asūtāana boe la.

¹⁴La baa bela, mam tarɪ la yelle fēe la ya. Yāma tarɪ la nērba n boe ya puam dɔla Abalaam* zāsɲɔ. Abalaam yuun zāsum na Abalakɪ ěn wun ěɲe se'em bēre Israyelɪ dōma botɪ ba obe бага nēnnɔ, dee tōm yalsɪ tōoma. ¹⁵Yāma mē tarɪ la nērba baseba n boe ya zē'am n doli Nikolayiti dōma zāsɲɔ. ¹⁶Teege-ya yem base tōon-be'ero. Sān dagna bela, mam wun wa'am ya zē'am lēele wā, la mam wun zebe la nēr-bāma la sukɔbɔ n ze'ele m nōorum yesra la.

¹⁷Seka n wōm yetɔga wā, a selse Nawēnne Sɪa n yetɪ a nērba se'em na sōɲa sōɲa. Seka n yāɲe, mam wun bɔ ě dia n sɔge yu'vre n de manɪ* n ze'ele saazuum ti a di, la mam wun bɔ ě kug-pēelga. Kug-ěɲa zuo yu'vr-paale n gulse mɪ, ti nēra nēra ka mina ě, sān dagna seka n to'oge ě na mā'a. > > >

Krisi kōa ti a bɔ Tiyatiiri Wēndeego nērba

¹⁸< < Gulse bɔ Tiyatiiri Wēndeego nērba la gu'ura yetɪ: Nawēnne Dayua la nini n ān wɔ bugwitung, ti a nāma yēgra wɔ zūuro ti ba zuge bugum puam na n ye'le se'em n wāna:

¹⁹< Mam bāɲe ya tōoma, la ya nōɲlum, la yan bɔ sira, la yan tōm bɔ nērba, la yan mōrge sēna nēɲa se'em mɛ. La mam mi ti ya tōnnɪ lēele wā zɔ'ɔra gāna yan tōm se'em pɔspɔsɪ la mɛ. ²⁰La yel-seka ti mam tarɪ la yāma n wāna: La de la yan sake base Azezabelɪ n de pɔka n yetɪ ěɲa de la Nawēnne nōtɔ'ɔsa, ti a zāsna nērba, pā'asra mam tōntōnɪba ti ba ita yalsɪ, dee ɔbra бага nēnnɔ na. ²¹Mam bɔ ě na wakate ti a teege yem base tōon-be'ero, la a ka boorɪ ti a teege yem base a yalsɪ tōoma la. ²²Bela, mam wun base ti a gā'are yē nāmsgɔ zozo'e. La seba n lagum na ě tōnna yalsɪ tōoma la wun yē toogo

zozo'e, sãn dagna ti ba base la tōon-be'e-seba ti a boti ba tōnna la.
²³Mam wun ken base ti a kōma ki, ti Wēndeto nērba la wuu wun
bãñe ti mam de la sēka n mi nērba tē'esgɔ, la ban boori se'em. La
mam wun yɔ ya nēra woo mase wu ěn tōnni se'em. ²⁴La yāma
Tiyatiiri nēr-seba n ka sakri zāsɲɔ bāma, dee ka mina sela ti ba wi'iri
ti Asūtāana yela n sugɛ la, mam ka tari sela wun yele ya pa'ase. ²⁵La
gure-ya sela ti ya tari la kãñkãñe halɩ ti mam wa wa'am. ²⁶Nēr-seka n
yãñe ěñe mam n boori se'em ka paage ba'asgɔ, mam wun boti a sɔna
so'olum buuri wuu. ²⁷⁻²⁸La de la pãn-seka ti mam to'oge m Sɔ
Nawēnne zē'am na ti mam wun bɔ ě. A wun tara la kuto dasaare sɔna
ba wu ban wōti lɔg-kegsɩ la. La mam wun ken bɔ ě bewā'are.
²⁹Seka n wōm yetɔga wā, a selse Nawēnne Sɩa n yeti a nērba se'em
na sōŋa sōŋa. > > >

3

Krisi kōa ti a bɔ Sardɩ Wēndeego nērba

¹< < Gulse bɔ Sardɩ Wēndeego nērba la gu'ura yeti: Seka n tari
Nawēnne susti bayopɔɩ*fl*, la wōrbie bayopɔɩ la n yele se'em n wāna:
< Mam mi ya tōoma mɛ, fu yu'ure yese mɛ ti ba yeti ya vɔa mɛ, la, ya
ki mɛ. ²Bela, guuse ya mēŋa, ti sela n deege la a ki la, yāage da ki
ba'ase. Se'ere n soe la, mam bãñe mɛ ti ya tōoma la ka paage
Nawēnne yem. ³Tēege-ya zāsɲɔ la ti ya daan wōm dee to'oge ě se'em
na, sake-ya ě teege yem base tōon-be'ero. Ya sãn ka guuse, mam wun
wa'am wa di'ige ya wu nayiga la, la ya kãn bãñe wakat-seka ti mam
wun wa'am ya zē'am. ⁴La nērba baseba n boe yāma puam Sardɩ ka
dēge ba futo. Bāma n wun ye fu-peelsɩ doose mam, bāma n mase la
ĩyā. ⁵Nēr-seka n yãñe wun wa ye la fu-peelsɩ bela, la mam kãn saam a

yu'ure wɔm gɔŋɔ la puam. La mam wɔn wi a yu'ure mam So, la a malekadōma* la nējam yeti a de la mam nēra.

⁶Seka n wɔm yetɔga wā, a selse Nawēnne Sia n yeti a nēba se'em na sōŋa sōŋa. > > >

Krisi kōa ti a bɔ Filadelfi Wēndeego nēba

⁷< < Gulse bɔ Filadelfi Wēndeego nēba la gu'ura yeti: Seka n de pupeelem dāana, la sira dāana n tarɪ naba Adavidi* kulɔnbie, seka n yu'uri ti nēra ka tāna yɔ'ɔra, dee yɔ'ɔra ti nēra ka tāna yu'ura la n yelee se'em n wāna:

⁸< Mam mi ya tōoma me, mam mi ti ya pāŋa ka zo'oge, la baa la bela, ya sake mam yetɔga la me, la ya ka st'ise ti yāma ka mi mam. Mam yo'oge la sore bɔ ya, la nēra nēra kān yāŋe yu ē. ⁹Mam n wɔn ēŋe nēr-seba n dolɪ Asūtāana la se'em n wāna: Nēr-bāma yeti bāma de la Zifdōma*, la dagɪ bela, ba de la pōmpɔrndōma. Mam wɔn base me ti ba wa'am wa ka dūma ya nējam, la ba wɔn bāŋe ti mam nōŋe ya. ¹⁰Yāma n sake mam yetɔga la mōrge sēŋe nēŋa na ãyā, mam mē wɔn gu'ura ya sōŋa ti toogo seka n sēm dūnia wuu zuo, ti a make nēr-seba wuu n boe dūnia zuo la, da paage ya. ¹¹Mam sēm na leele, gure-ya sela ti ya tarɪ la kāŋkāŋe, ti nēra da to'oge ya yɔɔɔ. ¹²Nēr-seka n yāŋe, mam wɔn botɪ a āna wu zēere mam So Nawēnne yire puam, la ba kān malɪn yese ē mĩ. La mam wɔn gulse mam So Nawēnne yu'ure, la a tēŋa n de Zerizalem paalga n ze'ele saazuum Nawēnne zē'am signa la yu'ure a zuo, la mam wɔn ken gulse mam mēŋa yu'ur-paalga la a zuo.

¹³Seka n wɔm yetɔga wā, a selse Nawēnne Sia n yeti a nēba se'em na sōŋa sōŋa. > > >

Krisi kōa ti a bɔ Laodise Wēndeego nēba

¹⁴< < Gɔlse bɔ Laodise Wēndeego nērba la gu'ura yeti: Seka n de Amina* la, sɛka n de sira dāana, dee siri tɔgra sɛla ti a nini yē, dee ken dɛna sɛka ti Nawēnne n nāam sɛla wuu ze'ele a zē'am n yele se'em n wāna:

¹⁵< Mam mi ya tōoma mɛ, mam mi ti ya dagi mā'asga, ya mē dagi tɔvɔlga. Mam boori ni ti ya dɛna la mā'asga bu tɔvɔlga. ¹⁶La yāma n ka de mā'asga bu tɔvɔlga mam tōoma la pɔam, dee āna wam na, mam wun uke ya mɛ m nōorum basɛ.

¹⁷Ya yeti yāma de la bōntatba, yāma tari sɛla woo mɛ ti sɛla ka pɔ'ɔge yāma. La, ya ka mi ti ya de la ninbāal-dōma, la fare dōma. Ya de la nasdōma, la beɛla, la fɔɔsi. ¹⁸Bɛla iyā, mam kā'anɪ ya mɛ ti ya da sālma mēŋa mēŋa ti ba zuge bugum pɔam yese ba mam zē'am, ti ya wun siri dɛna bōntatba. La ya da fu-pɛɛlɪ yɛ pī ya yānne na, dee da tum dō ya nini yēta. ¹⁹Mam sibgri la seba wuu ti mam nōŋɛ, dee dɛmsra ba. Bɛla, nargɛ-ya pāŋa teege yɛm basɛ tōon-be'ero. ²⁰Bise-ya, mam ze la kuliŋa nōorum wē'era, nēr-sɛka n wōm mam kōa yo'oge kuliŋa bɔ mam, mam wun kē a zē'am lagum na ɛ di, ti a mē lagum na mam di. ²¹Nēr-sɛka n yāŋɛ, mam wun boti a lagum na mam po zī'ire mam na'am bīmbīnne zuo, wu mam yāŋɛ po lagum na mam So Nawēnne zī'ire a na'am bīmbīnne zuo la.

²²Sɛka n wōm yetɔga wā, a selse Nawēnne Sia n yeti a nērba se'em na sōŋa sōŋa. > > >

4

Ba nā'asri Nawēnne saazuum

¹Bɛla poorum, mam bise mɛ yē ti kuliŋa n yo'oge Nawēnne yire. Ti kōa la ti mam wōm pɔspɔsi n tɔge la mam wu benkonne n peebe la,

yele mam yetu: < < Zom wa'am kalam, ti mam wun pa'ale fu sela n wun wa ēṅε. > > ²Ti Nawēnne Sia dare bɔna la mam boti mam yē na'am bīmbīnne n boe Nawēnne yire, ti nēra zēa a zuo. ³Seka n zī bīmbīnne na zuo la nēge yēgra wu kuga n tarti yōoro yu'ure n de zaspi, la sardvanu. La gōmatu-tāpɔ n yēgru āna wu kugre yu'ure n de emerɔdi n kaage na'am bīmbīnne na. ⁴La na'am bīmbīna pisyi la anaasi n daan gilge na'am bīmbīn-ēṅa, ti kēma pisyi la anaasi n ye fu-pēelsi vuge sālma mūnsi zēa ba zuto. ⁵Ti saaga ze'ele na'am bīmbīnnum na yēgra, tāsra dee sūnna, la fitladōma bayopɔi n lasum dita na'am bīmbīnne na nēṅam. Bāma de la Nawēnne susi bayopɔi la*f2*. ⁶Na'am bīmbīnne na nēṅam, bōnɔ n gāi āna wu ko-kāte yēgra wu bɪsga.

La bōn-vɔɔsi banaasi n gilge na'am bīmbīnne na n boe tēṅasuka la, ti nini pure ba nēṅa, la poore. ⁷Pɔspɔsi bōn-vɔa la wōn na gɪgnε, ti buyi dāana la wōna lulla, ti butā dāana la tara nēṅa n wōn na nērsaala nēṅa. La bōn-vɔa bunaasi dāana la wōn na tugfo n ēgru. ⁸Bōn-vɔɔsi banaasi la ayula woo tarti la kempagsi bayoobi ti nini pure ba zē'a woo, tilum na zuum. Yu'uhɔ la wuntεεṅa, ba yōoni me ka gɔ'ɔra yetu:

< < Sōṅa, sōṅa, sōṅa,

Zuudāana Nawēnne n de ke'eṅo wuu dāana n ān sōṅa.

Ēṅa n daan boe, n ken bɔna, dee wun bɔna wakate wuu. > >

⁹Bōn-vɔɔsi banaasi la ēn nā'asra seka n zī na'am bīmbīnne zuo n vɔa wakate wuu la me, pēgra ē dee pu'usra ē a yel-sōnne. ¹⁰Ba sān ēn ēṅε bela, kēma pisyi la anaasi la ēn ka la dūma seka n zī na'am bīmbīnne zuo n vɔa wakate wuu la nēṅam nā'asra ē, dee vugse ba mūnsi bīṅe na'am bīmbīnne na nēṅam, dee yeta ti:

¹¹< < Ti Zuudāana Nawēnne,

fõn mase fu to'oge na'am pãña,
la nã'asgɔ, la ke'ejɔ,
la de la fõn nãam sela woo,
la de la fõn boortɪ ïyã,
ti fõn nãam ba ti ba bɔna. > >

5

Gõŋɔ n tabe zẽ'esti bayopɔɪ, la Azezi n de Pebila yelle

¹La mam yẽ la gõŋɔ n boe seka n zĩ na'am bĩmbĩnne zuo la zuugo nu'ugo puam, ti a nẽña la a poore wuu gulse, ti ba dıke bõnɔ n tabri tabe ẽ zẽ'esti bayopɔɪ. ²Ti mam yẽ maleka* n tarı pãña n tɔgrı ke'enke'em yetı: < < Ane n mase wun lake bõnɔ na n tabe la, dee lake gõŋɔ la? > > ³La nẽra nẽra daan ka boe Nawẽnne yire, bu dũnia zuo, bu tẽña wã puam puam n tã wun lake gõŋɔ la, dee bıse a puam. ⁴Ti mam daan kella zozo'e, ban ka yẽ nẽra n mase n wun lake gõŋɔ la, dee bıse a puam na ïyã. ⁵Ti kẽma la nẽra ayıla yele mam yetı: < < Da kella. Bıse, seka n de Azuda* buuri gıgne*f3* n de naba Adavidi* yuŋa la yãŋe me, ẽña n tã wun lake bõnɔ na n tabe zẽ'esti bayopɔɪ la, dee lake gõŋɔ la. > > ⁶Ti mam yẽ Pebila*f2* n ze na'am bĩmbĩnne na tẽñasuka, ti bõn-vɔɔsi banaasi, la kẽma la gilge ẽ base tẽñasuka. Pebila la ãn wu ba daan ku ẽ me na. A tarı la ıla bayopɔɪ, la nini bayopɔɪ n de Nawẽnne susti bayopɔɪ la*f2* ti a tõm dũnia wuu puam na. ⁷Ti Pebila la paage to'oge gõŋɔ la seka n zĩ na'am bĩmbĩnne zuo la zuugo puam. ⁸En to'oge gõŋɔ la, bõn-vɔɔsi banaasi la, la kẽma pısyi la anaasi la, ka la dũma a nẽñam. Ba nẽra woo zãlı la kõlŋɔ, la sãlma laasi n pıre la tudare n tarı yũuŋo n ãn yẽlum, n de Nawẽnne nẽrba pu'usgɔ. ⁹Ba daan yõontı la yõom-paale yetı:

< < Fõn mase ti fu to'oge gõŋɔ la lake bõnɔ na n tabe la.
Se'ere n soe la, ba daan ku fõn me,
ti fõn dike fu zum na yɔ to'oge nersaalba buuri wuu, la yetɔga
buuri wuu, la tẽnsti wuu nẽrba, la so'olum wuu nẽrba bo
Nawẽnne.

¹⁰Fõn boti ba dena la fu so'olum kãabgɔ kẽma tõnna bɔ'ɔra
Nawẽnne, dee wun di na'am dũnia zuo. > >

¹¹Ti mam le bise, wõm malekadõma kuuyɔ kõa, ba daan de la tusa
nõore tusa tusa. Ba daan gilge la na'am bĩmbĩnne na, la bõn-vɔɔsi
banaasi, la kẽma la. ¹²Ba daan yõoni me ke'enke'em yeti:

< < Pebila ti ba daan ku la n mase ti a to'oge ke'eŋo, la
bõntarsõm, la yem, la pãŋa, la nã'asgɔ, la na'am pãŋa, la
pẽka. > >

¹³Ti mam wõm bõn-nãanisɩ wuu n boe Nawẽnne yire, la tẽŋa zuo, la
tẽŋa puam puam, la ko-kãte puam, la bõn-nãanisɩ n boe zẽ'esti wuu n
yeti:

< < Seka n zĩ na'am bĩmbĩnne zuo, la Pebila la n soe pẽka, la
nã'asgɔ, la na'am pãŋa, la ke'eŋo wakate n ka ba'asri. > >

¹⁴Ti bõn-vɔɔsi banaasi la yeti: < < Amina*. > > Ti kẽma la ka dũma
tẽŋa nã'asra ẽ.

6

Bõnɔ n tabe zẽ'esti bayopɔi la, bayoobi lakre

¹La mam yẽ me ti Pebila* la lake bõnɔ na n tabe zẽ'esti bayopɔi la
ayula. Ti mam wõm bõn-vɔɔsi banaasi la ayula n tɔgrɩ ti a kõa ãna wu
saaga n tãsrɩ la yeti: < < Wa'am! > > ²Ti mam bɩsra, yẽ wemõa n de
pɛelga. Ti nẽra bã ẽ zãla tãpɔ, ti ba bɔ ẽ mũŋa. Ti a dena nẽra n

yāŋri, sēŋe ti a yāŋe.

³Ti Pebila la lake bōnɔ buyi dāana n tabe la, ti mam wōm bōn-vɔa buyi dāana n yeti: < < Wa'am! > > ⁴Ti wemōa n de mōlga yese. Ti ba bɔ sɛka n bā ē na ke'ejo ti a yese dūnia sū-mā'asum ti nērba kuvra taaba, dee bɔ ē sukɔbgɔ n ān kātɛ.

⁵Ti Pebila la lake bōnɔ butā dāana n tabe la, ti mam wōm bōn-vɔa butā dāana la n yeti: < < Wa'am! > > Ti mam bisra, yē wemō-sabga. Ti sɛka n bā ē na zāla bōn-makrɪga a nu'ugo puam. ⁶Ti mam wōm dāmne n ān wu kōa n ze'ele bōn-vɔɔsɪ banaasɪ la tēŋasuka yeti: < < Si ligri wun zo'oge me, ti nēra daare ayula yɔɔrɔ wun da si wulla ayula, dee ti kamāana wulsi batā dena nēra daare ayula yɔɔrɔ. La, la sān dena kaam la dāam, da pa'ase sela. > >

⁷Ti Pebila la lake bōnɔ bunaasɪ dāana n tabe la, ti mam wōm bōn-vɔa bunaasɪ dāana n yeti: < < Wa'am! > > ⁸Ti mam bisra, yē wemōa n de puka. Sɛka n bā ē na yu'ure n de Akūm, ti ki'in-tēŋa dɔla a poore. Ti ba bɔ ba ke'ejo ti ba ku dūnia nērba banaasɪ woo puam nēra ayula. Sukɔbgɔ, la kɔm, la bā'asɪ, la we-dūnsɪ n wun ku ba.

⁹Ti Pebila la lake bōnɔ bunuu dāana n tabe la, ti mam yē nēr-sɛba ti ba daan ku ba, ban mōole Nawēnne yetɔga la, dee vɔa wu yetɔga la n yeke se'em na iyā, susɪ n boe kāabgɔ bīmbinne na tilum. ¹⁰Ti ba tɔgra ke'enke'em yeti: < < Zuudāana n gānnɪ wuu n ān sōŋa, n de sira dāana, fōn wun yuuge paage la wāne dee di dūnia nērba sarɪya sɪbge ba, ban ku tōma la iyā? > > ¹¹Ti ba bɔ ba nēra woo fu-pɛɛlga, dee yeke ba yeti ba gu fēe, halɪ ti ba ku ba sɔbiisi n de ba tōntōn-taaba, n de ba ku ba wu bāma la, ti ba sōore paage.

¹²Ti Pebila la lake bōnɔ buyoobi dāana n tabe la, ti tēŋa mīim zozo'e, ti wuntɛɛŋa lebge lika wu tān-sabga, dee ti wōrga lebge mōlga wu zum na. ¹³Ti wōrbie ze'ele saazuum suuge tēŋa, wu

kēnkāṇa ti kuseb-kāte mīim ti kēnkāma suvge la. ¹⁴Ti sagōṇo kilim wu sōṇo la bɔi. Ti tānsi wuu, la tēn-seba ti ko'om gilge la wuu ka le bɔna ba zē'esti. ¹⁵Ti dūnia na'adōma, la nēr-kegro, la sudaasi ke'endōma, la bōntatba, la pānsi dōma, la yamsi, la burkīndōma wuu svgra tānsi bogro pvam, la tāmpīisi lēma. ¹⁶Dee yeta tānsi, la tāmpīisi la yeti: << Lui-ya ti zuto svge tɔ, ti seka n zī na'am bīmbīnne zuo la da yēta tɔ, ti Pebila la sū-isgre da paage tɔ. ¹⁷Se'ere n soe la, ba sū-isgre daare paage me, nēra ka boe n wun yāṇe pōse. >>

7

Nawēnne nērba dāalgɔ

¹Bela poorum, mam yē la malekadōma banaasi n ze dūnia sakvgrɔ banaasi. Ba daan yōge la dūnia kusebgo n ze'ele zē'esti banaasi la wuu, ti ba da vugra wē'eri tēṇa, bu ko-kāte, bu tia. ²La mam yē la maleka ayēma n ze'ele wēntulle n doori zē'a la zɔnna, a zālɪ la vom dāana Nawēnne dāalgɔ bōnɔ. La a tɔge la ke'enke'em yele malekadōma banaasi la ti Nawēnne bɔ ba nōore ti ba sā'am tēṇa, la ko-kāte la yeti: ³<< Nān da sā'am-ya tēṇa, bu ko-kāte, bu tusi, base-ya ti ti ēṇe Nawēnne tōntōnɪba la dīa dāalgɔ, dee ti ya sā'am. >> ⁴Ti mam wōm seba ti ba ēṇe ba Nawēnne dāalgɔ la sōore. Ba de la nērba tuskɔbga la tuspinaasi la anaasi (144 000). Ba ze'ele la Israyeli* buuri la wuu pvam. ⁵Azuda buuri nērba ti ba dāale de la tuspia la ayi,

Arubā buuri nērba tuspia la ayi,

Agadı buuri nērba tuspia la ayi,

⁶Azeeri buuri nērba tuspia la ayi,

Aneftali buuri nērba tuspia la ayi,

Amanase buuri nērba tuspia la ayi,
⁷Asimeyō buuri nērba tuspia la ayi,
 Alevi buuri nērba tuspia la ayi,
 A'isakaaru buuri nērba tuspia la ayi,
⁸Azabilō buuri nērba tuspia la ayi,
 Azozefu buuri nērba tuspia la ayi,
 Abēnzamē buuri nērba tuspia la ayi.

Nēr-kvυηϗ zozo'e n lagse

⁹Bela poorum mam bisri me, yē nēr-kvυηϗ zozo'e ti nēra nēra ka tā wun kāale. Ba de la so'olum wuu nērba, la buuri wuu nērba, la tēnsi wuu nērba, la yetϗga buuri wuu nērba. Ba daan ye la fu-peelsi zāla karkϗηa vōorϗ ba nu'usum ze na'am bīmbinne, la Pebila* la nējam.

¹⁰Ba tϗgru la ke'enke'em yetu:

< < Fāare ze'eti la tōma Nawēnne n zī na'am bīmbinne zuo, la Pebila la zē'am. > >

¹¹Malekadōma la wuu daan ze gilge la na'am bīmbinne, la kēma, la bōn-vϗϗsi banaasi la. Ba daan ēn ka la dūma dīke ba nēnsi vōgle tēηa na'am bīmbinne na nējam nā'asra Nawēnne ¹²yetu:

< < Asira, Nawēnne n soe nā'asgϗ, la na'am pāηa, la yem, la yel-sōnne pu'vsgϗ, la pēka, la ke'eηo, la pāηa wakate n ka ba'asri. Amina. > >

¹³Ti kēma la ayila soke mam yetu: < < Andōma n de nēr-bāma n ye fu-peelsi la, ba ze'ele la be? > > ¹⁴Ti mam lerge ē yetu: < < M zuudāana, fōn mi. > > Ti a yele mam yetu: < < Ba de la nēr-seba n ze'ele toog-kāte pvam na. Ba peege ba futo me Pebila la zum pvam ti ba pelge. ¹⁵Bela n soe ti ba ze Nawēnne na'am bīmbinne na nējam, tōnna bϗ'ora ē wuntēηa la yu'vηϗ a yire la pvam. Sēka n zī na'am

bĩmbĩnne zuo la n wun gu'ura ba. ¹⁶Kom la koyũuro kãn le yõke ba, wuntɛɛŋa la a tɔvlgɔ kãn le wõŋe ba. ¹⁷Se'ere n soe la, Pebila la n boe na'am bĩmbĩnne tẽŋasuka la n wun bɪsra ba yelle, ẽŋa n wun tarɪ ba sẽŋe ko'om n bulli n bɔ'ɔrɪ vɔm zẽ'am. La Nawẽnne n wun duuse ba nintãm wuu. > >

8

Bõnɔ n tabe bayopɔɪ dãana la lakre

¹Pebila la lake la bõnɔ bayopɔɪ dãana n tabe la, tɪ la ãna yɪrɪrɪr Nawẽnne yire wakate fẽe paage karf-ayɪla pusuka. ²Tɪ mam yẽ malekadõma bayopɔɪ n ze Nawẽnne nẽŋam, tɪ ba bɔ ba benkɔma bayopɔɪ.

³La maleka ayẽma n wa'am wa ze'ele kãabgɔ bĩmbĩnne na zẽ'am. A daan tarɪ la sãlma laaga tɪ ba tarɪ yõ'ora tɪdare. Tɪ ba bɔ ẽ tɪdare pãɪ, tɪ a dɪke ba lagum na Nawẽnne nẽrba wuu pu'usgɔ yõ sãlma kãabgɔ bĩmbĩnne n boe na'am bĩmbĩnne na nẽŋam na zuo bɔ Nawẽnne. ⁴Tɪ tɪdare la tɪ a yõ la bug-zũ'usi lagum na Nawẽnne nẽrba la pu'usgɔ, ze'ele maleka la n ze Nawẽnne nẽŋam na nu'usum zɔnna saazuum. ⁵Tɪ maleka la dɪke laaga la tɪ ba tarɪ yõ'ora tɪdare la, pure ẽ na tɪdare bugum na n boe kãabgɔ bĩmbĩnne zuo la lobge ba tẽŋa zuo. Tɪ saaga tãsra, yãgra dee sũnna, tɪ tẽŋa mĩim.

Benkɔma peebgo

⁶Malekadõma bayopɔɪ la n zãɪ benkɔma bayopɔɪ la, mãasum me tɪ ba peebe ba.

⁷Tɪ pɔspɔsɪ maleka la peebe benkonne. Tɪ sakuga la bugum n gaam na zum ka'age dũnia zuo. Tɪ dũnia zẽ'estɪ batã pvam, bugum di zẽ'a ayɪla, tɪ tɪstɪ zẽ'estɪ batã pvam, bugum di zẽ'a ayɪla, tɪ mõ-mã'asa wuu

di bugum.

⁸Ti maleka buyi dāana peebe benkonne. Ti ba lobge sela ko-kāte puam n ān wu tān-kāte ti bugum diti. Ti ko'om na zē'esti batā puam, zē'a ayula lebge zum. ⁹Ti bōn-vooṣi seba n boe ko'om puam na batā puam woo ayula ki. Ti ōornɔ batā puam woo ayula sā'am.

¹⁰Ti maleka butā dāana peebe benkonne. Ti wōrbi-kāte n diti bug-zuluṅa ze'ele saazuum lui mōga, la kulṣi ko'om puam, a lui la ko'om na zē'esti batā ayula puam. ¹¹Wōrbiire la yu'ure de la Azēlōm. Ti ko'om na zē'esti batā puam, zē'a ayula lebge zēlōm. La nērba zozo'e n yū ko'om na ki, ko'om na n de zēlōm na ãyã.

¹²Ti maleka bunaasi dāana peebe benkonne. Ti wēntulle zē'esti batā puam zē'a ayula, la wōrga zē'esti batā puam zē'a ayula, la wōrbie zē'esti batā puam zē'a ayula pāṅa ba'ase, ti ba wuu zē'esti batā puam, zē'a ayula lebge lika. Ti wuntēṅa zē'esti batā puam ayula ka le nēera peelem, ti yu'uhɔ mē bela.

¹³Ti mam yē sil-kāte n ēgrɪ saazuum-zuum, wōm ēn togrɪ ke'enke'em yeti: < < Wai, wai! Nēr-seba n boe tēṅa wã zuo wun yē la toogo, malekadōma batā n weege la n wun peebe ba benkɔma, ti ba yē toogo. > >

9

¹Ti maleka bunuu dāana peebe benkonne. Ti mam yē wōrbiire n ze'ele saazuum lui dūnia zuo. Ti ba bɔ ē bog-ko'ogo saafɪbiire. ²Ti wōrbiire la pake bog-ko'ogo la, ti bug-zū'usi ze'ele bog-ko'ogo la puam yesra wu bug-kāte zū'usi la, boti wuntēṅa, la sapebsum sobe. ³Ti tēnta'aba ze'ele zū'usi la puam yese saage dūnia zuo. Ti ba bɔ ba toogo wu nānsɪ toogo la. ⁴La ba yele ba yeti ba da ēṅe mōorɔ, la bōn-seba wuu n yesri tēṅa, la tustɪ sela, ba pɔglum nēr-seba n ka tari

Nawēnne dāalgɔ ba đia zuto la mā'a. ⁵Ba daan ka bɔ tēnta'aba la nōore ti ba ku nērba la, la de la ba nāmse ba wōr-sɪnuu. Ban boti toog-seka nāmsra nērba la ān wu nāɲa n ēn dōn nēra ti la dōnna se'em na. ⁶La dabsa bāma, nērsaalba wun ɛera kūm, la ba kān yē ē. Ba wun bɔɔra ti ba ki, la kūm wun zoe dee base ba.

⁷Tēnta'aba la ān wu wiiri n māasum gu'ura zebre, la sela n boe ba zuto āna wu sālma mūnsi, dee ti ba nēnsi āna wu nērba nēnsi la. ⁸Ba tari la zomto n ān wu pɔgsi zomto la. Dee ti ba yēna āna wu gɪgma yēna la. ⁹Ba dɪke la bōnɔ n ān wu kuto futo pī ba yō'orɔ. La ba kempagsi la dāmne ān wu wiiri toto ti wiiri zozo'e ve'eri zɔta we'esa zebre zē'a. ¹⁰Ba tari la zɔa wu nānsi zɔa la dōnna. Ba zɔa bāma n bɔ ba ke'eɲo ti ba nāmse nērba wōr-sɪnuu. ¹¹Ba daan tari la naba, a de la malek-seka n gu'uri bog-ko'ogo la. A yu'ure la Ebre* yetɔga de la <<Abadō>>, la Greki* yetɔga de la <<Apoliyō>>, n boori ti la yeti <<Sā'ama>>.

¹²Pɔspɔsi toogo la tole mɛ. La toogo buyi n wun ken wa'am.

¹³Ti maleka buyoobi dāana peebe benkonne. Ti mam wōm kōa n ze'ele sālma kāabgɔ bimbīnne n boe Nawēnne nēɲam kuɲra banaasi la zē'am. ¹⁴Kōa la yele maleka buyoobi dāana n zālɪ benkonne na yeti: <<Lorge malekadōma banaasi ti ba lu ba, ti ba bɔna Efrati kul-kāte zē'am na base.>> ¹⁵Ti a lorge malekadōma banaasi la base. Ba daan māasum maleg-bāma gu'ura la wakate ēɲa, la dabsre ēɲa, la wōr-ēɲa, la yuun-ēɲa, ti ba ku nērsaalba batā woo puam ayɪla. ¹⁶Ti ba pa'ale mam ba sudaasi n bā'ari wiiri kālɪ, ba de la tusa kɔbsyi nōore tusre. ¹⁷Ti mam yē wiiri la, la ba wi-bā'arba n ān se'em: Ba tari la kuto futo n pī'iri yō'orɔ, ti ba mō'oge āna wu bugum, dee dēna yōosne, la dōbɔulum. Wiiri la zuto ān wu gɪgma zuto la. Bugum, la bug-zū'usi, la kidibre n ze'ele ba nōa puam yesra. ¹⁸Ti tooro bāma

batã n de bugum, la bug-zũ'usi, la kidibre n ze'ele wiiri la nõa puam yesra la, ku nãrsaalba batã puam woo ayula. ¹⁹Wiiri la ke'ejo boe la ba nõa, la ba zɔa puam. Ba zɔa la ãn wu bõnse'edõma la, ba tarti la zuto bãma ti ba tarti ita nãrba be'em sã'ana ba.

²⁰La nãr-seba n weege ti tooro bãma ka ku ba la, ka teege yem base ban uti sela ti ba mẽja boori la. Ba ken dɔla la kulka'arsi, la baga ti ba dɩke sãlma, la zũuro, la yõgõm, la kuga, la dɔɔɔ mãale, ti ba ka yẽta, ka wõnna, ka tãna senna. ²¹Ba ken ka teege yem base ba nãr-kua, la ba tum tõoma, la ba yalsi tõoma, la ba nayigum na.

10

Maleka n zãli gõn-pɩka n lake

¹Ti mam daan yẽ maleka ayẽma n tarti pãja n ze'ele Nawẽnne yire sigra. Ti sawara pile ẽ wu fuugo ti a ye, dee ti gõmati-tãpɔ kãke a zuugo. A nẽja ãn wu wẽntulle, dee ti a nãma ãna wu bug-zulisi la. ²A zãli la gõn-pɩka n lake a nu'usum. A dɩke a zuvuɔ nã'are tagle la ko-kãte zuo, dee dɩke a gɔbga nã'are tagle tẽja zuo. ³A daan tɔge me ke'enke'em wu gɩgne n kaase la. En daan tɔge la, saaga n tãse nõore buyopɔ. ⁴Saaga la n tãse tɔge la, mam yeti m gulse la ban ye se'em na. La mam wõm na kõa n ze'ele Nawẽnne yire tɔge mam yeti:

< < Suge sela ti saaga tãse buyopɔ tɔge la, da gulse ba. > >

⁵Ti malek-seka ti mam daan yẽ ti a ze ko-kãte la tẽja zuo la, n zẽke a zuvuɔ nu'ugo saazuum, ⁶pɔ la Nawẽnne n boe wakate wuu, n nãam saazuum, la tẽja, la ko-kãte, la sela wuu n boe ba puam na, yeti:

< < La kãn le yuuge. ⁷Maleka buyopɔ dãana la sãn peebe benkonne, Nawẽnne wun ẽje ẽn looge yem ti a ẽje se'em n suge la me, wu ẽn yuvn tɔge la a nõtɔ'ɔsrɩba n de a tõntõnɩba se'em na. > >

⁸Ti kōa la n ze'ele Nawēnne yire tōge ti mam wōm na, le yeke mam yeti: << Sēnɛ ka to'oge gōn-pika la n lake bōna maleka la n ze ko-kāte la tēnɔ zuo la nu'um. >> ⁹Ti mam sēnɛ maleka la zē'am ka yeke ē yeti: << Bɔ mam gōn-pika la. >> Ti a yeke mam yeti: << To'oge ē obe vole. A wun lebge la toogo fu pɔvrum. La fu nōorum, a wun āna yēlum wu seero la. >> ¹⁰Ti mam to'oge gōn-pika la a nu'um obe vole. Ti a āna yēlum wu seero mam nōorum. La mam n vole ē na, a lebge la toogo mam pɔvrum.

¹¹Ti ba yeke mam yeti: << Dēni ti fu le tōge Nawēnne yetoga pa'ale la wun ēnɛ tēnsi zozo'e nērba, la so'olum zozo'e nērba, la yetoga buuri zozo'e nērba, la na'adōma zozo'e se'em. >>

11

Kaset-dōma bayi

¹Ti ba daan bɔ mam mēelɔ n ān wu dibga ti ba tari makra, dee yeke mam yeti: << Isge make Wēnde-kāte* la, la kāabgɔ bimbīnne na, dee kāale nēr-sɛba n pu'ɔsɔ a puam na. ²La base a zēnzaka la, da make ē, se'ere n soe la, ba dɛke ē bɔ la bu-zānɔ* la, ba wun nē Nawēnne tēnɔ la mɛ wōrsɔ pinaasɔ la ayi sā'am. >>

³<< Mam wun tōm na nērba bayi n wun ze'ele mam poorum tōge mam yelle. Ba wun ye la bɔra futo to'ose mam yetoga tōge bɔ nērba dabsa tusre la kɔbsyi la pisyoobi. >>

⁴Nēr-bāma bayi de la Oliivi* tustɔ bayi, dee ken dɛna fitladōma bayi n ze dūnia wuu Zuudāana nēnɔm na. ⁵Nēra sān ɛera ti a ēnɛ ba be'em, bugum n ze'eti ba nōa puam dita ba be'ɛba la. Asira, nēr-sɛka n eeri ti a ēnɛ ba be'em, dēni ti a ki bela. ⁶Ba tari la ke'ɛnɔ wun yōke saaga ti a ka niira wakat-sɛba wuu ti ba to'osɔ Nawēnne yetoga tōgra

bɔ'ɔra nērba la. La ba ken tara ke'eño mɛ wun boti ko'om lebge zum, dee ken tara ke'eño wun boti tooro buuri wuu paage dūnia nērba wakat-sɛka wuu ti ba boori.

⁷Ba sãn wa tɔge yetɔga la ba'asɛ, dũɲa n wun ze'ele bog-ko'ogo la puam yese zɛbɛ la ba, yãɲɛ ku ba. ⁸Ti ba kũm na wun gã peelem nēɲam tēn-kãtɛ la puam. Bilam ti ba daan ka ba Zuudãana dɔ-puurɲa* zuo. Tēɲa la yv'vɛ n pa'alɛ ěn ãn se'em de la Sodom*, la Ezipti*. ⁹Tēnsɪ wuu nērba, la buuri wuu nērba, la yetɔga buuri wuu nērba, la so'olum wuu nērba wun bɪsra ba kũm na la dabsa atã la pusuka, dee kãn sake ti ba dɪkɛ ba kũm na laage. ¹⁰Dūnia nērba sũure wun ěɲɛ yēlum mɛ, ban yē ti nērba bayi la ki la ĩyã. Ti ba wun ěɲɛ sũ-yēlga de'em, bɔ taaba bɔ'a, se'ere n soe la, nɔtɔ'ɔsrɪba bayi la nãmse nērba dūnia mɛ. ¹¹La dabsa atã la pusuka la poorum, vo'osum n bɔ'ɔri vɔm n wun ze'ele Nawēnne zē'am wa'am wa kē ba puam, ti ba vo'oge isge. Ti dabeem zozo'e wun yōkɛ seba n yē ba la. ¹²La nɔtɔ'ɔsrɪba bayi la wun wōm na kōa n ze'ele Nawēnne yire yele ba yeti: < < Zom-ya wa'am. > > Ti ba kē sawara puam zɔnna wɛ'ɛsa Nawēnne yire, ti bɛ'ɛba la bɪsra ba. ¹³Wakate ěɲa mēɲa, tēɲa n wun mĩim halɪ zozo'e. Ti Zerizalem* tēɲa la zē'esɪ pia puam, zē'a ayɪla wun lui saam. Ti nērba tusa ayopɔɪ ki, tēɲa la n mĩim na ĩyã. Ti dabeem wun yōkɛ nēr-seba n weege la, ti ba bɔ Nawēnne n boe saazuum nã'asgɔ.

¹⁴Toogo buyi dãana tole mɛ. La toogo butã dãana la dee la fēe la a wa'am.

Benkonne buyopɔɪ dãana

¹⁵Ti malɛka buyopɔɪ dãana peebe benkonne, ti kōosɪ ze'ele Nawēnne yire tɔge ke'enke'em yeti:

< < Dũnia so'olum lebge la tōma Zuudāana, la Kriſi* ti a tōm na n
soe, la a na'am na boe la wakate n ka ba'asri. > >

¹⁶Ti kēma piſyi la anaasi la n zĩ ba na'am bĩmbĩna zuto Nawēnne
nēŋam na, vōgle nēnsi tēŋa nā'asra Nawēnne yeti:

¹⁷< < Zuudāana Nawēnne n de ke'eŋo wuu dāana, n daan boe, n
ken bōna la,
tōma pu'usri la fōn fu yel-sōnne, fōn dıke fu ke'eŋo n zo'oge vıgıle
fu na'am na ĩyā.

¹⁸Bu-zāŋſi* wuu nērba sūure isge me,
la læele wā fōn sū-yĩire wakate n paage,
ti fōn wun di seba n ki la sariya,
la fōn wun yo fu tōntōnıba la n de fu nōtɔ'ɔsrıba, la fu nērba la n
nā'asri fōn, ke'endōma la tarımdōma wuu me.

La de la wakate ti fōn wun sā'am nēr-seba n sā'anı dũnia la. > >

¹⁹Ti Wēnde-kāte n boe Nawēnne yire la yo'oge, ti nōor-bĩŋre* daka
la yēta. Ti saaga yāgra, sūnna, tāsra, ti tēŋa mĩim, ti sakuga zozo'e
lui.

12

Pɔka, la puryōŋ-yālma

¹Bōn-bān-kāte n puke saazuum. Pɔka n dıke wēntulle pile wu fuugo
la, ti wōrga bōna a nāma tēŋa, dee ti a vuge mūŋa n tari wōrbie pia
la ayi. ²Pɔka la tari la puvre virgra ti a dōge, wulsra kaasra, dɔka
toogo n tari ē na ĩyā. ³Ti bōn-bānne ayēma puke saazuum: A de la
puryōŋ-yālma n ān kāte dena mōlga, a tari la zuto bayopı, la ula
pia, ti mūnsi vuge a zuto la wuu. ⁴Ti a zuvre kā'ase wōrbie batā pvam
ayıla saazuum lobe base tēŋa zuo. Puryōŋ-yālma la ze la pɔka la n

yeti a dɔge la nɛnam gu'ura ti pɔka la dɔge ti a yɔke a bia la obe. ⁵La pɔka la dɔge la budibla n wun tara kuto dasaare sɔna so'olum buuri wuu. Ti ba ze bia la tari sɛnje Nawɛnne zɛ'am, a na'am bɛmbɛnne na zɛ'am. ⁶Ti pɔka la zoe sɛnje weem, zɛ'e-sɛka ti Nawɛnne mɛasum a iyɔ la, bilam ti ba diise ɛ dabsa tusrɛ la kɔbsyi la pisyooɔi.

⁷Ti zɛbre isge Nawɛnne yire. Ti malekadɔma ke'ema Amisɛti, la a malekadɔma zɛbra la puryɔŋ-yɔlma la, ti puryɔŋ-yɔlma la, la a malegsi mɛ zɛbra la ba. ⁸La ba koje pɔŋa mɛ, ti sore ka le bɔna ti ba bɔna Nawɛnne yire. ⁹Ti ba daan lobe puryɔŋ-yɔlma kɛte la base. Enja n de bɔnsɛla n yuun boe, ti ba wi'ira ɛ ti <<Dɔta>> bu <<Asɛtɛana*>> n pɔ'asri dɔnia nɛrba wuu la. Ba lobe ɛ, la a malegsi base la tɛŋa zuo. ¹⁰Ti mam wɔm kɔa n tɔgrɔ ke'enke'em Nawɛnne yire yeti: <<Nɛnanne wɔ, Nawɛnne fɛare daare paage mɛ, Nawɛnne yɔŋa pa'ale a pɔŋa, la a na'am mɛ, dee pa'ale Krisi* ti a tɔm na ke'ɛŋo, se'ere n soe la, ba dige sɛka n wɔ'ari ti sɔbiisi Nawɛnne zɛ'am wontɛŋa la yu'ɔŋɔ la mɛ. ¹¹La de la Pebila* la zum iyɔ, la ban mɔole Nawɛnne yetɔga la iyɔ, ti ti sɔbiisi la yɔŋe ɛ. Ba ka zoe ti ba wun ku ba. ¹²Bɛla, Nawɛnne yire, la yɔma sɛba wuu n boe mɛ na, ɛŋɛ-ya sɛ-yɛlga. La toogo n wun yɛ tɛŋa, la ko-kɛte, se'ere n soe la, Asɛtɛana sige ya zɛ'am la sɛ-yɛire, ɛn mi ti a wakate deege la fɛe la iyɔ. >>

¹³Puryɔŋ-yɔlma la n yɛ ti ba lobe ɛ base la tɛŋa zuo la, a babsɛ la pɔka la n dɔge bia la. ¹⁴Ti ba bɔ pɔka la sul-kɛte kempagstɛ bayi ti a ɛke sɛnje weem, zɛ'e-sɛka ti ba wun diisra ɛ yuuma atɛ la pusuka la, zɛage la bɔnsɛla la. ¹⁵Ti bɔnsɛla la uke ko'om a nɔorum wu mɔgre la pɔka la poorum ti ba pe'ege ɛ fɔrge. ¹⁶La tɛŋa sɔnje pɔka la mɛ, ya'age nɔore fɔoge ko'om na n ze'ele puryɔŋ-yɔlma la nɔorum na. ¹⁷Ti puryɔŋ-yɔlma la sɛure yɛige la pɔka la, ti a sɛnje ka zɛbra la pɔka la

yusi sɛba n weege ken sakra Nawēnne nōore, dee tɔgra Azezi yelle bɔ'ɔra nērba la. ¹⁸Puryōŋ-yālma la sēŋe ka ze la ko-kāte la nōorum.

13

Dūnsi bayi

¹Bela poorum, mam yē la dūŋa n ze'ele ko-kāte pvam dooge. A tari la ula pia, la zuto bayopɔɪ, ti mūnsi pia vuge a ula la wuu. La yu'ura n pɔ'ɔri Nawēnne yu'ure n gulse a zuto la zuo. ²Dūŋa la ti mam yē la wōn na webaaga. Ti a nā'a-tala āna kāra, tara nā'a-ēesi wu tēŋambōŋa la. Dee ti a nōore āna wu gigne nōore la. Ti puryōŋ-yālma la dɪke a pāŋa, la a na'am bīm̄bīnne, la a ke'eŋo bɔ dūŋa la. ³Dūŋa la zuugo ayula daan pɔglum me, āna wu a ki me na, la a pɔgluŋɔ la daan bɔɪ me. Ti la di'ige dūnia nērba wuu, ti ba dɔla dūŋa la. ⁴Ti nērba wuu nā'asra puryōŋ-yālma la, ēn bɔ dūŋa la a ke'eŋo la iyā. Dee nā'asra dūŋa la yetu: < < Ane n tari ke'eŋo wu dūŋa la? La āne n tā wun zebe la ē le? > >

⁵Ti ba bɔ dūŋa la nōore ti a tɔge tita'alum yetɔga, dee tu Nawēnne. A to'oge ke'eŋo ti a tōm na wōrsɪ pinaasi la ayi. ⁶Ti a pɔse tɔgra pɔ'ɔra Nawēnne dee pɔ'ɔra a yu'ure, la z'e-sɛka ti a boe, la sɛba n boe Nawēnne yire la wuu. ⁷Ti ba bɔ ē nōore ti a zebe la Nawēnne nērba yāŋe ba. Ba bɔ ē ke'eŋo ti a yāŋe la buuri wuu nērba, la tēnsɪ wuu nērba, la yetɔga buuri wuu nērba, la so'olum wuu nērba. ⁸Nērba wuu n boe dūnia zuo wun nā'ase dūŋa la me, sān dagna sɛba yu'ura n gulse Pebila* ti ba daan ku la vɔm gōŋɔ pvam na. Nēr-bāma yu'ura daan pōn gulse vɔm gōŋɔ la pvam na halɪ dūnia pī'iluŋo wakate.

⁹Seka n wōm yetɔga wā, a selse sōŋa sōŋa. ¹⁰Nēr-sɛka n de ba yōke ē sēŋe, ba wun yōke ē sēŋe. Nēr-sɛka n de ba ku ē na su'a, ba wun ku

ē na su'a. Bela, dēni ti Nawēnne nērba tara sū-ke'eño, dee bɔ Nawēnne sira.

¹¹Bela poorum, mam yē la dūŋa ayēma n ze'ele tēŋa puam yese. A tari la ula bayi n wōn na pebila ula, dee tɔgra wu puryōŋ-yālma la.

¹²A tari la pɔspɔsi dūŋa la ke'eño tōnna a nifum. A pērgɛ dūnia nērba wuu mɛ ti ba nā'asra pɔspɔsi dūŋa la n daan pɔglum āna wu a ki mɛ, dee yeege la. ¹³Dūŋa buyi dāana la ēŋɛ la bōn-yālm-kāra, halɪ boti bugum ze'eta saazuum sigra dūnia, nērba nifum. ¹⁴Bōn-yālma la ti a ēŋɛ pɔspɔsi dūŋa la nifum na, boti a pā'ase dūnia nērba mɛ. A yeke ba ti ba māale bōnɔ ti a āna wu dūŋa la ti ba pɔglum na su'a ti a voa la.

¹⁵Ti ba bɔ dūŋa buyi dāana la ke'eño ti a bɔ bōnɔ na ti ba māale ti a āna wu pɔspɔsi dūŋa la vo'osum, ti a tāna tɔgra, dee kv seba wuu n ka nā'asri ē na. ¹⁶La dūŋa la pērgɛ nērba wuu mɛ, tarumdōma la ke'endōma, bōntatba la nasdōma, yamsɪ la burkindōma ti ba dāale ba zuvɔ nu'ugo bu ba diire. ¹⁷Ti nēra nēra ka tāna wun da bu koose sela, a sān ka tara dūŋa la dāalgɔ, a yu'vɛ, bu a yu'vɛ la källe.

¹⁸Dēni ti fu tara yem: Nēr-seka n tari putē'ere, ēŋa n wun tā'age bāŋɛ dūŋa la källe vōore. Se'ere n soe la, källe la vōore de la nērsaala källe. Källe la bie de la 666.

14

Pebila, la seba n boe la ē

¹Ti mam le bise, yē Pebila* la n ze Siyō* tāŋa zuo. Ti nērba tuskɔbga la tuspinaasi la anaasi (144 000) ze a zē'am, ba tari la Pebila la yu'vɛ, la a So yu'vɛ n gulse ba dia zuto. ²Ti mam wōm kōa n ze'ele Nawēnne yire ti a dāmne āna wu ko-kāte dāmne, dee āna wu saaga n tāsri sūnna, dee āna wu kōl-wē'erba n wē'eri ba kōnɔ. ³Nēr-

yu'buɔ. > >

¹²Bela, dēni ti Nawēnne nērba n sakra a nōore dee bɔ Azezi sira la, tara sū-ke'eɲo.

¹³Ti mam wōm kōa n ze'ele saazuum yeke mam yeti: < < Gulse yeti: < Lan pɔse lɛɛle wã, nēr-seba n kiiri Zuudãana doosgo puam na tari zu-yēlga. > Ti Nawēnne Sta yeti: < La de la sira, ba wɔn vo'ose la ba tōon-tooro, ba tōon-sōma la doli ba mɛ. > > >

Dūnia bōnkɔla lagsgɔ

¹⁴Ti mam bisra, yē sawate n de pɛelga, ti nēra n wōn na nērsaala* dayva zɔa a zuo. A vuge la sālma mūɲa, dee tari geego n saase tara nōore a nu'um. ¹⁵Ti maleka ayēma ze'ele Wēnde-kāte la puam yese tɔge la sɛka n zo sawate zuo la ke'enke'em yeti: < < Dike geego la sɛera, ti lagsgɔ wakate paage mɛ, se'ere n soe la, tēɲa zuo bōnkɔla bi mɛ seke lagsgɔ. > > ¹⁶Ti sɛka n zī sawate zuo la dīke a geego la doose tēɲa zuo, se tēɲa bōnkɔla lagse.

¹⁷Ti maleka ayēma ze'ele Wēnde-kāte n boe saazuum na puam yese, tēɲa mē tari la geego n saase tara nōore. ¹⁸Ti maleka ayēma n tari ke'eɲo sɔna bugum ze'ele kāabgɔ bīmbīnne na zē'a yese tɔge ke'enke'em la malek-sɛka n tari geego n tari nōore la yeti: < < Dike fu geego la se viinye* tusi la biɛ n boe tēɲa zuo la. Se'ere n soe la, ba biɛ la bi mɛ. > > ¹⁹Ti maleka la dīke a geego doose tēɲa zuo se viinye tusi la biɛ, dīke ba lobge bōn-kāte ti ba wēkri viinye biɛ a puam n pa'alɪ Nawēnne sū-yīire la puam. ²⁰Ti ba wēke biɛ la wēkre bōnɔ na puam tēɲa la kēnkɛɲa. Ti zum ze'ele wēkre bōnɔ na puam yese pure tēɲa zoe paage kilomētri kɔbstã. Ti wemōa sãn sige ba puam, la de ko'ogo paara la a garēɲɛ.

15

Malekadōma bayopɔi n zālɪ ba'asgɔ tooro, la Pebila yōone

¹Tɪ mam le yē bōn-bānne ayēma saazuum n de yel-kāte n ēgrɪ palēŋa. La de la malekadōma bayopɔi n zālɪ tooro bayopɔi n de ba'asgɔ tooro. Se'ere n soe la, bāma n wun ēŋe tɪ Nawēnne sū-yīire la ba'ase.

²Tɪ mam yē sela n ān wu ko-kāte n yēgrɪ wu bɪsga n gaam na bugum. La mam yē la nēr-seba n zebe yāŋe dūŋa, la a bōnɔ tɪ ba māale, dee ka sake to'oge a yu'vre la källe dāalgɔ la, n ze ko-kāte n yēgrɪ wu bɪsga la nōorum. Ba zālɪ la kōnnɔ tɪ Nawēnne bɔ ba. ³Ba yōonɪ na Nawēnne tōntōnna Amoyisi* yōone, la Pebila* la yōone yetɪ:

< < Zuudāana Nawēnne n de ke'eŋo wuu dāana,
fōn tōoma de la tōon-kāra, la tōon-yālma.

So'olum buuri wuu Naba,

fōn yela la mase me,

la ba de la sira.

⁴Zuudāana, āne n kān zoe fōn, nā'ase fōn yu'vre la?

Se'ere n soe la, fōn mā'a n de pupeelem dāana.

So'olum wuu nērba wun wa'am wa ka dūma nā'ase fɔ,

se'ere n soe la, fōn tōoma n mase la puke me tɪ ba yē. > >

⁵Bela poorum mam bise me, yē tɪ Wēnde-kāte n boe Nawēnne yire la puam deego la yo'oge me. ⁶Tɪ malekadōma bayopɔi la n zālɪ tooro bayopɔi la ze'ele Wēnde-kāte la puam yese, ba ye la fu-pæelsɪ n yēgrɪ, dee dɪke sālma sēbrɪsɪ bobbe ba yō'orɔ. ⁷Tɪ bōn-vɔɔsɪ banaasɪ la ayɪla bɔ malekadōma bayopɔi la sālma laasɪ bayopɔi n pɪre la Nawēnne n vɔa wakate wuu la sū-isgre. ⁸Tɪ Wēnde-kāte la pɪre la bug-zū'usi n

pa'ali Nawēnne na'am pāṅa, la a ke'eṅo. Tɪ nēra nēra ka tāna wun kē
Wēnde-kāte la puam, sān dagna tɪ tooro bayopɔi la tɪ malekadōma
bayopɔi la zālɪ la n ba'ase.

16

Malekadōma ka'age Nawēnne sū-isgre bayopɔi dūnia zuo

¹Tɪ mam wōm kōa n ze'ele Wēnde-kāte la puam tɔgra ke'enke'em la
malekadōma bayopɔi la yetɪ: < < Sēṅe-ya ka ka'age Nawēnne sū-isgre
la n pɪre laasi bayopɔi la base dūnia zuo. > >

²Tɪ pɔspɔsɪ maleka sēṅe ka ka'age a laaga bōnɔ base dūnia zuo. Tɪ
nōrtānke'ε-tɔɔsɪ n dōnnɪ iyā yōge nēr-seba n tarɪ dūṅa la dāalgɔ, dee
nā'asra a bōnɔ na tɪ ba māale la.

³Tɪ maleka buyi dāana ka'age a laaga bōnɔ base ko-kāte puam. Tɪ
ko-kāte la lebge wu nēra n ki zum, tɪ bōn-vɔɔsɪ seba wuu n boe ko-
kāte la puam ki.

⁴Tɪ maleka butā dāana ka'age a laaga bōnɔ base mōga, la kulɪ
ko'om puam, tɪ ko'om na lebge zum. ⁵Tɪ mam wōm maleka n bɪsɪ
ko'om yelle la n yele Nawēnne yetɪ:

< < Fōn de la pupeelem dāana,
fōn daan boe mε, dee ken bɔna.

Fōn di sarɪya se'em na mase mε.

⁶Se'ere n soe la, ba ku la seba
n welge to'ore dena fōn nērba,
la fōn nōtɔ'ɔsrɪba tɪ ba zum yese,
bela tɪ fōn bɔ ba zum tɪ ba yū.

Bela n mase la ba. > >

⁷Tɪ mam wōm kōa n ze'ele kāabgɔ bīm̄bīnne na zē'am yetɪ:

< < Asira, Zuudāana Nawēnne n de ke'eño wuu dāana, fōn
sariyadia la mase me, dena sira. > >

⁸Ti maleka bunaasi dāana ka'age a laaga bōnɔ base wēntulle zuo ti a
yō'oge nērba la a bugum. ⁹Ti tuulg-kāte yō'oge nērba, ti ba tvura
Nawēnne n de ke'eño wuu dāana n tara nōore la tooro bāma la. La ba
ka teege yem base tōon-be'ero nā'ase Nawēnne.

¹⁰Ti maleka bunuu dāana ka'age a laaga bōnɔ base dūŋa la na'am
bīmbīnne na zuo. Ti dūŋa la so'olum wuu lebge lika. Ti toogo base ti
nērba obra ba zulusi, ba iyā n dōnni iyā. ¹¹Nōrtānke'esti la tooro n tari
nērba la iyā, ti ba tvura Nawēnne n boe saazuum na. La ba ka teege
yem base ba tōon-be'ero la.

¹²Ti maleka buyoobi dāana ka'age a laaga bōnɔ base mōg-kāte seka
ti ba wi'iri ti Efrati la puam. Ti a ko'om kēese, lebge sore bo
na'adōma seba n ze'ele wēntulle doore boba la. ¹³Ti mam yē
kulkā'arsi batā n ān wu lonno n ze'ele puryōŋ-yālma la nōorum, la
dūŋa la nōorum, la pōmpɔrŋɔ nōtɔ'osa la nōorum yesra. ¹⁴Ba de la
Asūtāana* kulkā'arsi n uti bōn-yālma. Ba we'esti la dūnia na'adōma
wuu zē'am ti ba lagse ba, ti ba zebe la Nawēnne n de ke'eño wuu
dāana, a dabs-kāte la daare.

¹⁵Ti Zuudāana yeti: < < Bise-ya, mam sēm wu nayiga la. Nēr-seka n
ka gīsri dee ye a futo tari zu-yēlga, bela ti a kān sēnna beele ti nērba
yēta a yānne. > >

¹⁶Ti kulkā'arsi la lagse na'adōma la zē'e-seka ti ba wi'iri la Ebre*
yetoga ti < < Armagedō > > .

¹⁷Ti maleka buyopɔi dāana ka'age a laaga bōnɔ sapebsum puam. Ti
kōa ze'ele na'am bīmbīnne n boe Wēnde-kāte la puam zē'am yeti:
< < La ēŋe ba'ase. > > ¹⁸Ti saaga yāgra, sūnna, tāsra, ti tēŋa mīim
halti zozo'e. Nērsaalba n boe tēŋa zuo teka, tēŋa nān ka mīim be'em

be'em wu bela. ¹⁹Tēṅa la n mīim na, tēn-kāte la pārse la zē'esi batā. Tī dūnia so'olum wuu tēnsi lui. Nawēnne tēege Babilōni* tēn-kāte la yelle me, boti a yū a sū-isgre kāte n ān wu dāam n boe a wanne puam na. ²⁰Tī tēn-seba wuu ti ko'om gilge, la tānsi wuu bōi, ti nēra ka le yēta ba. ²¹Tī sakug-kāra ze'ele saazuum lui nērba zuto. Sakugre ayila tibsıgō paage wu kilo pinaasi. Tī nērba tūvra Nawēnne, sakuga la toogo iyā. Se'ere n soe la, toogo la tari la pāṅa ti la yōsge gāṅe.

17

Pɔg-yalsı dāana n de tēn-kāte yelle

¹Tī malekadōma bayopōi la n daan zālī laasi bayopōi la, ayila wa'am mam zē'am wa yeke mam yeti: < < Wa'am, ti mam wun pa'ale fō pɔg-yalsı dāana n de tēn-kāte n mē lem kulsi zozo'e nōorum na n wun yē sıbgre se'em. ²La de la ēṅa ti dūnia na'adōma tōm yalsı tōoma la ē zozo'e. La dūnia nērba mē tōm na a yalsı tōoma wu dāam ti ba yū buge la. > >

³Tī Nawēnne Sia* bōna la mam, ti maleka la tari mam sēṅe mōom. Tī mam yē pōka n bā dūṅa n de mōlga ti yu'vra n tūvri Nawēnne gulse a iyā wuu. Dūṅa la daan tari la zuto bayopōi, la ula pia. ⁴Pōka la daan ye la fu-mōlga n de gomusga, dee ye nēnnōm lōgrō n de sālma, la kug-sōma buuri ligri n zo'oge. La a zālī la sālma laaga n pure la bōn-be'ero n de a yalsı tōon-dēgrō la. ⁵Yu'vre n daan gulse a dīire zuo, ti ba ka mina a vōore. Yu'vre la de la < < Babilōni* n de tēn-kāte la, a de la dūnia pɔg-yalsı dōma, la tōon-dēgrō wuu ma > >. ⁶La mam yē ti pɔg-ēṅa yū la Nawēnne nērba zum buge, nēr-seba n bō Azezi sira ti ba ku ba la zum.

Mam n yē ē na, la di'ige mam me zozo'e. ⁷Tī maleka la soke mam

yeti: < < Bēm ti la dēna di'ire bɔ fōn? Mam wun tɔge pɔka la, la dūŋa la ti a bā n tari zuto bayopɔi, la ula pia la vōore pa'ale fɔ. ⁸Dūŋa la ti fu yē la, kurum a vɔa mɛ, la a ka le bɔna, la a wun ze'ele la bog-ko'ogo la puam dooge, sēŋe sā'aŋɔ zē'am. La dūnia nēr-seba yu'ura n ka gulse bɔna vɔm gōŋɔ la puam halɔ dūnia pī'iluŋo wakate la sān yē dūŋa la, la wun di'ige ba mɛ, dūŋa la n daan vɔa, ka le wa bɔna, dee le wa bɔna la ūyā.

⁹Dēni ti fu tara yem, la putē'ere. Zuto bayopɔi la de la tānsɔ bayopɔi ti pɔka la zo ba zuto. ¹⁰La ba ken dēna la na'adōma bayopɔi. Banuu bayopɔi la puam na'am ba'ase mɛ, la ayula n boe lɛɛɛ wā, dee ti ayēma nān ka wa'am. La a sān wa wa'am, a wun bɔna la wakate fēe. ¹¹La dūŋa la n daan vɔi dee ka le bɔna la, ēŋa de la naba bunii dāana, la a ken dēna la bayopɔi dōma la puam nēra ayula. La a we'esɔ la sā'aŋɔ zē'a.

¹²Ula pia la ti fu yē la, de la na'adōma pia, la ba nān ka to'oge na'am. La ba wun wa to'oge na'am lagum na dūŋa la di karf-ayula. ¹³Bāma pia la putē'ere de la ayula, ba dɔke ba pāŋa, la ba ke'eŋo la wuu bɔ la dūŋa la. ¹⁴Ba wun zebe la Pebila* la mɛ, la Pebila la wun zebe yāŋe ba mɛ, ēŋa n de zuudāandōma Zuudāana, la na'adōma Naba la ūyā. Pebila la, la nēr-seba ti a wi, looge ba ti ba dēna sira dōma la, n wun zebe yāŋe ba. > >

¹⁵Maleka la le yeke mam yeti: < < Kulsɔ la ti fu yē, ti pɔg-yalsɔ dāana la zī ba nōorum na, de la nēr-kuvuŋɔ, tēnsɔ wuu nērba, la so'olum to'oto'ore, la yetɔga buuri to'oto'ore nērba. ¹⁶Ula pia la ti fu yē la, la dūŋa la wun sise pɔg-yalsɔ dāana la mɛ, wun to'ose sɛla wuu ti a tari la, dee base ē beele. La ba wun obe a nēnnɔ mɛ, dee yō ē na bugum. ¹⁷Se'ere n soe la, Nawēnne n base ti ba putē'era tē'esra ti ba ēŋe ēŋa n boori se'em. Ti ba wun lagum taaba la nōore ayula dɔke ba

na'am ke'eño bɔ dūŋa la, halɪ ka paage wakat-seka tɪ la wun ɛŋɛ wu
Nawēnne yetɔga n ye le se'em na ba'ase. ¹⁸Pɔka la tɪ fu yē la de la tēn-
kātɛ n soe dūnia na'adōma wuu. > >

18

Babilɔni n de tēn-kātɛ la sã'aŋɔ

¹Bela poorum, mam le yē la maleka n ze'ele Nawēnne yire sigra. A
daan tari la ke'eño zozo'e, tɪ a na'am pãŋa peelem nēge dūnia wuu.
²A tɔge la ke'enke'em yetɪ: < < A lui mɛ, a lui mɛ! Babilɔni* n de tēn-
kātɛ la lui mɛ. A lebge la kulkã'arsɪ kē'a zē'a, a de la kulkã'ar-be'esi, la
bōn-ēgla n de bōn-dēgrɔ tɪ nērba sisri soka zē'a. ³So'olum buuri wuu
tōm na a yalsɪ tōoma wu dāam tɪ ba yū la. Tɪ dūnia na'adōma lagum
na ẽ tōm yalsɪ tōoma. Tɪ dūnia leebdōma doose a nēnnōm lɔgrɔ n
zo'oge la poorum yē bōntarsōm, bela tɪ a sã'am. > >

⁴Tɪ mam wōm kōa ayēma n ze'ele saazuum yetɪ: < < M nērba, yese-
ya a puam fōrge, tɪ ya da kãn lagum na ẽ tōm a tōon-be'ero la, tɪ ya
da lagum na ẽ yē tooro seba tɪ a wun yē la. ⁵Se'ere n soe la, a tōon-
be'ero la zo'oge mɛ halɪ paage saazuum. Nawēnne tēri a tōon-be'ero
la wuu yelle mɛ. ⁶Ēŋɛ-ya ẽ wu ɛŋa n ɛŋe baseba se'em na, yɔ-ya ẽ ɛn
ɛŋe se'em na nōore ayi. Pɪre-ya a wanne na la dã-ke'eño nōore ayi bɔ
ẽ, wu ɛn botɪ nērba baseba yū se'em na. ⁷Nãmsɛ-ya ẽ tɪ a yē toogo la
sũ-sã'aŋɔ, wu ɛŋa n nã'asɪ a mēŋa la a nēnnōm lɔgrɔ se'em na: A yetɪ
a mēŋa tɪ: < Mam zĩ dena la pɔg-naba, mam dagɪ pɔkōore, la mam
kãn yē nãmsgɔ, la sũ-sã'aŋɔ. > ⁸Bela ïyã tooro wun wa'am a zuo la
daare ayɪla puam: La de la bã'asɪ n kuvri, la sũ-sã'aŋɔ, la kɔm, la
bugum n wun di ẽ, se'ere n soe la, Zuudãana Nawēnne n di a sariya
la de la ke'eño dãana. > >

⁹Dūnia na'adōma n tōnni yalsi tōon-dēgrɔ la tēn-ēŋa lɛ, dee yēta nēnnōm lɔgrɔ a zē'am na, sān wa yē bugum n laŋɛ tēŋa la dita ti zū'usi gulla, ba wun kella mɛ fabla a yelle. ¹⁰Ban zoti dabeem la a nāmsgɔ la, ba wun zɛ la zāazāare dee yeta yeti: < < Wai, wai! Tēn-kāte la, Babilɔni tēŋa n tari pāŋa la, karf-ayula puam ti fōn yē sɔbgrɛ wāna! > >

¹¹Ti dūnia leebdōma mē wun kella fabla a yelle, nēra nēra n ka le da'ara ba bōn-kɔɔsla la iyā. ¹²Ba bōn-kɔɔsla la de la sālma, la zūuro, la kug-sōma buuri ligri n zo'oge, la tān-sōma, la tān-mōlsi n de gomasga, la tān-saalsi n yēgrɔ, la dɔɔrɔ buuri wuu n tari yūuŋ-yēlga, la lɔg-sɛba ti ba dɩkɛ wɔbgrɔ yēna māale, la lɔg-sɛba ti ba dɩkɛ dɔɔrɔ n tari yōorɔ māale, la lɔg-sɛba ti ba dɩkɛ yōgōm, la kuto, la sālm-kuga māale. ¹³La tusti pɔgrɔ n tari yūuŋo, la bōnɔ n ān wu kakadule, la tɩdare kaam, la miiri, la tɩdare ti ba yō'ori, la dāam, la kaam, la zom, la bōnkɔɔla, la niigi, la piisi, la wiiri, la toto, la halɩ baa nērsaalba.

¹⁴Ba wun yeke tēŋa la yeti: < < Bōn-sɛba wuu ti fu yem boori la fōrge dee base fu mɛ. Fu bōntarsōm, la fu nēnnōm lɔgrɔ la tole mɛ dee base fɔ, ti nēra nēra kān le malɩn yē ba. > >

¹⁵Leebdōma n leebe lɔg-bāma yē bōntarsōm tēn-ēŋa puam na, wun zoe la dabeem la a nāmsgɔ la. Ba wun zɛ la zāazāare kaasra dee fabla ¹⁶yeti: < < Wai, wai! Tēn-kāte la n daan ān wu pɔka n yɛeri fu-sōma, la fu-mōlsi n de gomasga, dee ita nēnnōm la sālma lɔgrɔ, la kug-sōma buuri ligri n zo'oge la. ¹⁷Karf-ayula puam ti a bōntarsōm na wuu dare sā'am. > >

Ōornɔ ke'endōma, la nēr-sɛba n kē'eri ōornɔ sēna sore, la sɛba n tōnni ōornɔ na puam, la nēr-sɛba n kē'eri ōornɔ na ɛera lɛbra la ze la zāazāare, ¹⁸la ban yeti ti bugum diti tēŋa la ti zū'usi gulla la, ba kaasri mɛ yeta ti: < < Tēŋa nān ka boe n de tēn-kāte wu ēna. > >

¹⁹La ba vaari la tēntōnnō pukra ba zuto, kaasra, dee fabla yeti:
< < Wai, wai! Tēn-kāte ēna bōntarsōm īyā ti nēr-seba n tari ōorno
εera ko-kāte la puam lēbra la lebge bōntatba. La karf-ayula puam ti a
bōntarsōm na wuu dare sā'am. > >

²⁰< < Sēba n boe Nawēnne yire, ēņe-ya sū-yēlga sela n paage ē na
īyā. Yāma n welge to'ore dena Nawēnne nērba, a Tōntōniba*, la a
nōtō'ōsrība*, ēņe-ya sū-yēlga. Se'ere n soe la, Nawēnne di tēņa la
sariya sā'am ē me, be'em sēka ti a ēņe ya la īyā. > >

²¹Ti maleka n tari pāņa ōbge kug-kāte n ān wu nēere la lobge ko-
kāte la puam dee yeti: < < Ba wun lobge Babilōni n de tēn-kāte la
base la bela la pāņa, ti ba kān le malun yē ē. ²²Ba kān le wōm kōl-
wē'erba wē'a, la yōonyōoniba yōoma, la wusi, la benkōma peebgo, la
ba kān le yē nēra n tari nu'ugo tōone a puam, la ba kān wōm nēere
dāmne mī. ²³Futla bugum peelem kān le nēege mī. Ba kān le wōm
pōgdire kōa mī. Tēņa la leebdōma daan de la dūnia nērzuto. La tēņa
la tum tōoma pā'ase so'olum buuri wuu nērba me. > >

²⁴La de la Babilōni tēņa la puam ti ba yē Nawēnne nōtō'ōsrība, la
Nawēnne nērba, la nēr-seba ti ba daan ku dūnia wuu la zum.

19

¹Bela poorum, mam wōm na kōa n tōgrī ke'enke'em Nawēnne yire
wu nēr-kuvņō kōosi la yeti:

< < Aleluya! Nā'ase-ya Nawēnne!

Fāare, la nā'asgō, la ke'eņo de la tōma Wēnnaam n soe.

²Ēņa sariyadia la mase me, dena sira.

Se'ere n soe la, a di pōg-tutulga la n daan tōnni yalsi tōoma zozo'e
sā'ana dūnia la sariya me sibge ē, ēn boti a tōntōniba ki
la īyā. > >

³Ti ba le yeti:

< < Aleluya! Nā'ase-ya Nawēnne.

Tēn-kāte la ti bugum laṅe dita la bug-zū'usi zonnı na saazuum
wakate wuu. > >

⁴Ti kēma pisyi la anaası, la bōn-vōosi banaası la ka dūma tēṅa nā'asra
Nawēnne n zı a na'am bīmbīnne zuo la yeti:

< < Amina. Aleluya! Nā'ase-ya Nawēnne. > >

Pebila pōgdire kibsa

⁵Ti kōa ze'ele na'am bīmbīnne na zē'am yeti:

< < Yāma n de Nawēnne tōntōnıba n zoti ē na, tarumdōma, la
ke'endōma, nā'ase-ya ti Nawēnne. > >

⁶Ti mam le wōm kōa n ān wu nēr-kubıṅ zozo'e n tōgrı, dee āna wu
ko-kāte dāmne, dee āna wu saaga n tāsri ke'enke'em yeti:

< < Aleluya! Nā'ase-ya Nawēnne.

Zuudāana Nawēnne n de ke'eṅo dāana la n soe na'am.

⁷Base-ya ti ti ēṅe sū-yēlga sırum nā'ase Nawēnne,
se'ere n soe la,

Pebila* la pōgdire wakate paage me,

ti pōka la mē māasum a mēṅa ba'ase.

⁸Ti ba bō ē fu-sōṅo n yēgrı ka tara dēgrı, ti a ye. > >

Fu-sōṅo la de la Nawēnne nērba tōon-sōma.

⁹Ti maleka la yele mam yeti: < < Gulse yeti: Seba ti ba wi ba ti ba
wa'am wa di Pebila la pōgdire kibsa la tarı zu-yēlga. > > Dee le yeti:

< < Yetōg-bāma de la Nawēnne yetōga sıra sıra. > > ¹⁰Ti mam ka

dūma tēṅa a nēṅam ti m nā'ase ē, ti a yele mam yeti: < < Da ēṅe
bela! Mam mē de la Nawēnne tōntōnna wu fōn, la fu sōbiisi la n sake
sıra ti Azezi pa'ale la. La de la Nawēnne n de fu nā'ase. > >

Sira la ti Azezi puke pa'ale la n bela ti Nawēnne Sia boti a nōtɔ'ɔsrɪba tɔ'ɔsra tɔgra.

We-bā'ara n bā wemō-pɛɛlga

¹¹La mam yē la Nawēnne yire n yo'oge, ti wemō-pɛɛlga bɔna mɪ, ti sɛka n bā ē na yu'ure dena Atētēa, la Sira Dāana. A diti la sarɪya ti la mase, dee zebra zebre ti la mase. ¹²A nini ān wu bugwitung na, dee vuge mūnsi zozo'e a zuum. A tari la yu'ure n gulse ti nēra ka mina ē, sān dagna a mēŋa mā'a. ¹³La a ye la fu-woko n luse zum puam. A yu'ure de la Nawēnne yetɔga. ¹⁴Ti Nawēnne yire zebzebrɪba ye fu-pɛɛlsɪ n ān sōŋa ka tara dēgrɔ, bā wemō-pɛɛlsɪ dɔla ē. ¹⁵Ti sukɔbgɔ n saase tara nōore ze'ele a nōorum yesra. A wun dɪke la su'a la zebe yāŋe so'olum buuri wuu. A wun tara la kuto dasaare sɔna ba. A wun mēre ba la viinye* bie wēkre bōnɔ n pa'ali ke'eŋo dāana Nawēnne sū-isgre la puam. ¹⁶Yu'ure n gulse a fuugo zuo, la a gere zuo yetu:

< <Na'adōma Naba, la zuudāandōma Zuudāana. > >

¹⁷Ti mam yē maleka n ze wēntulle puam n tɔge ke'enke'em yele bōn-ēgla wuu n ēgrɪ saazuum yetu: < <Wa'am-ya wa lagse Nawēnne di-kāte la zē'am. ¹⁸Ya wun di la na'adōma nēnɔ, la ke'endōma, la sudaasi nēnɔ, la wiiri, la wi-bā'arba nēnɔ, la nērba wuu, burkīndōma, la yamsɪ, la ke'endōma, la tarumdōma wuu nēnɔ. > >

¹⁹Ti mam yē dūŋa la, la dūnia na'adōma, la ba zebzebrɪba n lagse taaba ti ba zebe la sɛka n bā wemōa, la a zebzebrɪba la. ²⁰Ti ba yōke dūŋa la, la pōmpɔrŋɔ nōtɔ'ɔsa la n daan ēŋe bōn-yālma dūŋa la nifum pā'ase seba n to'oge dūŋa la dāalgɔ, dee nā'ase a bōnɔ ti ba māale la. Ba lobe dūŋa, la pōmpɔrŋɔ nōtɔ'ɔsa la wuu la vɔɔsɪ base bugum mōgre n diti kidibre puam. ²¹Ti su'a la n ze'ele we-bā'ara la nōorum yesra la, ku seba n weege la. Ti bōn-ēgla wuu di ba nēnɔ na tɪge.

20

Yuuma tusre na'am

¹Bela poorum, mam yē la maleka n ze'ele Nawēnne yire sigra. A zālū la bog-ko'ogo la saafibiire, la zɔrgɔ n ān kāte. ²A yōke la puryōŋ-yālma la n de kurum kurum bōnsela, n de dōta, n de Asūtāana* la lu ē yuuma tusre iyā. ³A lobe ē base la bog-ko'ogo la puam yu, dee bi taase, ti a da le yāŋe pā'ase dūnia so'olum nērba, gu'ura halū ti yuuma tusre la wa paage. Yuuma tusre la poorum, dēni ti ba lorge ē base wakate fēfēe.

⁴Ti mam yē na'am bīmbīna, ti ba bɔ nēr-seba n zī ba zuto la ke'eŋo ti ba di sariya. Ti mam yē nēr-seba ti ba daan wige ba zuto, ban bɔ Azezi sira, dee mōole Nawēnne yetɔga la susi. Nēr-bāma daan ka nā'ase dūŋa la, la a bōnɔ na ti ba māale la, la ba ka to'oge a dāalɔ ba dīa zuto bu ba nu'usi zuto. Ba vo'oge me lagum na Krisi di na'am yuuma tusre la puam. ⁵Ēna de la pɔspɔsi kūm vo'ore. La kūm baseba la ka vo'oge, sān dagna yuuma tusre la n wun wa tole. ⁶Nēr-seba n wun po vo'oge pɔspɔsi kūm vo'ore la, tari zu-yēlga, bāma de la Nawēnne nērba. Kūm buyi dāana la ka tā wun ēŋe ba sela. Bāma n wun dena Nawēnne la Krisi kāabɔ kēma, la ba wun lagum na Krisi di na'am yuuma tusre.

Ba yāŋe Asūtāana

⁷Yuuma tusre la sān wa tole, ba wun yese Asūtāana yu'a zē'a na base me. ⁸Ti a yese pā'ase dūnia so'olum buuri wuu nērba, Gɔɔgi la Magɔɔgi*f4*. A wun lagse ba me ti ba zebe zebre. Ba wun lagse zo'oge wu tēntōnbī'isgo n boe ko-kāte nōorum se'em na. ⁹Ba wun yese me dūnia wuu lagse kaage Nawēnne nērba n boe zē'e-seka, tēn-seka ti

Nawēnne nōŋe la. La bugum n wun ze'ele Nawēnne yire sige di ba.
¹⁰Ti ba wun yōke Asūtāana n pā'asri dūnia nērba la lobe base bugum
mōgre n diti kidibre puam, zē'e-seka ti ba daan pōn lobe dūŋa, la
pōmpɔrŋɔ nōtɔ'ɔsa la. Bilam ba wun nāmsra la wontɛɛŋa la yu'ɔŋɔ
wakate n ka ba'asri.

Nawēnne di ba'asgɔ sariya

¹¹Ti mam le yē na'am bīmbinne kāte n de pɛelga, la seka n zī a zuo.
Ti tēŋa la saazuum zoe fōrge a nēŋam, ti ba ka le yē ba. ¹²Ti mam yē
nēr-seba n ki la, ke'endōma, la tarumdōma n ze na'am bīmbinne na
nēŋam. Ti ba lagse gōnnɔ. La ba lake la gōŋɔ ayēma n de vɔm gōŋɔ.
Ti ba di seba n ki la sariya mase wu ba tōoma n de se'em, wu lan
gulse gōnnɔ na puam se'em na. ¹³Ti ko-kāte base seba n ki a puam na,
ti kūm, la ki'in-tēŋa mē base nēr-seba n ki bɔna ba zē'am na. La ba di
ba wuu sariya mase wu ban tōm se'em na. ¹⁴Ti ba lobe kūm, la ki'in-
tēŋa base bugum mōgre la puam. Bugum mōgre la de la kūm buyi
dāana. ¹⁵Seka yu'ɔre n ka gulse vɔm gōŋɔ la puam, ba wun lobe ē
base la bugum mōgre la puam.

21

Saazuum paalga, la tēn-paalga

¹Ti mam yē saazuum paalga, la tēn-paalga. Pɔspɔsi saazuum, la
pɔspɔsi tēŋa la bɔi mɛ, la ko-kāte mē ka le bɔna. ²La mam yē la
Nawēnne tēŋa n de Zerizalem paalga n ze'ele saazuum Nawēnne
zē'am sigra. A malge mɛ āna sōŋa wu pɔka n ye nēnnōm futo māasum
a mēŋa ti a ele a sira. ³Ti mam wōm kōa n ze'ele na'am bīmbinne na
zē'am tɔge ke'enke'em yeti: < < Nawēnne kē'a zē'am boe la nērsaalba
tēŋasuka. A wun kē'era la ba le, ti ba dena a nērba. Nawēnne mēŋa n

wun bɔna la ba lɛ. ⁴A wun duuse ba nintām wuu. La kūm kān le bɔna, sū-sā'aŋɔ la kaasga, bu toogo kān le bɔna. Yel-kegɪ la wuu tole mɛ. > >

⁵Ti sɛka n zī na'am bīmbīnne zuo la ye le yeti: < < Bise, mam iti sela woo la paalsi. > > Dee ye le mam yeti: < < Gulse wāna, se'ere n soe la, mam yetɔga wā de la sira dee mase ti ba bɔ sira. > >

⁶Dee le ye le mam yeti: < < La ēŋɛ ba'ase mɛ. Mam de la Alfa, la Omega, sela woo pī'iluŋɔ, la ba'asgɔ. Koyūuro n tari sɛka, mam wun bɔ ē ko'om n bulli n bɔ'ɔri vɔm zāŋa ti a yū. ⁷Nēr-sɛka n yāŋɛ, a wun to'oge la bōn-bāma mam zē'am. Mam wun dena a Wēnnaam, ti a mē dena mam bia. ⁸La sān dena dabeto, la seba n ka bɔ sira, la seba n tōnni tōon-dēgrɔ, la nēr-kvɔrba, la yalsi dōma, la seba n tōnni tum tōoma, la seba n nā'asri bōndōma ti ba māale, la pōmpɔrndōma la wuu, bāma zē'a de la bugum mōgre n diti kidibre puam. Bela de la kūm buyi dāana. > >

Zerizalem tēn-paalga

⁹Ti malekadōma bayopɔi la n daan zālɪ laasi bayopɔi n pɪre la tooro bayopɔi n de ba'asgɔ tooro la, ayɪla wa'am wa ye le mam yeti: < < Wa'am ti mam wun pa'ale fu pɔka la n yeti a ele la, Pebila* la pɔga la. > >

¹⁰Ti Nawēnne Sia* bɔna la mam, ti maleka la tari mam zom tān-kāte n wɔge zuo. La a pa'ale mam na Nawēnne tēŋa n de Zerizalem* n ze'ele saazuum Nawēnne zē'am sigra, ¹¹n yēgrɪ la Nawēnne na'am pāŋa. A sōŋa la yēgrɪ wu kug-sōŋɔ n tari yōorɔ, āna wu kugre ti ba wi'iri ti zaspɪ, dee yēgra wu busga ti ba wi'iri kristalɪ. ¹²Tēŋa la tari la lal-kāte n wɔge gilge ē, tara nōa pia la ayi. Ti malekadōma pia la ayi gu'ura nōa la. Israyelɪ* buuri pia la ayi la yu'ura n gulse nōa la zuto.

¹³Nōa batā n boe lalga la dapoore boba, ti batā bōna zvugō boba, ti batā bōna gōbga boba, ti batā bōna zanōa boba. ¹⁴Tēṅa la lalga ēebe la kuga pia la ayi zuto. Tī Azezi n de Pebila la Tōntōntba* pia la ayi la yu'vra gulse kug-bāma zuto.

¹⁵Malek-seka n daan tōge la mam na, tarī la sālma dōgō ti ba tarī makra, ti a make tēṅa la, la a nōa, la a lalga la. ¹⁶Tēṅa la de la tēn-wēkō ti a lalsi banaasi la wuu zōna taaba. Tī maleka la dīke dōgō la make tēṅa la. Tī a yōṅō dena sitaadi tuspia la ayi*f5*. A woglum la a yōṅō, la a saazuum woko zōn na taaba. ¹⁷La a make lalga la me, ti a woglum dena kāntusi kōbga la pinaasi la anaasi. A kāntusi la de la buyla la nērsaala kāntusi.

¹⁸Ba dīke la kug-sōma* yu'vre n de zaspī mē lalga la. La tēṅa la mēṅa de la sālma mēṅa mēṅa n yēgrī āna wu bisga la. ¹⁹Lalga la, ba dīke la kug-sōma buuri to'oto'ore n tarī yōoro ēebe ē, ti a āna sōṅa.

Ēbre la pōspōsi kugre la yu'vre de la zaspī,

ti buyi dāana yu'vre dena safuri,

ti butā dāana dena kalsedvanī,

ti bunaasi dāana dena emerōdī.

²⁰Tī bunuu dāana dena sadonigsi,

ti buyoobi dāana dena sardvanī,

ti buyopōi dāana dena krizoliti,

ti bunii dāana dena berili,

ti buwei dāana dena topaazi,

ti pia dāana dena krizoprazi,

ti pia la ayula dāana dena yasēnti,

ti pia la ayi dāana dena ametisti.

²¹Nōa pia la ayi la kulnsi, ba dīke la kug-sōma buuri n tarī yōoro yu'vre n de perli pia la ayi ēṅe ba. Ba dīke la perli ayula ēṅe nōore

ayıla woo kuliŋa. Tēŋa la palle de la sālma mēŋa mēŋa n yēgru wu
bɪsga la.

²²Mam ka yē Wēndeego tēŋa la puam, se'ere n soe la, Zuudāana
Nawēnne n de ke'eŋo wuu dāana, la Pebila la n boe mī. ²³Tēŋa la ka
boori wēntulle, bu wōrga tɪ ba nēege ē, se'ere n soe la, Nawēnne
na'am pāŋa peelem n nēeri ē, tɪ Pebila la dena a fitla. ²⁴Dūnia
so'olum wuu nērba wun sēnna la a peelem na puam. La dūnia
na'adōma wun tara ba bōntarsōm sēŋe mī. ²⁵Tēŋa la nōa kān malɪn
yu, se'ere n soe la, yu'ʊŋɔ ka boe mī. ²⁶Ba wun tarɪ dūnia so'olum
wuu nā'asgɔ, la ba bōntarsōm sēŋe mī. ²⁷Sela n de bōn-dēgrɔ wuu, bu
nēr-seka woo n tōnnɪ tōn-dēgrɔ, la pōmpɔrndōma kān kē tēŋa la
puam. Nēr-seba yu'ʊra n gulse Pebila la vɔm gōŋɔ la puam mā'a n
wun kē tēŋa la puam.

22

¹Tɪ maleka la pa'ale mam ko'om n bɔ'ɔri vɔm kulaaga. Kulaaga la
yēgru wu bɪsga la. A ze'ele la Nawēnne, la Pebila* na'am bīmbinne na
zē'am ²zɔta tēŋa la puam palle tēŋasuka. Tɪa n bɔ'ɔri vɔm n boe
kulaaga la sakugrɔ bayi la wɔnna biɛ nōore pia la ayi yuune puam. A
wɔnnɪ na nōore ayıla wōrga woo puam. Tɪa la vōorɔ bɔ'ɔri la dūnia
so'olum wuu imā'asum. ³Sela tɪ Nawēnne kā be'em bɔ ē kān le bɔna
tēŋa la puam. Nawēnne, la Pebila la na'am bīmbinne n wun bɔna mī.
Tɪ Nawēnne tōntōnɪba wun nā'asra ē. ⁴La ba wun yē a nēŋa, la a
yu'ʊre wun gulse ba dīa zuto. ⁵Yu'ʊŋɔ kān le bɔna. Nērba kān bɔɔra tɪ
fitla, bu wēntulle nēege peelem, Zuudāana Nawēnne n wun nēege
peelem bɔ ba. La ba wun di la na'am wakate n ka ba'asru.

Azezi lemŋo

⁶Ti maleka la yeke mam yeti: < < Yetɔg-bāna wā wuu de la sira, mase ti ba bɔ sira. La de la Zuudāana Nawēne mēŋa n boti a nōtɔ'ɔsrɪba tɔ'ɔsra a yetɔga tɔgra la, n tōm a maleka ti a wa'am wa pa'ale a tōntōnɪba sela n kān yuuge dee ēŋɛ. > > ⁷Azezi yeti: < < Selse-ya! La kān yuuge dee ti mam wa'am. Seka n sakri gōŋɔ wā yetɔga ti ba to'osri Nawēne zē'am tɔgra la tari zu-yēlga. > >

⁸La de la mam Azā n wōm dee yē bōn-bāma. La mam n wōm dee yē ba la, mam ka la dūma tēŋa maleka la n pa'ale mam bōn-bāma la nēŋam ti m nā'ase ē. ⁹Ti a yeke mam yeti: < < Da ēŋɛ bela, ti mam mē de la tōntōnna wu fōn, la fu sɔbiisi n de nōtɔ'ɔsrɪba, la nēr-seba wuu n sakri gōn-ēna wā yetɔga la. Nawēne n de fu nā'ase. > >

¹⁰A yeke bela dee yeke mam yeti: < < Da sɔge gōŋɔ wā yetɔga ti Nawēne puke pa'ale fu la, se'ere n soe la, wakat-seka ti bōn-bāna wun ēŋɛ la lem mɛ. ¹¹Seka n de tōon-be'ero dāana, a ken tōnna be'em. Seka n de tōon-dēgrɔ dāana, a ken tōnna tōon-dēgrɔ. La seka n uti sela n mase, a ken ita sela n mase. Ti seka n de pupeelem dāana, ken sēŋɛ nēŋa la pupeelem. > >

¹²Azezi yeke yeti: < < Selse-ya! La kān yuuge dee ti mam wa'am. La mam tari la yɔɔɔ sēna ti m yɔ nēra woo mase wu ēn tōm se'em.

¹³Mam de la Alfa, la Omega, pɔspɔsi dāana, la poorum dāana, sela woo pī'iluŋɔ, la ba'asgɔ. > >

¹⁴Seba n peege ba futo tari zu-yēlga. Bāma n wun tara nōore ti ba di vɔm tia la biɛ, la bāma n wun doose tēŋa la nōa kē tēŋa la pvam.

¹⁵La nēr-seba n tōnni tōon-dēgrɔ, la seba n tōnni tum tōoma, la seba n tōnni yalsi tōoma, la nēr-kuurba, la seba n nā'asri bōndōma ti ba māale, la nēr-seba wuu n nōŋɛ pōmpɔrŋɔ dee parna la, wun weege la yēŋa, ba kān kē tēŋa la pvam.

¹⁶< < Mam Azezi n tōm m maleka ti a wa'am wa tɔge bōn-bāma

wuu pa'ale m nērba. Mam de la naba Adavidi* yuŋa, la bewā'are n nēeri. > >

¹⁷Nawēnne Sia, la poka la n māasum a mēŋa ti a ele la yeti:

< < Wa'am! > >

Seka n wōm bela, a mē yeti: < < Wa'am! > > Koyūuro n tarı seka, a wa'am, seka n boori ko'om n bɔ'ɔri vɔm, a wa'am wa to'oge zāŋa.

Ba'asgo yetɔga

¹⁸Nēr-seka woo n wōm Nawēnne yetɔga wā n boe gōŋɔ wā puam, mam Azā kā'anı ē yeti, nēr-seka sān pa'ase sela yetɔga wā puam, Nawēnne wun boti a yē tooro seba n gulse gōŋɔ wā puam na. ¹⁹La nēr-seka sān yese sela gōŋɔ wā yetɔga puam, Nawēnne wun yese a pure ti a kān po di vɔm tia la biε, la a kān kē Nawēnne tēŋa la puam wu lan pa'ale se'em gōŋɔ wā puam na.

²⁰Seka n tɔge yetɔg-bāna bɔ la yeti la de la sira, a yeti: < < Asira, la kān yuuge dee ti mam wa'am. > >

Amina! La dena bela. Zuudāana Azezi, wa'am.

²¹Tı Zuudāana Azezi yel-sōnne bɔna la ya wuu. \f1 3:1 Ba sān tɔgra sust bayopɔ, la pa'alı la Nawēnne Sia pāŋa, la ēn mi sela woo, dee bɔna zē'a woo yelle. \f2 4:5, 5:6 Bıse-ya 3:1 gōn-vōogo la tilum. \f3 5:5-6 Azuda* buuri gıgne de la Azezi. Pebila* la mē de la Azezi. \f4 20:8 Gɔɔgtı la Magɔɔgtı māmısrı la Nawēnne be'eba. \f5 21:16 Sitaadı tuspia la ayi de wu kilomētri tusayi la kɔbsyi. \e